


Irineane tasorensi oquenquetsatacotaqueri

Avincatsarite Jesoquirishito



New Testament in Asháninka (PE:eni:Asháninka)

Irineane tasorentsi oquenquetsatacotaqueri Avincatsarite Jesoquirishito

New Testament in Asháninka (PE:cni:Asháninka)

copyright © 2008 Wycliffe Bible Translators, Inc.

Language: Asháninka

Translation by: Wycliffe Bible Translators, Inc.

Asháninka [cni], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Asháninka

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

166be83d-e31e-5665-b8e5-244a7e211a4c

Contents

ISANQUENARE MATEO	1
ISANQUENARE MARICOSHI	56
ISANQUENARE IROCASHI	89
ISANQUENARE JOA	146
YANTAYETINIRI ITIANCANENI JESOSHI	186
PAVORO ISANQUENATINIRI OROMASATI	234
1 Cor.	254
2 Cor.	274
Gal.	287
PAVORO ISANQUENATINIRI EJESOSATI	295
Flp.	303
Col.	309
1 Ts.	314
2 Ts.	319
I PAVORO ISANQUENATINIRI TIMOTEO	322
2 PAVORO ISANQUENATINIRI TIMOTEO	329
PAVORO ISANQUENATINIRI TITO	333
PAVORO ISANQUENATINIRI JIREMONA	336
ISANQUENAYEETINIRI IJORIORIRINTE	338
ISANQUENATIRI SANTIACO	355
1 ISANQUENATIRI PETERO	361
2 ISANQUENATIRI PETERO	367
1 ISANQUENATIRI JOA	371
2 ISANQUENATIRI JOA	376
3 ISANQUENATIRI JOA	377
ISANQUENATIRI JORASHI	378
IRANTAYETERI JESOQUIRISHITO	380

YORA MATEO ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Isanquenataquero ivajiropee ishanincapeeni Jesoshi.

(Ir. 3.23-38)

¹ Meeca nosanquenajeitempiro ivajiropee icharinepeeni Jesoquirishito. Tempa irio ishanincani Iravirini aisati Avaramani.

² Ari itimini Avarama. Iri itomi iriori: Isaca. Iri itomi iriori Isaca: Jacovo. Iri itomipee iriori Jacovo: Jora aisati irirentipee.

³ Iri itomipee Jora: Jareshi aisati Sara. Iro irinironi Jareshi opajitani Tamara. Iri itomi Jareshi: Eshiromo. Iri itomi Eshiromo: Arama.

⁴ Iri itomi Arama: Aminarava. Iri itomi Aminarava: Naso. Iri itomi Naso: Saramo.

⁵ Iri itomi Saramo: Voso. Iro irinironi Voso opajitani Arava. Iri itomi Voso: Overe. Iro irinironi Overe opajitani Orototo. Iri itomi Overe: Jese.

⁶ (6,17a) Iri itomi Jese: Iraviri, yora pincatsaritatsiri. Ari icarajeitaque iriori 14 shiram-pari.

Impojji itimi itomi Iraviri: Saromo. Iro irinironi Saromo ora yaaveitaniri Oriashi.

⁷ Iri itomi Saromo: Orovoama. Iri itomi Orovoama: Aviashi. Iri itomi Aviashi: Asa.

⁸ Iri itomi Asa: Josavata. Iri itomi Josavata: Jorama. Iri itomi Jorama: Oshiashi.

⁹ Iri itomi Oshiashi: Joatama. Iri itomi Joatama: Acasa. Iri itomi Acasa: Eshequiashi.

¹⁰ Iri itomi Eshequiashi: Manasheshi. Iri itomi Manasheshi: Amo. Iri itomi Amo: Joshiashi.

¹¹ (11,17b) Iri itomi Joshiashi: Jeconiashi, aisati irirentipee. Ari icarajeiti iriori aisati 14 shiram-pari. Itimantari Jeconiashi, yora soraropee poneachari Vavironiaqui yaajeitanaqueri maaroni joriopee anta inampiqui.

¹² Impojji itimi itomi Jeconiashi: Saratiyeri. Iri itomi Saratiyeri: Sorovaveri.

¹³ Iri itomi Sorovaveri: Aviori. Iri itomi Aviori: Eriaquimi. Iri itomi Eriaquimi: Asoro.

¹⁴ Iri itomi Asoro: Saroco. Iri itomi Saroco: Aquimi. Iri itomi Aquimi: Erioro.

¹⁵ Iri itomi Erioro: Erisara. Iri itomi Erisara: Mata. Iri itomi Mata: Jacovo.

¹⁶⁻¹⁷ (16,17c) Iri itomi Jacovo: Jose. Iri Jose ojimetsori Maria, ora irinironi Jesoshi. Ipajitiri aisati Quirishito. Ari icarajeiti maaroni iriori shiram-pari 14.

Itimapaaque Jesoshi.

(Ir. 2.1-7)

¹⁸ Meeca noncamantempi jaoca ocantari itimantacari peerani Jesoshi. Ainiro yora Jose ijinatsori, opajita Maria. Isareacaró irayero, iro cantaincha tequera irineero. Iro cantaincha otsomontetaque: iro otsomontetantacari atasoncaquero Ishire Tasorentsi.

¹⁹ Iro iotantacari Jose otsomontetaque, iquenqueshireaca iriori: "Te oncameetsateji tsinane. Timatsiata oneayetiri. Eiro nairotsi". Iro cantaincha icameetsataque, icoaque incavintsayero Maria, te irininteji iroashiventayero; iquenqueshiretanaca: "Eiro noca-mantajeitiritsi oshanincapee, ishirontimentarocari. Apaniro noncantero irointi: 'Eiro meeca naimpitsi'".

²⁰ Irootaque iquenqueshiretanaqueri, irosati imapocantacari inampire Tasorentsi, in-eamainetaqueri. Icantapaqueri:

—Jose, tempa aviro ishanincani Iravirini, eiro piquenqueshireatsi. Tecatsi onee shiram-pari pijinatsori. Iro otsomontetantacari atasoncaquero Ishire Tasorentsi.

²¹ Coajica ontimeri otomi, pimpajiteri iriori Jesoshi. Iro pimpajitanteariri Jesoshi iroavisacojeiteri antayetirori caari cameetsatatsi.

²² Iro intimanteari iriori omoncaratanteari isanquenatiniri peerani camantantatsiniri Isayashini. Irio Avincatsarite sanquenatacaqueriri. Jero oca icantiniri:

²³ "Coajica otsomontetashitanaquea caari neiri shiram-pari, ontimeri otomi. Impajiy-eeteri Emaneere". Iro Emaneere ocanti aneanequi arori: "Itsipajeitaquee Tasorentsi".

²⁴ Ari itinaanaca Jose, iquemisantaquero icantaqueriri. Ijatashitaquero Maria, icantaquero:

—Ari coajica naasanotempi.

²⁵ Iro cantaincha tequera irineeroji: iro caariquera ineantaro, tequera intimeji otomi. Itimantacari, ipajitaqueri Jesoshi. Impojji quea yaasanotaquero.

2

Ipoqui ioyevetariri impoquiro irineeri Jesoshi.

¹ Ari itimapaaque Jesoshi anta Verequi. Otimi Vere anta Joreaqui. Itimantacari Jesoshi, irio pincatsariventantsiri Eroreshi. Ari yareetapaaca Jerosarequi poneajeitachari pashiniqui quipatsi, anta arejiqui. Iquenapaaque anta iquenapainta catsirincaiteri. Ishiavetari saserotepee, ioyevetari impoquiropee, paitaricapee.

² Isampitapaqueri jerosaresati:

—¿Jaoca yora ivincatsarite joriopee, yora iroaquera timaintsiri? Noneaqueri anta nonampiqui impoquiro iotacaanari itimaque. Meeca nopoqui nompincatsateri.

³ Iquemantacari yora pincatsari Eroreshi, iquenqueshireanaca, aisati iquempejeitaca maaroni jerosaresati.

⁴ Impoiiji yora Eroreshi icajemacantaajeitaqueri maaroni jivatacaajeitaqueriri saserotepee aisati maaroni yora oametantajeitirori sanquenarentsi. Isampijeitaqueri:

—¿Paíta ocantiri Sanquenarentsi? ¿Jaoca intimapeeri yora Quirishitotatsiri?

⁵ Yacajeitanaqueri:

—Ocanti Sanquenarentsi intimapaaque Verequi, aca Joreaqui. Irootaque isanquenatacotitacariniri peerani yora quenquetsatacantatsiniri pajitachaniri Miqueashi:

⁶ “Otimi Vere anta Joreaqui. Eiro itseencajeitirotsi ora nampitsi. Tempa imponeaquea anta Pincatsarisanori. Impincatsariventajeiteri maaroni joriopee”.

⁷ Impoiiji imanaquero Eroreshi icajemacantaqueri yora coatsiri irineeri Jesoshi. Isampijeitaqueri:

—¿Jaoca ocaratiri pineantacari impoquiro piotantacari itimapaaque pincatsari? Pincamantasanotena niotasanotantearori itimantacari.

⁸ Ari icamantaqueri. Impoiiji icantaqueri aisati:

—Cameetsa pijajeite meeca Verequi, pamenaiteri jaocarica isavicasanotaqueri yora jananequi. Ariorica pineapaaqueri, pimpocaje aisati aca, pincamantapeena. Nocoaque noneeri narori, nompincatsatanteariri.

⁹ Ari ijajeitanaque. Nianqui ineajiri aisati impoquiro ineaqueri chapinqui anta iponeacanta. Ijivatanaqueri impoquiro anta itimaquenta jananequi, impoiiji yaratincaapaaque anta, iojeitantapaacarori ivanco.

¹⁰ Iquimoshireimentasanotacari impoquiro iotacaajeitaqueriri.

¹¹ Impoiiji ijatanaque pancotsiquinta, iqueapaaque. Ineapaaqueri Jesoshi, aisati iriniro. Itiyoashitapaacari Jesoshi, ipincatsatapaqueri. Impoiiji itatareapaajiro itsivoote, yaa-jiro ashirotsiri pajitachari oro. Opinatasanotaca. Aisati yaajiro casancayetsiri, ipajeitapaqueri.

¹² Impoiiji imaaajeitanaque irioripee. Ineamainetaqueri Tasorentsi, icantaqueri:

—Eiro pipianajatsi anta Eroreshiqui; ariorica pimplanaje piipatsitequi, pinquenanaaje pashiniqui avotsi.

Ishiajeitanaca Ejipitoqui Jose, jero Maria; yaanaqueri Jesoshi.

¹³ Ari ipiajeitanaja yora iovetariri impoquiropee. Impoiiji aisati yora Jose ineamainetaqueri inampire Avincatsarite. Icantapaqueri:

—Meeca pijajeite: avirori, yora jananequi, aisati iriniro. Pishiajeitanaque Ejipitoqui. Pisavicajeitapaaque anta irosati noncantantempiri. Irotaintsi incoayeteri Eroreshi yora jananequi. Icoaque iroyeri.

¹⁴ Irosati ijajeitantanaca, nianquiitenti tsiteniri. Yaanaqueri jananequi anta Ejipitoqui, itsipatanacaro iriniro.

¹⁵ Ari osamanitanaque isavicajeitapaaque anta. Impoiiji icamaque Eroreshi. Iquemacotaqueri icamaque, irosati ipiajeitanta anta iipatsitequi. Irootaque peerani isanquenatacotaqueniri oca yora quenquetsatacantatsiniri pajitachari Oseashi. Iriotaque Avincatsarite sanquenataciriri. Isanquenatini: “Icanti Tasorentsi: ‘Intimavetea notomi anta Ejipitoqui, noncajemajeri impiaje aisati’ ”.

Yora Eroreshi yoacantaqueri jananequipee.

¹⁶ Impoiiji ionirotnaque Eroreshi yamatavitaqueri yora iovetariri impoquiropee: te impiajeji aisati. Ari iquisasanotanaca, itiancaqueri soraropee, icantiri:

—Pijajeite anta Verequi, poajeiteri maaroni jananequipee, pintsoncajeiteri maaroni shirampari: iroaquera timayetatsiri, maaroni; aisati poajeiteri moncaratainchari apite irosarintsite, maaroni.

Ja, icantaqueri chapinqui yoranqui tequera irimoncarateroji Jesoshi apite irosarintsite.

¹⁷ Aisati isanquenatacotaqueroni oca yora quenquetsatacantatsiniri pajitachaniri Jeremiashi:

¹⁸ “Oncajemacotasanteri aramasato otomipee, oshequi iracojeiteri. Ompajitea Araquere iraacoterineri otomipee. Iro oashiretanteari iroteetero otomipee, maaroni”.

Ipijanaja Jose Nasaretequi, yaanajiri Jesoshi aisati iriniro.

¹⁹ Ari impoiji icamaque Eroreshi, ainiroquera isaviqui Jose iriori anta Ejipitoqui. Impoiji ineamainetajiri aisati inampire Avincatsarite, icantaqueri:

²⁰ —Tsame pimpianaje anta piipatsitequi, paanajeri jananequica aisati iriniro. Camaque meeca coavetachari iroyerime.

Ari ipajijeitirori iipatsite Jose iipatsiteni Ishiraerini.

²¹ Ari ijatanaji, yaajeitanajiri anta iipatsitequi.

²² Iro cantaincha yareetantajari Jose, icamanteetiri:

—Irio pincatsariventajeitiriri meeca joreasati yora Arequerao. Ipojeetajari iririni: yora Eroreshini.

Ari aisati itsaroacaapaacari Jose yora pincatsaritajantsiri, aisati ineamainetaqueri Tasorentsi, icantiri:

—Paamayeariyea yora Arequerao.

Irosati yovaantanaja Jose anta Carireaquei.

²³ Yareetapaaca, isavicapaaque nampitsiqui pajitachari Nasarete. Irootaque omoncartantacari isanquenatacotiteetacarini Jesoshi: “Imponeaquea Quirishito Nasaretequi”.

3

Yora Joa vaotisantantsiri iquenquetsatacantapiniti anta caaraiteriqui.

(Mr. 1.1-8; Ir. 3.1-18; Joa 1.19-28)

¹ Ari impoiji ijataque Joa, yora vaotisantantsiri ora caaraiteriqui: ora carireaquiniri. Iquenquetsatacaapinitiri ishaninca,

² icantapinitiri:

—Pinquencheshirejeitanaquea, eiro piquempejeitajatsi peerani: paventajeiteari meeca Tasorentsi, irotaintsi impincatsariventajeitee.

³ Ari peerani iquenquetsatacotaquerini Joa yora quenquetsatacaantatsiniri pajiveitachaniri Isayashi. Jero oca isanquenatacotaqueriniri Joa: “Coajica inquenquetsatacaajeiteri ishaninca anta caaraiteriqui, incanteri: ‘Paamayeariyea Avincatsarite, pincameetsatanaque paacameetsatavacaajeitanteari’”.

⁴ Irio iquitsaatari Joa tijachari iviti cameyo. Irio ishiticatsaquitari meshinantsitsa. Yoapinitari quentori aisati irapinitiri ija pitsi.

⁵ Ijatashjeitaqueri maaroni jerosaresati iquemisantajeitavaqueri, aisati maaroni joreasati aisati maaroni savicajeitatsiri Joriraniqui.

⁶ Icantajeitapaqueri:

—Ainiro nantayetiri caari cameetsatatsi. Nocoaque incavintsayena Tasorentsi, iroav-isacotajena.

Impoiji ivaotisajeitavaqueri Joa Joriraniqui.

⁷ Aisati ipocajeivetaca variseopee aisati saroseopee, icoajeivetaca irivaotisajeiteame, iro cantaincha iquisatsatavaqueri Joa. Icantavaqueri:

—Te pincameetsajeitejive, quempejeitaquempi maranque. ¿Pijitashjeivetampa eiro yoasanquejeitimpitsi Tasorentsi?

⁸ Picoajeitaquerica novaotisajeitempi, ari cameetsa pisavicajeite niotanteari pojocasanotaquero caari cameetsatatsi pantapinijeitiri.

⁹ Picantajeivetaca: “Narojeitaque ishanincani Avaramani, aitaque irineacameetsataquena Tasorentsi”. Pamatavitaja avisati. Incoaquericame Tasorentsi, impeajerome oca mapi ishanincani Avaramani, iro cantaincha eiro ojatitsi inquitequi. Aisati piquempejeitaca avirori: patsipetashjeitacaro pishanincavetacari Avaramani.

¹⁰ Tempa achaquitapinitiro inchatopee caari timatsi oitsoqui, impoiji atajeitajiro. Aisati inquempetea Tasorentsi, irotaintsi iroasanquejeiteri maaroni caari antiniri icoacajeivetariri.

¹¹ Ariorica niotaque yojocajeitiro atiripee caari cameetsatatsi yantajeitaqueri, novaotisajeitaqueri nijaqui. Iro cantaincha timatsi impoitapeenaneri: intiancajeiteneri iriori quemisantajeiterineri Ishire Tasorentsi, irinti tseencantatsiri iroasanquejeiteri. Oshequi ipincatsaritaque irinti impoitenaneri. Oshequi nopincatsataqueri; notseencaja narori catsini.

¹² Ariorica aviitero aroso, impoiji antincaiquitero. Otaqui antayero, irointi oitsoqui anquempoyejero onantariqui. Aisati inquempetea Avincatsarite, irinashitacaajeitajeari atiripee: incavintsayeri quemisantajeiterineri, irintiquea caari cameetsatatsine irojocajeri paamariqui, ora caari tsivacanetatsi.

*Ivaotisataca Jesoshi.**(Mr. 1.9-11; Ir. 3.21-22; Joa 1.31-34)*

¹³ Impoiji ijataque Jesoshi Joriraniqui, iponeanaca Carireaquei. Ijatashitaqueri Joa, irivaotisantavaqueariri.

¹⁴ Te incoaveteaji Joa irivaotisateri, icantavaqueri:

–Eiro novaotisatimpitsi avinti. Aviroquea vaotisapeenane avinti. ¿Paita picoantari novaotisatavaquempi avirori? Oshequi pipincatsaritaque.

¹⁵ Yacanaqueri Jesoshi:

–Nocoasanotaque pivaotisatavaquena. Irootaque icoacaaquenari Tasorentsi.

Icantaqueri:

–Ari, novaotisatavaquempi.

¹⁶ Ari ivaotisataqueri, impoiji yaatanaji. Impoiji iriori Jesoshi, ineavaquero Ishire Tasorentsi, oponeaca inquitequi, aniireashitapaqueri, oshiavetapaacari sampaquiti. Aatapaqueri.

¹⁷ Impoiji iquemajeitaqueri Tasorentsi anta inquitequi, icanti:

–Iriotaque yoca notomi nonintasanotaqueri. Oshequi noveshireimentacari.

4*Yora camaari icoavetaca irantacayerime Jesoshi caari cameetsatatsi.**(Mr. 1.12-13; Ir. 4.1-3)*

¹ Impoiji Ishire Tasorentsi aanaqueri Jesoshi anta ocaraitapai. Aitaque ocaqueri irineantaveteari camaari. Icoavetaca camaari irantacayerime Jesoshi caari cameetsatatsi.

² Ari itimaque Jesoshi anta ocarataque 40 quitaiteri, te iroyeaji catsini. Aasanotaqueri itashe.

³ Impoiji yora camaari ijatashitaqueri Jesoshi, irineantapempariri. Icantavetapaacari: –Avirosanotaquerica Itomi Tasorentsi, jentsite, pimpeero mapica pitantane, poantearori.

⁴ Yacanaqueri Jesoshi:

–Te apaniro oncoiteimotee atantane, irointi acoaque anquemisantero maaroni icantavaqueeri Tasorentsi.

⁵ Impoiji yaanaqueri camaari anta Jerosarequi: anta ochoviinaquuitapaque ivanco Tasorentsi.

⁶ Icantavetacari:

–Avirorica Itomi Tasorentsi, pisapocanaque oshaavijinta quipatsiqui. Pinquenqueshireero ocantiri Sanquenarentsi: “Intianquempiri Tasorentsi inampire inquem-poyempi. Irancatsatavajempi eiro pipariantatsi mapiqui”.

⁷ Yacanaqueri:

–Aisati ocanti Sanquenarentsi: “Eiro pineantaritsi Pivincatsarite, tempa irio Tasorentsi”.

⁸ Aisati yapiivetajari camaari, yaanajiri antearoqui toncaari. Ijicotapainiri maaroni quipatsi, icantavetari:

–Pineajeitaqueri maaroni savicajeitatsiri, aisati tempa ocameetsajeitaque maaroni imajeitaqueri.

⁹ Ariorica pimpincatsatena narori, noncamantajeiteri maaroni impincatsajeitempi avirori.

¹⁰ Yacanaqueri aisati:

–Pijanirotaje. Avironiro Satanashi. Tempa ocanti Sanquenarentsi: “Pimpincatsatasanteri Avincatsarite, tempa iriotaque Tasorentsi. Apaniro irinti catsini pinquemisanteri”.

¹¹ Irosati ijatantanaja camaari. Impoiji ipocaque inampirepee Tasorentsi, intacojeitacari.

*Ijataque Jesoshi Carireaquei.**(Mr. 1.14-15; Ir. 4.14-15)*

¹² Impoiji iquemaque Jesoshi yoyeetaqueri Joa caravosoqui, irosati ipiantanaja Carireaquei.

¹³ Iro cantaincha te irisavicapeeji Nasaretequi, ainti ijataque Caperenaquui, isavicapaaque anta. Otimi Caperenaquui anta otsapijaquui antearoja incajare. Otimi quempeji Savorono aisati Nejatari.

¹⁴ Aisati isanquenatacotaqueroni oca yora Isayashini peerani:

¹⁵ “Otimi Savorono aisati Nejatari otsapijaquui incajare, anta Joriraniqui intatiquero, anta Carireaquei. Anta itiminta oshequi itsipapee atiri, caari inajeiti jorio.

¹⁶ Oquempetimojeivetacari itimini tsiteniriqui, te iriojeiveitearini Tasorentsi. Irija-jeiteme Sharincaveniqui, iro cantaincha meeca oquempetaca itimi quitaitetacojeitiriri, iotacaajeitiriri”.

¹⁷ Ari intanacarori Jesoshi iquenquetsatacaajeitaqueri atiri anta, icantajeitaqueri: –Pinquenqeshirejeitanaquea, eiro piquempetajatsi peerani. Irotaintsi impincatsariventajeitempi Tasorentsi.

Icoyaequeri Jesoshi aparopee iroamere.

(Mr. 1.16-20; Ir. 5.1-11)

¹⁸ Ari ishiteatanaca Jesoshi anta otsapijaqui incajare: ora timatsiri Carireaquei. Ineapaaqueri apite shirampari, yora Shimo Petero, jeri aisati irirenti, yora Antirishi. Irio quitsatapinitiriri shima. Ineapaaqueri Jesoshi, iquitsajeiti,

¹⁹ icantapaaqueri:

–Tsame poijatanaquena. Nocoaque pinquemisantacaapiniteri atiri.

²⁰ Irosati yojocajeitantanacaro iitsarite, yojijaitanaqueri.

²¹ Ari yavishimatanaque irosati ineantapaacari Santiago aisati Joa. Iriojeitaque itomipee Severeo. Isavicajeiti ivitoqui, ishiticajeitiro iitsarite. Icajemapaaqueri Jesoshi,

²² irosati yojijajeitantanacari. Yojocajeitanaqueri iriri apaniro anta ivitoqui.

Iquenquetsatacantayeti Jesoshi anta Carireaquei.

(Mr. 1.39; 3.7-8; Ir. 4.40; 6.17-19)

²³ Iquenaquenayetanaque Jesoshi anta Carireaquei. Maaroni nampitsiqui iquenquetsatacaajeitaqueri atiri anta pancotsiqui yapatotapinijeitanti. Icantiri atiri jaoca icanta Tasorentsi ipincatsariventajeitaquee. Yoavisaacojeitaqueri oshequi mantsiaripee: onashiyetaca aayetiriri imantsiare.

²⁴ Iquemacojeitaqueri Jesoshi yora savicajeitatsiri anta arejiqui: iotacotaqueri maaroni shiriasati. Yaajeitanaqueneri Jesoshi oshequi ishaninca mantsiyatatsiri iroavisacojeit-eri. Yojoquiiyetaca, icatsiyetaque, icamanatapiniyetaque, iquisoporoquiyetaque. Aisati yaanaqueneri neayetiriri camaari. Ari yoavisacojeitavaqueri Jesoshi.

²⁵ Yojijajeitaqueri oshequi carireasati, tecaporishisati, jerosaresati, joreasati, poneayetachari Joriraniqui intatiquero.

5

Iquenquetsataque Jesoshi anta toncaariqui: iquenquetsatacotaqueri quimoshirejeitatsineri.

(Ir. 6.20-26)

¹ Ineajeitaqueri Jesoshi icarajeitaque oshequi apatotimentajeitariri, ari ijataque toncaariqui, isavicapaaque anta. Yora iroamerepee yapatojeitaqueri atiri, maaroni. Icantajeitaqueri ishoncajeitapaacari.

² Impoiji yoamejeitaqueri, icantajeitaqueri:

³ –Inquimoshiretacaajeiteri Tasorentsi maaroni caari shemetatsi, impincatsariventajeit-eri.

⁴ Inquimoshiretacaajeiteri Tasorentsi maaroni oashirejeivetainchari, iroimoshirenca-jeiteri.

⁵ Inquimoshiretacaajeiteri Tasorentsi maaroni ashinoncaincari, incavintsaaajeiteri.

⁶ Inquimoshiretacaajeiteri Tasorentsi maaroni coasanotatsiri intime cameetsa, iramita-cojeiteri.

⁷ Inquimoshiretacaajeiteri Tasorentsi maaroni cavintsaaajeitiriri ishaninca, incav-intsaaanojeiteri iriori.

⁸ Inquimoshiretacaajeiteri Tasorentsi maaroni cameetsashirejeitatsiri, irineajeitajeri.

⁹ Inquimoshiretacaajeiteri Tasorentsi maaroni oimajerentajeitaqueriri quisachari, intomintajeiteari.

¹⁰ Ariorica pincameetsatanaque, irootaque inquisantempiri, ari pinquimoshire-tanaque: aviro savicasanotatsineri anta ipincatsaritinta Tasorentsi.

¹¹ Iriotempirica atiri piquemisantajeitaquena, incantimatempi, inquisaquempi, intsee-y-acotaquempi. Ari pinquimoshirejeitanaque.

¹² Pinquimoshirejeitanaque, piveshireajeitanaquea: impinatasanojeitempi Tasorentsi anta inquitequi. Eiro pipeacotarotsi: tempa peerani iquisheetirini iriori yora camantantatsiniri.

Yora quemisantatsiri ishiaquero tivi aisati tsiomentotsi.

(Mr. 9.50; Ir. 14.34-35)

¹³ Aisati icantajeitaqueri Jesoshi:

—Tempa ativitapinitiri ivatsa eiro ishititantatsi. Irompa terica ompoteate, ontimaite: tempa ari ajocajero, tecatsi coyeroneri. Piquempejeivetacaro tivi: avirojeitaque oameetsajeiterineri atiri.

¹⁴ Ariorica otimi nampitsi anta toncaariqui, otsiota maaroni pancotsipee tsiteniriqui. Tecatsi ancantero nampitsi amanero, tempa oconijatasanoti. Aisati piquempejeitacaro, aviro oamejeiterineri maaroni atiri: eiro pimanirotsi piojeitiri.

¹⁵ Aisati, ariorica pintsiotero pitsiomento, te pimanapiniteroji otapinaqui cantiri. Tempa poapinitiro anta onantariqui yamenajeitantari maaroni savicajeitsiri pancotsiqui.

¹⁶ Aisati aviroripee, cameetsa pisavicajeitanaque irineajeitantempiri maaroni pishanincapee oameetsataque maaroni pantajeitaqueri. Impoiji irineacameetsajeitanteariri Apa savicsisiri inquitequi.

Iquenquetsatacotaquero Jesoshi isanquenareni Moishishini aisati yora quenquetsatacaantatsiniri.

¹⁷ Aisati icantajeitaqueri:

—Eiro pijitashijeitatsi nocoaque nojocacaajempiro piquemisantiro isanquenare Moishishi aisati icantajeitineri yora quenquetsatacaantatsiniri. Iro cantaincha nocoaque noamejeitempiro icantajeitaqueri.

¹⁸ Queariotaque oca noncamantempiri: onsoncajearica quipatsi aisati inquite, iro cantaincha eiro otsonquimatatsi catsini isanquenajeitaqueri. Omoncarataquea maaroni icantaqueri.

¹⁹ Eirorica piquemisantasantiro isanquenatiniri, aisati ariorica poameteri pishaninca eiro iquemisantasantiro, eiro inecameetsatasantimpitsi Tasorentsi anta ipincatsaritinta. Iro cantaincha ariorica pinquemisantasantaquero maaroni isanquenajeitineri, aisati ariorica poamejeiteri pishaninca inquemisantasanojeitero, ari pimpincatsariventasantantapaaje anta ipincatsaritinta Tasorentsi.

²⁰ ¿Pijitashijeitacarimpa icameetsajeitaque yora oametantirori sanquenarentsi aisati yora variseopee? Meeca noncamantempi: te irimoncarajeiteroiji icoacaajeivetariri Tasorentsi. Eirorica panaajeitiritsi pincameetsatasanote, eiro pijatitsi anta ipincatsaritinta Tasorentsi.

*Icantajeitaqueri Jesoshi: “Piquisavacaacariya”.
(Ir. 12.57-59)*

²¹ Aisati icantajeitaqueri:

—Piojeitaquero icantineri yora intacaroniri: “Eiro poanti. Ariorica poante, iroasanquetayempi Tasorentsi”.

²² Iro cantaincha noncamantempi: eiro piquishiritsi pishaninca: yoasanquetaimpicari Tasorentsi. Eiro picantiritsi: “Te pioteji”: iquishimpicari yora oametavacainchari. Eiro picantimatiritsi pishaninca: pitaacari anta Sharincaveniqui.

²³ Pamene, ariorica pijate anta ivancoqui Tasorentsi poaqueneri pivira pimpanteariri; iro cantaincha otimirica iquishimentaquemperi pishaninca,

²⁴ aritsita icantavacsita pivira, pijatashiteri yora quisaquemperi. Pincamanteri: “Eiro napiitajirotsi caari cameetsatatsi. Pincavintsayena aacameetsatavacaajeitantajeari”. Ariorica cameetsa paacameetsatavacaajea, ari pimpianaje ivancoqui Tasorentsi, irosati pimpantapeempariri pivira.

²⁵ Ariorica intime quishempineri aanaquemperineri anta joeshiqui. Ari pishintsite pincantajeri: “Eiro piquisajanatsi, tsame aacameetsatavacaajea aisati”. Ariorica irareetacapaaquempi joeshiqui, incanteri varirira: “Paanaqueri yoca”, impoiji iroiminqueaquempi anta caravosoqui.

²⁶ Impoiji eirorica pipinatasantiro maaroni pirevitiriri, eiro yoimisoquijacantajimpitsi aisati.

*Icantajeitiri Jesoshi: “Paimentarocari pijina; paimentaricari pijime”.
(Mt. 19.9; Mr. 10.2-12; Ir. 16.18)*

²⁷ Aisati icantajeitaqueri:

—Piojeitaquero icantaqueri intacaroniri: “Eiro paimentarotsi pijina, eiro paimentaritsi pijime”.

²⁸ Noncamantempi nainti: ariorica pinevetearo tsinane aisati pinquenqueshiretero pantero, ainiro pantane; aitaque pinquenqueshiretaquea paimentearo pijina.

²⁹ Noshicantempiro: ariorica antacayempi poquisanori caari cameetsatatsi, pinquitsoreero, pojocajero. Te pininteji catsini ojatacayempi Sharincaveniqui. Tempa oameetsati pijanaroquitashitea anta inquitequi.

³⁰ Ariorica antacayempiro pacosanori caari cameetsatatsi, pimpesajero, pojocajero. Te pininteji catsini ojatacayempi Sharincaveniqui. Tempa ocameetsati pijacaraquitana je anta inquitequi. Pineaque, te oncameetsateji catsini pampiitapinitero caari cameetsatatsi.

³¹ Aisati icantaqueni yora intacarori: “Ariorica pincoaque pojocajero pijina, pisanque-natenero paperi pojocantajeorori, ari moncarataca”.

³² Iro cantaincha noncantempi nainti: eiro catsini pojocajirotsi pijina. Ariorica pojocajero pijina, aisati paaje pashini, aitaque paimentaquearo pijinasanori: paavioncaque pijina. Aajerica aisati pijina ontime antane: aimenteari ojimesanori. Aisati yora aajeroneri, ontime irantane. Irointiquea apatiro ocameetsaveta pojocajero ariorica aimentaquempi, tecatsi pashini.

Incanti Jesoshi: “Eiro pamatavitritsi pishaninca catsini”.

³³ Aisati icantaqueri Jesoshi:

—Piojeitaque ocantini Sanquenarentsi. Oametaquerini ashanincani: “Pintseeyarica, eiro picantashitatsi: ‘Ioti Avincatsarite nomoncaratempiro maaroni nocantaquempiri. Ariorica namatavitimpi, iroyenata’. Ariorica pincante: ‘Ioti Avincatsarite nomoncaratero maaroni nocantaqueri’, ari pimoncaratero, maaroni”.

³⁴ Irootaque isanquenatiniri peerani. Iro cantaincha nocantimpi nainti: ¿paita pincanteari pincante: “Ioti Avincatsarite queario oca nocantaqueri”? Ocameetsataque pimonoratasanotaquero maaroni picantaqueri. Eiro aisati picantitsi: “Tempa ocantani otimi inquite, aisati noquempeta narori, nocantani tampatica noneanati”. Noncantempi nainti: iro inquite isavancantari Tasorentsi; iotimpi, ioti queariorica picantaqueri.

³⁵ Aisati eiro picantitsi: “Tempa ocantani otimi quipatsi, aisati narori nocantani tampatica noneanati”. Noncantempi narori: itsoteiro Tasorentsi quipatsi, iotimpi; ioti queariorica picantaqueri. Eiro picantitsi: “Tempa ocantani otimi Jerosare, aisati narori nocantani tampatica noneanati”. Noncantempi: ipincatsariventajetiri Tasorentsi jerosaresati, irootaque pincatsarisanori. Ioti queariorica picantaqueri.

³⁶ Eiro picantitsi: “Eiro notseeyatsi, irosati noncamantaquea, noncanteani tampatica noneanate”. Tempa irio Tasorentsi cantatsine jaocarica oncarate ancame. Pimpincatsateri irinti, irio iotimpiri pitseeyanirica.

³⁷ Eiro pitseeyatsi, eiro pamatavitantitsi. Queariorica pantero paitapeerica, pincante: “Je, nantero”. Eirorica pantirotsi, pincante: “Eiro nantirotsi”. Moncarataca. Te oncameetsateji pishequiyero pineane pamatavitanteariri itsipapee.

Incantiri Jesoshi: “Eiro pipiataritsi quishempineri”.

(Ir. 6.29-30)

³⁸ Jero aisati icantajeitaqueriri Jesoshi:

—Aisati icantaqueni iriori yora intacaroniri: “Ariorica pinquitsoreero iroqui itsipa, ocameetsati impiatacoventajeari inquitsoreitempiro poqui avirori. Ariorica pijireiteri pishaninca iraji, ocameetsati impiatacoventajeari, irijireitempiro paji avirori”.

³⁹ Iro cantaincha noncantempi nainti: eiro pipiataritsi quisajeitaquempiri, irointi ariorica impasavorotempi acaquero, pishineteri aisati otsipa pivoro impasatero aisati.

⁴⁰ Ariorica incoaque atiri iraitempiro piitsaare, pimpavaqueri aisati poicoro.

⁴¹ Ariorica imperanatempi paanajeneri irovaararo aparoni quirometero, poavisayeneri apite quirometero.

⁴² Ariorica incantapeempi pishaninca: “Pimpenaro”, ari pimpavaqueri. Aisati, ariorica incantempi: “Pimpashitavaquenarota oca”, ari pimpashitavaqueari, eiro pitsaneapitsataritsi.

Incantiri Jesoshi: “Pinintajeiteri quisajeitaquempiri, pincavintsaajeteri”.

(Ir. 6.27-36)

⁴³ Aisati icantajeitaqueri:

—Aisati icantaqueni yora intacaroniri: “Pininteri pishanincasanori, pincavintsayeri. Irintiquea quisaquempiri, pinquisavaqueri iriori”.

⁴⁴ Iro cantaincha noncantajeitempi nainti: pinintajeiteri maaroni quisajeitaquempiri, pincavintsayeri, pinceri Tasorentsi incavintsayeri, maaroni.

⁴⁵ Irootaque icoacaajeitaqueriri Tasorentsi maaroni quemisantajeitiriri itomintajeitacari. Tempa iriotaque vetsiquiriri catsirincaiteri: yovoreacojeitaqueri maaroni atiri, cameetsajeitatsiri aisati caari cameetsajeitatsi. Aisati incani, yoariajeitaqueneri maaroni atiri: yora quemisantatsiri aisati caari quemisantatsi.

⁴⁶ Ariorica pincavintsayeri apaniro yora cavintsaimpiri, ¿pijitempi irineacameetsatempi Tasorentsi? Tempa ioti tseencantatsiri icavintsaavaacaajeita iriori.

⁴⁷ Ariorica pincavintsayeri apaniro yora shanincatasanojeitimpiri, ¿paita pishemetanteari? Aitaque iojeiti maaroni caari ioterine Tasorentsi icavintaavacaajeita iriori.

⁴⁸ Pincameetsatasanotaque catsini, pinquempejeitanaqueari Apa Tasorentsi: tempa icameetsatasanotaque irinti catsini.

6

Yoamejeitaquee Jesoshi jaoca ancanteari ancavintsaante.

¹ Aisati icantajeitaqueri Jesoshi:

–Eiro pishiacantanirotatsi piquemisanti, eiro piquemisantamempeatsi pamatavitan-tearirime atiripee. Ariorica irineaquempi Apa Tasorentsi pishiacantaca, eiro inecameeet-satimpitsi iriori.

² Ariorica pimpashiteari ashinoncaincari coiteimojeitariri, eiro picamantajeitiritsi itsipapee. Irootaque yamenirojeitari yora shiacantavetachari iquemisanti. Ariorica ipiri ashinoncaincari paitarica, icamantajeitaqueri quemisantajeititsiri, aisati savicajeitatsiri anta nampitsiqui. Icoaniriojeitaque iriori irineacameetsajeiteri ishaninca. Ariorica irineacameetsaveteari ishaninca, iro cantaincha moncarataca: eiro inecameetsatiritsi iriori Tasorentsi, tecatsi impinateri.

³ Ariorica pincavintsayeri ashinoncaincari, pimanaquero: eiro piotacaajeitiritsi itsipapee.

⁴ Ari iriotaque Tasorentsi irinti, impinatempi irinti.

Yoamejeitaquee Jesoshi jaoca ancanterori anquenquetsatacayeri Tasorentsi.

(Ir: 11.2-4)

⁵ Aisati icantajeitaqueri:

–Ariorica pinquenquetsatacayeri Tasorentsi, eiro piquempetaritsi shiacantavetachari: icoaque iriori incatiye anta yapatojeitanta atiripee, aisati anta nampitsiqui nianqui, irineantaniriojeitavaqueariri ishanincapee. Queario oca noncamantempiri: moncarataca. Ariorica irineacameetsajeiteri ishaninca, iro cantaincha eiro inecameetsatiritsi Tasorentsi.

⁶ Ariorica pinquenquetsatacayeri, pijate apaniro pivancoqui, pashitacotanaquea tsumpoina, impoiji pinquenquetsatacayeri Apa. Irineaquempi apaniro irinti, irineacameeet-satempi, impinatempi.

⁷ Ariorica pinquenquetsatacayeri, eiro pineanatashiveeta, vero, vero, vero. Aitaque yamataro caari iotiri Tasorentsi, ineaveetashita. Ijtashijeiveta ariorica irineanatashiveetea, ari inquemisantaqueri.

⁸ Queariyee, piquempejeitaricari avirori. Iotasanotiro Tasorentsi maaroni coiteimojeitaquempiri. Tequerata pincanteri, iotitacaro coiteimotaquempiri.

⁹ Ariorica pinquenquetsatacayeri Tasorentsi, ari pinquempetaquerori avirori oca:

Apa, savicatsiri inquitequi,

oshequi nopincatsatasanojeitaquempi.

¹⁰ Pimpincatsariventajeitena narori.

Nocoajeitaque aca quipatsiqui nomajeitempiro maaroni pincoacaajeitenari,

nonquempeteari pinampirepee anta jenoqui:

tempa imajeitaquempiro iriori maaroni picoacaajeitaqueriri.

¹¹ Pimpapinijeitena noyee coiteimotaquenari.

¹² Ainiro nantajeitiri caari cameetsayetatsi,

iro cantaincha eiro poasanquetimentanarotsi,

irointi nocoajeitaque pincavintsaajeitena.

Aisati narori noncavintsaajeiteri noshaninca antanajeitenaneri paitapeerica, eiro noquishiritsi iriori.

¹³ Eiro pishinetiritsi yora camaari irineantajeitena, eiro pishinetiritsi irantacaajeitena caari cameetsatatsi.

Pincantaitatiyempani pimpincatsariventajeitena.

Pincantaitatiyempani pintasoncaventajeitena.

Aisati narori, noncanteani nompincatsajeitempi, maaroni.

Irootaque nocantaquempiri, ari.

Icantiri Jesoshi: “Pincavintsaajeiteri itsipapee”.

¹⁴ Aisati icantajeitiri:

–Ariorica pincavintsayeri quisajeitaquempiri, incavintsaajeitempi avirori Apa savicatsiri inquitequi.

¹⁵ Iro cantaincha eiorica picavintsairitsi pishanincapee, eiro icavintsaajeitimpitsi Apa.

Yoamejeitaqueri Jesoshi jaoca incanteari, ariorica intitimenteari Tasorentsi.

¹⁶ Aisati icantajeitiri:

—Aisati, ariorica pintitea pinquenqueshiretanteariri Tasorentsi, eiro piotacaajeitir-itsi itsipapee. Eiro piquempetaritsi yora shiacantachari iquemisanti: ariorica ititapinita, yoashirevorotashitaca iriojeitanteari ishaninca itita. Yatsipetashitacaro, te inquenqueshireteriji Tasorentsi, irointiquea icoaque incavintsaaajeiteri ishaninca. Eiro ipinatiritsi Tasorentsi.

¹⁷ Ariorica pintitimenteari Tasorentsi pinquenqueshiretanteariri, cameetsa pinquishitea, pinquivavorotea aisati,

¹⁸ oncanteata eiro iotanta pishaninca pitita. Apaniro iriotempi irinti Piri jenoquiniri, impinatempi irinti.

Icantiri Jesoshi: “Pimpiotero pivaararo anta inquitequi, pinquenqueshireteri Tasorentsi”.

(Ir. 11.34-36; 12.33-34)

¹⁹ Aisati icantajeitiri Jesoshi:

—Eiro pipiotirotsi pivaararo aca quipatsiquica: opatsaaranticari, aisati icoshiyeetimpicari.

²⁰ Aintiquea pimpiotero pivaararo anta inquitequi: eiro ainti opatsaitsi, aisati eiro ainti icoshiyeetajimpitsi.

²¹ Ariorica ontme pivaararo aca quipatsiqui, pinquenqueshiretapinitero timajeitarsiri aca quipatsiqui; iro cantaincha ontimerica pivaararo inquitequi, pinquenqueshiretapiniteri Tasorentsi.

²² Otimi poqui pamenantari, otimantari piotantari. Oshiaquero tsiomentotsi pitsiotapinitantari tsiteniriqui pineantari. Ariorica ocameetsataque, piojeitanaque,

²³ iro cantaincha eiorica ocameetsati, eiro pamenitsi, eiro piotitsi, pintime tsiteniriqui. Aisati oquempetaca, ariorica pinquenqueshiretapinitero caari cameetsatatsi, eiro piotiritsi Tasorentsi, ainti pintime tsiteniriqui.

Icanti Jesoshi: “Ariorica pantaveetanontea avisati, tecatsi pincantea panteneri Tasorentsi icoacaaquempiri”.

(Ir. 16.13)

²⁴ Pashini aisati icantiriri Jesoshi:

—Tecatsi pincantea pintsameeteneri apite pivatorote, aisati oquempetaca: ariorica panteneri Tasorentsi icoacaaquempiri, irompa ariorica pantaveetanontea avisati paantearori pivaararo. Tecatsi pincantero apite. Pineaquero, ariorica pinintasanoteri Tasorentsi, eiro picoitsi pivionquero pivaararo. Aisati, ariorica pincoaque pivionquero pivaararo, eiro picoitsi pinquemisanteri Tasorentsi.

Icantiri: “Eiro piquenqueshiretatsi, irinti pinquenqueshireteri Tasorentsi”.

(Ir. 12.22-31)

²⁵ Aisati icantajeitiri Jesoshi:

—Meeca noncamantajeitempi: eiro piquenqueshiretapinitero paitapeerica poayeteari, pirayeteri, pinquitsaatapiniteari, paitapeerica. ¿Irompa pitimantari poapinita poari? Te iro pintimantea, tempa iro pitimantari pinquenqueshireteri vetsicanaquempiri. ¿Irompa otimantari pivatsa pinquitsaatero, poaneenquero? Te iro ontimantea. Irointi pitimajeitanta piojeiteri Tasorentsi, aisati panteneri icoacaaquempiri.

²⁶ Pamenajeiteri yora tsimeripee: te impanquitanonteaaji, aisati te irantanonteaaji ivanco irivioncantearori ivanquire. Iro cantaincha ipapinitiri Apa Tasorentsi yoari maaroni quitaiteeriqui. Ari icavintsairi maaroni quitaiteeriqui; tempa avinti icavintsasaanotaquempiri, eiro yoashinoncaimpitsi.

²⁷ Ariorica pinquenqueshirete, ¿arimpa pimatero pishequiajero pisarintsite? Eiro. Patsipetashita piquenqueshiretashita.

²⁸ ¿Paita piquenqueshiretantarori piitsaare, paitarica pinquitsaateari? Pamenajeitero oteapee tojari, te onquenqueshireteaji irointi: “¿Paita nonquitsaateari?” Te onquiriqueji, aisati te ontijeji,

²⁹ iro cantaincha, oshequi oaneencaca. Pamene, peerani oshequi yoaneencaveitani yora pincatsariveitachaniri Saromoni, iro cantaincha te inquempetasanotearoji oteaquipee: oshequi oaneencasanota irointi.

³⁰ Tempa irio Tasorentsi oaneenquirori oteaquipee tojari, iro cantaincha eiro osamanititsi ontme, impoiiji tempa itaapiniyeetiro, pomei. Irompa avinti, pintimajeiteni peerani: tempa iroaneencasanontempi avinti. Pishireteari, eiro pitseenquiritsi.

³¹ Eiro picantashiretitsi, eiro picantitsi: “¿Paita ayeari? ¿Paita ireri? ¿Paita anquitsaateari?”

³² Icoajeitiro ocapee yora tseencajeitantatsiri. Iro cantaincha iojeitimpi Piri jenoquiniri, iojeitiro coiteimojeitaquempiri.

³³ Irioquea pijivate pimpincatsateri, aisati pincanteri iroameetsashiretempi, impoijiquea impapinijeitempiro coiteimojeitaquempiri.

³⁴ Ari eiro piquenqueshiretirotsi osaitequera, paitarica panteri. Irintacotempi osaitequera, aisati maaroni quitaiteriqui. Timatsi aquenqueshiretaqueri meeca quitaiteriqui, te oncameetsateji anquenqueshiretero aisati osaitequera.

7

Incantajeitiri Jesoshi: “Eiro picantimatiritsi itsipapee”.

(Ir. 6.37-42)

¹ Aisati incantajeitiri Jesoshi:

—Eiro picantimatiritsi pishaninca. Ariorica pincantimateri itsipapee, icantimpicari Tasorentsi: “Ainiro pantane avirori”.

² Ariorica anquisaqueri itsipapee, ari inquisavaquee arori; aisati oquempetaca, ariorica ancavintsayeri itsipapee, incavintsayee arori.

³ Otimirica pantayetiri avirori, te oncameetsateji pincanteri pishaninca avirori: “Ainiro pantane”. Jero oca noshiacaventempiri: ariorica pitijaquitaca quimota avinti, ¿arimpa pineaquero itijaquiro pishaninca ovane quipatsi capichaji?

⁴ ¿Ocameetsatimpa pincanteri: “Jentsite, naajempiro pitijaquiro”? Eiro pineirotsi.

⁵ Oshequi picantashitaca. Pijivate pojoquero inchatora jocaaquempirira avirori, impoiji pamenaje paantajejanariri itijaquiro pishaninca. Aisati pincoaquERICA pincanteri pishaninca irojocajero yantayetiri, pijivate pojocajero caari cameetsatsi pantayetiri avirori.

⁶ Te pimpapiniteriji otsiti cameetsatasanotatsiri ivatsa. Aisati te pimpapiniteriji chancha marereatatsiri mapi iroyearo, eiro icoitsi iroyearo. Tempa ari iraticavaquerome, irovitsintavaquerome, impoiji inquisacotaquero iroyeari, irantsiquimentaquempiro. Aisati oquempetaca, ocameetsati irineane Tasorentsi. Ocameetsati pinquenquetsatacyeri itsipapee ashaninca, iro cantaincha ariorica inquishmentempiro, incanteata.

Incantiri Jesoshi: “Te pantsipetashiteaji piquenquetsatacairi Tasorentsi”.

(Ir. 11.9-13)

⁷ Aisati incantiri Jesoshi:

—Ariorica pincanteri Tasorentsi, irimatempiro paitarica pincanteriri. Pincoayetajero paitarica, impoiji pineajero. Ariorica pareetea pancotsiqui, pincantapaqueri savicatsiri: “Pashitareenaro”, ari irashitareaquempiro.

⁸ Aitaque ipapinijeitiri Tasorentsi maaroni coacotiriri. Aisati ariorica pincoayetanaque, iramenacayempiro. Ariorica pincanteri: “Pashitareenaro”, ari irashitareaquempiro.

⁹ Ariorica incantempi pitomi: “Apa, pimpena noyeari”, ¿arimpa pimpaqueri mapi?

¹⁰ Ariorica incantempi: “Pimpena shima noyeya”, ¿arimpa pimperi maranque iroyeari?

¹¹ Pineaquero, te pincameetsatasanojeiteji, iro cantaincha piojeiti picavintsapinitiri pitomipee. Irinti Apa savicatsiri inquitequi icameetsasanaotaque, ioti irinti catsini incavintaajeitaqueri maaroni quenquetsatacaajeitiri.

Incantajeitiri Jesoshi: “Pincavintaavacaajeitea”.

(Ir. 6.31; 6.43-46)

¹² Aisati incantajeitiri:

—Ariorica pincoaque incavintaajeitempi pishanincapee, ari pincavintaajeiteri avirori. PincoaquERICAME iroashinoncaajeitempime, ari poashinoncaajeiterime avirori. Irootaque isanquenatiniri yora Moishishini aisati maaroni camantantatsiniri.

Iquenquetsatacotiro Jesoshi apite avotsi.

(Ir. 13.24)

¹³ Jero aisati ishiacantiniri Jesoshi:

—PincoaquERICA pinqueapaaquero ivanco Tasorentsi, pinqueapaaquero orijani omoro. Ainiro pashini avotsi, antearo irointi, te ompomerentsiteaji anquenantearo, aisati anta ocaratapainta otimi omoro antearo. Iro cantaincha maaroni quenayetanaintsine anta irashinoncaajeitea anta Sharincaveniqui. Icarajeiti iriori oshequi.

¹⁴ Iro cantaincha timatsi ora orijani avotsi, aisati orijani omoro. Oshequi opomerentsitaca irointi, itimi aparopee quenantarori. Iro cantaincha irareetea irinti Tasorentsiqi, incantaitiyempani intime irioriqui.

Iquenquetsatacotiri Jesoshi amatavitantatsiri.

(*Ir. 6.43-44*)

¹⁵ Aisati icantajeitiri Jesoshi:

—Queariompia, yamatavijeitimpicari shiavetariri quenquetsatacotiriri Tasorentsi. Pishiacantiricari ovisha, pijiticari tecatsi incantempi; iro cantaincha noquempetacantaqueri nainti maniti: oshequi icovencatsi.

¹⁶ Pamenasanoteri yantayetiri, piotanteariri icameetsatirica. ¿Otimantarompa tojari ova? Teve, te ontimantearoji. ¿Otimantarompa iyera? Aisati te omateroji. Aisati iquempjeita yora amatavitantatsiri: tecatsi incantero irimatero cameetsayetatsiri.

¹⁷ Inchato cameetsari otimi oitsoqui cameetsari, ari avaquearo. Iro cantaincha terica oncameetsateji inchato, te ontimeji oitsoqui cameetsari.

¹⁸ Ora inchato cameetsari, tecatsi oncantero ontimero oitsoqui caari cameetsatsi. Aisati caari cameetsatsi inchato, tecatsi oncantero ontimero cameetsatsiri oitsoqui.

¹⁹ Tempa achaquitapinitiro inchato caari oitsoquitatsi, ataaapinitiro.

²⁰ Aisati piojeiteri maaroni coatsiri iroamejeitempi. Piotaque ocameetsatirica yantayetiri, ari cameetsa aisati yoametantiro irineane Tasorentsi. Irompa terica oncameetsateji yantayetiri, te oncameetsateji aisati yoametanti.

Jaoca icantari iotasantotiriri Jesoshi.

(*Ir. 6.47-49; 13.25-27*)

²¹ Pashini aisati icantiriri Jesoshi:

—Ainiro inaveta oshequi cantashitanari: “Aviro novincatsarite, oshequi nopincatsatimpi”. Iro cantaincha eiro ijajeititsi iriori anta nompincatsaritentia. Irinti jatasantatsineri anta inquitequi maaroni yora antasanotiniriri Apa icoacaajeitaqueriri.

²² Ariorica nompincatsaritanotanaque nampatojeiteri maaroni atiri noncantacoventajeitanteariri. Intime oshequi cantashitenaneri: “Novincatsarite, oshequi noquenquetsatacotaquempi. Nocantaqueri neiriri camaari: ‘Paventeari Jesoshi pavisacotantajeari’. Aisati nocantaqueri noshaninca: ‘Irio Jesoshi matacaanarori notasoncantayeti’”.

²³ Iro cantaincha noncanteri narori: “Te niotempiji, te noshanincatempiji. Tsame pijate arejiqui, oshequi pantayetiro caari cameetsatsi”.

²⁴ Pamene, ariorica pinqueshiretero maaroni nocantaquempiri, aisati ariorica pantenaro maaroni nocoacaquempiri, ocameetsati. Ontime piotanteari, pinquempeteari vetsiquirori ivanco mapiqui.

²⁵ Opariaque incani, ooncanaca. Aisati otimi antearo tampea otatsincavetanacaro, iro cantaincha te aaveeroji. Iro caari aaveantaro, yovetsiquiro mapiqui, oquisotasantaque.

²⁶ Aisati oquempetaca avirori, eiorica piqueshiretiro maaroni nocantaquempiri, aisati eiorica pantanaro maaroni nocoacaavetimpiri, te oncameetsateji. Eiro otimitsi piotanteari. Pinquempeteari vetsiquirori ivanco anta impanequiqui.

²⁷ Opariaque incani, ooncanaca. Aisati otimi antearo tampea, otatsincanaquero. Ojaraaquero, jaran; otsoncanaquero, aanaquero, poyere. Tempa yatsipetashitacaro yora vetsicavetarori. Eiro patsipetashitarotsi avirorijeji piquemajeitaquena, irointi pantasanotero nocoacaajeitaquempiri.

Yovecarataquero Jesoshi iquenquetsatacaajeitiri apatotimentajeitariri.

(*Mr. 1.22*)

²⁸ Irootaque icantajeitaqueriri apatotimentajeitariri anta toncaariqui, ari yoajeitanakeri cavaco maaroni. Icantajeiti:

²⁹ —Oshequi ioti irinti, oshequi ipincasariti, cameetsa yoamejeitaquee; te inquempeteariji yora oametantavetarori Sanquenarentsi.

8

Yoavisacotiri Jesoshi patsaatsiri.

(*Mr. 1.40-45; Ir. 5.12-16*)

¹ Ari iquenquetsatacanti Jesoshi anta toncaariqui, impoiji yoirincapaaja, yojajeitaqueri oshequi atiri.

² Ari ijatashitaqueri aparoni shirampari patsaatsiri, itonquiotavacari, icantavaqueri: —Novincatsarite, pincoaquericapavisacotajena, niotaque aitaque pimatajenaro.

³ Ari yacotanaque, ipamitaqueri, icantiri:

—Aitaque nocoaque. Aitaque pavisacotanaje meeca.

Irosati yavisacotantanaja.

⁴ Ari icantaqueri Jesoshi:

–Eiroya picamantitsi, irointiquea pantero icantiniri peerani Moishishi: pijatashiteri saserote, pincamanteri irinti: “Nopatsaaveitani, iro cantaincha pamenajenate, avisacotajana: te aneajeroji meeca novatsaaro”. Ari iramenavaquempi, impoiiji iroyeri pivira, intayeneri Tasorentsi, iriojeitanteari ashanincapee pavisacotaji.

Ari ijatanaque.

Yora Jesoshi yoavisacotiri inampire capitano.

(Ir. 7.1-10)

⁵ Ari yovaanaja Jesoshi, aisati yora oijajeitiriri, impoiiji yareejitapaaca Caperenaouqui. Itonquiotavacari aparoni capitano, yora ivincatsarite oshequi soraro. Caari ini jorio yora capitano.

⁶ Icantavaqueri:

–Novincatsarite, ainiro nonampire anta novancoqui, te irimatajeaji irishevatajea, aisati oshequi icatsitaque. Catsiqueti oanaqueri. Nocoaque poavisacoteri.

⁷ Ari yacanaqueri:

–Aitaque nojataque noavisacotajeri.

⁸ Iro cantaincha icantiri:

–Oshequi nopincatsataquempi: te noncameetsateji, eiro pintsipatapaanatsi anta novancoqui. Ariorica pincante iravisacotanaje, niotaque ari iravisacotanaje: patsipetarocari pijate novancoqui. Oshequi pipincatsariti.

⁹ Timatsi perananari, aisati itimi soraro noperanajeitacari narori. Ariorica noncanteri soraro: “Pijate”, ari irijataque. Ariorica noncanteri itsipa: “Pimpoque”, ari impoque. Ariorica noncanteri nonampire: “Jeroca panteri”, ari irimataquero. Aisati onquempetaquea avirori, aitaque omoncarataquea paitarica pincanteri.

¹⁰ Ari yoanaqueri Jesoshi cavaco, icantajeitiri oijajeitiriri:

–Queario oca noncamantempiri: oshequi catsini iquemisantasanotaque yoca, yanaacojeitaqueri maaroni jorio iquemisanti.

¹¹ Coajica anta ipincatsaritinta Tasorentsi intime oshequi itsipapee atiri poneayetachaneri otsipapeequi quipatsi. Incarajeiteri Avarama, Isaca, Jacovo, maaroni.

¹² Iro cantaincha eiro itimitsi oshequi jorio anta. Icoacaavetacari Tasorentsi intsipajeitearime anta ipincatsaritinta, iro cantaincha oshequi itseencajeitaqueri, irootaque intiancajeitantariri anta otsitenitanotinta. Oshequi anta iroashinoncaajeitea, oshequi inquematsicataro.

¹³ Ari icantiri yora capitano:

–Meeca pijataje pivancoqui. Piquemisanti, irootaque iravisacotantajeari pinampire.

Irosati yavisacotantanaja inampire.

Yoavisacotiro Jesoshi irairo Petero.

(Mr. 1.29-31; Ir. 4.38-39)

¹⁴ Ari ijatanaque Jesoshi ivancoqui Petero. Ineapaaquero irairo, ojoquuitaca, aaquero catsiirentsi.

¹⁵ Ipamitapairo acoqui, irosati avisacotantaja. Otinaanaja, irosati opantavacariri iroapeempari.

Yoavisacojeitiri Jesoshi oshequi pashinipee atiri.

(Mr. 1.32-34; Ir. 4.40-41)

¹⁶ Ari ishaavijiitanaque catsirincaiteri, irosati yamantajeitapaacari oshequi neiriri ca-maari. Ari iquenquetsatacaavaqueri, irosati yavisacojeitantajari. Aisati yoavisacojeita-queri oshequi joquijeitachari.

¹⁷ Aitaque itsataaquero Jesoshi maaroni iquenquetsatacotiniri peerani Isayashini: “Coajica iroavisacojeiteri Quirishito oshequi mantsiyetatsiri, oshequi incavintsaajeiteri”.

Icantajeitiri Jesoshi atiripee: “Poiijaitanaquena”.

(Ir. 9.57-62)

¹⁸ Ari ineajeitavaqueri Jesoshi oshequi catsini apatotimentajeitacariri, irosati icantantari iroamerepee:

–Tsame ajajeite intatiquero incajare.

¹⁹ Ari icantiri oametantirori Sanquenarentsi:

–Oametnari, jaocarica pijateri, nocoaque noijatanaquempi.

²⁰ Yacanaqueri:

–Yorari parari ainiro imoro imaantari, aisati yora tsimeripee ainiro yaatantari imaantari. Noponeaca narori anta inquitequi, natiritapaaque, iro cantaincha te aneroji novanco nainti nomaanteari. Patsipetashitacari poijatanaquena, pashinoncaacari.

²¹ Icantiri pashini iroamere:

—Novincatsarite, nocoavetaca noijatempime, iro cantaincha incamaquetsita apa: impoiiquea quiso noanaquempi.

²² Iro cantaincha icantaqueri:

—Poiجاتenata, impoiiji ariorica incame piri, ainiro tijerineri itseencaririnte: yora caari iotiri Tasorentsi.

Yora Jesoshi ipeaquero antearo tampea.

(Mr. 4.35-41; Ir. 8.22-25)

²³ Ari itetanaca Jesoshi pitotsiqui, icarajeitaqueri iroamerepee.

²⁴ Ari imaanaque Jesoshi. Nianquijaqui omapocashijeitacari iroamerepee antearo tampea, otejatapaaca omotoncane.

²⁵ Ari ijatashitaqueri, yoisaaquireaqueri, icantaqueri:

—Novincatsarite, jentsinocanti ampiinquenive: poavisacojeitena, aisati poavisacotajea avirori.

²⁶ Ari itinaanaca, yacanaqueri:

—¿Paita pitsaroantacari? ¿Paita caari piqenqueshiretasanotantana?

Impoiiji ipeajiro tampea, aisati ipeajiro omotoncane. Opeasantanaja tampea, opeasantanaja omotoncane.

²⁷ Ari yoajeitanaqueri cavaco, icantavacaanaca:

—¿Jaoca icantari yoca? Pineaquero ipeajiro tampea, aisati ipeajiro omotoncane, maa.

Yoavisacojeitiri Jesoshi pashinipee neiriri camaari.

(Mr. 5.1-20; Ir. 8.26-39)

²⁸ Ari yareejeitanaca intatiquero, yaatacotapaaque. Opajita nampitsi Carara. Ari iponeaca tijaariqui apite neiriri camaari, itonquiotavacari Jesoshi. Yora camaari, oshequi iquisacaacari neiriri, irootaque itsarocaaajeitantariri ishaninca, te inquentajearo tijaariqui.

²⁹ Icantavaqueri camaari:

—¿Aviro? Niotaquempi, aviro Itomi Tasorentsi. ¿Paita pipocashitantanari? ¿Irompa pipocashitantanari meeca poashinoncayena? Tequera omoncarateaji nonquematsicantantearori anta ishaaviji.

³⁰ Ari itimi anta oshequi chancho, yoajeitanta.

³¹ Icantiri camaari:

—Ariorica poavisacoteri neanarica, pintianquena anta chanchoqui, nonijapeempari iriori.

³² Ari icantiri:

—Pijate, pinijapeempari iriori.

Ari ijatanaque, ineavaqueri iriori chancho, irosati ishiajeitantanaca imperitaqui, ipiincajeitanaque incajarequi, tsapo, tsapo, tsapo, tsapo. Itsitiajeitanaque, pomiririri, poyere.

³³ Ari ineavaqueri shentajeivetariri, ishiajeitana. Ijatanaque nampitsiqui, icamantapaaqueri ishaninca maaroni oca ineakeri.

³⁴ Ari ijatashijeitaqueri maaroni savicajeitatsiri, icantapaaqueri Jesoshi:

—Tsame pijataje: eiro pipocajitsi aca nonampiqui.

9

Yoavisacotiri Jesoshi caari shevatacha.

(Mr. 2.1-12; Ir. 5.17-26)

¹ Ari itetanaja aisati Jesoshi pitotsiqui, icarajeitiri iroamerepee. Ipiajeitanaja inampisanoriqui.

² Ari yameetaqueneri caari shevatacha, yamacotaqueri shitashintsiqui. Iotaque Jesoshi oshequi iquemisantaque, irootaque icantantavacari:

—Piveshireanaque, noshaninca, meeca noavisacotempi; eiro noquishmentimprotsi caari cameetsatatsi pantayetiri.

³ Ari iquemajeitaqueri oametantirori Sanquenarentsi, icantavacaajeitana:

—Ijitasorentsitateemi Jesoshi.

⁴ Ari iotaque iriori iquenqueshirejeitiri, icantajeitiri:

—¿Paita piquisashirejeitantanari? ¿Paita pitseencajeitantanari?

⁵ Ariorica noncantaqueri yoca: “Meeca noavisacotempi, paniitanaje”, tempa ari pamenajeitavaqueri, sorerere. Eirorica nomatirotsi, ari pishirontimentena. Iro cantaincha pijitashijeitaca nocantashitari: “Noavisacotempi, eiro noquishmentimprotsi caari cameetsatatsi pantayetaqueri”.

⁶ Nocoaque piojeite te noncantashiteaji. Noponeaca narori inquitequi, natiritapaaque. Icantaquena Apa: “Poavisacotenari antirori caari cameetsatsi, impoiji eiro aquishimentajiritsi aisati yantayetiri”. Nocoaque piojeite ainiro notasorenca.

Ari icantiani caari shevatacha:

–Pincatianaje, paanajero pishitashi, pijataje pivancoqui.

⁷ Ari icatianaja, cati; ijatanaji ivancoqui.

⁸ Ineajeitavaqueri maaroni apatojeitainchari, yamenajeitavaqueri sorerere. Itsaroajeitanaque, aisati icantajeiti:

–Tempa icameetsati Tasorentsi, imatacaqueri yoca yoavisacotajiri mantsiaripee.

Icantaqueri Jesoshi Mateo: “Pojatanaquena”.

(Mr. 2.13-17; Ir. 5.27-32)

⁹ Ari yovaanaja Jesoshi anta novanquinta narori. Ineapaaquena naitayetiri noshaninca iirequite nompanteariri oromasati. Icantapaaquena:

–Tsame, poijatanaquena avirori.

Ari nocatianaca, noijatanaqueri.

¹⁰ Impoiji naanaqueri anta novancoqui, noacaapaacari. Ari nocajemiri Jesoshi, it-sipa iroamerepee, yora notsipajeitari napatojeitiniri oromasati iirequite, itsipapee caari quemisantatsi, maaroni. Ari noajeitaca.

¹¹ Ari ipocashitaquena yora variseopee, icajemiri itsipapee iroamere Jesoshi, isampijeitiri:

–¿Paita yantiri yora oamejeitimpiri? Jeri yoacaajeitacari apatotiniriri oromasati quirequi, aisati icarajeitiri caari cameetsajeitatsi. Te oncameetsateji.

¹² Ari iquemaque iroamere, impoiji ijatashitaqueri Jesoshi, icamantapaaqueri; impoiji icantanaque iriori:

–Yora caari mantsiatatsi te incoyeji iravintea, irintiquea mantsiyetatsiri coatsiri iravintea.

¹³ Tsame pijajeite pinquenqueshirejeitero icantiri Tasorentsi: “Te noncoyeji poapinite-nari pivira, pintaapinitenari; irointiquea nocoasanotaque pincavintsaajeiteri pishaninca”. Te iro nompocantea nonquemisantacajeiteri cameetsayetatsiri, irintiquea caari cameetsajeitatsi.

Irootaque icantiriri Jesoshi variseopee.

Icamantiri Jesoshi paita caari ititanta iroamerepee.

(Mr. 2.18-22; Ir. 5.33-39)

¹⁴ Impoiji ipocaarantaque iroamerepee Joa, isampitapaaqueri Jesoshi:

–Pamene, notitapinita noquenqueshiretantariri Tasorentsi, aisati iquempetaca yora variseopee; irintiquea poamerepee avirori, te intitimateaji. ¿Paitaquea?

¹⁵ Ari yacanaqueri:

–Piojeitaque yamejeitari yora iroaquera aatsi ijina: icajemajeitakeri ishaninca, yoacajeitacari, iveshireimentajeitacari iriori. ¿Paita iroashiretacanteariri icajemacantiri? Iro cantaincha, ariorica irijatanaque arejiqui, impoijiquea iroashirejeitanaquea, intijeitanaquea. Aisati narori, coajica nojataje, impoijiquea iroashirejeitanaquea, intijeitanaquea noamerepee.

¹⁶ Aisati, otimirica piitsaare iroaquerari, te pintsereroji pimpataquero peesatotaintsiri pimaatsara. Ariorica poavitajero, eiro omoncaratavacaatsi. Aisati ariorica pinquivajero oshirincamaotanaque iroaquerari, antsivianaquea peesatotaintsiri, ontsereanaque.

¹⁷ Tempa apeantantaro iroaquerajari pearentsi imeshinaqui iroaquerari, impoiji antsitacotaquero eiro aparajatanta. Ariorica oshimoretanaque, aravoncanaque, ontapiaqueri imeshina. Iroaquerarica ini, eiro ipesacotitsi, aisati eiro aparajatatsi: tempa iroaquera ini. Irooricame ampeantantajarome pearentsi iroaquerajari peesatitatsiri imeshina, tempa ari iraravoncanaqueme, intoncanaqueme, ton. Aitaque intereanaqueme, aisati amparajatanaqueame iroaquerajari, chararara. Iroaquera oni oca noamejeitimpiri, te oncameetsateji onconoyearo peeraniniri poamejeitiriri avirori.

Irootaque icantaqueriri Jesoshi.

Yoavisacotiro Jesoshi irajatatsiri aisati yoitinaajiro camaintsiri.

(Mr. 5.21-43; Ir. 8.40-56)

¹⁸ Irosati ipocashitantacari pincatsaritatsiri, itiyeroashitapaacari Jesoshi, ipincatsatapaaqueri; icantapaaqueri:

–Camaque nishintio, iro cantaincha nocoaque pijate novancoqui pimpamitapeero aneantajeari.

¹⁹ Ari yojatanaqueri Jesoshi, nocarajeitanaqueri narori, maaroni iroamerepee.

²⁰⁻²¹ Ari anta nianqui avotsi oneavaquena tsinane, ocarataque 12 osarintsi ashinoncaaca: ocantani irajataquenive. Oquenqueshiretaca: “Ariorica nantitaqueri iitsaare Jesoshi, ari navisacotanaje”. Ari oquenapaaque itapiiqui, antitaqueri ovarashiqui iitsaare.

²² Ari ipitsocanaca, ineaquero, icantaquero:

—Piveshireanaquea, noshaninca, piquemisantaque, irootaque pavisacotantajari. Ari avisacotaji.

²³ Ari novaajeitanaja, nareejeitapaaca ivancoqui pincatsari, noneapaaqueri shiovitacoventirori camaintsiri, aisati oshequi ashaninca, icajemajeitanaque.

²⁴ Ari icantajeitiri Jesoshi:

—Pijajeitanaque. Te oncameji oca piraacojeitiri, irointi omai.

Ari ishirontimentajeitacari, iji, iji, iji.

²⁵ Ari isoquijajeitanaque, irosati iqueantapaaca Jesoshi. Yajiricavacotapaaquero, irosati otinaantanaja.

²⁶ Irosati iquenquetsatacojeitancari maaroni savicajeitatsiri.

Yamenacaajiri Jesoshi apite caari amenatsi.

²⁷ Ari novaajeitanaja aisati, itimi anta apite caari amenatsi. Yoijatanaqueri Jesoshi, icantajeitiri:

—Tempa aviro ishanincani Iravirini. Pincavintsaajena.

²⁸ Ari noqueajeitapaaque pancotsiqui, aisati iriori yora caari amenatsi. Ipcashijeitaqueri Jesoshi, impoiji icantavaqueri:

—¿Paamaacampa ari nomatero namenacaajeitajempi?

Icantiri:

—Je, novincatsarite; nioti ari pimatajena.

²⁹ Irosati ipamijaquitancari, icantaqueri:

—Pishiretaquena, irootaque noavisacotantempiri.

³⁰ Irosati yamenajeitantanaja, iro cantaincha icantasanotaqueri:

—Eiroyea picamantiritsi itsipapee: “Yamenacaajana Jesoshi”.

³¹ Iro cantaincha ijajeitanaque, icamantajeitaqueri maaroni ineaajeitaqueri:

—Yamenacaajana Avincatsarite.

Ineanatacaajiri Jesoshi caari neanatatsi.

³² Ari impoiji, jeri ipocapaaque neiriri camaari, te irimateroji irineanate.

³³ Ari itianquiri Jesoshi yora masontitacaaveitariniri, ineanatacaajiri. Ari yoajeitanaqueri cavaco maaroni amenajeitaqueriri, icantajeiti:

—Peerani, te aneapiniteriji quempetearine yoca.

³⁴ Iro cantaincha icantanirojeiti yora variseo:

—Yamitacotiri ivincatsarite camaari, irootaque imatantacariri iamaaririnte itianquiri.

Oshequi icavintsaajeitaqueri Jesoshi atiripee, icoaque inquemisantajeite.

³⁵ Ari oshequi iquenaquenayetanaque Jesoshi maaroni nampitsipeequi, yoametapinijeitiri noshaninca anta yapatotapinijeitanta. Iquenquetsatacotapinitiri Tasorentsi, jaoca icanta ipincatsariventanti. Yoavisacojeitiri maaroni: tecatsi ompomerentsitimoteari, imataquero maaroni mantsiarentsipee.

³⁶ Ari ineaqueri oshequi catsini atiri yapatotimentajeitacari, oshequi icavintsaajeitaqueri. Icantiri:

—Oshequi yashinoncaajeitaca, tecatsi intacotearine. Iquempejeivetacari ovisha yora caari ishenteei.

³⁷ Impoiji icantajeitana:

—Oquempetaca otimi oshequi oitsoqui panquirentsi, iro cantaincha te intimeji oshequi aviiteroneri.

³⁸ Pincantajeiteri Pivincatsarite intiancajeitantariri oshequi quenquetsatacaajeiterineri ashaninca, quemisantacaajeiterineri.

10

Imatacaajeitaqueri Jesoshi iroamere yoavisacojeitaqueri neiriri camaari aisati mantsi-ayetatsiri.

(Mr. 3.13-19; Ir. 6.12-16)

¹ Ari icajemajeitaquena Jesoshi, maaroni itsipapee iroamerepee, nocarajeiti 12. Imatacaajeitaquena noavisacojeitaqueri neiriri camaari, nojocacoventajeitaqueri iamaarite. Aisati imatacaaquena noavisacojeitaqueri maaroni mantsiayetatsiri.

² Ari itiancajeitaquena nomayetero imatacaajeitaquenari. Ari nocarajeitiri Shimo, irosati ivajiro aisati Petero; jeri Antirishi, irirenti Petero; Santiaco, yora itomi Severeo; Joa, yora irirenti Santiaco;

³ Jeripi; Varitorome; Tomashi; aisati narori: narotaque apatoveitanariniri oromasati iirequite; Santiaco itomi Arejeo; Tareo;

⁴ Shimo, icantiri aisati Sheraroro; jeri aisati yora Jorashi Ishicariote, yora aacaanterineri coajicani Jesoshi.

Itiancajeitaqueri Jesoshi iroamerepee inquenquetsajeite.

(Mr. 6.7-13; Ir. 9.1-6; 10.3-11)

⁵ Ari itiancajeitaquena Jesoshi, icantavaquena:

–Eiro pijatashitiritsi yora itsipapee atiri, aisati eiro pijatitsi anta itiminta samariasati.

⁶ Irintiquea pijatashijeite maaroni ajorioririnte. Noshiacantajeitaqueri ovisha yora caari ishenteeti.

⁷ Jaocarica pinquenayetanaqueri, pinquenquetsatacaajeiteri atiripee. Pincamantajeiteri: “Irotaintsi impincatsariventajeitee Tasorentsi”.

⁸ Poavisacojeiteri mantsiaripee, pointinaajeitajeri camayetatsiri, poavisacojeiteri patsaayetatsiri aisati neayetiriri camaari. Oshequi nocavintsaajeitaquempi, iro cantaincha tecatsi noncoacojeitempi. Meeca pincavintsaajeiteri itsipapee, iro cantaincha tecatsi pincoacojeiteri avirori.

⁹ Eiro paanaqueritsi piirequite,

¹⁰ pitsarate, otsipa piitsaare, pisapatote, piotiquiro, tecatsi catsini. Tempa ocameetsati incavintsaajeitempi maaroni yora pincavintsaajeiteri avirori: ocameetsati impashijeitempi maaroni coiteimojeitaquempiri.

¹¹ Ariorica pareetea nampitsiqui, pincoapeeri quemisantasanotatsiri; pisaviquimoteri iriori irosati povaantanajeari otsipapeequi nampitsi.

¹² Ariorica pareetapaaquea, pineacameetsajeitapeeri savicajeitatsiri.

¹³ Ariorica irineacameetsajeitavaquempi iriori, pinceranti Tasorentsi incavintsaasanteri. Iro cantaincha terica irineacameetsatemp, eiro picantiritsi incavintsayeri.

¹⁴ Eirorica ineacameetsatavaquempi, aisati eirorica iquemisantavaquempi, ari povaanajea. Pincantanaqueri: “Te pinquemisantavaquena, ari coajica iroasanquejeitempi Tasorentsi”.

¹⁵ Queariotaque oca noncantempiri: coajica, ariorica incantacoventajeiteri Tasorentsi maaroni atiri, iroasanquetaajeiteri maaroni soromasatini aisati maaroni comorasatini. Iro cantaincha iroasanquetaasanojeiteri catsini maaroni caari neacameetsajeitempine, oshequi irashinoncaajeitanaquea.

¹⁶ Meeca nontiancajeitempi, iro cantaincha oquempetaca notianquiri ovisha anta itiminta covencari: oshequi iroashinoncaajeitempi tseencantatsiri. Pinquenqueshirejeitanaquea, eiro catsini poashinoncairitsi pishaninca.

Irootaque icantajeitavaquenari Jesoshi.

Icamantajeitiri Jesoshi iroamerepee: “Coajica oshequi inquisajeitempi itsipapee”.

(Mr. 13.9-13; Ir. 21.12-19)

¹⁷ Aisati icantajeitaquena Jesoshi:

–Queariompia, yoashinoncaimpicari ashaninca. Iraajeitanaquempi anta yoametava-caajeitanta pincatsaripee iroasanquetaacantantempiri. Aisati irajeitanaquempi ashanincapee anta yapatojeitantari, impanatatapinitemp.

¹⁸ Irojeitempirica piquemisantajeitaquena, iraanajempi anta itiminta ivincatsaritepee itsipapee ashaninca, impoiji pinquenquetsatacaajeiteri irojeitantenari itsipapee ashaninca.

¹⁹ Ariorica irajeitanaquempi, eiro piquenqueshireatsi, eiro picantitsi: “¿Paitampa noncanceriri?” Narotsitaquea nainti oamejeitempineri paitarica pinceranti.

²⁰ Eiro piotashitatsi avirori pinquenquetsatacayeri, irointi Ishire Tasorentsi oametasantempineri pinquenquetsatacayeri.

²¹ Coajica oshequi inquisavacaimentajeitaquena atiripee. Aparo iroacanteri irirenti, pashini iroacanteri itomi, aisati itsipapee iroacantayeteri ashietariri.

²² Piquemisantajeitaquena, irootaque inquisajeitantempiri pishanincapee, iro cantaincha eiro poipacairotsi piquemisanti. Ariorica pincanteani pinquemisantena, noavisacojeitempi, cameetsa pisaviquimojeitena anta inquitequi.

²³ Ariorica inquisajeitempi savicajeitatsiri aparoni nampitsiqui, ari pishianaque, povaanajea otsipaqui nampitsi. Queario oca noncamantempiri: eirotsitarica pitsoteiro maaroni nampitsi isavicantari ajorioririntepee, aisati nompiapaaje narori. Tempa noponeaca narori inquitequi, natiritapaque.

²⁴⁻²⁵ Ariorica irimoncaraveteari iroamere oametiriri iriote, iro cantaincha eiro yanaacotiritsi. Aisati ariorica irimoncaraveteari nampirentsi yora nampitariri ipincatsariti, iro cantaincha eiro yanaacotiritsi. Ari meeca oshequi iquisajeitaquena ashaninca, iji-tashijeitaquena naro ivincatsarite camaari. Piquemisantajeitaquena, tempa irootaque inquisajeitantempiri avirori,

²⁶ iro cantaincha, eiro pitsaroacaajeitaritsi. Meeca te iriojeiteji maaroni nopincatsaritaque, iro cantaincha coajica iriotosanojeitanaque maaroni; irineajeitaquena nompincatsaritanotananaque, aisati pincarajeitena avirori.

²⁷ Meeca apaniro nocamantajeitaquempi, te iriojeiteji yora tseencantatsiri, iro cantaincha coajica niotacaajeiteri. Meeca nomanavetacaro, iro cantaincha coajica noncamantasanajeiteri maaroni.

²⁸ Irimajeivetearo iriori iroajeitaquempi, iro cantaincha eiro pitsaroacaaritsi: tecatsi incantempiri intianquempi Sharincaveniqui. Irinti pimpincatsatasanoteri Tasorentsi: incoaquera iriori irimatajari iroajempi aisati intianquempi Sharincaveniqui.

²⁹ Pamene, te impinateaji tsimeripee, iro cantaincha terica incoacayeri Apa incame, eiro icamitsi aponi, catsini.

³⁰ Iotiro jaoca ocaratiri piishi, iotasanoimpiti catsini.

³¹ Pineaquero, oshequi panaacojeitiri tsimeripee, oshequi iquenqueshiretaquempi. Meeca eiro pitsaroitsi.

³² Ariorica pincanteri ashaninca: “Nopincatsataqueri Jesoshi”, aitaque anta inquitequi noncanteri Apa: “Ipincatsataquena iriori, noshanicatacari”.

³³ Iro cantaincha pincanterica ashaninca: “Te nompincatsateriji Jesoshi”, ari anta inquitequi noncanteri Apa: “Te impincatsatenaji yora, te nioteriji narori”.

³⁴ Aisati icantana Jesoshi:

—Eiro pijitashitanatsi popoqui iraacameetsatavacaajeitanteari maaroni savicajeitatsiri. Te iro nompocantea iraacameetsatavacaajeitanteari, irointi inquisavacaajeitanteari.

³⁵ Irointi nopocanta inquisanteariri shirampari iriri, onquisantearori tsinane iniro, onquisantearori tsinane airo,

³⁶ inquisanteariri shirampari ishanincasanori.

³⁷ Tempa ocameetsati pinintajeiteri piri aisati piniro, iro cantaincha ocameetsatanoti pinintanojeitena narori. Eirorica pinintasanotanatsi narori, eiro noneacameetsatimpitsi avirori. Aisati, ocameetsati pinintajeiteri pitomi aisati pishinto, iro cantaincha ocameetsatanoti pinintasanotena narori. Eirorica pinintasanotanatsi narori, eiro noneacameetsatimpitsi avirori.

³⁸ Nocoaque pinquearioventenaro maaroni nocoacaquempiri. Ariorica inquisihmenteetempiro, iro cantaincha nocoaque pimpomerentsiventenaro. Eirorica pipomerentsiventanarotsi, eiro noneacameetsatimpitsi narori.

³⁹ Ariorica pincavintsasaanotajea avisati meeca, pashinoncaasanotanaquea coajica. Iro cantaincha pinqueantisasanotena meeca, ariorica iroashinoncaajeivetempi pishaninca, iro cantaincha eiro patsipetarotsi: coajica paneajeitanaje anta ocameetsaitetasanotinta catsini.

⁴⁰ Maaroni aacameetsajeitempineri, yaacameetsajeitaquena narori. Aisati maaroni aacameetsajeitanari, yaacameetsajeitaqueri Apa iriori: yora tiancaquenari.

⁴¹ Ariorica irioyeetempi aviro quenquetsatacotiriri Tasorentsi, irootaque iraacameetsatantempiri, ari pimincaratavacajeitea impinajeitempi Tasorentsi: avirori, aisati yora aacameetsajeitempineri. Aisati oquempetaca, irioyeetempirica picameetsati avirori, irootaque iraacameetsatantempiri, ari pimincaratavacajeitea impinajeitempi Tasorentsi.

⁴² Ariorica irioyeetempi piquemisantana, irootaque impacotantempirori pireri, iriotero Tasorentsi, impinatanoteri yora cavintsaimpiri.

Irootaque icantajeitanari Jesoshi.

11

Itianquiri Joa iroamere irineeri Jesoshi.

(Ir. 7.18-23)

¹ Ari ivecarataquero yoamejeitaquena Jesoshi, yovaanaja anta otsipapeequi nampitipee, yoamejeitaqueri savicajeitatsiri, iquenquetsatacaajeitaqueri. Noijatanajiri narori, aisati nocarajeitaqueri itsipapee iroamerepee, nocarajeiti 12.

² Chapinqui yoiminquetaqueri Joa, yora vaotisantantsiri. Meeca ari inaqueri caravosoqui, iro cantaincha iqumacotaqueri yantayetaqueri Quirishito, irosati itiancantacariri iroamerepee iriori:

³ –Pijatashijeiteri Jesoshi, pisampitaiteiri: “¿Avirompa Quirishito naamaajeitari? Terica aviro, ari naamayea pashini”.

⁴ Ari yareejeitapaacari Jesoshi, isampitapairi. Ari yacavaqueri:

–Pimpiajeitanaje, pincamantapeeri Joa maaroni piquemaquenari aisati maaroni pineacotaquenari.

⁵ Namenacaajeitajiri caari amenajeivetacha, naniitacaajeitajiri caari shevajeivetacha, noavisacojeitaqueri maaroni patsaajeivetachari, noquemacaajeitajiri caari quemaveitachani, noitinaajiri aisati camavetainchari, niotacaajeitaqueri ashinoncaajeivetachari jaoca incanteari iravisacotantajeari.

⁶ Inquimoshirejeitanaque maaroni caari tseencana. Irootaque pincamantapaaqueriri Joa.

Yora Jesoshi ineacameetsataqueri Joa.

(Ir. 7.24-30)

⁷ Ari ipiajeitanaja iroamerepee Joa, impoiji iquenquetsatacaajeitaqueri Jesoshi yora apatotimentajeitariri:

–Ari peerani pijatapinijeiti anta caaraiteriqui, piquemisantapinijeitiri Joa. ¿Paita pijatashijeitantariri? Tempa piojeitiri iotiri iriori Tasorentsi, irootaque pijatashitantariri.

⁸ ¿Pineaquerimpa iquitsaata cameetsa? Teve. Yora quitsaatarori iitsaare cameetsari isavicajeiti anta ivancoqui pincatsari.

⁹ Tempa piojeitaqueri iriotaque quenquetsatirori irineane Tasorentsi. Queariotaque, iro cantaincha yanaacotasanojiri itsipapee quenquetsacotiriri Tasorentsi.

¹⁰ Iquenquetsatacaquerini peerani Tasorentsi, icantitanani: “Notiomi, nontianqueri coajica jivatempineri, inquenquetsatacaapaqueri ishaninca, incanteri: ‘Pinquenqueshirejeitea, paamaajeiteari Avincatsarite’ ”.

¹¹ Meeca noncantantempi, queariotaque: tempa itimi oshequi catsini atiri, iro cantaincha yanaacojeitaqueri Joa, yora vaotisantantsiri. Yanaacotasanojeitaqueri itsipapee, iotasanojaqueri Tasorentsi. Iro cantaincha maaroni neajeitaquerineri Tasorentsi impincatsaritapaaje, iranaacotasanojeteri Joa, iriomasanojeitanaque irinti.

¹² Peerani iquenquetsatacaitaquempi nari, meece noquenquetsatacaajeitaquempi narori, piojeitantariri Tasorentsi. Ari impincatsariventajeiteri maaroni coasanojeitantsiri iriojeiteri.

¹³ Peerani maaroni yora camantantantsiniri iquenquetsatacotiri Quirishito, aisati iquempetani Moishishini. Aisati icantajeiti: “Irotaintsirica impoque Quirishito, irijivatapaqueri Iriashi”. Impoiniji meece ipocaque iriori Joa,

¹⁴ ariorica noncantantempi: iriotaque Joa iquenquetsatacotiri, ¿arimpa pijitaque namatavitaquempi?

¹⁵ Otimirica piyempita piquemantari, pinquemaquena.

Irootaque icantajeitiriri maaroni apatotimentajeitariri.

ICantiri Jesoshi: “Te piotacotasanojeitenaji”.

(Ir. 7.31-35)

¹⁶ Jero oca aisati icantajeitaqueriri Jesoshi:

–Piquempejeitacari jananequiepe, savicajeitantsiri saiteriqui, cantiriri itsipapee:

¹⁷ “Notamporovetaca, iro cantaincha te poijatanajuenaji; nosoncavetaca, iro cantaincha aisati te poijatanajuenaji. Nomaninquetevetaca, te poijatanajuenaji”.

¹⁸ Pineaquero, picoajeiveta irantajeiterome pishaninca paitarica picoacaajeivetacariri. Pineavetari Joa, itivetaca aisati te irireroji cachojari, ari picantashijeitari: “Oo, ineaqueri Joa camaari, ititantacari”.

¹⁹ Ari noponeaca narori inquitequi, nirititapaque; te nontiveteaji nainti, aisati niriro cachojari nainti. Ari picantimajeitaquena: “Jeri yonta oashenti, shinquinarinti. Ishanincatacari aitaqueeriri airequite aisati itsipapee caari cameetsayetatsi”. Iro cantaincha ioti Tasorentsi, ocameetsataque maaroni icoacaquenari; aisati maaroni quemisantanari, iojeitaque ocameetsataque icoacaquenari Apa.

Irootaque icantajeitaqueriri.

Irashinoncaajeitanaquea maaroni tseenuquiriri Jesoshi.

(Ir. 10.13-15)

²⁰ Impoiji iquenquetsatacojeitaqueri Jesoshi yora neajeivetacariri itasoncanti, iro cantaincha itseencajeitaqueri. Icantiri:

²¹ –Irashinoncaajeitanaquea maaroni coraseisati, aisati vetsairasati. Oshequi inea-jeivetaquena notasoncantayeti, iro cantaincha te inquenqueshireteaji, te inquemisanteji.

Irineaquename notasoncantayeti yora tirosatini peerani, aisati yora shirosatini, inquenqueshirejeitanaqueame irinti, irojocajeitaquerome caari cameetsatatsi yantajeitiniri, inquemisantajeiteme.

²² Coajica, ariorica incantacoventajeiteri Apa, iroashinoncaajeiteri yora tirosatini aisati yora shirosatini: oshequi te incameetsajeiteni. Iro cantaincha iroashinoncaasanojeitaqueri catsini yora coraseisati aisati vetsairasati: tempa ineacojeivetaquena notasoncantayeti, iro cantaincha te inquemisantenaji.

²³ Aisati iriori caperenaosati, ijitashijeiveta irijate inquitequi, iro cantaincha itseencantajeiti: irootaque irijajeitanteari iriori ishaaviji. Irineaquerome yora soromasatini maaroni ineajeitaqueri caperenaosati, inquenqueshirejeitanaqueame, eiro itsoncajeitirime peerani Tasorentsi, ontimeme meeca inampi.

²⁴ Coajica iroashinoncaajeitajeri aisati Tasorentsi soromasatini, iro cantaincha iroashinoncaasanojeiteri catsini yora caperenaosati.

Irootaque icantaqueriri Jesoshi.

Yora Jesoshi iquenquetsatacairi Iriri.

(Ir. 10.21-22)

²⁵ Impoiji iquenquetsatacairi Jesoshi Tasorentsi, icantiri:

—Apa, aviro pincatsariventajeitiriri maaroni inquitesati aisati maaroni quipatsisati, oshequi nopasonquitimpi. Ainiro cantashitachari: “Niotasanoti nainti”, iro cantaincha pimanapitsajeitaqueri piotiri. Irintiquea piotacaajeitiri itsipapee, yora itseenqueetiri.

²⁶ Pineshinoncajeitaqueri irinti, picoacaajeitaqueri iriote.

²⁷ Irootaque icantaqueriri iriri, impoiji icantajeitaqueri ashaninca:

—Irio Apa iotacaanari maaroni. Apaniro iotasanotaque irinti naro itomi, te irirotacotenaji itsipapee. Apaniro niotiri narori, tempa narotaque itomi; yorari itsipapee, te irirotasanojeiteriji Apa. Irintiquea iotasanojeitaqueri yora noamejeitaqueri.

²⁸ Ariorica pashinoncayea, ariorica ompomerentsitimotempi paitapeerica, pimpcashitena pincamantena; ari noncavintsayempi, nintacotempi eiro opomerentsitimotantajimpitsi aisati.

²⁹ Pinquemisantena narori, pincoajeite noamejeitempi; oshequi nocavintsanti, oshequi noneshinoncatanti. Ariorica pinquemisantena, noveshireacaajeitempi.

³⁰ Pamene, eiro noperanatimpitsi, eiro noashinoncaimpitsi, irointi namitacotapinijeitempi.

12

Yora Jesoshi irio cantatsiri paitapeerica antayeteri saavaroqui.

(Mr. 2.23-28; Ir. 6.1-5)

¹ Ari pashini saavaro noijajeitanaqueri Jesoshi, ijivajeitanaquena anta oantsipeequi. Narotaque iroamerepee. Ari aajeitaquena notashe, irootaque naviitantanacarori oitsoqui tirico, noajeitacaro.

² Ari ineajeitaquena variseopee, irosati icantantacari Jesoshi:

—Pamenerite poamerepee. Meeca saavaro, te oncameetsateji meeca iraviitantearo.

³ Ari yacanaqueri:

—Tempa pineanatapinivetaro Sanquenarentsi quenquetsatacotiriri Iravirini. Aajeivetacarini peerani itashe, aisati aajeivetacarini maaroni oijajeitiriri.

⁴ Ari iqueapaaque ivancoqui Tasorentsi, icantapaaqueri yora saserote: “Aajeitaquena notashe”. Ari otimaveta anta tanta yoashiyeetanariri Tasorentsi. Te oshinetanteaji iroajeitearo ashanincapee, apaniro irinti yoaro saserote. Iro cantaincha icavintsajeitavaqueri, te incoyeji iroashinoncayeri, irootaque ipajeitantariri Iravirini, aisati itsipajeitari. Yoajeitaca. Meeca te pincanteji: “Te oncameetsateji yantiniri Iravirini”, ari Ꞥpaita picantantari meeca: “Te oncameetsateji yantiri yoca”?

⁵ Aisati isanquenatini Moishishi: “Eiro pantaveetantarotsi saavaro”. Iro cantaincha maaroni saavaro ijatapinitini saserote ivancoqui Tasorentsi, yantaveetapinitini. Te pinquishimenterini, tempa pineacameetsataquero yantayeteri.

⁶ Tempa atiri yanaacojeitaquero ivanco Tasorentsi, ocameetsati ancavintsajeiteri irinti, eiro avashinoncairitsi.

⁷ Pineaquero, isanquenatini peerani: “Icanti Tasorentsi: ‘Te noncoyeji poapinitenari ovisha, pintaapinitenari; irointiquea nocoasanotaque pincavintsajeiteri pishaninca’ ”. Pinquemasanoterome oca icantiri Tasorentsi, eiro picantimentirime yoca aviitirori tirico, te aneroji irantane.

⁸ Noponeaca narori inquitequi, natiritapaaque. Narotaque nainti cantatsine paitarica antayeteri saavaroqui.

Yoavisacotiri saavaroqui Jesoshi tsiricoipacori.

(Mr. 3.1-6; Ir. 6.6-11)

⁹ Ari novaajeitanaja, noqueajeitapaaquero pancotsi yapatojeitantari.

¹⁰ Itimi anta tsiricoipacori. Ari yora variseopee isampijeitavaqueri Jesoshi:

—¿Ocameetsatimpa poavisacoteri saavaroqui tsiricoipacori?

Icoajeitaque iroavisacoteri saavaroqui, irootaque incantajeitanti: “Yantaveeniroti Jesoshi saavaroqui, te incameetsateji!”.

¹¹ Ari yacanaqueri:

—Pamene, ariorica saavaroqui impariaque omoroqui povishate, tempa paajeri, poisoquijajeri. Ocameetsati picavintsairi.

¹² Tempa atiri yanaacotiri ovisha icameetsatasanotaque. Ocameetsataque ancavintsayeri saavaroqui.

¹³ Impoiji icantiri yora tsiricoipacori:

—Pancotaje.

Ari yacotanaji, cameetsatanaji iraco, omoncarajaro otsipa iraco.

¹⁴ Iro cantaincha iquisajeitanaca variseopee. Ijajeitanaji, yoametavacaajeitanaca, icantajeiti:

—¿Jaoca ancantiriri Jesoshi, avacantanteariri?

Oquenquetsatacotaquerini Jesoshi sanquenarentsi peerani.

(Mr. 3.7-12; Ir. 6.17-19)

¹⁵ Iotaque Jesoshi icoajeitaque iroyeri, irootaque yovaantanajari. Ari noijajeitanaqueri, nocarajeitiri oshequi itsipapee atiri. Itimi oshequi mantsiyatetsiri, iro cantaincha yoavisacojeitakeri maaroni,

¹⁶ impoiji icantajeitakeri:

—Eroyea picamantitsi: “Yoavisacojeitacuena Jesoshi”.

¹⁷ Ari itsoteajiro Jesoshi maaroni iquenquetsatacotaqueriniri peerani Isayashi. Jero oca irineane Apa Tasorentsi isanquenatiniri:

¹⁸ “Jeri yoca Quirishito nocoacaqueri irantenaro maaroni nocoacaqueriri. Oshequi nonintaqueri, oshequi noneacameetsataqueri. Nontianqueneri noshire, quiso oanaqueri, amitacotapiniteri. Incamantajeiteri itsipapee atiri jaoca noncanteari noameetsatanteariri maaroni.

¹⁹ Eiro icantavacaimentarotsi paitapeerica, eiro iquenquejairitsi itsipapee. Eiro icajemacotapinitiritsi itsipapee.

²⁰ Eiro yoashinoncairitsi oashiretachari. Eiro yamatavitiritsi coatsiri iriotena. Aitaque, incanteani incavintsante, aisati impincatsariventantasante.

²¹ Iriotaque oavisacojeiterineri itsipapee atiri, te intimeji pashini oavisacojeiterine”. Irootaque icantiri Tasorentsi peerani.

Yora variseopee icantimajeitakuero Ishire Tasorentsi.

(Mr. 3.20-30; Ir. 11.14-23)

²² Impoiji yameetaqueneri Jesoshi neiriri camaari: te irameneji, aisati te irineanateji. Ari yoavisacotajiri: yamenacaajiri aisati ineanatacaajiri.

²³ Ari yoajeitanaqueri cavaco maaroni neacojeitakeriri. Isampitavacaajeitaca:

—¿Iriompa yoca Quirishito aamaajeitacari?

²⁴ Iro cantaincha icantajeiti variseopee:

—Irio Satanashi, yora ivincatsarite camaari, amitacotiriri itiancajiri iyamaaririnte.

²⁵ Ari iotaque Jesoshi iquenqeshirejeitiri, icantajeitiri:

—Ariorica irimanatavacaajeiteame savicajeitatsiri quipatsiqui, tempa ari impoyereavacaajeiteame. Aisati iquempetaca yora savicajeitatsiri nampitsiqui, ariorica inquisavacaajeiteame, tempa ari inteentareavacaajeiteame. Aisati iquempejeita maaroni atiri, ariorica inquisakeri ishanincasanori, eiro quiso yoajiritsi.

²⁶ Pamene: irioricame Satanashi amitacotenaneme notianquiri noyamaaririnte, tempa nompoyereavacaajeiteame.

²⁷ Aisati irioricame amitacotenaneme notianquiri camaari, ¿irisatimpa camaari amitacoteitiriri pishanincapae iriori yojocantariri camaari?

²⁸ Iro cantaincha irootaque Ishire Tasorentsi amitacotanari notiancantajariri camaari. Tempa irootaque pioletameri ainiro icarajeitakuempi Tasorentsi, icoaveta impincatsariventajeitempime.

²⁹ Intimerica coatsiri incoshiteri shintsitatsiri, tempa irijivateri irayeri, shepi; iroisoteri, oiso, oiso. Impoiji incoshiteri ivaararo, eiro imatirotsi impiateari yora ashivetariri ivaararo.

³⁰ Yora caari quemisantana, iriotaque quisaquenari. Aisati, iquisaquena maaroni caari amitacotana.

Iquenquetsatacotaqueri Jesoshi yora cantimajeitirori Ishire Tasorensi.
(Mr. 3.28-30; Ir. 12.10; 6.43-45)

³¹ Aisati icantiri Jesoshi variseopee:

—Yora Tasorensi icavintsaajeitiri maaroni caari cameetsajeitatsi aisati maaroni cantimajeivetariri, eiro iquishimentajeitiritsi yantayetiri. Iro cantaincha eiro icavintsaajeitiritsi yora cantimajeitirori Ishire.

³² Noncamantempi: noponeaca nainti inquitequi, natiritapaaque, iro cantaincha incavintsaajeiteri Apa maaroni cantimajeivetanari. Eiro icavintsaajeitiritsi irinti cantimajitirori Ishire. Eiro icavintsairitsi meeca, aisati coajica eiro icavintsairitsi, irointi iroasanquetasanojeiteri.

³³ Ariorica ocameetsati inchato, ocameetsati oitsoqui iroori; terica oncameetsateji inchato, aisati iroori oitsoqui, te ocameetsateji. Ariorica pineero oitsoqui, tempa piotaque ocameetsatirica inchato.

³⁴ Pishiajeitaqueri camaari, te pincameetsajeiteji: tecatsi pincantea poametante cameetsa. Te oncameetsateji piquenqueshirejeitiri, irootaque caari ocameetsatanta picantajeitiri.

³⁵ Irinti cameetsatatsiri shirampari iquenqueshiretapinitiro cameetsayetatsiri, irootaque ocameetsatantari yantayetiri. Yora caari cameetsayetatsi iquenqueshiretapinitiro caari cameetsatatsi, irootaque caari ocameetsatanta yantayetiri.

³⁶ Coajica incantacoventajeitaquempi Tasorensi: inquenqueshiretacaajempio maaroni picantajeitiri meeca.

³⁷ Ocameetsajeitirica picantajeitiri, ari irineacameetsatempi, iro cantaincha terica oncameetsayetaji, incantempi: “Ainiro pantayetiri, oshequi pinquematsicatimentearo”.

Irootaque icantiriri Jesoshi variseopee.

Iquenquejaajeitaqueri Jesoshi yora tseencajeitantatsiri.
(Mr. 8.12; Ir. 11.29-32)

³⁸ Impoiji icantajeivetari variseopee aisati oametantayetirori Sanquenarentsi:

—Oametanari, nocoaque namenempi pintasonquero paitapeerica, notantempiri avirotaquerica Quirishito.

³⁹ Yacanaqueri Jesoshi:

—Te pincameetsajeiteji, oshequi pitseenaqueri Tasorensi, irootaque picantantantari. Eiro notasonquimojeitimpitsi piotantentanarime. Otimi yantayetiniri Jonashi: pishiretearome ishiacantaqueenari, ari pinquemisantaqueename.

⁴⁰ Peerani iniaquerini anteari omani, ocarataque mava quitaiteri inaqueri isheitoqui. Aisati narori, noncamaque, oncarataque mava quitaiteri nonaque narori omoroqui tsonpoina.

⁴¹ Coajica incantacoventajeitempi Tasorensi, incantajeitempi: “Ainiro pantanejei avirorijeji. Peerani yora ninivesati iquemisantajeitaquerini yora Jonashi, iquenqueshirejeitantacari. Avintijeji, pineajeivetacari Quirishito, oshequi yanaacotasantotiri Jonashi, ipincatsaritasanoti irinti, iro cantaincha te pinquemisantajeiteji”.

⁴² Aisati incantajeitempi: “Ainiro pantayetiri avirorijeji. Peerani ora ivincatsaroteni savasatini oquemaque oshequi iotaque Saromo, irootaque ojatantacari arejiqiu oquemisantantacari. Jeri isaviquimojeivetimpi avinti anaacotiriri Saromo, iro cantaincha te pimpincatsateriji”.

⁴³ Noshiantempiro aisati: oquempevetaca yora camaari itimantacari ishirequi shirampari, ipeaquero ishire ivanco. Ari yojoqueetiri camaari, yavisacovetaja yora itimantari. Ijataque camaari anta caaraiteriqui, anta opirijaiteaque. Icoaveta irimaoreeme, iro cantaincha te irimateroji.

⁴⁴ Impoiji icantaniroti: “Nompianajeta novancoqui noponeacanta”. Ari ipianaja, inepaaquero opishitaca, ocareniteanaque, ovetsicayetaca isavicamentopee, imaamento, maaroni.

⁴⁵ Ari ijatashitanaqueri pashini iamaaririnte, icarati 7. Oshequi yanaacojeitiri icamaaritasanojeiti. Icantiri: “Tsame pisavicajeite novancoqui”. Ari, peerani yashinoncaavetaca capichaji yora itimantari camaari; meeca irampiitajea irashinoncaasanotanajea catsini. Aisati pinquempejeitea avirorijeji. Pashinoncaajeivetaca, te piojeiteniji. Meeca pineajeivetaquena, iro cantaincha te pimpincatsajeitenaji, irootaque pampiitajea, pashinoncaasanojeitajea.

Irootaque icantajeitaqueriri Jesoshi.

Ishanincajeitacari Jesoshi maaroni quemisantajeitiriri.

(Mr. 3.31-35; Ir. 8.19-21)

⁴⁶ Ari iquenquetsatacaajeitaquena Jesoshi, aisati yora apatojeitachari anta pancotsiqui. Irosati opocantapaacari iriniro Jesoshi, jeri irirentipee, ocatiapaaca saiteriqui, ocajemacantaqueri.

⁴⁷ Icamanteetaqueri:

—Areetapaaca piniro, jeri pirentipee, ocoapaaquempi. Ocoaque onquenquetsatacayempi.

⁴⁸ Yacanaqueri:

—¿Janicampa ina? ¿Janicampa iyeppee?

⁴⁹ Ari ijicojeitaquena, icantiriri:

—Jeri yoca noamerepee, iriojeitaque iyeppee, aisati iroojeitaque ina.

⁵⁰ Iriotaque noshanincatasanojeitacari maaroni antiniriri Apa Jenoqueiniri icoacaajeitaqueriri: nocantajeitaqueri iye, tsio, jero ina.

13

Iquenquetsatacotaqueri yora panquiveetatsiri.

(Mr. 4.1-9; Ir. 8.4-8)

¹ Irosati isoquijantanaja Jesoshi, ijatanaque otsapijaqui incajare. Noijajeitanaqueri,

² aisati yapatotimentajeitacari oshequi atiri. Ineaquero pitotsi, otsatacotaca; ari itetapaacaro, isavicapaaque. Ari nocatiajeitaca narori otsapijaqui.

³ Impoji, oshequi iquenquetsatacaajeitaquena, ishiacantiriri panquiveetatsiri, icanti:

—Ijati panquiveetatsiri yojocaitiro oitsoqui tirico iroanequi.

⁴ Opariaarantapaaque aparopee oitsoqui avotsiqui, impoji ipocapaaque contsaro, yoitapaacari oitsoqui.

⁵ Otsipapee oitsoqui opariaarantapaaque mapiqui. Te anta ontimasanoteji quipatsi, ari jentsipaite oshiocavetanaca, aisati jentsipaite otsoancavetapaaca.

⁶ Iro cantaincha te ontimasanoteji ovaritsa. Ijenoquitapaaque catsirincaiteri, oshimpetanaque, impoji ocamaanaque.

⁷ Pashini pariapaintsi quitotsequishiqui: anaanaquero irointi, oshioaque, ajaanaquero panquirentsi.

⁸ Orari pashinipee oitsoqui opariapaaque quipatsisanoriqui cameetsari. Oquimotanaque, oitsoquitanaque. Aparopee timanaintsi oitsoqui ocarataque 100, iro otsipapee ocarataque oitsoqui 60, iro otsipapee ocarataque oitsoqui 30.

⁹ Otimirica piyempita piquemantari, pinquemavaquero oca nocantajeitaquempiri.

Yoametaqueri Jesoshi iroamerepee ishiacaaventiniriri.

(Mr. 4.10-12; Ir. 8.9-10)

¹⁰ Impoji notsipajeitanacari pashinipee iroamere, nocantajeitaqueri Jesoshi:

—¿Paita pishiacantantanmariri yora itsipapee? Te inquemajeiteroji picantaqueriri.

¹¹ Ari yacanaquena:

—Nocoacaajeitaquempi piojeitanaquero caari iojeiti itsipapee. Nocoaque piojeite jaoca icanta Tasorentsi ipincatsariventajeitimpi, iro cantaincha te noncoacayeriji yora itsipapee iriojeitanaque.

¹² Itimirica iovetachari, ari niotacaasanoteri. Iro cantaincha itsipapee, te incoyeji iriote, irootaque caari iotanta irinti; eiro noametiritsi irinti, aisati nompeapitsataqueri iotantavetari.

¹³ Irootaque noshiacantantanmariri irioripee, te incoyeji iriojeite. Yamenajeiveta, iro cantaincha tecatsi irinee. Iquemajeivetavacaro iro cantaincha te inquemavaqueroji, te iriotavaqueroji nocantavetacariri.

¹⁴ Aitaque iquenquetsatacotitarini peerani Isayashi, icantini: “Pinquemajeivetea, iro cantaincha eiro piojeitavaquerotsi. Pamenajeivetea, iro cantaincha eiro pineasanojeitirotsi.

¹⁵ Te pincoajeiteji piojeitanaque, irootaque caari piquenqueshireajeitanta. Te pincoyeji pinquemajeite, irootaque povitantacarori piyempita. Te pincoajeiteji pamenasanojeite, irootaque pimatsiocantacari. Te pincoyeji catsini noavisacojeitempi”. Irootaque iquenquetsatacotiriniri peerani Isayashini.

¹⁶ Iro cantaincha pamenajeitanaji avinti, piquemisantajeitajana, irootaque pinquimoshiretasanojeitanteari.

¹⁷ Queario oca noncamantempiri: icoajeiveitani peerani yora quenquetsatacantantatsiniri aisati cameetsajeitatsiniri irineerome oca pineajeitaqueri avirori. Icoajeiveitani

inquemerome oca piquemajeitaqueri meeca. Iro cantaincha te irineajeitenaji, te inquemajeitenaji.

Irootaque icantaquenari Jesoshi.

Yora Jesoshi yoamejeitaqueri paita ishiacantimiriri.
(Mr. 4.13-20; Ir. 8.11-15)

¹⁸ Ari icantajeitaquena Jesoshi:

—Meeca noamejeitempiro oca noshia cantajeitaqueriri incaranqui.

¹⁹ Ari nocamantapinitiri itsipapee jaoca icanta Tasorentsi ipincatsariventanti, iro cantaincha terica inquemerome, iquempetacar oitsoqui pariaintsiri avotsiqui. Ipoqui camaari, yojocacaqueri iquenqueshirevetacar o noneane.

²⁰⁻²¹ Aisati itsipapee iquemavetavacar o nocantavetariri, iveshireimentavetacar o, irootaque iquisantacariri ishaninca. Iro cantaincha te iriotasanteji, te inquemisan-tasanoteji, irootaque yojocantajarori iquemisantaveta. Ari ishiaguero iriori oitsoqui pariapaintsiri mapiqui.

²² Iojeveta itsipapee noamejeivetari, iquemavetaro noneane, iro cantaincha oshequi iquenqueshireyetro paitapeerica, aisati oshequi iveshireimentaro irovaararo, irootaque caari iquenqueshiretantaro noneane. Te inquemisanteji. Ishiaquero iriori oitsoqui pariapaintsiri quitotseequishiqui.

²³ Iro cantaincha ainiro itsipapee quemisantanoirori noneane, quemasantanoirori. Oshequi iquemisantaquena, iquearioventaquero maaroni nocoacaqueriri. Ishiaquero oitsoqui pariapaintsiri quipatsiqui cameetsari, ora shequianaintsiri oitsoqui: aparopee timayetanaintsiri oitsoqui 100, iro otsipapee otimaque oitsoqui 60, iro otsipapee aisati otimaque oitsoqui 30.

Irootaque icantaquenari.

Iquenquetsatacotiri Jesoshi yora quishiriri panquitirori tirico.

²⁴ Pashini aisati ishiacantaquenari Jesoshi, icantaquena:

—Aitaque icanta ipincatsariventanti Tasorentsi, iquempetacar yora panquitirori oitsoqui tirico. Ocameetsataque oitsoqui ipanquitiri.

²⁵ Impoiji tsiteniriqui imai, aisati imaajeiti iratiritepee. Ipoaque tsiteniriqui quisaqueriri, yamaquero oitsoqui tiriconiro. Oshivetaroro tirico, iro cantaincha oquepiati. Ipanquitiro anta ivanquirequi ashitarori iroane, iconoaitiniri tirico. Impoiji ijatanaji.

²⁶ Ari impoiji aisati oshiocanaque tirico, oitsoquitanaque. Aisati oshiocanaque tiriconiro, oconoanacaro.

²⁷ Ineaquero iratiritepee, ijatashitaqueri, icantaqueri: “Tempa ocameetsati oitsoquipee apanquijeitiri anta poanequi. ¿Paita oshiocantacar tiriconiro?”

²⁸ Yacanaqueri: “Irioyeata quisaquenari panquitaaitirori”. Ari isampijeitiri: “¿Picoaque-mpa nojajeite nontocayetajero tiriconiro?”

²⁹ Icantiri: “Aitanaque. Pitsocacotirocari tiricosanori.

³⁰ Ocantavacata. Oshiocacoterota meeca. Coajicaquea amenavaquero oitsoquitanaquetsita tirico. Impoijiquea, noncantajeitempi: ‘Pimpesajeitero tiriconiro, paajeitero, pintayero. Impoijiquea pavitero tiricosanori, poajero anta pancotsiqui noquempoyeantaroriqui’ ”.

Irootaque ishiacantaquena Jesoshi.

Ishiacantiro Jesoshi oitsoqui moshitasa.

(Mr. 4.30-32; Ir. 13.18-19)

³¹ Jero oca pashini ishiacantaquena Jesoshi, icanti:

—Aitaque icanta ipincatsariventanti Tasorentsi, ishiacantiro oitsoqui moshitasa ipanquiyetiri oantsiqui.

³² Orijaniqui onaveta oitsoquijaniqui, iro cantaincha oshiocanaquerica, antearotanaque, anayetanaquero otsipapee panquiyetachari, aitaque irimencotantaquero tsimeripee ojempequiqui.

Ishiacantiro Jesoshi tapiacaarori tanta.

(Mr. 4.33-34; Ir. 13.20-21)

³³ Jero pashini ishiacantaquenari:

—Aitaque icanta ipincatsariventanti Tasorentsi, iquempevetaro tsinane ovetsiquiro tanta. Aaquero ovane tirico oshequi, aisati oconoiro tapiacaarori capichaji. Oconoasantiro, impoiji otapiaquero maaroni.

³⁴ Aitaque icanta Jesoshi, ishiacaaventapinijeitiniri apatotimentajeitariri, iotaca ishiacantiriri.

³⁵ Imoncarataquero isanquenatiniri peerani yora quenquetsatacantatsiniri: “Icanti Tasorentsi: ‘Oshequi noshiacanteneri atiripee; noncamanteri caari iojeitini peerani’ ”.

³⁶ Impoiji ijatanaque Jesoshi, yojocajeitanajiri yora apatotimentajeitariri, ijatanaque pancotsiqui. Narotaque iroamerepee, noijajeitanaqueri. Nocantaqueri:

–Poametasanotenaro oca pishiacantajeitiniriri yora apatotimentajeitimpiri. ¿Paita oshiacantiri tiriconiro ipanquiyeeitiri tiricomashiqui?

³⁷ Ari yacanaquena:

–Noponeaca narori inquitequi, natiritapaaque. Naro shiaqueriri panquitirori tirico cameetsari.

³⁸ Ora oantsi oshiacantaquero quipatsi asavicajeitanti. Ora oitsoqui cameetsari oshiacantaqueri pincatsatiriri Tasorentsi. Irointi tiriconiro oshiacantaqueri pincatsatiriri camaari.

³⁹ Yora quisantatsiri, panquitirori tiriconiro, ishiacantaqueri camaari. Ora yaviitaqueri oitsoqui oshiacantaquero ontsoncanteari quipatsi. Yora iratiritepee ishiacantaqueri inampirepee Tasorentsi.

⁴⁰ Pineaquero, yapatotacantaquero tiriconiro, itaasanotaquero, pomein. Oca oshiacantaquero nanteri coajica nontsoncantajeatoriri quipatsi.

⁴¹ Nontiancajeiteri oshequi nonampirepee, nampatotacantajeiteri maaroni caari cameetsajeitatsi; te nonintacayeriji incarajeiteri maaroni pincatsajeitanari.

⁴² Nojocacantajeiteri anta paamariqui: oshequi irashinoncaajeitaquea anta, oshequi inquematsicatearo.

⁴³ Impoiji irishipaqueireajeitanaque maaroni cameetsajeitatsiri, inquempejeiteari catsirincateri. Incarajeiteri Apa anta ipincatsaritinta. Otimirica iyempita atiripee, ocameetsati inquemisantajeitena.

Iquenquetsatacotaqueri Jesoshi quirequi imaneetiri.

⁴⁴ Aisati icantaquena Jesoshi:

–Aitaque icanta Tasorentsi ipincatsariventanti, ishiaqueri oshequi quirequi imaneetiri quipatsiqui. Ari ineashitacari quirequi pashini shirampari. Imanaqueri iriori, te incamanteji. Iquenqueshiretaca: “Namananterota quipatsi, nashitanteariri timatsiri quipatsiqui”. Impoiji ijataque ipimantajeitaquero maaroni yashijeitari iraateariri quirequi. Irootaque yamanantantacarori quipatsi itimantari oshequi quirequi. Impoiji iquimoshireventaqueri oshequi quirequi, yoca yamanantacotaqueri.

⁴⁵ Aisati iquempetacari coatsiri iramanantero marereatatsiri mapi, cameetsatasanotatsiri.

⁴⁶ Ineaquero aparori, ocameetsatasanotaque, opinatasanotaca. Icoasanotaquero, irootaque ipimantantarori maaroni timimojeitiriri yaantariri quirequi. Impoiji itsoncaqueri iirequite yamanantantarori aparori mapi cameetsari.

Iquenquetsatacotiro Jesoshi quitsari.

⁴⁷ Aisati icantajeitaquena Jesoshi:

–Pashini aisati noshiacantempiro jaoca icantari Tasorentsi ipincatsariventanti. Oquempetaca iquitsati shirampari incajarequi. Yojocaquero iitsarite nijaqui, impoiji inoshicacotaqueri shimayetatsiri; icaantanacave, monquire, monquire. Inashiyetaca.

⁴⁸ Ijaacaro quitsariqui, inoshicacotaqueri otsapijaqui. Impoiji isavicaque, icoyeyetacari cameetsayetatsiri. Irintiquea yora caari cameetsayetatsi yojocaqueri.

⁴⁹ Aisati onquempetajea ariorica nompocaje. Nontianqueri nonampirepee irinashitacajeiteari cameetsajeitatsiri aisati caari cameetsajeitatsi.

⁵⁰ Irojocajeiteri caari cameetsajeitatsi anta paamariqui. Oshequi irashinoncaajeitanaquea, inquematsicatasanojeitearo paamari.

⁵¹ ¿Piquemajeitaquerompa oca nocamantajeitaquempiri?

Nacajeitanaqueri:

–Je, noquemajeitaque.

⁵² Ari icantaquena:

–Ariorica inquemisantena yora oametantirori Sanquenarentsi, iriojeitanaquero oshequi: tempa meeca iotiro maaroni isanquenayeetiniri peerani: aisati, inquemisantenarica, iriotero iroaqueratatsiri noamejeitiriri meeca. Iriotanaquero jaoca icantari Tasorentsi ipincatsariventanti.

Iplanaja Jesoshi Nasaretequi.

(Mr. 6.1-6; Ir. 4.16-30)

⁵³ Ari ivecarataquero Jesoshi ishiacantajeitaquenaro, impoiji ijatanaque,

⁵⁴ ipianaja anta iipatsitequi iponeacanta. Noijajeitanaqueri narori. Ari yoametan-tapaaque anta yapatojeitanta ashanincepee. Yoajeitanaqueri cavaco maaroni quema-jeitavaqueriri, icantajeiti:

—¿Janica oametiriri yoca otimantacari iotantari? ¿Paitaquea matacaqueriri itasoncantayeti?

⁵⁵ Tempa iriotaque itomi vetsiquirori inchato. Tempa irootaque iriniro Maria. Tempa iriotaque irirentipee yora Santiago, Jose, Shimo, jeri Jorashi.

⁵⁶ Tempa aisati acarajeitaquero iritsiropee. ¿Paita ipincatsanirotantacari?

⁵⁷ Ari iquisajeitaqueri, itseencajeitaqueri, irootaque icantantariri:

—Timatsi pincatsatiriri quenquetsatirori irineane Tasorentsi, iro cantaincha itseenca-jeitiri ishanincasanori.

⁵⁸ Ari oshequi itseencajeitaqueri ishanincasanori, irootaque caari itasoncantayetanta oshequi anta inampisanoriqui.

14

Yora Eroreshi yoacantaqueri Joa, impoiji ijitashitajari itinaanaja, ijitajiri irio Jesoshita-jantsiri.

(Mr. 6.14-29; Ir. 9.7-9)

¹ Irosati yora Eroreshi iquemacotaqueri Jesoshi. Yora Eroreshi ipincatsariventajeitiri maaroni carireasati.

² Icantajeitiri ishanincepee:

—Irioyeata Joa Jesoshitajantsiri. Noacantavetacari, iro cantaincha aamaashiteari tinaanajaitatsi ini, irootaque imantantari itasoncantayeti.

³⁻⁴ Ari chapinqui yora Eroreshi yaapitsataqueri irirenti Jeripe ijina, opajita Eroriashi. Yora Joa icantavetacari: “Te oncameetsateji paapitsateri pirenti ijina”. Irosati yaacantantacari, yoiminqueacantaqueri. Yoisoeyetaqueri carenatsaqui.

⁵ Ari icoavetaca iroacantitearime, iro cantaincha oshequi ipincatsajeitaqueri atiri Joa, iojeitiri iquenquetsatocotiri Tasorentsi. Ijivetaca Eroreshi: “Ariorica noacanteri, inquisacojeitanaqueari atiripee”.

⁶ Impoiji omoncarataca quitaiteiri itimantacari peerani Eroreshi. Yapatojeitaqueri oshequi ishaninca, iquimoshireimentajeitacari. Aisati omaninquetacotimentaqueri oshintoto Eroriashi. Oshequi inecameetsataquero,

⁷ irootaque icantantarori:

—Paitarica pincoacotaquenari, aitaque nompaquempiro. Ioti Tasorentsi eiro namatavitimpitsi.

⁸ Ocantiro iniro:

—Pincanteri iroacanteri Joa.

Irosati ocantantariri:

—Nocoaque poacanteri Joa, impoiji pimpacotenaro matitaqui iitoni, iotanteari ina queario icamasanotaque.

⁹ Ari yoashiretanaca Eroreshi. Te incoaveteaji, iro cantaincha iquemajeitaqueri maaroni ishaninca icantaquerori irishintotsori.

¹⁰ Irootaque ipescantantacariri Joa.

¹¹ Impoiji yameetaquenero matitaqui iito Joani. Aavaquero, aanaquenero iniro.

¹² Irinti iroamereni yaajeitanaqueri, itijaitiri. Impoiji ijajeitanaque, icamantapaaqueri Jesoshi:

—Yoyeetaqueriyea Joa.

Ijivataquero itasoncaquero Jesoshi tanta, yoshequiaquero.

(Mr. 6.30-44; Ir. 9.10-17; Joa 6.1-15)

¹³ Iquemantacari Jesoshi icamaque Joa, ijatanaque apaniro anta tenta intimeji atiri. Itentajeitanaquena, iro noquenajeitantanacari pitotsi. Iro cantaincha iquemacojeitaqueri atiripee, iponeayetanaca nampitsipeequi, ishiteajeitanaca, yojajeitanaquena.

¹⁴ Ari naatacojeitapaaque, noneajeitapaaqueri oshequi apatojeitainchari. Oshequi icavintsaajeitapaaqueri, yoavisacojeitaqueri mantsiaripee.

¹⁵ Ari ishaavijitanaque catsirincaiteri. Nocarajeitaqueri pashini iroamere, nocantajeivetacari:

—Pamene, caraiteitaque aca, aisati ishaavijiteanaque catsirincaiteri. Pintiancajeiteri yocapee irijajeite nampitsipeequi iramanantajeite iroyeari.

¹⁶ Yacanaquena:

—¿Paita irantsipetashitanteiri irijate? Jentsite, pimpajeiteri avirori iroajeiteari.

¹⁷ Nocantajeitaqueri:

—Te ontimeji nompajeiteriri. Jero oca ocarataque tanta apapacoroni. Jerica aisati apite shima.

¹⁸ Icantaquena:

—Pamaquenaro.

Ari nopaqueri.

¹⁹ Impoiji icantajeitaqueri:

—Pisavicajeite saveshishiqui.

Ari isavicajeitanaque. Impoiji yaavaquero tanta aisati shima. Ari yamenanaque jenoqui, icantiri iriri:

—Irove, Apa, pipaquenaro oca noyearica.

Impoiji icarajaquero, ipaquenaro. Novaajeitaqueneri yora apatojeitainchari.

²⁰ Yoajeitacaro maaroni, iquemajeitanaca. Impoiji napatojeitajiro timaarantapaa-sirsiri, nojaayetajiro cantiriqui, ocarataque 12.

²¹ Naamaaca ari icarajeiti yora oajeitacarori 5,000 shirampari, aisati tsinaneppee, jeri aisati jananequipee.

Yora Jesoshi yanijatiro incajare, te intsitiaquiteji.

(Mr. 6.45-52; Joa 6.16-21)

²² Impoiji icantajeitaquena:

—Noamerepee, pintejeitanajea pitotsiqui, pijivajeitanajena intatiquero.

Impoiji aisati icantajeitaqueri apatojeitainchari:

—Pijajeitanaje pivancopeequi.

²³ Impoiji ijatanaque apaniro toncaariqui, iquenquetsatacaira iriri. Ari otsitenitanaque, itimi apaniro iriori anta.

²⁴ Narojeiquea nainti, noquenacojeitanaque nianquijaqui. Antearo omotoncane, aisati oiipiacotajana tampea.

²⁵ Irotajantsi onquitaitetaje noneajeitavaqueri, yanijatapaaquero incajare, te intsitiaquiteji. Te niojeitavajeriji,

²⁶ irootaque notsaroacajeitancariri, nocajemajeitanaque:

—Jee. Coraqueve camaarira.

Oshequi notsaroacajeitacari.

²⁷ Iro cantaincha icantajeitapaajana:

—Narotaque pocajantsi, piveshireimentajeitavajena, eiro pitsaroacajeitanatsi.

²⁸ Ari icantiri Petero:

—Avirorica novincatsarite, pincajemena nanijatashitanajempi nijaqui.

²⁹ Ari icantiri:

—Caatequeti.

Irosati imitajantanaca, yanijatanaque anta Jesoshiqui.

³⁰ Iro cantaincha impoiji iquenqueshiretaquero tampea, aisati itsaronaque. Ineavaitia itsitianaque, icajemanaque:

—Novincatsarite, paavajena.

³¹ Irosati yacotashitantavajari, yaavajiri. Icantiri:

—Capichaji pishiretaquena, ¿paita pitseencantanari?

³² Ari itetanajaro pitotsi, irosati opeantanaja tampea.

³³ Oshequi nopincatsajeitaqueri, nocantajeitaqueri:

—Queariotaqueteemi, aviro Itomi Tasorentsi.

Yoavisacojeitiri Jesoshi mantsiyetatsiri anta Jenesaretequi.

(Mr. 6.53-56)

³⁴ Ari nomonteajeitanaja, nareejeitapaaja Jenesaretequi.

³⁵ Yora savicajeitatsiri jojeitavaqueri Jesoshi, itiancajeitaqueri ishaninca, yamacanta-jeitaqueri mantsiyetatsiri.

³⁶ Ari yantitapaqueri iitsaare ocaratapai. Yavisacojeitanaji maaroni antitajeitaqueriri.

15

Icantavacaimentajeitaro paita caari acameetsashirejeitanta.

(Mr. 7.1-23)

¹ Impoiji ipocashijeitiri Jesoshi variseopee aisati oametantirori Sanquenarentsi. Iponea-jeitaca iriorijeji Jerosarequi. Isampitapaqueri:

² —Tempa arojeitaque jorio. Amejeivetacaro tequeratsitarica avajeitea, ajivati aquiva-cotasana. Irootaque yoamejeitaqueeri yora peeraniniri. ¿Paita caari iquempejeitanta poamerepee? Yoashinirotaca, te inquivacoteaji.

³ Yacanaqueri:

—Oshequi pimincaratashiyetacaro icantashiyetacaniri peeraniniri, irootaque caari pimatantaro yoamejeivetimpiri Tasorentsi.

⁴Tempa icanti irinti: “Pimpincatsateri piri aisati piniro”. Aisati icanti: “Incameta yora cantimatiriri iriri aisati iriniro”.

⁵Iro cantaincha aviroripee, picantajeitiri pishaninca: “Pincanteri ashitimpiri ‘Nompempime quirequi, noncavintsayempime, iro cantaincha nojivataque nocantaqueri Tasorentsi nomperiri iriori’”. Poamenirojeitiri eiro icavintsairitsi ashtariri, eiro ipincatsatiritsi.

⁶Pineaquero, poametashinrojeitacari icantashiyetacari pishaninca, te poamejeiteriji irineane Tasorentsi.

⁷Pishiicantavetaca piquemisantiri Tasorentsi, iro cantaincha te pinquemisanteriji. Queario oca iquenquetsatacotimpiri peerani Isayashini:

⁸“Icanti Tasorentsi: ‘Icantashijeitaca ipincatsataquena, iro cantaincha te irishirejeitenaji.

⁹Yatsipetashitacaro yapatotimentashitana, te iroametanteroji noneane, irointi yoametantiro irineane iriori’”.

¹⁰Impoiji icajemajeitiri yora apatotimentajeitariri, icantajeitiri:

—Pinquemajeitena, piojeitavaquero oca noncamantempiri:

¹¹ora ayeari, tecatsi oncantero ashire ompeacayearo. Irointiquea oca aneaveetashiyetari, irootaque matirori ashire ompeacayearo.

¹²Impoiji nojatashitiri Jesoshi, nocarajeitiri itsipapee iroamerepee, nocantajeitiri:

—¿Tempa piote iquishimentajeitimpiri variseopee oca picantiriri?

¹³Yacanaquena:

—Coajica intsocajero Apa jenoquiniri maaroni caari ipanquiti iriori.

¹⁴Arinaji yora variseopee: te irioteji, iquempejeitacari caari amenatsi. Oquempetaca icoaque irijate jaocarica, icoaque irancatsatanajeri itsipapee caari amenajeitatsi iriori. Aitaque impariajeitaque omoroqui maaroni, terocn.

¹⁵Icantiri Petero:

—Te nonquemempiji, poametenaro oca pishiicantiri.

¹⁶Icantiri:

—¿Tequerampa ontime piotantari?

¹⁷¿Tempa piote paitarica ayeari ojataque asheitoqui, impoiji ashitajero? Tecatsi oncantero ashire.

¹⁸Iro cantaincha pineanantantaro paitarica piquenqueshiretiri: terica oncameetsateji, eiro picameetsashiretisi.

¹⁹Tempa piojeitiro piquenqueshiretiro caari cameetsatatsi, poanti, paimentaro pijina, pantiro caari pai, picoshiti, pitseeya, picantimatiri pishaninca.

²⁰Irootaque caari picameetsajeitanta. Iro cantaincha terica pinquivacoteaji, tecatsi oncantero pishire.

Yoavisacotiro Jesoshi oshinto canasato.

(Mr. 7.24-30)

²¹Irosati ijatantancari Jesoshi Tiroqui aisati Shiroqui. Itentajeitanaquena maaroni iroamerepee.

²²Ojatashitaqueri cananasato, caari oni jorio. Ocantiri:

—Novincatsarite, tempa aviro ishanincani pincatsari Iravirini. Nocoaque pincavintsayena, aisati noshinto. Yataanaquero iroori camaari, catsiqueti yoanaquero.

²³Iro cantaincha imajeretanaque, te iranqueroji. Nocantajeivetari narori:

—Pincantajero ojatajeta, oshequi ashereajeitaquee.

²⁴Icantiro:

—Itiancaquena Apa noncavintsayeri joriopee.

²⁵Iro cantaincha opocashitiri, otiyeroashitacari, aiquero ocantatiiri:

—Novincatsarite, pincavintsayena.

²⁶Icantiro:

—Te oncameetsateji aapitsateri atomi yoari ampanteariri otsiti. Te aviro jorio, ¿paita noncavintsaaantempiri?

²⁷Acanaqueri:

—Queario, novincatsarite, oca picantiri. Iro cantaincha, tempa yoaro otsiti iroaritsopequi yora ashtariri.

²⁸Yacanaquero:

—Tsinane, cameetsa pishiretaquena. Aitaque nomataquempiro oca picoacotaquenarica.

Irosati avisacotantanaja oshinto.

Yoavisacojeitiri Jesoshi oshequi mantsiaripee anta incajarequi.

(Mr. 7.31-37)

²⁹ Ari yovaanaja aisati Jesoshi, iquenanaque otsapijaqui incajare anta Carireaque. Impoiji itoncaanaque toncaariqui, isavicapaaque. Noijajeitanaqueri narori, aisati iriori maaroni iroamerepee.

³⁰ Ijatashijetaqueri oshequi atiripee, yaajeitanaqueneri oshequi mantsiyetatsiri: choritatsiri, caari shevatacha, caari amenatsi, caari neanatsi, maaroni. Ari yoavisacojeitiri.

³¹ Ari yoajeitanaqueri cavaco maaroni neajeitaqueriri. Ineajeitajiri ineanataji caari neanaveitachani, ishevajeitanaja caari shevaveitachani, yaniiyetanaji caari aniiveitachani, yamenanaji caari amenaveitachani. Icantajeiti:

—Tempa icameetsataque Tasorentsi, yora pincatsariventajeitiriri maaroni joriopee.

Yapiitajiro Jesoshi itasoncajiro tanta, yoshequiajiro aisati.

(Mr. 8.1-10)

³² Impoiji icajemajeitaquena Jesoshi, aisati iriori maaroni iroamerepee. Icantajeitaquena:

—Oshequi nocavintsaajeitaqueri maaroni yora apatotimentajeitanari. Ocarataque meeca mava quitaiteri icarajeitaquene: tecatsi meeca iroajeiteari. Oshequi aajeitaqueri itashe meeca. Ariorica nontiancavetajeari meeca, aitaque ajaajeitanaqueri itashe, eiro yaaveajatsi irarejeitajea ivancoqui.

³³ Nocantajeitaqueri:

—Pamene, caaraiteitaque aca. ¿Jaoca ayerori tanta avacaajeiteariri? Oshequi icarajeiti catsini.

³⁴ Isampitaquena:

—¿Jaoca ocaratiri tanta timatsiri?

Nacanaqueri:

—Ocarataque 7, aisati timatsi shivajaniqui aparopee.

³⁵ Ari icantajeitiri apatojeitainchari:

—Pisavicajeite quipatsiqui.

³⁶ Irosati yaantacaro tanta aisati shivajaniqui. Icantiri iriri:

—Ariove apa, pipaquena noyari.

Impoiji icarajaquero, ipajeitaquenaro. Naajeitavaquero, impoiji novaaajeitaqueneri iriori apatojeitainchari.

³⁷ Yoajeitanaca, iqumajeitanaca. Impoiji napatojeitajiro timaarantapaajantsiri, nojajiro cantiriqui ocarataji 7.

³⁸ Icarajeiti oajeitainchari 4,000 shirampari. Aisati oajeitainchari oshequi tsinane aisati jananequipee.

³⁹ Impoiji itiancajeitajiri Jesoshi:

—Meeca pijajeitanaje pivancopeequi.

Irosati notejeitantanaja pitotsiqui, nomonteanaja anta Macataraque.

16

Icoaveta saserotepee irineerime Jesoshi intasoncanteme.

(Mr. 8.11-13; Ir. 12.54-56)

¹ Impoiji ipocashitaqueri variseopee aisati saroseopee: icoajeivetaca irantacayerime Jesoshi caari cameetsatsi ontimanteameri inquisantearimeri. Icantavetapaacari:

—Jentsite, namenempi pintasoncante, niotanteari piponeacarica inquitequi.

² Yacanaqueri Jesoshi:

—Pamene, ariorica ishaavijiiteanaji, pineaquerorica opotsonaiteanaji, tempa picantajeiti: “Eiro oparii incani”.

³ Iro cantaincha, oquitaitetamani, pineamaneririca iquiteriteamaniro catsirincaiteri, aisati otsiteniiteamani, ari picantajeiti: “Ompariye meeca incani”. Piojeitaque jaoca ocanta inquite, pioti ompariaquerica incani. Iro cantaincha te piojeiteroji maaroni pineaqueri meeca quipatsiqui.

⁴ Te pincameetsajeiteji, oshequi pitseencajeitaqueri Tasorentsi: picoajeiveta pineena nontasoncante, iro cantaincha eiro nonijaimpirotsi. Apatiro pineaqueri coajicani oca ishiacantiri Jonashi.

Irootaque icantaqueriri Jesoshi, irosati ijatantanaja.

Ishiacantiniri Jesoshi tapiacaarori itantane variseo aisati saroseo.

(Mr. 8.14-21)

⁵ Ari narejeitanaca intatiquero, nocarajeitiri itsipapee iroamere. Impoiiji noquenqueshirejitaquero tanta: tecatsi namaque.

⁶ Icantajeitaquena Jesoshi:

—Paamayearoyea tapiacaarori itantane variseopee aisati saroseopee.

⁷ Ari nosampitavacaaca:

—¿Paita icantanteeri: “Paamayearoyea tapiacaarori itantane”? Te ameji tanta, iroitatsi icantantaqueeri.

⁸ Iotashitaca Jesoshi nocantajeitaqueri, icantajeitana:

—Te pishiretasanojeitenaji. ¿Paita picantantari: “Te ameji atantane”? ¿Paita piquenqueshiretantacari?

⁹ ¿Tequerampa piojeiteji? Chapinqui otimaveta tanta apapacoroni, iro cantaincha noacaajeitacari 5,000 shirampari. Paajeitajiro timaarantapaajantsiri: ¿Jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 12.

¹⁰ Aisati impoiiji ocarati tanta 7, noacaajeitacari 4,000 shirampari. ¿Jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 7.

¹¹ Icantana:

—¿Paita caari piojeitanta meeca? Te nonquenqueshireteroji tanta pipeacotanacari. Queariompia, paamayearoyea tapiacaarori itantane variseopee aisati saroseopee.

¹² Impoiiji niojeitanaque te inquenqueshireteroji tapiacaasantorori tanta, irointi ishiacaventiro maaroni yoametantayetiri variseopee aisati saroseopee. Te irininteji Jesoshi iramatavijeitee yora variseo aisati saroseo.

Icantiri Petero Jesoshi: “Avirotaque Quirishito”.

(Mr. 8.27-30; Ir. 9.18-21)

¹³ Impoiiji nojajeitanaque anta Sesareaqui: ora nampitsi yovetsicacantaqueri Jiripo. Ari icantaquena Jesoshi:

—Noponeanaca narori inquitequi, natiritapaaque, iro cantaincha ¿paita yaamaajeitaquenari atiri, janicana?

¹⁴ Nacanaqueri:

—Icanti aparopee: “Irioyeata Jesoshi Joani, yora vaotisantantaveitachaniri, itinaanaja”. Icanti itsipapee: “Irioyeata Iriashini, yonijantaja”. Icanti itsipapee: “Irioyeata Jerimishini, yonijantaja”. Irio itsipa ijijeitimpi aviro quenquetsacantatsiniri, pitinaanaja.

¹⁵ Ari isampitana:

—Avirojei, ¿paita picantajeitiri avirori?

¹⁶ Yacanaqueri Shimo Petero:

—Avirotaque Quirishito naamaajeitari. Aviro Itomi Tasorentsi, yora Aneasanotatsiri.

¹⁷ Icantiri:

—Queario picantaque, Shimo itomi Jonashi. Te irio oamejeitempirone atiri, irinti Apa jenoquiniri oametimpirori.

¹⁸ Nopajitimpi Petero: ocanti pivajiro “Mapi”. Nocoacaquempi poamejeiteri atiri noamejeitaquempiri avirori. Eiro imatiritsi camaari iroashinoncaajeiteri quemisantajeiteroneri pincamanteriri.

¹⁹ Noametempi paitarica irantajeiteri atiri irineanteariri Tasorentsi anta ipincatsaritinta. Eirorica piquemisantacairi atiri aca quipatsiqui, eiro ijatitsi inquitequi; irinti maaroni pinquemisantacaajeiteri irisavicajeite anta inquitequi.

²⁰ Impoiiji aisati icantajeitana:

—Eiroyea picamantiritsi atiri: “Iriotaque Jesoshi Quirishito”.

Yora Jesoshi icamantitacari iroamere incame.

(Mr. 8.31-33; Ir. 9.22)

²¹ Impoiiji icamantaquena Jesoshi:

—Irotaintsi nojate Jerosarequi. Anta oshequi iroashinoncaajeitena yora savicacantatsiri, yora jivatacaajeitiriri saserotepee, yora oametantirori Sanquenarentsi, maaroni. Aitaque oncanteari iroyeetena, iro cantaincha oncarate mava quitaiteri, ari nontinaanaje aisati.

²² Iro cantaincha ipiatsatacari Petero:

—Novincatsarite, te oncameetsateji oca picantaqueri. Eiro pashinoncaatsi, eiro picamitsi.

²³ Ari ipitsocashitanacari Jesoshi, icantiri:

—Pijate, piquempetacari Satanashi. ¿Paita pitseencantaquenari? Te pioteroji icoacaquenari Tasorentsi, irointi piotaque icoacaquenari atiri.

Icamantiri Jesoshi paita icoacairi maaroni oijajeitiri.

(Mr. 8.34-38; 9.1; Ir. 9.23-27)

²⁴ Impoiji icantajeitana:

—Picoasanotirica pinquemisantasanotena, eiro pantanonatsi avisati, irointi pim-pomerentsiventenaro paitarica noncoacaquemperi narori. Ariorica iroashinoncaimeteetempiro, iro cantaincha pinquemisantasanotanaquena.

²⁵ Yora coavetachari incavintsayeia irisati irashinoncayea; irintiquea yora caari cavintsaachane irisati irineeri Tasorentsi irinti.

²⁶ Ariorica intime ashiyetarori maaroni timayetatsiri quipatsiqui, iro cantaincha eiorica ijati inquitequi, tempa yatsipetashitacaro maaroni. Pineaquero, tecatsi pincantea pimpinateri Tasorentsi irisavicacantempiri anta inampiqui.

²⁷ Noponeaca narori inquitequi, natiritapaaque. Coajica nompiaje aisati aca, nontsipatapaaqueari nonampirepee, nompincatsaritapaaque, nonquempeteari Apa. Nompinajeiteri maaroni quearioventanarori nocoacairi. Irinti maaroni caari quemisantana, noashinoncaajeiteri.

²⁸ Queario oca noncamantempiri: eirotsitarica picamajeititsi avirori, pineajeitavajena nompocaje, nompincatsaritanotapaaje.

17

Ipashinitanaque Jesoshi.

(Mr. 9.2-13; Ir. 9.28-36)

¹ Ari 6 nomaajeiti, impoiji yora Jesoshi yaajeitanaqueri Petero, Santiaco, jeri Joa, yora irirenti Santiaco. Yaajeitanaqueri anta antearoqui toncaari.

² Ineajeitavaqueri ipashinitimojeitanacari. Ishipaqueareavorotanaque, iquempetanacari catsirincaiteri; aisati iitsaare, oquitamarotasanotanaque catsini.

³ Imapocaqueri Moishishini, jeri Iriashini: iquenquetsatacapaaqueri Jesoshi.

⁴ Yora Petero, icantiri Jesoshi:

—Novincatsarite, aitanaquempaquea nopocajeitacae naroripee aca, noneajeitacuempi nainti. Pincoaquericca, novetsicuempiro mava pancotsijaniqui: aparoni pashi, aparoni irashi Moishishi, iro otsipa irashi Iriashi.

⁵ Irosati omapocantapaacari omaaroncapaaca mencori, oshipaqueireapaaque iroori. Isavicaque Tasorentsi mencoriqui, icanti:

—Iriotaque yoca notomi nonintasanotiri, oshequi noveshireimentasanotacari. Pinquemisantajeiteri.

⁶ Iquemajeitantacarori iroamerepee oca, itarecajeitanaca, oshequi yoajeitanaqueri cavaco.

⁷ Iro cantaincha ipocashitaqueri Jesoshi, ipamijeitacueri. Icantiri:

—Pincatijajeitanaje, eiro pitsaroajeititsi.

⁸ Ari yamenajeitanaji: tecatsi irineaje, apaniro inaji Jesoshi.

⁹ Impoiji yoirincajeitanaja, icantajeitiri:

—Eirota picamantitatsi oca pineaqueri. Arioricaquea noncamaque aisati nontinaanaje, irosatiquea pincamantantayetaqueari itsipapee atiri. Tempa noponeaca inquitequi, natiritapaaque.

¹⁰ Ari nocantajeitacueri:

—Yora oametantirori Sanquenarentsi icantajeiti: “Irotaintsirica impoque Quirishito, irijivatapaaque ironijantapaaaje Iriashini”. ¿Paita icantajeitantarori oca?

¹¹ Yacanaquena:

—Queario icantaqueri: “Ironijantapaaaje Iriashini, irovetsicajeitacueri maaroni”.

¹² Noncamantempi: nijantaja inaji Iriashini, iro cantaincha te iriojeitavaqueriji atiripee, oshequi yoashinoncaajeitacueri. Aisati narori, oshequi iroashinoncaajeitena.

¹³ Impoiji niojeitanaque iquenquetsatacotaqueri Joa, yora vaotisantatsiri.

Yoavisacotiri Jesoshi evancari camanatatsiri.

(Mr. 9.14-29; Ir. 9.37-43)

¹⁴ Ari narejeitapaaca anta itiminta oshequi atiri yapatojeitaca. Irosati ipocashitanacari Jesoshi shirampari. Itiyeroashitapaacari, icantapaaqueri:

¹⁵ —Novincatsarite, pincavintsayeri notomi: oshequi icamanatapiniti, oshequi yashinoncaapinitaca. Ipariapiniti paamariqui, itaapinita, pomein: aisati ipincapiniti ojaqui, pocn, pocn.

¹⁶ Naavetanacanari poamere, nocantavetari: “Poavisacotajenari”, iro cantaincha te irimateriji.

¹⁷ Ari icantajeitana Jesoshi:

—Te pinquemisantajeiteji, te pincameetsajeiteji. ¿Jaoca oncarate nontsipajeitempi pitanteari? Oshequi pitseencajeitaquena.

Impoiji icantiri ashitariri itomi:

—Jentsite, pamaquenari pitomi.

¹⁸ Ari iquisatsataqueri camaari, irosati ijabatantaja. Irosati yavisacotantaja yora evancari.

¹⁹ Impoiji nomanacaacari nosampijeitiri:

—¿Paitaquea caari nomatantaro noavisacojeiteri narori?

²⁰ Icantajeitaquena:

—Iro caari pimatantaro te pinquemisantimateji capichaji. Queario oca noncamantempiri: pinquemisanterica capichaji ari pincantero oca toncaari: “Povaanajea anta”, ari ovaanajea. Pinquemisantanoterica, tecatsi pomerentsitimotempine.

²¹ Iro cantaincha pincoaquericapojokeri camaari quempetariri yoca, ocameetsati pinquenquetsatacaasanoteri Tasorentsi aisati pintitea.

Yapiitajiniri aisati Jesoshi, icantajiri iroamere: “Irotaintsi noncame”.

(Mr. 9.30-32; Ir. 9.43-45)

²² Ari nontsipajeitacari Jesoshi anta Carireaquei: narori aisati maaroni itsipapee iroamere. Icantajeitana:

—Noponeaca narori inquitequi, natiritapaaque. Irotaintsi irayeeena,

²³ iroyeeena. Oncarate mava quitaiteri nontinaanaje aisati.

Noquemajeitantariri, oshequi noashirejeitanaca.

Ipinataquero Jesoshi yovetsicantayetarori ivanco Tasorentsi.

²⁴ Impoiji nojajeitanaque Caperenaocui. Ainiro anta itimi yora quempoyeiriri quirequi yoameetsatantayetarori ivanco Tasorentsi. Ari ijabatashitiri Petero, isampitiri:

—¿Ipashitapinitarimpa oametimpiri iirequite, yoameetsatantayetarori ivanco Tasorentsi?

²⁵ Yacashitanacari:

—Je, ipiri.

Impoiji ipianaja Petero pancotsiqui. Isampitavaqueri Jesoshi:

—Shimo, ¿paita piquenqueshiretiri? Yora pincatsaripee, ¿janica icoacotapinitiri iirequite? ¿Icoacotirimpa ishanincasanori? Terica, ¿irintimpa icoacotiri itsipapee atiri?

²⁶ Yacanaqueri:

—Tempa icoacotiri itsipapee atiri.

Ari icantiri:

—Queario, tecatsi incoacoteri ishanincasanori. Aisati oquempetaca narori, tecatsi incoacotena Apa: tempa noshanincatacari.

²⁷ Iro cantaincha te noninteji ontime inquishmentenari yora quempoyeiriri quirequi. Meeca pijate incajerequi, pimpitasate. Ariorica paaque shaori, pinquirancaqueri, pineaqueri ivantequi quirequi. Paavaqueri, impoiji paanajeneri yora quempoyeiriri quirequi, pimpapaaqueri. Iriotaque avinarojei, avirori aisati narori.

18

Iquenquenquetsatacotaqueri Jesoshi pincatsatachaneri anta inquitequi.

(Mr. 9.33-37; Ir. 9.46-48)

¹ Impoiji, nocarajeitaqueri itsipapee iroamere, nojatashijeitaqueri Jesoshi, nosampijeitiri:

—Anta ipincatsaritinta Tasorentsi, ¿janica intsipateari impincatsaritanote?

² Ari icajemaqueri jananequi, isatecaqueri nianqui,

³ icantajeitana:

—Queariotaque oca noncamantempiri: pinquenqueshirejeitea, paventajeiteari Tasorentsi; nocoaque pinquempejeiteari yoca jananequi, pishiretasanotena. Eirorica pishiretasanotanatsi, eiro pineirotsi ipincatsaritinta Tasorentsi.

⁴ Te irishemetaji yoca: maaroni quempetearine impincatsaritanotanaque anta inquitequi.

⁵ Ariorica paacameetsateri quempetariri yoca jananequi, paacameetsajeitena narori.

⁶ Iro cantaincha ariorica pantacayeri caari cameetsatsi, noasanquetasanotempi. Ocameetsateme pijivateme pincameme eiro pantacantarime caari cameetsatsi. Tecatsi noasanquetimentempimeri.

⁷ Queario intime antayerone caari cameetsatsi, iro cantaincha oshequi irashinon-caajeitanaquea yora antacairiri.

ICantiri Jesoshi: "Pantirocari caari cameetsatsi".

(Mr. 9.42-48; Ir. 17.1-2)

⁸ Aisati icanti Jesoshi:

–Meeca noshiacontempiro. Ariorica antacayempi paco caari cameetsatsi, pim-pesajero, pojocajero; aisati pinquempetero piiti antacayempirica caari cameetsatsi. Ocameetsaveta pinqueapontsoquitapaaje anta inquitequi, te oncameetsateji ontime apite paco, irootaque pijatanteari Sharincaveniqui, aisati te oncameetsateji ontime apite piiti, irootaque pijatanteari Sharincaveniqui. Ainiro anta paamari caari tsivacanetatsi: queario-piquemaatsicatarocari.

⁹ Aisati ariorica antacayempiro poqui caari cameetsatsi, pinquitsoreero, pojoquero. Ocameetsati pinqueanaraquitaje inquitequi; te oncameetsateji ontime apite poqui, irootaque pijatanteari Sharincaveniqui pinquematsicantearori paamari. Pineaquero, te oncameetsateji catsini pantero caari cameetsatsi.

ICanti Jesoshi: "Eiro pitseenquiritsi jananequipee".

(Ir. 15.3-7)

¹⁰ Aisati icanti Jesoshi:

–Aisati eiro catsini pitseenquiritsi jananequipee. Ainiro inampirepee Apa quempoyeav-tantajeitaqueriri jananequipee, camantacoventapinitiriri.

¹¹ Noponeaca narori inquitequi, natiritapaaque. Nopocashitaqueri jatatsinimeri Sharincaveniqui, noavisacotantajeiriri.

Ishiacantiri Jesoshi ovisha peainchari.

(Ir. 15.4-7)

¹² Aisati icantajeitana Jesoshi:

–Noshiacontempiro aisati. Ariorica intime ashitariri 100 irovishate. Impeaquearica aparoni, tempa irashitacotanaqueri yora 99 irovishate iramenantajeiriri yora peainchari. ¿Paita piquenqueshirejitiri avirori?

¹³ Irineajeririca aisati, ¿iriompa iriveshireimetea yora apatojeitainchari caari peacha? Te, irintiquea iriveshireimetea yora peavetainchari. Tempa queario.

¹⁴ Aisati iquemeta yora Apa jenoquiniri: te incoyeji irijate Sharincaveniqui aparoni jananequi.

ICantaqueri Jesoshi: "Poameteri pishaninca eiro yantantarotsi caari cameetsatsi".

(Ir. 17.3)

¹⁵ Aisati icantaquena Jesoshi:

–Ariorica irantero pishaninca caari cameetsatsi, irootaque poashiretacotanteariri, ocameetsati pijatashiteri, pincanteri. Apaniro pijatashiteri, eiro picamantiritsi itsipapee. Ariorica inquemisantempi cameetsa irisavicantajeiri, ari pinquempetacantajeiri pirenti, paacameetsatavacaajea aisati.

¹⁶ Iro cantaincha eiorica iquemisantimpitsi, pijatashitajeri aisati, paanaqueri itsipa piyemisantaririnte: ariorica aparo, ariorica apite. Intsipajeitempi iriotanteari paitarica pincanteriri, aisati intsarojeitapeeri iriori.

¹⁷ Eiorica iquemisantajeitimpi, ari pincamantajeiteri maaroni piyemisantaririnte, intsarojeiterita iriori. Eiorica iquemisantajeitiri, ari pinquempetacaajeari tseencantat-siri, antirori caari cameetsatsi; eiro picantajiritsi quemisantatsiri.

¹⁸ Paitarica pincantajeiteriri incanteri aisati iriori Tasorentsi. Pincantajeiteririca ainiro irantane, aisati incanteri iriori Tasorentsi. Pincantajeiteririca te aneroji irantane, aisati inquempetea iriori Tasorentsi.

¹⁹ Nampiitajempiro: irosatirica pincantajeiteriri avirori Apa jenoquiniri; ariorica pinc-arajeite apite, ari inquemisantasanojeitempi.

²⁰ Jaocarica irampatotimentenari apite quemisananari, ariorica mava, aisati narori noncarajeitaqueri.

Yoamejeitiri Jesoshi: "Pincavintsante".

²¹ Impoiji yora Petero isampitiri Jesoshi:

–Novincatsarite, inquisshenarica noshaninca, tempa ocameetsati noncavintsayeri, eiro nopiataritsi. Iro cantaincha irampiitapinitarica inquisaquena, ¿jaoca oncarate noncav-intsaapiniteri? ¿Ariompa oncarate 7?

²² Yacanaqueri:

—Irosati pincanteani pincavintsayeri: eiro pipiataritsi catsini.

²³ Noshiacantempiro jaoca icanta Tasorentsi ipincatsariventanti. Itimi pincatsari coatsiri impinatajeri iratiritepee.

²⁴ Icajemaqueri aparoni, irevitiriri oshequi quirequi catsini. Icantavetari: “Pimpinatajena”.

²⁵ Yacanaqueri: “Tecatsi noncantea nompinatajempi”. Ari icantiri pincatsari itsipapee: “Payeri yoca. Pimpimanteri, pimpimantero ijina, itomipee, irovaararo, maaroni, naantajeari quirequi irevitanari”.

²⁶ Iro cantaincha itiyeroanaca quipatsiqui yora irevitiriri, icantiri: “Eirotsita pipimantanatsi. Coajica nompinatajempiro, maaroni”.

²⁷ Ari oshequi icavintsairi ivatorote, icantiri: “Aitanaji, moncarataca, eiro nocoacotajimpitsi”.

²⁸ Ari ijatanaque yora irevitantavetachari. Iquenanaque avotsiqui, itonquiotavacari irevitiriri iriori capichaji. Icativacaqueri itsanoqui, icantiri: “Pishintsite pimpinatajena ora pivevitanari”.

²⁹ Ari itiyeroavetanaca iriori, icantavetari: “Eirotsita picoacotanatsi, coajica nompinatajempi maaroni”.

³⁰ Iro cantaincha te incavintsayeriji irinti. Yoiminqeacantaqueri, icantiri: “Ariorica pimpinatajena maaroni, noncanteri iroimisoquijajempi”.

³¹ Ari ineantacariri itsipapee, yoashirejeitanaca. Ijatashitaqueri ivatorote, icamantaqueri: “Noneaqueri yoranqui picavintsairi, te incavintsanteji irinti. Yoiminqeacantaqueri irevivetariri irinti capichaji”.

³² Ari icajemacantaqueri ivatorote, icantiri: “Picantaquena: ‘Eirota pipimantanatsi’, irootaque nocavintsasaanotantaquempi, nocantimpi: ‘Aitanaji, eiro pipinatajanatsi’. Iro cantaincha te pincameetsateji avinti.

³³ Tempa oncameetsateme pincavintsayerime avirori yora irevivetimpiri capichaji, pinquempetename narori nocavintsaaquempi”.

³⁴ Ari iquisaqueri, yoiminqeacantaqueri, icantiri: “Meecaquea aviroriniro, ariorica pimpinatanotajena maaroni, ari noimisoquijajempi”.

³⁵ Ari piojeitaquero oca noshiacantimpiri. Eirorica picavintsanti, iroasanquetasanotempi Apa jenoquiniri, pinquempeteari yora noquenquetsatocotiri.

19

Ijataque Jesoshi Joreaqui.

¹ Ari iquenquetsatacana Jesoshi chapinqui anta Carireaque. Impoiji yovaanaja Joreaqui, anta Joriraniqui intatiquero. Noijatanaqueri narori, aisati itsipapee iroamere.

² Aisati yoiijaiteaqueri oshequi itsipapee atiri. Aisati oshequi yoavisacojeitaqueri mantsiyatetsiri.

Iquenquetsatocotiri Jesoshi joquirori ijina.

(Mr. 10.1-12; Ir. 16.18)

³ Aisati ijatashitaqueri Jesoshi variseopee. Icoavetaca incomitacayearime, irootaque isampitantavetariri:

—¿Ocameetsatimpa irojocajero shirampari ijina?

⁴ Yacanaqueri:

—Tempa pineanatapinivetaro Sanquenarentsi. Peerani yovetsicaqueri Tasorentsi shirampari aisati tsinane,

⁵⁻⁶ aisati icanti: “Ariorica irayero shirampari ijina, inteentareanaqueri iriri aisati iriniro, iro cantaincha te noncoacayeriji irojocajero ijina. Nocoaque quiso iroanaquero. Peerani inashiveitani shirampari aisati ijinatsori, iro cantaincha ariorica iraaquero, onquempetaquea apaniro irinaque, eiro yojocavacaajatsi”. Tempa aitaque itsipatacaacari Tasorentsi, te oncameetsateji irojocacaajeri atiri.

⁷ Ari isampitiri aisati:

—¿Arimpa? ¿Paita icantantariri Moishishi peerani: “Pisanquenatenero pijina paperi pojocantearori, impoiji ocameetsati pojocajero”?

⁸ Yacanaqueri:

—Te pincameetsashireteji, irootaque icantantimpiri Moishishi ocameetsati pojocajero pijina. Iro cantaincha te incoacayempiji Tasorentsi pojocajero. Icoacaquempi eiro pojocajirotsi catsini.

⁹ Nocantimpi narori, ariorica pojocajero pijina impoiji paaje pashini, aitaque paimentaquero pijinasanori. Apatiroti ariorica ojivate aimentempi, ocameetsaveta pojocajero.

Iquenquetsatacotiri Jesoshi caari aatsi ijina.

(Mr. 10.1-12)

¹⁰ Impoiji, nocarataqueri pashini iroamere, nocantaqueri Jesoshi:

—Ariompa, jaata eirota naitame nojina narori.

¹¹ Icantaquena:

—Eiro pimajeitirotsi pinquemajeitero oca nocantaquempiri. Apaniro inquemero yora yoametasanotiri Tasorentsi.

¹² Timatsi caari matiro iraye ijina: irosati itimapaaque. Timatsi itsipa yaitsoquiyeeitiri, caari yaanta ijina. Timatsi pashini caari coatsi iraye. Icoaque intimashitea inquearioventeneri Tasorentsi paitapeerica iranteneriri. Pimaterorica pinquemero oca, ari pinquengeshiretero.

Ipamijeitiri Jesoshi jananequipee.

(Mr. 10.13-16; Ir. 18.15-17)

¹³ Impoiji yamaqueneri Jesoshi jananequipee, icantajeitiri:

—Pimpamiteri notomipee, pincanteri Tasorentsi incavintsaajectenari.

Nocantajeivetari:

—Eiro pashereiritsi Avincatsarite.

¹⁴ Iro cantaincha icantana:

—Eiro picantiritsi: nocoaque iramajeitenarita jananequipee. Iojeiti iriori ipincatsajeitaquena. Maaroni quempetariri yoca irisavicajecte anta ipincatsaritinta Tasorentsi.

¹⁵ Irosati ipamijeitantavacari, icantiri Tasorentsi:

—Apa, nocoaque pincavintsaajecteri yoca jananequipeeca.

Impoiji ijatanaji.

Jero oca icamantiriri Jesoshi ashitaarantachari.

(Mr. 10.17-27; Ir. 18.18-27)

¹⁶ Impoiji ijatashitaqueri Jesoshi aparoni evancari, isampitapaqueri:

—Oametantatsiri, picameetsataque. ¿Paita cameetsatatsiri nanteri narori nosavicanteari anta inquitequi, noncantaitiyempañi?

¹⁷ Ari icantiri:

—¿Paita picantantanari: “Picameetsataque”? Itimi aparo cameetsatatsiri: yora Tasorentsi. Iro cantaincha pincoaquerica pijate inquitequi, pantajeitero maaroni icantiriri Moishishini.

¹⁸ Icantiri:

—Otimi oshequi icantayetiniri: ¿paita picoaqueri nanteri?

Yacanaqueri:

—Eiro poantitsi, eiro pantirotsi caari pai, eiro picoshititsi, eiro pitseeyacotaritsi pishaninca,

¹⁹ pimpincatsateri piri aisati piniro; oquempetaca pininta avisati, aisati pinintajeiteri itsipapee iriori.

²⁰ Icantaqueri:

—Aitaque nomatitacaro nojananequitapaini, irosati meeca. ¿Paita pashini nanteri?

²¹ Yacanaqueri:

—Picoaquerica pintsoteaquero maaroni, pijate pimpimantero maaroni timimojeitim-piri, pimperi ashinoncachari maaroni ovinaro; impoiji impinatempi Tasorentsi, ontime pivaararo inquitequi. Ariorica pimpimantero maaroni, tsame poijatanaquena narori.

²² Iquemavaitiuro oca, ijatanaque, yoashiretanaca. Otimi oshequi irovaararo, te incoyeji impimantero.

²³ Impoiji icantajeitana Jesoshi:

—Queario oca noncamantempiri: opomerentsitomotari ashitaarantachari irijate anta inquitequi.

²⁴ Nampiitajempiro: tempa opomerentsitaca inqueero cameyo omorojaniqui quitsapi. Iro cantaincha opomerentsitasanotaca catsini irijate ashitaarantachari anta ipincatsaritinta Tasorentsi.

²⁵ Noquemajeitantarori oca noajeitanaqueri cavaco. Nosampitiri:

—¿Ariompa? ¿Janica meeca materone iravisacotaje?

²⁶ Yamenaquena, icantaquena:

—Eiro imatirotsi atiri, iro cantaincha irinti Tasorentsi irimataquero maaroni. Tecatsi ompomerentsitomoteari irinti.

Te irantsipetashitearoji quemisantatsiri yojatasanotanaqueri Quirishito.

(Mr. 10.28-31; Ir. 18.28-30)

²⁷ Icantaqueri Petero:

—Pamene, nocoasanojeitaque noijatanaquempi, irootaque nojocajeitantacarori maaroni timimojeivetanari. ¿Paita naayetajeri coajicani aisati?

²⁸ Icantajeitana Jesoshi:

—Queario oca noncamantajeitempiri, tempa noponeaca inquitequi, natiritapaque: coajica ontime quipatsi iroaquerari. Narori, nosavique anta novincatsarimentoqui, nompincatsatanotaque. Aisati aviorrijei, pincarajeitena pimpincatsarijeitanaque, ontime 12 pivincatsarimentopee pisavicajeitanteari aviorripee. Pimpincatsariventajeiteri maaroni joriopee.

²⁹ Ariorica poijajeitanaquena, tecatsi pantsipejeitea. Ariorica pojocanaquero pivancopee, porentipee, pitsiropee, piripee, piniropee, pitomipee, piipatsite, paitapeerica. Iro cantaincha ariorica poijatasanoatanaquena, te pantsipetashijeitearoji. Ariorica pojocanaquero aparo, impajempi Tasorentsi 100. Aisati irajaaitanaquempi inampiqui pisaviquimojeitanteari iriori, pincantaitiyempani.

³⁰ Itimajeti meeca oshequi pincatsarijeitatsiri aca quipatsiqui, iro cantaincha eiro ipincatsarijeitajitsi inquitequi: ariorica aparopee pincatsaritanajantsine. Aisati itimajeti meeca oshequi ashinoncaajeitachari, iro cantaincha coajica anta inquitequi impincatsaritaarantapaaje.

20

Iquenquetsatacotaqueri tsameejeitatsiri anta ovamashiqui.

¹ Pashini aisati icanti Jesoshi:

—Noshiacontempiro aisati jaoca icanta Tasorentsi ipincatsariventanti. Itimi ashitarori irovamashite. Tsiteniquera ijatamani nampitsiqui irameneri tsameetenerine.

² Ineapaaqueri coatsiri intsameeteneri, icantiri: “Ariorica pintsameetena meeca, irosati ishaaviniji, nompinajeitempi aparoni quirequi: yora pajitachari tenario”. Icantajeiti: “Ari cameetsa”. Ari icantiri: “Meeca pijajeite, pintsameejeite”. Ijajeitanaque, itsameejeiti.

³ Impoiji ijenoquitapaaque catsirincaiteri, ijatanaji aisati nampitsiqui yora ashitarori irovamashite. Ineapaaqueri itsipapee shirampari, icatiashijeitaca anta, tecatsi irantajeite.

⁴ Icantiri: “Ariorica pintsameejeite anta novamashitequi, cameetsa nompinajeitaquempi”. Icantajeitiri: “Ari”. Irosati ijajeitantanaca, itsameejeiti.

⁵ Aisati tampatica ijati nampitsiqui, itsameetacaajeitiri itsipapee. Aisati ishaaviniji itsameetacaajeitiri itsipapee aisati.

⁶ Impoiji aisati antoo ishaavijiteanaji, ijatanaji nampitsiqui. Ineapaaqueri caari tsameejeitatsi. Icantajeitiri: “¿Paita patsipetashijeitantari picatiashijeitaca? Te pintsameejeiteji?”.

⁷ Yacajeitanaqueri: “Tecatsi tsameetacaajeitenane”. Icantiri: “Pintsameejeite novamashitequi, pincarajeiteri yora jivajeitanantsiri incaranqui”.

⁸ Ari otsimancaiteanaji, yora ashitarori icantiri quempoyeiniriri iirequite: “Pincajemajeiteri maaroni tsameetacotanarori novamashite, pimpinajeiteri. Pijivateri pimpinajeiteri yora impoitatsiri itsameejeiti. Impoiji pimpinajeiteri jivajeitatsiri itsameejeiti oquitaitetamani”.

⁹ Ari ipocajeiti yora impoitatsiri itsameejeiti: capichaji itsameejeiti iriori, iro cantaincha ipinajeitaqueri aparoni tenario. Aisati imoncaratavacaajeitaca ipinajeitaqueri maaroni.

¹⁰ Impoijiniquea ipocajeiti iriori yora intamanarori itsameejeitamani. Ijashijeivetaca iranaacojeiteri impinajeiteri. Iro cantaincha ipinajeitaqueri aisati aparoni tenario.

¹¹ Ineatiri iirequite, iquisatsataqueri yora tsameetacairiri,

¹² icantiri: “Yora impoitatsiri itsameejeiti capichaji, iro cantaincha imoncarataquena pipinataquena. Nainti nojatitamanaca oquitaitamani notsameeti, opomerentsivetaca, oshequi nomasavitaque. Oncameetsateme nanaacoterime nayeri quirequi”.

¹³ Ari icantiri: “Noshaninca, te namatavijeitempiji. Tempa nocantimpi oquitaitetamani: ‘Nompinatempi aparoni tenario’; picantajeivetana: ‘Ari, cameetsa’.

¹⁴ Paanajeri meeca piirequite, pijajeitaje pivancoqui. Nopinatashitacari yora impoitatsiri itsameeti aparo tenario imoncaratantaquempiri.

¹⁵ Tempa ocameetsati nopashitacari noirequite. ¿Paita caari picoanta noncavintsayeri?”

¹⁶ Aisati noncamantempi: anta inquitequi impincatsarijeitanaque yora caari pincatsarijeitatsi aca quipatsiqui. Yorari irinti pincatsarijeivetachari aca, eiro ipincatsarijeitajitsi anta inquitequi. Aisati icantajeivetari Tasorentsi oshequi atiri: “Pinquemisantena”, iro cantaincha te inquemisantajeiteji, irootaque caari irijajeitantea iriori inquitequi.

Yapiitajiro aisati Jesoshi, icanti: “Noncame, aisati nontinaanaje”.
(Mr. 10.32-34; Ir. 18.31-34)

¹⁷ Ari impoji i jatanaque Jesoshi Jerosarequi, itentajeitanaquena narori, aisati itsipapee iroamere. Apaniro icantajeitanaquena:

¹⁸ —Meeca ajajeite Jerosarequi. Ari noponeanaca narori inquitequi, natiritapaaque. Irotaintsi irayena jivatacaajeitiriri saserotepee aisati yora oametantirori Sanquenarentsi, incantena: “Te pincameetsateji”.

¹⁹ Incanteri oromasati: “Payeri Jesoshi, poyeri”. Irishirontimentajeitena iriori, impasanajeitena, impajacojeitena coroshiqui, noncame. Oncarataque mava quitaiteri irointinaajena aisati Apa.

Ojashitiri Jesoshi ijina Severeo.

(Mr. 10.35-45)

²⁰ Impoji ojatashitiri Jesoshi ijina Severeo, otsipatari otomipee: yora Santiago aisati Joa. Otiyeroashitapaacari, ocantapaaqueri:

—Nocoaque pincavintsayena.

²¹ Isampitiro:

—¿Paita picoiri?

Ocantiri:

—Coajica, ariorica pimpincatsaritanotanaque, nocoaque irisaviquimotempi notomipee: aparo irisavique pacosanoriqui, irio itsipa irisavique pampatequi. Pincanteri incarajeitimpi impincatsarijeitanaque.

²² Icantiro, aisati icantiri otomipee:

—Te pioteji paitarica picoacotanari. Oshequi nonquematsicayetearo paitapeerica.

¿Tempa pintsaroacayearo pinquematsicayetearo avirori?

Yacanaqueri:

—Te nontsaroacayearoji, ari nomataquero narori.

²³ Ari icantiri:

—Queario pinquematsicayetearo. Iro cantaincha te naro cantatsine janicarica saviquimotenaneri coajica: irio cantatsine Apa, irinti.

²⁴ Noquemajeitantarori oca icantajeitiriri, noquisajeitakeri yora Santiago aisati Joa; iro noquisantacariri, icoaveta impincatsariteme.

²⁵ Iro cantaincha icajemajeitanaquena Jesoshi, icantajeitanaquena:

—Piojeitaque yora ivincatsaritepee itsipapee atiri yamejeitaca iperanajeitacari ishanincapee.

²⁶⁻²⁷ Iro cantaincha eiro piquempejearitsi. Eiro picoajeititsi avirori pimperanajeitacari pishanincapee. Pincoaquericca pimpincatsariventante pintacojeitacari pishaninca, eiroquea piperanajeitacari. Pantajeiteneri pishaninca paitarica incoacajeitempiri.

²⁸ Noponeaca narori inquitequi, natiritapaaque, iro cantaincha te iro nompocantea nomperanajeitempi, irointi nopocanta nintacojeitempi aisati noncamimentajeitempi, maaroni.

Yoavisacotiri Jesoshi apite caari amenatsi.

(Mr. 10.46-52; Ir. 18.35-43)

²⁹ Ari noponeajeitanaca Jericoqui, noquenajeitanaque avotsiqui. Yoijajeitanaquena oshequi atiri.

³⁰ Ari isaviqui otsapiqui avotsi apite caari amenatsi. Icamanteetiri:

—Coraque Jesoshi.

Ari icajemajeitanaque:

—Pincavintsaajeitapeena: tempa aviro ishanincani Iravirini.

³¹ Ari iquisatsataqueri yora apatojeitainchari, icantajeitiri:

—Pimajerete.

Aiquero icajemajeitanaque:

—Novincatsarite, pincavintsayena: tempa aviro naamaajeitacari, aviro ishanincani Iravirini.

³² Icatiapaaca Jesoshi, icantiri:

—¿Paita picoiri nantempiri?

³³ Icantiri:

—Novincatsarite, nocoaque namenaje.

³⁴ Ari icavintsairi, ipamititaqueri iroqui. Irosati yamenantanaja, aisati yoijajeitanaqueri.

21

Ijataque Jesoshi Jerosarequi, ipincatsajeitavaqueri atiri.

(Mr. 11.1-11; Ir. 19.28-40; Joa 12.12-19)

¹ Ari nareejetapaaca Vetejajequi, oquempejitaro toncaari ipajiyeeitiro Orivomashi. Iro-tapaajantsi Jerosare. Itianquiri Jesoshi apite iroamere,

² icantiri:

–Pijivatanaque anta nampitsiquinta. Pineapaaquero voro, otsatacotaca; otsipatacari orijani. Pintsatacoreapeero, pamaquenaro.

³ Irisampitempirica ashaninca: “¿Paita pitsatacoreantarori?” Ari pincanteri: “Irio coirori Avincatsarite”. Ari incantempi: “Paanaqueneri”.

⁴ Iro yantantarori oca, imoncaratiro isanquenatacotiqueriniri peerani yora camantan-tatsiniri pajitachari Sacariashi:

⁵ “Pincamantajeiteri jerosaresati: ‘Coraquetaqueni pivincatsarite. Icameetsataque, te irishemeteji. Inquijacotapeempari vorojaniqui’”.

⁶ Ari ijatanaque apite, ineapairo voro, yamaqueneri.

⁷ Apite yamaque: tsinane, aisati orijani. Yoanquetaqueneri imittsaqui quitsaarentsi, impoji iquijacotacari Jesoshi.

⁸ Ari itimi oshequi atiri anta avotsiqui, yoayetaqueneri iroicoropee anta avotsiqui iraat-icantanaquearori voro. Aisati yoayetaqueneri ojempequijaniqui inchatoshi avotsiqui, iraatcantanaquearori. Aitaque yametaró yoayetiniri pincatsaripee iroicoropee aisati ojempequijaniqui inchatoshi.

⁹ Ari ijivajeitanaqueri oshequi atiri anta avotsiqui, aisati impoijeitanaqueri oshequi pashini. Icajemajeitanaque:

–Jeriqueti ishanincani Iravirini, tsame ampincatsajeitavaqueri. Itiancaqueri Avincatsarite, tsame aneacameetsajeiteri. Tempa ineacameetsatiri iriori Tasorentsi.

¹⁰ Ari yareetapaaca Jerosarequi. Isampitavacaajeitaca maaroni jerosaresati:

–¿Janicampa yoca?

¹¹ Yacajeitaueri itsipapee:

–Iriotaque Jesoshi, poneachari Nasaretequi, ora timatsiri Carireaquei. Oshequi iquen-quetsatacotiri Tasorentsi.

Yojocajeitapairi Jesoshi pimantayetatsiri anta ivancoqui Tasorentsi.

(Mr. 11.15-19; Ir. 19.45-48; Joa 2.13-22)

¹² Ari ijataque Jesoshi ivancoqui Tasorentsi, iquisajeitapaaqueri maaroni amanantatsiri aisati pimantatsiri, yojocajeitapaaqueri. Aisati iquempejeitaueri yora pinaavacaariri iirequite, aisati yora pimantiriri paroma: itatsinquitapaaqueri imesatepee aisati isavica-mentopee.

¹³ Icantajeitaueri:

–Ocanti Sanquenarentsi: “Icanti Tasorentsi: ‘Ocameetsati pinquenquetsatacaapinijeit-ena aca novancoqui’”. Iro cantaincha avirojei te pinquenquetsatacaajeiteriji, irointi picoshitapinijeitiri pocajeitatsiri.

¹⁴ Impoji ijatashitaueri oshequi caari amenatsi aisati choriyetatsiri. Yoavisacojeita-queri.

¹⁵ Ari ineajeitaueri yora jivatacaajeitiriri saserotepee aisati yora oametantirori San-quenarentsi, iquisajeitanaca. Ocameetsati yantayetiri, aisati icantajeiti atiripee:

–Tsame ampincatsajeiteri ishanincani Iravirini.

Irootaque iquisajeitantacariri yoranqui,

¹⁶ aisati icantajeitaueri Jesoshi:

–¿Piquemaquerompa oca icantajeitiri atiripee? Te oncameetsateji impincatsajeitempi.

Yacanaqueri:

–Je, noquemaqueri. Tempa pineanatiro Sanquenarentsi cantatsiri: “Impincatsajeiteri Quirishito yora jananequipee”.

¹⁷ Ari ijatanaji Jesoshi, quiso noanajiri narori, aisati itsipapee iroamere. Nojajeitanaque Vetaniaqui, aitaque nomaajeitapairi.

Yoamaaquero Jesoshi iyera.

(Mr. 11.12-14, 20-26)

¹⁸ Ari oquitaitetamanaji nopiajeitanaja Jerosarequi. Nianqui itasheanaque Jesoshi.

¹⁹ Ineapaaquero avotsinampiqui iyera. Icoavetapaacaro oitsoqui, te onttimeji; irointi iotaca oshi. Icanti:

–Meeca eiro otimajitsi aisati oitsoqui iroajeitantajarori atiri.

Irosati oshimpeshitantanaca, ocamaque iyera.

²⁰ Noneantacarori, nosampitiri:

–¿Jaoa ocantanacari oshintsitantanacari oshimpeshitanaque?

²¹ Yacanaquena:

—Queario oca noncamantempiri: ariorica pishiretasanoteari Tasorentsi, pimatero avirori quempetarori pineaqueri meeca. Aisati pincanteririca Apa: “Povajero oca toncaari, pojoquero anta incajarequi”, aitaque irimatatacaquempiro. Iro cantaincha, eiro pitseenquiritsi.

²² Ariorica pishiretasanoteari, irimatatacaquempiro paitapeerica pincoacoteriri.

Icantavacamentari Jesoshi: “¿Janicarica tianquiriri?”

(Mr. 11.27-33; Ir. 20.1-8)

²³ Ari nareejitapaaja ivancoqui Tasorentsi, yoametantapaaji Jesoshi. Irosati ijatashitantapaacari yora jivatatacaajetiriri saserotepee aisati yora jivatacantantatsiri, isampijeitiri:

—¿Janicampa tianquimpiri pantayetantarori ocapee? ¿Janica nintacaimpiri pipincatsaritantacari?

²⁴ Yacanaqueri:

—Aisati narori, aparo nosampitempi: ariorica pancaquena, noncamantempi janica tiancaquenari.

²⁵ ¿Janicampa tianquiriri Joa ivaotisantantayetariri ashanincepee? ¿Irimpa tianquiriri Tasorentsi? ¿Irimpa tianquiriri atiri?

Ari icantavacaajeitanaca:

—Ancanteririca: “Irio Tasorentsi tianquiriri”, icanteecari: “¿Paita caari piquemisantantari?”

²⁶ Iro cantaincha ariorica ancantari: “Irio tianquiriri atiri”, iquisajeiteecari atiripee. Tempa ijitashijeitari irio Tasorentsi tianquiriri Joa iquenquetsati.

²⁷ Ari icantajeitiri:

—Te nioteji janicarica tianquiriri.

Icantiri:

—Aisati narori, eiro nocamantimpitsi janicarica tiancaquenari nantantarori ocapee.

Ishiacantiniri yora saserotepee ashitachari itomi apite.

²⁸ Aisati icantajeitiri Jesoshi:

—Meeca noshiantempiri ashitachari itomi apite: ¿paita piquenqueshiretacotiriri? Icantiri intarori itimi: “Notiomi, pijate meeca pintsameete anta ovamashiqui”.

²⁹ Yacanaqueri: “Eiro notsameetitsi”, iro cantaincha impoiji ijati itsameeti.

³⁰ Aisati icantiri itsipa itomi: “Notiomi, pijate meeca pintsameete anta ovamashiqui”. Ari icantiri: “Ari, apa, nojataque”. Iro cantaincha te irijateji.

³¹ Meeca nosampitempi: ¿janica antasanotiniriri iriri icoacairiri?

Yacanaqueri:

—Yora jivatatsiri itimi, jatatsiri itsameeti.

Icantiri aisati:

—Queario oca noncamantempiri: irijivajeitempi irijajeitanaque inquitequi yora coshitantatsiri aisati ora antapiniyetiriri shirampari caari ai.

³² Ipcapaaque Joa icamantavetimpi jaoca pincantajeameri pincameetsatantajeameri, iro cantaincha te pinquemisantavaqueriji. Irinti iquemisantajeitaqueri yora apatotiniriri oromasati iirequite, aisati oquemisantaqueri antapiniyetiriri shirampari caari ai. Pineajeivetacari iquemisantajeiti icameetsatantajari, iro cantaincha te pinquenqueshirejiteaji avirorijeji; te pinquemisantavaqueriji Joa. Irijajeite irinti inquitequi: aviroriquea avinti, eiro pijajeititsi.

Iquenquetsatacotaqueri Jesoshi amenirori ovamashi.

(Mr. 12.1-12; Ir. 20.9-19)

³³ Jero oca pashini icantiriri Jesoshi:

—Pashini aisati noshiantempiro: pinquemajeitavaquero. Itimi shirampari panquitirori ovamashi. Itantacotiro otsapiqui. Aisati yovetsiquiro intsinacaitantearori oitsoqui, aisati onanteari oja. Yovetsiquiro pancotsi jenoquitatsiri yamenacotantarori savicatsiri ora panquirentsi. Impoiji icantiri pashini ishaninca: “Meeca no coi pamennaro novamashite, aisati pintsameetacotenaro”. Icantiri: “Ari”. Impoiji ijatanaque yora ashtarori ovamashi pashiniqui quipatsi.

³⁴ Peeranitanaque omoncarataca otimanaque oitsoqui. Itiancavetacari iratiritepee: “Pijajeite pincanteri yora amenirori novamashite impacantena nashitari narori”. Ari ijajeivetanaca.

³⁵ Ineajeitavaqueri yora amenirori ovamashi: ipasatavaqueri aparo, tac, tac; pashini yoavaqueri, shemi; irio itsipa ipichavaqueri, pitse, pitse.

³⁶ Ari yora ashitarori, ari itiancavetaca pashini iratiritepee, icarajeiveta oshequi. Iro cantaincha yoashinoncaajeitavaqueri yora amenirori ovamashi.

³⁷ Impoiji iquenqueshiretaque yora ashitarori: “Meeca nontianqueri notomi. Iriitatsi impincatsatavaque irinti”. Ari itiancavetacari iriori.

³⁸ Iro cantaincha ineajeitantavacariri, icantanivotavacaaca: “Coraquetaqueni yora itomi ashitarori iroamashite. Ariorica incame iriri, iriotaque ashitajearoneri ovamashi. Tsame avavaqueri, impoiji ashijeitajearo arori ovamashi”.

³⁹ Ari yaajeitavaqueri, shepi; yaanaqueri anta otsapiqui, yoaqueri, shemi.

⁴⁰ Ariorica impocaque yora ashitarori iroamashite, aamaaca, ¿jaoca incantapeeriri yora amenavetanariri iroamashite?

⁴¹ Icantajeitiri:

–Tempa iraanrojeiteri, iroashinoncaajeiteri, iroajeiteri. Impoiji iramenaje pashinipee cameetsatsiri, amenajenerine iroamashite, yora paaranterineri irinti oitsoqui irovate.

⁴² Ari icantiri Jesoshi:

–Tempa pineanatiro ocantiri Sanquenarentsi: “Itseencaquero mapi yora vetsiquirori pancotsi, iro cantaincha ipeaquero Tasorentsi otincamiaro pancotsi. Tempa icameetsataque Avincatsarite, tempa avajeitanaquero cavaco maaroni yantajeitiri”.

⁴³ Irotaque nocantajeitantimpiri: eiro pineajeitiritsi Tasorentsi impincatsariventajeit-empi. Irintiquea irinti impincatsariventajeiteri pashinipee: yora pincatsatasanojeiterineri, quemisantanasojeiterineri.

⁴⁴ Naro shiacantachari mapi nocantaquempiri: terica piotavaquena, pashinoncayea; terica pinquemisantena, pijate Sharincaveniqui.

⁴⁵ Ari iquemajeitavaqueri yora jivatacaajeitiriri saserotepee aisati yora variseopee. Iojeitaque irio iquenquetsatocotaqueri Jesoshi.

⁴⁶ Icoajeiveta iraacanterime Jesoshi, iro cantaincha itsarocaaajeitacari atiripee. Iotaqueri atiripee queario iquenquetsatocotaqueri Jesoshi Tasorentsi.

22

Iquenquetsatocotaqueri Jesoshi cajemacantavetariri ishaninca iroajeitea.

¹ Pashini aisati ishiantiniri Jesoshi, icantajeitiri:

² –Noshiantempiro jaoca icanta Tasorentsi ipincatsariventanti. Itimi pincatsari itomi aatsineri ijina. Impoiji icoaque pincatsari iriveshireimentajeiteari ishanincapee itomi. Icajemacantajeivetacari iroacaajeitearime.

³ Itiancavetacari inampirepee, icajemacantajeivetacari ishaninca, iro cantaincha, te impocajeiteji.

⁴ Itiancavetaja aisati, icantiri: “Pincamanteri yora nocajemacantaqueri: ‘Vetsicayetaca maaroni. Yoayetaqueri vaca aisati vacajaniqui. Caate piveshireimenteari itomi aatsineri ijina’ ”.

⁵ Iro cantaincha te inquemisantavaqueriji, irointi ijajeitanaque jaocarica. Ijati aparo iroanequi, irio pashini ijati iomparita.

⁶ Irio pashinipee yaajeitavaqueri itiancane, shepi; yoashinoncaavaqueri, impoiji yoajeitavaqueri, shemi.

⁷ Ari iquisanaca yora pincatsari. Itiancaqueri soraro, yoapaaqueri yora oaqeriri itiancane aisati itaitaqueri ivancopee.

⁸ Impoiji icantiri itsipapee inampirepee: “Vetsicayetaca maaroni, iro cantaincha te incameetsateji yora nocajemacantajeivetacari”.

⁹ Pijajeite meeca anta nampitsiqui, pincantajeiteri maaroni pineajeitaqueri: “Caate avinti avincatsaritequi, piveshireimenteari itomi aatsineri ijina”.

¹⁰ Ari ijajeitanaque, yapatojeitaqueri maaroni ineajeitaqueri: cameetsayetatsiri, caari cameetsayetatsi, maaroni. Ijaajeitapaacaro pancotsi.

¹¹ Ari ijataque yora pincatsari ivetsajeitavacari pocajeitaintsiri. Ineaqueri aparoni shirampari caari quitsaatacha cameetsa.

¹² Icantiri: “Noshaninca, nopajeivetaquempi quitsaarentsi cameetsari pinquitsaati-mentearimeri notomi. ¿Paíta caari piquitsaantantaro?” Te iranqueji.

¹³ Ari icantiri inampire: “Poisoteri iracoqui aisati ititiqui. Pojoqueri anta otsitenitaque-nta, anta itiminta irajeitachari aisati cavintsaajeitachari”.

¹⁴ Pineaquero: icajemacantavetacari oshequi, iro cantaincha te irishequiteji yora icyeasanotaqueri.

Yoametiri Jesoshi variseopee iranteneri pincatsari icoacairiri.

(Mr. 12.13-17; Ir. 20.20-26)

¹⁵ Impoiji ijajeitanaque variseopee, yoametavacaajeitaca:

—¿Jaoca ancanteriri Jesoshi ancomitacanteariri? Ariorica incomitaquea, irosati anquisacantanteariri.

¹⁶ Impoiiji itiancajeitaqueri iroamerepee, itsipajeitacari oijatiriri Eroreshi. Isampijeitapaaqueri Jesoshi:

—Oametanari, niojeiti queario poametantaque. Cameetsa poametantiro irineane Tasorensi, te pintsaroacayeariji itsipapee atiri, aisati te pimpincatsateriji.

¹⁷ Meeca pincamantena paitarica piqenqueshiretiri: ¿ocameetsatimpa amperi Sesari airequite? ¿Tericampa oncameetsateji?

¹⁸ Iro cantaincha iotaque Jesoshi icoajeivetaca iramatavijeiterime. Isampitiri:

—¿Paita picoantacari pamatavitena? Te pincameetsateji.

¹⁹ Piniyayenari quirequi pipapinitiriri oromasati.

Ari yamaqueneri apamentaquiro, ipajiyetiri tenario.

²⁰ Ari isampitiri:

—¿Janicampa ashitarori ishiantaro oca? ¿Jaoca opajitari ivajiro oca sanquenataincharica?

²¹ Yacanaqueri:

—Tempa Sesari.

Ari icantiri:

—Panteneri Sesari icoacaimpiri, aisati panteneri Tasorensi icoacaimpiri iriori.

²² Iquemajeitavaqueri, irosati yoajeitantanacari cavaco. Ari ijajeitanaji.

ICANTIRI JESOSHI SAROSEO: “Queario, antinaajeitanaje”.

(Mr. 12.18-27; Ir. 20.27-40)

²³ Impoiiji yora saroseopee ipocashitaqueri Jesoshi, ijitashijeitaca iriori eiro atinaajeitajatsi, eiro ajajeititsi inquitequi. Ari isampitapaaqueri:

²⁴ —Oametanari, icantini peerani Moishishi: “Ontimerica shirampari ijina, iro cantaincha te intimacayeroji itomipee. Impoiiji incamaquerica, ocameetsati iraajero irirentini ijinani, intimacayero otomi, iro cantaincha irishiacteri itomini irirentini”.

²⁵ Ari itimi shirampari aisati irirenti, icarajeiti 6. Yaavetajaro ijina, iro cantaincha te intimacayeroji itomi. Impoiiji icamaque iriori, torein. Yaavetajaro aisati irirentini, te intimacayeroji aisati, impoiiji icamaque.

²⁶ Aisati iquempejeitaca irirentipee, maaroni aajeivetajarori: te intimacayeroji itomipee.

²⁷ Impoiiji ocamaque iroori tsinane, torein.

²⁸ Ariorica intinaajeitanaje, ¿janicampa aajeroneri? Pamene, ijinantajeiveitaroni maaroni.

²⁹ Ari yacanaqueri:

—Oshequi picomijeitacaro. Te piojeiteroji Sanquenarentsi, aisati te pioteji itasorensitasanoti Tasorensi.

³⁰ Ariorica antinaajeitanaje, tecatsi aajantsineri. Maaroni tinaajantsineri inquempejeitajeari inampirepee Tasorensi: eiro yaajeitapaajitsi ijina.

³¹ Intinaajeitanaje maaroni camajeitatsiri, tempa pineanatiro icantimpiri Tasorensi:

³² “Narotaque Tasorensi: ipincatsataquena Avarama, ipincatsataquena Isaca, ipincatsataquena Jacovo”. Te incanteji: “Ipincatsaveitanani”, pineaquero, aneatsi meeca inajeiti: irotaque ipincatsajeitancariri. Aisati, aneatsi inajeiti, irotaque ipincatsariventantiriri iriori Tasorensi.

³³ Noquemajeitancarori oca, noajeitanaqueri cavaco, nocantajeiti:

—Tempa cameetsa yoametanti Jesoshi.

ICAMANTIRI JESOSHI PAITA OCOACAASNOTEERI SANQUENARENTSI.

(Mr. 12.28-34)

³⁴ Iquemajeitaque variseopee cameetsa yacanaqueri Jesoshi saroseopee, irotaque itsaroacantajeitanacariri iriori irineanatajeri aisati. Ari ipocashitaqueri iriori variseopee Jesoshi.

³⁵ Icoajeivetaca incomitacayearime. Icarajeitiri aparoni oametantirori Sanquenarentsi, isampitiri:

³⁶ —Oametanari, ainiro oshequi oamejeitaquee Sanquenarentsi: ¿paita cameetsatasanotatsiri anquemisantajeiteri?

³⁷ Yacanaqueri:

—Iro cameetsatasanotatsiri oca: “Pinintasanoteri catsini Tasorensi, yora Avincatsarite: pinquearioventero pinintasanoteri, pincantaitiyempani”.

³⁸ Irotaque anaacotantatsiri isanquenajeitiri.

³⁹ Otimi otsipa, quempetarori: “Oquemeta picavintsaa ja avisati, pincavintsaa jeiteri pishanincaptee”.

⁴⁰ Ariorica pimajeitaquero oca, ari pimocarajeitaquero maaroni isanquenatiniri Moishishi, aisati maaroni isanquenatiniri yora quenquetsatacantatsiniri.

Incantavacaimentajeitacari Quirishito: “¿Janica ishanincatacari?”

(Mr. 12.35-37; Ir. 20.41-44)

⁴¹ Ari Jesoshi isampijeitiri yora variseopee apatotimentajeitariri:

—¿Paíta piquenqueshiretacotiriri Quirishito? ¿Janica irishanincateari?

⁴² Yacajeitanaqueri:

—Irishanincateari Iravirini.

⁴³⁻⁴⁴ Icantiri:

—Peerani osanquenatacaqueri Ishire Tasorentsi Iravirini, icantantariri Quirishito: “Novincatsarite”. Tempa piotiro isanquenare: “Yora Tasorentsi icantiri Novincatsarite: ‘Pisavique, notiomi, nacosanoriqui, pincaratená ampincatsariventante. Aítaque pisavique irosati nontsoncajeitacari maaroni quisajeitaquempiri’ ”. ¿Paíta icantantariri Iravirini: “Novincatsarite”?

⁴⁵ Iriorica Quirishito ivincatsarite Iravirini, ¿paíta picantantariri irio ishanincani? Tempa amejeita apincatsajeitiri jivajeiteeri itimi.

⁴⁶ Tecatsi incantajeitea irancanaqueri. Aisati itsarocaaajeitacari itsipapee irisampiterime iriori.

23

Yoamejeitiri Jesoshi atiri jaoca icantari oametantirori Sanquenarentsi aisati variseopee.

(Mr. 12.38-40; Ir. 11.37-54; 20.45-47)

¹ Impoiji icantajeitaqueri Jesoshi apatotimentajeitariri, aisati icantaquena narori, aisati icantajeitaqueri iriori itsipapee iroamere:

² —Yora oametantirori Sanquenarentsi aisati yora variseopee ijitashijeivetaca iquempetacari Moishishi: oshequi iperantashijeitaquempi.

³ Ocameetsaveta pantayetero paitapeerica icantayetimpiri, iro cantaincha eiro pantirotsi yantashiyetari iriori. Icantajeivetimpi: “Cameetsa pintime”, iro cantaincha te intimeji iriori cameetsa. Te irimateroji iriori icantajeivetimpiri.

⁴ Oshequi opomerentsitimojeitaquempi pantajeitaquero icantajeitaquempiri, iro cantaincha te impomerentsiventearoji iriori.

⁵ Yantashiyetaro paitapeerica pineanteariri, pineacameetsatanteariri. Imavacotacaro irineane Tasorentsi iracoqui aisati yamatsetacotacaro ivancainaqui; antearo oni, pincantajeitacari: “Pineaqueri, quemisantincari ini”. Aisati oshequi yoanencashitacaro iitsaare ocaratapai.

⁶ Ariorica yoajeita, icoasantaque intsipatapiniteari pincatsatatsiri. Aisati anta yapatojeitanta icoasantaque savicamentotsi cameetsari.

⁷ Icoaque cameetsa pivetsajeiteari anta nampitsiqui, icoaque pincantajeiteeri: “Oametanari”.

⁸ Iro cantaincha avinti, eiro piquempetaritsi: eiro picoitsi incanteetempi: “Oametanari”. Iriotaque Tasorentsi oamejeitimpiri; avirojei, pimocaravacaaajeitaca.

⁹ Aca quipatsiqui eiro picantashitaritsi itsipapee: “Apa”. Itimi Piri apaniro anta inquitequi.

¹⁰ Aisati eiro pishinetiritsi incanteetempi: “Novincatsarite”. Itimi pivincatsarite apaniro, yora Quirishito.

¹¹ Pincoaquerica pimpincatsaritanaque, pijivate pintacojeiteari itsipapee.

¹² Ariorica pincantajeiteeri: “Nompincatsariventempi”, ari pishemetaque catsini, iro cantaincha iroashinoncayempi Tasorentsi. Impeajeri pincatsaritajantsine maaroni caari shemejeitatsi.

Iquenquejairi Jesoshi oametantirori Sanquenarentsi aisati variseopee.

¹³ Icantiri Jesoshi yora oametantirori Sanquenarentsi aisati variseopee:

—Oshequi pamatavitantajeiti, coajica irootaque oshequi pashinoncaajeitacari. Eiro pijatitsi anta ipincatsarintanta Tasorentsi, aisati te pincocayeriji itsipapee irijate iriori.

¹⁴ Oshequi pamatavitantajeiti, coajica irootaque oshequi pashinoncaajeitacari. Picoshitacuero camajimentaaro ovanco; pishiacantavetaca piquenquetsatacairi Tasorentsi, pisananinirodashitacaro, vero, vero, vero. Aítaque iroasanquetasanojeitempi Tasorentsi.

¹⁵ Oshequi pamatavitantajeiti, coajica irootaque oshequi pashinoncaajeitacari. Oshequi pipomerentsiventacaacari itsipa atiri pipeantacari jorio. Impoiji poameteri yamatavitanti, inquempetantempiri irijatanteari Sharincaveniqui.

¹⁶ Oshequi pamatavitanti: piquempetacari caari amenatsi yora acatsatiriri iyamara-jquiririnte. Pashinoncaajeitanaquea. Picantashinirota: “Ariorica ancante: ‘Tempa otimi ivanco Tasorentsi, piotanteari eiro namatavitimpitsi’, ari ocameetsati amatavitante. Iro cantaincha ariorica ancante: ‘Tempa otimi oro anta ivancoqui Tasorentsi, piotanteari eiro namatavitimpitsi’, ari eiro amatavitanti”.

¹⁷ ¿Paitasa picantantari? Te pionirojeiteji catsini. Oshequi pineaveetashita. ¿Paita cameetsasatanotatsiri? ¿Irompa oro cameetsasatanotatsiri? ¿Irompa ivanco Tasorentsi cameetsasatanotatsiri? Tempa irootaque ocameetsatantari oro otimi ivancoqui Tasorentsi.

¹⁸ Aisati picantashinirojeita: “Ariorica ancante: ‘Tempa otimi atantanariri Tasorentsi avira, piotanteari eiro namatavitimpitsi’, ari ocameetsati amatavitante. Iro cantaincha ariorica ancante: ‘Tempa itimi avira avaqueneri Tasorentsi, antaaqueneri, piotanteari eiro namatavitimpitsi’, ari eiro amatavitantitsi catsini”.

¹⁹ ¿Paitasa picantantari? Te pionirojeiteji catsini. ¿Paita cameetsasatanotatsiri? ¿Irompa pivira? ¿Irompa pitaantanariri Tasorentsi pivira? Tempa irootaque icameetsatantari pivira pitaqueneri Tasorentsi.

²⁰⁻²² Pamene, oshequi picanti: “Tempa otimi ataantanariri Tasorentsi”, “Tempa otimi ivanco Tasorentsi”, “Tempa otimi inquite”, paitapeerica. Picantashinirotarro, impoiji pijitashiniroveta ocameetsati pamatavitanti. ¿Pijitimpia te intimeji Tasorentsi? Noncaman-tempi: itsoteaquero itsorenca maaroni. Iojetitiro pantajeitiri, iroasanquetimentempiro maaroni pamatavitanti.

²³ Oshequi pamatavitantajeiti, coajica irootaque oshequi pashinoncaajeitanteari. Pamene, timatsi pimavevetacari. Ariorica paaque piierequite 10, pipaqueri Tasorentsi aparoni; ariorica paaque 10 oshi pipanquitiri, jero pipavetacari aparoni oshi. Iro cantaincha te pinquencheshireteroji icoacaasanovetaquempiri Tasorentsi: icoaveta pintimeme cameetsa, icoaveta pincavintsayerime pishaninca, icoaveta pinquemisanterime. Oncameetsateme pimajeiterome maaroni ocapee, impoiji ariorica paaque paitapeerica oncarate 10, aparoni pipapaqueri Tasorentsi.

Yovaajiniri, icantajiri aisati:

²⁴ –Te pioteji catsini, iro cantaincha picoajeiveta poamejeiterime itsipapee. Oshequi piquearioventavetacaro pipomerentsiventasanovetacaro caari icoacaasanotimpi Tasorentsi; iro cantaincha te pinquencheshiretimateroji capichaji oca icoacaasanovetimpiri.

²⁵ Oshequi pamatavitantajeiti, coajica irootaque oshequi pashinoncaajeitanteari. Piquivasanovetaro piramento otapiiqui, iro cantaincha te pinquiveroji osantequi: oshequi oshititaque. Aisati piquempejeita avirori, poameetsantashita inecameetsajeitantimpiri ashanincapee, iro cantaincha pishirequi te pincameetsateji catsini: oshequi picoshitapiniti aisati oshequi pinevetaro vaaranontsi.

²⁶ Te piojeiteji catsini. Pijivate pinquivasanotero osantequi, impoiji eiro oquipatsitajitsi aisati otapiiqui. Arioricame pincameetsashiretaqueme, irineacameetsajeitimpime ashanincapee.

²⁷ Oshequi pamatavitantajeiti, coajica irootaque oshequi pashinoncaajeitanteari. Piquempejeitacaro yoanteetariri camatsiri, ipotsotiro quitamarori. Ocameetsavetaca saiteri quica, iro cantaincha tsompoina oshititaque, ojaacaro itonqui camatsiri.

²⁸ Inecameetsajeivetaro ashanincapee pantayetiri, iro cantaincha te pincameetsashireteji: oshequi pamatavitanti aisati oshequi pantapinitiro caari cameetsatsi.

²⁹⁻³⁰ Oshequi pamatavitantajeiti, coajica irootaque oshequi pashinoncaajeitanteari. Peerani yora pishanincapeeni yoajeitaqueri quenquetsajeitironiri irineane Tasorentsi, yora cameetsatsiniri. Meeca povetsicajeitiro pancotsipee pinquencheshirejeitanteariri yora quenquetsacantatsiniri. Poanencayetaquero cameetsa. Picantanirojeiti: “Nontim-itaqueame nainti peerani, eiro noajeitirime, eiro noquempetarime nainti noshanincani oajeitaqueriniri”.

³¹ Picanti avirori: “Noshanincajeitacari yora peeraniniri”. Queario oca picantanirojeitiri.

³² Aisati piquempejeitacari, avirojeitaque oayeri. Tempa iriojeitaque intacaroniri, meeca aviro vaajeitajirori poantaji.

³³ Piquempejeitacari maranque, te pincameetsajeiteji catsini. ¿Pijijeitimpia eiro pijajeititsi Sharincaveniqui?

ICantajitaqueri Jesoshi: “Iroasanquetaajeitaquempi Tasorentsi”.

(Ir. 13.34-35)

³⁴ Aisati icantajitaqueri Jesoshi:

—Nontianquempiri coajica itsipapee quenquetsatacotineri Tasorentsi, iotasannotiriri, oametanteroneri irineane. Niotaque povaaranteri, pashinipee pimpajacotaaranteri, itsipapee pimpasanataaranteri anta papatojeitanta, itsipapee aisati pinquisaaranteri jaocarca irijayetanaqueri.

³⁵ Ainiro pantanejei avirori, picoacaajeitaqueri incamajeitaque maaroni cameetsatsiri: yora Averini, maaroni. Aisati yora Sacariashi, yora itomini Verequiashini: iquemisan-tacaavetacari ashanincani anta ivancoqui Tasorentsi, iro cantaincha yoajeitaqueri. Pintimitaqueame avirori, pamijeitaquerime poajeitaquerime avirori. Pashi poajeitiro poantajeiti.

³⁶ Aitaque iroasanquetimentajeitaquempiri Tasorentsi maaroni picoacaajeitaqueri incame.

³⁷ Jo, aviro jerosaresati. Oshequi poapinitiri quenquetsatacotiriri Tasorentsi, pipichaavaqueri maaroni itiancayevetimpiri. Oquempeta teapa osaramonquitari orijanipee, ocavintsairi, nocoaveta nonquempetearome narori, noncavintsajeitempime. Iro cantaincha te pincoajeiteji.

³⁸ Jero ivanco Tasorentsi pineacameetsajeitaqueri: eiro nopiashitajarotsi aisati. Aisati Apa, eiro ipocashitajirotsi irirori.

³⁹ Eiro pineapinijeitajanatsi aisati. Apanivani pineajeitavajena aisati, pincantajeite: “Icameetsataque Jesoshi, iriotaque Avincatsarite tianquiriri”.

24

Incanti Jesoshi: “Coajica intireetajero ivanco Tasorentsi”.

(Mr. 13.1-4; Ir. 21.5-7)

¹ Ari iponeaca Jesoshi ivancoqui Tasorentsi, irotajantsi irijataje. Ari nojatashitaqueri, nocarajeitaqueri itsipapee iroamere, namenacaajeitaqueri ivanco Tasorentsi aisati otsipapee pancotsi.

² Ari icantaquena:

—Ari pineamempeajeivetacaro meeca oca pancotsipeeca. Queario oca noncamantempiri: coajica intireetajero maaroni, irovarayeetajero maaroni mapipee.

³ Ari nojajeitanaque toncaariqui ipajiyeetiro Orivomashi. Isavicapaaque Jesoshi, ari nojatashitaqueri, nosampijeitaqueri:

—Pincamantajeitena: ¿Jaoca oncarate intireetantajeorori pancotsipee? ¿Paita iotacayenane jaoca oncarate pimpoantajeari? ¿Jaoca oncarate omoncaratantajeari maaroni picantaquenari?

Incantaqueri Jesoshi: “Coajica oshequi inquematsicayetearo atiri”.

(Mr. 13.5-8; Ir. 21.8-11)

⁴ Yacanaquena:

—Queariompiya, yamataviyeetimpicari.

⁵ Intime oshequi pocatsine, cantapaatsine: “Narotaque nainti Quirishito”. Iramataviyetapeeri oshequi atiri.

⁶ Pinguemapiniteri incante: “Imanatavacaaajeita atiripee anta”. Incante itsipa: “Coajica irimanatavacaajeitea anta”. Iro cantaincha eiro piquenqueshirejeitatsi. Aitaque oncanteari irimanatavacaajeitea, iro cantaincha tequeratsita omoncarateaji maaroni nocantaquempiri.

⁷ Aitaque oncanteari yora atiri inquisajeitanaqueri itsipapee atiri; intime pashinipee quemajeiterone itashe, iro cantaincha eiro otimanajitsi iroanajeari; aisati onicapinitia quipatsi;

⁸ iro cantaincha eirotsita iquematsicaatanotarotsi.

Incantiri Jesoshi: “Oshequi inquisanayeeteri quemisantatsiri”.

(Mr. 13.9-13; Ir. 21.12-14)

⁹ Pashini aisati icantaquena:

—Ariorica iriojeitanaque atiri piquemisantajeitaquena, iroashinoncaapinijeitempi, iroaarantempi, inquisajeitempi maaroni atiri.

¹⁰ Intime oshequi jocayeteroneri iquemisanti, impoiji inquisaqueri quemisantasanotantsiri, iraacantayereteri, paitapeerica.

¹¹ Intime amatavitantatsineri, incantavetea: “Nonquemisantacayempi”, iro cantaincha iramatavijeiteri maaroni quemisantavetavaquearine.

¹² Oshequi irantajeitero atiri caari cameetsatsi, oshequi catsini, impoiji irijocajeitajero imintavacaajeitani.

¹³ Iro cantaincha noavisacojeiteri maaroni quearioventanarori nocantaqueriri.

¹⁴ Pijajeitanaque maaroni quipatsiqui, pincamantajeiteri maaroni atiri nocoaque nompincatsariventajeiteri; impoijiquea omoncaratea maaroni nocantaquempiri.

Incanti Jesoshi: “Irashinoncaajeitea coajica joreasati”.

(Mr. 13.14-18; Ir. 21.20-24)

¹⁵ Aisati icamantajeitana Jesoshi:

–Peerani isanquenatini yora Iranieri, yora camantantatsiniri, icantini: “Intime coajica anta ivancoqui Tasorentsi caari cameetsatatsine, iramparajeitero maaroni”. Tempa plotiro oca noquenuetsatocotiri. Ariorica pineaqueri yoca nocamantacotiri,

¹⁶ aisati pintimerica Joreaque, pishiajeitanaque toncaariqui.

¹⁷ Ariorica pisavique saiteriqui, eiro pijatapanajantitsi pivancoqui paantapanajan-tearori pivaararo, irointi pishiasanotanaque.

¹⁸ Aisati pintimerica oantsiqui, eiro pipiashitapaintarotsi otsipa piitsaare.

¹⁹ Oshequi ashinoncaajeitanaquea tsinane tsonontetatsineri aisati antsoyayerine ojananequite: eiro omatirotsi oshiasanotanaque.

²⁰ Aitaque coajica pishiajeitanaque, iro cantaincha pincerteri Tasorentsi eiro pishi-antatsi incaniniqui aisati quitaiteeriqui pimaoreajeitantari.

Incanti Jesoshi: “Oshequi catsini irashinoncaajeitea maaroni savicajeitatsineri”.

(Mr. 13.19-23)

²¹ Aisati icanti:

–Aitaque oshequi iroashinoncaajeitempi. Pashinoncaasanojeitanaquea, panaacojeiteri maaroni peeraniniri aisati maaroni timajantsineri coajica.

²² Arioricame osamanitanaqueme iroashinoncaajeitempime, pintsoncajeiteame maaroni; iro cantaincha incavintsaajeiteri Tasorentsi maaroni quemisanterineri incoyeajei-teri, irootaque eiro osamanitanta iroashinoncaeyeetempi.

²³ Ariorica incanteetempi: “Pamene, jeri yoca Quirishito”, eiro pishiretavacarotsi incantempiri. Aisati, incanteetempirica: “Nijaantapaaja anta Quirishito”, eiro pishiretavac-arotsi.

²⁴ Intime oshequi amatavitantatsineri, incante: “Naro Quirishito”, irio itsipa: “Naro quenquetsatocotiriri Tasorentsi”. Oshequi intasoncantayete, iramatavijeiteri oshequi savicajeitatsineri, iro cantaincha eiro imatiritsi yora quemisantasanotatsineri.

²⁵ Piquemaquena nocamantitaquempiro jaoca oncanteari coajicani.

²⁶ Incantempirica: “Timatsi Quirishito anta caaraiteriqui”, eiro patsipetashitatsi pi-jatashitena. Ariorica incantempi: “Ainiro Quirishito anta pancotsiqui tsonpoina”, eiro pishiretarotsi.

²⁷ Ari noponeaca narori inquitequi, natiritapaaque. Tempa imapocapinitimpi iporequi, porec, impoiji otsoteapaintiro inquitequi: aisati nonquempetapaajea narori, ariorica nompocaje. Nompocajeitapaajempi, iro cantaincha pineajeitavajena, maaroni.

²⁸ Jaocarica icamapinitiri camatsiri, aitaque ipocashitapinitiri tisoni. Aisati oquem-petaca, oshequi itseencanti joriopee, irootaque impocashitanteariri oshequi amatavijeit-terineri.

Aitaque oncanteari impocantajeiri Jesoshi.

(Mr. 13.24-27; Ir. 21.25-28)

²⁹ Aisati icanti Jesoshi:

–Ari oshequi ompomerentsitimojeiteri atiri, maaroni: irashinoncaajeitanaquea. Impoiji intspaiete intsvajanaque catsirincateri, aisati yora cashiri; impariajeitanaque impoiquiropee, irishevajeitanaquea maaroni inquitesati.

³⁰ Impoiji nonconijatapaaje anta inquitequi, irosati iroashirejeitantanaqueari maaroni tseencajeitanari. Irineajeitavaquena maaroni atiri nonquenapaaje mencoriqui: nompin-catsaritanotapaaque, noshipaquireasanotapaaque.

³¹ Nontiotapaaque iriojeitanteari maaroni nonampire impocajeitantapeempari irama-jeitantapeempariri maaroni quemisantajeitanari, maaroni nocoyeajeitaveri. Intsonca-jeitanaqueri savicajeitatsiri pashinipeequi quipatsi, maaroni.

Ishiacantajeitiniri Jesoshi iyera.

(Mr. 13.28-31; Ir. 21.29-33)

³² Pashini icantajeitavajena Jesoshi:

–Meeca noshiacantempiro iyera: pinquencheshiretasanotero. Ariorica oshiocajempe-quitanaaje, aisati oshitanaaje, ari piojeitanaque irotimatajantsi onquimojantsitaje.

³³ Aisati oquempetaca: ariorica pineajeitavaquero oca nocantaquempiri, piojeitanaque irotajantsi nompocaje.

³⁴ Eirotsitarica picamajeiti, ario pineajeitavaquero maaroni oca nocamantaquempiri.

³⁵ Ompeanaquea inquite aisati quipatsi, iro cantaincha eiro opeatsi irointi noneane. Omoncaratajea maaroni nocantaquempiri.

Te ayojeiteji jaocarica oncarate impocantajeari Jesoshi.

(Mr. 13.32)

³⁶ Pashini aisati icantajeitaquena Jesoshi:

—Iro cantaincha tecatsi iotatsine jaocarica oncarate: te irioteji inampirepee Apa, aisati te nioteji narori. Irinti Apa apaniro ioti.

³⁷⁻³⁹ Peerani itimaveitani Noeni, yoapinijeita ishaninca, ishinquitapinijeita, yaapini-jeitiro ijina, maaroni. Te inquenqueshirejeiteroji icamantavetariri: “Coraquetaque oon-quea”. Impoiji itetacaro pitotsi, yashitacotanaca, tarocn. Impoiji aisati omapocajeitaqueri atiri incani, ooncanaca, itsoncajeitanaca, itsitiajeitanaca. Aisati inquempejeitaquea maaroni atiri, ariorica omoncaratapaaquea nompocantajeari narori: eiro iquenqueshire-jeitatsi, nomapocajeitapaajeri. Impoiji irashinoncaajeitanaquea maaroni tseencajeitat-siri.

⁴⁰ Intimerica apite tsameetatsineri anta oantsiqui: naanajeri aparoni nontsipatanaque-ari, irio itsipa eiro naanajiritsi.

⁴¹ Ontime apite tsinane tononqueroneri tirico: naanajero aparoni nontsipatanaquearo, iro otsipa eiro naanajirotsi.

Icantiri Jesoshi iroamere: “Paamaajeitajena”.

(Mr. 13.33-37; Ir. 12.41-48; 21.34-36)

⁴² Aisati icantana:

—Paamaajeitena, pinquenqueshiretapinijeitena: te piojeiteji jaoca oncarate nompocan-tajeari. Nomapocapaimpicari.

⁴³ Oquempetaca yora ashtarori ivanco icoshiyeetiri: irioteme irotaintsi impoque coshi-terineri, irisaaquiteme, eiro ishinetirime incoshiteri, irointi iroimpiavajerime.

⁴⁴ Aisati narori, paamaajeitena: nomapoquimpicari.

⁴⁵ Pinquempejeiteari nampirentsi cameetsari, yora iotasannotatsiri. Icantiri nampitariri: “Aviro vetsicapiniteroneri iroajeiteari notomi, pimpapiniteri cameetsa”.

⁴⁶⁻⁴⁷ Ariorica irineaqueri cameetsa yovetsicapinitiro yoari, ari incanteri: “Cameetsa pantayetaquero nocoacayetaquempiri. Meeca aviro quempoyeajenarone maaroni tim-imojeitanari. Cameetsa nompinatempi, nioti eiro pamatavitanatsi”. Tempa ari in-kuimoshiretanaque inampire.

⁴⁸ Iro cantaincha intimerica itsipa inampire, caari quemisanterine yora nampitariri. Incante irinti: “Meeca jataque ini nampitanari, eirotsita ipiajatsi”.

⁴⁹ Iquisaqueari itsipa nampirentsi, icapojapiniyetiri, ishinquitapinitaca.

⁵⁰ Impoiji imapocetapaajeri yora nampitariri: te iraamaajeiriji.

⁵¹ Ari yoasanquetapaaqueri, itiancaqueri arejiqui itsipajeitantapeempariri yora am-atavitantatsiri. Ari anta yoashiretasanotanaca aisati oshequi icavintsaanaca. Eiro piquempejeitaritsi avinti, irintiquea pinquempejeitea quemisantasanotiriri nampitariri.

25

Iquenquetsatacotiro Jesoshi ora 10 evancaro.

¹ Pashini aisati icamantaquena Jesoshi:

—Meeca noshiacontempiro aisati jaoca icanta Tasorentsi ipincatsariventanti. Otimi 10 evancaro, coatsiri amenavaqueri ojimetsori impoque. Otsitenitanaque, irosati aan-tayetacaro otsioro.

² Ari ocarataque evancaro iotasannotaintsiri apapacaroni, aisati ocarataque caari iotatsi iroori apapacaroni.

³ Aavetacaro iroori otsioro, iro cantaincha te ayeji oja orivo.

⁴ Irointi ora iotatsiri, aacotanaquero oja, ontsiotantearori.

⁵ Ari osamanitanaque, tequera impoque. Impoiji aajeitaquero ovochoquine, omaajei-tanaque.

⁶ Ari nianquiite oquematii icanteetaquero: “Coraquetapaaque pijimetsori, pijate pame-najeitavaqueri”.

⁷ Ari otinaajeitanaca, ovetsicajeivetaro otsioro.

⁸ Ocantavetaro caari iotatsi: “Pimpena narori oja, irotaintsi ontsivaque notsioro”.

⁹ Iro cantaincha acanaquero ora quenqueshiretainchari: “Eiro nopimpirotsi, eiro onarotsi oja. Nompempirica, tecatsi nontsiotanaqueari narori. Pijajeite pamanantanon-tapaintea avirori”.

¹⁰ Ari ojatanaque amanantavetapainta. Jentsipaite yareetapaaca ojimetsori, iqueanaque anta yoajeitanta, icarajeitaquero ora vetsicajeitainchari, yashitacojeitanaca.

¹¹ Impoiiji opiavetaja caari quenqueshireacha, ocantavetapaacari: “Pashitareajenaro narori, noneapaajempi”.

¹² Iro cantaincha yacanaquero: “Te niotempiji, janicampirica. Te noncoyeji pim-pocashitena aca”.

¹³ Pinqueshiretero oca noshiantimpiri: paamayena, te piojeiteji jaocarica oncarate nompocantajeari.

Ishiacantiniri Jesoshi yora iomparitachari.

(Ir. 19.12-27)

¹⁴ Icantaquena aisati:

—Pashini noshiantempiro jaoca icanta Tasorensi ipincatsariti. Oquempetaca ijatanaque ashitaarantachari pashiniqui nampitsi. Ijvataque icajemajeitaqueri maaroni inampirepee, icantaqueri: “Nocoaque pinquempoyeajenari noirequite”.

¹⁵ Icantiri aparo: “Jeri S/.200,000, pinquempoyeajenari”. Irio icantiri itsipa: “Jeri S/.80,000, pinquempoyeajenari”. Irio itsipa aisati ipaqueri S/.40,000 inquempoyeanteariri. Irio anaacotantaintsiri ioti yora ipasanotaqueri oshequi. Yora caari ipasanoti, irio caari iotasnotatsi. Ari ipajeitaqueri, impoiiji ijatanaque pashiniqui nampitsi.

¹⁶ Yora aasanotiriri quirequi oshequi ijatanaque iomparita. Yoshequiasanotaqueneri iirequite ivatorote, icaratiri S/.200,000 aisati.

¹⁷ Aisati iomparita yora airiri S/.80,000. Yoshequiaqueri aisati, yaantacari aisati itsipa S/.80,000.

¹⁸ Iro cantaincha irinti aavetariri S/.40,000, yaanajiri quirequi, itijiri omoroqui quipatsi.

¹⁹ Impoiiji ipiaja yora ivatorote, icantapairi: “Pimpajeitena meeca noirequite”.

²⁰ Ari ipocaque yora aaueriri S/.200,000, yamaqueri aisati itsipapee S/.200,000. Icantiri: “Jeri quirequi pipaqueri. Oshequi niomparitaca, noshequiasanotaqueri. Jeri itsipa quirequi, icarati aisati S/.200,000”.

²¹ Ari icantiri ivatorote: “Cameetsataque, pimatasanotaquero nocoacaaquempiri. Chapinqui piquempoyeajenari capichaji, nocoaque meeca pinquempoyeajenari oshequi aisati. Nocoaque oshequi noveshireacayempi”.

²² Impoiiji ipocapaaque yora airiri S/.80,000. Icantiri ivatorote: “JERICA quirequi pipaqueri. Oshequi niomparitaca, noshequiasanotaqueri. Jeri itsipa quirequi, icarati aisati S/.80,000”.

²³ Icantiri ivatorote: “Cameetsataque, pimataquenaro nocoacaaquempiri. Chapinqui piquempoyeajenari capichaji, nocoaque meeca pinquempoyeajenari aisati oshequi. Oshequi noveshireacayempi”.

²⁴⁻²⁵ Impoitapaaque yora aavetariri S/.40,000, icantapaaqueri: “Niotaquempi avirori, te pincavintsante, oshequi notsaroacaimpi. Nojiti ariorica noshequiaquerime piirequite, ari paapitsatenarime maaroni, irotaque caari niomparitanta. Notijaqueri piirequite, maaroni. Jerica, noipiajimpiri”.

²⁶ Yacanaqueri: “Te pincameetsateji, oshequi piperatata. Piovetaca nocoavetaca narori irishequianaqueme noirequite.”

²⁷ ;Paita caari pipantari yora itsipa quempoyeapinitiriri quirequi? Pimpajerime iriori, impinataquename, naantajeameri aisati. Aisati iroimpiajenarime maaroni nashisanori”.

²⁸ Ari icantiri itsipa inampire: “Paapitsatajeri noirequite, pimpajeri yora ashitasanotariri meeca S/.400,000.”

²⁹ Nompasanoteri yora ashitaarantachari. Irintiquea yora caari ashitaarantacha, naapitsatajeri ora capichaji timimovetariri.

³⁰ Meeca paanajeri yoca anta otsiteniitintita: te incameetsateji. Nocoaque incarajeiteri maaroni yora oashirejeitachari aisati ashinoncaajeitachari”.

Icanti Jesoshi: “Coajica noncantacoventajeiteri atiri”.

³¹ Impoiiji icantajeitana Jesoshi:

—Noponeaca narori inquitequi, natiritapaaque. Coajica nojatanaje, impoiiji nompiaje aisati; oshequi nompincatsaritapaaque, noncarajeitapaaqueri oshequi nonampirepee. Nompincatsaritanotapaaque, impincatsatasanojeitavaquena maaroni savicajeitatsiri.

³² Nampatojeiteri maaroni atiri, jaocarica isavicajeitiri. Nonquempeteari yora ashitariri ivira inashitacaari: irovishate aisati yora iyavarate; aisati narori nonashitacayeari quemisantajeitanari aisati tseencajeitanari.

³³ Noncantajeiteri maaroni quemisantajeitanari: “Pimpocajeite aca nacosanoriquica”. Irinti tseencajeitanari noncantajeiteri: “Pimpocajeite avirori aca nampatequica”.

³⁴ Impoiiji noncamantajeiteri savicajeitatsiri nacosanoriqini: “Caatanaque, maaroni, oshequi iriveshireacajeitempi Apa maaroni. Peerani, catsini yovetsicajeitakuempiro

pisavicaajeitanti anta inampiqui. Meeca pijajeite pincarajeiteri. Cameetsa impincatsariventajeitempi.

³⁵ Aavetaquenani notashe, pipajeitaquenaro noari. Aavetaquenani nomire, pipa-jeitaquenaro niraqueri. Te piojeivetenaji, iro cantaincha pineshinoncajeitaquena anta pivancopeequi.

³⁶ Te ontimaveiteani noitsaare, ari pipajeitaquenaro. Nojoquiveitani, ari pijatashijeitana pineajeitana. Yoiminqeetaquenani caravosoqui, ari pijatashijeitana, picavintsaa-jeitaquena”.

³⁷ Impoiji incantajeitena yora cameetsajeitatsiri: “¿Arimpa novincatsarite? ¿Jaocampa ocaratiri aantavetaquempiri pitashe nopantaquempiri poari? Te nonquenshireta-jeroji. ¿Jaocampa ocaratiri aantavetaquempiri pimire nopantaquempiri piraqueri?”

³⁸ ¿Jaocampa ocaratiri noneshinoncatantaquempiri novancoqui? ¿Jaocampa ocaratiri nopantaquempirori piitsaare?

³⁹ ¿Jaocampa ocaratiri nojatashitimpiri noquivantimpiri?”

⁴⁰ Ari nancanaqueri: “Queario oca noncamantempiri: ariorica picavintsaaqueri aparoni quemisantanari picavintsaaquena narori”.

⁴¹ Impoiji noncanteri yora catiajeitainchari nampatequi: “Tsamempi pijajeitanaque anta Sharincaveniqui, pinquematsicajeitearo anta paamariqui yovetsicaqueri Tasorentsi peerani. Yovetsiquiniri camaari aisati maaroni oijajeitiriri. Meeca pincarajeiteri anta, oshequi pashinoncaaya.

⁴² Peerani aaquena notashe, iro cantaincha te pimpenaji noyeani. Aaquena nomire, iro cantaincha te pimpenaji nireri.

⁴³ Nojatashivetimpi noneempime, iro cantaincha te pineshinoncatavaquenaji, te poisav-icavaquenaji pivancoqui. Te nonquitsaaveiteani, iro cantaincha te pimpenaji noitsaare. Nojoquiiatani aisati yoiminqeetaquena caravosoqui, iro cantaincha te pijatashitenaji pineena”.

⁴⁴ Impoiji irancajeitena: “Novincatsarite, ¿jaocampa ocaratiri noneantavetaquempiri pashinoncaaca, iro cantaincha te noncavintsayempiji?”

⁴⁵ Ari noncanteri: “Queario oca noncamantempiri: te pincavintsaaajeiteriji yora quemisantajeitanari, irootaque caari picavintsantana narori”.

⁴⁶ Ari iroashinoncaajeiteri Tasorentsi anta Sharincaveniqui, incantaitiyempani. Irinti cameetsajeitatsiri irisavicaajeitaje inquitequi, incantaitiyempani.

26

Incanti joriopee: “¿Jaoca ancanteriri Jesoshi avacantanteariri?”

(Mr. 14.1-2; Ir. 22.1-2; Joa 11.45-53)

¹ Impoiji icamantajeitaquena Jesoshi, narori aisati itsipapee iroamere:

² –Piojeiti ocarati apitenivani quitaiteri omoncaratantajeari quitaiteri apajitiri Yavisantaniri. Noponeaca narori inquitequi, natiritapaaque, iro cantaincha coajica impajacota-canteetaquena.

³ Ari yapatojeitaca yora jivatacaajeitiriri saserotepee aisati yora savicacaajeitantsiri. Yapatojeitaca anta ivancoqui yora ivincatsarite saserotepee. Ipajita iriori Caijashi.

⁴ Yoametavacaajeitaca, icanti:

–¿Jaoca ancanteriri Jesoshi aanteariri aisati avacantanteariri? Iro cantaincha te ancoyeji iriojeitanaque atiripee: iquisacoventaricari.

⁵ Ari icanti itsipapee:

–Irotaintsi quitaiteri Yavisantaniri: inquimoshirejeitanaque atiripee. Eiro amatiritsi ayeri meeca Jesoshi, iquisacoventajeitaricari.

Osaitiri vetaniasato Jesoshi.

(Mr. 14.3-9; Joa 12.1-8)

⁶ Impoiji yovaanaja Jesoshi Vetaniaqui, noijajeitanaqueri. Nojajeitanaque maaroni, irosati ivancoqui Shimo, yora patsaaveitachaniri peerani.

⁷ Noajeitapaaca, irosati opocantacari tsinane amacotaquero casancajari. Oshequi ov-inaro casancajari. Ari osaitapaqueri iitoqui.

⁸ Noneajeitantarori oca, noquisajeitanaquero, nocantajeiti:

–¿Paिताquea aparajatantarori?

⁹ Ompimanterome casancajari, ayeme oshequi quirequi, impoiji oncavintsayerime oshequi ashinoncaajeitachari.

¹⁰ Yacanaquena Jesoshi:

–¿Paita picantimentantarori oca tsinaneca? Ocameetsataque oca antaqueri.

¹¹ Incantaitatitempani incarajeitempi ashinoncaajeitachari, pincantaitatitempani pincavintsaapinijeiteri irinti. Irompa nainti, eiro nocantani nosavique aca.

¹² Iotaque noncame, irootaque osaitantanari.

¹³ Queario oca noncamantempiri: coajica pinquenquetsatacaajeiteri maaroni savi-
cajeitatsiri quipatsiqui, pintsoatequero maaroni nampitsi, aisati pincarajeiteri oshequi
itsipapee. Jaocrica pijajeiteri pincamantajeiteri atiripee antaquerica oca tsinane, iriojei-
tanteari ocavintsaquena.

Icantiri Jorashi saserotepee: "Namitacotempi payeri Jesoshi".

(Mr. 14.10-11; Ir. 22.3-6)

¹⁴ Impoiji ijatanaque itsipa iroamere, yora pajitachari Jorashi Ishicariote. Ijatashijeita-
queri yora jivatacaajeitiriri saserotepee,

¹⁵ icantapaaqueri:

—Ariorica noncamantajeitempi jaoca pincanteriri Jesoshi paanteariri, ¿paita pimpina-
jeitenari?

Yacanaqueri:

—Nompinatempi quirequi.

Ari ipajeitaqueri imentaqui quirequi, icarati 30. Iro yovetsiqueetiri imentaqui perata.

¹⁶ Irosati ipiantaja Jorashi, yamenasanotiri Jesoshi iriotanteari jaoca iraacanteriri.

Ivecaratantacarori Jesoshi yoa.

(Mr. 14.12-21; Ir. 22.7-23; Joa 13.18-30)

¹⁷ Ari moncarataca noajeitantarori tanta caari tapiacha. Nojatashijeitaqueri Jesoshi,
nosampijeitiri:

—¿Jaoca picoaqueri nojajeiteri novetsicantempirori poyeari pinquenqueshiretantearori
Yavisantaniri?

¹⁸ Icantaquena:

—Pijajeite Jerosarequinta, pincantapaaqueri yora pineapaaqueri: "Icanti oamejeiteeri:
'Irotaintsi nomoncaratero. Nocoaque noyea anta pivancoqui, noncarajeiteri noamerepee'
".

¹⁹ Ari nojajeitanaque, nocantapaaqueri. Yonijaquenaro ivanco, irosati novetsicantacarori
noajeitari.

²⁰ Ari tsitenijencaiteanaque ipocapaaque Jesoshi, isaviquimojeitapaaquena,

²¹ noajeitanaca. Impoiji icantajeitaquena:

—Queario oca noncamantajeitempiri: meeca, aca picarajeitica, timatsi aacantenaneri.

²² Ari noashirejeitanaca, irosati nosampijeitantariri:

—¿Narompa, novincatsarite, aacantempineri?

Irio itsipapee aisati icantiri:

—¿Narompa, novincatsarite, aacantempineri?

²³ Yacajeitaquena:

—Iriotaque yoca quitacotaquenarica meeca nomatitatequi.

²⁴ Noponeca inquitequi, natiritapaaque. Oquenquetsatocotanani Sanquenarentsi
peerani, aitaque nomoncaratero maaroni oquequetsatocotanari. Iro cantaincha oshequi
irashinoncaasanotanaquea yora aacantenaneri. Oncameetsateme eiro itimime iriori,
impoiji eiro yashinoncaame.

²⁵ Impoiji isampitiri Jorashi:

—¿Narompa, oametanari, aacantempineri?

Yacanaqueri:

—Je, avirotaque.

Yoamejeitee Jesoshi avajeitimenteari aisati irajeitimenteri.

(Mr. 14.22-25; Ir. 22.19-20; 1 Cor. 11.23-26)

²⁶ Ari tequera nontsoncaajeiteri noyea, ari yaaquero Jesoshi tanta, yajiricaquero, ipason-
quitiri Tasorentsi. Impoiji icarajaquero, ipajeitaquena, icantajeitaquena:

—Paajeitavaquero, poajeitearo. Tempa narotaque camimentajeitempineri.

²⁷ Impoiji yaaquero aisati nirajeitantari, ipasonquitajiri Tasorentsi. Ipacojeitaquenaro,
icantajeitaquena:

—Pirajeitero, maaroni.

²⁸ Tempa irootaque niraja amparajatimentajeitempineri, incavintsaajeitantempiri
Tasorentsi. Ariorica paventajeitena, eiro iquenqueshiretajirotsi Tasorentsi caari cameet-
satatsi pantajeitiri. Iroaquera oca nocantajeitaquempiri piojeitanteari jaoca pincantajeiri
pavisacojeitantajari: avirorije, aisati maaroni timajeitatsiri.

²⁹ Eiro meeca nirajirotsi aisati ovaja. Ariorica nirajero aisati, noncarajeitempi irajeitero anta ipincasaritinta Tasorentsi.

Icantiri Jesoshi iroamere: "Meeca tsiteniri pojocajeitanaquena".
(Mr. 14.26-31; Ir. 22.31-38; Joa 13.36-38)

³⁰ Ari nopampoyeaventajeitiri Tasorentsi, impoiiji nojajeitanaque anta toncaariqui pajitachari Orivomashi.

³¹ Nareejeitantacari, icamantajeitana Jesoshi:

—Meeca tsiteniri pojocajeitanaquena. Tempa oquenquetsatacojeitimpini Sanquenar-entisi: "Incamaquerica shentajeitiriri irovishate, irishiajeitanaque irovishate, irovaraajeitanaquena".

³² Iro cantaincha ariorica nontinaanaje aisati, nojivajeitanajempi Carireaqui.

³³ Ari icantiri Petero:

—Arioricampa irojocajeitanaquempi irinti yocapee, iro cantaincha nainti, eiro nojoquimpitsi.

³⁴ Yacanaqueri:

—Queario oca noncamantempiri: meeca tsiteniri, tequerarica irineaaje teapa, ari oncarataque mava pincante: "Te nioteriji Jesoshi".

³⁵ Icantiri:

—Ariorica nontsipatempi ancamajeite, iro cantaincha eiro nocantitsi: "Te nioteriji Jesoshi".

Aisati nocantajeivetacari narorije, maaroni.

Iquenquetsatacairi Jesoshi Iriri anta Jetsemaniqui.
(Mr. 14.32-42; Ir. 22.39-46)

³⁶ Impoiiji ijatanaque Jesoshi Jetsemaniqui, noijajeitanaqueri: narori, aisati maaroni itsipapee iroamere. Icantiquena:

—Pisavicajeitavaquetsita aca: nojate anta nonquenquetsatacaavaquerita Apa.

³⁷ Ari yaanaqueri Petero, jeri itomipee Severeo apite. Oshequi yoashiretanaca, iquenqueshiretanaca.

³⁸ Impoiiji icantiri:

—Oshequi catsini noashiretanaca. Pisavicajeitavaqueta aca, pisaaquiteyea.

³⁹ Ari yavisaque capichaji, impoiiji itarecapaacaro quipatsi, iquenquetsatacaqueri Iriri:

—Apa, te noncoaveteaji nonquemaatsicatarome, iro cantaincha eiro nantirotsi no-coavetari narori, irointi nantempiro picoacaquenari avinti.

⁴⁰ Impoiiji ipiashitacari iroamere, ineajeitapaqueri imaajeitaque. Icantiri Petero:

—Tempa pamavetmatero pivochoquine, te pimateroji pisaaquitime capichaji.

⁴¹ Pisaquite, pincanteri Tasorentsi iramitacotantempiri eiro pantantarotsi caari cameetsatsi. Picoavetaca pimatanoterome maaroni nocoacaquempiri, iro cantaincha te pimateroji.

⁴² Ari ipianaja, icantajiri aisati:

—Apa, picoacaasanotaquenarorica nonquemaatsicataro, aitaque cameetsa: nomoncaratero maaroni picoacaquenari.

⁴³ Ipijanaja aisati, ineajeitakeri iroamerepee, imaajeitaque: oshequi aajeitakeri ivochoquine.

⁴⁴ Ari ipianaja aisati, iquenquetsatacaajiri. Irosati yapiitaque icantaqueriri incaranqui.

⁴⁵ Ipiashitajiri aisati iroamere, icantiri:

—¿Maajimpimpa aisati? Meeca maajarataca. Noponeaca inquitequi, natiritapaaque; meeca icantacoventaquena, meeca irayena caari cameetsajeitatsi.

⁴⁶ Pintinaajeitanaje, tsame ajataje. Jeri, yocatapaaque aacantenaneri.

Yayeetaqueri Jesoshi.

(Mr. 14.43-52; Ir. 22.47-53; Joa 18.2-11)

⁴⁷ Irosati ipocashitantapaacari Jorashi, yora yoamevetari Jesoshi: ijivajeitapaqueri oshequi atiri. Yamayetaque ivasamentopee, ivasamentopee, maaroni. Ipocajeitapaque aisati yora jivatacaajeitiriri saserotepee aisati itsipapee savicacantajeitatsiri.

⁴⁸ Icamantanirotitacari Jorashi incaranqui:

—Nonintavorotapaaqueri Jesoshi, piojeitanteariri. Impoiijuea pajiricapeeri avirori.

⁴⁹ Irosati ijatashitantacari, icantapaqueri:

—¿Ainirompi, oametanari?

Inintavoronirotapaaqueri.

⁵⁰ Icantavaqueri Jesoshi:

—Noshaninca, ¿paita pipocashitiri aca?

Irosati ipocashjeitantapaacariri maaroni, yajeitapaqueri, tapi.

⁵¹ Irosati yaantacaro itsipa iroamere ivesamento iriori, ipesavetacari inampire ivincatsarite saserote. Ipeshitaqueri iyempita.

⁵² Icantiri Jesoshi:

—Poajero pivesamento, ipiatimpicari. Tempa impesheetajeri iriori pesantapinitatsiri.

⁵³ Tempa piote noncoaquericame, noncanterime Apa, impoiji intianquenarime oshequi catsini inampire inquisacovenename.

⁵⁴ Iro cantaincha inquisacovenenaricame, iroavisacotenaricame, eiro nomoncaratirome ocamantacotitananiri Sanquenarentsi.

⁵⁵ Impoiji icantajeitiri yora pocashjeitaqueriri:

—¿Paita pamashitantanari pivesamento aisati pivasamento? ¿Narompa coshinti piquisananari? Pineapinitana maaroni quitaiteriqui anta ivancoqui Tasorentsi, noametanti; ja, payenaniqueti.

⁵⁶ Iro cantaincha irootaque paajeitantaquenari omoncaratantajeiri oquenquetsatacotitananiri Sanquenarentsi.

Irosati narori notsaroantanaca, noshianaca. Aisati iquempjeitaca maaroni iroamerepee.

Yayeetanaqueri Jesoshi anta inaquentaa oametavacainchari.

(Mr. 14.53-65; Ir. 22.54-71; Joa 18.12-24)

⁵⁷ Ari yayeetanaqueri Jesoshi anta ivancoqui Cajjashi: yora ivincatsarite saserotepee. Yapatojeitanta yora oametantirori Sanquenarentsi aisati yora savicacantajeitatsiri.

⁵⁸ Ari impoitanañi Petero anta otsapiqui iipatsite saserote. Iqueapaaquero otantacota quipatsi, isaviquimotapaaqueri yora soraropee. Yamenapaaque iriotanteari jaocarica incanteeteriri Jesoshi.

⁵⁹ Ari yora oametavacajeitainchari icoayetanaque tseyyacotearineri Jesoshi, ontimanteari iroacantanteariri.

⁶⁰ Ari itimi oshequi tseyyacovetacariri, iro cantaincha tecatsi incanteri iroacanteri. Impoiji ipoqui apite pashini tseyyacotapaariri,

⁶¹ icantapaaque iriori:

—Icanti yoca: “Nontireajero ivanco Tasorentsi: oncarate mava quitaiteri novetsicajero aisati”.

⁶² Ari icatianaca ivincatsarite saserote, icantiri Jesoshi:

—¿Tecatsimpa pincanteri avirori? ¿Paita ojita oca icantacojeitaquempiri?

⁶³ Imajeretaque Jesoshi, te iranqueriji. Yapiitajiri aisati:

—Tempa ineaquempi Tasorentsi, yora aneasanotatsiri. Pincamantasanotena: ¿avirompa Quirishito, Itomí Tasorentsi?

⁶⁴ Yacanaqueri:

—Narotaque. Noponeaca inquitequi, natiritapaaque. Coajica pineajena nosavique iracosanoriqui Tasorentsisanori, aisati pineavajena nonquenapaaaje mencoriqui, nompiaje aca quipatsiqui.

⁶⁵ Irosati iquisantanacari saserote, irosati itsereantanacaro iitsaare. Icanti:

—Pinquemaniroteriqueti: ijitasorentsitacateemi. ¿Paitampa acoantacari intime pashini camantacoterineri?

⁶⁶ ¿Paita piquenqueshirejeitiri avirorijeji? ¿Jaoa ancantiriri?

Yacajeitanaqueri:

—Cameetsa incame.

⁶⁷ Impoiji iquitiojavorojeitaqueri ivoroqui. Impoiji icapojanajeitaqueri, aisati ipasanajetaqueri, tac, tac, tac;

⁶⁸ icantaqueri:

—Quirishito, pincamantena: ¿janica capojanataquempiri?

Icanti Petero: “Te nioteriji Jesoshi”.

(Mr. 14.66-72; Ir. 22.55-62; Joa 18.15-27)

⁶⁹ Ainiroquera isaviqui Petero anta saiteriqui. Oneaqueri nampirentsi, ocantiri:

—Aviro oijatiriri Jesoshi, yora carireasati.

⁷⁰ Icanti Petero:

—Te nioteji paitarica picantaquenari.

⁷¹ Ari ijavetanaca anta iqueavetapaaca, otimi pashini nampirentsi, oneavaqueri iroori, ocanti:

—Jeri yoca oijatiriri Jesoshi, yora nasaretasati.

⁷² Icantanaquero:

—Te nioteriji yoca picantaquenari. Terica ontampaticate oca nocantaquempiri, no-coaque iroasanquetenata Tasorentsi.

⁷³ Impoiiji capichaji, jeri pashini cantapairiri:

—Queario, avirotaque oijatiriri: noquemaquero pineanataque, avirotaque carireasati.

⁷⁴ Yacanaqueri:

—Teve, te nioteriji yora shirampari picantaqueri. Ioti Tasorentsi queario nocantaquem-piri. Terica ontampaticate nocantaquempiri, nocoaque iroasanquetenata Tasorentsi.

Irosati ineantanaca teapa.

⁷⁵ Ari iquenqueshiretanacuero icantaqueriri Jesoshi: “Eirotsitarica ineaji teapa, oncar-te mava pincante: ‘Te nioteriji Jesoshi’”. Ari isoquijanaji, irapaaca jii, jii.

27

Yayeetanaqueri Jesoshi anta Piratoqui.

(Mr. 15.1; Ir. 22.66-23.1; Joa 18.28-32)

¹ Ari iroaquera oquitaitetamani, yoametavacaajeitaca yora jivatacaajeitiriri saserote-pee aisati savicacaajeitantsiri:

—¿Jaoa ancantiriri meeca Jesoshi avacantanteariri?

² Ari yoisoeyetaqueri, yayeetanaqueri anta itiminta pincatsari, yora pajitachari Pirato.

Ishiticaja irisati Jorashi.

(Yan. 1.18-19)

³ Yora Jorashi, yora aacantiriri Jesoshi, iotaque yoacantashitacari Jesoshi. Oshequi iquenqueshiretanaca, irosati yoipiantajantanari yora 30 imentaqui: yora peratatatsiri. Icantapaaqueri yora jivatacaajeitiriri saserote aisati yora savicacaajeitantsiri:

⁴ —Jeriniro piirequite. Te oncameetsateji oca nantaqueri. Tecatsi irante Jesoshi, naacantashitacari.

Yacajeitanaqueri:

—Jm, aviroyea.

⁵ Ari ipishoncanajiniri quirequi anta ivancoqui Tasorentsi, iquenaitaji, ipianaja. Impoiiji jatanaque, ishiticaja irisati.

⁶ Yora jivatacaajeitiriri saserote yajeitajiri quirequi, icantajeiti:

—Te oncameetsateji aca anquempoyeajeri yoca quirequica. Tempa iriotaque apinata-queriri iroacantanteariri.

⁷ Ari yoametavacaajeitaca:

—¿Jaoa ancantajeriri quirequica?

Icanti:

—Tsame amanantero quipatsi antijanteariri camatsiri caari aneapinijeiti.

Iro yamanantaqueri quipatsi ora yaapiniyeetiri quipatsi yovetsiqueetiri coviti.

⁸ Meeca ipajiyeetaquero oca quipatsi: “Ivinaro Jesoshi yoacantanteariri”.

⁹ Imoncarataquero isanquenatitacanari Jeremiashi: “Irayeri 30 imentaqui quirequi, yovetsicanteariri perata. Iriotaque ivinaro iraacantanteariri Quirishito. Eiro ishe-quititsi quirequi impinatantaveteariri.

¹⁰ Iriotaque iramanantantearori quipatsi anta yaapiniyeetiri quipatsi yovetsiqueetiri coviti. Iriotaque Avincatsarite canterineri iramanantero quipatsi”. Irootaque isanque-nataqueniri Jeremiashini.

Ari icantacoventiri Pirato Jesoshi.

(Mr. 15.2-15; Ir. 23.2-25; Joa 18.28-19.16)

¹¹ Ari icatiimotacari Jesoshi yora pincatsari pajitachari Pirato. Isampitiri iriori:

—¿Avirompa ivincatsarite joriopee?

Yacanaqueri:

—Je, narotaque.

¹² Impoiiji iquishimanataqueri yora jivatacaajeitiriri saserotepee aisati yora savicacantantsiri, iro cantaincha tecatsi incante iriori, imajeretashitaca.

¹³ Isampitiri Pirato:

—¿Tempa pinquemeru icantacotaquempiri? ¿Paita caari pineanatanta avirori?

¹⁴ Tecatsi incante, te impiateariji. Ari yoanaqueri cavaco pincatsari, oshequi iquenqueshireanaca.

¹⁵ Ari maaroni osarintsi, ariorica omoncarataca Yavisantaniri, yora Pirato isampitap-inijeitaqueri savicajeitantsiri: “Timatsi oshequi pishaninca anta caravosoqui. ¿Picoaque-mpa noisoquijajempiri aparoni?” Aitaque icantapinita maaroni quitaiteri Yavisantaniri, yoisisoquijapinitiri aparoni, janicarica icoiri joriopee.

¹⁶ Itimi caravosoqui meeca shirampari iquemacojeitaqueri joriopee, ipajita Varavashi: oshequi yoanti irinti.

¹⁷ Ari meeca yapatojeitaca oshequi atiri, irootaque icantajeitancacari:

–Piojeiti nametaca noimisoquijimpiri aparoni timatsiri caravosoqui. ¿Janicampa picoajeitiri noimisoquijajeitempiri meeca? ¿Iriompa Varavashi? Terica pincoyeriji Varavashi, ¿irioricampa picoajeitaque noimpacajempiri Jesoshica, yoca picantiri Quirishito?

¹⁸ Iotaque Pirato oshequi iquisashitacari Jesoshi yora jivatacantantatsiri, te incoacaajeiteriji ashanincepee inquemisantajeiteri. Ijivetaca Pirato incantajeiterime ashaninca: “Nocoaque poimpacajenari Jesoshi”.

¹⁹ Aisati incaranqui otianquiniri ijina camantiriri: “Ocanti pijina: ‘Eiro poacantiritsi Jesoshi, icameetsatasanotaque. Nomishitacari incaranqui, oshequi noquenqueshiretacoqueri’”. Irootaque caari icoantaveta iroacanterime.

²⁰ Iro cantaincha yora jivatacaajeitiriri ashanincepee icantajeitiri:

–Pincantajeiteri: “Poimisoquijajeri Varavashi, irinti Jesoshi, pimpajacotacanteri”.

Icantajeitaqueri:

–Aviroyeampa, paitarica picoaqueri avirori.

²¹ Ari yapiitajiri Pirato, isampijeitiri:

–Jeri icarataque apite: ¿Janicampa picoaqueri noimpacajempiri?

Icantajeitaqueri:

–Varavashi.

²² Isampijeitiri:

–¿Jaoca noncanceriri Jesoshica: yoca ipajiyeetiri Quirishito?

Yacajeitanaqueri:

–Pimpajacotacanteri.

²³ Isampijeivetari:

–¿Paitampa yantaqueri nompajacotacantanteariri?

Aiquero icajemajeitanaitiri:

–Pimpajacotacanteri. Pimpajacotacanteri.

²⁴ Ari iotanaque yatsipetashitaca isampinajeivetacari, aisati oshequi iquisajeitanaca atiripee. Icantiri inampire:

–Pamacotenarota nija.

Yamacotaqueneri, impoiiji iquivacotaca, iriotanteari atiri te incoaveteaji iroacanteri Jesoshi. Ineajeitaqueri atiripee, aisati icantajeitiri:

–Te naro coatsine noacanteri. Picoajeitaquerica avinti, aviroyeampa.

²⁵ Yacajeitanaqueri:

–Nocoasanojeitaque, tempa narojeitaque cantaquempiri. Inquishenata nainti Tasorentsi, aisati ocameetsati inquisheri notomipee narori.

²⁶ Ari yoisoquijajiri Pirato Varavashi. Icantiri soraro:

–Paanajeri Jesoshica, pimpasateri, impoiiji pimpajacoteri.

Yora soraropee ishirontimentajeitacari Jesoshi.

(Mr. 15.16-20; Joa 19.1-3)

²⁷ Ari yaanaqueri soraro Jesoshi anta ivancoqui pincatsari, icajemajeitaqueri itsipapee soraro.

²⁸ Ari isapocaqueri Jesoshi iitsaare, impoiiji iquitsaatiri otsipa quitsaarentsi, quiraanirori.

²⁹ Yovetsicaqueneri iramatseere totsequi, yamatseetaqueri. Aisati ipaqueri chacopi, icantiri:

–Pajiriquero opirico chacopi.

Yora pincatsari peerani iquitsaatapinitaro quiraanirori, yamatsetaro iramatseere pinatasanotachari, aisati yajiricapinitiro iotiquiro cameetsari. Ari itiyeroashinirojeitacari soraropee Jesoshi, ipincatsatamempeacari, ishirontimentajeitari, icantajeitiri:

–Aviro, novincatsarite. ¿Pipincatsariventajeitirimpa maaroni joriopee? Iji, iji, iji, iji, iji.

³⁰ Iquitiojajeitaqueri, impoiiji yaapitsatajiri chacopi, ipasatantajari iitoqui.

³¹ Oshequi yapiinataqueri ishirontimentanatacari, iji, iji, iji. Impoiiji isapocajiri quitioncanirori, iquitsaatajiri aisati iitsaaresanori. Yaajeitanaqueri impajacoteri.

Ipajacojeitaqueri Jesoshi coroshiqui.

(Mr. 15.21-32; Ir. 23.26-43; Joa 19.17-27)

³² Ari yaajeitanaqueri Jesoshi impajacotanteariri. Anta avotsiqui itonquiotavacari shirenesati, ipajita Shimo. Iperanatavacari soraro:

–Jero oca coroshica, paanaqueneri yoca.

Ari yaanaqueneri.

³³ Yareejaitapaaca Coricotaqui. Iro apajitiro aneanequi: iitontsini.

³⁴ Ari ipeevetacari Jesoshi ovaja, oconoajata quepishijatatsiri. Ineantavetavacaro, te incoyeji irirero.

³⁵ Ari ipajacojeitaqueri soraropee coroshiqui, impoiji ineatsajeitaca iriojeitanteari janica aajeroneri iitsaare.

³⁶ Impoiji isavicajeitaque, yamenajeitaqueri.

³⁷ Isanquenajeitaquero paperiqui: “Jerica Jesoshi. Iriotaque ivincatsarite joriopee”. Impoiji ipajacotaquero coroshiqui, ivatitotacaro Jesoshi.

³⁸ Impoiji aisati ipajacojeitaqueri apite coshinti: aparo yoatiacotaqueri iracosanoriqui Jesoshi, irio pashini yoatiacotaqueri irampatequi.

³⁹ Ari ainiro avisayetatsiri avotsiqui, ishirontimentajeitacari Jesoshi. Itecainajeitaca,

⁴⁰ ishirontajeitaca, iji, iji, iji. Icantajeitiri:

—Pintireerome ivanco Tasorentsi, aisati oncarate mava quitaitei povetsicajerome aisati. Jentsite, poavisacotajea avisati. Avirorica itomi Tasorentsi, jentsite paniireashitajea.

⁴¹ Aisati iquempejeitaca yora jivatacaajeitiriri saserotepee, yora oametantirori Sanquenarentsi, jeri yora savicacantatsiri: ishirontimentajeitacari. Icantajeiti:

⁴² —Ijitashiniroveitani yoavisacotejirini ashanincepee, iro cantaincha meeca te irimatajeaji iriori iroavisacotajea irisati. Jentsite, amenavaqueritsita: iriorica avincatsarite, iraniireapaaje. Ariorica iraniireapaaje, ari ampincatsatanaqueri arori. Iji, iji, iji.

⁴³ Ari ipincatsarivetari Tasorentsi iriori: ariorica iroavisacoteri irinti. Aamayea ari incoaque iroavisacoteri itomi, tempa icanti meeca yoca: “Narotaque Itomi Tasorentsi”. Iji, iji, iji.

⁴⁴ Aisati iquempejeitaca yora coshitantatsiri ipajacoyeetaqueri: ishirontajeitaca iriori.

Icamaque Jesoshi.

(Mr. 15.33-37; Ir. 23.44-46; Joa 19.28-30)

⁴⁵ Ari icarataque catsirincaiteri tampatica, omapocanaca otsiteniiteanaque, otsimoiroтанаque: irosati ishaaviniji.

⁴⁶ Ari ishaaviniji antearojenca icanti Jesoshi:

—Eri, Eri, arama savacatani.

Iro acantiri aneanequi: “Apa Tasorentsi, ¿paita pojocantanari?”

⁴⁷ Iquemantacariri yora savicajeitaintsiri, icanti:

—Pinquemerite, icajemaqueri Iriashi.

⁴⁸ Ari ishianaca aparoni, yovincaquero pijoncashincanari ovajaqui quepishijari. Isataaquero inchaquiqui, ijicotacovetacanari Jesoshi, irantsimicantearorime,

⁴⁹ iro cantaincha icantiri itsipapee:

—Eiro pantiritsi: tsame amenavaquerita, impocashiteririca Iriashi iroavisacoteri. Iji, iji, iji.

⁵⁰ Ari icajemanaji aisati Jesoshi, impoiji icamanaque, torein.

Iquenquetsatacotiri yora neajeitaqueriri Jesoshi icamaque.

(Mr. 15.38-41; Ir. 23.45-49)

⁵¹ Icamantacari Jesoshi, otsereanaque oticaashiro ivanco Tasorentsi: intanaca jenoqui otsereanaque, tsererere, irosati ishaaviji. Aisati onicanaca quipatsi, nica, nica, nica; ocotareanaque antearo mapipee.

⁵² Yashitareacotanaca tijaari, itinaajeitanaja oshequi quemisantatsiri, tinare.

⁵³ Impoiji, itinaantajari Jesoshi, ijajeitanaque yora itsipapee tinaajeitajanchari Jerosarequi. Ineajeitaqueri oshequi atiri.

⁵⁴ Ari yora capitano aisati yora soraropee ineajeitaquero onicanaca quipatsi, aisati ineajeitaqueri yora tinaajeitajanchari, ineaquero otsiteniitanaque, maaroni. Impoiji yoajeitanaque cavaco, aisati icantajeiti:

—Queariotaque: iriotaque Itomi Tasorentsi.

⁵⁵ Otimi anta nijanteaji oshequi tsinaneppee, amenajeitaqueri Jesoshi. Iroojeitaque oijaveitariniri, oponeajeitaca Carireaque. Quiso oapinitirini, opapinitirini yoari.

⁵⁶ Ocarajeitaquero Maria maquitarasato; jero otsipa Maria: ora iriniro Santiago aisati Jose; jero aisati iriniro itsipa Santiago aisati Joa. Ari oneajeitaqueri Jesoshi, icamanaque.

Yoiminqeetaqueri Jesoshini omoroqui.

(Mr. 15.42-47; Ir. 23.50-56; Joa 19.38-42)

⁵⁷ Ari ishaviijiteanaque. Itimi aparoni iroamereni Jesoshi, ipajita Jose. Iponeaca iriori Arimateaqui; ashitaarantincari ini.

⁵⁸ Ijatashitaqueri Pirato, icantapaaqueri:

—Camaque Jesoshi. Nocoaque pishinetenari naanajeri noiminqiajeri omoroqui: onta yovetsiqueetiniriri camatsiri.

Ari icantiri iriori soraro:

—Pishineteri yoca iraanajeri.

⁵⁹ Ari ijataque, yaanaqueri, yampinaicacotaqueri tocoyaqui caari pitsitatsi.

⁶⁰ Impoiji yoaqueri omoroqui mapi iroaquera imoqueeiro. Itivironquiro antearo mapi omoroqui, yashitacotantacariri. Impoiji ijatanaji Jose.

⁶¹ Ainiro osavicaque anta Maria maquitarasato aisati otsipa Maria. Oneacotaqueri yoiminqeaqueri.

Ijati soraro ishentajeivetaro omoro inaquentajesoshi.

⁶² Iro quitaiteri ipajacotantariri Jesoshi opajita Yavisantaniri. Oquitaitetamaaque ijatashijeitaqueri Pirato yora jivatacaajeitiriri saserote aisati yora variseopee.

⁶³ Icantajeitapaaqueri:

—Novincatsarite, noquemajeitaqueri icantaqueri chapinqui yora amatavitantatsiri: “Noncamaque, impoiji oncarataque quitaiteri mava, ari nontinaanaje”.

⁶⁴ Nocoaque pintianque soraro meeca irishentasanotero omoro anta yoiminqeaquerinta. Iramenasanotero irosati omoncaratanteari mava quitaiteri. Ijatashitiricari iroamereni, yaanajiricari. Impoiji icantajeitiricari ashanincaptee: “Tinaanaja inaji Jesoshi”. Peerani oshequi yamatavitantini iriori, iro cantaincha ariorica iraanajeri, yamatavitanojeitiricari iroamereni ashanincaptee, icanticari: “Tinaanaja inaji Jesoshi”.

⁶⁵ Icantiri Pirato:

—Jeri yoca soraropee, pijajeite pamenasanojeitero.

⁶⁶ Irosati ijajeitantanaca, yashitacotasanoaqueri, impoiji ishentajeitiro soraro.

28

Itinaamanaja Jesoshi.

(Mr. 16.1-8; Ir. 24.1-12; Joa 20.1-18)

¹ Ari avisanaque quitaiteri imaoreajeitantari, meeca otomincotapaaque. Tsiteniquera ojatamanaque Maria maquitarasato, aisati otsipataro omariaroronte. Ojataque amenanajero omoro yoyeetaquerinta Jesoshini.

² Omapocanaca antearo onicanaca quipatsi aisati. Jeri aisati itimi inampire Avincatsarite: iponeanaca inquitequi, ipocaque itivironcapaaquero mapi, irootaque isavicantapaacari.

³ Oshequi ishiquaireapaaque, iquempetacaro iporequi. Oquitamarotasanoaquee iitsaare, oquempetacaro sharaca.

⁴ Oshequi catsini itsarocaaajeitavacari soraropee, te irimatajeaji irishevatajea: iquempevetanaca incamaquerica.

⁵ Ari icantiro tsinane:

—Eiro pitsaroitsi avinti. Niotaque irio pipocashiveta Jesoshi.

⁶ Te aneajeriji meeca, tinaanaja ini. Tempa icamantitaquempini. Caatanaque, pamenero aca yoyeevetacarica.

⁷ Impoiji pishintsitanaje pijatanaje pincamantajeitapeeri iroamere: “Tinaanaja Avincatsarite, irijivajeitanaguempi Carireaquei. Aitaque pineajeitapaajeriri anta”. Irootaque nocamantaquempiri.

⁸ Ari oasanotanaque cavaco, aisati oshequi oquimoshiretanaque. Ojatanaque, oshiashitanacari iroamere, oncamanteri.

⁹ Nianqui imapocaquero Jesoshi, ivetsatacaro. Ojatashitaqueri, otiyeroashitacari, ajiricapairi iitiqui. Oshequi opincatsatapaacari.

¹⁰ Impoiji icantaquero:

—Eiro pitsaroitsi. Pijajeite meeca pincamantajeiteri noamereni irijajeiteta anta Carireaquei. Aitaque irineajeitapaajenari anta.

Ijatashijeivetaca joriopee yaanajiri iroamereni Jesoshi.

¹¹ Ari ojatashitaqueri iroamereni tsinane. Irinti yora soraro shentavetarori omoro ijataarantaji nampitsiqui, icamantajeitapairi yora jivatacaajeitiriri saserotepee.

¹² Yapatojeitiri iriori yora savicacantantatsiri. Yoametavacaajeitaca:

—¿Jaoca ancannerori meeca amanacotanteariri?

Ari icajemajeitaqueri soraro, icantajeitaqueri:

—Jeri yoca quirequica, nocoli nompinatempi.

¹³ Pincantashijeiteari atiripee: “Nomaajeitaque nianquiteni. Ipocaque iroamereni Jesoshi, yaanajiri”.

¹⁴ Ariorica inquemacovetaquempi yora pincatsari, pincantaque: “Nomaaque”, noncamanteri narori: “Eiro piquishiritsi soraropee. Te irimayeji. Narotaque cantiqueriri: ‘Pintseeya’”.

¹⁵ Ari yaajeitaqueri quirequi, icamantajeitaqueri atiri: “Nomaajeitaque, impoiji yaajeitajiri iroamereni Jesoshi”. Ainirotatsi meeca icantajeiti joriopee meeca.

Ineajeitajiri Jesoshi anta Carireaquei.

(Mr. 16.14-18; Ir. 24.36-49; Joa 20.19-23)

¹⁶ Ari nojatanaque Carireaquei, notsipajeitacari itsipapee iroamere. Aparoni peaincha, yora Jorashi. Noajeitanaque toncaariqui icantaquenari chapinqui Jesoshi.

¹⁷ Noneajeitapaajiri, nopincatsajeitapaajiri. Iro cantaincha aparopee tseencaveta-paincha.

¹⁸ Ari ipocashijeitana Jesoshi, icantaquena:

–Icantitaquenani Apa peerani: “Pimpincatsaritanote meeca aca inquitequi aisati pimpincatsariventasanojeiteri maaroni quipatsisati”.

¹⁹ Irootaque nocantantimpiri: pijajeite maaroni nampitsipeequi, pinquemisantacajeiteri maaroni atiripee, pintsoteaqueri maaroni. Ariorica inquemisantajeitaque, pivaoisajeiteri: irootaque icoacaqueriri Apa, aisati nocoacaajeitaqueriri narori, aisati ocoacaajeitaqueriri Ishire Tasorentsi.

²⁰ Pincamantajeiteri atiri irimajeitero maaroni nocamantaquempiri. Quiso noajeitanaquempi, noncanteani, irosati nompocantajeiri nompincatsaritantapaajeiri.

Ari ocarati. Narotaque sanquenatirori: *Mateo*

YORA MARICOSHI ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Yantayetiri Joa vaotisantantsiri.

(Mt. 3.1-12; Ir. 3.1-18; Joa 1.19-28)

¹ Meeca noncamantempiro cameetsatsiri. Noncamantempi yoavisacotanti Jesoquirishito. Tempa iriotaque itomi Tasorentsi.

² Peerani isanquenatini camantantsiniri pajiveitachaniri Isayashi. Jero oca isanquenatiniri: "Icantiri Tasorentsi itomi: 'Pinquemena, notiom. Nontianqueri quenquetsatocotempineri, irijivatanaquempi. Incantajeiteri atiri: Paamaajeiteari Quirishito, pincameetsashirejeitanaque.

³ Inquenquetsatacaajeiteri ishaninca caaraiteriqui. Incantajeiteri: Pincameetsashirejeitanaque oncanteata ariorica impoque Avincatsarite, irineacameetsajeitantapeempiri'".

⁴ Ari moncaratapaaca icantiniri peerani Isayashini. Yareetapaaca caaraiteriqui Joa, yora vaotisantantsiri. Icantajeitaqueri ishaninca:

—Pinquenqueshireempa, eiro piquempetajatsi peerani. Ariorica pojocasanojeitajero pantajeiveitaniri, ari novaotisaajeitaquempi, impoiiji iriojeitanaque atiri icavintsaa-jeitaquempi Tasorentsi, eiro iquenqueshireacotajimpirotsi pantaveitaniri.

⁵ Ari ijatashijeitaqueri maaroni joreasati, aisati maaroni jerosaresati, icamantajeitapairi:

—Ainro nantayetiri caari cameetsatsi. Nocoaque navisacotaje.

Ari ivaotisaajeitavaqueri Joa Joriraniqui.

⁶ Irio iquitsaatari tijachari iviti cameyo. Ishiticatsaquitari meshinantsitsa. Yoapinitari quentori aisati ija pitsi.

⁷ Ari icamantapinitiri ishaninca:

—Coraque impoitapeenaneri, yanaacotaquena, ipincatsaritanoti irinti. Nopincatsatanotaqueri catsini, narori notseencia narosati.

⁸ Novaotisaajeitaquempi nijaqui, iro cantaincha intianquempiro irinti Ishire, ontsipajeit-antemperi.

Ivaotisatapaaca Jesoshi.

(Mt. 3.13-17; Ir. 3.21-22)

⁹ Ari pashini quitaiteri yareetapaaca Jesoshi. Iponeaca Nasaretequi, timatsiri Carireaqui. Ivaotisatavaqueri Joa Joriraniqui,

¹⁰ impoiiji yaatanaji. Yamenanaque jenoqui, irosati ineantavacaro Ishire Tasorentsi. Omapocapaaca aniireashitapaqueri, oshiaqueri sampaquiti.

¹¹ Iquematiiri Tasorentsi icantiri:

—Avirotaque notomi nonintasanotiri. Oshequi noquimoshireventasanotaquempi.

Ijatanaji Jesoshi caaraiteriqui.

(Mt. 4.1-11; Ir. 4.1-13)

¹² Impoiiji aanaqueri Ishire Tasorentsi caaraiteriqui.

¹³ Itimaiti anta ocarataque 40 quitaiteri. Yora Satanashi ineantavetacari, irantacayerime caari cameetsatsi. Aisati tecatsi ishaninca intsipateari, irinti timatsi covencayetatsiri, iro cantaincha intacojeitacari inampirepee Tasorentsi.

Iquenquetsataque Jesoshi.

(Mt. 4.12-17; Ir. 4.13-15)

¹⁴ Ari pashini quitaiteri yashitacoyeetaqueri Joa caravosoqui. Impoiiji ijatanaji Jesoshi Carireaqui. Icamantajeitaqueri ishaninca jaoca icanta Tasorentsi yoavisacotanti.

¹⁵ Icantajeitaqueri:

—Irotaintsi impincatsariventajeitajee Tasorentsi. Pinquenqueshireempa, eiro piquempetajatsi peerani: te pincameetsaveiteani. Pinquemisantajeite pavisacotantajeiri.

Icoyeaqueri Jesoshi iroamerepee.

(Mt. 4.18-22; Ir. 5.1-11)

¹⁶ Ari pashini quitaiteri ishiteatanacaro Jesoshi incajare timatsiri Carireaqui. Ineapaaqueri Shimo, aisati irirenti, Antirishi. Iquitsati incajarequi: aitaque icantapinita, iquitsatapinitiri shima.

¹⁷ Icantapaaqueri Jesoshi:

—Poiijatanaquena, nocoaque pinquemisantacaapiniteri atiri.

¹⁸ Irosati yojocantanacaro iitsarite, yoijatanaqueri.

¹⁹ Capichaji yovaavetanaca aisati, ineapaaqueri Santiaco, Joa, apite: iriotaque itomipee Severeo. Isavicajeiti ivitoqui, ishiticayeti ro iitsarite.

²⁰ Icajemapaaqueri, yoijajeitanaqueri. Yojocanaqueri iriri, isavicaque irinti pitotsiqui, icarajeitaqueri amitacojeitiriri.

Iqueapaaque Jesoshi yapatojeitanti joriopee.

(Ir. 4.31-37)

²¹ Impoiiji yareetapaaja Jesoshi Caperenaquero, icarajeitiri iroamerepee. Irootaque saavaro, imaoreajeitanti, iqueajeitapaaque pancotsiqui yapatojeitanti. Yoametantapaaque.

²² Yora atiripee, yoajeitanaque cavaco, icantajeiti:

—Pineaqueri, cameetsa yoametantasanotaque, iotasanoiti irinti. Te inquempeteeriji yora oametapinijeiveteerori sanquenarentsi: te iriotasanoiteji irinti.

²³ Aisati itimi anta pancotsiqui aparoni shirampari neiriri camaari.

²⁴ Icajemacotavaqueri Jesoshi, icantavaqueri:

—Niotaquempi: aviro nasaretasati, aisati aviro itomi cameetsari Tasorentsi. ¿Paita pipocashitantanari? ¿Arimpa pintsoncajeitapaaquena?

²⁵ Icantiri Jesoshi camaari:

—Pimajereiteve. Piniyantareanajeri noshaninca.

²⁶ Ari yampitsitaacanacari ashaninca, antearojenca icajemanaque, irosati inijantareantanajeri camaari.

²⁷ Aisati yoajeitanaque cavaco ishaninca, maaroni. Isampitavacaanaca:

—¿Pineaquerompa imataqueri? Iroaquera aquemaquero oca yoametaqueeri. Aisati imataqueri camaari, itiancaqueri: itsaroacaitacariteemi.

²⁸ Irosati iquenquetsatacotantajeitacari maaroni carireasati.

Yoavisacotiro Jesoshi irairo Petero.

(Mt. 8.14-15; Ir. 4.38-39)

²⁹ Ari iponeajeitajeri pancotsiqui yapatojeitanti, ijajeitanaque ivancoqui Shimo, jeri Antirishi. Yoijajeitanaqueri Santiaco aisati Joa.

³⁰ Icamantiri Jesoshi:

—Ojoquuitaca irairo Shimo, aaquero catsirentsi. Jero onta nariainchari.

³¹ Ari ijatashitanaquero, yacatsavacotapaaquero, yoisavicapaajiro. Irosati opeantanaja ovatsiare, irosati opajeitantacari iroyeari.

Iro saavaro yoavisacoyetantacariri Jesoshi mantsiyetatsiri.

(Mt. 8.16-17; Ir. 4.40-41)

³² Iqueanaji catsirincaiteri, irotanaintsi ontsitenijencaiteanaje, yamayetaqueneri Jesoshi maaroni mantsiyetatsiri, aisati maaroni yatajeaoncayetiri camaari.

³³ Maaroni nampitsiquiniri yapatojeitapaaca omoroqui pancotsi.

³⁴ Isavicajeitapaaque maaroni mantsiyetatsiri, onashiyetaca imantsiarepee. Yoavisacojeitajiri. Aisati icantaqueri camaari:

—Piniyantareajeitanajeri yora patajeaonquiri, aisati pimajerejeite.

Yora camaari, iojeitaqueri Tasorentsi ini Jesoshi, irootaque caari icoanta Jesoshi incamanteri atiri.

Imananaja Jesoshi, ijatanaji.

(Mt. 4.23; Ir. 4.42-44)

³⁵ Oquitaiteanaque, tsiteniquera itinaamanaja Jesoshi. Ijatamanaque anta tecatsi timatsine, iquenquetsatacairi iriri.

³⁶ Icoacoayetajiri Shimo aisati itsipajeitari.

³⁷ Ineantapaajariri, icantapaaqueri:

—Icoacoajeitaquempi maaroni ashaninca.

³⁸ Ari icantavaqueri irirori:

—Ari inajini. Tsame avaanajea otsipapeequi nampitsi. Aitaque anta nonquenquetsatacajeiteri itsipapee atiri, irootaque nopocantacari quipatsiquica.

³⁹ Iquenaquenayetanaque, ifsoteajeitaquero nampitsipee anta Carireaque. Iquenquetsatacapinitaqueri ishaninca anta yapatotapinijeitanta, yoavisacojeitaqueri maaroni neiriri camaari.

Yoavisacotaqueri Jesoshi patsaatsiri.

(Mt. 8.1-4; Ir. 5.12-16)

⁴⁰ Pashini quitaiteri ijatashitaqueri patsaatsiri, icantapaaqueri:
 —Tempa aviro pincatsari, pincavintsayena. Ainiro pitasorenca: pinintirica poavisacotajena, ari pimataquero.

⁴¹ Oshequi icavintsaasanotavaqueri. Ari yacotashitavaqueri, ipamitavaqueri. Icantavaqueri:

—Je, noninti: aitaque pavisacotaje.

⁴² Irosati opeantanaja ivatsaaro, yavisacotanaji.

⁴³ Itiancajiri, icantasanotiri:

⁴⁴ —Noncantempi: eiro picamantayeritirsi itsipapee, irinti pijatashiteri saserote. Pini-jaapaajeri pavisacotaji. Pimoncaratero icantiniri Moishishini: poyeneri Tasorentsi pivira iriotanteari pishaninca pavisacotaji.

⁴⁵ Ari ijatanaque, iro cantaincha icamantacoyetaquero, yovaraaquero. Iotacojeitaqueri Jesoshi, irootaque caari ijatanta nampitsiqui. Itimaiti anta ocaraiteti. Ijatashijeitaqueri atiri poneyetchari otsipapeequi nampitsi.

2

Yoavisacotaqueri Jesoshi choritatsiri.

(Mt. 9.1-8; Ir. 5.17-26)

¹ Pashini quitaiteri ipianaja Jesoshi Caperenaquui. Iquemacojeitajiri areetaja ivancoqui.

² Yapatojeitaca oshequi atiri, ijaapaaca pancotsiqui. Tecatsi inquenapee pashini in-
 quempjeitantapeemparori omoro. Iquenuetsatacaajeitaqueri Jesoshi.

³ Ari icompitacotapaaqueri choritatsiri. Icarati amiriri itsipasati.

⁴ Tecatsi inquempjeitantapeempariri Jesoshi, yojocajeitavaqueri atiripee. Ari yataita-
 caanaqueri otataroqui pancotsi. Itatareapaaquero, itampaticaquero inaquentana Jesoshi. Imataquero omoro, ari yoaniitacotaqueri inareantariqui.

⁵ Iotavaqueri Jesoshi ishijeitacari, irootaque icantantacariri:

—Noshaninca, ainiro pantayetiri, iro cantaincha eiro noasanquetimentimpirotsi, aitaque noavisacotajempi.

⁶ Ainiro anta isavicaity oametantirori sanquenarentsi.

⁷ Icantashiretaque iriori:

—¿Paita icantashinirotantantari oca? Ijitasorentsinerotacateemi. ¿Jaoca incanteriri iroav-
 isacotanteariri? Tempa apaniro yoavisacotanti irinti Tasorentsi.

⁸ Ioshiretashitaca Jesoshi icantashiretaqueri, icantiri:

—¿Paita picantashiretantari?

⁹ ¿Paita pomerentsitasanotachari? ¿Pomerentsinimpa nocantiriri yoca choritatsiri: “Eiro
 noasanquetimpitsi, irointi noavisacotajempi”? Te ompomerentsiveteaji: eiro piojeititsi
 nomaterorica. Irointi pomerentsivetcha noncanteri yoca: “Pincatianaje, paajero pinari-
 antavetari, paniitanaje”. Tempa onconijatasanotanaque nomaterorica.

¹⁰ Aca quipatsiquica nocavintsaajeitiri caari cameetsatatsi, aisati noavisacojeitaqueri.
 Nocoaque piojeite ainiro notasorenca noavisacotanteariri.

Ari icantaqueri choritatsiri:

¹¹ —Nocantimpi, pincatianaje, paanajero pinariantaniri, pijataje pivancoqui.

¹² Irosati icatiantanaja, yaanajiro inariantaniri, isoquijanaji. Ineajeitavajiri ishaninca,
 yoajeitanaque cavaco. Icantajeitanaque:

—Tempa icameetsatasanoti Tasorentsi, te aneapiniteroji peerani quempetarori oca.

Ari icantavacaaca.

(Mt. 9.9-17; Ir. 5.27-39)

¹³ Ipijanaja Jesoshi aisati otsapijaqui incajare. Yapatotashijeitapaajari aisati atiri,
 yoametavajiri.

¹⁴ Impoiji yovaanaja aisati. Ineapaaqueri Irevi, yora itomi Arijeo, isavicaity pancotsiqui
 yapatotapinitiri quirequi: yapatotapinijeitiniri oromasati. Icantapaaqueri:

—Tsame, poijatanaguena.

—Ja, tsamequeti.

Ari icatianaca, yojatanaqueri.

¹⁵⁻¹⁶ Ari ijajeitanaque ivancoqui Irevi. Yoacajeitapaacari oshequi oijajeitiriri Jesoshi,
 iroamere, apatotapinitiriri quirequi, maaroni. Jeri aisati yoacaacari caari cameet-
 sayetatsi. Yarejeitapaaca oametantirori sanquenarentsi, variseo ini. Ineacotapaaqueri
 Jesoshi yoimojeitacari caari cameetsayetatsi. Isampitapaaqueri iroamere:

—¿Paita itsipajeitantariri yocapee, yoajeita? Te incameetsajeiteji.

¹⁷ Ari iquemavaqueri iriori Jesoshi, icantiri:

—Yora caari mantsiatatsine te incoyeji aavinterineri, irintiquea mantsiatatsiri. Te iro nompocantea noncajameri cameetsatsiri, irintiquea caari cameetsatsi.

¹⁸ Ari itijeita iroamerepee Joa aisati iroamerepee variseo. Yora atiri ipocashitiri Jesoshi, icantapaaqueri:

—Jeri meeca itijeita iroamerepee Joa, aisati iquempjeita iroamerepee variseo. ¿Paita caari ititanta poamerepee aviroi?

¹⁹ Ari icantavaqueri Jesoshi:

—Oquempetaca ariorica iraye shirampari ijina, incajemajeiteri ishaninca inquimoshireventajeiteri. Ariorica irareejitapeempa, ¿arimpa intijeitapeempa iriori? Eiro. Tempa iriveshireimentapeempari. Pineaquero, meeca nocarajeitiri noamerepee: ¿paita nontitacanteariri?

²⁰ Aisati, ariorica irojocajeitanajeri ishaninca aatsiri ijina, impojiniquee intijeitanaquea. Aisati coajica, nojocanajeririca noamerepee, iroashiretaojeitanaquena, irosati intijeitanaquea.

²¹ Tempa ajacapinitiro quitaarentsitsara, irootaque oshiricamaotantari. Impoiji, te oncameetsateji impataqueetero nianqui iroaquerari: tequera oshiricamaoteji irointi. Impataqueeterome, impoiji ariorica inquiveetajerome aisati, oshiricamaotanaqueme iroori iroaquerari, antsiviacaquerome maatsarantsi. Impoiji ontsereacaquero iroaquerari.

²² Ariorica ampeantantajarime pearentsi iroaquerajari peesatitsiri imeshina, tempa ari intapianaqueame, intoncanaqueme. Aitaque intserenaqueme, aisati amparajatanaqueame iroaquerajari, chararara. Tempa apeantantapinitaro iroaquerajari imeshinaqui iroaquerari. Pineaquero: iroaquerari oca noamejeitimpiri, te oncameetsateji onconoyearo ora yoametapinijeitimpiniri intaroniri.

Icantavacaimentacaro saavaro.

(Mt. 12.1-8; Jr. 6.1-5)

²³ Ari pashini saavaro iquenanaque Jesoshi panquirentsiqui, itsipajeitari iroamerepee. Ari nianqui yaviitapairo iroamere oitsoqui tírico, itaquireiro otaqui, yoajeitaro oitsoqui.

²⁴ Ari icantiri variseo:

—Paitateemi yaviitantarori oitsoqui, itaquireitantacari quitaiteri amaoreantari. Te oncameetsateji. ¿Paita yantantarori?

²⁵ Ari yacanaqueri Jesoshi:

—¿Tempa pinquenqeshireeroji sanquenarentsi quenquetsacotiriri peerani Iravirini? Te ontimeji iroyeari, aakeri itashe, aisati itsipajeitari.

²⁶ Ainiro onaveitani tanta yovetsiqueetiniriri Tasorentsi: te irishineyeeteriji iroajeitearo atiri, apaniro yoaro saserote, irinti. Iro cantaincha aavetacari itashe Iravirini. Ijatashitiri Aviataro, yora ivincatsarite saserote, icantiri: “Notasheajeitaque. Tecatsi noajeiteari”. Ari ipavaqueri tanta: “Jero oca, poyea”. Ari yoacaro, aisati yoacaajeitacari itsipajeitari. Caari inajeiti saserote, iro cantaincha te irininteji Tasorentsi iroashinoncaajeiteri.

²⁷ Pamene, yovetsiquiniri Tasorentsi atiri quitaiteri imaoreajeitantari. Te iro irovetsicanteanari atiri irineapincatsatearo quitaiteri.

²⁸ Narotaque cantacaantakerori quitaiteri amaoreantajeitari: tempa noponeaca narori inquitequi, natiritapaaque.

3

Yora Jesoshi yoavisacotiri quisoporoquitatsiri iracoqui.

(Mt. 12.9-14; Jr. 6.6-11)

¹ Yora Jesoshi ijatanaji aisati pancotsiqui yapatojeitantari. Aitaque isaviquiri shirampari quisoporoquitatsiri iracoqui.

² Yamenashijeitavaqueri atiri, sorerere: icoaque iriote ariorica iroavisacotajeri saavaroqui. Icoajeitaque incantajeite: “Te oncameetsateji oca yantiri Jesoshi”.

³ Yora Jesoshi icantiri quisoporoquitatsiri:

—Pincatiaje, caate aca nianqui.

⁴ Impoiji isampijeitaqueri maaroni amenajeitaintsiri:

—¿Cameetsampa aneshinoncatari atiri quitaiteri amaoreajeitantari? ¿Ariompa avashinoncayeri? ¿Ocameetsatimpa avavisacoteri? Tericampa, ¿picoaquempa ayeri?

Iro cantaincha imajerenirojeitanaque.

⁵ Iquisanaca Jesoshi, yamenajeitaqueri, aisati iquenqeshireanaca. Iro iquenqeshireantanacari te incavintsantaajeiteji atiri. Icantiri shirampari:

—Pancotaje.

Ari yacotanaji, irosati yavisacotantanaja.

⁶ Isoquijajeitanaque variseopee, ijatashijeitanaqueri ishaninca Eroreshi. Yoametava-caajeitaca:

—¿Jaocasa ancanteriri Jesoshi, avanteariri?

Yoavisacotanti Jesoshi anta incajarequi.

(Mt. 4.24-25; 12.15-21; Ir. 6.17-19)

⁷ Yora Jesoshi aisati iroamerepee ijajeitanaji incajarequi, yojajeitanaqueri oshequi careiasati, aisati iroreasati,

⁸ jerosaresati, iromeasati, intatiquerosati Jorirani, maaroni savicajeitatsiri Tiroqui, Shiroqui, maaroni. Iquemacojeitaqueri itasoncanti, irootaque ijatashijeitantariri oshequi atiri.

⁹ Icantiri iroamere:

—Pamaquenarota pitotsi, nontetearo: ishenacajeitapaanacari ashanincapee.

¹⁰ Ari iquenquetsatacaajeitaqueri, impoiji yaniireapaaji aisati quipatsiqui. Oshequi yoavisacojeitavaqueri. Yora mantsiyetatsiri iteencareayetaqueri ishanincapee, impamitantapeempariri Jesoshi.

¹¹ Yora atiri yatajeaonquiri camaari ipincatsajeitaqueri. Antearojenca ineanatacaqueri icantajeitaqueri:

—Jesoshi, avirotaque itomi Tasorentsi.

¹² Icantasanotiri Jesoshi:

—¿Paita picantantanari? Pimajerete, eiro picamantacotanatsi.

Icoyeaqueri Jesoshi iroamerepee.

(Mt. 5.1; 10.1-4; Ir. 6.12-16)

¹³ Ari impoiji itoncaanaque toncaariqui. Icajemaqueri yora icoyeaqueri, ari ijatashijeitaqueri.

¹⁴ Icoyeasanotaqueri 12 shirampari, intsipatasanojeitantariri. Impoiji intiancajeiteri inquenquetsatacaajeiteri ishaninca irineane Tasorentsi.

¹⁵ Aisati imatacaqueri itasoncantajeitaque irojocantariri camaari.

¹⁶ Ari icoyeaqueri iroamere 12. Icoyeaqueri Shimo, ipajitajiri aisati Petero.

¹⁷ Aisati icoyeaqueri Santiago itomi Severeo. Icoyeaqueri Joa irirenti Santiago: ipajiyee-tajiri aisati Voaneriji, acantiro aneanequi “Shintsiri”.

¹⁸ Aisati icoyeaqueri Antirishi, Jeripi, Varitorome, Mateo, Tomashi, Santiago itomi Arijeo, Tareo, Shimo. Iriotaque Shimo shintsiyetirori paitaricapee.

¹⁹ Aisati icoyeaqueri Jorashi Ishicariote: iriotaque aacanterineri coajica Jesoshi.

Jjivevetari yatajeaonquiri camaari Jesoshi.

(Mt. 12.24-32)

²⁰ Impoiji ipianaja Jesoshi pancotsinentsiqui. Yapatojeitajiri aisati oshequi atiri. Tecatsi incantea iroyea.

²¹ Iquemacojaqueri Jesoshi ishanincasanori, ijatashivetajari iraanajerime ivancosanoriqui. Icantavacaanaca:

—Te irineacoteaji Jesoshi, tsame aanajeri.

²² Ario ipocashitiri aisati jerosaresati, oametantirori sanquenarentsi. Icantacotashita-paacari:

—Iriotaque Satanashi atajeaonquiriri Jesoshi. Tempa Satanashi iriotaque ivincatsarite camaari: iriotaque amitacotiriri itianquiri iamaaririnte, irootaque imatantariri.

Yacanaqueri iriori Jesoshi.

(Mt. 12.22-32; Ir. 11.14-23; 12.10)

²³ Icajemavaqueri Jesoshi, icantavaqueri:

—¿Queariompa yatajeaoncaquena camaari? Pamene: ¿jaoca incanteari Satanashi irojocajea irisati?

²⁴ Oquempetaca ariorica inquisavacaajeitea savicatsiri nampitsiqui, irojocavacaajeitea, ¿arimpa irisavicajeitanaje cameetsa?

²⁵ Aisati oquempetaca ariorica inquisavacaajeitea savicatsiri pancotsiqui, ¿arimpa inquisoavacaajeitajea?

²⁶ Aisati iquempetaca, ariorica Satanashi inquisherime iamaaririnte, irojocavacayeame, eirome itimime: aitaque impoyereavacayeame.

²⁷ Aisati iquempeta iriori coshitantatsiri: itsaroacaari shintsitatsiri inqueavancoteri incoshitanteariri irovaararo. Ariorica impocashiteri, irijivatapeeri irapeeri, iroisotapeeri shintsitatsiri, impoijiquea incoshiteri paitaricapee yoayetiri ivancoqui.

²⁸ Queariotaque oca noncamantasanotempiri: icavintsaaajtajiri Tasorentsi maaroni antirori caari cameetsatsi. Aisati, ariorica incantimajeiveteari, incavintsaaajeiteri aisati.

²⁹ Iro cantaincha, eiro icavintsaajeitiritsi irinti cantimatirori Ishire: incantaitatijem-pani intime iriori Sharincaveniqui. Eiro catsini yavisacotajitsi.

³⁰ Irootaque icantaqueriri Jesoshi. Pineaquero, icantashinirojeivetaca incaranqui: “Irio camaari amitacotiriri Jesoshi”. Tempa irootaque Ishire Tasorentsi amitacotiriri, caari ini camaari.

Icamantiri Jesoshi janica ishanincatasannotacari.

(Mt. 12.46-50; Ir. 8.19-21)

³¹⁻³² Ari isaviquii Jesoshi pancotsiqui, isaviquimojeitapaaqueri areejeitapaariri. Impoiji areetapaaca iriniro, otsipajeitapaari irirentipee. Ocatipapaaca saiteriqui, ocantiri oneapaaqueri:

—Pincantenari notomi.

Ari iqueashitanaqueri, icantapaaqueri:

—Areetapaaca piniro, pirentipee, aisati pitsiropee. Osavicapaaque saiteriqui, ocaapaaquempi.

³³ Ari yacavaqueri:

—¿Jaoca ocantari inatatsiri? ¿Jaoca icantari iyetatsiri?

³⁴ Irosati ijicotantanacari saviquimojeitaqueriri. Icantanaque:

—Jeroca inatatsiri. Jerica iyetatsiri.

³⁵ Janicarica antapinitirori icoacairiri Tasorentsi: iriojeitaque iyetatsiri, tsiotatsiri, inatatsiri. Noshanincajeitacari maaroni quemisantajeitanari.

4

Ishiacantiri panquiveetatsiri.

(Mt. 13.1-23; Ir. 8.4-15)

¹ Yoametantaji aisati Jesoshi anta otsapijaqui incajare. Yapatotimentapaaajari oshequi atiri catsini. Irosati itetantaca pitotsiqui, itiancaquero nianquija capichaji, isavicaque. Icatishijeitapaacari otsapijaqui maaroni ashaninca.

² Yoameyetaqueri paitaricapee, aisati ishiacaaventiniri, icantiri:

³ —Meeca noncamantempi. Ijataque panquiveetatsiri yojocaitiro oitsoqui tirico.

⁴ Yojocaitiro, opariaarantapaaque avotsiqui. Ipcapaaque contsaro, yoapaacaro, itsonquitapaaqueri.

⁵ Pashini pariapaintsi oitsoqui mapiqui. Te ontimasanoteji oshequi quipatsi, jentsipaite oshiocavetanaca.

⁶ Ari ijenoquitapaaque catsirincaiteri, irosati oshimpeshitananaca. Te omparitsatasanoteji, irootaque ocamantanacari.

⁷ Opariapaaque pashini oitsoqui quitotseequimashiqui, oquimotanaque quitotseequi. Irootaque ajaanaquerori, caari oitsoquitanta panquirentsi.

⁸ Pashini pariapaintsi quipatsiqui cameetsari. Oquimotanaque, otimayetanaque oitsoqui. Aparo oitsoquitanaaintsi ocarati oitsoqui 30. Pashini otimanaque aisati oitsoqui ocarati 60. Iro otsipa ocarati oitsoqui 100.

⁹ Piquemavaquerorica oca nocantaquempiri, piotavaquero, pinquenqueshiretavaquero.

¹⁰ Impoiji ijajeitanaji atiripee, itimanaji apaniro Jesoshi, itsipajeitari aparopee oijatiriri, aisati iroamere caratatsiri 12. Isampijeitiri:

—¿Jaoca ocantari oca pishiacaaventiniriri?

¹¹ Icantanaqueri:

—Meeca noncamantempero caari piojeitini: aitaque piojeitero jaoca icantari Tasorentsi ipincatsariventanti. Irompa irinti yontapee, eiro nocamantasantiritsi, irointi noshiacantini oncanteata

¹² iramenavetea, iro cantaincha eiro ineasanotitsi, inquemavetea, iro cantaincha eiro iotasanotitsi. Eiro iquenqueshireatsi, eiro icavintsaajiritsi Tasorentsi.

¹³ Aisati icantaqueri:

—¿Tempa pinquemavaquero oca noshiacantimpiri? Ariorica noshiacantempero aisati, ¿jaoca pincanteari piotantearori?

¹⁴ Yora jocaiyetirori oitsoqui ishiaqueri ovaayetirori irineane Tasorentsi.

¹⁵ Aparopee jocaiyetapaincha avotsiqui oshiaqueri quemisantavetavacarori irineane Tasorentsi, iro cantaincha yora Satanashi yojocapitsatajiri iquenqueshireantavetacari: te inquemisantanejeji.

¹⁶ Aisati oca jocaitapainchari mapiqui, oshiaqueri quemavetavacarori irineane Tasorentsi. Intsipate iquimoshireventavetavacaro.

¹⁷ Ishiaquero panquirentsi caari timatsine ovaritsa. Intsipaiete ocamaque. Iquemisan-tavetaca, irootaque yoashinoncanteetacariri, aisati iquisanentanteetacariri. Intsipaiete yojocanajiro iquemisantaveta.

¹⁸ Oca jocaitainchari quitotseequimashiqui oshiacaaventiri quemavetavacarori irineane Tasorentsi.

¹⁹ Iro cantaincha iquenqueshiretapinitiro timayetsiri aca quipatsiqui, iquimoshireventajetiro yashiyetari. Aiquero icoanaitii irashijeitearo paitaricapee, irootaque yojocantajarori iquemisantavetari. Ishiaquero caari timatsi oitsoqui.

²⁰ Iroquea oca irointi jocaitapainchari quipatsiqui cameetsari, oshiacaaventiri quemasanotavaquerori irineane Tasorentsi. Aitaque ishiresanotacarori, iriotaque shiacaaventainchari panquirentsipee timanaintsiri oitsoqui. Aparo oitsoquitainaintsi ocarati oitsoqui 30. Pashini otimanaque aisati oitsoqui ocarati 60. Iro otsipa ocarati oitsoqui 100. Oca oitsoqui oshiacaquero amajeitaqueneriri Tasorentsi, aparato iranaacotaqueri itsipapee.

Ishiacantiniri Jesoshi tsiomentotsi.

(Ir. 8.16-18)

²¹ Aisati icantaqueri:

—Ancoaquericas antsiotea, zarimpa avajero tsiomentotsi covitiqui tsoompoina? Zarimpa amanaquero tsiomentotsi? Tempa acoiro antisiojeitearo maaroni amenajeitanteari.

²² Coajica onconijatanaque maaroni amanavetari, iriojeitanaquero maaroni antajeitaqueri.

²³ Otimirica piquemantari, pinquemavaquero oca nocamantaquempiri.

²⁴ Pashini icantaqueri aisati:

—Pinquenqueshiretero oca piquemaqueri. Ariorica capichaji pinquemisantavaquero nocamantimpiri, ari capichaji piotavaquero. Ariorica pinquemisantasanotavaquero, ari oshequi piotavaquero, noametasanotaquempiro catsini.

²⁵ Yora iotavaquerori noametaqueriri, aiquero noametasanoteri catsini. Yora caari iotavaquero nocamantavetacariri, eiro iotitsi catsini.

Ishiacantiniri Jesoshi panquitirori oitsoqui.

²⁶ Aisati icanti:

—Tempa ipincatsariventajeitaquee Tasorentsi. Ishiaquero shirampari jatatsiri ipanquitiro oitsoqui quipatsiqui.

²⁷ Imaapiniti tsiteniriqui, isaaquitapiniti quitaiteriqui. Ocontetsoaquitanaque ivanquire, oquimotanaque. Te iriotacoteroji jaoca ocantanacari oshiocantacari.

²⁸ Oshioaque quipatsiqui: ojivati otsoaqui, impoiji ominca, impoiji opa, impoiji antaiquitanaque oitsoqui.

²⁹ Ariorica osampaquitanaque oitsoqui, intotacoyeetero, tempa omoncaratapaaca irantearori.

Ishiacaaventiniri moshitasa.

(Mt. 13.31-32; Ir. 13.18-19)

³⁰ Aisati icanti Jesoshi:

—Jaoca noncantempirori noshiacaaventempiro jaoca icanta Tasorentsi ipincatsariventanti? Jaoca ancanteterori anquenquetsatocantearori?

³¹ Oshiaquero oitsoqui moshitasa. Irointi oitsoqui, te onquempetearoji pashinipee oitsoquiyetatsiri: quiripequiiataque oni catsini. Ariorica ampanquitero,

³² oshiocanaque. Onquimotanaque, anayetanaquero otsipapee panquirentsiyetatsiri. Antearoyetanaque ojempequipee, aitaque iramampeapinitearo vanquiyetachari.

³³ Aitaque icantapinita Jesoshi, ishiacaaventapinitiniri atiri iroametanteariri irineane Tasorentsi. Ariorica capichaji iquemaquero, ari capichaji yoametaqueri: oshequirica iquemavaquero, ari oshequi yoametaqueri.

³⁴ Iotaca ishiacaaventapinitiniriri. Irintiquea iroamere, itsoteajeitaqueneri yoametasanojeitiri.

Yoimajerentaquero Jesoshi tampea.

(Mt. 8.23-27; Ir. 8.22-25)

³⁵ Iqueanaji catsirincaiteri. Icantajiri iroamere:

—Tsame amonteanaje intatiquero.

³⁶ Itiancanajiri apatotimentajeitariri:

—Tsamajempi pijajeitanaje pivancopeequi.

Irosati inaque iriori pitotsiqui, isavicaque. Itejeitanaja iroamere, yoimonteajiri. Aisati imonteacotanaja yora apatotimentariri otsipapee pitotsi.

³⁷ Omapocavaqueri nianquija antearo tampea catsini. Ora omotoncane otejatapaacaro pitotsi, irovetaincha ojaayeame.

³⁸ Imaaque Jesoshi anta opataquiqui, itiinataca. Yoisaaquerequeri iroamere, icantaqueri:

—Oametnari, ¿paita caari pinquenqueshireanta? Irotanaintsi ampiincajeite.

³⁹ Itinaanaja, icajemacotaquero tampea, aisati icantiro incajare:

—Pimajerete, pimajerejate.

Opeanaja tampea. Omajerejatanotanaji incajare.

⁴⁰ Icantiri:

—¿Paita pitsaroantari? ¿Paita caari pishirejaitantari Tasorentsi?

⁴¹ Oshequi catsini itsaroasanojeitanaque. Icantavacaanaca:

—¿Janicampa yoca, oquemisantantacariri tampea? Aisati incajare, oquemisantaqueri.

5

Yoavisacotiri Jesoshi neiriri camaari.

(Mt. 8.28-34; Jr. 8.26-39)

¹⁻² Yarejeitanaca intatiquero, yamatsecapaaque quipatsiqui: irootaque iipatsite jerasasati. Intsipaita itonquiotavacari neiriri camaari, iponeanaja anta tijaarimashiqui,

³ aitaque isaviquiri. Tecatsi aaveerineri iroimajerenteri.

⁴ Yoisotapiniyeevetari iracoqui carenatsa, aisati itiqui, iro cantaincha ipesayetaquero, peti, peti. Tecatsi anacoterine ishintsiti.

⁵ Icantiatiani: tsiteniriqui, quitaiteriqui, iquenayeti tijaariqui aisati toncaariqui. Icajeyameti, itoyetaro mapi.

⁶ Yoca shirampari ineitavacari arejiquinta Jesoshi, ishiashitanacari, itiyeroashitapaacari.

⁷⁻⁸ Icantavaqueri Jesoshi camaari:

—Pinijantareanajeri yoca shirampari.

Antearojenca icajemacotapaaqueri:

—¿Paita pashereantnari? Aviuro Jesoshi, itomi Tasorentsi inquitequiniri, tempa ineajectaquee. Nocantasanotimpi catsini, eiro poashinoncaanatsi.

⁹ Ari isampitiri Jesoshi:

—¿Jaoca pipajitari?

Yacanaqueri:

—Nopajita Oshequianti. Iro nopajitantari, oshiquianti noni catsini.

¹⁰ Eiro pitiancanatsi pashiniqui nampitsi.

Aitaque icantasanotapinivetacari catsini.

¹¹ Ari anta itimi oshequi chancho, yoajecta tioncaiqui.

¹² Yora Oshequianti icantiri:

—Ari pintianquenari anta chanchoqui, irineavaquena iriori, quiso noapaajeri.

¹³ Ari ishinetaqueri; injantareanajiri camaari shirampari, yojocanjari. Ineavaqueri irinti chancho. Icarajeti chancho 2,000. Ishiajeitanaca imperitaitequi, ipiincajeitanaque incajarequi, pocn, pocn, pocn; itsitiajeitanaque, pomiririri.

¹⁴ Itsaroajeitanaque shentajeivetariri, ishiajeitanaca, icamantapairi savicajeitatsiri nampitsiqui, aisati oantsipeequi. Otsoteanaca neantsi. Ipocajeitanaque atiri irameneri jaocarica icantacari chancho.

¹⁵ Ijatashijeitiri Jesoshi, ineajectapairi yora neaveitariniri camaari. Isavicaji, iquit-saataja, timanaji iquenqueshiretantari. Ari ineajectapaaqueri, itsaroacajeitapaacari.

¹⁶ Yora neasanotaqueriri incaranqui icamantajeitaqueri:

—Pineaqueri, yoavisacotajiri Jesoshi yora neaveitariniri camaari. Aisati yoviincacantaqueri chancho.

¹⁷ Impoiji icantasanajeitiri:

—Pijataje, eiro pipocajitsi aisati nonampiqui.

¹⁸ Ari itetanaja Jesoshi pitotsiqui. Icantasanovetari yora yoavisacotiri:

—Nocoaque noijatanaquempi.

¹⁹ Iro cantaincha, icantiri Jesoshi:

—Eiro poijatatanatsi, ainti pijataje pinampiqui, anta pishanincaqui. Pincamantapeeri: “Ineshinoncatajana novincatsarite”.

²⁰ Ari ijatanaque neaveitariniri camaari Tecaporishiqui. Icamantajeitapairi maaroni atiri:

—Yoavisacotajana Jesoshi.

Yoajectavaqueri atiri cavaco.

Yoavisacotiro Jesoshi irajashetatsiri.

(Mt. 9.18-26; Ir. 8.40-56)

²¹ Ari imonteanaja Jesoshi intatiquero. Yapatotejavacari oshequi atiri anta otsapijaqui.

²² Yareetapaaca shirampari pajitachari Jairo, yora jivatacaajeitiriri atiri anta pancotsiqui yapatotantari. Ineapaaqueri, itiyeroashitapaacari Jesoshi.

²³ Icantasanotapaqueri:

—Irotaintsi oncame noshinto. Pimpoque pimpamitapeero avisacotantajeari iroori, eiro ocamantatsi.

²⁴ Ari yoijatanaqueri, aisati yoijajeitanaqueri oshequi catsini apatotimentariri, yovetacajeitanaqueri.

²⁵ Ocarajeitaqueri tsinane irajashetatsiri. Ocaratacotaque osarintsite 12 irajashetanacari.

²⁶ Oshequi yaavinteenayevetaro, aiqero yoatsiyeetaquerori. Atsipetashitacaro opinaventayevetacaro maaroni ashiyevetari. Te avisacotimateji, aiqero ojatatii irajatanaque catsini.

²⁷⁻²⁸ Oquemaque icantacoyeetiriri Jesoshi: “Oshequi yoavisacotanti”. Osatecanacari oijajeitiriri, oquenapaaque itapiiqui. Oquenqueshiretanaca:

—Ariorica nantiteri iitsaare, aitaque navisacotanafe.

Ari antitaqueri iitsaare, ocaratanaji irajaveitani.

²⁹ Oquemavaitia maaririri, avisacotanafe.

³⁰ Aisati iriori Jesoshi, iquemashitavaitiaro itasorenca. Ari ipitsocashitanacari oijajeitiriri, icantiri:

—¿Janicampa antitaquenarori noitsaare?

³¹ Yacanaqueri iroamere:

—Tempa pineeriji yoshequitaque oijajeitimpiri. Yovetacayetaquempi. Aiqero picanti: “¿Janicampa antitaquenarori noitsaare?”

³² Yamenamenayetanaque irineero antitaqueriri iitsaare.

³³ Iroori tsinane, oshequi otsaronaque, opioncanaque, pio, pio. Iotanaque avisacotaji. Otiyeroashitapaacari, opincatsataqueri. Otsoteaquero ocamantasanotaqueri maaroni.

³⁴ Icantiro:

—Tsinane, pishiretaquena, irootaque pavisacotantajari. Meeca pijataje, pinquimoshiretanaje. Aitaquenea pavisacotajiri.

³⁵ Tequerata intsonquerome ineanatiro, ipocajeitapaaque inampirepee Jairo. Icanta-paaqueri:

—Camanaque pishinto. ¿Paita pantsipetacanteariri pasherequeri yoca oametantatsiri?

³⁶ Iquemavaquero Jesoshi oca icantapaaqueriri. Icantiri Jairo:

—Eiro picantashiretitsi, nainti pishiretea.

³⁷ Tecatsi irishinete oijatanaquerine. Irinti ishinetaque yora Petero, Santiago, Joa. Iriotaque Joa irirenti Santiago.

³⁸ Yareejeitapaaca ivancoqui Jairo. Ineapaaqueri atiripee: icajemajeitaque, iraashiretacojeitacaro, iracojeitacaro.

³⁹ Iqueapaaque, icantapaaqueri:

—¿Paita picajemacojeitantarori? ¿Paita piraacojeitantarori? Te oncamasanoteji evancaro, irointi omai.

⁴⁰ Ishirontimentajejavacari, iro cantaincha yoisoquijajeitapairi. Yaanaqueri irini, jero inironi, aisati iroamere, iqueanaque anta onaquenta evancaroni.

⁴¹ Yajiricavacotapaaquero acoqui. Icantiro:

—Tarita comi.

Acantiro aneanequi arori: “Evancaro, pintinaanaje”.

⁴² Otinaanaja evancaro, tancore, aniitanaji. Ocarataque osarintsite 12, irootaque omantantajari aniiveetaji. Yoasanojeitanaque cavaco oshaninca.

⁴³ Icantasanotiri:

—Eiroya picamantayetiritsi atiri. Meeca pimpero oyeari.

6

Ijataque Jesoshi Nasaretequi.

(Mt. 13.53-58; Ir. 4.16-30)

¹ Ari ijatanaji Jesoshi, yareetapaaja iipatsitequi iriori. Yoijajeitajiri iroamere.

²⁻³ Impoiji quitaiteri imaoreaajeitantari, yoametantapaaji anta yapatotapinijeitacanta joriopee. Yoajeitavaqueri cavaco oshequi quemavaqueriri. Itseencajeitaqueri Jesoshi, icantajeiti:

—Tempa iriotaque ashanincasanori arori. ¿Jaoca oponeimotacariri oca yoametantiri? ¿Jaoca icantacari itasoncantayetantacari? ¿Caarimpa yoca vetsicapinitirori inchato? Iriotaque otomi Maria, tempa iriotaque irirentipee Santiago, Jose, Jorashi, aisati Shimo. Aisati iritsiropee, tempa osaviquimojeitaquee aca.

⁴ Icanti Jesoshi:

—Ari inecameetsajeivetacari atiripee camantantatsiri. Iro cantaincha iriorica camantantatsiri ishanincasanori, ari intseenqueri.

⁵ Ari itseencajeitaqueri, irootaque caari itasoncantapinitanta anta inampiqui. Aparopee ipamiyetiri mantsiyetatsiri, yoavisacoyetiri.

⁶ Iro cantaincha te inquemisantajeiteriji ishaninca, irootaque yoantanacari cavaco:
—¿Paita caari iquemisantajeitantana?

Yantayetiri iroamerepee Jesoshi.

(Mt. 10.1-15; Jr. 9.1-6)

Iquenaquenayetanaque Jesoshi nampitsipeequi, yoametantayetanaque.

⁷ Aisati icoyeaqueri iroamere 12. Imatacaqueri iroavisacotanteariri neiriri camaari. Impoiji itiancajeitaqueri; itsipatavacaayanaca, apitepee ijayetanaque nampitsipeequi.

⁸ Icantasannotavaqueri:

—Ariorica pijatanaque, tecatsiyea paanaque. Eiro paanaquetsi poyeari, eiro paanaque-rotsi pitsarate. Aisati eiro paanaqueritsi piirequite. Irointiquea paanaque piotiquiro.

⁹ Aisati pisapatotanaque, iro cantaincha eiro piquitsaatarotsi poicoro.

¹⁰ Aisati icantavaqueri:

—Jaocarica pisavicapaqueri, aitaque pintimaanitapaaqueri, irosati pijatantajeari pashiniqui nampitsi.

¹¹ Eiorica yaacameetsajeitavaquempi nampitsiquiniri, aisati eiorica iquemisanta-jeitavaquempi, ari povaanajea, iriotanteari pishemacari, eiro pipiashitaritsi aisati.

¹² Ari ijajeitanaque iroamere. Icamantajeitiri atiripee:

—Pinquenqueshirejeitea, eiro pantapinitirotsi aisati caari cameetsatatsi.

¹³ Yoavisacoyeitiri oshequi yatajeaoncane camaari. Itiritantayetari quejitsi oshequi mantsiaripee, yoavisacoyetiri.

Yora Eroreshi yoacantaqueri Joa.

(Mt. 14.1-12; Jr. 9.7-9)

¹⁴ Oshequi quemacojeitiriri Jesoshi, irootaque iquemacotantacariri aisati pincatsari pajitachari Eroreshi. Icantayeti atiripee:

—Iriotaque Joa vaotisantantatsiri, camavetainchari: itinaanaja. Iro itinaantajari itasorentsiti.

¹⁵ Timatsi pashini cantayevetachari:

—Irioyeata Iriashini: itinaanaja.

Pashini cantayetatsiri aisati:

—Iriotaque camantantatsiri. Ishiajiri camantantaveitachaniri.

¹⁶ Ari iquemacotaqueri Eroreshi, icanti:

—Iriotaqueteemi Joa. Nopesacantavetacari itsanoqui iro cantaincha itinaanaja aisati.

¹⁷⁻¹⁹ Ari peerani Eroreshi yaapitsataqueri irirenti ijina. Ipajita irirenti Jeripi, iro ijinantaveitaniri, Eroriashi.

Yora Joa icantapinivetacari Eroreshi:

—Te oncameetsateji paapitsateri pirenti ijina.

Oquisanaqueri Eroriashi, ocoasanoveta oacanterime, iro cantaincha te irininteji yora ojimentajari. Oshequi ashereapinitaqueri, irootaque yaacantantacariri Joa, yoiminqui-cantaqueri caravosoqui tsoompoina.

²⁰ Ipincatsavetacari iriori Joa, iotiri icameetsatasanoti, iquemisantasananoti Tasorentsi. Te irishinevetearoji ijina oacanteri. Itsaroacaapinivetari Joa, iquenquetsatacapinitiri. Inecameetsatiro icantiriri Joa, iro cantaincha te irioteji jaoca incanteari.

²¹ Omoncarataja iitaiterite itimantacari peerani Eroreshi. Yoacaajeitari ivincatsaririnte, ivincatsarite soraro, aisati ivincatsarite carireasati. Irootaque quitaiteiri oacantantacariri Eroriashi Joa.

²² Oqueapaaque oshinto Eroriashi anta yoajeitanta omaninquetsaveetapaaque apaniro. Inecameetsatavaquero Eroreshi aisati itsipajeitari. Icantiro evancaro:

—Pincoacotena paitarica picoaqueri. Aitaque nompaquempiro.

²³ Ineaquena Tasorentsi, ioti eiro namatavitimpitsi. Paitaricapee pincoacotaquenari, aitaque nompaquempi. Picoaquerica nompaaantempi noipatsite, aitaque nompaquempi cashetani.

²⁴ Osoquijanaji iroori, osampitapaaquero iniro:

—¿Paita noncoacoteriri?

Acavaquero iroori:

—Iro pincoacoteriri iito Joa vaotisantantsiri.

²⁵ Intsipaita opianaja aisati, opiashitanajari pincatsari. Ocoacotapaaquero, ocantiri:

—Nocoi meeca pimpacotenaro matitaqui iito Joa.

²⁶ Oshequi yoashiretanaca. Tempa aitaque icantaquero incaranqui: “Eiro namatavitimpitsi”. Aisati iquemajeitavaquero maaroni itsipajeitacari. Te meeca incoajaji iramatavitero.

²⁷ Ari itiancaquero oantatsiri, icantavaquero:

—Pamaquenaro iito Joa.

Ari ijatanaque anta yoiminqueaquerinta, ipesapaaquero itsanoqui.

²⁸ Yamacotaquero matitaqui iitoni, ipapaaquero evancaro. Iroori, ovaaquenero iniro.

²⁹ Iquemacotaquero iroamereni Joani, ari ijatashijeitaquero. Yaanajiri, itijajiri.

Yoacaacari Jesoshi oshequi atiri.

(Mt. 14.13-21; Ir. 9.10-17; Joa 6.1-15)

³⁰ Ipiajeitanaja itiancane Jesoshi. Icamantajeitapaajiri maaroni yantayetaquero. Aisati icamantacoyetapairo maaroni yoametantayetaquero.

³¹ Irosati icantani oshequi atiri ipocashitapinitiri Jesoshi, aisati ijajeitanaji. Te irinjantareeriji, tecatsi incantea iroyea. Icantajeitavaquero itiancane:

—Tsame ajate ayojeitanaquea anta tecatsi timatsine. Amaoreajeitavaqueta capichaji.

³² Ari ijajeitanaque, iquenanaque pitotsiqui.

³³ Ari ineajeitavaquero oshequi atiri, iojeitavaquero. Iponeajeitanaca ivancopeequi, ishianaca, ishitejeitanaca. Ishianaca, yanaacojeitaquero, yapatotimentajeitavacari.

³⁴ Imitajanaque Jesoshi, ineapaatiiri oshequi apatojeitainchari. Irosati ineshinoncajeitantapaacariri ishiacaantapaaquero ovisha caari timatsine amenerineri. Oshequi yoamejeitapaquero paitapeerica.

³⁵ Ari ishaavijitanaji catsirincaiteri. Ipcashitiri iroamere, icantiri:

—Meeca anajeitaque aca caaraiteriqui, tecatsi avajeiteari. Aisati ishaavijitaque catsirincaiteri.

³⁶ Pintiancajeiteri atiri irijajeitajeta oantsiqui, nampitsiqui quempejiniri. Iramananta-jeitapeeta iroyeari.

³⁷ Yacanaquero, icantiri:

—Pimperita avinti iroyeari.

Icanti iroamere:

—¿Picoavetampa nojate namanantaite tanta nompantajeiteariri? Oshequi ompinatea noacantajeiteariri maaroni, eiro imoncaratarotsi airequite.

³⁸ Yacanajiri:

—¿Jaoca ocaratiri pitantane timatsiri? Pijate, pamenaitero.

Ari ineaitiro, icantaquero:

—Apapacoroni ocarati tanta, aisati apite shima.

³⁹ Icantiri:

—Poisaviquero atiripee ara saveshishiqui. Pampatoyeteri, aisati pinashitacaayeteri.

⁴⁰ Ari yapatojeitaquero, isavicajeitanaque. Aparoni apatojeitainchari icarati 100 atiri. Itimi oshequi itsipapee apatojeitainchari aisati. Inashiyetaca pashinipee apatojeitainchari, icarayetaque 50.

⁴¹ Ari yaaquero Jesoshi tanta aisati shima, yamenanaque jenoqui. Icantiri iriri:

—Ariove, Apa, aviro paquenarori oca noyearica.

Icarajaquero tanta. Ipaquero iroamere irovayeteneri apatojeitainchari. Aisati shima, yovayetaqueneri maaroni atiri,

⁴² ari yoajeitanaca. Iquemajeitanaca, te intsonqueroji.

⁴³ Yaayetajiro timaarantapaajantsiri, ijaayetajiro cantiriqui ocarati 12.

⁴⁴ Icarajeiti ocarori 5,000 shirampari.

Yaniijatiro Jesoshi incajare.

(Mt. 14.22-33; Joa 6.16-21)

⁴⁵ Impoiji itianquiri Jesoshi iroamere, icantiri:

—Pintetanajea pitotsiqui. Pijivajeitanaquena intatiqueronta, anta Vetsairaqi: nontiancajeitajerita ivancopeequi yoca apatojeitainchari.

⁴⁶ Impoiji ijatanaque Jesoshi toncaariqui, iquenquetsatacari iriri.

⁴⁷ Otsitenijencaiteanaji, inianquijatacotanaque iroamere incajarequi. Itimaiti Jesoshi apaniro quipatsiqui.

⁴⁸ Ineaqueri iroamere, icomacomajeiveta, iotaqueri imaojempequitaque. Aiquero oipiacotajiriri tampea. Ari oquitaitetimataji ijatashitajiri iriori Jesoshi. Yaniijatanajiro incajare, te intsitiyeji. Iro iravisanaquerime,

⁴⁹ iro cantaincha ineajeitavajiri, yaniijatapaajiro incajare. Ijijeivetavacari irio camaari. Ari icajemajeitanaque:

—Eeeee. Coraquenive camaari.

⁵⁰ Ari ineajeitavaqueri maaroni. Itsaroajeitanaque. Ineanatapaajiri:

—Pinquimoshirejitaje. Narotaque pocajantsiri. Eiro pitsaroashijeitatsi.

⁵¹ Itetapaaja pitotsiqui, itsipajeitapaajari, opeanaja tampea. Yoajeitanaque cavaco catsini.

⁵² Ineajeivetacari incaranqui itasonquiro tanta, iro cantaincha tequera inquenqeshireimateaji.

Yantayetiri Jesoshi anta Jenesaretequi.

(Mt. 14.34-36)

⁵³ Ari imonteanacaro, yareejeitapaaca Jenesaretequi. Yaatacojeitapaaque.

⁵⁴ Imitajaitapaaque, intsipaite iojeitavaqueri atiri.

⁵⁵ Ishiashijeitapaacari. Yamacojeitakeri mantsiyetatsiri inareantariqui. Jaocarica itimapairi Jesoshi, aitaque anta yaacotanaqueneriri.

⁵⁶ Iquenaquenayeti nampitsijaniquiqui, nampitsiqui antearo, aisati oantsiqui. Jaocarica iquenaqueri Jesoshi yoayetaqueneri mantsiyetatsiri. Yoayetaqueneri nianqui nampitsiqui, icantajeitavaqueri:

—Pishinetenaro nompamititavaquempiro ocaratapai piitsaare.

Ari yavisacojeitaji maaroni pamititajeitaveriri iitsaare.

7

Yamejeitari joriopee.

(Mt. 15.1-20)

¹ Ari ipocapaaque variseopee, aisati aparopee oametantirori sanquenarentsi, iponeaca Jerosarequi. Yapatotimentapaacari Jesoshi.

² Ineajeitapairi iroamere, yoajeita iriori: te inquivacoteaji. Icantajeiti intacaroniri: “Ariorica ayea, ajivate anquivacotea ancameetsashiretanteari”.

³ Yora variseo yamejeitaro tequeratarica iroyeata, iquivacotasanta. Tempa yamejeitaro maaroni joriopee. Irompa eiorica iquivacotita, eiro yoatsi. Aitaque imoncaratajira yoametantapinitiniri intacaroniri.

⁴ Ariorica imponeajea anta nampitsiqui nianqui, eiorica iquivacotasantopaaajatsi, eiro yoapaaajatsi. Aisati imoncaratashiyetaro oshequi paitarica yoameyetiriri ishanincani. Iquivaajeitapinitiro pajo, onero, oya, maaroni.

⁵ Ari isampijeitapaqueri Jesoshi:

—¿Paita caari imoncaratantaro poamere yoametantapinitiniri intacantaqueeniri? Jeri yoca meeca oainchari, te inquivacoteaji: ainiro irantane.

⁶ Icantavaqueri Jesoshi:

—Oshequi pamatavitantayeti. Aitaque icamantacotitaquempini peerani Isayashini. Isanquenatini: “Icantashivetana yoca atiri: ‘Picameetsati’, iro cantaincha te inquenqeshiretenaji.

⁷ Yatsipetashitaro itiyeroimentavetana; ipincatsatashivetana. Pamatavitashiyetacari pishaninca: picantanirovetari oca poametantavetari irootaque irineane Tasorentsi”. Queario oca icantaqueniri Isayashi.

⁸ Aisati icantiri Jesoshi:

—Pojocashitacaro icantavetimpiri Tasorentsi, irointi piquemisantashitacaro yoametantapinitiri atiri.

⁹ Aitaque pitseencaquero icantiri Tasorentsi, irointi picoaque pimoncaratajero yoametantapinitiri intacaroniri.

¹⁰ Icantini Moishishini: “Pimpincatsateri piri, aisati piniro”. Aisati icanti: “Aitaque iroasanqueteri Tasorentsi yora cantimatiriri iriri aisati iriniro”.

¹¹ Iro cantaincha picantashinirojeivetari ashaninca: “Ariorica pincashiacyeri Tasorentsi piirequite, ari pimpasanoteri. Irashinoncayearica piri, piniro, pincanteri: ‘Eiro nomatirotsi noncavintsayempi: nocashiacaqueri Tasorentsi noirequite nomperiri’”.

¹² Aitaque meeca te pishineteriji pishaninca irintacoteari iriri, iriniro.

¹³ Picoacaqueri inquemisantero poametantapinitiriri, aisati poametaqueri intseenquero icantiri Tasorentsi. Aitaque picantanerotapinitari: pojocacaayetiri ashaninca iquemisanti.

*Icamantiri Jesoshi paita caari icameetsatanta atiri.**(Mt. 15.10-20)*¹⁴ Ari icajemajiri aisati apatojeitainchari, icantajeitiri:

–Pinquemajeitavaquena maaroni. Piojeitavaquero oca.

¹⁵ Ocameetsati avajeitearo paitapeerica, eiro otimitsi antane: tecatsi oncantero avari ashire. Piquenqeshiretiro caari cameetsatsi, irootaque pantapinitantarori.¹⁶ Otimirica piyempita piquemantari, pinquemavaque.¹⁷ Ari ijajeitanaji apatotimentariri, iqueapaaji Jesoshi pancotsiqui. Isampitiri iroamere:

–¿Jaoca ocantari pishiacaaventiniriri?

¹⁸ Icantiri:

–Aisatimpa avirori, ¿tempa pinquemavaquena? Paitapeerica iroyeari ashaninca, ocameetsati, eiro otimitsi irantane. Tempa piotavaquero.

¹⁹ Eiro omatirotsi ishira, ainti ojataque isheitoqui, impoiji ishitajiro.

Irootaque yoamejeitiri ocameetsataque paitarica yoyeeyetari.

²⁰ Aisati icantiri:

–Oca iquenqeshiretiri antacairiri ashaninca caari cameetsatsi.

²¹ Te iroyearoji caari cameetsatsi, irointi iquenqeshiretiro. Irootaque yantajeitantarori maaroni: yantavintsatiro tsinane caari yai, antavintsatiri shirampari caari ai, icoshiti, yoanti.²² Yaimentaro ijina, aimentari ojime. Inevetaro yashiyetari pashini atiri. Icamaaritanti, yamatavitanti, imayempitantapiniti, imashitsati, icantimatanti, ishemeti. Te ontimeji iojeitanti.²³ Iquenqeshiretiro atiri caari cameetsatsi, irootaque yantantarori: impoiji otimi irantanepee.*Yoavisacotajiro Jesoshi oshinto shirojenishiasato.**(Mt. 15.21-28)*²⁴ Impoiji ijatanaji Jesoshi Tiroqui. Isavicapaaque pancotsiqui, te incoaveteaji irioyee-terime. Iro cantaincha tecatsi incantea irimanea.²⁵ Otimi anta tsinane, yatajeaonquiro oshinto camaari. Oquemacotavaquero tsinane Jesoshi, ojatashitaquero, otiyeroashitapacari.²⁶ Caari oni jorio, oponeaca Shirojenishiaqui. Ocantapaaquero:

–Yatajeaoncaquero noshinto camaari, poavisacotajenaro.

²⁷ Icantavaquero:

–Nojivatavaquerita noshanincasanori nintacoteari. Te oncameetsateji aapitsatajeri yoari ajananequite, amperi otsiti iroyeari.

²⁸ Iroori acanaquero:

–Je, queario. Aitaque iniri otsiti nijanteaji. Yoatsopequititayetari atomi.

²⁹ Icantajiro:

–Je, cameetsa; queario picantaquero. Cameetsa pijataje meeca, avisacotanaji pishinto.

³⁰ Opianaja ovancoqui. Oneapaajiro oshinto, onariaca omaamentoqui, avisacotaji.*Yora Jesoshi yoavisacotiri mayempivetachaniri.*³¹ Impoiji yovaanaja aisati Jesoshi, iquananaji Tiroqui, Shiroqui aisati Tecaporishiqui. Ari yareetapaaja incajarequi Carireaquiniri.³² Yameetapaaqueneri aparo shirampari imayempiti, aisati imasantiti. Icantapaaquero:

–Pimpamitavaquero, poavisacotajeri.

³³ Yora Jesoshi yojocanajiri apatotimentariri, apaniro itsipatanacari mayempiri. Yoim-inquiaqueneri iracotsapaqui iyempitaqui. Iquitojaquero iracotsapaqui, ipantaquero inenequi.³⁴ Yamenanaque jenoqui, yaneencanaque, icantiri:

–Epeta.

Acantiri arori aneanequi: “Ovitareanajea”.

³⁵ Ovitareanaja iquemantari. Opeanaja iniconeneveitani, cameetsajencatanaji ineavee-taji.³⁶ Yapiitapinivetari:

–Eiroyea picamantacotanatsi.

Iro cantaincha te inquemisanteriji, aiqero catsini icamantacotaqueriri.

³⁷ Aiquero catsini yoajeitanaquero cavaco Jesoshi. Icantajeitiri atiripee:

–Paitaquea, ocameetsatanoti yantayetiri. Imatasanotaquero Jesoshi maaroni yantayetiri. Iquemacaayetajiri mayempiveitachaniri, aisati yora masontiveitachaniri, ineaveetacaayetajiri.

8

Yapiitajiro Jesoshi yoshequiapiro tanta.

(Mt. 15.32-38)

¹ Pashini quitaiteri yapatojeitaca aisati oshequi atiri, tecatsi iroajeiteari. Yora Jesoshi icajemiri iroamere, icantavaqueri:

² —Nocavintsaaajeitaqueri yocapee. Iro nocavintsaajeitantariri mavataque quitaiteri itsipajeitaquena, te iroajeiteaji meeca.

³ Aajeitaqueri itashe. Timatsi aparopee poneainchari paricoti: ariorica nontiancaveta-
jeari meeca ivancoqui, ari irimaoshirejeitanaque nianqui avotsiqui, irimaotsajeitanaque.

⁴ Yacanaqueri iroamere:

—¿Jaoca ancanteari anquemacaajeitantariri tanta? Aca caaraiteriqui.

⁵ Isampitiri:

—¿Jaoca ocaratiri pitantane?

Icanti:

—Ocarati 7.

⁶ Icantaajtiri apatotimentajeitariri:

—Pisavicajeite quipatsiqui.

Yaaquero tanta, ipasonquitiri iriri. Icarajaquero, ipajeitaqueri iroamere, yovaajeitaque-
neri apatojeitainchari.

⁷ Timaque aisati shivajaniqui aparopee. Ipsonquitacotaqueri aisati. Impoiji icantiri
iroamere:

—Pimpajeiteri aisati shivajaniqui.

⁸ Ari yoajeitaca, iqemajeitanaca. Yaayetajiro timaarantapaintsiri, yoajiro cantiriqui.

Ocarati jaajanchari 7.

⁹ Icarajeiti oainchari 4,000. Impoiji itiancajeitajiri:

—Pijajeitaje pivancopeequi.

Icoaveta variseo irineerime Jesoshi intasoncantayete.

(Mt. 15.39; 16.1-4; Ir. 12.54-56)

¹⁰ Itsipajeitanajari iroamere, itejeitanaja pitotsiqui. Ijajeitanaji anta Tarimanotaqui.

¹¹ Ari ipocapaaque variseo. Iquisatsatiri, icantiri:

—Jentsite, pintasoncantayete niotantempiri avirotaque Tasorentsi, impoijiquea ariorica
nonquemisantanirotempi.

¹² Oshequi catsini ocantimoneentacari Jesoshi. Icanti:

—¿Paita icoajeitantari maaroni atiri nonijayeri nontasoncante? Queariotaque oca non-
camantasanotempiri, eiro ineanatsi nontasoncantayete.

¹³ Ari ijatanaji Jesoshi, itetanaja aisati pitotsiqui. Ijatanaji, imonteanaja intatiquero.

Icantiri Jesoshi: “Yamatavitimpicari variseo”.

(Mt. 16.5-12)

¹⁴ Ipeacojeitanacaro iroamere iranaquerome tanta pitotsiqui, aparo yaanaque.

¹⁵ Icanti Jesoshi:

—Paamaventearo tapiacaarori tanta, yashitari variseo, aisati yashitari Eroreshi.

¹⁶ Ari icantavacaanaca, icantaajtiri:

—Tecatsi atantane, irootaque icantantaqueeri: “Paamaventearo tapiacaarori tanta”.

¹⁷ Iotacotaqueri Jesoshi, icantiri:

—¿Paita picantavacaantari: “Tecatsi atantane”? ¿Paita caari piquemanta? ¿Paita caari
piotanta? ¿Paita caari piquenqueshiretanta?

¹⁸ Otímaveta poqui, ¿paita caari pineanta? Otímaveta piquemantari, ¿paita caari pique-
manta? ¿Paita caari pinquenqueshiretantajaro

¹⁹ noshequiantacarori tanta? Ocaraveta apapacoroni tanta, icarati ocarori 5,000
shirampari. Ari paajiro timaarantapaajantsiri. ¿Jaocampa ocarati jaajanchari cantiriqui?

Yacajeitanajiri:

—Ari ocaratiri 12.

²⁰ Icanti Jesoshi:

—Aisati pashini, ocarati tanta 7, icarati aisati ocarori 4,000. Paajiro aisati timaaranta-
paajantsiri. ¿Jaoca ocaratiri cantiri pijaajiri?

Icantaajtiri:

—Ocarati 7.

²¹ Icantiri:

—¿Tequerampa meeca piotavaquero? Te iro nonquenquetsatocote tanta incaranqui,
iointi noquenquetsatocoti yoametantiri variseo aisati Eroreshi.

Yoavisacotajiri Jesoshi quitapoojaquiri.

²² Ari ijajeitanaji Vetsairaquí. Yameetapaaqueneri quitapoojaquiri. Icantapaaqueri:

—Pimpamitavaqueri iramenantajeiri.

²³ Ari yacatsanaqueri quitapoojaquiri, yaanaqueri otsapitapaaca nampitsi. Iquitiojaqueri iroquiqui, ipamijaquitaqueri. Isampitaqueri:

—¿Amenavetajimpimpa?

²⁴ Yamenanaji, icanti:

—Je, namenavetaja, noneavetajari shiramparinta, iro cantaincha te inconijatasanoteji, ishiavetacaro inchato, aniitaintsiri.

²⁵ Yapiitajiri aisati, ipamijaquitajiri iroquiqui. Impoiji yamenasanotanaji, yavisacotasanotanaji. Yamenanaji, conijaitetasanotanaji maaroni.

²⁶ Icantiri Jesoshi:

—Eiroyea piquenanajitsi nampitsiqui, apatiroyea povaanajero pivancoqui.

Iotiri Petero Quirishito ini Jesoshi.

(Mt. 16.13-20; Ir. 9.18-21)

²⁷ Ari yovaanaja Jesoshi, itsipatanajari iroamere. Ijajeitanaque nampitsipeequi anta Sesareajiripoqui. Inianquitanaque avotsiqui, isampijeitaqueri iroamere:

—¿Paita yaamaajeitaquenari atiripee?

²⁸ Yacanaqueri:

—Aparopee aamaayetaincha aviro Joani vaotisantantsiniri. Irio itsipa yaamaaquempi aviro Iriashini. Itsipapee aisati icanti aviro camantantsiniri, pitinaanaja.

²⁹ Isampijeitaqueri:

—Avirojei, ¿paita piquenqueshirejeitiri?

Yacanaqueri Petero:

—Avirotaque naamaajeitacari peerani: aviro Quirishito.

³⁰ Icantasanotiri:

—Eiroyea picamantacotanatsi.

Icantajeitiri Jesoshi: “Noncamimentajeitempi”.

(Mt. 16.21-23; Ir. 9.22)

³¹ Ari yoametajiri aisati:

—Noponeaca narori inquitequi, natiritapaaque. Coajica oshequi nonquemaatsicatimentajeitempi. Queario, intseencaquena pincatsaripee, aisati jivatacaajeitiriri saserotepee, aisati oametantirori sanquenarentsi: intseencajeitaquena, iroacantajeitaquena. Noncamaque, iro cantaincha oncarataque mava quitaiteri, irosati nontinaantanajeri.

³² Aitaque icantasanojeivetacari. Yora Petero yaanaqueri quempequetiji ara, icantaqueri:

—¿Paita picantantarori oca? Te oncameetsateji poamaimatea.

³³ Ari ipitsocashijeitacari Jesoshi iroamerepee, yamenajeitanaqueri. Irosati ishintsita-tantacari Petero:

—Piquempetacari Satanashi. Pijate, te pincameetsateji. Piquempejeitacari atiri, te pinquenqueshireempa. Te pioteroji icoacaquenari Tasorentsi.

Jaoca ancantajeiteari aijatanteariri Jesoshi.

(Mt. 16.24-28; Ir. 9.23-27)

³⁴ Impoiji icajemiri Jesoshi apatojeitachari aisati iroamere. Icantiri:

—Ariorica picoaque poijajeitena, eiro pantirotsi caari cameetsatatsi picoashiyevetari avirori. Poijajeitanaquena, pinquearioventajeitenaro maaroni noncoacaquempiri: pi-ojeite ariorica pincamimentena.

³⁵ Terica pincoyeji pincamimentena, patsipetashita pitimi, ainti pijate Sharincaveniqui. Iro cantaincha ariorica pincamimentena, aisati ariorica pinquemisantacayeteri atiri, eiro patsipetashitarotsi: pincantaitiyempani panee anta inquitequi.

³⁶ Ariorica pashijeitearo maaroni timayetsiri aca quipatsiqui, aintiquea pijate Sharincaveniqui, tempa pantsipetashitearo pashiyetearo.

³⁷ Ariorica pijate Sharincaveniqui, ¿jaoca pincanteari pijatanteari inquitequi?

³⁸ Tseencantatsiri inajeiti maaroni timajeitatsiri, aisati yantapinijeitiro caari cameetsatatsi. Noponeaca inquitequi, natiritapaaque. Coajica nojataje inquitequi: meeca, ariorica pipashiventacaana, aisati ariorica pipashiventacaaro noneane, coajica nompiaapaajerica, nompashiventacaapeempi avirori. Aisati ariorica nompiaje nompincasaritananotapaaque, nonquempetapaaquereari Apa, aisati nontsipajeitapaaquereari inampirepee.

9

Ipashinitimotanaqueri Jesoshi iroamere.

(Mt. 17.1-13; Ir. 9.28-36)

¹ Aisati icantajiri Jesoshi:

—Queariotaque oca noncamantasanotempiri. Pamene, acarajeitaque meeca aca. Eiro-tarica picamajeititsi, ari pineavaqueri Tasorentsi impoque, impincatsaritapaaque, inta-sorensitapaaque.

² Avisanaque 6 quitaiteri. Yaanaqueri Jesoshi yora Petero, Santiago, aisati Joa, ijivatana-queri anta antearoqui toncaari. Ari itimajeitapaaque apaniro. Ipashinitanaca Jesoshi, ipashinitimotanaqueri oijajeitiriri.

³ Oshipaquireanaque iitsaare. Oquitamarotanaque catsini. Aca quipatsiqui te aneroji catsini quempetearoneri.

⁴ Imapocapaaca, iconijatimotapaaqueri Iriashini aisati Moishishini, iquenquetsataca-paaqueri Jesoshi.

⁵ Ineaveetashitanaca Petero:

—Oametnari, tempa ocameetsatanoti pamaquena aca, noneantaquempiri. Meeca nocoaque novetsicajeitempi mava pancotsijaniqui: aparoni pashi, aparoni irashi Moishishi, iro otsipa irashi Iriashi iriori.

⁶ Itsaroasanojeitanaque catsini, irootaque caari iotanta Petero paitarica incanterimeri.

⁷ Otsimanajeitapaaqueri mencori. Omapocanaca irineane Tasorentsi mencoriqui, icantajeitaqueri:

—Iriotaque notomi nonintasanotiri, pinquemisanteri.

⁸ Intsipaita yamenayevetanaca iroamere, tecatsi irinee, irinti apaniro Jesoshi.

⁹ Irosati ipiajeitanaja, yoirincajeitanaja. Icantasanotiri Jesoshi:

—Eiroyea picamantacotirotso oca pineaqueri. Coajica noncame. Ariorica nontinaanaje, irosati pincamantacotentnari oca pineaqueri meeca. Tempa noponeaca inquitequi, natiritapaaque.

¹⁰ Ari iguemajeivetavacari, irosati isampitavacantanaca paita ojitari oca icantiriri Je-soshi: “Coajica noncame. Nontinaanaje aisati”.

¹¹ Isampijeitaqueri:

—¿Paita icantantari oametantirori sanquenarentsi: “Tequeratarica impoque Quirishito, irijivatapaaque Iriashini”?

¹² Iriori Jesoshi yacanaqueri:

—Queario icanteetiri: “Irijivatapaaque Iriashini, iroameetsajeitapaaque maaroni”. No-poneaca narori inquitequi, natiritapaaque, tempa naro isanquenatacotiniri peerani: “Os-hegui inquemaatsicataro, aisati oshequi intseencajeitavaqueri”. ¿Paita icantantaroniri oca?

¹³ Meeca noncamantempi: aitaque peerani ipocaji aisati Iriashini. Oshequi yan-tanayetaqueri, imoncarataquero isanquenatacotiteetacariniri.

Yoavisacotiri Jesoshi yatajeaoncane camaari.

(Mt. 17.14-21; Ir. 9.37-43)

¹⁴ Ari ipiajeitanaja anta isavicajeitaquenta iroamerepee pashini. Ineajeitapaaqueri itsipajeitapaacari oshequi apatotimentacariri. Itimi oametantirori sanquenarentsi, in-eanajeitiri yora iroamerepee Jesoshi.

¹⁵ Ari ineajeitavaqueri Jesoshi, ipocaji, yoasanotavaqueri cavaco. Ishiashijeitanacari, ivetsajeitavacari.

¹⁶ Isampitapaaqueri:

—¿Paita pineanatacojeitiri?

¹⁷ Yacanaqueri aparoni shirampari, icanti:

—Oametnari, namaquempiri notomi. Yatajeaoncapinitiri camaari. Imasontiaqueri notomi.

¹⁸ Irajiricapaajeririca, ipishoncajiri quipatsiqui, ishimoretacaanacari, yatsicanajita-caanacari, iquisoporoquitacaanacari. Nocantavetari poamere: “Poavisacotajeri”. Teve, te irimateroji.

¹⁹ Yacanaqueri Jesoshi:

—Te pinquemisantimajeiteji. ¿Jaoa oncarate piojeite? Noametapinijeivetaquempi, iro cantaincha te pinquemisantajeitavaque. Jentsite, pamaquenarite pitomi.

²⁰ Ari yamaqueneri. Yora camaari, ineapaaqueri Jesoshi. Yampitsitacaanacari jananequi, ipariacaanaqueri quipatsiqui, poron. Ipinaironcapinaironcatanaca, ishimore-tanaque ivantequi.

²¹ Yora Jesoshi isampitaqueri iriri jananequi:

–¿Jaoca ocaratiri intantanacari?

Yacanaqueri:

–Ainiroquerani ijananequitapaini.

²² Oshequi yojocacaapinitari paamariqui, aisati nijaqui. Icoaveta iroamayerime. Pita-soncantirica, pineshinoncatajena, poavisacotajenari.

²³ Icanti Jesoshi:

–¿Paita picantantanari: “Pitasoncantirica”? Pinquemisanterica, aitaque irimataquem-
piro Tasorentsi paitapeerica.

²⁴ Antearojenca icanti iriri jananequi:

–Noquemisantaveta. Tericampa nonquemisantasanote, pinquemisantacaasanotena
avinti.

²⁵ Iriori Jesoshi ineavaqueri ishiashjeitapaacari oshequi atiri. Iquisatsataqueri ca-
maari, icantiri:

–Avironirotaque camaari. Pimasontitacanti, pimayempitacanti. Meeca nocantasan-
otimpi, poimpacanajeriqueti, eiro patajeaoncajiritsi aisati.

²⁶ Icajemaunque camaari, yampitsitacaanacari jananequi, yojocanajiri. Yora jananequi
iquempevetanacari camatsiri. Oshequi cantayetanaints:

–Camanaque inaque.

²⁷ Iro cantaincha yacatsavacotajiri Jesoshi, yoitinaajiri, icatianaja iriori.

²⁸ Impoiji iqueajeitapaaji pancotsiqui. Iojetaca iroamere, isampjeitiri:

–¿Paitaquea caari nomatantaro narori noavisacoteri?

²⁹ Yacanaqueri:

–Oshequi ishintsiti yora camaari, irootaque caari pimatantari poavisacotajeri yora
yatajeaonquiri. Aisati maaroni quempejeitariri, eiro pimajeitiritsi. Iro cantaincha, pin-
cantasanoteririca Tasorentsi, ari iramitacotempi poavisacotajeri yatajeaoncane camaari.

Yapitajiniri Jesoshi iroamere: “Aitaque noncamaque”.

(Mt. 17.22-23; Ir. 9.44-45)

³⁰⁻³¹ Ari yovaanaja Jesoshi anta, iquenanaqi Carireaquei. Ari icoaque iroameteri
iroamerepee apaniro, irootaque imanantanajari ijajeitanaji. Icantanaqueri:

–Noponeaca narori inquitequi, natiritapaaque: coajica iracaanteefena. Irayena atiri,
iroyena. Ari noncamasanovetaquea, impoiji, omavatapaaque quitaiteri, ari nontinaanaje
aisati.

³² Iro cantaincha te iriojeitavaqueroji iriori oca icamantavetacariri. Itsaroajeitanaque
irisampiterime.

Jaoca ancanteari ampincatsariventante.

(Mt. 18.1-5; Ir. 9.46-48)

³³ Ari yarejeitapaaca Caperenaquqi, isavicajeitapaaque pancotsiqui. Isampitiri Jesoshi
iroamere:

–¿Paita picantavacaanacari avotsiqui?

³⁴ Imajerejeitanaque iriori, ipashiventajeitanaca. Icantavacaajeitanaca anta avotsiqui,
icanti:

–Meeca acarajeitica, zjanicampa anacotantsineri impincatsarite?

³⁵ Ari isaviqui Jesoshi. Icajemiri iroamere, icantiri:

–Ariorica pincoye pimpincatsariventante, pintacojeiteari pishaninca maaroni, aisati
pamitacojeiteri, pineshinoncajeiteri.

³⁶ Yamaqueneri aparoni jananequi. Isatecapaaqueneri nianqui, yavitsanotavaqueri.
Icanti:

³⁷ –Pishirejeitena narori, impoiji pincavintsayeri jananequi. Ariorica pincavintsayeri,
aisati narori, pincavintsayena. Aisati oquempetaca, ariorica pincavintsayena, te naro
pincavintsasaanote, irintiquea Apa tiancaquenari.

Yoavisacotanti pashini quemisantatsiri.

(Mt. 10.42; Ir. 9.49-50)

³⁸ Impoiji yora Joa icantanaqueri:

–Oametnari, noneajeitaqueri shirampari, icanti: “Noquemisantaqueri Jesoshi,
irootaque nojocantacariri camaari”. Te meeca ancarajeiteriji iriori aca, irootaque
notsaneacotantariri.

³⁹ Icanti Jesoshi:

–Eiro pitsaneacotaritsi. Tempa nomatacaqueri itasoncanti, eiro meeca icanti-
matanatsi irinti.

⁴⁰ Janicarica caari quisanenteene iriotaque acarajeitiri.

Icantiri Jesoshi: "Pincavintsavaacaajeitea".

(Mt. 18.6-9; Ir. 17.1-2)

⁴¹ Aisati icantiri Jesoshi:

—Ariorica iriotavaquempi atiri aviro quemisantanari, irootaque incavintsantavaquem-
piri, aitaque impinateri Apa. Queariotaque oca nocamantasantimpiri.

⁴² Jeri yoca jananequi, quemisantanari: eiro catsini pantacairitsi caari cameetsatsi.
Pantacayeririca, iroasanquetayempi Tasorensi, pashinoncaasanotanaquea. Oncameet-
sateme pincamiteame peerani, eiro pashinoncaiteame.

⁴³ Jero oca noshiacontempiri meeca piotanteari te oncameetsateji catsini pantero caari
cameetsatsi. Ariorica antacayempiro paco caari cameetsatsi, pimpeshero. Aitaque
ocameetsatiri pijapontsoquitana je inquitequi, oncanteata anta paneantasanotapaajeari.
Te oncameetsateji catsini ontime apite paco: eirorica pipeshirotsi, irootaque pijatanteari
Sharincaveniqui. Aitaque anta otimiri paamari caari tsivacanetatsi, aisati iriori yora
quenitsi caari caamanetatsi.

⁴⁴ Eiro anta icamitsi quenitsi, aisati eiro otsivacanetitsi paamari iroori.

⁴⁵ Aisati ariorica antacayempiro piiti caari cameetsatsi, pimpesajero. Aitaque
ocameetsatiri pijapontsoquitana je inquitequi, oncanteata anta paneantasanotantapaajeari.
Te oncameetsateji ontime apite piiti: eirorica pipeshirotsi, irootaque pijatanteari
Sharincaveniqui.

⁴⁶ Eiro anta icamitsi quenitsi. Aisati eiro otsivacanetitsi paamari iroori.

⁴⁷ Aisati ariorica antacayempi poqui caari cameetsatsi, pinquitsoreero. Ari ocameet-
satiri pijanaroquitana je anta ipincatsaritinta Tasorensi. Te oncameetsate ontime apite
poqui: eirorica piquitsoreirotsi, irootaque irojocanteetempiri Sharincaveniqui.

⁴⁸ Eiro anta icamitsi quenitsi. Aisati eiro otsivacanetitsi paamari iroori.

⁴⁹ Avirojeitaque quemisantajeitanari, irootaque inquisajeitantempiri caari quemisanta-
jeitensi. Ariorica pinquemisantajeitena, ompomerentsitimotempi.

⁵⁰ Ocameetsati tivi. Irompa ariorica ompeanaquea ovoteare, tecatsi oncantajea om-
poteataje aisati. Aisati piquempetaca avirori: ariorica paacameetsatavacaajeitea, tempa
ocameetsati: pincanteani paacameetsatavacaajeitea, maaroni.

10

Ijataque Jesoshi Joriraniqui intatiquero.

¹ Ari yovaanaja Jesoshi, iquenana je Joreaquei. Aisati ijataje intatiquero Joriraniqui. Yapa-
totimentajari aisati oshequi atiri, yoamejeitapaajiri. Tempa aitaque yametaro yoametant-
tapiniti.

Icanti Jesoshi: "Eiro pojocajirotsi pijina".

(Mt. 19.1-12; Ir. 16.18)

² Ipocashitapaqueri variseo. Icoaveta incommitacayearime Jesoshi, irootaque isampjei-
tantapaacariri:

—¿Oshinetantampa irojocajero shirampari ijina?

³ Yacavaqueri:

—¿Paitampa icantimpiniri Moishishi?

⁴ Yacajeitanaqueri iriori:

—Icantini Moishishi: "Pisanquenatajenero pijina, pincamantajero: 'Nojocajempi'. Im-
poijiquea oshinetantajea apaniro pojocantajearori".

⁵ Icantanaqueri Jesoshi:

—Te incoaveteaji Tasorensi pojocajero pijina, iro cantaincha te ontimejei piquen-
queshireantari, irootaque isanquenatantimpironiri Moishishini oca.

⁶ Peerani intantacarori yovetsicantaque Tasorensi, yovetsicaqueri shirampari. Aisati
iroori tsinane yovetsicaquero.

⁷ Irootaque yojocantariri shirampari iriri, aisati irinero, irantearori ijina.

⁸ Ari icarati shirampari, aisati tsinane: apite inavetaca. Iro cantaincha, ariorica irayero
ijina, inquemetaquea apaniro irinaque: quiso iroavacaya.

⁹ Ari ineaqueri Tasorensi apaniro inaque, meeca eiro pinijantareacaajiritsi.

¹⁰ Ari itimapaaji anta pancotsiqui. Isampitajiri aisati iroamere:

—¿Jaoca ocantari oca picantaqueriri?

¹¹ Icantiri:

—Janicarica joquerone ijina, ariorica irraje otsipa tsinane, tempa iraimentearo iji-
nasanori.

¹² Aisati oquempeta iroori tsinane, ariorica ojocajeri ojime, aajerica pashini shirampari,
tempa aimenteari ojimesanori iroori.

Yora Jesoshi ineacameetsataqueri jananequipee.

(Mt. 19.13-15; Ir. 18.15-17)

¹³ Ari yameetapaaqueneri jananequipee, icantapaaqueri Jesoshi:

–Pincanteri Tasorentsi cameetsa irisavicacaajecteri yoca jananequipee.

Iro cantaincha icantavaqueri iroamerepee:

–Eiro pamiritsi jananequipee, pashereiricari oametani.

¹⁴ Te onimoteriji Jesoshi yantiri iroamere. Icantiri:

–Pishineteri impocashitenata jananequi. Eiro pitsaneanatsi. Pineaqueri yoca jananequi, ishirejeitaquena: ipincatsariventajeitiri Tasorentsi maaroni quempejeitariri iriori.

¹⁵ Queariotaque oca nocamantasanotimpiri, irinti jananequi ipincatsatiri Tasorentsi. Irompa irinti yora caari shiiri jananequi, yora caari pincatsatiri Tasorentsi, eiro ijatitsi irinti anta ipincatsaritinta.

¹⁶ Yavitsanojeitavaqueri jananequi, ipamitaqueri iitoqui. Icantajeitiri:

–Cameetsa irineshinoncatempi Tasorentsi.

Ijaticari Sharincaveniqui ashitaarantincari.

(Mt. 19.16-26; Ir. 18.18-27)

¹⁷ Ari ijataji Jesoshi, iquenanaaji avotsiqui. Ishiapaaca aparoni shirampari, itiyeroashitapaacari. Icantiri:

–Oametantatsiri, cameetsari pini. ¿Paitampa nanteri naneantajeari, noncantaitatiyempani?

¹⁸ Icantiri:

–¿Paita picantantanari: “Cameetsari pini”? Tecatsi cameetsatatsine, irinti apaniro Tasorentsi icameetsati.

¹⁹ Piovintsataquero oca icantacantiniri Moishishini: “Eiro poantitsi. Eiro paimentarotsi pijina. Eiro paimentaritsi pijime. Eiro picoshititsi. Eiro pitseeyacotaritsi atiri. Eiro pamatavantitsi paitanteariri yashiyetari pishaninca. Pimpincatsateri piri, aisati piniro”.

²⁰ Icantanaqueri iriori:

–Pamene, ainironi nevancaritapaini, aitaque notsoteaquero maaroni ocapee, irosati meeca.

²¹ Yora Jesoshi, yamenanaqueri, inintaqueri. Icantaqueri:

–Ainiro apanivani caari pimati. Pijate meeca pimpimantayetero maaroni pashiyetari. Pimpashijeiteari caari ashitaarantachane, pashini paapaaje pivaararo inquitequi. Impoiji, tsame, pojatanaquena.

²² Iquemavaitiiri icantavoriri, yoashiretanaca. Iro yoashiretananacari oshequi timimotiri irovaararo. Icantavorotanaca, ijatanaji.

²³ Ari ipitsocashitanacari Jesoshi iroamere, icantiri:

–Yora ashitaarantachari opomerentsitimotari irijate anta ipincatsaritinta Tasorentsi.

²⁴ Iquemavaitiiri iroamere, yoajeitanaque cavaco. Yapiitajiniri aisati Jesoshi, icantiri:

–Evanacari, aitaque opomerentsitaca pijate anta ipincatsaritinta Tasorentsi.

²⁵ Tempa opomerentsitaca inqueero cameyo omoroqui quitsapi. Iroquea irointi pomerentsitsanotachari irijate ashitaarantachari anta ipincatsaritinta Tasorentsi.

²⁶ Yoajeitanaqueri cavaco catsini iriori. Icantavacaanaca:

–¿Janicampa meeca avisacotajantsine? Opomerentsitsanotaca.

²⁷ Yamenanaqueri Jesoshi, icanti:

–Eiro imatashitarotsi atiri iroavisacotajea irisati, irintiquea Tasorentsi maticayerine iroavisacotajeri. Tecatsi pomerentsitimotearine irinti.

Yora Tasorentsi impinajeiteri maaroni oijajeitiriri Quirishito.

(Mt. 19.27-30; Ir. 18.28-30)

²⁸ Impoiji Petero icantanaqueri iriori:

–Naroquea nainti, aitaque nojocayetaquero maaroni, paitarica nashijeiveitaniri, noijatanaquempi meeca avirori.

²⁹ Icanti Jesoshi:

–Queariotaque oca noncantempiri. Ariorica pincoaque pojatanaquena, eiro pat-sipetashitarotsi pojocayetero pinampi, pirentipee, pitsiropee, piniro, piri, pijananequitepee, poanepee. Aisati ariorica pincoaque pinquemisantacayeri pishaninca, eiro pat-sipetashitarotsi.

³⁰ Queario, inkuishmentempiro piquemisantaquena, ompomerentsivetea, iro cantaincha eiro pat-sipetashitarotsi. Ariorica pojocanaquero aparo, impajempi Tasorentsi

100: pivancopee, pirementee, pitsiropee, piniropee, pijananequitepee, poaneppee, maaroni. Aitaque coajica ontimimojeitempi oshequi anta paneasanojeitapaajenta, pincantaitiyempani.

³¹ Ainiro pincatsarivetachari meeca, iro cantaincha coajica eiro ipincatsaritajitsi; ainiro meeca yora caari pincatsariyetatsi, iro cantaincha coajica impincatsarite irinti.

Yapiitajiniri aisati Jesoshi: "Noncamaque".

(Mt. 20.17-19; Ir. 18.31-34)

³²⁻³³ Ari iquenajeitanaque avotsiqui, irotaintsi irijajeite Jerosarequi, ijivatanaque Jesoshi. Yoajeitanaqueri cavaco oijajeitiriri, aisati itsaroajeitanaque. Ari yapatotiri aisati yora 12 iroamere, icantiri:

—Pinquemena. Tempa noponeaca inquitequi, natiritapaaque. Meeca ajate Jerosarequi. Coajica iraacanteena anta, iraaaquena jivatacaajeitiriri saserotepee, aisati oametantirori sanquenarentsi, iroacantaquena. Iraacantajena aisati, iraanenari pashinisati atiri.

³⁴ Irishirontimentajeitaquena, inquitiojena, impasanatena, iroyena. Omavatapaaque quitaiteri, irosati nontinaantanajeari.

Icantiri Jesoshi jaoca incanteari impincatsaritanteari.

(Mt. 20.20-28)

³⁵ Ipoqui quempeji Santiaco, jeri Joa, yora itomipee Severeo. Icantiri:

—Oametantatsiri. Nocoaque pishinetenaro paitarica noncoacotempiri.

³⁶ Icantavaqueri Jesoshi:

—¿Paita picoiri noshinetempiri?

³⁷ Icantiri:

—Coajica pimpincatsaritanote, pishinetena nosaviquimotempi pacosanoriqui. Irioyeca irisaviquimotempi pampatequi, nonquempejitempi avirori pipincatsariti.

³⁸ Icantiri Jesoshi:

—Te pioteji paitarica picantaquenari. Pamene, oshequi nonquematsicatearo narori, ¿arimpa pimatero oshequi pinquematsicatearo avirori?

³⁹ Icantanaque iroamere:

—Je, ario nomataquero.

Icantiri:

—Je, aitaque ontime coajica pinquematsicateari.

⁴⁰ Iro cantaincha tecatsi noncantea noshinetempi pisavique nacosanoriqui, aisati nampatequi. Irintiquea cantatsineri Tasorentsi janicarica saviquimotenaneri: iotitacarinipeerani yora saviquimotenaneri.

⁴¹ Iquemajeitantacariri yora itsipapee iroamere, iquisanentanaqueri Santiaco aisati Joa.

⁴² Icantajeitiri Jesoshi:

—Caate, pimpocajeite. Píoti itimi ivincatsaritepee pashinipee atiri. Iperanayetacari ishaninca iriori. Aisati yora savicacaajeitiriri iriori, iperanajeitacari ishaninca.

⁴³ Eiro piquempejitaritsi avirori. Aintiquea ariorica pincoaque pimpincatsariventajeteri pishaninca, pintacojeiteari maaroni pitsipajeitari.

⁴⁴ Aisati ariorica pincoaque pisavicacante, ari pintacojeiteari maaroni pitsipajeitari.

⁴⁵ Noponeaca narori inquitequi, natiritapaaque. Te iro nompocantea nonampiteari atiri, irointiquea nopocanta nintacojeiteari itsipapee. Aisati noncamimentero oshequi atiri, noavisacotanteariri.

Yoavisacotiri Jesoshi Timeojani.

(Mt. 20.29-34; Ir. 18.35-43)

⁴⁶ Ari yareetaca Jesoshi anta nampitsiqui pajitachari Jerico. Yovaanaja aisati, itsipajeitancari iroamerepee aisati oshequi apatojeitainchari. Ainiro isavicaiti avotsinampiqui shirampari pajitachari Timeojani, iriotaque itomi Timeo. Icamarajati Timeojani, icoacotapinitiri atiri impashiteari quirequi.

⁴⁷ Iquemacotavaqueri impoque Jesoshi, yora nasaretasati. Iroaquera iquemacotavaqueri, icajemavaqueri, icantiri:

—Jesoshi, tempa aviro ishanincani Iravirini, pineshinoncatapaajena narori.

⁴⁸ Oshequi atiri ishintsitsajeitaqueri:

—Pimajerete.

Iro cantaincha aikuero catsini icajemasananajani aisati:

—Aviro quempetajariri Iravirini. Pineshinoncatena narori.

⁴⁹ Icatiapaaca Jesoshi, icanti:

—Pincajemerí.

Icajemetiri camarajari, icanteetiri:

—Piveshireanaquea, pincatianaje. Icajemimpi yonta.

⁵⁰ Irosati yojocantanacaro yoicotari, icatianaca, cati. Ijatashitanaqueri Jesoshi.

⁵¹ Icantavaqueri Jesoshi:

—¿Paita picoacotanari? ¿Jaoca noncantajempiri?

Yacanaqueri camarajari:

—Apa, nocoaque namenaje.

⁵² Icantiri Jesoshi:

—Meeca pijataje. Pishiretaquena, irootaque pavisacotantajeari.

Irosati yamenantanaja, yoiwatanajiri avotsiqui.

11

Ijatanaque Jesoshi Jerosarequi, ipincatsajeitavaqueri atiripee.

(Mt. 21.1-11, 14-17; Ir. 19.28-40; Joa 12.12-19)

¹ Iquempejijeitapaacaro Jerosarequi, Vetejajequi, aisati Vetaniaqui: onaquenta toncaari pajitachari Orivomashi. Yora Jesoshi itiancaqueri iroamere apite,

² icantavaqueri:

—Pijatapainte anta nampitsiqui onta amontetacari. Pareetapaaquearica, pineapaaqueri aparoni voro, tequera irantearitasanote, tequera inquijacoyeeteari. Ainiro itsatacota: pintsatacoreapeeri, pamaquenari.

³ Ariorica incanteetavaquempi: “¿Paitaquea pitsatacoreantariri voro?” Ari pincantanaqueri: “Irio coiriri Avincatsarite. Coajica iroimpiajempiri aisati”. Ari irishinetempiri.

⁴ Ari ijatanaque iroamere. Ineapaaqueri voro anta avotsiqui. Itsatacota ashitacoroqui pancotsi. Itsatacoreapaaqueri.

⁵ Ainiro isaviqui atiri, isampitavaqueri:

—¿Paita pantiri? ¿Paita pitsatacoreantariri voro?

⁶ Yacanaqueri, icantiri oca icantavaqueriri Jesoshi. Ari ishinetavaqueri yaanaqueri voro.

⁷ Ari yacatsatacotanaqueneri Jesoshi. Yoanquetaqueneri imititsaqui iitsaarepee, impoiji iquijacotacari.

⁸ Ari yaniitacaanaqueri avotsiqui, ipincatsajeitavaqueri maaroni ishaninca, imaaroncajeitacueneri quitsaarentsipee avotsiqui. Yora itsipapee ipesaqueneri inchatoshi, aisati yoaqueneri avotsiqui.

⁹ Yora jivajeitacueneri aisati impoijeitacueneri, icajemajeitanaque:

—Jeritapaaque oavisacojeiteeneri, tsame aacameetsajeitavaqueri. Coraqueni, iriotaque itiancaqueneri Avincatsarite.

¹⁰ Peerani Iravirini ipincatsariventirini ashanincani: meecaquea, impincatsariventaque yoca aneavaquerica. Iriotaque ishanincani Iravirini. Tsame ampincatsajeiteri Tasorensi inquitequiniri.

¹¹ Ari yareejeitapaaca Jerosarequi, iqueapaaque ivancoqui Tasorensi. Itsoteaquero yamenayetaquero, iro cantaincha ishaavijiiteanaque catsirincaiteri. Isoquijanaji, iwatanaji Vetaniaqui. Itsipajeitanajari iroamerepee.

Ineaquero Jesoshi iyera caari timatsi oitsoqui.

(Mt. 21.18-19)

¹² Ari oquitaitetamanaji aisati, yojocanajiro Vetania, irijate Jerosarequi. Nianqui aave-tacari itashe.

¹³ Ineaquero paricoti inchato, pajitachari iyera. Otimaveta oshi. Ari ijatashitiro, icoavetapaacaro oitsoqui. Te aneroji, irointi oshi. Tequeratsita omoncaratajea oitsoquitanajeari.

¹⁴ Icantanaqueri Jesoshi iroamere:

—Tecatsi iroajeitajeari atiri oitsoqui aisati.

Itiancajeitajiri Jesoshi pimantayevetachari anta ivancoqui Tasorensi.

(Mt. 21.12-17; Ir. 19.45-48; Joa 2.13-22)

¹⁵ Ari yareejeitaja aisati Jerosarequi. Iqueapaaqui ivancoqui Tasorensi. Yojocajeitapaqueri maaroni pimantajeivetachari aisati maaroni amanantajeivetachari. Itatsinquitayetapaqueri imesatepee yora pinavacaavetariri iirequite. Aisati itatsinquitayetapaqueri isavicamentopee pimantajeivetariri sampaquiti.

¹⁶ Itsaneapitsajeitacari irayetanaqueme vaararonsi anta ivancoqui Tasorensi.

¹⁷ Ari yoametanaque, icantajeitiri:

—Peerani isanquenatironi irineane Tasorensi, icantini: “Irootaque oca novanco. Aca inquenquetsatacaajeitantenari maaroni atiri”. Tempa piojeivetaro. Iro cantaincha avirojei pipeaquero ivanco coshinti.

¹⁸ Ari iquemajeitavaqueri maaroni yora apatotimentariri, irootaque yoajeitanta-nacariri cavaco. Aisati iquemacotaqueri jivatacaajeitiriri saserote, oametantirori sanquenarentsi, maaroni. Icantajeivetaca:

—¿Jaoa ancantaniroteriri Jesoshi, avanteariri?

Iro cantaincha tecatsi incanteri, itsaroacaaajeitacari. Tempa ipincatsajeitiri atiri Jesoshi.

¹⁹ Iqueanaji catsirincaiteri, ari yojocanaajiro Jesoshi nampitsi.

Inajeitacuero iyera, ocamanaque.

(Mt. 21.20-22)

²⁰ Oquitaitetamanaji aisati, ipianaja anta onaquenta iyera. Ineapaaquero, ocamanaque, irosati anta ovaritsaqui.

²¹ Iquenqueshiretaquero Petero icantanaqueri Jesoshi oshaiteji. Icantiri:

—Oametanari, pamenero iyeraca poamaimatanaqueri oshaiteji. Camanaque.

²² Yacanaqueri Jesoshi:

—Pishireteari Tasorentsi.

²³ Queariotaque oca noncamantajeitempiri. Ariorica pincanteri Tasorentsi: “Povaajero otishinta, poviincajero anta incajarequi”. Eirorica pitseencashiretitsi, aisati ariorica pishiretasanotaque ovaanaquea, ari irimataquempiro.

²⁴ Irootaque noncamantantempirori oca: ariorica pinquenquetsatacayeri Tasorentsi, paitarica pincanteri, pinquenqueshirete: “Aitaque irimataquenaro nocantaqueriri”. Pishiretearirica, aitaque irimataquempiro.

²⁵ Ariorica pinquenquetsatacayeri Tasorentsi, pijivate pincavintsayeri pishaninca: eiro piqishimentiritsi paitapeerica iranteri. Impoiji aisati avirori, eiro iquishimentimpirotsi Apa Tasorentsi pantayetiri avirori.

²⁶ Eirorica picavintsairitsi pishaninca, eiro icavintsaimpitsi avirori Tasorentsi.

Icantimentavacaacaro itasorencia Jesoshi.

(Mt. 21.23-27; Ir. 20.1-8)

²⁷ Ari yareejeitanaja aisati Jerosarequi, yaniitamanaji anta ivancoqui Tasorentsi. Yora jivatacaajeitiriri saserotepee, oametantirori sanquenarentsi, aisati savicacaantatsiri ipocashijeitakueri.

²⁸ Icantajeitapaaqueri:

—¿Janica oametimpirori pipincatsaritantari pimayetantarori pantayetiri? ¿Janicampa meeca peaquempiri pincatsari, pimayetantacarori pantayetiri?

²⁹ Icantavaqueri Jesoshi:

—Meeca aparo nosampijeitempi avirori. Ariorica pancaquena avirori, noncamantem-piro.

³⁰ Yora Joa ivaotisantantayeti. ¿Janicampa tianquiriri ivaotisantantayeti? ¿Iriompa Tasorentsi tianquiriri? Tericampa, ¿irintimpa atiri tianquiriri? Panquenaqueti.

³¹ Ari icantavacaanaca saserotepee:

—Ariorica ancanteri: “Iriotaque Tasorentsi tianquiriri”, icanteecari: “¿Paita caari piqumisantantari Joa?”

³² Aisati eiro acantiritsi: “Iriotaque atiri tianquiriri”. Iquisheecari.

Pineaquero, yora saserote itsaroacaaajeitacari atiripee; maaroni atiri ineacameetsajeita-queri Joa, icantajeiti: “Tempa irio Tasorentsi tianquiriri Joa icamantanti”.

³³ Irootaque icantantiriri saserotepee:

—Te nioteji janicarica tianquiriri.

Icanti Jesoshi:

—Aisati narori, eiro nocantimpitsi janicarica tiancanari nopincatsaritantari nomatanta-rori oca.

12

Ishiacaventiniri Jesoshi panquitirori ovamashi.

(Mt. 21.33-46; Ir. 20.9-19)

¹ Impoiji ishiacantiniri oca, icantiri:

—Ipanquitiro ovamashi shirampari. Itantotacotaquero otsapiqui, yovetsicashitaquero onanteari ovaja. Impoiji yovetsiquero shitamencotsi anta jenoqui iramenacoventan-tearori maaroni. Impoiji aisati icantiri tsameetacantatsiri: “Pishentenaro maaroni: coajica nonpinatempi cameetsa”. Impoiniji ijatanaque pashiniqui quipatsi.

² Osamanitapainti iraacanaque oitsoqui ova. Ari yora ashitarori itiancavetari inampire aparo, iraaranteme ova.

³ Te impavaqueriji, irointi yaanirotavaqueri, tapi; ipasatashitavacari, tac, tac. Yoipiava-jiri, tecatsi iranaaque.

⁴ Ari itiancavetaca aisati itsipa inampire. Iposainatavaqueri iitoqui, toc, toc, yoashinon-caavaqueri.

⁵ Itiancavetaca pashini aisati. Yoavaqueri, shemi. Aisati itiancavetacari oshequi itsipapee: aparopee ipasanatavaqueri, irio itsipapee yoavaqueri.

⁶ Apanivaniquea itimanaque itomi iriori, inintasanotiri. Icantashiretanaque iriori: "Trioricampa irinti notomi irio impincatsatavaqueri". Itiancavetacari iriori.

⁷ Iro cantaincha icantavacaanaca tsameetacotirori: "Jeritapaque itomi ashitarori, ariorica incamaque iriri, iriotaque yoca ashitasanotajearoneri. Tsame avavaqueri, impoijiquea ashijeitajearota ainti irovamashite".

⁸ Ari yaavaqueri, yoanivotavaqueri, shemi. Yojocaqueri otsapitapaaca ovamashi.

⁹ ¿Paíta piquenqueshirejeitiri? ¿Jaoca incanteriri ashitarori irovamashite? Tempa impoque irinti, impoyereapaqueri iratiritepee. Pashini iramenaje shentajenerine.

¹⁰ Tempa pineanatio sanquenarentsi. Ocanti: "Yora vetsiqueronemeri pancotsi itseencajiro mapi intincamitantearomeri ivanco, icanti: "Te oncameetsateji".

¹¹ Iro cantaincha Avincatsarite ipeajiro mapica otincami ivanco, ocameetsatanoti. Tempa irootaque avantanacari cavaco".

¹² Iotacojeitavaquero icantaqueri Jesoshi, iriotaque ishiacaaventaqueri. Icoajeiveta iraaajeitanaquerime, iro cantaincha itsaroacaajeitacari yora apatotimentajeitacari. Ari yojocajeitanajiri, ijajeitanaji.

Isampitiri variseopee: "¿Arimpa ampajeri ivincatsarite oromasati airequite?"

(Mt. 22.15-22; Jr. 20.20-26)

¹³ Itianqueetiri variseopee aisati oijatiriri Eroreshi. Icoavetaca incomitacayearime irineane Jesoshi.

¹⁴ Yareetapaaca, icantapaaqueri:

—Oametantatsiri, niojeitaquempi avirotaque cameetsatatsiri. Te oncantimoneentanaquempiji paitarica icantayetiri atiri, te pintsaroacayeariji. Tampatica poametantiro icoacaajeiteeri Tasorentsi. ¿Ocameetsatimpa nomperi ivincatsarite oromasati quirequi? ¿Tericampa oncameetsateji? ¿Nomperimpa? ¿Eirompa nopiritsi?

¹⁵ Iotacotaqueri Jesoshi, iramataviterime yoca sampitaqueriri. Icantiri:

—¿Paíta picoantacari pincomitacayename? Pamaquenari quirequi, ponijayenari.

¹⁶ Ari aparo yamaqueneri. Isampijeitiri:

—¿Janicampa shiacantachari ivoroqui? ¿Janicampa ashitarori ivajiro?

Yacajeitanaqueri iriori, icantiri:

—Irio ashitaro Shisari, yora ivincatsarite oromasati.

¹⁷ Icantiri:

—Panteneri pincatsari icoacaimpiri, aisati panteneri Tasorentsi icoacaimpiri iriori.

Yoajeitanaqueri cavaco yora sampijeitiriri.

Icantiri Jesoshi: "Queario, antinaajeitanaje".

(Mt. 22.23-33; Jr. 20.27-40)

¹⁸ Icantapiniti saroseo: "Eiro itinaajatsi camatsiri". Ari ipocashitiri iriori Jesoshi, isampitapaaqueri:

¹⁹ —Oametantatsiri, isanquenaajeitanaroni peerani Moishishi, icantini: "Ariorica incame shirampari, irojocanaquero ijinani. Eiorica itimacaanaquerotsi itomi, cameetsa iraitajeri irirentini ijinani. Ariorica intimacayero itomitsori camaintsiri, irishiacantajeitajeri itomisanori iriori".

²⁰ Ari. Ainiro shirampari irirenti. Yaaveta ijina, impoiji icamaque, toren. Tequera intimacayeroji itomi.

²¹ Yaavetajaro irirentini apitetapaintsiri. Icamaque iriori, aisati te intimacayeroji itomi. Aisati iquempetaja iriori yora mavatapaintsiri.

²² Aisati iriori iquempjeitaca maaroni irirentini. Tecatsi intimacayero itomi. Impoiji ocamaque iroori tsinane, toren.

²³ Coajica ariorica intinaajeitanaje camajeitaintsiri, ¿janicampa aajeroneri? Tempa aitaque ijinantajeiveitaroni maaroni.

²⁴ Icantiri Jesoshi:

—Te pioteroji sanquenarentsi, aisati te piotacoteriji Tasorentsi, tempa irootaque picomitantacarori oca.

²⁵ Icamajeitaque, toren. Coajica intinaajeitanaje aisati. Iro cantaincha eiro yaajitsi aisati ijina. Eiro itimajitsi aacaajerineri aisati. Aitaque irishiapaajeari inampire Tasorentsi savicatsiri jenoqui.

²⁶ Meeca noncamantempi: aitaque intinaajeitanaje camajeitatsiri. Tempa pineanataquero isanquenare Moishishi. Oquenquetsatacotiro quitosequishi, otaavetaca iro cantaincha te ontsoneqaeji. Anta iquemaquero peerani Moishishi icantiriri Tasorentsi: “Narotaque Tasorentsi, icantani ipincatsajeitaquena Avarama, Isaca, aisati Jacovo”.

²⁷ Pineaquero, aneatsi ini iriorijeji, irosati icantani iquemisantiri Tasorentsi. Te inquemisantajeji camaintsiri, irintiquea aneatsiri. Pineaquero, te ampoyereempaji. Oshequi picomitasanotaca avirori.

Iquenquetsatacotiro icoacaasanotaqueeri Tasorentsi.
(Mt. 22.34-40)

²⁸ Iquempejitapaaque aparoni oametantirori sanquenarentsi. Iquemapaqueri icantavacaanaca. Iotacotapaaqueri Jesoshi, cameetsa yoametavaqueri saroseo. Ari isampitapaaqueri:

—¿Paita icoacaasanoteeri Tasorentsi?

²⁹ Yacanaqueri Jesoshi:

—Tempa isanquenataqueeroni Moishishi peerani icoacaasanoteeri Tasorentsi. Jero oca isanquenatiniri: “Noshaninca, pinquemisantajeitena. Yora Tasorentsi, iriotaque Avincatsarite, apaniro ipincatsariti irinti.

³⁰ Oshequi catsini pinintasanoteri, pincanteani. Aisati pinquenqueshiretapiniteri”.

³¹ Aisati isanquenatini: “Oquempetaca avisati nintajancha, aisati pinquempejeiteri maaroni picarajeitiri, pinintajeiteri”. Irootaque inintacaasanojeitaqueeri maaroni.

³² Icantanaqueri oametantirori sanquenarentsi:

—Je, aitaque. Queariotasantaque oca picantaqueri. Apaniro ini Tasorentsi, tecatsi pashini.

³³ Cameetsa oshequi catsini anintasanoteri, anquenqueshiretapiniteri. Aisati oquem-peta arosati nintajancha, aisati anquempeteri maaroni acarajeitiri, anintajeiteri iriori. Irootaque icoacaasanotaqueeri Tasorentsi. Te iro incoasanote atayeneri poshiniri.

³⁴ Iquemaqueri Jesoshi, cameetsa icantaqueri, icantiri:

—Irotaintsi pimpincatsateri Tasorentsi, impincatsariventantempiri iriori.

Impoiji itsarocaaajeitacari atiripee irisampitajerime aisati.

Iquenquetsatacotaja irisati Quirishito.
(Mt. 22.41-46; 23.1-7; Ir. 20.41-44)

³⁵ Yoametanti Jesoshi anta ivancoqui Tasorentsi:

—Icanti oametantirori sanquenarentsi: “Yora Quirishito, irishanincatasanojajeari Iravirini”. ¿Paita icantantirori?

³⁶ Tempa iro Ishire Tasorentsi sanquenatacainiriri Iravirini. Isanquenataqueroni oca: “Yora Tasorentsi icantiri novincatsarite: ‘Pisavique aca nacosanoriqui, pincaratena ampincatsarijeite. Aitaque noasanquetaajeiteri maaroni quisajeivetaquempiri”.

³⁷ Tempa iquenquetsatacotitarini Iravirini Quirishito, icantiri: “Novincatsarite”. ¿Jaoca incanteari Iravirini impincatsatajeri ishaninca impoitajantsiri itimi?

Ari iquemajeitavaqueri, iquimoshirejeitanaque oshequi apatotimentacariri.

³⁸ Ari yoametantaji aisati, icanti:

—Paamayeariyea oametantirori sanquenarentsi. Icoashita iroaneencashitea, irishemetacayero iitsaare, inquenquensantsatacaayetero. Icoaque irineacameet-satashiteari ishaninca anta nampitsiqui.

³⁹ Aisati ariorica ijatapiniti anta pancotsiqui yapatojeitanta, icoyepinitiro savicamentotsi cameetsasatanotatsiri. Aisati ariorica irampatojeitea ishaninca iroajeitearica, icoaque iriori irisatecapeempa nianqui incarajeitantariri pincatsaripee.

⁴⁰ Yaapitsanirotaquero maaroni timimovetarori camajimentaaro. Osamani ineanatashimpeavetacari Tasorentsi, vero, vero. Oshequi yamatavitantaveta, iro cantaincha coajicani iroasanquetasanotaqueri catsini Tasorentsi.

Ora ashinoncaincaro opaqueri Tasorentsi maaroni timimovetarori.
(Ir. 21.1-4)

⁴¹ Ari isavicaque Jesoshi, imontetacaro yoapiniyetantariri quirequi. Yamenajeitaqueri oshequi pocajeitatsiri, itetapinitiri iirequite yoantaririqui. Ipoqui oshequi ashitaarantincari, itetapaaque oshequi catsini iirequite.

⁴² Opocapaaque iroori aparoni camajimentaaro ashinoncaincaro. Otetapaaque iroori apimentaquite quirequijaniqui, te impinaveteaji irinti.

⁴³⁻⁴⁴ Icajemiri iroamere, icantiri:

—Queariotaque oca noncamantempiri: capichaji otevetaca oca ashinoncaincaro, iro cantaincha inecameetsatasanotaquero Tasorentsi. Tempa opaqueri maaroni timimove-tacarori: tecatsi meeca amanantantajeari oyeari. Irintiquea yora ashitaarantincari, oshequi itejeivetaca, iro cantaincha te irineacameetsatasanoteriji Tasorentsi: tempa oshequitatsi iirequite iquempoyeanontari.

13

Icantiri Jesoshi: “Coajica ontireanajea ivanco Tasorentsi”.

(Mt. 24.1-2; Ir. 21.5-6)

¹ Impoiiji isoquijjanaji Jesoshi. Icantiri aparoni iroamere:

—Oametani. Pamenero mapica yovetsicantarori ivanco Tasorentsi: antearo oni, aisati ocameetsati pancotsi.

² Icantiri Jesoshi:

—Pineaquero jaoca ocantari oca mapipanco. Antearo onaveta, iro cantaincha coajica intireetajero, ojocayetanaquea nijanteaji mapi. Ompoyereajea pancotsi.

Isampitiri iroamere: “¿Jaoca oncarate ontireantajeari?”

(Mt. 24.3; Ir. 21.7)

³ Impoiiji isavicanaque Jesoshi toncaariqui, opajita Orivomashi. Imontetapaaro ivanco Tasorentsi. Imananaca Petero, Santiaco, Joa, jeri aisati Antirishi: ijatashijeitaqueri Jesoshi.

⁴ Isampitapaaqueri:

—Pincamantajeitena. ¿Jaoca oncarate ontireantajeari ivanconta Tasorentsi? Ariorica coajica omoncaratempa ontireanteari, ¿jaoca noncanteari niotantajeari?

Icantiri Jesoshi: “Coajica irashinoncaajeitea atiri”.

(Mt. 24.4-8; Ir. 21.8-11)

⁵ Icantiri Jesoshi:

—Yamataviyeetimpicari.

⁶ Intime oshequi pocayetsineri, cantatsineri: “Narotaque nainti Quirishito”. Ira-matavitapeeri oshequi atiri.

⁷ Ariorica pinquemacoteri imanatavacaca atiri, aisati pinquemeru pashini cantatsine: “Trimanatavacaajeitea atiri”. Iro cantaincha eiro pitsaroanaquetsi. Aitaque oncanteari coajicani, irimanatavacaapinitea, iro cantaincha tequerata omoncarateaji nompincatsar-itantapaaajeiri.

⁸ Yora atiri inquisapinitanaqueri itsipapee. Oshequi irimanatavacaajeitea itsipasatipee atiri. Onicapiniyetanaquea quipatsi, aisati intasheapinijeitanaque atiripee. Aiquero ojatatiye, inquematsicajeitearo paitapeerica, irashinoncaasanojeitanaquea.

Icantiri Jesoshi: “Inquisheetapinijeiteri quemisantatsiri”.

(Mt. 24.9-14; Ir. 21.12-19)

⁹ Aisati icantaqueri Jesoshi:

—Paamaventea. Icantacoventimpicari, yaimpicari yora oametavacainchari. Ariorica pijate anta yapatojeitanti aitaque impasanayeetavaquempiri, tac, tac. Iraanaquempi anta itiminta savicacaantatsiri, aisati anta itiminta pincatsari. Ariorica irayempi, irosati pinquemisantacayeri, iravisacotantajeari.

¹⁰ Irijivajeite maaroni atiri inquemacojeitena noavisacotanti, impoiiji nompocaje, nompincatsaritanasotapaaque.

¹¹ Ariorica irayeetanaquempi anta, ariorica incantacoventeetempi, eiro picantashiretitsi: “¿Jaoca noncanteriri?” Aitaque oametaquempi Ishire Tasorentsi paitarica pincanteriri. Irootaque neanatacaaquempine, eiro pineanatashitatsi aviori.

¹² Coajica aparo shirampari iraacanteri irirenti, iroacantanteariri. Pashini iraacanteri itomi. Aisati pashini atiri inquisanaqueri ashtariri, iroacanteri.

¹³ Piquemisantaquena, irootaque inquisanteetempiri maaroni. Queario, ompomerentsitimojeitempi, iro cantaincha ariorica pincanteani pishiretasanotena, aitaque noavisacotajempi.

Icantiri Jesoshi: “Coajica ompomerentsitasanotanaquea anta Joreaqi”.

(Mt. 24.15-20; Ir. 21.20-23)

¹⁴ Aisati icantiri Jesoshi:

—Ariorica pineanatero isanquenareni Iranirini, piotavaquero icantini: irashinoncaajeitanaquea atiri. Icanti intime ivancoqui Tasorentsi caari cameetsatsine. Te oncameet-sateji intime anta. Ariorica pintime Joreaqi, aisati pineeririca yoranqui, pishintsite pishiajeitanaque anta toncaariqui.

¹⁵ Ariorica pisavique pancotsiqui saiteriqui, eiro piqueapanajantitsi paantapanajantearori paitapeerica, irointi pishianaque.

¹⁶ Aisati pisaviquerica oantsiqui, eiro pipiapanajantatsi paantapanajantearori piitsaare.

¹⁷ Ariorica omoncaratapaquea maaroni oca, joo, oshequi ashinoncayetanaquea tsomonteyetatsine, aisati ashinoncaquea antsotayerine ojananequite: ompomerentsiti-mojeitearo oshianaque.

¹⁸ Pincanteri Tasorentsi, oncanteata ariorica pishianaque, eirotarica oparii incani. Pishiasanojeitanaque, yaimpicari quisajeitempineri.

Yaamaventacaajeitacari Jesoshi: "Yamatavitimpicari".

(Mt. 24.21-26; Ir. 17.22-24; 21.22-24)

¹⁹ Jero aisati icantiri Jesoshi:

—Aitaque coajica irashinoncaasanojeitanaquea catsini oshequi atiri. Peerani te irineap-iniveitearoni quempetearoneri oca, jeri yora maaroni intacaroniri, te irineeroni. Coajica aisati maaroni impoitajantsineri, eiro ineirotsi aisati quempetearoneri oca.

²⁰ Irishintsite iroimajerentajeiteri Tasorentsi: eiorica, impoyereavacaajeiteame. Iro iroimajerentajeiteri, incavintsajeiteri quemisantejeiterineri, tempa irinintajeiteri iriori.

²¹ Pamene, ariorica incamanteetempi: "Pineavaqueri: jerica Quirishito", eiro piquemisantiritsi. Aisati ariorica incanteete: "Pineavaqueri: jeri yonta", eiro piquemisantiritsi catsini, itseevani.

²² Impocapaque amatavitantatsine, incantapaque: "Narotaque nainti Quirishito, narotaque camantantatsiri". Intasorentsimpeavetapaquea, incoavetaquea pin-quemisantavaqueri, irimayetempiro caari pineapiniti. Incoavetea iramataviterime quemisantejeiteri Tasorentsi, iro cantaincha tecatsi incanteri.

²³ Paamaventea. Nojivatitaquempiro nocamantasanojeititaquempiro maaroni.

Yora Jesoshi icamantacotaja impiantajeeri.

(Mt. 24.29-31; Ir. 21.25-28)

²⁴ Aisati icantiri:

—Ariorica irovecaraanaquero iquisavacaajeita, impoijiquea intsitenitanaque catsirin-caiteri, eiro iqumpetajatsi meeca. Aisati eiro iquitasantetanajitsi cashiri.

²⁵ Aisati impariaarantanaque impoquiroppee, imponeaquea inquitequi, imporocayetanaque itsipapee.

²⁶ Noponeaca inquitequi, natiritapaque: coajica irineajeitavajena atiri nonquenapaaaje mencoriqui. Nontasorentsitasanotapaque, nompincatsaritapaque.

²⁷ Aisati nontiancajeiteri nonampirepee irampatojeiteri maaroni quemisantejeitanari. Imponeaquea maaroni quipatsipeequi.

Ishiacaaventiniri Jesoshi iyera.

(Mt. 24.32-35; Ir. 21.29-33)

²⁸ Yovaajiniri aisati, icantiri:

—Jero oca piotantearoni oshiacaaventiri iyera. Iroaquerarica oshiocajempequiyetaje, ariorica ontimanaje oshi, piotaque irotajantsi osarintsitapaaje.

²⁹ Aisati, ariorica pineajeitavaquero maaroni oca nocamantayetaquempi, piote quempejitapaajana, irotaintsi nompocashitajantempi.

³⁰ Queariotaque oca nocamantimpiri. Tequeratsita pincamaajeite avirori, omoncaratapaquea maaroni oca nocamantimpiri.

³¹ Ompeajea inquite aisati quipatsi, irompa irointi noneane, eiro opeajatsi.

Aamaajeitajeeri Jesoshi: te ayojeiteji jaocarica oncarate impocantajeeri.

(Mt. 24.36-51; Ir. 21.34-36)

³² Jeroca aisati icantiri:

—Jaocarica oncarate quitaiteri, jaocarica incarate catsirincaiteri, tecatsi iotatsine. Aisati te irioiteji yora inampire Tasorentsi jenoquiniri. Pamene, narotaque itomi Tasorentsi, iro cantaincha te nioteji. Irintiquea iotatsi apaniro Apa.

³³ Paamaventea, aisati paamaajeitena. Te pioteji jaoca oncarate nompocantajeeri.

³⁴ Nonquempeteari shirampari, jatatsiri paricoti. Ariorica yojocanaquero ivanco, icantajeitanaqueri maaroni inampirepee paitarica irantajeiteneriri. Aisati iriori yora shentiriniri ivanco icantanaqueri iriori: "Paamaajenayea".

³⁵ Irootaque nocantajeitanimpiri: paamaajeitajenayea avirori. Te pioteji jaoca oncarate nompocantajeeri: ariorica inqueanaje catsirincaiteri, ariorica nianquuite tsiteniri, ariorica irineaje teapa, ariorica onquitamaroiteamanaje quitaiteri nompocaje.

³⁶ Paamaventea, paamaasanojeitena. Ariorica nompocaje, nomapocapaimpicari. Noneapaimpicari, maatsimpi catsini.

³⁷ Oca nocantimpiri, irootaque nocantajeitaqueriri maaroni atiri. Paamaventasanojeitea, paamaasanojeitena, maaroni.

14

Icoajeitaque joriopee iraacantajeiteri Jesoshi.

(Mt. 26.1-5; Ir. 22.1-2; Joa 11.45-57)

¹ Ari apitenivani quitaiteri omoncaratajea quitaiteri yavisantaniri. Iro iquenqueshiretantarori quitaiteri peerani yavisantaniri inampire Tasorentsi, oajeitiriri itomipee ejipitosati. Quitaiteri yavisantaniri te iroapinitearoji tapiachari tanta, irointi caari tapiacha. Ari icoaque jivatacaajeitiriri saserotepee aisati oametantirori sanquenarentsi jaoca incanteriri iramataviteri Jesoshi, iraanteariri. Aitaque icoaveta iroyerime Jesoshi.

² Icanti:

—Eiro aantaritsi quitaiteri yavisantaniri: iquisacoventajeitaricari atiripee.

Osaitiri Jesoshi casancajari.

(Mt. 26.6-13; Joa 12.1-8)

³ Ari isavicaque Jesoshi Vetaniaqui, anta ivancoqui Shimo patsaaveitachaniri. Oshequi oajeitachari anta. Opocapaaque tsinane, amacotapaaquero casancajari. Iojatata oja nararo, oshequi ovinaro. Ocameetsatasanoti onantari, iro yovetsiqueetiri mapi pajitachari aravashitoro. Ocarajacotapaaqueneri, osaitantapaacari iitoqui.

⁴ Itimanaque aparopee quisaneentajeitaquerori. Incantavacaanaca iriori:

—¿Paitampa meeça aparajatantacarori oca casancajari?

⁵ Arime ompimanterome, aantaquearome oshequi quirequi, impoiijuea ompayeterime ashinoncajetachari.

Impoiiji iquisatsajeivetacaro,

⁶ iro cantaincha icantiri Jesoshi:

—Eiro piquishimentirotsi. ¿Paita pashereantarori? Ocameetsatasanoti osaitaquena.

⁷ Aitaque incantaitatiyempani ashinoncaincari: pincanteani pincarajeiteri, aisati pineapiniteri. Ariorica pincoaque pintacoteari, aitaque pimataquero, pimpaqueri. Irompa nainti, eiro nocantaitatiani nontsipajeitempi aca.

⁸ Te omayeteroji paitapeerica, irointi omataque osaitaquena. Tempa asaitapinitiri camatsiri, iro cantaincha te iriotacoteaji. Irointi oca tsinane ojivataquena osaitaquena, aneatsiquerana noni. Iotaquena noncamaque.

⁹ Queariorataque oca noncamantempiri: jaocarica incamantantajeitero atiri noneane, incamantacotero antaqueri oca tsinaneca, inquenqueshireajeitantearori.

Iquenqueshireti Jorashi iraacanteri Jesoshi.

(Mt. 26.14-16; Ir. 22.3-6)

¹⁰ Ainiro iriori Jorashi Ishicariote icarajeitiri iroamere Jesoshi. Ijatanaque apaniro anta itiminta jivatacaajeitiriri saserotepee, incantacoventanteariri Jesoshi.

¹¹ Iquemajeitavaqueri ora icantapaaqueriri, iquimoshirejeitanaque, icantiri:

—Cameetsataque: oshequi nompinajeitempi quirequi.

Impoiiji iquenqueshireti Jorashi:

—¿Jaoca noncantiriri naacantanteariri? ¿Jaoca oncarate?

Yovetsicajeitiro iroamere iroajeiteari.

(Mt. 26.17-19; Ir. 22.7-13)

¹² Moncaratapaaca quitaiteri yoajeitantarori tanta, caari tapiacha. Aisati yoari ovishaniqui: yametapinijeitaro yoajeitari quitaiteriqui iquenqueshiretapinitiro yavisantaniri oantatsiri peerani. Isampitiri Jesoshi iroamere:

—¿Jaoca picoaqueri novetsicajeitero avajeiteari?

¹³ Ari itiancaque iroamere apite, icantiri:

—Pijate nampitsiquinta. Aitaque pintonquotavaqueari aparoni shirampari, iraacote chomoqui nija. Poijatanaqueri iriori.

¹⁴ Jaocarica anta inqueapaajeri, aitaque iniri ashitarori ivanco; iriotaque pineanapeeri. Pincantapaqueri: “Icanti oametantatsiri: ‘¿Jaocame nosavicantapeempari, noacantapeempariri noamere?’ ”

¹⁵ Irosati ironijantavaquempirori anta jenoqui oshitamencotanta: antearo oni. Timatsi ovetsicajeitaca maaroni avantayetearori: apanivaniji povetsicajeitapaquero ayeari.

¹⁶ Ari ijatanaque iroamere nampitsiqui, ineapaaquero oca icantaqueriri, impoiiji yovetsicapaaquero yoari.

Icamantacotaqueri Jesoshi aacaanterineri.

(Mt. 26.20-25; Ir. 22.21-23; Joa 13.18-30)

¹⁷ Ari ishaavijiteanaque catsirincateri. Yareetapaaca iriori Jesoshi, itsipajeitapaacari iroamerepee.

¹⁸ Isavicajeitapaaque, yoajeitapaaca, icantiri Jesoshi:

—Queariotaque oca noncamantempiri. Meeca acarajeitica, timatsi aacantenaneri, oacojeitaqueeri.

¹⁹ Yoashirejeitanaca, icantiri aparo:

—¿Narompa aacantempineri?

Aisati itsipa:

—¿Narompa?

Aisati itsipapee isampijeitanaqueri.

²⁰ Icanti Jesoshi:

—Tempa iriotaque aacantenaneri chaantacotaquenari meeca nomatitatequi.

²¹ Noponeaca inquitegui, natiritapaaque. Irotanaintsi noncame: aitaque ontsataaquea isanquenatacotitaquenari. Iro cantaincha irashinoncaitaquea yora aacantenaneri. Eirome itimime iriori, eirome yaacantaname, aisati iriori eirome iquematsi-catarome, coajica.

Ishiacaventajeitaqueero Jesoshi incamimentajeitee.

(Mt. 26.26-29; Ir. 22.14-20; Joa 13.21-30; 1 Cor. 11.23-26)

²² Ainiro yoajeitaca, yaaquero Jesoshi tanta. Ipsonquitiri iriri, icarajaquero, ipajeitaqueri iroamere. Icantiri:

—Paajeitero, tempa narotaque camimentajeitempineri.

²³ Impoiji yaaquero pajoqui aisati. Ipsonquitaqueri iriri, ipacojeitaqueri, irajeitavaquero.

²⁴ Icantajeitaqueri:

—Irootaque niraja amparajatimenterineri oshequi atiri. Ariorica noncamimentempi, piojeitaquero queario icantaquempiri Tasorentsi, iroavisacojeitempi.

²⁵ Queariotaque oca nocamantajeitimpiri. Eiro meeca napiitajirotsi aca quipatsiqui nirajero ovaja. Ariorica nosavicapaaje anta ipincatsaritinta Tasorentsi, ari nirapaajero pashinijari.

Icantajeitiri Jesoshi iroamere: “Coajica pojocajeitanaquena”.

(Mt. 26.30-35; Ir. 22.31-39; Joa 13.31-38)

²⁶ Ari ipampoyeaventajeitanaqueri Tasorentsi, impoiji ijajeitanaji anta toncaariqui, opajitanta Orivomashi.

²⁷ Icantajeitaqueri Jesoshi:

—Coajica pojocajeitanaquena. Aitaque isanquenatacotiteetaquempini: “Noyeri yora shentiriri ovisha, impoiji inquenashiveetanaquea irovishate”.

²⁸ Iro cantaincha, coajica nontinaanaje, nojivajeitanaquempi anta Carireaquei.

²⁹ Icantiri Petero:

—Ariorica irojocajeitempi maaroni irinti yoca, irompa nainti, eiro nojoquimpitsi.

³⁰ Icantiri:

—Queariotaque oca noncamantempiri: meeca tsiteniriqui, tequeratsitarica irampiitajerota irineaje teapa, oshequi pintsaroanaque. Oncarate mava pincante: “Te nioteriji Jesoshi”.

³¹ Iro cantaincha icantasanti Petero:

—Eiro nojoquimpitsi. Ariorica ancaraajeitavacayea ancamaajeite, eiro nocantitsi: “Te nioteriji”.

Aisati omoncarataca icantajeitaqueri maaroni itsipapee.

Iquenquetsatacairi Jesoshi iriri anta Jetsemaniqui.

(Mt. 26.36-46; Ir. 22.39-46)

³² Ari yareejeitapaaca anta Jetsemaniqui. Icantajeitiri iroamere:

—Pisavicajeitavaqueta aca, nonquenquetsatacaavaquerita Apa.

³³ Irintiquea yaanaqueri Petero, Santiaco, jeri Joa. Iquenqueshireanaca, aisati yoashiretanaca.

³⁴ Icantiri:

—Oshequi catsini noashiretasanotanaca. Pisavicavaqueta aca, pisaaquiteyea.

³⁵⁻³⁶ Ari yovaanaca capichaji ara. Itiyeroanaca quipatsiqui, iquenquetsatacairi iriri. Icantiri:

—Apa, aviro avinti mayetirori maaroni, paitapeerica. Nocoavetaca poaviscotename oca nonquematsicateari, iro cantaincha eiro pantirotsi nocoavetari narori, pantenaro picoacaquenari avinti.

³⁷ Impojji ipianaja anta isavicaquenta iroamere. Ineapaatiiri, maajeitaque. Icantapaaqueri Petero:

—Shimo, ¿maaquempimpa? Tempa pamavetimatero pisaaquitimite capichaji.

³⁸ Pisaquite. Pincaneri Tasorentsi oncanteataquea ariorica incoaque camaari iran-tacayetempiro caari cameetsatatsi, eiroquea pantantarotsi. Queario picoasanovetaca pantenerime Tasorentsi icooaaquempiri, iro cantaincha te pimateroji.

³⁹ Ipijanaja aisati, iquenquetsatacaajiri aisati iriri. Irosati icantajiri icantaqueriri incar-anqui.

⁴⁰ Ipiapaaja aisati, ineajeitapaajiri, maajeitaji aisati. Oshequi catsini aajeitaqueri ivochoque. Oshequi ipashiventajeitaca, te irioteji paitarica incanteriri.

⁴¹ Ari ipianaja aisati mavatapaintsiri. Impojji icantapaaqueri:

—Meecaquea pimaajeite, pimaoreajeite. Noponeaca inquitequi, natiritapaaque. Mon-caratapaaca, aitaque meeca icantacoventaquena: irayena meeca caari quemisantatsi.

⁴² Meeca pintinaanaje, tsame ajataje. Ja, jeri yocatapaaque aacantenaneri.

Yaajeitaqueri Jesoshi.

(Mt. 26.47-56; Jr. 22.47-53; Joa 18.2-12)

⁴³ Irosatiquera ineaveeti Jesoshi, ipocapaaque yora Jorashi, iriotaque tsipaveitariniri yora iroamere Jesoshi. Itsipajeitapaacari meeca oshequi atiri. Yamajeitapaaque isavirite-pee, aisati inchaquiipee. Iriotejaque itiancane jivatacaajeitiriri saserotepee, jeri itiancane oametantirori sanquenarentsi, jeri savicacantatsiri.

⁴⁴ Icantitajeitacari yora Jorashi:

—Meeca noncamantasanotempi piotantapeempariri Jesoshi: pineaquena nonintavoro-tapaaqueri, pajiricapeeri. Paanaqueriyea, pishentasanoteriyea.

⁴⁵ Ari ipocapaaque, iquempejitapaacari. Icantapaaqueri:

—Oametanari.

Inintavoronirotapaaqueri.

⁴⁶ Yajiricajeitapaaqueri, tapi, yaajeitanaqueri.

⁴⁷ Aparo iroamere yaaquero isavirite. Ipeshitaqueri iyempita inampire ivincatsarite saserote, peti.

⁴⁸ Icantajeitavaqueri Jesoshi:

—¿Narompa coshinti? ¿Paita pamashitantanari pisaviritepee aisati inchaquiipee? Paashitanaquena, eiro noshiaipitsatimpitsi.

⁴⁹ Aitaque maaroni quitaiteri notsipajeivetaquempi anta ivancoqui Tasorentsi, noametantini. Ja, payenaniqueti. Meecaquea omoncaratata ocantiri sanquenarentsi.

⁵⁰ Iriori iroamere, yojocajeitanaqueri, ishiajeitanaca maaroni.

⁵¹ Aparoquea evancari oijavetanacariri Jesoshi. Te inquitsaatanaqueaji, irointi yamp-inaicanaca ivashicaro. Yajiriqueevetavacari,

⁵² itsaneanaca iriori, yojocanaitiuro ivashicaro, ishiatsempequitana.

Icantajeiti pincatsaritee: “Ocameetsati incame Jesoshi”.

(Mt. 26.57-68; Jr. 22.54-65; Joa 18.12-14, 19-24)

⁵³ Impojji yaajeitanaqueri Jesoshi ivincatsaritequi saserote. Yapatojeitimentapaacari maaroni jivatacaajeitiriri saserotepee, savicacaajeitantatsiri, aisati oametantirori san- quenarentsi.

⁵⁴ Iriori Petero yojitacoventavetanacari Jesoshi, iro cantaincha nijanteaji, irosati ya-reentantapaaca anta ivancoqui saserote. Isaviquimotapaaqueri yora nampirentsipee, itatapaaquero paamari.

⁵⁵ Ainiro aisati anta pancotsiqui ivincatsarite saserote aisati maaroni oametavaca-jeitachari. Isampijeitiri atiri:

—¿Pineacotaquerimpa yantiro Jesoshi caari cameetsatatsi noacantanteariri?

Iro cantaincha, tecatsi irineacoteri.

⁵⁶ Ipocapaaque oshequi tseyacotacariri, te omoncarateaji icantayetaqueri.

⁵⁷ Aparopee catianaincha, itseeyacotashitacari, icanti:

⁵⁸ —Noquemajeitajeri Jesoshi, icanti: “Coajica noshoveajero ivanco Tasorentsi, oca yovetsicane atiri. Ari oncarate mava quitaiteri novetsicajeneri nainti pashini ivanco, caari yovetsiqui iriori atiri”.

⁵⁹ Iro cantaincha te omocaratavacayeaji icantayevetacari.

⁶⁰ Icatianaca nianqui yora ivincatsarite saserote. Isampitaqueri Jesoshi:

—¿Paita caari paquimatanta? ¿Paita ojita oca icantacoyetaquempiri yoca?

⁶¹ Iriori Jesoshi imajeretaque, te iranqueji. Yapiitaqueri yora ivincatsarite saserote:

—¿Avirompa Quirishitotatsiri, itomi Tasorentsi noneacameetsajeitiri?

⁶² Yacanaqueri:

—Narotaque. Aitaque noponeaca narori inquitequi, natiritapaaque. Coajica pineajena nosavique anta iracosanoriqui Apa, noncarateri nompincatsarijeite. Aisati pineavajena nonquenantapaaajeero onta mencorinta, nompiaje aisati quipatsiqui.

⁶³ Yora ivincatsarite saserote yaitanacaro iitsaare, itsereanaquero, tsererere; iquisanaca. Icantanaque:

—¿Paitampa meeca acoantari pashini camantacoterineri?

⁶⁴ Piquemajeitavaqueri meeca: ijitasorentsinirotacateemi. ¿Paita picoajeitiri? ¿Jaoa ancantireri?

Icantajeitanaque:

—Ainiro irantane, cameetsa incame.

⁶⁵ Ainiro aparopee quitiojayetaqueriri. Impoiji ipashicavorotaqueri, aisati ipasanatiri. Icantiri:

—Pincamantenate janica pasavorotaquempiri.

Aisati iriori nampirentsipee, ipasanajeitaveri.

Icanti Petero: "Te nioteriji Jesoshi".

(Mt. 26.69-75; Ir. 22.55-62; Joa 18.15-29)

⁶⁶ Isaviqui iriori Petero anta pancotsiqui ishaaviji. Opocapaaque aparoni inampire saserote.

⁶⁷ Oneapaaqueri Petero, itaataque paamari. Amenashetapaaqueri, sorerere, ocantiri:

—Aviro tsipatariri yora Jesoshi nasaretasati.

⁶⁸ Itsaroanaque iriori, icantanaque:

—Jm, te nioteji paitarica picantiri. Te nonquemempiji aisati.

Isouijjanaji saiteriqui, ijatanaque anta otsapiqui. Ineanaque teapa.

⁶⁹ Oneajiri aisati nampirentsi. Ocantajeitiri yora ocarajeitaveri:

—Iriotaque yoca tsipatariri Jesoshi.

⁷⁰ Aisati icantaji Petero. Ari osamanitapainti capichaji. Yapiitajiri yocapee, icantiri:

—Queariosanotaque. Aitaque pitsipatarini iriori, avirotaque carireasati.

⁷¹ Icantasanotiri:

—Te nioteriji yora shirampari picantaqueri. Ioti Tasorentsi queario nocantaque: not-seeyanirica, nocoaque iroasanquetayenata Tasorentsi.

⁷² Yapiitajiro ineanaji teapa. Iquenqueshiretanajiro Petero icantaqueriri Jesoshi: "Tequeratarica irampiitanajerota anta atiripee coajeivetachari irojoquerime pincatsari: 'Te noneeriji Jesoshi' ". Ari yoashiretanaca Petero, irosati iraanatanaca, jii, jii.

15

Ari yaajeitanaqueri Jesoshi Piratoqui.

(Mt. 27.1-26; Ir. 22.66-23.5; Joa 18.28-40)

¹ Ari oquitaitetamani, yapatojeitamanaja yora jivatacaajeitiriri saserotepee, savicacaantajeitatsiri, oametantirori sanguenarentsi, maaroni. Aisati yapatojeitaca maaroni pashini oametavacainchari. Icantavacaimentajeitacari Jesoshi. Ari yoisoyeetanaqueri Jesoshi, yaanaqueri anta, ipapaqueri Pirato.

² Isampitavaqueri:

—¿Avirompa ivincatsarite jorio?

Iriori Jesoshi yacanaqueri:

—Je, naro.

³ Icantajeiti jivatacaajeitiriri saserotepee:

—Osheqiri yantaniroyaqueri yoca, te incameetsateji.

⁴ Yapiitajiri Pirato, isampitajiri:

—¿Paitampa caari pacanta? Piquemavaqueri oshequi icantacotashijeitaquempiri.

⁵ Te iranqueji Jesoshi. Irosatiquea iriori Pirato yoantanacariri cavaco.

⁶ Ari ainiro yametacari: maaroni osarintsi, ariorica omoncaratapaaja yavisantaniri, yoimisoquijapinitiri aparoni yoiminqheetiri. Yoimisoquijajiri janicarica icoajiri atiripee.

⁷ Ainiro meeca yashitacotaca anta atiripee coajeivetachari irojoquerime pincatsari: ipajita aparoni Varavashi. Iro irojocantearimeri pincatsari, yoantaque.

⁸ Ari ijatashijeitaveri yora apatojeitainchari, icantajeitapaaqueri:

—Meecaquea nocoi pantajeitenaro oca pametari: poimisoquijajenari aparoni poiminquri.

⁹ Yacavaqueri Pirato:

—¿Iriompa picoaqueri noimisoquijajempiri yora pivincatsarite?

¹⁰ Iotaque Pirato oshequi ipincatsajeitiri atiri Jesoshi, irootaque iquisajeitancari saserotepee, yaacantancari.

¹¹ Ari yora saserote iquenaquenayetanaque, icantajeitaqueri atiripee:

—Picantacoventiricari Jesoshi. Pincantajeiteri: “Irinti poimpacaajeri Varavashi”.

¹² Yapiitajiri aisati Pirato, icantiri:

—¿Jaocampa meeca noncanceriri yoca pipincatsajeivetacari?

¹³ Icajemajeitanaji aisati:

—Pimpajacotacanteri coroshiqui.

¹⁴ Isampitiri:

—¿Paitampa yantaqueri nompajacotacantanteariri?

Aiquero yovaapinijeitanaquero icajemajeitanaque:

—Pimpajacotacanteri, pimpajacotacanteri.

¹⁵ Icoanaque Pirato inquimoshiretacaajeitajeri yora atiripee, irosati yoipacantajariri Varavashi. Ja irintini Jesoshi ipasanatacantaqueri, ari yaacantaqueri impajacotacantanteariri.

Oshequi yoashinoncaaqueri soraro Jesoshi.

(Mt. 27.27-31; Joa 19.1-3)

¹⁶ Iriori soraro yaanaqueri tsonpoina ivancoqui Pirato. Ipajitironta pancotsi peretorio. Yora soraro icajemajeitaqueri maaroni itsipapee.

¹⁷⁻¹⁸ Itseencajeitanaqueri, ishirontimentajeitacari, icantiri:

—¿Avirotaquempa ivincatsarite jorio? Jentsite, narori, nompincatsajeitempi. Tsame pinquitsaatearo qutioncanirori, aisati pamatseetearo amatseerentsi pinquempetanteariri pincatsari, impoji nompincatsajeitantempiri. Iji, iji, iji.

Ari iquitsaataqueri, aisati yantaqueneri totseequi, yamatseetaqueri.

¹⁹ Ipananatiri iitoqui, iro ipasatantacari savoroqui. Iquitiojaqueri. Itiyeroashinrotacari, ineapincatsatamempeacari.

²⁰ Ari oshequi yantavintsanataqueri, impoji isapocajiri iitsaare qutioncanirori, iquit-saatajiri iitsaasesanori iriori.

Ipajacotantacari Jesoshi.

(Mt. 27.31-56; Ir. 23.26-44; Joa 19.16-30)

Impoji yaanaqueri anta impajacotanteariri.

²¹ Nianqui avotsi ineaqueri soraro shirampari pajitachari Shimo, iriotaque shirenesati. Irio iriri Arijantero, jeri Irojo. Iponeanaja Shimo oantsiqui, iro iravisanaqueme, iro cantaincha yaavaqueri soraro, iperanatavacari:

—Panatanaqueneri Jesoshi coroshi.

²² Ari yaajeitanaqueri Jesoshi anta opajitanta Coricota. Iro ipajitantarori otishi oshiaquero iitonaroqui atri.

²³ Ipavetari ovaja oconoajataca aavintarontsi pajitachari mira. Iro cantaincha te irireeroji.

²⁴ Impoji ipajacojeitaqueri, aisati ineantacaro mapijaniqui, iriojeitanteari janicarica aitajerineri iitsaareni. Ipavacaayetacaro.

²⁵ Ari ijenoquitapaaque catsirincaiteri, irosati ipajacotantacari.

²⁶ Isanquenataquero sanquenarentsi, ocanti: “Iriotaque ivincatsarite jorio”. Ipatacaquero coroshiqui jenioquiji.

²⁷ Ora pashini coroshi ipajacotaqueri apite coshinti. Aparo yoatiacotaqueri iracosanoriqui Jesoshi, irio itsipa yoatiacotaqueri irampatequi.

²⁸ Irootaque omncaratantajari sanquenarentsi cantatsiniri: “Irishiacanteri caari cameetsatsine”.

²⁹ Ainiro anta avisayetatsiri icantimatanaqueri, aisati yavimacanaca, icantajeitiri:

—Joo, aviro shoveajeronemeri ivanco Tasorentsi. Oncarateme mava quitaiteri povetsicajerome aisati.

³⁰ ¿Arimpa pitasoncantashiyeta? Jentsite, pintasoncacoventajea avisati: poaviscotajea avisati, paniireanaje coroshiqui.

³¹ Irosati icantaqueriri iriori yora jivatacaajeitiriri saserotepee, aisati oametantirori sanquenarentsi. Ishirontimentajeitacari, icantavacaajeitanaca:

—Irintiquea itsipa yoaviscoti. Jaquea iriori te iroavisacotajeaji.

³² Jeri Quirishitovetachari, pincatsariventerinemeri ijorioririnte. Jentsite, amenavaquerita ariorica iraniireanaje ara coroshiqui. Noneaqueririca, ari nonquemisantanaqueri.

Aisati iriori tsipatacariri Jesoshi ipajacojeitaca, itseencaqueri.

³³ Ari icaravetapaaca catsirincaiteri tampatica, otsitenitanaque maaroni quipatsiqui. Ari ishavijitanaji, iporeanaji aisati.

³⁴ Irosati icajemantanaca antearojenca Jesoshi, icanti:

—Eroi, Eroi, irama savatani.

Irootaque acantiri aneanequi: “Notasorensite. Notasorensite. ¿Paita pojocantaque-nari?”

³⁵ Iquemavetavacari aparopee shirampari, icanti:

—Pinquemeri, icajemiri Iriashi.

³⁶ Ari ishianaca aparato atiri, yoviincapaaqueneri quepishijariqui aajatirori. Yoisotocotaqueneri savoroquiiqui. Ipavetari irantsimicavaquerome. Icanti:

—Ari icantavacata: amenavaquerita ariorica impocashitapaaqueri Iriashi iroaniitapaa-
jери.

Icamanaque Jesoshi.

(Mt. 27.50-56; Ir. 23.45-49; Joa 19.30-37)

³⁷ Antearojenca icajemanaque Jesoshi, icamanaque, toren.

³⁸ Ainiro anta ivancoqui Tasorensi antearo tocoya, tontari, opaincaca omoroqui. In-tanaca jenoqui otsereamaotanaque, tsererere, irosati ishaaviji. Apitemaotanaji.

³⁹ Ainiro imontetacari iyapitanote soraro. Ineavaqueri jaoca icantanacari Jesoshi, icamantanacari. Irootaque icantantacari:

—Quearioteemi: iriotaque yoca shirampari itomi Tasorensi.

⁴⁰ Otimaiti paricoti aparopee tsinane, amenajetiri. Ocarajeitaiti Maria Maquitarasato, jero aisati pashini Maria, irootaque iriniro Santiaco, jeri aisati Jose. Yora Santiaco impoitatsiri itimi. Aisati ocarajetiri Sarome.

⁴¹ Ainiro itimaveitani Jesoshi anta Carireaquei, oijajetirini maaroni oca tsinaneppee. Intacojearini aisati. Otimaque meeca aca oshequi otsipapee tsinane. Itoncaantanacari Jesoshi anta Jerosarequi, irootaque oijajetiriniri.

Jaoca icantaqueriri Jesoshini.

(Mt. 27.57-61; Ir. 23.50-56; Joa 19.38-42)

⁴² Ishavijiiteanaji catsirincaiteri. Iro quitaiteri meeca yovetsicajetiro iroajeiteari osaite-
quera, tempa osaitequera quitaiteri imaoreantajetari.

⁴³ Ainiro Jose, yora poneachari Arimateaquei. Aitaque icarajetiri yora oametavacaa-
jeitainchari. Ineacameetsajetiri atiripee. Yaamaari Tasorensi, icoaque impincatsariven-
teri. Ipanacari iriori Pirato, ijatashitaqueri yamanantapaaajiri yora Jesoshini.

⁴⁴ Yoanaque cavaco Pirato. Iquenqueshiretanaque: “¿Icatimaitacampa icamanaque Je-
soshi?” Ari icajemacantaqueri iyapitanote soraro. Isampitavaqueri:

—¿Queariompa? ¿Camasanotanaquempa Jesoshi?

⁴⁵ Icantiri:

—Je, camasanotaque ini.

Irosati itiancantacariri Jose intijeri Jesoshini.

⁴⁶ Yamanantaque Jose tocoya. Yoaniitaqueri Jesoshi, yapinaicacotaqueri tocoyaqui. Yoiponaaqueri omoroqui, anta imoqueetironta imperita. Itivironcashitanaqueri antearo
mapi omoroqui.

⁴⁷ Oneacotaqueri jaoca yoaqueriri Maria Maquitarasato. Otsipataro Maria, ora iriniro
Jose.

16

Itinaanaja Jesoshi.

(Mt. 28.1-10; Ir. 24.1-11; Joa 20.1-10)

¹ Avisanaque quitaiteri imaoreantajetari. Amanantanaque tsinane casancajari, ontir-
itantajearimeri Jesoshini. Ari opajitari iroori tiriterinemeru Maria Maquitarasato. Aisati
iroori ocaratiro pashini Maria iriniro Santiaco, jero aisati iroori Sarome.

² Ari capichaji quitaiteri ojatamani anta omoroqui yoyeevetacarinta. Iro tominco
ojatantacari. Ari ijenoquitapaaque catsirincaiteri, irosati aretantapaa.

³ Ocantavacaanaca:

—¿Janicampa tivironqueerone ora mapi omoroquinta? Antearo oni, eiro aaveirotsi.

⁴ Amenapaaque, oneapaaquero mapi, tivironcanaca. Antearo catsini onaveta.

⁵ Oqueapaaquero omoroqui anta yoavetacarinta. Te oneapaaajeriji ocoavetapaaajari,
irinti oneapaaque evancari, isavicaque acosanoriqui. Iquitsaataro quitsaarentsi quita-
marori catsini. Oapaaque cavaco.

⁶ Icantavaquero:

—Eiro poitsi cavaco. Irio picoaveta yora Jesoshi nasaretasati, yora ipajacoyeetaqueri.
Itinaanaja, te aneajeriji aca. Pamenerote aca yoyeevetacarica.

⁷ Pijataje meeca, pincamantapeeri iroamere. Aisati pincamanteri Petero. Pincantapaa-
queri: “Irijivatanaquempi anta Carireaquei, aitaque pineapaaajeriri anta. Tempa aitaque
icamantitimpini”.

⁸ Ari osoquijanaji, oshianaca. Opioncanaque, oanaque cavaco catsini. Otsarohanaque, irootaque caari ocamantacotantari.

Oneajiri Maria Jesoshi.
(Joa 20.11-18)

⁹ Irootaque itinaantajari Jesoshi tominco. Iro intasanotajari yonijaajaro Maria Maquitarasato. Irootaque peerani yatajeaoncaveitaniri 7 camaari, iro cantaincha yoavisacotaqueroni.

¹⁰ Irosatiquaea ojatantanaca iroori ocamantapaaqueri yora itsipajeiveitaniri Jesoshi. Irosatiquera yoashiretacojeivetari, iracojeivetari aisati.

¹¹ Ari ocamantavetapaacari:
—Tinaanaja Jesoshi, noneajiri.
Te inquemisantavaqueroji.

Inejiri apite iroamere Jesoshi.
(Ir. 24.12-35)

¹² Impoiji ipashinivorotanaca Jesoshi, injapaajari apite iroamereni, yaniijeitanaji anta oantsiqui.

¹³ Ari ipianaja yoca neaqueriri, icamantapaaqueri itsipapee. Aisati iquempetavaqueri, te inquemisantavaqueroji.

Iquenquetsatacajeitiri Jesoshi maaroni iroamerepee.
(Mt. 28.16-20; Ir. 24.36-49; Joa 20.19-23)

¹⁴ Impoiji yoajeitaja iroamerepee, icarajeitaji 11. Irosati injajeitantaapaajari Jesoshi. Icantajeitaqueri:

—Tempa nocamantitimpini nontinaanaje: ¿paita caari piquemisantantana? Tempa ontime piquenqueshireantari. ¿Paita caari piquemisantantari neajanari incaranqui?

¹⁵ Pijajeite pintsoteanaquero maaroni quipatsiqui. Pincamantajeiteri maaroni atiri jaoca incantajeari iroavisacotantajeari iriori.

¹⁶ Janicarica quemisantavaquerone ora pincamanteriri, aisati ariorica irivaotisatajea, aitaque iroavisacotajea. Irompa yora caari quemisantavaquerone, iroasanquetasanoteri Tasorentsi irinti.

¹⁷ Jaocarica pijajeiteri, intasoncacoventempi Tasorentsi, iriojeitanteari atiri queario-
taque oca picantaqueriri. Nomatacayempiro poavisacotanteari yatajeaoncane camaari. Poyetero otsipapee neantsi pinquenquetsatacotantenari.

¹⁸ Ariorica pajiricaveteari maranque, ariorica irantsicavetempi, iro cantaincha eiro yoamaimpitsi. Aisati, ariorica pirero piantatsiri, eiro oamaimpitsi. Aisati ariorica pim-
pamiteri mantsiatatsiri aisati pincantacoventeri, ari iravisacojeitaje.

Ivecarataquero Maricoshi isanquenare.
(Ir. 24.50-53)

¹⁹ Irootaque icantajeitaqueriri Avincatsarite Jesoshi, irosati yoancantanaja inquitequi, isavicapaaji anta iracosanoriqui Tasorentsi, icaratapaajiri ipincatsaritapaaji iriori.

²⁰ Ari ijajeitanaque iroamerepeeni. Iquenaquenayetanaque, icamantantayetanaque jaocarica iquenanaqueri. Quiso yoiri Avincatsarite, yamitacojeitiri. Aisati itasoncantayetaque, iojeitantacari atiripee queariosanotaque icamantajeitapairiri. Aitaque ocanta. Ari ocarati. Narotaque sanquenatirori: *Maricoshi*

YORA IROCASHI ISANQUENATAACOTAQUERI JESOQUIRISHITO, JAÛCA ICANTA IRIORI YOAVISACOTANTI

Ivetsatari Tiojiro.

¹⁻⁴ ¿Ainirompi Tiojiro? ¿Tecatsimpa oyempine? Meeca noninti nonquenquetsacoteri Jesoquirishito. Icarajeitaque oshequi sanquenatacojeitaqueriri, icamantacoyetaquero yantayetaqueri. Ineajeitaqueri, aisati iquemacojeitaqueri, irootaque isanquenatacotantariri. Noneanataquero narori isanquenare, aisati nosampitacoyetaquero yantayetaqueri niotasantotacarori, notsoteaquero maaroni. Meeca novaajempio narori, nocoaque tampatica piotasanotero yantayetaqueri Jesoshi, piojeite te iramatavijeitempiji yora sanquenatirori.

Yora Caviryeri icamantiri Sacariashi intime itomi.

⁵ Peerani, ipincatsaritanti Eroreshi anta Joreaqi, itimini saserote pajitachari Sacariashi. Iriotaque ishanincani Aviashi: ariorica yantaveetiniri Tasorentsi anta ivancoqui, icarajeitiri ishanincasanori iriori. Opajita ijina Sacariashi Isavere, irootaque ishanincani Aaro.

⁶ Quemisantincari ini iriori Sacariashi, aisati ijina. Icantani imayetaquero icantiriri Tasorentsi, iojeitiri atiri icameetsataque.

⁷ Te intimeji itomipee: shiravaro oni ijina, aisati imoncaratavacaajeitaca yanteashipajeitaque.

⁸ Ari omoncarataca quitaiteri yantaveejeiti ishaninca. Yamejeitaro itiancapinitiri aparori saserote itainiri Avincatsarite casancapatsari.

⁹ Icantajeitiri Sacariashi ishaninca:

—Meeca aviro queasanotatsine anta, pintayeneri Avincatsarite casancapatsari.

¹⁰ Ari iqueanaque, irinti yora apatojeitainchari isavicajeiti saiteriqui, iquenquetsatacaajeitiri Tasorentsi. Aitaque ariorica itaaquero casancapatsari, iquenquetsatacaajeitiri Tasorentsi.

¹¹ Anta tsompoina, imapocaqueri inampire Avincatsarite, icatiapaaca quempeji onantariqui casancapatsari, icatiapaaca irampatequi.

¹² Ineantavacariri yoanaque cavaco, aisati oshequi itsaroanaque.

¹³ Iro cantaincha icantaqueri:

—Sacariashi, eiro pitsaroitsi. Timatsi picantaqueriri Tasorentsi; tempa iquemaquempi, irootaque ontimanteariri coajica pijina pitomi. Pimpajiteri Joa.

¹⁴ Oshequi pinquimoshireventeari, aisati inquimoshireventajeiteari oshequi pishanincapee.

¹⁵ Aisati irineacameetsasanoteri Tasorentsi iriori. Eiro iroiotsi cachojari. Quiso oasanoteri Ishire Tasorentsi, tequeratsita intime, quiso oyeri: oncanteani oameteri.

¹⁶ Oshequi inquemisantacajeiteari pijorioririnte, impincatsajeitanteari Tasorentsi, tempa irio Avincatsarite maaroni.

¹⁷ Inquempeteari Iriashini, oshequi oameteri Ishire Tasorentsi, aisati otasoncacaqueri. Irijivatanaqueri Avincatsarite, incamantajeiteari ishanincapee iramaajeiteari, aisati incamanteri inquemisantajeiteari. Iroamejeiteari ishaninca inquemisantanteari, inquempeteari yora peeraniniri inquemisantini intacaroniri. Iroamejeiteari tseencantatsiri cameetsa inquemisanteri Tasorentsi.

¹⁸ Icantaqueeri Sacariashi:

—¿Arimpa? ¿Jaoa noncanteari niotasantanteari queariotaque oca picantaquenari? Anteashipataquena, aisati nojina, anteashipataque iroori.

¹⁹ Yacanaqueri:

—Naro Caviryeri, quiso noiri Tasorentsi. Iriotaque tiancaquenari nocamantantimpirori oca cameetsatsiri.

²⁰ Aitaque omoncarataquea oca nocamantaquempiri, iro cantaincha te pishiretearoji, irointi pitseencaquena. Meeca pimasontite, eiro pineanatajitsi irosati intimanteari pitomi.

²¹ Ainiro anta saiteriqui apatojeitainchari yamenaajeivetacari Sacariashi, icantajeitaque:

—Osamanitanaqueteemi ipeaca. ¿Paita caari isoquijantaja?

²² Impoiji isoquijanaji, te irimatajeaji irineanataje, irointi ijicojicotashitaca. Impoiji iojeitanaque, icantajeiti:

—Timatsi ineaqueri anta tsoompoinaqui.

Te irineanatasanoteji catsini.

²³ Irosati icanta, oshequi quitaiteri yantaveetaji aisati ivancoqui Tasorentsi. Impoiji ipianaja ivancoqui iriori.

²⁴ Impoiji oaque ijina, irosati oquempoyeantaca ovancoqui. Icarati 5 cashiri te osoquija-jeji.

²⁵ Ocanti:

—Peerani te intimeji notomi, irootaque nopashiventantacari, iro cantaincha eiro nopashiventajatsi aisati. Icavintsaaquena Avincatsarite, tempa icameetsatasanoti.

Yora Caviriyeri icamantiro Maria: “Intime pitomi”.

²⁶ Impoiji icarataque 6 cashiri otsomotetantacari Isavere. Ari itiancajiri aisati Tasorentsi Caviriyeri:

—Pijate Nasaretequi: ora carireaquiniri.

²⁷ Pincopaquero Maria, ijinatsori Jose. Iriotaque ishanincani Iravirini. Ocashiacar ayeri, iro cantaincha te oneayeteriji shirampari.

²⁸ Ari ijatashitaquero. Imapocapaquero, icantapaquero:

—¿Ainirompi, Maria? Noncamantempi: oshequi inintasanotaquempi Tasorentsi, quiso yoaquempi. Oshequi icavintsaasanotaquempi, panaacotaquero maaroni pitsinaneroronte.

²⁹ Iro cantaincha otsaronaque iroori, oquencheshiretanaca: “¿Paita ojita oca icantaquenari?”

³⁰ Icantaquero:

—Eiro pitsaroitsi. Queario, icavintsaasanotaquempi Tasorentsi.

³¹ Irotaintsi poye. Coajica pintimeri pitomi, pimpajiteri Jesoshi.

³²⁻³³ Impincatsaritanote. Irojeitanaque atiri irio Itomi Tasorentsi, savicatsiri inquitequi. Tempa iriotaque Avincatsarite. Peerani yora Iravirini ipincatsariventaveitarini pijorioririnte. Iro cantaincha incanteri Tasorentsi: “Notiomi, aviro pincatsariventajeiterineri maaroni, pincantaitiyempani”. Aitaque incanteari impincatsaritanaque, eiro yoipacaajirotsi.

³⁴ Ari ocantiri:

—¿Jaoca incanteari intimanteari notomi? Te intimeji nojime.

³⁵ Yacanaquero:

—Iro timacayempine Ishire Tasorentsi. Aisati intasoncaventaquempi Tasorentsi, savicatsiri inquitequi jenoqui. Coajica incantacojeiteri pitomi: “Icameetsatasanoti, te aneeroji irantane. Iriotaque Itomi Tasorentsi”.

³⁶ Aisati noncamantempi: anteashipatanovetaca iroori pishaninca Isavere, aisati icanteetiro shiravaro oni, iro cantaincha icarataque meeca 6 cashiri otsomontetantacari. Coajica ontimeri otomi.

³⁷ Pineaquero, tecatsi pomerentsitimotearine Tasorentsi, imajeitaquero paitarica icoiri.

³⁸ Ocantiri iroori:

—Irioyeampa Avincatsarite. Onimotaquena paitarica icoacaquenari: icoacaquenarica intimashitea notomi, ari cameetsataque.

Irosati ipiantanaja inampire Tasorentsi.

Ojataque Maria oquivantiro Isavere.

³⁹ Pashini quitaiteri ojatanaque Maria Joreaqi. Oshintsiti ojatanaque toncaariqui.

⁴⁰ Areetapaaca anta ivancoqui Sacariashi. Oneapaquero Isavere, ocantapaquero:

—¿Ainirompi?

⁴¹ Oquemantavacarori Maria ocajemapaaque, oquematiiri ishevatanaca orijani, moyec. Aisati oametasanotaquero Ishire Tasorentsi,

⁴² irosati ocajemantavacaro. Ocantiro:

—Tempa ineshinoncajeitaquee Tasorentsi, aisati iquempjeitiro maaroni tsinane; iro cantaincha avinti, panaacajeitaquena: ineshinoncatasanotaquempi catsini. Tempa aisati inecameetsatiri pirijani.

⁴³ Aviro ashitearine Avincatsarite. ¿Paita piquencheshiretananari pineana?

⁴⁴ Pamene, noquemantavaquempiri pivetsatapaaquena, iquimoshiretanaque norijani, ishevatanaca, moyec.

⁴⁵ Pishiretasanotavacaro maaroni icamantaquempiri Avincatsarite, irootaque ineshinoncatantaquempiri.

⁴⁶ Ocantiro Maria:

—Tempa icameetsatasanotaque Avincatsarite,

⁴⁷ iriotaque Atasorensite aisati oavisacojeiteeneri coajica. Oshequi noquimoshireventaqueri.

⁴⁸ ¿Paita icavintsantanari narori? Nashinoncaavetaca, tecatsi niote narori. Iro cantaincha iriojeitanaque maaroni atiri noquimoshireventaqueri.

⁴⁹ Oshequi itasoncacoventaquena, tempa itasorensitasanotaque, icameetsatasanotaque.

⁵⁰ Icantatiani icavintsaajeitaqueri maaroni pincatsajeitiriri.

⁵¹ Oshequi itasoncantayetaque. Intsoncajeitajeri maaroni shemejeitatsiri.

⁵² Imajeitaqueri pincatsarivetachari yojocacaaqueri ipincatsariventanti. Irintiquea ashinoncaincari ipeajiri pincatsari.

⁵³ Iquemacaacari tasheavetachari, aisati yaapitsatajiri ashitaarantincari maaroni timi-mojeivetariri.

⁵⁴ Icantani Tasorensi yamitacojeitaqueri ajorioririnte, te impeacoteeji arori icavintsaajeitaquee.

⁵⁵ Aitaque imataquero maaroni icantaqueriri intacaroniri peerani: Avarama aisati maaroni ishanincani, catsini.

Irootaque ocantirori Maria.

⁵⁶ Ari osavicaiti mava cashiri, impoiiji opianaja onampiqui.

Itimaque Joa vaotisantantsiri.

⁵⁷ Ari moncarataca otimiri Isavere otomi.

⁵⁸ Iquemacojeitaquero oshanincapee, iquimoshireventaquero. Icantajeitaque:

—Tempa ineshinoncatasanotaquero Avincatsarite.

⁵⁹ Ari ocarataque imaacotaque 7, moncarataca intoyeantanteariri. Yamejeitaro jorio ipajitavacaa iriori, icantajeiti ishaninca:

—Tempa impajitea Sacariashi, inquempetajeari iriri.

⁶⁰ Iro cantaincha ocanti iriniro:

—Eiro ipajitatsi Sacariashi, ainti impajitea Joa.

⁶¹ Icantajeivetaro:

—¿Paitaquea? Te intimeji pishaninca pajitachaneri Joa.

⁶² Ari isampijeitiri Sacariashi:

—¿Paita picoiri avinti?

⁶³ Ari ijicotiro paperi, isanquenajeitaqueneriri: “Aitaque, impajitea Joa”. Irosati yoajeitantanaca cavaco.

⁶⁴ Imapocanaja Sacariashi ineanataji aisati, icanti:

—Tempa icameetsati Tasorensi.

⁶⁵ Impoiiji yoajeitanaqueri cavaco maaroni ishaninca. Iquemacojeitaqueri maaroni savicajeitatsiri toncaaripeequi: ora timatsiri Joreaquei.

⁶⁶ Iquenqueshirejeitanaca maaroni quemacojeitaqueriri: “¿Jaoca icantari yora jananequi? ¿Paita iranteri coajicani? Tempa ineshinoncatasanotaqueri Avincatsarite”.

⁶⁷ Impoiiji Ishire Tasorensi oametaqueri Sacariashi, icantantarori oca:

⁶⁸ —Tempa icameetsatanoti Avincatsarite, iriotaque tasoncaventajeitaqueeri. Ipcashijeitaquee iroavisacojeitajee.

⁶⁹ Peerani Iravirini yantiniri Tasorensi icoacairiri. Meeca itiancaqueri Tasorensi ishanincani Iravirini, itasorensitaque, yoavisacotantaque.

⁷⁰ Tempa peerani icantirini Tasorensi quenquetsacotiririni:

⁷¹ “Nontianquempiri oavisacojeitempineri, intimerica quisajeitempineri, irojocacoventajeitaquempi.

⁷² Noncavintsaajeitaqueri ishanincani Avarama, maaroni. Eiro nopeacotajarotsi nocantajeitaqueriri.

⁷³ Peerani nocantasanotaqueri Avarama:

⁷⁴ ‘Coajica noavisacojeiteri pishanincapee, nompiajeiteari quisajeivetearineri, impoiiji eiro itsaroajeititsi inquemisantajeitena.

⁷⁵ Noameetsajeiteri, noncanteani noneacameetsajeiteri’ ”. Irootaque icantaqueriri Tasorensi peeraniniri.

⁷⁶ Meeca notiomni, noncamantempi: iriojeitempi atiri aviro quenquetsacoterine Tasorensi jenoquiniri. Pincamantajeiteri incameetsatanaque, iramaajeiteari Avincatsarite.

⁷⁷⁻⁷⁸ Poamejeiteri ashanincapee iriojeitanteari jaoca incanteari iravisacotantajeari. Pincamantajeiteri icavintsaasanojeitaqueri Tasorensi, eiro iquenqueshiretajirotsi yantaye-tiri caari cameetsatatsi. Ariorica icontetapaaque catsirincaiteri, te ontsitenitanajeji,

irointi oquitaitetanaji. Aisati oquempetaca, ariorica imponeaquea Avincatsarite jenoqui, ayotasanojeitanaque cameetsa asavicajeite.

⁷⁹ Iroavisacojeiteri maaroni caari iovetari Tasorentsi, maaroni tsaroayevetachari incame. Iriotacaajeitapaqueri jaoca incanteari iracameetsatanteariri Tasorentsi.

Irootaque icantaqueri Sacariashi.

⁸⁰ Ari avisanaji oshequi oshequi maaroni, yantearitanaque Joa, oshequi iquemisantaqueri Tasorentsi. Ari itimaqueri apaniro caaraiteriqui, irosati iquenquetsatanteariri ishanincapee.

2

Itimaque Jesoshi.

(Mt. 1.18-25)

¹ Ari ipincatsariventanti Jerosarequi oromasati, ipajita Shisari Acoshito. Ari iroaquera itimapaaque Joa, icanti Shisari:

–Nocoaque irisanquenatacojeitea maaroni atiripee, niotanteari jaoca icarajeitiri.

² Iro isanquenajeitantarori ivajiropee, irio Shirino pincatsariventajeitiriri shiriasati.

³ Ari ijajeiti atiri anta nampitsiqui itimajeitini ishanincani peerani, isanquenatacojeitaca.

⁴ Itimi meeca Jose anta Nasaretequi, ora timatsiri Carireaquei. Iro cantaincha ishanincatacari Iravirini: yora pincatsariveitachaniri. Iro inampini Iravirini Verequi, timatsiri anta Joreaquei. Irootaque ijatantacari Jose Verequi, irisanquenatacotantajeiri irisati.

⁵ Itsipatanacaro iroori ijinatsori, irotimatainti ontimacote.

⁶ Ari yaretantapaacari Verequi, irosati oquemantacaro atiscaneentaquero, nii.

⁷ Icoayevetapaaca pancotsi irimaanteari, iro cantaincha ijajeitacaro pancotsipee irisavicantapeempameri: irointi timatsi ivanco virantsi. Aitaque otimaqueriri otomi, jivatatsiri itimi. Oponataqueri, oaqueri ora iquempoyeanteetanariri virantsi yoari.

⁸ Ari otsitenitanaji, ainiro anta qeshiiqui isavicajeiti shentajeitiriri irovishate.

⁹ Imapocaqueri Avincatsarite, ishiquaireacojeitacaqueri, oquempetaca quitaiteri, aisati inaejaitavaqueri inampire Avincatsarite. Itsaroajeitanaque; icantaita, shiquere.

¹⁰ Iro cantaincha icantapaqueri:

–Eiro pitsaroajeititsi, timatsi noncamantempiri: ocameetsatasanotaque. Pinquimoshireventajeitearo, aisati inquimoshireventearo maaroni atiri.

¹¹ Iroaquera itimaque Verequi oavisacojeitempineri: iriotaque Avincatsarite Quirishito.

¹² Jeroaca noncamantempiri piotanteariri. Pijate ivancoquinta virantsi, pamenaiteri yora iroaquera timaintsiri; pineapaqueri iponaaca anta ivancoqui virantsi, iponatata.

¹³ Irosati imapocajeitantariri oshequi jenoquisati, icantajeiti:

–Tempa icameetsatasanoti Tasorentsi,

¹⁴ nopincatsatasanajeitiri anta inquitequi. Aca quipatsiqui irisavicacajeiteri cameetsa maaroni inecameetsajeitiri.

¹⁵ Ari ipiajeitanaja inquitequi, impoiiji icantajeiti shentajeitiriri irovishate:

–Icamantaquee Avincatsarite timaque Verequi oavisacojeiteeneri. Tsamete amenaiteri.

¹⁶ Ari ishiajeitanaca, inaejaitapaqueri Jose, jero Maria, jeri iriori otomi, iponaaca ara.

¹⁷ Ari icamantajeitapaqueri maaroni icamantaqueriri inampire Tasorentsi.

¹⁸ Ari yoajeitanaque cavaco maaroni quemajeitakeriri.

¹⁹ Iroori Maria oshequi oquenqueshiretaquero oca icantajeitakeriri, oquenqueshiretapinitaquero.

²⁰ Ari ipiajeitanaja ashitariri irovishate anta qeshiiqui. Icantajeitanaque:

–Tempa icameetsataque Tasorentsi. Ocameetsataque maaroni injaaqueeri aisati maaroni icamantaqueeri. Cameetsa ini Tasorentsi.

Itoyeantajaniquitaqueri Jesoshi.

²¹ Ari ocarat 7 imaacotaque Jesoshi, irosati itoyeantanteetacari. Aisati ipajitiri Jesoshi: imoncarataquero icantaquerori Maria chapinqui inampire Tasorentsi.

icanti Jose aisati Maria: “Nocoacaaqueri Jesoshi irantasanteneri Tasorentsi paitarica icoacaaqueriri iriori”.

²²⁻²⁴ Ari peerani isanquenatacaqueri Avincatsarite Moishishini: “Ariorica ontimeri tsinane otomi, onquempoyeempaya ovancoqui oncarate 40 quitaiteri: eiro ojatitsi ampatojeiteari quemisantatsiri. Ariorica omoncarataquea 40 quitaiteri, ocameetsati ojate ivancoqui Tasorentsi onquemisantantajeiri aisati. Aanajeneri Tasorentsi apite sampaquiti, ariorica apite paroma. Ompapaqueri saserote, iroyeri, impoiiji intayeneri Tasorentsi. Impoiiji onquempetajea aisati peerani, cameetsa ojatapinitaje aisati, onquemisantapinitaje”. Timatsi pashini isanquenatiniri aisati: “Iriorica shirampari yora jivatatsiri otimiri

tsinane, icoaque Avincatsarite inquemisantasanoteri, iranaacoteri impoiterineri intime. Ocameetsati iraanajeri ashitariri ivancoqui Tasorentsi, incanteri Tasorentsi: 'Jerica notomi, jivatatsiri itimi. Paitarica pincoacaaqueriri, nocoaque irantasanotempiro'".

Ari ocarataque 40 quitaiteri itimantacari Jesoshi, irosati ijajeitantanaja Jerosarequi: Jose, Maria, jeri Jesoshi. Imoncarajeitaquero maaroni isanquenatineri Moishishi ojatapinitantajeri Maria onquemisante. Aisati ocamantaqueri Tasorentsi:

—Jerica notomi, nocoaque irantasanotempiro paitarica picoacaaqueriri.

²⁵ Ari itimi anta Jerosarequi shirampari pajitachari Shimeo. Quemisantasanotatsiri ini, cameetsa isaviqui, iquemisantasanotaquero Ishire Tasorentsi. Aisati yaamaari Quirishito: yora veshireacaajeitearineri maaroni joriopee.

²⁶ Ocamantaqueri Ishire Tasorentsi: "Eirotsitarica picami, pineavaqueri Quirishito: yora intianqueri Avincatsarite".

²⁷ Irosati otiancantacari Shimeo anta ivancoqui Tasorentsi; impoitapaqueri Jose, Maria, jeri Jesoshi.

²⁸ Ineavaqueri Jesoshi, ijatashitaqueri, yatsomaavaqueri; icantiri Tasorentsi:

—Novincatsarite, tempa picameetsati,

²⁹⁻³⁰ noneaqueri oavisacotenaneri, yora picantaquenari. Meece moncarataca, tecatsi noncoyero aisati. Noquimoshiretaque, vetsicaquena noncame.

³¹ Queario, pitiancaqueri iroavisacojeiteri maaroni atiri:

³² irio iotacaajeiterine pashinipee atiri, iriveshireimentajeiteari maaroni joriopee quemisantajeitimpiri.

³³ Irosati yamenantanaca Jose, jero Maria, yoanaqueri cavaco; iquenqueshiretasanotiro icantaqueri Shimeo.

³⁴⁻³⁵ Aisati icantajeitaqueri:

—Nocoaque irineshinoncajeitempi Tasorentsi.

Aisati icantiro iriniro:

—Pamene, coajica oshequi piraacoteari pitomi: ipocaque ayojeitanteari avavisacojeita-
jea, iro cantaincha incarate oshequi ashaninca tseencajeiterineri: iroashinoncaajeitea
iriori. Irintiquea pashini ashanincapee, iroveshireimentasanojeiteari pitomi. Aparo
intseencajeiteri, pashini iroveshireimenteari, onconijatanteari iquenqueshirejeitiri.

Irootaque icantaquerori Shimeo.

³⁶⁻³⁷ Ari otimi aisati ivancoqui Tasorentsi tsinane pajitachari Aana: oshequi ocaman-
tapinitiri oshaninca irineane Tasorentsi. Ipajitani irini Janoeri: iriotaque ishanincani
Asere. Anteashipatasanotaque Aana: ocarataque osarintsite 84. Camajimentaaro
oni, ocarataque 7 osarintsi irosati icamantacari ojimeni. Meece osavicaque ivancoqui
Tasorentsi. Ocantani: quitaiteriqui, tsiteniriqui, oquenquetsatacapinitiri Tasorentsi;
oshequi opincatsataqueri. Te onquenqueshiretasanoteroji oayetari.

³⁸ Ari ojatashitaqueri Jesoshi iroori. Ocantaqueri Tasorentsi:

—Ariove, noneaqueri narori.

Aisati ocantajeitiri oshaninca:

—Jerica yoca, iriotaque oavisacojeiterineri ashanincapee: maaroni aamaajeitariri.

³⁹ Ari imataquero Jose aisati Maria maaroni isanquenataqueri Moishishi: tempa isan-
quenatacairi Avincatsarite. Impoiji ipiajeitanaja Nasaretequi: timatsiri Carireaquei.

Evancariquera Jesoshi, ipianaja ivancoqui Tasorentsi.

⁴⁰ Ari iqueveanaque Jesoshi, aisati ishintsitanaque, aikuero ijatanaque iotasano-
tanaque, yanaacotiri ijananequiririnte. Oshequi ineshinoncataqueri Tasorentsi.

⁴¹ Ari ijatapinitiri anta Jerosarequi, itsipajeitari Jose aisati Maria. Aitaque ijatapinitiri
maaroni osarintsi ariorica omoncaratapaaca quitaiteri Yavisantaneri.

⁴² Ari ocarataque irosarintsite Jesoshi 12, ijajeitanaji aisati.

⁴³ iquimoshireventaqueri Tasorentsi. Pashini quitaiteri ipiajeivetanaja maaroni ishan-
inca, iro cantaincha isavicanaque Jesoshi Jerosarequi apaniro. Te irioveteari ishaninca,

⁴⁴ yaamaashivetacari itsipajeitanajari ishanincapee pashini. Ari ishaaviniji icoa-
coayevetacari ishanincaqui,

⁴⁵ iro cantaincha te irineajeriji. Irosati ipiantanaja Jerosarequi, icoacoayevetajari,

⁴⁶ ocarataque mava quitaiteri. Impoiji ineapaajiri ivancoqui Tasorentsi: icarajeitiri
oametantayetsiri. Iquemisantayetiri yoametantayetiri, aisati isampijeitiri paitapeerica.

⁴⁷ Yoajeitanaqueri cavaco atiripee, icanti:

—Pamenerite evancarica: oshequi iotantari, cameetsa yacanaqueri yora oametantatsiri,
te incomitearoji.

⁴⁸ Aisati yoapaqueri cavaco Jose, jero Maria. Ocantiri iriniro:

—Notiomi, ¿paitaquea pimanapitsatantanari? Pamene, nocaratiri pirtsori nocoacoayeveaquempi. Oshequi nocoiteaquempi.

⁴⁹ Yacanaquero:

—¿Paita picoacoayetantanari? Tempa piote nocoasanaque nosavique ivancoqui Apa.

⁵⁰ Iro cantaincha te inquemajeitavaqueriji icantavetacariri.

⁵¹ Impoiji yoijajeitanajiri, ipiajeitanaja Nasaretequi. Icantani iquemisantaqueri, tecatsi incantea impiatsateari. Irointi Maria oshequi oquenghshiretaquero maaroni oca oneayetaqueri.

⁵² Aiquero ijatati iotasanaque Jesoshi, yantearitanaque. Yora Tasorentsi inintaqueri itomi; aisati ishanincapee iriori, inintajeitaqueri Jesoshi.

3

Intantacarori Joa iquenquetsati.

(Mt. 3.1-6; Mr. 1.1-6; Joa 1.19-28)

¹ Ocarati meeca 15 osarintsi ipincatsariventajeitiri maaroni oromasati yora Tiverio Shisari. Ipincatsariventiri joreasati Pontsio Pirato. Yora Eroreshi ipincatsariventiri carireasati; irinti irirenti, Jiripo, ipincatsariventiri itoreasati aisati taraconitiresati. Aisati yora Irisania ipincatsariventiri avirenesati.

² Aisati meeca ipincatsariventajitiri saserotepee Anashi aisati Caijashi. Ari itimaqueri Joa, itomi Sacariashi, anta caaraiteriqui. Icantiri Tasorentsi:

—Nocoaque meeca pinquenquetsatacyeri pishaninca, timatsi nocoaque pincamantajeiteriri.

³ Ari iquenaquenayetanaque Joa Joriraniqui, icantajeitiri ishaninca:

—Pinquenqueshirejeitea, eiro piquempetajatsi peerani, impoiji incavintsaajeitempi Tasorentsi: eiro iquenqueshireacotajimpitrotsi pantajeiveitaniri. Impoijiquea novaotisaajeitempi iriotanteari pishaninca pavisacotaji.

⁴ Imoncarataquero Joa icamantacotitariniri peerani Isayashini: “Anta caaraiteriqui intime coajica quenquetsatacyerineri ishaninca. Incamantajeiteri ishaninca: ‘Coraque Avincatsarite, pamenaajeiteri, paamaajeiteari. Pincameetsatanaque irineacameetsatantapeempiri. Ariorica pincameetsatanaque, pinquempetearo avotsi cameetsatatsiri inquenanteari Avincatsarite: poameetsatero irineacameetsatantearori. Pintampaticatero,

⁵ pijayero otsateni, pinquiaarantajero toncaaripee, pintampaticatajero maaroni tipiyetatsiri, pintijayetajero ovintenipee.

⁶ Impoiji maaroni atiri irineajeitavaqueri oavisacojeiterineri intianqueneri Tasorentsi’”.

Icantayetiriri Joa ishaninca.

(Mt. 3.7-12; Mr. 1.7-8; Joa 1.19-28)

⁷ Ari ijatashjeivetacari Joa oshequi atiri irivaotisaajeiterime. Jeroca icantavaqueriri:

—Avirojeitaque camaari: oshequi pamatavitantajeiti, te pincameetsajeiteji. Te pincoajeiveteaji pijate Sharincaveniqui, iro cantaincha te pinintasanoteji pinquemisanterit Tasorentsi, irootaque picoantavetacari pivaotisaajeiteame.

⁸ Ariorica pinquenqueshirejeitea pimpashinitantajeiri, pintime cameetsa iriojeitan-teari itsipapee queario picantaque. Eiro picantashitatsi: “Noshanincatacari Avaramani, irootaque niotantacari noavisacotajea”. Pamatavitaja avisati. Incoaquericame Tasorentsi, irimatero intasonquerome oca mapica, impeajerome atiri, oshanincata-jeirime Avaramani, iro cantaincha eiro avisacotitsi iroori. Patsipetashitaca pishanincave-tacari Avarama: piquempetarocari mapi.

⁹ Piquempajeitacaro aisati inchato. Iro cantaincha irotaintsi inchaquitero Tasorentsi inchato, imponquitireajero aisati. Terica oncameetsateji oitsoqui, inchaquitero, intaasan-otajero, pomein. Piquempetarocari inchato caari cameetsatatsi oitsoqui: yojoquimpicari Tasorentsi.

¹⁰ Ari isampijeitiri:

—¿Paita picoiri nantajeiteri?

¹¹ Icantiri:

—Otimirica apite piitsaare, pimpaaranteri ashinoncaincari aparato. Otimirica oshequi poari, pimpaaranteri aisati ashinoncaincari. Pincavintsaantapinite.

Irootaque icantapinitiriri Joa.

¹² Aisati ijatashitaqueri Joa aayetiriri quirequi: yainiri yora oromasati, oshequi yamatavitiri aisati ishaninca. Ijatashjeitiri, icoaque irivaotisaajeitavaqueri, isampitapa-queri:

—¿Paita nanteru piotantenari queario noquemisantaque?

¹³ Ari icantavaqueri:

–Eiro paashititaritsi iirequite pishaninca, irointi pimoncaratero icantaquempiri oromasati.

¹⁴ Aisati ijatashijeitaqueri soraro, isampitaqueri:

–¿Paita nanteri narori?

Ari icantavaqueri:

–Eiro piquishiritsi atiri paapitsatanteariri iirequite, aisati eiro picantacotashitaritsi paitanteariri iirequite. Moncaratata ipinataquempiri pivincatsarite, eiro picoitsi aisati.

¹⁵ Ari yaamaajeitari Quirishito, ijatashijeiveta irotaintsi irareetea. Iquencheshirejietiri: “Iriorica Joa Quirishito”.

¹⁶ Iro cantaincha icantajeitaqueri Joa:

–Novaotisaajeitaquempi nijaqui: te ompomerentsiteaji. Coajica impoque Avincatsarite irinti, oshequi nopincatsataqueri, notseencia narori. Intiancajeitaqueree irinti Ishire Tasorentsi, quiso oajeitee, oameetsajeitee.

¹⁷ Coajica irinashitacayeari cameetsatsiri aisati caari cameetsatsi. Oquempetaca arori anashitacaaro oitsoqui panquirentsi, aisati anashitacaaro osapentairoqui. Aquempoyeajiro oitsoqui, atairo osapentairoqui. Aisati inquempajeitee Avincatsarite arori: incavintsajeiteri cameetsajeitsiri, iroashinoncaajeiteri caari cameetsajeitsi.

¹⁸⁻²⁰ (-)

Ivaotisataca Jesoshi.

(Mt. 3.13-17; Mr. 1.8-11)

²¹⁻²² Ari ivaotisaajeitaqueri Joa oshequi atiri, aisati ivaotisataca Jesoshi, irosati iquenchetsatataantacari iriri. Omapocanaca aniireashitapaqueri Ishire Tasorentsi, oponeaca inquitequi. Oshiapaaqueri sampaquiti. Aisati iquemajeitaquero icantaqueriri Tasorentsi: –Avirotaque notomi nonintasanotiri. Oshequi noveshireimentaquempi.

Yoiminqeacantaqueri Eroreshi Joa.

(Mt. 14.3; Mr. 1.14; 6.17)

(v 18) Aitaque icanta Joa: icamantapinitiri atiri incameetsatanaque, aisati icamantiri jaoca incantajeiteari iroavisacojeitantajeari.

(v 19-20) Aisati icantaque:

–Te oncameetsateji yantayetiri Eroreshi. Yaavetaro irirenti Eroriashi, iro cantaincha yaitaqueri Eroreshi. Ainiro oshequi pashini caari cameetsatsi yantayetiri.

Ari iquisanaca Eroreshi. Ipincatsariventajeitiri carireasati, irotaque imatantacarori yaacantaqueri Joa, shepi, yoiminqeacantaqueri. Aiquero ijatatii yantanaquero catsini caari cameetsatsi.

Isanquenatiro ivajiropee ishanincani Jesoshi.

(Mt. 1.1-17)

²³⁻³⁸ Peerani yovetsiquiri Tasorentsi Aran.

Iri itomini Aran ipajitani Sete.

Iri itomini Sete ipajitani Enoshi.

Iri itomini Enoshi ipajitani Cainama.

Iri itomini Cainama ipajitani Marereri.

Iri itomini Marereri ipajitani Jarete.

Iri itomini Jarete ipajitani Enoco.

Iri itomini Enoco ipajitani Matosara.

Iri itomini Matosara ipajitani Arameca.

Iri itomini Arameca ipajitani Noe.

Iri itomini Noe ipajitani Seme.

Iri itomini Seme ipajitani Aratajara.

Iri itomini Aratajara ipajitani Cainama.

Iri itomini Cainama ipajitani Sara.

Iri itomini Sara ipajitani Evere.

Iri itomini Evere ipajitani Jarareque.

Iri itomini Jarareque ipajitani Aracao.

Iri itomini Aracao ipajitani Seroco.

Iri itomini Seroco ipajitani Nacoro.

Iri itomini Nacoro ipajitani Tare.

Iri itomini Tare ipajitani Avarama.

Iri itomini Avarama ipajitani Isaca.

Iri itomini Isaca ipajitani Jacovo.

Iri itomini Jacovo ipajitani Jora.
 Iri itomini Jora ipajitani Jareshi.
 Iri itomini Jareshi ipajitani Eseromi.
 Iri itomini Eseromi ipajitani Arini.
 Iri itomini Arini ipajitani Aranini.
 Iri itomini Aranini ipajitani Aminarava.
 Iri itomini Aminarava ipajitani Nasono.
 Iri itomini Nasono ipajitani Sara.
 Iri itomini Sara ipajitani Voso.
 Iri itomini Voso ipajitani Jovere.
 Iri itomini Jovere ipajitani Jese.
 Iri itomini Jese ipajitani Iraviri.
 Iri itomini Ivaviri ipajitani Natama.
 Iri itomini Natama ipajitani Matata.
 Iri itomini Matata ipajitani Mena.
 Iri itomini Mena ipajitani Merea.
 Iri itomini Merea ipajitani Eriaquimi.
 Iri itomini Eriaquimi ipajitani Jonama.
 Iri itomini Jonama ipajitani Jose.
 Iri itomini Jose ipajitani Jora.
 Iri itomini Jora ipajitani Shimeo.
 Iri itomini Shimeo ipajitani Irevi.
 Iri itomini Irevi ipajitani Matata.
 Iri itomini Matata ipajitani Jorimi.
 Iri itomini Jorimi ipajitani Eriyesere.
 Iri itomini Eriyesere ipajitani Jesoshi.
 Iri itomini Jesoshi ipajitani Ere.
 Iri itomini Ere ipajitani Eremarama.
 Iri itomini Eremarama ipajitani Cosama.
 Iri itomini Cosama ipajitani Ari.
 Iri itomini Ari ipajitani Merequi.
 Iri itomini Merequi ipajitani Neri.
 Iri itomini Neri ipajitani Saratiyeri.
 Iri itomini Saratiyeri ipajitani Sorovaveri.
 Iri itomini Sorovaveri ipajitani Eresa.
 Iri itomini Eresa ipajitani Joanana.
 Iri itomini Joanana ipajitani Jora.
 Iri itomini Jora ipajitani Joseca.
 Iri itomini Joseca ipajitani Semeini.
 Iri itomini Semeini ipajitani Matatiashi.
 Iri itomini Matatiashi ipajitani Mata.
 Iri itomini Mata ipajitani Nacai.
 Iri itomini Nacai ipajitani Eshiri.
 Iri itomini Eshiri ipajitani Naomo.
 Iri itomini Naomo ipajitani Amoshi.
 Iri itomini Amoshi ipajitani Matatiashi.
 Iri itomini Matatiashi ipajitani Jose.
 Iri itomini Jose ipajitani Janai.
 Iri itomini Janai ipajitani Merequi.
 Iri itomini Merequi ipajitani Irevi.
 Iri itomini Irevi ipajitani Mata.
 Iri itomini Mata ipajitani Eri.
 Iri itomini Eri ipajitani Jose.
 Iri itomitsori Jose ipajita Jesoshi, iro cantaincha ijijeivetari ishaninca irio itomisanori.
 Ari ocarataque irosarintsite Jesoshi 30, intantacaroniri iquenquetsatacaajeitiri ishaninca.

4

Yora camaari irantacayerime Jesoshi caari cameetsatatsi.

(Mt. 4.1-11; Mr. 1.12-13)

¹ Ari ijatanaji Jesoshi, iponeanaja Joriraniqui. Quiso oanaqueri Ishire Tasorentsi, aanaqueri caaraiteeriqui.

² Ocarati 40 quitaiteri itimaque anta, tecatsi iroyeari: aasanoaqueri itashe. Ari maaroni quitaiteri ijatashitaqueri yora Satanashi, icoaveta irantacayerime caari cameetsatsi.

³ Icantavetapaacari:

—Avirorica itomi Tasorentsi, jentsite: pintasonquero oca mapica, pimpeero tanta, poyearo.

⁴ Yacanaqueri Jesoshi:

—Isanquenatini peerani Moishishi: “Ocameetsati avajeitearo avanaro eiro acamanta, iro cantaincha ocameetsatanoti anteneri Tasorentsi maaroni icoacaajeitaqueeri”.

⁵ Aisati yanaaqueri antearoqui toncaari, ijicotapaqueneri maaroni quipatsi,

⁶ icantiri:

—Pincoaquerica noncantajeiteri maaroni savicajeitatsiri impincatsajeitempi, iraa-cameetsajeitempi. Tempa narotaque pincatsariventajeitiriri maaroni,

⁷ ariorica noncanteri impincatsajeitempi avirori, ari impincatsajeitempi. Apatiroquea nocoaque pintiyeroashitena, pimpincatsatena narori.

⁸ Yacanaqueri:

—Ocameetsati ampincatsateri Tasorentsi, apaniro ampincatsateri irinti. Irootaque ocantiri irineane.

⁹ Impoiji yaanjiri Jerosarequi, anta otataroqui ivanco Tasorentsi, antoo jenoqui. Icantiri:

—Avirorica itomi Tasorentsi, jentsite: pimpariye, eiro picamitsi.

¹⁰ Tempa ocanti Sanquenarentsi: “Irishentempi inampirepee Tasorentsi, inquem-poyeaquempi”.

¹¹ Ainiro aisati pashini isanquenatiniri: “Ari irancatsatavajempi iriori, eiro ishinetimpitsi pimpariye mapiqui”. Pineaquero, ¿paita pitsaroantacari?

¹² Yacanaqueri:

—Aisati ocanti Sanquenarentsi: “Eiro pineantaritsi Tasorentsi: yoasanquetaimpicari”.

¹³ Ari iotaque camaari tecatsi incanteri Jesoshi, ijatanaji. Iro cantaincha ari irampiitajeri coajica.

Ipianaja Jesoshi Carireaquei.

(Mt. 4.12-17; Mr. 1.14-15)

¹⁴ Ari impoiji ipianaja Jesoshi Carireaquei, oshequi omatacaaquei Ishire Tasorentsi. Te osamaniteji iquemacojeitaqueri maaroni savicajeitatsiri anta.

¹⁵ Icantajeiti:

—Tempa icameetsati Jesoshi; ariorica apatojeita, tempa cameetsa yoamejeitaquee.

Yareetanaja Jesoshi Nasaretequi.

(Mt. 13.53-58; Mr. 6.1-6)

¹⁶ Impoiji ijatanaji Jesoshi Nasaretequi, aitaque yantearitaqueri inampisanoriqui. Ari saavaroqui ijatanaque anta yapatotapinijeitantari, icantani ijatapiniti saavaroqui. Tsompoina icatiapaaca, irineanateneri ishanincapee irineane Tasorentsi.

¹⁷ Ipeetavaqueri isanquenareni Isayashini. Yampinaicareavaquero, yamenaquero irineanateneriri. Ocanti:

¹⁸ “Quiso oaquena Ishire Avincatsarite, otiancaquena noncamanteri ashinon-caayetachari jaoca incanteari iroavisacotantajeeri. Noncamanteri maaroni iperanatacari camaari noimpacoventajeitajeri. Namenacaajeri aisati caari amenatsi. Aisati noimpacoventajeri maaroni yoashinonqueeyetiri.

¹⁹ Aisati noncamantajeiteri atiri irotaintsi nontasoncacoventeri”.

²⁰ Ari yampinaicajiro sanquenarentsi, yoipiajiniri ipajiri, impoiji isavicanaji. Yame-nashejeitanaqueri, sorerere.

²¹ Icantajeitiri:

—Queario meeca nomoncarataquero oca noneanataquemperi, oquenquetsacotana.

²² Ari inecameetsajeivetacari Jesoshi, aisati inecameetsajeitaquero icantaqueriri. Aisati isampitavacaaca:

—¿Tempa irio itomi Jose?

²³ Icantaqueeri:

—¿Pitseencaquenampa? Naamaaca pincantename: “Jentsite, poavisacotajeriqueti pishanincasanori avirori. Noquemacotaquempi pitasoncantaque anta Caperenaoui, meecaquea pintasoncantaqueti aisati aca anampiquica”.

²⁴ Iro cantaincha noncamantempi pamejeita pitseenquiri pishanincasanori: te pitejei pimpincatsateri iriori, irintiquea pashini pipincatsati.

²⁵⁻²⁶ Queario oca noncamantempiri: peerani itimantacari Iriashini, piojeiti te ompariyeji incani. Peerani osarintsitaqueni. Ocarati mava osarintsi aisati 6 cashiri, te

ompariimateji incani catsini. Itasheajeitanaque maaroni savicajeitatsiri quipatsiqui. Otimini oshequi camajimentaaro aca, iro cantaincha itianquiri Tasorensi Iriashini pashiniqui quipatsi opajita Shironi. Itianquiri irijatashitero camajimentaaro savicatsiri anta Sarepetaqui. Itasoncapinitiniro oari, ipapinitiro. Irointi savicatsiri aca inampiqui, te intansonqueneroji.

²⁷ Aisati, peerani itimantacari Iriseoni, itimini aca oshequi patsaincari, iro cantaincha tecatsi iroavisacote. Apaniro irinti yoavisacotiri shiriasati pajitachari Nama.

²⁸ Iquemajeitancacarori apatojeitainchari, iquisajeitanaca.

²⁹ Ari icatiajeitanaca, yaaajeitaqueri, shepi. Yaanaqueri anta otsapitapaa nampitsi, otiminta imperita. Impishoncajeiterime, iroariyerime,

³⁰ iro cantaincha ipeimotanajari, ijatanaji.

Ipianaja Jesoshi Caperenaogui.

(Mr. 1.21-28)

³¹ Ari ipianaja Jesoshi Caperenaogui, ora carireaquiniri. Saavaroqui yoamejeitajiri aisati atiri.

³² Yoajeitanaqueri cavaco, icantajeiti:

—Tempa ocameetsati oca yoametaqueeri. Ipincasariti: iotasanaotaquero oca yoametaqueeri.

³³ Ari itimi anta yapatotapinijeitanta aparoni shirampari neiriri camaari. Antearojenca icajemacotavaqueri:

³⁴ —Aviro Jesoshi poneachari Nasaretequi. Niotaquempi: aviro itomi cameetsari Tasorensi. ¿Paita pipocashitantanari? ¿Picoavetampa pojoquena?

³⁵ Ishintsitsataqueri Jesoshi, icantiri:

—Pimajerete. Piniyantareanajeri yoca shirampari.

Ari ipishoncanaqueri shirampari quipatsiqui, tiricn, irosati ijanirotantanajari. Tecatsi oajerine shirampari, tecatsitanaji.

³⁶ Yoajeitanaqueri cavaco aisati icantajeiti:

—Pineaqueri: apatiro ineanataqueri camaari, irosati ijatantanaja. Oshequi ipincasariti, oshequi itasoncanti.

³⁷ Ari iquemacojeitaqueri Jesoshi maaroni savicajeitatsiri.

Yoavisacotiro Jesoshi irairo Petero.

(Mt. 8.14-15; Mr. 1.29-31)

³⁸ Impoiji ijatanaji Jesoshi ivancoqui Shimo. Icantajeitavaqueri:

—Ojoquiitaca irairo Shimo, oshequi oyatsiire. Poavisacotajero.

³⁹ Icatiapaaca onampinaqui, icantaquero:

—Ari ompeanajea piatsiire, pavisacotaje.

Irosati opeantanaja oyatsiire, maani; ocatianaja, opajeitajiri yoari.

Yoavisacoyetiri itsipapee atiri.

(Mt. 8.16-17; Mr. 1.32-34)

⁴⁰ Ari iqueanaji catsirincaiteri. Yameetaqueneri Jesoshi oshequi mantsiyetatsiri, onashiyeta imantsiare. Ari ipamijeitavaqueri, yoavisacojeitavaqueri.

⁴¹ Impoiji ipocajeiti oshequi yoitsavianquiri camaari, icajemajeitapaaque:

—Aviro itomi Tasorensi.

Iojeitaque camaari iriotaque Quirishito, irootaque icantantacariri:

—Pimajerete, eiro picamantacotanatsi.

Yovaanaja Jesoshi pashinipeequi nampitsi.

(Mt. 4.23; Mr. 1.35-39)

⁴² Ari oquitaitetamanaji ijatamanaque Jesoshi anta ocaratetapaaque. Icoacoajeitaqueri atiripee. Ineantajariri, icantajeivetapaari:

—Eiro pijatajitsi, pisavique aca Caperenaogui.

⁴³ Iro cantaincha icanti Jesoshi:

—Eiro nosaviquitsi. Nocoaque noncamanteri itsipapee atiri ipincasariventajeitiri Tasorensi, tempa cameetsa iriojeitero iriori. Irootaque itiancantanari Apa.

⁴⁴ Ari iquenaquenayetanaque Jesoshi anta Joreaqui, iquenquetsatacajeitiri atiri anta pancotsipeequi yapatojeitantari.

5

Iquitsatiri Shimo oshequi shima catsini.

(Mt. 4.18-22; Mr. 1.16-20)

¹ Ari pashini quitaiteri iquenquetsati Jesoshi anta otsapijaqui incajare pajitachari Jene-sarete. Itsitacajeitapaacari atiripee, icoajeitaque inquemero irineane Tasorentsi.

² Ari ineaquero Jesoshi apite pitotsi anta otsapijaqui. Tecatsi tetearone: yora quitsat-siri iquiviro iitsarite anta.

³ Itetaca Jesoshi ivitoqui Shimo, icantiri:

—Shimo, pintianquero capichaji.

Ari isavicaque pitotsiqui nianquijamaji, yoamejeitiri apatojeitainchari otsapijaquinta.

⁴ Ari osamanitanaque, itsoncanaquero yoamejeitaqueri. Icantiri Shimo:

—Pijate anta osaanajataquenta, pinquitsate.

⁵ Yacanaqueri:

—Oametantatsiri, noquitaitetacotaque noquitsavetaca incaranqui, tecatsi naimete catsini. Meecaquea picantaquena, aitaque nojataque nonquitsajeitajanteta aisati.

⁶ Ari iquitsataji: yaasanoataque shima, oshequi catsini: monquire, monquire. Jaaca inaca, irotaintsi ompeshe quitsari.

⁷ Icajemaqueri ishaninca savicatsiri pashiniqui pitotsi:

—Caateve, pamitacojeitenave.

Ari ipocacotaque, itetacotaqueri shima apite pitotsi, tero, tero; irotaintsi ontsiye.

⁸⁻¹⁰ Icarati oshequi shima iquitsatiri, irootaque yoantanacari Petero cavaco; aisati iquempejeitaca itsipapee: jeri Santiago aisati Joa. Iriotaque yoca itomipee Severo. Iriotaque icaratapinitiri Shimo iquitsatapinitiri shima. Itiyeroashitanacari Shimo Petero, icantiri:

—Novincatsarite, cameetsa pijataje. Te noncameetsateji narori catsini, eiro pitsi-patanatsi.

Yacanaqueri Jesoshi:

—Eiro pitsaroacaanatsi. Noncamantempi: oquempetaca peerani piquitsatapinitiri shima, nocoaque meeca pinquemisantacaapinijeiteri atiripee.

¹¹ Ari yaatacojeitapaaji, irosati yojocajeitantanajaro ivitopee, iitsaritepee, maaroni. Yoijajeitanaqueri Jesoshi.

Yoavisacotiri Jesoshi patsaatsiri.

(Mt. 8.1-4; Mr. 1.40-45)

¹² Itimi anta nampitsiqui shirampari patsaasanotsiri: otsoncaqueri ivatsaaro, opit-cashaqueri maaroni itseempequiqui. Ineantavacariri Jesoshi, itiyeroashitavacari, icantiri:

—Novincatsarite, tempa pitasorentsi: pincoaquerica, poavisacotena.

¹³ Ari yacotashitaqueri, ipamitiri. Icantiri:

—Nocoaque. Pavisacotaje.

Irosati opeantanaja ivatsaaro.

¹⁴ Aisati icantiri:

—Eiroyea picamantacotanatsi. Meeca pijate saserotequi, pinijaapeeri iriotanteari pavisacotaji. Pimatero icantiniri Moishishini: paanajeneri saserote pivira intayeneri Tasorentsi iriojeitanteari atiri pavisacotaji.

¹⁵ Iro cantaincha aiquero ijatatii icamantacojeitaqueri Jesoshi. Icarati oshequi catsini jatashijeivetacariri inquemisanterime, aisati pashini icoajeiveta iroavisacoterime.

¹⁶ Ari ijatanaque iriori anta caaraiteriqui, iquenquetsatacairi iriri.

Yoavisacotiri Jesoshi caari shevatacha.

(Mt. 9.1-8; Mr. 2.1-12)

¹⁷ Ari pashini quitaiteri yoametantaji Jesoshi pancotsiqui. Isavicajeiti quempeji variseopee aisati oametantirori sanquenarentsi: iponeayetaca oshequi nampitsipeequi, anta Carireaquí, Joreaquí, aisati iponeayetaca Jerosarequi. Otimasanoti itasorenca Avincatsarite imatantarori yoavisacotantaque.

¹⁸ Jeritapaaque shirampari, icompitacojeitapaqueri caari shevatacha. Icoajeiveta iranaquerime anta isavicaquenta Jesoshi, iro cantaincha tecatsi inquenapee, iticajeit-queri atiripee.

¹⁹ Tecatsi incantea inqueapee, irootaque yataitacantacariri otataroquinta pancotsi. Imorontaquero, impoiiji yoaniitacotaqueri anta inaquenta Jesoshi.

²⁰ Iotavaqueri iriori ishirejeitacari, irootaque icantantavacariri:

—Noshaninca, ainiro pantane, iro cantaincha eiro noquishimentimprotsi, irointi non-cavintsayempi: eiro noquenqueshiretacotimprotsi aisati, irointi noavisacotempi.

²¹ Ari icantavacaajeitaca variseopee aisati oametantirori sanquenarentsi:

—Piquemanirotaqueri: ijitasorentsinirota. Apaniro irinti Tasorentsi yoavisacotanti.

²² Ari iotaquero Jesoshi iquenqueshirejeitiri, irosati icantantanacari:

—¿Paita picantantari: “Ijitasorentsinirotaca”?

²³ Pamene, nocantaqueri: “Eiro noquenqueshireacotajimpitrosi pantane, irointi noavisacotajempi”. Meeca pitseencajeitaquena. Tempa opomerentsivetaca naniitacaajeri yoca. Eirorica yaniitajitsi, ari pintseencasanojeitena, pishirontimentajeitena.

²⁴⁻²⁵ Noponeaca narori inquitequi, natiritapaaque. Nocoaque piojeite ainiro nota-sorencia, aisati nomataquero nocavintsairi antirori caari cameetsatsi, noavisacojeitiri.

Ari icantiri caari shevatacha:

—Jentsite, pincatianaje, paanajero pinariantari, pijataje pivancoqui.

Ari ineajeitavaqueri icatianaja, yaanajiro inariantari, ijatanaji ivancoqui. Icantanaque:

—Ariove, icameetsati Tasorentsi.

Ari icantiri saserotepee:

—Pineaquero, nomataquero caari pineapiniti, irootaque piotanteameri oshequi nota-sorentsitaque. Aisati ari nomatajeri naanajeri coajica inquitequi.

²⁶ Ari yoajeitanaqueri atiripee cavaco, icantajeiti:

—Tempa icameetsatsanoti Tasorentsi, ipincatsaritanoti. Te aneapiniteroji oca ane-aqueri meeca.

Yojatiri Jesoshi Irevi, yora apatovetanariri pincatsari quirequi.

(Mt. 9.9-13; Mr. 2.13-17)

²⁷ Impoiji isoquijanaji Jesoshi, irosati ineantapaacariri Irevi, yora aitayetiriri ishaninca iirequite, impoiji ipiri pincatsari. Isaviqui anta isanquenatapiniti. Icantapaaqueri:

—Tsame, poijatanaquena.

²⁸ Ari yoipacanaquero isanquenatacoyetiri quirequi, icatianaca, yojatanaqueri Jesoshi.

²⁹ Impoiji ijataque Irevi ivancoqui, icajemacantaqueri itsipapee vionquiniriri pincatsari iirequite, pashini ishanincapee, Jesoshi, maaroni. Yoacaajeitacari maaroni.

³⁰ Ipocaque saserotepee aisati yora oametantirori sanquenarentsi. Icantapaaqueri iroamere Jesoshi:

—Pamenerite Jesoshi: icarajeitakeri vionquiriri quirequi, yoajeita, irajeiti. Jeri aisati itsipapee caari cameetsayetatsi. Te oncameetsateji incarajeiteri iroajeitea.

³¹ Ari icantiri Jesoshi:

—Yora joquuitachari iriotaque coatsiri iravintea. Yorari caari joquuitacha te incoyeji aavinterineri.

³² Iriotaque nopocashitiri caari cameetsatsi niotacantajeariri eiro yantapinitajirotsi aisati caari cameetsatsi. Te nompocashiteriji jivetachari icameetsati.

Isampitiri saserote: “¿Paita caari ititanta poamere?”

(Mt. 9.14-17; Mr. 2.18-22)

³³ Ari icantiri saserote Jesoshi:

—Pamene ititapinita iroamere Joa, aisati iquenquetsatacapinitiri Tasorentsi: aisati iquempejeitacari iroamere variseo. Irinti poamerepee, te intiteaji: yoapinijeita, irapini-jeiti.

³⁴ Ari yacanaqueri:

—Oquempetaca ariorica iraye shirampari ijina, incajemajeiteri ishanincapee in-quimoshireventajeitanteariri. Ariorica irareejeitaquea, ¿arimpa intijeitapeempa? Eiro. Aisati narori, nocarajeitiri meeca noamerepee: ¿paita nontitacanteariri?

³⁵ Ariorica irojocajeitanajeri ishaninca aatsiri ijina, impoijiquea intijeitanaquea. Aisati nonquempetea narori: ariorica coajica noncame, impoiji iroashiretacojeitanaquena noamere, irosatiquea intijeitanaqueari iriori.

³⁶ Aisati, otimirica piitsaare iroaquerari, te pintsereroji pimpataquero peesatotaintsiri pimaatsara. Aisati, ariorica poavitajerome, eiro omoncaratavacaatsi. Aisati pinquiva-gerorica ontsitiamatanaque iroaquerari, aisati antsivianaque peesatotaintsiri. Otserea-coticari iroaquerari.

³⁷⁻³⁸ Tempa apeantantaro iroaquerajari pearentsi imeshinaqui iroaquerari, impoiji antsitacotaquero eiro aparajatantatsi. Ariorica oshimoretanaque, aravoncajatanaque, otapiasanaqueri imeshina. Iroaquera ini, eiro ipesacotitsi, aisati eiro aparajatatsi oja. Irooricame ampeantantajearome pearentsi iroaquerajari peesatitatsiri imeshina, tempa iraravoncanaque, intoncanaque: ton. Aitaque intserenaque, aisati amparajatanaquea iroaquerajari.

³⁹ Tempa ariorica irajeitero peesatojaintsiri pearentsi, eiro acoirotsi irero iroaquerajari.

6

Icantavacaimentaro saavaro.

(Mt. 12.1-14; Mr. 2.23-3.6)

¹ Ari osaavaro taque, iquenanaque Jesoshi tiricomashiqui, itsipatanacari iroamere. Yora iroamere yaviijeitaquero oitsoquipee, yamirocaitaquero otaqui, yojocaquero. Irointi oitsoqui, yoajeitacaro.

² Ineajeitaqueri variseopee, icantiri:

—Te oncameetsateji oca pantiri. Tempa irointi oca saavaro, amaoreajeitanti, eiro ataquireaitantarotsi meeca. ¿Paita pantantarori?

³⁻⁴ Yacanaqueri Jesoshi:

—Tempa pineanatiro isanquenatacotiriniri Iravirini. Aaqueri itasheni aisati itsipajeitari. Otimi anta ivancoqui Tasorentsi tanta yovetsiqueetiniriri Tasorentsi. Apaniro yoajeitaro saserotepee, te irishineteriji itsipapee iroyearo. Iro cantaincha yashinoncaaca Iraviri, irootaque ipantacariri tanta yora ivincatsarite saserote, aisati ipajeitaqueri maaroni oijajeitiriri. Pineaquero, te irininteji iroashinoncayeri.

⁵ Noponeaca narori inquitequi, natiritapaaque: naro cantacantirori paitarica anteri saavaroqui.

⁶ Ari pashini saavaro ijatanaji anta yapatotapinijeita, yoametantapaaque. Itimi anta shirampari tsiricoipacori.

⁷ Yamenashetavaqueri oametantirori sanquenarentsi aisati variseopee, icoaque irioteri iroavisacotanterica saavaroqui. Icoaque incanteri ivincatsarite: “Noneaqueri Jesoshi yantaquero caari cameetsatatsi”.

⁸ Iro cantaincha iotaqueri Jesoshi iquenqueshirejeitiri. Icantiri tsiricoipacori:

—Caate, pincatiapee aca.

Ari icatianaca, ijatashitaqueri.

⁹ Icantajeitiri Jesoshi:

—Meeca nosampijeitempi. ¿Paita cameetsatatsiri antajeiteri saavaroqui? ¿Cameetsampa ancavintsayeri ashaninca? Terica, ¿picoaquempa avashinoncayeri? ¿Cameetsampa avavisacoteri ashaninca? Terica, ¿picoaquempa ayeri?

¹⁰ Yamenajeitaqueri Jesoshi, imajerenirojeitanaque. Ari icantiri:

—Pancote.

Ari yacotanaque, cameetsatanaji iraco.

¹¹ Ari iquisajeitanaca saserotepee. Isampitavacaanaa:

—¿Jaoca ancantiriri avacantanteariri?

Icoyeajeitaqueri Jesoshi iroamerepee.

(Mt. 10.1-4; Mr. 3.13-19)

¹² Pashini quitaiteri ijataque Jesoshi toncaariqui, iquenquetsatacairi iriri, iquitaitetacotapaaque.

¹³ Ari oquitaitetamani icoyeajeitaqueri iroamerepee. Icarataque 12 icoyeaqueri. Icoaque coajica intianqueri inquenquetsatacotanteariri. Jero oca ivajiropee:

¹⁴⁻¹⁶ Shimo (aisati ipajitiri Jesoshi: Petero), Antirishi (yora irirenti Shimo), Santiago, Joa, Jeripi, Varitorome, Mateo, Tomashi, Santiaco (yora itomi Arijeo), Shimo (icanteetiri aisati Seraroro), Jorashi (yora itomi Santiaco), aisati Jorashi Ishicariote (yora aacanterineri coajica Jesoshi). Aitaque ipajijeitari iroamere icoyeaqueri Jesoshi.

¹⁷ Impoiji yoirincapaaja anta opampaitetinta. Itiminta oshequi iroamerepee, aisati oshequi catsini pashinipee atiri: iponeajeitaca Joreaqui, Jerosarequi, Tiroqui, aisati Shiroqui. Otimi Tiro aisati Shiro arejiqui, anta otsapijaqui antearoja incajare. Ijatashijeitaqueri Jesoshi inquemisantajeitavaqueri, aisati icoajeitacoe iroavisacojeiteri mantsiaripee.

¹⁸ Ari yoavisacojeitaqueri yatajeaoncyetiri camaari.

¹⁹ Icoajeitacoe impamijeitapeeri, intasoncacoventanteariri iroavisacojeitanteariri.

Iquenquetsatacotaqueri Jesoshi quimoshirejeitatsineri.

(Mr. 5.1-12)

²⁰ Ari yamenanaqueri iroamere, icantiri:

—Ariorica pashinoncaavetaca meeca, pinquimoshiretanaque: aitaque impincatsariventajeitempi Tasorentsi, coajica.

²¹ Ariorica pitashevetaca meeca, pinquimoshiretanaque: aitaque inquemacajempi Tasorentsi, coajica. Ariorica poashirevetaca meeca, pinquimoshiretanaque: aitaque inquimoshiretacaajempi, coajica.

²² Ariorica inquisajeitempi atiripee, intianquempi, incantimatemp, incante te pincameetsateji. Ariorica inqishimentajeitempiro piquemisantana, iro cantaincha inquimoshiretacayempi Apa. Tempa noponeaca narori inquitequi, natiritapaaque.

²³ Ariorica inquisajeitempi, pinquimoshiretasanotanaque, pincantajeite: "Cameetsave". Tempa aitaque cameetsa impinatasanotemp Apa inquitequi. Queario yora intacantajeitaqueeri iquisajeitaquerini peerani yora camantacotiriniri Tasorentsi.

Iquenquetsatacotiri Jesoshi ashinoncachaneri coajica.

²⁴ Jero pashini aisati icantaqueriri Jesoshi:

—Iro cantaincha yora ashitaarantincari, iquimoshirementaro yashijeitari: moncarataca, iroashinoncayea irinti.

²⁵ Aisati iroashinoncayea quemarori yoari meeca: coajica inquemero itashe. Iroashinoncayea shirontajeitachari meeca: coajica incavintsajeitea aisati irirajeitea.

²⁶ Ariorica irineacameetsajeitempi maaroni atiripee, pashinoncayea coajica: tempa yora intacarori inecameetsajeitashitari yora amatavijeitiriri.

Icoaque Jesoshi aninteri quisajeiteeri.

(Mt. 5.38-48; 7.12)

²⁷ Aisati icantajeitaqueri:

—Pinquemisantajeitavaquena: pininteri avinti quisajeitimpiri, pincavintsayeri.

²⁸ Pincanteri Tasorentsi iramitacojeiteri maaroni cantimajeitimpiri, aisati maaroni quisajeitimpiri.

²⁹ Ariorica impasavorotemp pampatevoroqui, pishineteri impasavorotemp acaque-roca aisati. Ariorica iraa pitsatempiro poicoro, pimperita pashini piitsaare aisati.

³⁰ Ariorica iramanempiro paitapeerica, ari pimperi. Ariorica iraa pitsatempiro pipa-araro, eiro picoacotiritsi aisati.

³¹ Ariorica picoaque incavintsayempi itsipapee, ari pincavintsayeri avirori.

³² Ariorica pinintajeitiri maaroni nintajeitimpiri, tempa moncarataca: tecatsi incantea impinatemp Tasorentsi. Tempa ioti caari quemisantatsi inintiri nintiriri iriori.

³³ Aisati oquempetaca: ariorica picavintsairi cavintsajeitimpiri avirori, tempa aisati moncarataca. ¿Paita picoiri impinatempiri Tasorentsi? Aisati iriori caari quemisantatsi, incavintsairi cavintsajeitiriri iriori.

³⁴ Ariorica picoaque iroimpiajemp pipaqueriri pishaninca, tempa moncarataca: ¿Arimpa picoaque impajemp aisati Tasorentsi? Tempa aisati ipavacaa iriori caari quemisantatsi paitapeerica, aisati icoaque irovanayeneri iroimpiajeneri.

³⁵ Irootaque nocantantimpiri pincavintsayeri avinti quisajeitaquempiri, pincavintsante, pimpashiyeteari ashinoncaincari: eiro piquenqueshiretirotsi irimaterorica iroimpiajemp. Ariorica pantero oca, cameetsa: impinatasanotemp Tasorentsi, aisati intomintasanoeitempi. Cameetsa ipincatsariventanti anta jenoqui. Queario incavintsairi piatsajeitariri, yora caari cameetsajeitatsi.

³⁶ Incavintsantasanoti Apa: pinquempeteeri.

³⁷ Eiro paamaashitaritsi pishaninca, aisati eiro picantitsi: "Ainiro irantane", impoiiji eiro icantimpitsi Tasorentsi: "Ainiro pantane avirori". Eiro piquishimentiritsi pishaninca yantayetiri, irointi pincavintsayeri: impoiiji eiro iquishimentimpirotsi Tasorentsi pantayetiri avirori, irointi incavintsayempi.

³⁸ Ariorica pimpayeri ashinoncaincari coiteimoyetariri, aisati inquempetajemp iriori Tasorentsi: impayetempiro maaroni coiteimoyetaquempiri avirori. Te irimashitsateji: impasanotemp. Ariorica capichaji pincavintsante, aisati capichaji incavintsayempi avirori. Ariorica oshequi pincavintsantasanote, ari oshequi incavintsasaanotemp avirori.

Irootaque icantiriri Jesoshi.

Icoaque Jesoshi ancavintsayeri quisajeiteeri.

(Mt. 7.1-6, 15-23)

³⁹ Jeroca ishiacaaventiniriri aisati Jesoshi:

—¿Arimpa irimatero camarajaquiri irancatsatanaqueri iamarajaquiririnte? Eiro imatirotsi: tempa ari impariajeitaque omoroqui.

⁴⁰ Aisati iquempeta, yora iroamere te iranaacoteriji oametiriri ioti. Iro cantaincha ariorica irishitoriatasanote, ariorica irimoncarateari.

⁴¹ ¿Paita piquishimentantariri pishaninca yantayetiri? Panaacotasantotiricari avirori. Oquempetaca picantiri pishaninca: "Pitijaquitaca ovane quipatsi", iro cantaincha ainiro avirori pitijaquitacararo antearo inchato.

⁴² Arimpa pincanteri: "Jentsite, noshaninca, naajempiro pitijaquiro". Tempa pioti otimi inchato pashicajaquitauempiri avirori. ¿Jaoca pincanteari paantajeantariri itijaquiro

pishaninca? Pamatavitanti, pinquempetearime cameetsasatanotsiri. Pamene, pijivate pojuero antearora inchatora pashicajaquitaquempirira, impoiji pamenasanotanaje paantajejanariri itijaquiro pishaninca iriori.

⁴³ Jero oca pashini ishiacantiriniriri Jesoshi:

—Ariorica ocameetsati inchato, ocameetsati oitsoqui iroori. Aisati terica oncameetsateji inchato, te oncameetsateji oitsoqui iroori.

⁴⁴ Ariorica aneero oitsoqui inchato ayoti jaoca ocantari inchato iroori. Ariorica pincoaque chochoqui, zarimpa pijatashitero anta manitincanamashiqui? Eiro pijatitsi, tempa piotiro te oitsoquitantearoji chochoqui, iyera, ova, tecatsi catsini.

⁴⁵ Ariorica anquenqueshiretero cameetsatsiri, antayetero cameetsayetsiri. Ariorica anquenqueshiretero caari cameetsatsi, antayetero caari cameetsatsi. Queario, aneanantaro aquenqueshireyeteri.

⁴⁶ ¿Paita picantashitantavetanari: “Novincatsarite”? Te pinquemisantenaji.

Ivecarataquero icantajeitiriri.

(Mt. 7.24-29)

⁴⁷ Aisati icantiri Jesoshi:

—Meece noshicantempiri jaoca icantari quemisantanari. Iquemiro noneane, iquemisantasantaquero: yantajeitaquero maaroni nocantaqueriri.

⁴⁸ Ishiaqueri shirampari vetsiquirori ivanco. Iquishitaquero tsoompoina, irosati mapiqui aitaque yovecarataquerori. Ari oniri ominca mapiqui, oquisotantacari. Oparisanotaque incani, ooncanaca eni. Antearo catsini otatsincavetapaacaro, iro cantaincha te aaveeroji: quisotaque onaque mapi.

⁴⁹ Iro cantaincha yora caari quemisantana ishiaqueri shirampari vetsicavetarori ivanco, te intijacotasantoroji. Impoiji ooncanaca, aanaquero ivanco. Ojaraanaque, aanaquero, te aneajeroji.

Irootaque icantajeitiriri Jesoshi.

7

Yoavisacotiri Jesoshi inampire capitano.

(Mt. 8.5-13)

¹ Impoiji ipianaja Jesoshi anta Caperenaoqui.

² Itimi anta nampitsiqui aparo capitano. Oromasati ini, caari ini jorio. Ijoquuitaca inampire, irotaintsi incame. Inintasanotiri capitano inampire.

³ Iquemacotaqueri Jesoshi, itasoncantaque, irosati itiancantacariri jivatacaajeitiriri joriopee:

—Pincamantaiteri Jesoshi impocanaqueta iroavisacotenari nonampire.

⁴⁻⁵ Ari yareejeitapaacari, icantasanojeitapaqueri:

—Pijatashiteri. Icameetsatanoti yora capitanonta, oshequi inintajeitaquee arori. Yovetsicacantaqueenero pancotsi apatojeitantari. Cameetsa poavisacoteneri inampire.

⁶⁻⁷ Ari yojajaitanaqueri. Quempeji inapaaque, inajeitavaqueri pashini ishanincapee capitano, itianquiri. Icamantapaqueri:

—Jero oca icantaqueri noyapitanote: “Nopincatsasantaquero Jesoshi, iro caari notonquotantavacari. Notseencaja narosati, irootaque caari nocoanta impoque novancoquica. Niotaque incoaquerica iroavisacoteri nonampire, ari iravisacotaje.

⁸ Timatsi cantanari paitarica nanteri, aisati timatsi soraro notiancapinitiri. Noncanterica: ‘Pijate’, ari irijataque. Noncanterica: ‘Pimpoque’, ari impocanaque. Aisati noquempetiri nonampire iriori, ariorica noncanterica: ‘Jero oca panteri’, ari irantaquero”.

⁹ Iquemavaitiiri Jesoshi, yoanaque cavaco. Ari ipitsocashijeitacari oijajeitiriri, icantajeitiri:

—¿Piquemaquerompa oca icantiri oromasati? Oshequi ishiretaquena, te inquempejeariji ashanincapee arori.

¹⁰ Ari impoiji ipiajeitanaja ishanincapee capitano. Ineapaaqueri inampire, avisacotaji.

Yoitinaajiri Jesoshi camaintsiri anta Naiqui.

¹¹ Pashini quitaiteri ijatanaque Jesoshi anta Naiqui, icarajeitaqueri inampirepee aisati oshequi pashini oijajeitiriri.

¹² Iquempejjeitapaacaro nampitsi, inavaitiiri icompitacotapaqueri camatsiri, intijerime. Iro iriniro camaintsiri camajimentaaro, aisati te intimeji pashini otomi. Oijatacoven-tiri otomini, ocarajeitiri oshequi oshaninca.

¹³ Ineantavacarori Avincatsarite, oshequi icavintsairo, icantaquero:

—Eiro piraacotiritsi pitomi.

¹⁴ Ari ijatashitaquero cajo yoantacariri, ipamitaquero. Icatiacaapaacari compitacotiriri. Icantiri Jesoshi camaintsiri:

—Evcari, pintinaaje.

¹⁵ Irosati itinaantanaja, isavicaji; ineanatanaji. Impoiiji icantiro Jesoshi:

—Jerica pitomi, aneanaji.

¹⁶ Yoajeitanaque cavaco catsini neajeitaqueriri, icantajeiti:

—Tempa icameetsati Tasorensi. Itiancaqueeri oamejeiteerori irineane. Queario, itasoncaventaquee Tasorensi, icavintsaajeitiri quemisantajeitiriri.

¹⁷ Irosati iquemacojeitantariri maaroni joreasati, aisati otsoteanaca neantsi pashinipeequi nampitsi.

Yora Joa Vaotisantantsiri itianquiri iroamere Jesoshiqui.

(Mt. 11.2-6)

¹⁸ Ari iquemacotaqueri Jesoshi iroamerepee Joa, yora vaotisantantsiri. Ijatashijeitaqueri, icamantapaqueri yantayetaqueri Jesoshi. Yora Joa, icajemiri iroamere apite,

¹⁹ itiancaqueri Avincatsaritequi, icantavaqueri:

—Pijajeite Jesoshiqui, pisampitapeeri: “¿Avirompa Quirishito namenaajeivetari? ¿Pashinimpa naamaajeitea?”

²⁰ Ari yareejeitapaacari, icantapaqueri:

—Itiancaquena Joa, icantana: “Pisampitaiteri Jesoshi: ‘¿Avirompa Quirishito naamaajeivetari? ¿Pashinimpa naamaajeitea?’ ”

²¹ Tecatsi incantea Jesoshi iranqueri, irointita yanti yoavisacoyetiri oshequi mantsiayetatsiri, aisati yoavisacoyetiri oshequi yatajeoncayetiri camaari. Aisati yamenacaayetajiri oshequi caari amenayetatsi.

²² Impoiiji icantiri:

—Meeca pijajeitaje, pincamantapeeri Joa aitaquenea pineacojeitaquenari aisati piquemacojeitaquenari. Pincamantapaajeri amenanaji yora caari amenaveitachani, anitanaji yora caari aniiveitachani, avisacojeitanaji patsaayeveitachaniri, iquemayetanaji yora caari quemaveitachani, itinaayetanaaja camayevetainchari. Aisati nocamantajeitiri ashinoncaajeivetachari jaoca incanteari irijate inquitequi.

²³ Iquimoshireventajeitaquena maaroni quemisantasanotanari.

Icanti Jesoshi: “Icameetsatasanotaque Joa”.

(Mt. 11.7-15)

²⁴ Ari ipiajeitanaja itiancane Joa, impoiiji iquenquetsatacaajeitiri Jesoshi apatotimentariri. Iquenquetsatacotiri Joa, icantiri:

—¿Paíta pijatashijeitantariri Joa anta caaraiteriqui? ¿Pijitimpa itsataashita Joa, iquenquetsatashita? Te inquenquetsatashiteaji. ¿Pijivetarimpa icomitapinita, te irioteji paitarica iquenqueshiretiri? Tempa ioti.

²⁵ ¿Paíta pijatashitanotanantariri? ¿Irompa pijijeitaqueri ashitaarantincari ini, quitsaatarori cameetsamaori? Caari ini. Pamene, yora quitsaatarori cameetsamaori ishanincatacari pincatsari, aisati iquempetaca: iveshireimentaro irovaararo timatsiri ivancoqui pincatsari. Te inquempeteariji irinti Joa.

²⁶ Jentsite, pincamantena: ¿paíta pijatashitiri? ¿Irimpa pijitiri quenquetsatirori irineane Tasorensi pijatashitanantariri? Tempa queario, iquenquetsatiro, iro cantaincha yanaacojeitiri itsipapee quenquetsatacantantsiri.

²⁷ Tempa piojeitiro sanquenarentsi cantatsiri: “Notiomi, nontanqueri jivatempineri, inquenquetsatocotempí. Incamantajeiteri atiri incameetsashirejeitanaque, inquemisantajeitempi”. Queario, oca sanquenarentsi oquenquetsatacotiri Joa Vaotisantantsiri.

²⁸ Yanaacojeitaqueri maaroni itsipapee quenquetsatacantantsiri: imataquero maaroni icoacaqueriri Tasorensi, irootaque ineametsatantariri. Iro cantaincha ineametsatasanotiri catsini Tasorensi maaroni ipincatsariventasanojeitiri.

Yora saserotepee itseencajeitiri Joa, aisati Jesoshi.

(Mt. 11.16-19)

²⁹ Ari iquemajeitaqueri oshequi atiri icantaqueriri Jesoshi. Iquemantacariri, icantajeiti:

—Queario, icameetsataque Tasorensi.

Aisati icarajeitaqueri quemajeitaqueriri yora ivaotisayetiri Joa, aisati apatoyetiniriri oromasati quirequi.

³⁰ Irintiquea yora variseo aisati yora oametantirori sanquenarentsi te irinintajeiteji iranteneri Tasorensi icoacaavetariri, aisati te irijatashiteriji Joa irivaotisateri. Te iriveshireimentaro irinti icantiri Jesoshi.

³¹ Icantiri Jesoshi aisati:

—¿Paitaquea? ¿Jaoa icantari yocapee? ¿Paitaniquea caari iquemisantantana yoca? Te inquenqueshiretimateaji. ¿Paita noshia canteri?

³² Irio noshia canteri jananequi, isavicajeiti nampitsiqui nianqui, icanti aparo: “Apaniro nosoncavetaca, iro cantaincha te poijatacotenaji, te pimaninquetaji. Noashiretacovetari camaintsiniri, iro cantaincha te poashireteaji avirori”.

³³ Pamene, yora Joa ititapinita, te iririmateroji cachojari, jero picantajeiti: “Irio camaari pincacairiri, caari yoasanotanta, aisati caari irantaro cachojari”.

³⁴ Iro cantaincha noponeaca nainti inquitequi, natiritapaaque: noapinita aisati nirapinita. Aiquero picantajeiti: “Jerinta oashenti, shinquinarinti. Ishanincatacari apatotapinitiniriri oromasati quirequi, icarajeitapinitiri caari cameetsajeitatsi”.

³⁵ Ontimimotaquempiricame piotantari, piotaqueme te ontampaticateji picantajeitiri.

Yoavisacotiro Jesoshi tsinane antapinivetarori caari cameetsatsi.

³⁶ Ari aparoni variseo icantiri Jesoshi:

—Caate novancoqui, avajeitea.

Yacanaqueri:

—Jaa, ari.

Ari ijajeitanaque, yoajeitaca.

³⁷ Otimi anta nampitsiqui tsinane antapinivetarori caari cameetsatsi. Oquemacotaqueri Jesoshi, yoa anta ivancoquinta variseo, ojatashitiri oneeri. Acotanaqueneri casancajari. Iro aacotananacanjari mapi quitamarori imoqueetiri.

³⁸ Ocatiaapaaca itapiiqui Jesoshi, quempeji. Iraasanotapaaca, ovitejantacari ojaqui iitiqui, iro oshetantajanariri oishi. Impoiji onintiri iitiqui, aisati osaitantacari iitiqui casancajari.

³⁹ Ineantavacarori yora variseo, iquenqueshiretanaca: “Iriome itiancane Tasorentsi, iriotavaquerome oca tsinane. Oshequi antapinitiro caari cameetsatsi, eirome ishinerarome antiterime iiti”. Ipajita variseo Shimo.

⁴⁰ Iotaqueri Jesoshi iquenqueshiretiri, icantiri:

—Shimo, timatsi noncamantempiri.

Yacanaqueri:

—¿Paita pincamantenari oametinari?

⁴¹ —Noshia cantempiro. Itimi shirampari irevitiriri 5,000 soles, itimi pashini irevitiriri 500 soles.

⁴² Iro cantaincha te irimateroji yora apitetatsiri iroimpiajeneri iirequite, irootaque icantantariri: “Aitanaji, eiro pipinatanatsi. Nopashitimpiri”. Tempa icavintsairi apite. Aparo irevivetacari capichaji, irinti itsipa irevitasanovetacari. Pincamantena: ¿Janica neacameetsatasanoterineri?

⁴³ Yacanaqueri:

—Naamaaca yora irevitasanovetariri, tempa iriotaque icavintsasaanotiri catsini.

Icantiri:

—Queario picantaque.

⁴⁴ Impoiji yamenaquero Jesoshi tsinane, icantiri Shimo:

—Pamene, incaranqui noqueapaaque aca pivancoquica, iro cantaincha te paacameetsatavaquenaji: te pimpavaquenaji nija nonquivantapeemparomeri noiti. Pineaquero irointi oca tsinaneca. Oquivantapaquenaro ojaqui noiti, aisati oshetantaquenaro oishi.

⁴⁵ Te pinintavorotenaji, irointi oca, onintapinitaquero noiti.

⁴⁶ Te pisaitantenaro noitoqui quejitsi, irointi oca, osaitantaquenaro noiti casancajari.

⁴⁷ Pamene, airo antayevetari oshequi, iro cantaincha nocavintsaaquero, eiro noquenqueshireacotajirotsi antayetiri: tempa oshequi onintasanotaquena. Ariorica noncavintsayeri antayevetarori capichaji, capichaji irinintavaquena iriori.

⁴⁸ (v 48, 50) Ari icantiro tsinane:

—Airo onaveta pantayevetari, iro cantaincha eiro noquishmentimpirotsi, eiro noquenqueshireacotimpirotsi aisati. Pishiretaquena, irootaque pavisacotantajari. Cameetsaya pijataje, piveshireasanotanaquea.

⁴⁹ Airo inaveta oaojeitacariri, isampinatavacaca:

—¿Paitampa ijita yoca, icavintsantarori antirori caari cameetsatsi?

⁵⁰ (-)

8

Oijajeitiri Jesoshi tsinane amitacotapinijeitiriri.

¹ Pashini quitaiteri iquenaquenayetanaque nampitsipeequi Jesoshi. Iquenquetsatacaajeitiri atiri, icamantajeitiri:

—Irotaintsi impincatsariventajetempí Tasorentsi.

Quiso yoanajiri iroamerepee, yora carajeitatsiri 12,

² aisati oijajetiri tsinanepée. Peerani yoitsaviantaveitaroni camaari, aisati ojojiveitani, iro cantaincha yoavisacojeitajiro Jesoshi. Opajita aparoni tsinane Maria Maquitarasato. Icaraveitani camaari oitsaviantaveitaroniri 7.

³ Iro oijatiriri pashini, opajita Joana, ijina Cosa. Yora Cosa, iriotaque amitacotiriri pincatsari Eroreshi. Aisati iroori oijatiri Sosana, aisati otsipapee tsinanepée. Oca tsinanepée amitacotapinijetiri Jesoshi, opapinijetiri coiteimotacariri.

Ishiacantiriri jocaitirori oitsoqui tirico.

(Mt. 13.1-9; Mr. 4.1-9)

⁴ Yapatotimentajetacarí Jesoshi oshequi atiri, ari ishiacantajetiriri, icantiri:

⁵ —Ari ijataque shirampari yojocaitiro oitsoqui tirico oaantsiqui. Aparopee pariitapaintsi avotsiqui: yaaticayetaquero aniiyetatsiri, impoiji yoajeitacaro contsaropee, itsoncaquero.

⁶ Pashinipee pariitapaintsi mapiqui. Oparitsavetanaca capichaji, iro cantaincha te oncajavatsatimateji, irootaque oshimpetantanacari, ocamajeitanaque.

⁷ Pashini pariitapaintsi quitotseequimashiqui: ishioacavetanaca, iro cantaincha anaanaquero quitotseequi, irootaque ocamantacarí.

⁸ Iro pashini pariitapaintsiri cameetsariqui quipatsi: oshiocanaque, otimasanotanaque oitsoqui oshequi.

Irootaque ishiacantajetiririri, impoiji antearojenca icantajetiri:

—Otimirica piquemantari, pinquemasanotavaquero.

Yoametiri Jesoshi iroamere oshiaaaventiri oitsoqui.

(Mt. 13.10-23; Mr. 4.10-20)

⁹ Isampijetiri iroamerepee:

—¿Paita pishiacantiri incaranqui?

¹⁰ Yacanaqueri:

—Icoacaquempi Apa Tasorentsi piojeitero caari iojeiti itsipapee atiri. Avintiquea niotacaquempi jaoca icanta Apa ipincatsariventajetaquempi. Irio noshiacantajetiriri yoranqui: iramenajeivetea, iro cantaincha eiro ineanotitsi; inquemajeivetea, iro cantaincha eiro ijeitavaquerotsi.

¹¹ Jero oca noshiaaaventimpiri: oca oitsoqui oshiaaaventiro irineane Tasorentsi.

¹² Oca avotsi opariantavetapaacari oitsoqui oshiaaaventiri quemajeivetavacarori irineane Tasorentsi: ipocapaaque camaari, yojocacajiri iquenqueshirevetacaro irineane. Te irinintacayeriji inquemisante aisati iroavisacotea.

¹³ Orari mapitaintsiri opariantavetapaacari oitsoqui, oshiaaaventiri veshireimentavetarori irineane Tasorentsi, ineametsavetacaro. Iquemisantaveta, iro cantaincha te inquearioventeroji: ariorica opomerentsitimotacarí quemisantaveta, ari yojocanajiro.

¹⁴ Aisati oquempetaca quitotseequimashi opariantavetapaacari: oshiaaaventiri quemajeivetacarori irineane Tasorentsi, iro cantaincha iquenqueshiretasanotiro yantapinitiri, iveshireimentaro yashiyetari, aisati icoaque inquimoshiretashitea. Yatsipetashitaro iquemavetaro irineane Tasorentsi: te inquemisantasanoteroji, te iranteneriji Tasorentsi icoacaavetacariri.

¹⁵ Ocarí cameetsaintsiri quipatsi oshiaaaventiri quemasanotavaquerori irineane Tasorentsi. Iquearioventaquero iquemisantasanoataque, icameetsashiretanaque. Iriotaque matasanotirori maaroni icoacaqueriri Tasorentsi.

Icantiri Jesoshi: “Piotasanojeitavaquero jaoca icanta Tasorentsi ipincatsariventajetaquempi”.

(Mr. 4.21-25)

¹⁶ Jero aisati yoamejetiriri Jesoshi iroamere:

—Ariorica antsiotero tsiomentotsi amenajeitanteari, ¿arimpa antatacotero cantiriqui? ¿Arimpa amanquero jaocarica ara? Tempa ocameetsati avanqueteri jenioquiji onconijajetanteari paitapeerica. Irootaque noamejeitantaquempiri: nocoaque piotasanojeite.

¹⁷ Tequera piojeite jaoca icantari Tasorentsi ipincatsariventajetaquempi, iro cantaincha coajica piotasanojeitajero.

¹⁸ Pinquemasanojeitavaquena piojeitantajeari. Capichaji piotaque meeca, iro cantaincha ariorica pinquemisantasanoatena, nontsoteajetempiro, niotacaasanojeitempi. Ariorica pijiveta pioti, eiro piquemisantanatsi, impoiji icomitacaasanotimpicari Tasorentsi: tecatsi piotimataje.

Ijatashjeitiri ishanincasanori Jesoshi irineeri.

(Mt. 12.46-50; Mr. 3.31-35)

¹⁹ Impoiji ojatashitiri Jesoshi iriniro, otsipajeitari irirentipee. Yareejeitapaaca pancotsiqui anta isaviquinta, iro cantaincha tecatsi incantajeitea intsipajeitapeempari: yojocaa-jeitavaqueri oshequi atiripee.

²⁰ Icamanteetiri:

—Ocoapaaquempi piniro, jeri pirentipee. Osavicapaaque anta saiteriqui.

²¹ Iro cantaincha yacanaqueri:

—Nonirontacaro maaroni quemisantanojeitiriri Tasorentsi, maaroni antasanotiniriri iocacaquerori. Aisati nirentijeitacari maaroni quemisantiriri.

Yoimajerentaquero Jesoshi tampea aisati omotoncane incajare.

(Mt. 8.23-27; Mr. 4.35-41)

²² Pashini quitaiteri itetajaro Jesoshi pitotsi, icarajeitakeri iroamerepee. Icantiri:

—Tsame amonteajeitanaje intatiquero incajare.

²³ Ari ijatacojeivetanaca, aacotanaqueri tampea. Ari ijatacotaque nianquijaqui, imanaaque Jesoshi. Impoiji omapocajeitakeri antearo tampea, otejatapaacono nija pitotsiqui, irotaintsi intsitiacojeite.

²⁴ Icaocakeri iroamerepee:

—Pintinaye, oametnari, irotaintsive antsitiacojeite.

Ari itinaanaca, impoiji ipeajiro tampea, ipeajiro omotoncane: opeasanotanaja.

²⁵ Icantiri:

—¿Paíta caari pishirejeitantana?

Itsaroacaajeitanacari, aisati yoajeitanaqueri cavaco. Icantavacaajeitanaca:

—¿Janicampa yoca? Imataquero tampea, aisati omotoncane: ipeajiro. Te aneapiniteroji oca.

Yoavisacotiri Jesoshi neiriri camaari.

(Mt. 8.28-34; Mr. 5.1-20)

²⁶ Ari iponeanajari Jesoshi Carireaque, meeca yareetapaaca intatiquero: anta Jerasequi.

²⁷ Yaatacotapaaque, yamatsecajeitanaque quipatsiqui. Ineapaaqueri neiriri camaari: peerani, te inquitsaateaji. Te irisaviqueji pancotsiqui, irointi iquenaquenatsempequiyeti anta tijaariqui.

²⁸ Ineantavacariri Jesoshi, itiyeroashitavacari, icajemanaque:

—¿Jaoca pincantenari? Niotavaquempi: avirotaque itomi Tasorentsisanori savicatsiri inquitequi. Eiro piquematsitacaanatsi.

²⁹ Iro icajemantacari, itsaroacaavacari Jesoshi, iotaque camaari intianqueri. Yora shirampari ineapinitiri camaari, iquenacaapinitiri. Yoisotapiniyeevetari iracoqui aisati itiqui carenatsa, iro cantaincha ishintsitacari camaari, ipesantarori carenatsa yoisotan-teevetacariri. Ariorica ipesanaquero, ishiacaanacari camaari caaraiteriqui.

³⁰ Icantiri Jesoshi:

—¿Jaoca pipajitari?

Yacanaqueri:

—Nopajita Oshequianti.

Iro ipajitantacari Oshequianti ineaqueri oshequi camaari.

³¹⁻³² Ari itimi anta tioncaiquiji oshequi chanco yoajeita. Yora camaari icantiri Jesoshi:

—Eiro pitiancajeitanansi Sharincaveni, ainti pintiancajeitena anta chancoqui, non-ijaapeemparita iriori.

Ari icantiri:

—Pijajeite.

³³ Ari yojaajeitanajiri shirampari, injaaajeitapaacari chancopee, irosati ishiajeitan-tanaca, ipariajeitanaque imperitacari, ipiincajeitanaque incajarequi, pocn, pocn, pocn, itsitiajeitanaque.

³⁴ Ari ineantavacariri, ishiajeitanaca shentajeivetariri chanco, icamantajeitakeri ishaninca anta nampitsiqui aisati oantsiqui.

³⁵ Ari ipocajeitacari irameneri yora neaveitariniri camaari, jaocarica icantajari. Ineapaaqueri, tecatsitaji inaji; tecatsi oajerine, isavicaji Jesoshiqui. Iquitsaataja, otimanaji iquenqueshiretantari. Itsaroacaajeitapaacari.

³⁶ Yora neasanotaqueriri icamantajeitavaqueri maaroni ishaninca yantiri Jesoshi, it-soteaqueneri.

³⁷ Ari itsaroajeitanaque catsini maaroni timajeitatsiri ara. Itiancajeitajiri Jesoshi:

—Pijataje, eiro pipocajitsi aisati.

³⁸ Irintiquea yora neaveitariniri camaari icantavetari:

- Nocoaque noijatanaquempi.
Iro cantaincha icantiri:
- ³⁹ —Eiro poiijatanatsi, ainti pijataje pivacoqui. Pincamantajeitapeeri pishaninca oshequi icavintsaquempi Tasorentsi.
Ari ijatanaque, iquenaquenayetanaque nampitsiqui, icamantajeitiri ishaninca:
—Pineaquena: oshequi icavintsaajana Jesoshi.
- Yoavisacotiro Jesoshi irajatsiri aisati yoitinaajiro irishinto Jairo.*
(Mt. 9.18-26; Mr. 5.21-43)
- ⁴⁰ Impoiji ipianaja Jesoshi, imonteanajaro incajare. Yoyeajeitaqueri oshequi atiri, yaacameetsajeitavaqueri.
- ⁴¹⁻⁴² Itonquiotavacari shirampari pajitachari Jairo: iriotaque jivatacaantatsiri anta pancotsiqui yapatojeitanti. Itiyeroashitapaacari iitiqumi Jesoshi, icantapaqueri:
—Tsame novancoqui, irotaintsi oncame nishintio.
Apaniro oni irishinto, ocarataque osarintsite 12. Ari yoiijatanakeri, itsitacajeitanacari oijajeitanakeri.
- ⁴³ Oijatanakeri aisati tsinane irajashetatsiri: ocarataque 12 osarintsintantanacari irajashetanaque. Tecatsi materoneri iroavisacotajero.
- ⁴⁴ Oquenapaaque itapiiqui antitaqueri iitsaare ocaratapaaque, irosati opeantanajaro iraja.
- ⁴⁵ Ari icanti Jesoshi:
—¿Janica antitaquenarori noitsaare?
Icantajeitanaque:
—Te nantitempiro piitsaare.
Impoiji icanti Petero:
—Oametnari, icarajeiti atiri oshequi ishoncajeitaquempi, itsitacajeitaquempi. Aiquero picantanaiti: “¿Janica antitaquenarori noitsaare?”
- ⁴⁶ Iro cantaincha yacanaqueri iriori:
—Ainiro antitaquenarori. Ocamantaquena notasorenca: timatsi notasoncacoventajiri.
- ⁴⁷ Iotaque tsinane tecatsi oncantea omanapitsateri antitaqueri iitsaare. Opioncanaque, ojatashitiri, otiyeroashitacari, ocantiri:
—Narotaque antitaquempirori piitsaare, irootaque navisacotantajari nirajaveitani.
Iquemajeitavaquero maaroni atiripee.
- ⁴⁸ Aisati icantaquero Jesoshi:
—Noshaninca, pishiretaquena, irootaque pavisacotantajari. Cameetsa pijataje pivancoqui, pinquimoshiretanaje.
- ⁴⁹ Ari pashini pocapaintsi ishaninca Jairo camantapairiri:
—Camanaque pishinto. Eiro picantiritsi meeca oametantatsiri irijate avancoqui.
- ⁵⁰ Iquemavaqueri Jesoshi, icantiri:
—Eiro picantashiretitsi. Ariorica pishiretena, ari avisacotanaje pishinto.
- ⁵¹ Ari yareejeitapaaca pancotsiqui. Icantiri Jesoshi:
—Eiro avinti piqueajeitapaitsi: irintiquea queapaintsine Petero, Joa, Santiago, iri, aisati iniro, aitaapaaji.
- ⁵² Ainiro iracojeitacaro oshanincani, yoashiretacojeitacaro. Icantajeitaqueri Jesoshi:
—Eiro piraacojeitarotsi: te oncamasanoteji, irointi omai.
- ⁵³ Ishirontimentajeitacari, iojeitaque ocamasanotaque.
- ⁵⁴ Ari yajiricavacotaquero, antearojenca icanti:
—Evancaro, pintinaanaje.
- ⁵⁵ Irosati otinaantanaja. Icantiri:
—Pimpero oyeari.
- ⁵⁶ Ari yoajeitanaque cavaco maaroni oshaninca, iro cantaincha icanti Jesoshi:
—Eiro meeca picamantitsi.

9

Itianquiri Jesoshi iroamere inquenquetsatacyeteri atiri.

(Mt. 9.35-38; 10.5-15; Mr. 6.7-13)

- ¹ Impoiji yapatojeitiri Jesoshi iroamere, imatacaajeitaqueri itasoncacaqueri itsipapee, icantajeitiri:
—Nocoaque pojocacoventajeiteri atiripee camaari, pimateri maaroni camaaripee, aisati poavisacojeiteri maaroni mantsiayetatsiri.
- ² Meeca pijajeite. Pinquenaquenayetanaque, pincamantajeiteri atiri: “Irotaintsi impincatsariventajeitempi Tasorentsi”. Aisati poavisacoyeteri mantsiayetatsiri.

³ Noncantempi, tecatsiya paanaque: eiro paanaquerotsi piotiquiro, pitsarate, poyeari, piirequite, poicoro, tecatsi catsini.

⁴ Jaocarica pareetapaaqueari, ari pisavicapaaque.

⁵ Eirorica iquemisantajeitavaquempitsi savicajeitatsiri, povaanahea. Ariorica povaanahea pincantajeitanaqueri: “Meeca te pinquemisantenaji, ari iroasanquetempi Tasorentsi”.

⁶ Ari ijajeitanaque, iquenayetanaque nampitsipeequi. Icamantajeitaqueri atiri jaoca incantajeiteari iravisacotantajeari. Aisati yoavisacoyetajiri mantsiyatetsiri.

Yora Eroreshi icoaque irineeri Jesoshi.

(Mt. 14.1-12; Mr. 6.14-29)

⁷ Ari yora pincatsari Eroreshi iquemacotaqueri yantayetaqueri Jesoshi, itasoncantayetaque. Te irioteji paitarica inquenqueshireteri. Icantayeti: “Irio Jesoshitajantsiri Joani: itinaanaja”.

⁸ Icantayeti itsipapee: “Yonijaantaja aisati Iriashi”. Pashini cantayetatsi: “Itinaanaja camantantatsiniri”.

⁹ Iro cantaincha icanti Eroreshi:

—Nopesacantaqueri Joani: camaque inaque. Iro cantaincha, ¿janica yoca aquemacojeitaqueri itasoncacoventajeitaqueri atiripee? Nocoaque noneeri.

Itasonquiro Jesoshi tanta, yoshequiaquero.

(Mt. 14.13-23; Mr. 6.30-46; Joa 6.1-15)

¹⁰ Ari ipiajeitanaja itiancajeitaqueri Jesoshi, icamantajeitapaaqueri imayetaqueri. Impoiji itsataajeitanajiri yaajeitanajiri iroamere anta Vetsairaqi.

¹¹ Iro cantaincha iojeitaqueri atiri ijatanaque, yojajeitanaqueri oshequi. Ari yovetsajeitavacari Jesoshi, yoamejeitavaqueri jaoca icanta Tasorentsi ipincatsariventajeitaqueri. Aisati yoavisacojeitaqueri mantsiaripee.

¹² Ari ishaavijiiteanaque, ipocashitiri iroamerepee, icantajeitiri:

—Pamenerote, caaraiteitaque aca. Pintiancajeiteri meeca nampitsipeequi: otiminta irimaajeitanteari aisati iroajeitanteari.

¹³ Iro cantaincha icantavaqueri:

—Pimpajeiteri avinti iroajeiteari.

Icanti:

—Tecatsi nompajeiteriri. Pamene, ocarataque tantajaniqui apapacoroni. Jeri apite shima. ¿Picoaquempa nojaeite namananteneri iroajeiteari maaroni yocapee? Oshequi ini catsini.

¹⁴ Aamaaca icarajeiti shirampari 5,000 yapatojeitaca. Icantiri Jesoshi:

—Poisavicajeiteri maaroni: pimincarajeiteri incarayetaque yora 50 irampatojeitaquea, aisati iriori yonta 50. Aisati inquempejeitaqueari maaroni.

¹⁵ Ari imajeitaqueri, yapatojeitaqueri. Yoisavicajeitaqueri.

¹⁶ Impoiji yajiricaquero Jesoshi tanta, jeri aisati shima. Yamenanaque inquitequi, icantiri iriri: “Ariove, Apa, pipaquenaro noyeani”. Impoiji ipaqueri iroamere, icantaqueri:

—Jeri, povaajeiteneri yora apatojeitaincharira.

¹⁷ Ari yoajeitaca maaroni, iquemajeitaca. Impoiji yaajeitajiro timaaranapaaajantsiri, yapatotajiro. Ocarataque cantiriqui ijaajiri 12.

Icantiri Petero Jesoshi: “Avirotaque Quirishito naamaajeitacari”.

(Mt. 16.13-23; Mr. 8.27-33)

¹⁸ Pashini quitaiteri ijatanaque apaniro Jesoshi iquenquetsatacairi iriri. Iotanajiri yaanajiri iroamerasanori. Impoiji isampitiri:

—¿Janica ijitaquenari ashaninca? ¿Paita icantajeitiri?

¹⁹ Yacanaqueri:

—Icantayeti aparopee: “Irioitatsi Joani vaotisantantaveitachaniri, itinaanaja”. Irio pashini icanti: “Irioitatsi Iriashi, yonijaantaja aisati”. Irio pashini icanti: “Irioitatsi camantantatsiniri, itinaanaja”.

²⁰ Isampitiri:

—Avintiquea, ¿paita picantajeitiri?

Yacanaqueri Petero:

—Avirotaque Quirishito naamaajeitacari. Itiancaquempi Tasorentsi.

²¹ Iro cantaincha icantansanojeitiri:

—Eiroyean picamantiisi.

²² Queario, noponeaca inquitequi, natiritapaaque, iro cantaincha oshequi nonquematsicateari. Intseencajeitena savicacantajeitatsiri, jivatacaajeitiriri saserotepee, oametantirori sanquenarentsi, maaroni. Incantajeite: “Caari ini Quirishito”. Iroyeetena, oncarataque quitaiteri mava, nontinaanaje.

Icanti Jesoshi: “Poijatasanojeitanaquena: eiro piperaventarotsi”.

(Mt. 16.22-28; Mr. 8.32-38)

²³ Impoiji icantajeitiri Jesoshi:

—¿Picoajeitaquempa poijatasanojeitanaquena? Ari eiro picavintsaaajatsi avisati, eiro pantanontatsi avisati. Maaroni quitaiteri pimpomerentsiventenaro nocoacaquempiri: ariorica iroimenteetempiro, ariorica inquishimenteetempiro. Iro cantaincha quiso poyena, poijatasanojeitanaquena.

²⁴ Ariorica pantanontea pincavintsayea avisati meeca, eiro piotasanotiritsi meeca Tasorentsi, aisati eiro pisaviquimotiritsi coajica. Ariorica pinintena narori, aisati pimpomerentsiventayetenaro meeca nocoacaajeitimpiri, eiro patsipetarotsi, irointi piveshireimenteari meeca Tasorentsi, aisati pisaviquimoteri coajica.

²⁵ Ariorica pimpiotasojeitero vaararontsi catsini, iro cantaincha pintseenqueri Tasorentsi; impoiji pijate Sharincaveniqui. Tempa pantsipetashijeitearo maaroni pashijeiveteari.

²⁶ Eiro pipashiventacaanatsi; aisati noneane, eiro pipashiventacaarotsi. Tempa naro poneachari inquitequi, natiritapaaque. Coajica nojatanaje jenoqui. Impoiji nompiapaaje aisati aca quipatsiqui, nompincatsaritasanotapaaque, nontasorentsitasanotapaaque: nonquempeteari Apa aisati maaroni inampirepee. Iro cantaincha pinqueshirejeitea: ariorica pimpashiventacayena meeca, nompashiventacaquempi coajica avirori.

²⁷ Iro cantaincha queario oca noncamantempiri, eiro namatavitimpsiti: eirotsitarica picamajeiti, pineajeitavaquero jaoca icanta Tasorentsi ipincasariventanti.

Ineaqueri iroamere ipashinitanaque Jesoshi.

(Mt. 17.1-8; Mr. 9.2-8)

²⁸ Ari ocarataque quitaiteri 8, ijataque Jesoshi toncaariqui, inquenquetsataceyeri iriri. Yaanajiri aisati Petero, Santiago, jeri Joa.

²⁹ Ari iquenquetsatacaapaaqueri iriri, imapocanaca ipashinivorotanaque, aisati oshipaquireasanotaque iitsaare, atsioquintaqueri yora amenajeitaqueriri.

³⁰ Imapocapaaqueri aisati apite shirampari, iquenquetsatacaapaaqueri Jesoshi. Irio pocaintsiri Moishishini aisati Iriashini;

³¹ te inquempeteeji aquempejeita arori, icameetsatasanotaque: iquempejeitacari inquiresati. Ari iquenquetsatavacaajeitaca mava: iquenquetsatcotiro incame coajica Jesoshi anta Jerosarequi.

³² Oshequi ipochoquivetanaca Petero aisati itsipajeitari, iro cantaincha te irimayeji. Yamenashejeitaqueri Jesoshi, ishiquireaque, iquempetacarotaiteri. Aisati yamenashejeitaqueri yora itsipajeitari Jesoshi.

³³ Irotaintsi impianaje yora apitetaintsiri, icantiri Petero Jesoshi:

—Oametanari, aitaquempa nopocaque narori aca, noneajeitaquempi. Nocoaque novetsiquempiro mava pancotsijaniqui: aparo pashi, aparo irashi Moishishi, aparo irashi Iriashi.

Ari ineaveetashitaca Petero, te inquenqueshireteaji.

³⁴ Ari omapocanaca mencori, omaaroncajeitapaacari, irosati itsaroajeitantanaca.

³⁵ Impoiji iquemajeitaqueri Tasorentsi, inaque mencoriqui:

—Iriotaque yoca notomi nonintasanotiri: pinquemisantajeitavaqueri.

³⁶ Impoiji yamenajeivetanaca: tecatsi irinee, apaniro irinti Jesoshi. Ari imanajeitaquero: peerani, tecatsi incamantajeite. Impoiji, icamantaquee.

Yoavisacotiri Jesoshi jananequi yampitsiitacaari camaari.

(Mt. 17.14-21; Mr. 9.14-29)

³⁷ Oquitaitetamanaji, yoirincajeitamanaja, itonquiojeitavacari oshequi atiri.

³⁸ Icantavaqueri aparoni:

—Oametanari, pincavintsayeri notomi, te intimeji pashini.

³⁹ Yatajeaoncaqueri camaari, icajemacaapinitiri. Yampitsiitacaapinitari, ishimoreta-caapinitari. Yoashinoncaapinitaqueri: te irinijantareempariji.

⁴⁰ Nocantavetacari poamerepee iroavisacoteri, iro cantaincha te irimateriji.

⁴¹ Yacanaqueri Jesoshi:

—Eiro imatiritsi: tempa irinti pitseencaririnte, irootaque caari imatantari camaari; te pinquenqueshirejeitempa. ¿Arimpa noshinetempi pintseencantapinite? Jentsite pamaquenari.

⁴² Jeri inianquitacaavetapaacari itomi, imapocanaca camaari ipishoncaqueri quipatsiqui, yampitsiitacaanajari aisati. Ari itiancajiri Jesoshi camaari, yoavisacotajiri jananequi. Icantiri iriri:

—Jerica pitomi: avisacotaji inaji.

⁴³ Yoajeitanaqueri cavaco maaroni atiripee icantavacaajeitanaca:

—Tempa itasorentsitasanoti catsini Tasorentsi.

Icamantavetari Jesoshi iroamere irayeeteri.

(Mt. 17.21-23; Mr. 9.29-32)

Ainiroquera icantavacaajeitaca, icantiri Jesoshi iroamere:

⁴⁴ —Pinquenqueshiretasanotero oca noncamantempiri. Eiro pipeacotarotsi. Noponeaca inquitequi, natiritapaaque, iro cantaincha irayeetena.

⁴⁵ Iro cantaincha te inquemajeitavaqueroji icantavetacariri. Te irishineteriji Tasorentsi inquemajeitavaquero. Itsaroocaajeitacari irisampiterime: “¿Paita picantaqueri?”

Icantiri Jesoshi iroamere jaoca incanteari impincatsaritantajeari.

(Mt. 18.1-5; Mr. 9.33-37)

⁴⁶ Impoiji icantavacaajeitanaca iroamerepee Jesoshi, yaamaajeitaca:

—Aca acarajeitica: coajica, ¿janica anaacotantajantsine impincatsaritaje? ¿Narompa pimpincatsajeite?

⁴⁷ Totashitacari Jesoshi iquenqueshirejeitiri. Icajemiri jananequi:

—Caatanaque aca nonampinaqui.

⁴⁸ Impoiji icantajeitiri iroamerepee:

—Pameneri jananequica, quemisantanari. Ariorica pincavintsayeri yoca, pincavintsayena narori. Ariorica pincavintsayena, aisati pincavintsayeri tiancaquenari. Ariorica pincavintsayeri itsipapee, ari pimpincatsaritanaque.

Yoavisacotanti pashini quemisantiriri Jesoshi.

(Mr. 9.38-40)

⁴⁹ Impoiji icantiri Joa:

—Oametanari, chapinqui noneaqueri shirampari oavisacoyetiriri neiriri camaari. Icamantavetana iquemisantimpi, irootaque imatantariri yoavisacotiri. Iro cantaincha te quiso iroajeitee, irootaque notsaneacotantacariri iroavisacoteri neiriri camaari.

⁵⁰ Yacanaqueri Jesoshi:

—Eiro pitsaneapitsataritsi. Te inquisajeiteeji, irootaque ayotantacari iquempejeitaquee.

Yora samariasati te iraacameetsateriji Jesoshi.

⁵¹ Te osamaniteji meeca: irotantsi irijataje Jesoshi inquitequi. Ari iquenqueshiretaca irijate Jerosarequi.

⁵² Itiancaqueri iroamere:

—Pijivatanaque anta Samariaqui, pamenapeero asavicantajeitapeempari.

⁵³ Ari ijavetanaca, iro cantaincha iojeitaque samariasati irijate Jesoshi Jerosarequi, irootaque itsaneapitsatavacariri irisavicantapeempameri inampiqui. Ari ipianaja, icamantapaajiri Jesoshi:

—Eiro ishineteetsi amaye inampiqui.

⁵⁴ Ari iquemantacariri Santiaco aisati Joa, icantiri:

—¿Novincatsarite, picoaquempa noncanteri Tasorentsi intaajeiteri maaroni samariasati? Nonquempeteari Iriashini peerani: itaacantaqueri soraro quisajeitaqueriri.

⁵⁵ Yamenashetaqueri Jesoshi, icantiri:

—Te oncameetsateji anquisheri. Te piojeiteji jaoca picantacari: te pincameetsashireteji.

⁵⁶ Noponeaca narori inquitequi, natiritapaaque. Te iro nompocantea noayeri atiri, irointi nopocantaca noavisacojeiteri.

Impoiji yovaajeitanaja pashini nampitsiqui.

Icantayetiri Jesoshi itsipapee atiri.

(Mt. 8.18-22)

⁵⁷ Ari iquenajeitanaque avotsiqui, itonquiotavacari shirampari, icantavaqueri Jesoshi:

—Novincatsarite, nocoaque noijatatanotanaquempi, jaocarica pijateri.

⁵⁸ Icantiri:

—Natiritapaaque noavisacotantariri atiri. Pinquemisantavaquero oca noncamantempiri: yora otsitiniro timatsi imoro imaaapinitantari, yora tsimeripee timatsi itsitiyetari; iro cantaincha nainti, tecatsi nomaanteari.

⁵⁹ Impoiji icantiri pashini:

–Poijatanaquena avinti.

Yacanaqueri iriori:

–Novincatsarite, nocoaveta, iro cantaincha incamavaquetsita apa. Ariorica nontijeri, impoiji nojjatanaquempi.

⁶⁰ Ipiatacari Jesoshi:

–Ainero itseencaririnte, iriotaque tijerine ariorica incamaque. Aviroquea avinti, pinca-mantajeiteri atiri jaoca icanta Tasorentsi ipincatsariventajeitiri.

⁶¹ Icantiri pashini shirampari:

–Aitaque, novincatsarite, nojjatasannotanaquempi: iro cantaincha nojjivajeitapainterita novetsajeitapainteari noshaninceapee.

⁶² Iro cantaincha icantiri Jesoshi:

–Ariorica pitsapatiro piquiro quipatsi pimpanquitanteorori pivanquire, te pamena-menayetero paitapeerica, caari otipitantayeta piquiaqueri. Aisati oquempetaca: pin-coaquerica impincatsariventempi Tasorentsi, pojjatasanotena, eiro piquenqueshiretirotsi pantajero aisati pantapiniveitaniri.

10

Itianquiri Jesoshi oshequi quenquetsatacaajeitantsiri.

¹ Impoiji itiancajeitaqueri oshequi iroamere irijivajeitanaqueri, icarajeiti 70. Icantava-queri:

–Pijajeite, apitepee pincantayetanaquea. Pijivajeite nampitsipeequi nocamanta-jeitaquempiri, nimpoitanaje narori.

² Oquempetaca ocarataque oshequi oitsoqui panquirentsi, aparaitanaca: te iroshequiteji aviiteroneri. Pincanteri Avincatsarite intiancajeitanteariri oshequi amitacotempineri pinquenquetsatacaajeiteri atiri, irijajeitanteari iriori inquitequi.

³ Pamene, oshequi ompomerentsitimojeitempi, oshequi irantanatempit tseencantatsiri: pinquempeteari ovisha, itsoncaqueri maniti. Meecaquea, pijajeite pinquenquetsajeite.

⁴ Eiro paanaquerotsi pitsarate, piirequite, pisapatote. Ariorica pintonquiotavaqueari atiri nianqui, eiro piquenquetsatacaavaqueritsi, irointi pavisanaqueri: apatiro povaana-queri onta nocantaquempiri.

⁵ Jaocarica pisavicapaaqueri, pincanteri Tasorentsi iramitacoteri ashitarori ivanco in-quemisantanteari.

⁶ Ariorica inquemisantaque, iravisacotaje. Irompa eirorica iquemisanti, iro cantaincha eiro patsipetarotsi pinquenquetsatacayeri Tasorentsi: tempa pimataqueneri oca nocantaquempiri.

⁷ Jaocarica anta pisavicapeeri, aitaque pisavicavaquetsita. Eiro piquenaquenayetitsi pancotsipeequi. Poyearo paitarica impavaquempiri, aisati pirero, maaroni. Ocameetsati impavaquempi paitapeerica coiteimotaquempiri: tempa ocameetsati impinateri shiram-pari antaveetiniriri.

⁸ Jaocarica pijateri, ariorica iraacameetsatavaquempi, poapaaquearo paitarica im-pavaquempiri.

⁹ Intimerica mantsiaripee, poavisacojeiteri. Pincamantajeiteri maaroni: “Irotaintsi impincatsariventajeitempi Tasorentsi”.

¹⁰ Iro cantaincha terica iraacameetsatempit itsipapee ashaninca, pincamantajeiteri:

¹¹ “Pinquemajeitavaquena: icoaveta Tasorentsi impincatsariventempime, iro cantain-cha te pincoyeji. Te paacameetsajeitavaquenaji, aisati oquempetaca, te paacameetsatava-queriji Tasorentsi. Meeca pashinoncaitayempani”.

¹² Irootaque nocoakeri pincamanteriri. Pineaquero, peerani itseencajeitaqueri Tasorentsi soromasatini, irootaque ipoyereajeitancariri. Iro cantaincha eirorica inquemisantajeitavaquempi ashaninca meeca, iranaacoteri soromasatini, irashinon-caasanojeitanaquea catsini.

Iquenquetsatacotaqueri Jesoshi tseencajeitaqueriri.

(Mt. 11.20-24)

¹³ Aisati icanti Jesoshi:

–Irashinoncaasanojeitanaquea corasesati aisati vetsairasati: oshequi ineacojeive-taquena notasoncantapiniti, iro cantaincha te inquemisantajeitavaquenaji catsini. Irinea-jeitaquenaricame tirosatini aisati shirosatini, inquenqueshirejeitanajeame, irojocajeita-jerome caari cameetsatatsi yantajeitiniri.

¹⁴ Queariotaque iroasanquejeiteri Tasorentsi coajica tirosatini aisati shirosatini, iroashinoncaajeiteri, iro cantaincha iroashinoncaasanojeiteri catsini corasesati aisati vetsairasati.

¹⁵ Aisati icoajeiveta caperenaosati irijajeiteme anta inquitequi, iro cantaincha ainti irijajeite Sharincaveniqui.

¹⁶ Noamere, pinquemajeitena. Ariorica inquemisantajeitavaquempi atiripee, aisati narori inquemisantajeitena. Ariorica intseencajeitavaquempi, intseencajeitavaquena narori. Aisati oquempetaca, ariorica intseencajeitena, intseencajeiteri aisati yora tiancaquenari. Meecaquea, pijatasanojeite.

Ijajeitaque iroamere Jesoshi, iquenquetsatacaajeitiri itsipapee, impoji ipiajeitapaaja.

¹⁷ Ari ipiajeitapaaja itiancane Jesoshi, iquimoshirejeitapaaque. Icamantajeitapaaqueri: —Novincatsarite, iotantacari camaari noquemisantaquempi, iquemisantaquena narori. Nomataqueriquea notiancajeitaqueri.

¹⁸ Yacanaqueri:

—Queario yora Satanashi ipincatsariventacetacari iamaaririnte, iro cantaincha nonea-jeitaquempi pimajeitaqueri pitiancaqueri camaari avirori: meeca niotaque eiro ipincatsaritanotiritsi meeca Satanashi, tempa yanaacotaqueri Tasorentsi irinti.

¹⁹ Meeca oshequi notasoncaventaquempi: oquempevetaca ariorica paatiqueri maranque, eiro yoamaimpitsi; aisati yora quitoniro, tecatsi incantempi. Aisati inquisavetempi yora camaari, iro cantaincha tecatsi incantempi, tempa notasoncacoventimpi.

²⁰ Queario pitiancaqueri camaari, iro cantaincha eiro piveshirementarotsi. Irointiquea pinquimoshireventasanojeitanaque pijajeite inquitequi.

Te iriojeiteroji irineane Tasorentsi, te irineajeiteriji Jesoshi itasoncanti.

(Mt. 11.25-27; 13.16-17)

²¹ Impoji oquimoshiretacaasanojaqueri Ishire Tasorentsi, icantiri iriri:

—Oshequi, apa, picameetsati. Pipincatsariventajeitiri maaroni inquitesati aisati maaroni quipatsisati. Itimaveta atiri iovetachari, ioyevetaro paitapeerica, iro cantaincha pimanapitsataqueri pineane: te iriojeiteroji jaoca incanteari iravisacotantajeeri. Irintiquea poametasanojeitaqueri caari iotasanovetacha: itseencajeivetacari ishaninca, iro cantaincha picoacaqueri iriote iriori.

²² Impoiniji icantajeitaqueri apatotimentajeitacariri:

—Iriotaque Apa matacaaquenarori maaroni catsini. Apaniro iotasanotana Apa, tecatsi pashini iotasanotenane. Aisati noquempeta narori, apaniro notasanotiri, te intimeji pashini iotasanoterineri: irintiquea yora noamejeitiri, iojeitiri iriori.

²³ Ari ipitsocashitanacari iriori iroamere, apaniro yoamejeitaqueri:

—Pineajeitaquena avinti nomataquero caari ineapinijeiti itsipapee atiri. Ocameetsati pinquimoshireventena, aisati inquimoshireventena pashini neenaneri.

²⁴ Icoajeiveitani peerani yora quenquetsatacantaveitachaniri irineename nontasoncantayete, iro cantaincha te irineenaji notasoncantayeti. Aisati icoajeiveitani irineename yora pincatsariyeveitachaniri. Aisati icoajeiveitani inquemajeitename, iro cantaincha, te. Avirojei avinti, pineajeitaquena, piquemajeitaquena.

Icoasanotaque Tasorentsi aninteri, aisati aninteri ashanincapee.

(Mt. 22.34-40; Mr. 12.28-34)

²⁵ Pashini quitaiteiri ijatashitaqueri iotasanotirori isanquenareni Moishishi. Icoavetaca incomitacayearime Jesoshi; icantapaqueri:

—Oametanari, zpaita nanteri nosavicanteari inquitequi, nuncantaitiyempani?

²⁶ Yacanaqueri:

—zPaita ocantiri isanquenare Moishishi?

²⁷ Icantiri:

—Ocanti isanquenare: “Ocameetsati anintasanoteri Tasorentsi: tempa iriotaque Avincatsarite. Cameetsa anintasanojeiteri catsini. Aisati oquempetaca arosati nintajanca, anintasanojeiteri itsipapee ashanincapee, impoji antime inquitequi”.

²⁸ Icantiri:

—Queario picantaque: ariorica pimatero avinti, ari pincantaitiyempani pintime inquitequi.

²⁹ Iotaque iriori te irinintasanoteriji maaroni ishaninca, iro cantaincha icoaveta iri-manerome. Irootaque isampitantariri:

—Jaoca itimiri noshaninca noninteri?

Iquenquetsatacotiri samariasati, neshinoncatiriri jorio.

³⁰ Yacanaqueri Jesoshi:

—Noshiacantempiro. Iquenanaque jorio avotsiqui. Iponeaca Jerosarequi, irijateme nampitsiqui pajitachari Jerico. Nianqui avotsiqui imapocaqueri coshitantatsiri, yaavajiri, tapi. Isapocajiri, yaitaqueri iitsaare, oshequi ipasanataqueri, tac, tac, tac. Impoiji yojokitsempequitaqueri avotsiqui, irotaintsi incame.

³¹ Ari impoiji iquenanaque avotsiqui saserote; jorio ini aisati. Ineavetapaacari ishaninca yoashinonqueetaqueri, iro cantaincha yanampitanaqueri, te irinешinoncateriji.

³² Aisati iquempetaca aparoni Irevita, iquenapaaque avotsiqui. Ineavetapaacari ishaninca, iro cantaincha aisati yanampitanaqueri, te irinешinoncatimateriji.

³³ Impoiji, ari iquenapaaque iriori aparoni samariasati. Inashita irinti, te irishanincateariji jorio. Iro cantaincha ineantapaacariri yora ashinoncaincari, inешinoncatapaaqueri.

³⁴ Ijatashitaqueri, yaavintapaaqueri, aisati ipashicaqueri ora itoyeetaqueri. Ainiro yamaqueri aisati samariasati imorane. Ari yaajiri ashinoncaincari, yoanquetaqueri imoranequi, yaanajiri anta otiminta pancotsi. Anta cameetsa inешinoncatapaaajiri aisati, yaavintapaaajiri.

³⁵ Ari oquitaitetamanaque icoaque samariasati irovaanajea. Icantiri ashitarori ivanco: “Jerica quirequi. Nocoaque pincavintsayeri yoca shirampari. Terica irimoncarateajiquirequi, ari nompajempi coajica pashini”.

³⁶ Ari itimi mava neaqueriri ashinoncaincari avotsiqui. ¿Jaoca itimiri ishaninca nintasanotiriri?

³⁷ Yacanaqueri:

—Tempa yora nешinoncatiriri.

Icantiri Jesoshi:

—Aisati pinquempeteri, pinешinoncajeiteri pishaninca, maaroni.

Iquenquetsatacotiro Marita aisati Maria.

³⁸ Impoiji iquenanaque avotsiqui Jesoshi, icarajeitiri iroamerepee. Yareejaitapaaca nampitsiqui. Oneavajiri tsinane pajitachari Marita, ocantavaqueri:

—Tsame, pijajeite novancoqui.

³⁹ Otimi anta ovancoqui ireento, opajita Maria. Osaviquimotaqueri Avincatsarite iitiqui, oquemisantavaqueri icamantaquerori.

⁴⁰ Iroori Marita, oshintsishintsiyetaque, ovetsicayetiniri paitaricapee. Impoiji ojatashitaqueri, ocantaqueri:

—Novincatsarite, pamene apaniro novetsicayetimpiro poyeari. Orari eentio, te amita-cotenaji. Pincantero amitacotenata.

⁴¹ Yacanaquero:

—Oshequi piquenqueshiretaquero povetsicaquero ayeari, poameetsayetaquero paitapeerica. Oshequi piquenqueshireyetaquero. Ocameetsayeveta, iro cantaincha timatsi aparoni cameetsasanotatsiri:

⁴² irootaque ocoaqueri pireento, tecatsi cantimenterone.

11

Yora Jesoshi yoamejeitiri iroamere iquenquetsatacaajeitiri Tasorentsi.

(Mt. 6.9-15; 7.7-11)

¹ Pashini quitaiteri iquenquetsatacairi Jesoshi iriri. Ari ivecaratantacarori, icantiri iroamere:

—Novincatsarite, yora Joani yoamejeitaqueri iroamereni iquenquetsatacaajeitaqueri Tasorentsi. Nocoaque meeca pinquempetajeari avirori: poamejeitena nonquenquetsat-acayeri narori.

² Icantiaqueri:

—Ariorica pinquenquetsatayeri, jero oca, pinquempeterori:

Apa jenoquisati, oshequi picameetsati catsini,

nocoajeitaque pimpincatsariventajeitena, maaroni.

Ocameetsati nomajeitimpiro maaroni picoacaajeitaquenari,

nonquempeteari iriori inquistati yantajeitimpiro iriori maaroni picoacaajeitiriri.

³ Pimpapinitenaro maaroni quitaiteri noyeari coiteimotanari.

⁴ Eiro piquishimentanarotsi caari cameetsatatsi nantiri, irointi picavintsayena:

tempa nocavintsaaajeitiri noshanincapee.

Eiro pishinetiritsi camaari irantacayena caari cameetsatatsi.

Icanti Jesoshi: “Ariorica pincoacotasanoteri Tasorentsi coiteimotaquemperi, impasanotempiro”.

⁵ Aisati icantaqueri Jesoshi:

—Pamene, noshiacantempiro aisati. Oquempetaca ariorica pijatashiteri pishaninca nianquuite pamanapeeri itantane. Pincantapaaqueri:

⁶ “Nocoi pimpena mava pitantane noacaajeiteariri noshaninca. Iroaquera yareeta-paaca, tecatsi nompavaqueriri”.

⁷ Aamaaca ari incantavaquempime: “Eiro pashereanatsi, novochoquineni. Maajeive-taquena: narori, notomipee, maaroni. Yavitaca oni ashitacorontsi. Tecatsi noncantea nontinaye aca nompantempirori notantane”.

⁸ Pishaninca inaveta, iro cantaincha eirorica icoitsi intinaye impantempiri itantane. Iro cantaincha te incoyeji aisati pampiitapiniteri, irootaque intinaantajeari, tinare, impaque-mpiro picoacotaqueriri.

⁹ Aisati oquempetaca: ariorica pamanapiniteri Tasorentsi, impapinitempiro pincoacoteri. Ariorica pincoapiniyetero paitarica, ari paajero. Ariorica pinquenquetsatacaapini-teri Tasorentsi, ari inquemisantempiri.

¹⁰ Queario, ipasanotee Tasorentsi maaroni coiteimojeitaqueri: te irimashitsateji, inta-cojeitaquee.

¹¹ Pamene, incoacotempirica pitomi tanta iroyeari, *zarimpa* pimpaqueri mapi? Incoacotempirica shima iroyeari, *zarimpa* pimpaqueri maranque?

¹² Ariorica incoacotempi iitsouqui teapa, *zarimpa* pimpaqueri quitoniro? Eiro pipiritsi, irointi pimpasanoteri yoyeeyetari.

¹³ Pineaquero, te pincameetsajeiveeteji, iro cantaincha piojeiti picavintsajeitiri pito-mipee. Tempa aisati iotasanoi irinti Apa jenoquiniri icavintsajeitaquee arori. Ariorica pincoacojeiteri, intiancajeitempiro Ishire iriori amitacojeitempie.

Incantayeti atiripee: “Irio Jesoshi camaari”.

(Mt. 12.22-32; 12.43-45; Mr. 3.20-30)

¹⁴ Pashini quitaiteri ineaqueri Jesoshi shirampari imasantitacairi camaari. Itasonca-coventajiri Jesoshi, yoavisacotajiri, irosati ineaveetanajaja aisati. Yoajeitanaque cavaco maaroni neajeitaqueriri.

¹⁵ Iro cantaincha incantayeti aparopee:

—Ishanincatacari Jesoshi Satanashi: yora ivincatsarite camaari, irootaque imatantarori yoavisacotiri neiriri camaari.

¹⁶ Itimi pashini tseenquiriri Jesoshi, icantiri:

—Intsite, pintasoncante, niotantempiri queariorica piponeaca inquitequi.

¹⁷ Iro cantaincha iotaque iriori iquenqueshirejeitiri. Icantiri:

—Ariorica irimanatavacaajeitea atiri, tempa aitaque impoyereavacaajeitaquea. Aisati ariorica inquisavacaajeitea ashaninca, tempa ari irinijantareajeitanajeri.

¹⁸ Aisati oquempetaca, ariorica inquisajeiterime Satanashi iamaaririnte, *zjaoca* incante-teri impincatsajeitantaririme?

¹⁹ Aisati picantayeti: “Irio Satanashi amitacotiriri Jesoshi yoavisacotiri neiriri camaari”. Iriome amitacotenaneme noavisacotantariri, *zjanica* amitacotiriri pishanicajei yoavisacotantariri neiriri camaari? *zIrisatimpa* camaari pishaninca?

²⁰ Iro cantaincha itasoncacaquena Tasorentsi noavisacotantariri neayetiriri camaari, piojeitanteari meeca quiso yoajeitaquempi Tasorentsi, icoaque impincatsariventajeit-empi.

Jero aisati ishiacantiriri Jesoshi:

²¹ —Pamene, oquempetaca oca: ontimerica shintsitatsiri shirampari ivesamento, ichacopite, maaroni, tempa irishentasanotero ivanco. Eiro ishinetriitsi incoshiyeeteri irovaararo.

²² Iro cantaincha impoquerica anaacotiriri ishintsitasanoti, iranaacotapaaqueri irinti irantapaaqueri, impoiiji irapitsatapaaqueri yoantamento. Impoiiji incoshiteri irovaararo, impajeiteri ishanincepee iriori.

²³ Iquisajeitaquena maaroni caari oijajeitana, itseencajeitaquena maaroni caari amita-cotana.

²⁴ Ariorica iroavisacotajea neavetariri camaari, ocameetsati iramaventajeari: yapiita-jiricari aisati. Ishiaquero oca: iquenayeti camaari caaraiteriqui, icoayevetaro pancotsi irisavicanteameri. Tecatsi irinee, irootaque iquenqueshiretantacari: “Nompianajeta anta pancotsiqui noponeacanta”.

²⁵ Ariorica impiaje, irineapajero pancotsi, opishitaca. Vetsicayetaca irisavicantapeem-pari aisati.

²⁶ Impoiiji irijataque incajemeri itsipapee iyamaaririnte, incarate oshequi. Eiro icameet-satitsi camaari catsini, yora incajemeri. Pineaquero, oca pancotsi oshiaqueri neiriri

camaari. Ariorica iravisacotaje, ocameetsati iramaventajeari camaari: yapiitajiricari irineajeri aisati. Ariorica irampiitajeri irineajeri, catsiqueti irasanoteri.

Icanti Jesoshi: "Iquimoshirejaitaque maaroni quemisantatsiri".

²⁷ Ari itimi oshequi quemajetaqueri Jesoshi. Antearojenca canti aparoni tsinane:

–Tempa ocameetsati oquimoshireventiri Jesoshi iriniro.

²⁸ Iro cantaincha icanti:

–Je, queario, iro cantaincha iquimoshiretasanajeitaque maaroni quemajeitirori irineane Tasorentsi, aisati maaroni quemisantajeitiriri Tasorentsi.

Icantiri Jesoshi atiri: "Ioti Tasorentsi pitseencajeitaque".

(Mt. 12.38-42; Mr. 8.12)

²⁹ Ari yapatotimentajeitari Jesoshi itsipapee atiri aisati. Impoiji yoamejeitajiri:

–Te pincameetsajeiteji. Picoajeiveta pineajeitename nontasoncantajeme aisati, iro cantaincha eiro pineajirotsi aisati. Pinquengeshireteri Jonashini piotanteari:

³⁰ peerani iniaqueri anteari omani. Ocarati mava imaacotaje tsoompoina, impoiji isoquujanaji ivantequi, iotantacari ninivesati itiancaqueri Tasorentsi. Nonquempetajea coajica piojeitanteari itiancaquena Tasorentsi: tempa natiritapaaque nainti, noponeaca inquitequi.

³¹ Aisati ora ivincatsaroteni savasati, oponeaca arejiqui catsini, pashiniqui quipatsi. Oponeaca paricoti oquemisantantiriri Saromoni, peerani. Ocoaque iriotacaasanoteri. Pamene, nanaacotiri Saromoni nioti, iro cantaincha pitseencajeitaque. Coajica, ariorica irampatojeiteri Tasorentsi maaroni camajeitatsiri, incantajeitempi: "Ainiro pantane: pitseencaqueri notiancane. Irompa irointi oca ivincatsarote savasati te aneroji antane: tempa oquemisantiri Saromoni".

³² Aisati iquempeta yora ninivesatini: iquemisantirini Jonashini. Iquengeshirejitanaca, yoipacaajeitajiro caari cameetsatsi yantajeitiri. Nanaacotiri nainti Jonashini, iro cantaincha te pinquemisantajeitenaji. Coajica incantempi Tasorentsi: "Iquemisantirini ninivesatini Jonashini: avintiquea, ¿paita caari piquemisantantari notiancane?"

Icanti Jesoshi: "Ariorica piquemisanti pishiaquero tsiomentotsi".

(Mt. 5.15; 6.22-23)

³³ Aisati icantajeitiri Jesoshi:

–Ariorica pitsiotiro tsiomentotsi, ¿arimpa pimanaquero jaocarica? ¿Pititrompa cantiriqui? Tempa poapinitiro onantiriqui, pitsiojeitantari.

³⁴ Oca aqui oquempevetaro tsiomentotsi. Ocameetsatirica aqui, amenajeitanaque paitapeerica. Iro cantaincha terica oncameetsateji aqui, tecatsi amenanteari, oquempetaca aqueni tsiteniriqui, te ayojeiteji jaocarica aqueniri.

³⁵⁻³⁶ Ocameetsati piotacotea avisati piquemisantanaquericarica. Ariorica piquemisantasanoti, ari piotasantanaque, eiro pitseenquimatantajitsi. Impoiji pinquempetearo tsiomentotsi tsiotasantachari.

Irootaque icantajeitajeri Jesoshi.

Yora Jesoshi icantaqueri variseo aisati oametantirori Sanquenarentsi: "Ainiro pantanejei, iroasanquejeitempi Tasorentsi".

(Mt. 23.1-36; Mr. 12.38-40; Ir. 20.45-47)

³⁷ Impoiji icantaqueri variseo Jesoshi:

–Tsame ajate novancoqui, noacayempi.

Ari yojatanaqueri, yoacaapaacari.

³⁸ Te inquivacoteaji Jesoshi, irootaque yoantanacariri cavaco variseo.

³⁹ Icantiri Avincatsarite:

–Queario, pamejeitacaro piquivapinitiro pajo aisati piveratote: iro cantaincha apatiro otapiiqui. Te pojoqueroji caari cameetsayetatsi timatsiri osantegui. Piquempetacaro avirori: piquengeshiretapinitiro picoshiyeti aisati pantapiniyetiro caari cameetsatsi.

⁴⁰ Te pinquengeshirenroteaji. ¿Apatirotimpa yovetsiquiro Tasorentsi paco? Tempa aisati yovetsiquiro piquengeshireantari.

⁴¹ Pipashiyetari ashinoncaancari coiteimovetariri, iro cantaincha te pincavintaasaanoteriji. Ariorica pincavintaasaanoteri itsipapee pishaninca, ari pincameetsataque.

⁴² Pashinoncaajeitea avirojei. Queario pipaarrantapinivetari Tasorentsi piirequite capichaji, iro cantaincha tequera omoncarateaji. Timatsi pineacameetsatiri avirori aisati caari pineacameetsati. Iro cantaincha te omoncaratearoriji icoacaquempiri Tasorentsi. Te pininteriji Tasorentsi aisati te pininteriji pishanincapee. Ocameetsati pimperi Tasorentsi quirequi, iro cantaincha eiro pipeacotirotsi pininteri aisati panteneri icoacaquempiri.

⁴³ Pashinoncaajeitea avirojei. Ariorica irampatojeitea ashaninca inquemisantaran-teariri Tasorentsi, picoanirojeiti impincatsajeitempi avinti. Ariorica pinquenayetanaque nampitsiqui, picoaque cameetsa iraacameetsajeitempi atiripee.

⁴⁴ Queario, iroashinoncaajeitempi Tasorentsi. Piquempetacari camatsiri tijachari quipatsiqui, imanaca; iro cantaincha yavisajeitanaque atiripee, te iriojeiteji irotaintsi irati-querime camayetatsiri patsaatsiri. Aisati avirori, pimanayevetaro caari cameetsayetsati pantayetiri.

Irootaque icantaqueriri Jesoshi variseopee.

⁴⁵ Ari icantiri oamentantirori isanquenareni Moishishini:

—Oametantatsiri, aisati narorijeji piqusaquena.

⁴⁶ Icantiri Jesoshi:

—Je, aisati avirori iroashinoncaajeitempi Tasorentsi. Oshequi piperanayetacari ashan-inceapee, iro cantaincha te pintacoteariji.

⁴⁷ Queario, pashinoncaajeitea. Pimoncarajeitacari pishanincani oajeitiriniri camantan-tatsiniri.

⁴⁸ Avirojei oayeri. Pintimitaquearicame peerani avirori, poajeitaquerime aisati yora camantantatsiniri.

⁴⁹ Iotacojeitaquempi Tasorentsi, icanti: “Nontianqueneri atiri quenquetsatayerineri, iro cantaincha iroyetavaqueri aparopee, irio itsipapee inquisavaqueri, intiancaaranta-geri”.

⁵⁰ Ainiro pantajeitiri maaroni: pashi poajeitiro poanti. Yora peeraniniri poajeiterime, irosati picanta meeca poajeitiri quemisantajeitiriniri Tasorentsi.

⁵¹ Pishanincaajeitacari oaqueriniri Averini. Aisati pishanincaajeitacari oaqueriniri yora Sacariashini: yoyeetaqueri iriori anta ivancoqui Tasorentsi. Ainiro pantajeitiri maaroni, irootaque iroashinoncaimentempiri Tasorentsi.

⁵² Poametantavetaro isanquenareni Moishishini, iro cantaincha pashinoncaajeitea: tempa pamatavijeitiri ashaninceapee. Te pincoajeiteji pioteri Tasorentsi, aisati te pincoa-caajeiteriji iriojeitajeri iriori ashaninceapee.

⁵³ Irootaque icantajeitaqueriri maaroni, impojji isoquijanaji. Iquisajeitaqueri yora variseopee aisati yora oametantirori sanquenarentsi, aisati iquenquejaaajeitaqueri. Aisati isampiyevetacari paitapeerica,

⁵⁴ icoajeiveta incomitacayearime. Icoaveta incomitacayearime iraacantantearimeri.

12

Yora Jesoshi yoamejeitiri iroamerepee.

(Mt. 10.28-33; 12.32; 10.19-20)

¹ Ari yapatotimentajeitari Jesoshi oshequi catsini atiri, itsitacaavacaajeitanaca. Irosati icantantari iroamerepee:

—Paamayeariyea variseopee, yamatavijeitimpicari. Oshequi yamatavitanti.

² Ijijeivetaca tecatsi iotatsine yamatavijeivetacari, iro cantaincha coajica iriotacojeitana-queri maaroni atiri yashi yoero yamatavitanti.

³ Aisati aviroripee, paitarica pimanavetacari picantiri meeca, inquemajeitero coajica. Paitarica pincanteri apaniro anta pivancoqui, irovaayetajero anta yapatojeitanta atiripee.

⁴ Meeca, noshaninca, noncamantempi: eiropitsaroacaaritsi yora atiri coatsiri iroyempi. Ariorica iroyempi, iro cantaincha irointi iroyeete pivatsa. Tecatsi incantero pishire.

⁵ Irinti Tasorentsi pimpincatsate: incoaqueerica, iroyempi. Iro cantaincha aisati icoaque-rica, irimatero intianquempi Sharincaveniqui. Irooquea pintsaroacayeari irointi pijate Sharincaveniqui.

⁶ ¿Ivinaronimpa tsimeripee? Te impinatasanoteaji, iro cantaincha iojeitiri Tasorentsi: te impeacojeiteariji.

⁷ Aisati oquempetaca, iotasanojeitaquempi: ioti jaoca ocaratiri piishipee. Iquem-poyeajeitaqueri tsimeripee, iro cantaincha avirojei iquem-poyeasanojeitaquempi. Eiro picantashiretitsi, irointi piveshireimenteari Tasorentsi.

⁸ Aisati piojeitavaquero oca noncantempiri: eiropipashiventacaanatsi, ariorica pinca-mantajeiteri itsipapee atiri piquemisantaquena, aitaque noncamanteri Apa anta inquite-qui pishanincataquena. Tempa noponeaca inquitequi, natiritapaaque.

⁹ Iro cantaincha ariorica pimpashiventacayena aca quipatsiqui, aisati avirori nom-pashiventacayempi anta inquitequi.

¹⁰ Ariorica incantimatena atiri, ariorica incavintsayeri Tasorentsi, eiropiquenqueshire-tajirotsi yantajeitiri. Iro cantaincha ariorica incantimajeitero Ishire Tasorentsi, eiropicavintsairitsi Tasorentsi catsini.

¹¹ Ariorica irayeetempi anta yapatotapinijeitanta, aisati anta joeshiqui, aisati anta pincatsariqui, eiro pitsarocaaajeitaritsi. Eiro piquenqueshiretitsi: “¿Paita noncanteriri?”

¹² Ariorica irayeetempi, oametempi Ishire Tasorentsi paitarica pincanteriri.

Icantajeitiri Jesoshi: “Pinevetarocari vaararontsi”.

¹³ Impoiji icantiri aparoni shirampari:

—Oametnari, ipanaquerini apani iyeca maaroni timimojeiveitariniri. Tecatsi impena nainti. Pincanteri iye impaarantajena narori irovaararo.

¹⁴ Yacanaqueri:

—Eiro nocantiritsi. ¿Narompa joeshi, noncantanteariri?

¹⁵ Icantajeitiri maaroni apatotimentajeitariri:

—Queariompia: pinevetarocari yashiyetari itsipapee, eiro oveshireacaasanotimpitsi.

¹⁶ Impoiji ishiacaventiniri oca:

—Otimi ipatsite ashitaarantincari. Oshequi onintiro panquirentsi quipatsi, cameetsa oshiocayetanaque ivanquirepee.

¹⁷ Yaayetajiro oitsoquipee, inquemoyeantearori ovancopeequi iroori, iro cantaincha opiojeitaca pancotsiqui. Te onajeitearaji maaroni. Iquenqueshiretaca:

¹⁸ “¿Jaocasa noncanterori? Tecatsi noantearori maaroni. Jaa, niotaque meeca: noshoveajero pancotsijaniqui, nantacantajero antearo pancotsi noantearori maaroni novanquirepee, aisati maaroni novaararo.

¹⁹ Oshequitaque meeca maaroni, tecatsi coiteimotajenaneri. Peerani catsini, eirotat onsonquitatsi; meeca nomaoree oshequi osarintsi. Cameetsa noapinitea, noshinquitapinitea, noveshireimentearo maaroni timimotanari”.

²⁰ Iro cantaincha icantiri Tasorentsi: “Te piotacoteaji. Meeca tsiteniri noyempi; impoiji, ¿janica ashitajearoneri maaroni timimojeivetimpiri?”

²¹ Pineaquero, te irioteji maaroni coatsiri iroshequiyero irovaararo. Oncameetsateme irovetsiquerome irisavicantearime inquitequi.

Icantiri Jesoshi: “Pincanteri Tasorentsi inquemoyeaventempi”.

(Mt. 6.25-34)

²² Aisati icantiri Jesoshi iroamere:

—Eiro piquenqueshiretatsi jaoca payerori poyeari aisati pinquitsaateari.

²³ Tempa Tasorentsi oaneaquempiri. ¿Opomerentsitimotarimpa meeca impaquempi poyeari aisati piitsaare?

²⁴ Pinquenqueshireteri jaoca icantari tsimerpee: te impanquitanonteaji aisati te inquemoyeantonteaji iroyeari pancotsiqui, iro cantaincha ipapinitiri Tasorentsi yoari. Pamene, inquemoyeaventajeitiri Tasorentsi tsimerpee iriori, tempa aisati avirori inquemoyeaventasanajeitimpi.

²⁵ ¿Paita patsipetashitantarori picantashireti? ¿Pijitimpa ariorica pincantashirete aiqero pijatatiye pantearitasanotanaque?

²⁶ Pineaquero, patsipetashitacarico picantashireti. Tecatsi paye.

²⁷ Pinquenqueshiretero jaoca ocantari oteaquipee tojari. Te ontsameetanonteaji, aisati te ontijanonteaji oitsaare, iro cantaincha ocameetsatasanotaque. Peerani oshequi yoaneencani Saromoni, iro cantaincha te inquempetearoji oteaquipee: ocameetsatasanotaque irointi.

²⁸ Pineaquero, yoaneencaquero Tasorentsi oteaquipee. Otimaveta, impoiji oshintsiti oshimpetanaji. Peerani pintume avirojei: tempa pijiti inquenqueshiretaquempi avirori. ¿Paitasa pitseencantariri?

²⁹ Eiro piquenqueshiretirotsi paitarica poyeari, aisati paitarica pireri: inquemacayempi Tasorentsi.

³⁰ Tempa icoajeitaque atiri iroapinijeitea. Iro cantaincha iotaque Tasorentsi maaroni coiteimotaquempiri.

³¹ Ariorica pimpincatsatanoteri, impaquempi maaroni coiteimotaquempiri.

³² Noamere, oshequi inintaquempi Apa Tasorentsi: icoasanotaque impincatsariventajeitimpi, incavintsaasanajeitimpi.

³³ Pimpimantero pashiyetari, pimpayeteri ashinoncaincari ovinaro. Impoiji iminatempi Tasorentsi anta inquitequi. Ontimasanote pivaararo anta: eiro opatsaajitsi, eiro opitsititsi, eiro icoshiyeetajimpitsi, eiro yapeajirotsi cajiro.

³⁴ Ariorica otimi pivaararo aca quipatsiqui, oshequi piquenqueshiretaquero timayetatsiri quipatsiqui. Ariorica otimi pivaararo inquitequi, ari piquenqueshiretapinitiri Tasorentsi.

ICantiri Jesoshi: "Pivetsicajeitea, te pioteji jaoca oncarate impocashijeitempi Tasorentsi".
(Mt. 24.45-51; 25.1-13; Mr. 13.33-35)

³⁵⁻³⁶ Jeroca icantaqueriri Jesoshi iroamere:

—Paamaajeiteari pivincatsarite, pivetsicasanojeitea. Pinguempeteari yora inampire ashitarori ivanco. Ijataque yora ashitarori irineeri ishaninca irayero ijina. Yaamaajeitari inampire anta ivancoqui. Ariorica irareetapaajea incoapaaje irashitareavajeneri, aisati incoapaaje irineapaajero ovetsicayetaca ivanco. Ariorica otsitenitanaje, icoaque ontsiotea ivanco. Aisati icoaque intinaye inampirepee, inquitsaajeitea.

³⁷ Ariorica irineapaajeri yovetsicajeitaca, inquimoshirejeitaque maaroni. Yora ashitarori ivanco irisavicacaajeiteri maaroni inampirepee, iroacaajeiteari.

³⁸ Iro cantaincha te iriojeiteji jaocarica oncarate impocantajeiri: ariorica iroaquera imaajeiti, ariorica nianquuite. Iro cantaincha ariorica irineapaajeri inampire yovetsicajeitaca, ari inquimoshirejeitanaque, maaroni.

³⁹ Piojeitavaquero oca noncamantempiri: arioricame pioteme impoque tsiteniriqui coshitantatsiri, tempa pisaaquiteme poimpiantavajearimeri, eiro pishinetirime in-coshitempime. Iro cantaincha te pioteji jaocarica oncarate impocanteari.

⁴⁰ Aisati noquempevetari coshinti, te noncamantempiji jaocarica oncarate nompocantajeiri. Peerani noponeaca inquitequi, natiritapaaque. Coajica nompiaje. Pinguenqueshirejeitena, paamaajeitajena: nomapocapaimpicari.

⁴¹ Ari isampitiri Petero:

—Novincatsarite, ¿apanirompa poamejeitena naroripee? Irompa tericampa, ¿picoaquempa iriojeitanaque maaroni atiri?

⁴² Yacanaqueri:

—Noquenuetsatacaajeitiri maaroni quearioventirori nocoacaajeitiriri. Iquempetaca ivatorote atiripee, icoacaqueri aparoni iratirite iroacaapiniteari itsipapee. Impoiji ijataque ivatorote jaocarica.

⁴³ Ariorica iroacaapiniteari cameetsa, ariorica impocaje ivatorote, iroveshireimenta-paajeiri.

⁴⁴ Incantapaajeri: "Cameetsa piquemisantaquena. Meeca aviro amenajeitenarone maaroni timimojeitanari".

⁴⁵ Iro cantaincha, incanterica yora iratirite: "Eirotsita ipoqui novatorote". Icoacaavetari ivatorote incavintsayerime itsipapee, iro cantaincha imapocaqueri iquisajeitaqueri, ipasajeitaqueri: shirampari, tsinane, maaroni. Oshequi iperataca, oshequi ishinquitaca.

⁴⁶ Ari pashini quitaiteri impocaje ivatorote, irimapocapaajeri. Iroasanquetapaajeri, inquempetacaanteri itsipapee caari quemisantiri.

⁴⁷ Pineaquero, iovetacaro icoacaavetacariri ivatorote, iro cantaincha te incoyeji iri-matero. Irootaque impasatacanteariri, aiquero catsini impasatacantasanteri.

⁴⁸ Iro cantaincha eiro yoasanquetasantoritsi caari iotatsi. Eiro icoacotasantoritsi oshequi yora caari iotatsi. Irintiquea iotasantoritsi, incoacotasanteri irinti.

ICantiri Jesoshi iroamere: "Coajica oshequi inquisavacaimentajeitena atiripee".
(Mt. 10.34-36)

⁴⁹ Aisati icanti Jesoshi:

—Nopocaque quipatsiquica inquisavacaimentantenari atiripee, nocoasantaque noma-majeitero maaroni nopocashitiri.

⁵⁰ Oshequi noquenueshireaca: irotantsi oshequi nonquematsicatearo.

⁵¹ ¿Pijitashijeivetampa nopocashijeitiri atiri noimajerentajeiteri, cameetsa iraacameetsa-tavacanteari? Teve, irointi inquisavacaimentajeitena.

⁵² Ariorica incarate apapacoroni savicatsineri pancotsiqui, inquisavacaajeitea. Incarate mava quisherineri yora apite ishaninca.

⁵³ Ariorica yora ashitariri inquisheri itomi, aisati itomi iquisheri iriri. Ariorica on-quishero airo evatayero, onquishero iroori airo.

Pinguenqueshiretea piotanteari iroametempiro Tasorentsi.
(Mt. 16.1-4; Mr. 8.11-13)

⁵⁴ Impoiji icantajeitiri apatotimentajeitariri:

—Ariorica pineaquero antearo tampea amaquero mencori otsitenishaanaque, picanta-jeiti: "Coraqueve incani". Tempa piojeitaque ompoquerica incani.

⁵⁵ Ariorica oquitamaroitetanaji, picantajeiti: "Eiro oparii incani, ari osarianaje". Tempa aisati piojeiti,

⁵⁶ irointi pimanaquero piojeitiri. Piojeitaque ompariaquerica incani. Iro cantaincha te pincoajeiteji piojeite oshequi ompomerentsitimojeitempi coajica.

⁵⁷ ¿Paita caari picoanta piojeitero queariosantoritsiri?

⁵⁸ Ariorica inquisitiontempiri pishaninca quirequi piveviteriri, incoaquericira anajampi joeshequi. Ari tequeratsitarica irareetacayempi, pincantanaqueri: “Eiro piquisanatsi, coajica nompinatajempi”. Yoiminqueimpicari caravosoqui.

⁵⁹ Ariorica iroiminqueaquempi, incoacotasantempi maaroni quirequi pivevitiriri. Eirorica pipiritsi, eiro yoimisoquijajimpitsi.

13

ICantiri Jesoshi atiri: “Pinquenqueshireajeitea, pojocajero caari cameetsatatsi pantapinijeitiri”.

¹ Impoiji ipoqui pashini atiri, icamantapaaqueri Jesoshi:

–Ijajevetaca carireasatipee anta Jerosarequi iroajeitenerime Tasorentsi ivira. Jeriniro yora Piratoniro yoacantanirojeitaqueri carireasatipee anta ivancoqui Tasorentsi. Oconojatacaro irirajani ashanincani irirajani ivira yoajeitineriri Tasorentsi.

² Yacanaqueri Jesoshi:

–¿Pijitirrimpa yora carireasati antasanojeitironiri caari cameetsatatsi ishinetantariri Tasorentsi yoacantaqueri Pirato?

³ Noncamantempi: te iro incamantea. Iro cantaincha queariompiyea: eirorica piquenqueshiretajatsi, aisati eirorica pojocajirotsi caari cameetsatatsi pantapinitiri, pinquempjeiteari yora yoyeetiri. Yoajeitimpicari, maaroni.

⁴ Aisati peerani otireanaji antearo mapipanco anta Shiroequi, otsinacapaaqueri 18 shirampari, icamajeitaque. ¿Paita icamajeitantacari? ¿Iriompa antasanotirori caari cameetsatatsi icamantacari? Te. Iquempjeitacari maaroni ishiramparirinte.

⁵ Pinquenqueshireajeitea avirori, pojocajero caari cameetsatatsi pantapinijeitiri. Eirorica piquenqueshirejeitatsi, aisati pincamajeite avirorije.

⁶ Impoiji ishacaventajeitineri oca:

–Ipanquitaquero shirampari iyera anta irovamashitequi. Ocarataque peerani oshioaque, impoiji yamenapinivetaro oitsoqui, irayerome: iro cantaincha te oitsoquiteji.

⁷ Impoiji aisati icantiri yora tsameetiniriri iipatsite: “Pamene, ocarataque mava osarintsi nopocapiniveta nayerome oitsoquipee. Te ontimeji catsini. Atsipetashitaca otimi. Pimpesajero nompanquitantearori paitapeerica cameetsatsiri”.

⁸ Yacanaqueri tsameetiniriri ivatorote: “Ari onavaquetsita meeca osarintsiquica. Nonquiyetero quipatsi ometsoitetanteari, aisati noapinitenero itia pivira, cameetsa ontimanteari oitsoqui.

⁹ Impoiji ariorica ontimanaque oitsoqui pashini osarintsi, tempa cameetsa, eiro apeshirotsi. Iro cantaincha eirorica otimitsi oitsoqui, nompesajero”.

Yoavisacotiro saavaroqui Jesoshi yatajeaonquiri camaari.

¹⁰ Pashiniqui saavaro yoametanti Jesoshi anta yapatotapinijeitanta joriopee.

¹¹ Otimi anta pancotsiqui aparoni tsinane yatajeaonquiri peerani camaari. Ocarataque meeca 18 osarintsi omitiaque, irosati ocanta omitiaque: tecatsi oncantajea oncatiaje.

¹² Ineantacarori Jesoshi, icajemaquero:

–Caatanaque, meeca noavisacotajempi.

¹³ Ipamitaquero, irosati avisacotantanaja. Cameetsatanaji, ocatianaja. Ocatanaque:

–Yoavisacotajana Tasorentsi, tempa icameetsati.

¹⁴ Yora jivatacantantatsiri anta ivancoqui Tasorentsi iquisaqueri Jesoshi. Icantajeitiri apatojeitainchari:

–Ocameetsati antavejeite 6 quitaiteri, iro cantaincha ariorica omoncaratapaquea quitaiteri 7 ocameetsati amaoreasanojeitanaque. Eiro antaveetitsi catsini. Ariorica picaoque pavisacojeitaje, pimpoque pashiniqui quitaiteri, eiroquea pipoquitsi saavaroqui.

¹⁵ Ipiatanacari Avincatsarite, icantanaqueri:

–Oshequi pamatavinrotanti. Pantavejeiti avirori saavaroqui. Pamene, ariorica airi pivacate imire saavaroqui, tempa pitsatacoreiri paantanacariri anta otiminta nija. Aisati piquempetiri pimorane, maaroni. Queario, picavintsaajeitiri pivirapee saavaroqui.

¹⁶ Iro cantaincha caari oni pivira oca tsinane, irointi pishaninca. Peerani omantsiataque: tempa ocameetsataque ancavintsayero saavaroqui.

¹⁷ Iquemantarori oca, ipashiventajeitanaca maaroni quisajeitaqueriri Jesoshi. Irinti itsipapee atiri iveshireimentajeitacari Jesoshi, icantajeiti:

–Ocameetsajeitaque yantayetiri Jesoshi.

ICamantiri Jesoshi iroamere paita oshiacaventiri moshitasa aisati tapiacairori tanta. (Mt. 13.31-34; Mr. 4.30-32)

¹⁸ Impoiji icanti Jesoshi:

—¿Piojeitimpa jaoca icanta Tasorentsi ipincatsariventanti? ¿Jaoca noncanterori noshia-caaventantempirori?

¹⁹ Oshiaquero oitsoqui moshitasa ipanquitiri shirampari iroanequi. Oshiocanaque, oquimotanaque, oshiavetacaro inchato. Ipcapiniti tsimeri, yaatapinitiro ojempequi.

²⁰ Yapiitajiro, icanti:

—¿Jaoca noncanterori noshia-caaventantempirori?

²¹ Oquempetacaro tsinane, airo tapiacairori tanta capichaji. Oconoiro oshequi tiri-copane otapiantanacari. Otapiaquero maaroni, ometsotantacari. Aisati iquempetaca ashaninca. Intimerica aparoni antirori caari cameetsatatsi, irantacaajeiteri ishaninca, maaroni.

ICantiri Jesoshi ishaninca: “Pimpomerentsiventearo pareetanteari inquitequi”.
(Mt. 7.13-14, 21-23)

²² Ari iquenaquenayeti Jesoshi nampitsipeequi, yoametantayeti. Icoaque irijate Jerosarequi.

²³ Isampiyeeiteri:

—¿Jaoca incarajeiteri oavisacojeitajanchane? ¿Arimpa incarate aparopee? Yacanaqueri:

²⁴ —Noshia-cantempiro. Oquempetaca orijaniqui omorojaniqui anqueanteari inquitequi. Intime oshequi coavetachane irijateme inquitequi, iro cantaincha eiro imatirotsi irareetearo. Pimpomerentsiventearo pareetanteari inquitequi.

²⁵ Aisati oquempetacaro yantiri ashitarori ivanco. Itimi tsoompoina iriori, yashitacotaca, iyavitiro ashitacorontsi. Impoiji pimpocajeivetea avirorije, pincantavetapaaqueari: “Novincatsarite, pashitareenaro, nonqueanaque”. Iro cantaincha incantavaquempi: “Te noijeitempiji jaocarica piponeari”.

²⁶ Impoiji pincantajeiveteari: “Peerani aitaque pitsipajeitaquena nonampiqui avejaitaca, aisati poamejeitaquena”.

²⁷ Ari incantempi: “Te niotempiji. Pijataje, pimpianaje. Oshequi pantayetiro caari cameetsatatsi. Te pincameetsateji”.

²⁸ Impoiji oshequi poashiretasanotanaquea catsini, piraasanotanaquea aisati. Pineaqueri Avarama, Isaca, Jacovo, maaroni yora quenquetsatcantatsiniri itimi jenoqui, iro cantaincha avirojei, eiro pimajeitrotsi pijate: iroimpiavajempi Tasorentsi.

²⁹ Imponeajeitaquea quemisantatsiri intatiquero, acaqueroaca, catonco, quirinca, maaroni quipatsipeequi. Irisavicajeitapaaque anta ipincatsaritinta Tasorentsi.

³⁰ Irareetasanotaquea yora pitseencajeitaqueri. Eiro yareetatsi irinti pipincatsajeitiri.

Yora Eroreshi iramataviterime Jesoshi.

(Mt. 23.37-39)

³¹ Irosati ipocantaca aparopee variseo. Icantapaaqueri Jesoshi:

—Pijate pashiniqui quipatsi. Icoaque Eroreshi iroacantempi.

³² Yacanaqueri:

—Pincamantanirotaiteri yora amatavitantatsiri: “Icanti Jesoshi: ‘Eiro noshiatsi. Noncanteeani noavisacojeiteri neiriri camaari aisati mantsiaripee: meeca, osaitequera, aisati otsipa quitaiteri. Impoiji nomoncarataquero maaroni’”. Irootaque pincanteriri.

³³ Aitaque nonquenaquenayete meeca, osaitequera, aisati otsipiniqui quitaiteri. Aisati ocameetsati noncame Jerosarequi: tempa anta icamapiniti quenquetsatpinitirori irineane Tasorentsi.

ICanti Jesoshi: “Iroashinoncaajeitea jerosaresati”.

³⁴ Aisati icantiri Jesoshi:

—Yora jerosaresati oshequi yoayetaqueri quenquetsatirori irineane Tasorentsi. Ipichaapinitaqueri itiancane Tasorentsi. Oquempetaca teapa osaramonquitiri orijanipee, oshequi nocoaveta nampatojeiterime jerosaresati: nonquemisantacayerime, iro cantaincha te incoajeiteji.

³⁵ Pamene, tecatsi amitacoterineri meeca, yojocajeitiri Tasorentsi, icantiri: “Incanteata”. Eiro ineapinitajanatsi meeca. Jaocarica intimeri pincatsatenaneri, ari irineajena aisati.

14

Yoavisacotiri saavaroqui Jesoshi eereyetatsiri.

¹ Pashiniqui saavaro itimi Jesoshi anta ivancoqui jivatacaajeitiriri variseo. Yamenasanojeitiri Jesoshi, icoaque irantero paitarica inquishmentanteariri.

² Itimi anta aparoni mantsiari, yeereyetanaque, yenoncayetanaque maaroni.

³ Isampitiri Jesoshi variseopee:

—¿Ocameetsatimpa avavisacoteri mantsiaripee quitaiterica amaoreajeitantari?

⁴ Iro cantaincha imajerejitanaque, te irancaniroteji. Ari yacatsavacotaqueri Jesoshi mantsiari, yoavisacotiri, impoiji itiancajiri ivancoqui.

⁵ Ari icantaqueri yora amenashejeitaqueriri:

—Tempa pantavejeiti avirojei saavaroqui. Ariorica impariaque pivacate omoroqui, tempa ari paavajeri aisati.

⁶ Aisati, imajerenirojeitanaque.

Yoamejeitiri Jesoshi atiri: “Eiro pishemejeititsi”.

⁷ Impoiji yamenajeitaqueri Jesoshi yora oajeitainchari yoacajeitacari yora jivatacaajeitiriri. Icoajeiveta irisaviqueme quempeji yora pincatsari irineacameetsatantearimeri. Ari icantajeitaqueri Jesoshi:

⁸ —Ariorica iroacayempi pishaninca, eiro pisavicashitatsi quempeji yora pincatsaritatsiri. Pamene, ipoquicari pashini ivincatsaririnte,

⁹ impoiji ipoquicari yora cajemacantimpiri, icantimpicari: “Eiro pisaviquimotiritsi pincatsarica. Irisaviqueta aca irinti ivincatsaririnte”. Isavicacaimpicari anta nijantiaji, impoiji pimpashiventanaquea.

¹⁰ Irointiquea ocameetsati pisavicapaaque anta nijantiaji. Impoiji ariorica irineajempi yora cajemacantimpiri, incantempi: “Caatanaque, noshaninca, pisaviquimoteri aca pincatsari”. Irineajeitempi maaroni oajeitainchari ishanincataquempi pincatsari.

¹¹ Ariorica pincoaque irineapincatsajeitempi itsipapee, pishemeticari; impoiji ipashiventacaimpicari Tasorentsi: tecatsi neapincatsatempineri. Iro cantaincha yora caari shemetatsi incarajeiteri Tasorentsi impicatsariventante.

Jesoshi iquenquetsacotiri cajemacantavetariri ishaninca iroacaajeitearime.

(Mt. 22.2-14)

¹² Aisati icantiri Jesoshi yora cajemacantiriri:

—Ariorica pincajemacanteri atiri poacantajeiteariri, eiro picajemapinijeitiritsi pishanincasanori aisati yora ashitaarantincari. Ariorica poacaaqueari, ari iriori impiatemp, iroacaajempi.

¹³ Iro cantaincha ocameetsasatanoti pincajemacanteri irinti yora caari ashitaaran-tayetacha, yora choriyetatsiri, jempayetsiri, caari amenayetatsi, maaroni.

¹⁴ Tecatsi incantajeitea irinti impiajeitajempi iroacaajeitempi. Iro cantaincha coajica irointinaajeitajeri Tasorentsi maaroni quemisantajeitiriri. Impoiji impinatemp irinti. Te pantsipetashiteaji picavintsanti.

¹⁵ Iquemantacariri aparoni oainchari, icanti:

—Tempa oncameetsasasanaque antime anta ipincatsaritinta Tasorentsi.

¹⁶ Icantaqueeri Jesoshi:

—Oquempetaca aparoni shirampari. Yovetsicacantaquero oshequi yoari, impoiji icajemacantaqueri ishaninca iriori iroyea.

¹⁷ Ovetsicajeitaca maaroni. Itiancaqueri inampire: “Pijate, pincamantaiteri: ‘Moncarataca, vetsicajeitaca maaroni, pimpoque meeca’”.

¹⁸ Iro cantaincha te incoajeiteji irijajeite. Icantanti aparoni: “Iroaquera namanantaquero noipatsite. Nojate meeca namenaiterota, ocameetsataquerica. Pincamantajeri: ‘Eiro ipoquitsi’”.

¹⁹ Icantanti pashini icajemacantiri: “Iroaquera namanantaqueri 10 vaca. Nocoaque name-naiteri icameetsataquerica. Pincamantapaajeri: ‘Eiro ipoquitsi iroyea’”.

²⁰ Icantiri pashini: “Iroaquera naaque nojina. Tecatsi noncantea nojate”.

²¹ Ari ipianaja yora inampire camantavetariri ishaninca. Icamantapaajiri: “Icantajeiti: ‘Eiro nojatitsi noyee’”. Ari iquisanaca yora ivatorote, icantiri inampire: “Incanteata noshaninca. Meeca pijate anta nampitsiqui, pinquenayetanaque pincoacoayeteri yora caari ashitaaran-tayetachane, choriyetatsiri, jempayetsiri, caari amenayetatsi, maaroni”. Ari ijataque, icajemajeitaqueri, ipocajeitaque.

²² Ari ipiajara aisati, icantapaajiri ivatorote: “Nojaiti, nocamantajeitaqueri. Ipocajeitaque, iro cantaincha tequerata omoncarateaji”.

²³ Ari icantiri aisati: “Ari pijate anta aisati, pinquenayetanaque avotsipeequi, pincantajeiteri itsipapee impoque, nocoaque irijaasanojeitapeemparo novanco.

²⁴ Irinti yora noshaninca nojivavetacari nocajemacantavetacari, eiro catsini yoimatarotsi oca novetsicavetanariri”.

Irotaque iquenquetsatacaajeitiriri Jesoshi anta ivancoqui variseo.

Icantanti Jesoshi: “Pimpomerentsiventasanotenaro nocoacaajeitaquempiri”.

(Mt. 5.13; 10.37-39; Mr. 9.50)

²⁵ Ari iquenanaque Jesoshi avotsiqui aisati, yojajaitanaqueri oshequi atiri. Ipitso-cashijaitanacari, icantajaitiriri:

²⁶ —Niotaque pinintajaitiri piripee, piniropee, pijinapee, pitomipee, pirementee, pitsiropee, maaroni. Aisati avisati nintajaitacha avirori. Iro cantaincha pincoajaiterica pojajaitena, ocametsati nainti pinintasanojaitena catsini. Eirorica pinintasanotanatsi, tecatsi pincantea pimpeajea noamere.

²⁷ Aisati eirorica pipomerentsiventasanotanarotsi nocoacaajaitaquempiri, aisati eirorica pojajaitasanotanatsi, tecatsi pincantea pimpeajea noamere. Pinquenqueshirejaita jaocarica oncanteari.

²⁸ Oquempetaca ariorica icoaque irantacantero shirampari ivanco, irijivataque irisampiteri yora vetsiquenerine jaoca oncarate ompinatea. Impoiji irimoncarateri iirequite iriotanteari moncaratacarica.

²⁹ Eirorica ijivati iriote irimoncaratearica, icomitarocari. Ariorica irimoncaratearo ominca, ari ocarati. Impoiji tecatsi pashini iranteneri yora vetsicavetanariri. Impoiji irishirontimenteari ishaninca.

³⁰ Incantajaita: “Pineaqueri, irovetsicacanterome pancotsi, iro cantaincha te intsoncancerotero. Te intimeji iirequite, iji, iji, iji”.

³¹ Aisati yora pincatsari, ariorica inquemacoteri itsipapee atiri itiancaqueri 20,000 soraro inquisanteariri. Ariorica intime isorarote pincatsari 10,000. Te irioteji ocameetsatirica irimanatavaqueri yora pocatsineri. Tempa irijivate incajemajaiteri ishanincapee iroametatavacanteari: impoiji iriote ocameetsatirica irimanatea iroimpianteariri yora pocashiterineri.

³² Ariorica incantajaita ishaninca: “Yanaacojaitaquee, ishequitasanotaque. Tecatsi ancantea aimpiavajeri”. Ari incanteri: “Tequera irareejaita, tsame antianqueri aparopee ashaninca irisampiteri paitarica incoajaitaqueeri eiroquea imanantapeetsi”.

³³ Aisati pinquempetea aviroriji: ariorica pincoaque pojaitena, pijivate pinquenqueshireta jaoca ocantajaitari maaroni timimojeitimpiri. Piotasanojaitero: impoiji pojocajaitajero, pojaitasanojaitanaquena.

³⁴⁻³⁵ Nocoaque yora quemisantanari iroameteri itsipapee atiri intime cameetsa, irompa eirorica yoametiritsi, te irimateroji nocoacaavetacari, yatsipetashitaca itimi. Iquempetacaro tivi caari poteatatsine: tempa ajocajero. Pinquenqueshiretasanotero oca nocantajaitaquempiri piotasanojaiterori.

Irootaque icantajaitaqueriri Jesoshi oijajaitiriri.

15

Iquenquetsatacotiri Jesoshi yora ovisha peachari.

(Mt. 18.10-14; Joa 10.1-18)

¹ Itimi anta oshequi jorio aittiriri iirequite ishaninca impanteariri yora oromasati, aisati icoshitajaiteriri ishaninca. Iro cantaincha yamejaitaca iriori yapatotimentapinitari Jesoshi, icarajaitaqueri itsipapee antapinitirori caari cameetsatatsi. Iquemisantapinijaitaqueri Jesoshi iquenquetsati.

² Ari icantajaiti yora variseopee aisati yora oametantirori Sanquenarentsi:

—Te oncameetsateji oca yantapinitiri Jesoshi: icarajaitapinitiri caari cameetsayetatsi, itsipajaitacari yoajaita.

³ Impoiji, jero oca ishiacantiriri Jesoshi:

⁴ —Aamaaca intimerica povishate 100. Impeaquearica aparoni, tempa ari poanaqueri yora 99 anta queshiiqui, impoiji pijatanaque anta caaraiteriqui, pincoacanteariri peainchari. Pincoacoayetajeri irosati pineantajeariri.

⁵ Ariorica pineapajeri, tempa oshequi pinquimoshireventajeari. Tempa pinquijajeri, paanajeri, poajateri anta itimajaitinta ishaninca.

⁶ Aisati, ariorica pareetea pinampiqui, tempa pincajemajaiteri pishaninca, pincantajaiteri: “Tsame anquimoshirejaita: ipeavetaca novishate, naajiri aisati”.

⁷ Aisati iquempetata Tasorentsi. Ariorica inquenqueshiretajea aparoni antirori caari cameetsatatsi irojocantearori, incanteri maaroni savicajaitatsiri inquitequi: “Tsame anquimoshireventajaiteri”. Te irio incantacote yora itsipapee cameetsajaitatsiri.

Iquenquetsatacotiri Jesoshi quirequi peachari.

⁸ Jero pashini icantiriri Jesoshi:

—Pashini aisati noshiacaventempero: otimi tsinane oirequite, icarati iitsoqui 10. Ariorica impeaquea aparoni, oncoacoayetajeri. Ariorica ontsitenitanaque, ontsietero ot-siomento, oneanteariri, aisati ompishitasanotero pancotsi amenayetajeri otijaqueririca quipatsi. Ari oncoacoayetajeri irosati oneantajeariri.

⁹ Ariorica oneajeri, oncajemeru oshanincajei, oncanteri: “Tsame pintsipajeitena, anquimoshirejaitanaque. Noneajiri aisati noirequite peavetainchari”.

¹⁰ Aisati noncamantajeitempi: aisati iquempetaca Tasorentsi. Ariorica inquenqueshiretajea aparoni antirori caari cameetsatsi irojocantajearori yantayetiri, inquimoshiretanaque Tasorentsi, irineajeiteri inampirepee.

Iquenquetsatacotiri Jesoshi Evancari jatapitsavetariri iriri.

¹¹ Pashini aisati ishiacantiniri Jesoshi:

—Itimi shirampari itomi apite.

¹² Yora impoitatsiri itimi icantiri iriri: “Apa, nocoaque pishinetenaro nayerota maaroni novaararo aisati maaroni noirequite. Pimpenaro meeca maaroni”. Ari ipajeitaqueri.

¹³ Pashini quitaiteri yapatojeitaquero irovaararo, maaroni. Ijataque arejiqui, pashiniqui nampisi, yaanaquero maaroni timimojeitiriri. Anta te irisavique cameetsa, irootaque yaparantacarori maaroni irovaararo aisati iirequite.

¹⁴ Ari tecatsi timimotajerine, aisati te ontimasanoteji iroajeiteari atiri. Oshequi yashinoncaaca evancari, iquemasanaquero itashe.

¹⁵ Impoiji iquenaquenayetanaque iramenayeri tsameetacayerineri. Ineapaaqueri aparoni ashitariri ichanchote, icantapaaqueri: “¿Picoaquempa nontsameetempi?” Icantiri: “Je, nocoaque pamenenari nochanchote”.

¹⁶ Ari yamenavetacanari ichanchote, ipapinitiri yoari: ora shiavetarori otaqui intsipa. Iro cantaincha tecatsi oacayearine yoara evancari, icoavetanaca iroacotearime yoari chanchcho.

¹⁷ Impoiji iquenqueshiretanaja: “Icarajeitaque iratirite apa oshequi. Timatsi yoajeitari maaroni, iquemapinijeitaca, timatsi timaarantapaintsiri aisati. Naintiquea, aasano-taquetuena notashe.

¹⁸ Meeca nompianaje anta apaqui, noncantapaajeri: ‘Apa, te nonquemisantempiji, aisati te nonquemisanteriji Tasorentsi. Ainiro nantane oshequi.

¹⁹ Eiro meeca pitomintajanatsi, ainti pinampitajena. Nontsameetempiro piipatsite’”.

²⁰ Impoiji ipianaja, iquenanaji avotsiqui. Icaantanaja, irotapaaajantsi ivanco iriri. Ari iniitavajari iriri anta paricoti, iquenapaaji. Oshequi iquimoshiretanaque, icavintsaasano-tavajiri. Ishiashitavajari iquempelitavajari, yavitsanotavajiri, inintavorotavajiri.

²¹ Ari icantapaaqueri itomi: “Apa, te nonquemisanteriji Tasorentsi, aisati te nonquemisantempiji avirori. Ainiro nantaneve. Te oncameetsateji pitomintajena”.

²² Iro cantaincha icajemiri iriri inampirepee, icantajeitiri: “Pishintsijeite, paitero quitaersari cameetsari, pinquitsaateri notomi. Aisati paiteneri aniyo, pisatevacoteneri iracotsapaquiqui. Paiteneri aisati sapato, irisapatotapaaajeri.

²³ Aisati paiteneri vacajaniqui, timasanotatsiri ireji, poyeneri. Tsame maaroni anquimoshireventavajeri notomi, avacaajeitavajeri, maaroni.

²⁴ Nojivetaca eiro noneajiritsi, oquempetomotaquetuena icamaque. Iro cantaincha meeca oquempetaca yaneanaji aisati, meeca noneajiri. Ipeavetaca, meeca ipocaji, aneajeitajiri aisati”. Ari iquimoshirejaitanaque, yoacaajeitajiri.

²⁵ Ari itsameeti itomi pashini anta oantsiqui: te irineavajeriji irirenti. Impoiji yareeta-paaja iriri, iquempelitapaaji iquemapaquero moshica, aisati ivairajeitaque.

²⁶ Icajemapaqueri aparoni nampirentsi, isampitiri: “¿Paita pivairajeitantari?”

²⁷ Yacanaqueri: “Areetapaaja pirenti. Yoacantaqueri piri vacajaniqui, yoacaajeitacari maaroni. Oshequi iquimoshireventavajiri pirenti ipocaji, cameetsa yareetaja, tecatsi oyerine”.

²⁸ Irosati iquisantanaca irirenti, te incoyeji inqueapaaje pancotsiqui. Isoquijanaque iriri, icantavetavajari: “Caate, notiomu, pinqueapee. Piveshireimentavajeri pirenti”.

²⁹ Iro cantaincha yacanaqueri: “Peerani nantaveetaquempiro paitapeerica picantaqeari, te nompitsatimatempiji. Iro cantaincha tecatsi pimpena nainti catsini noacayearimeri noshanincapee. Te pimpenariji chivo, tecatsi catsini.

³⁰ Jeri iyeniro, ijatanaque arejiqui itsonquitaquempiri piirequite: ipinajeitaquero tsinanepee inavintsajeitaquero. Meeca ipianirotaja, ari poaqueneri cameetsari vaca”.

³¹ Ari icantiri: “Notiomu, acantani quiso avavacaaca. Avirotaque ashitearoneri maaroni vaararontsi oca avancoquinirica.

³² Iro cantaincha ocameetsati aveshireimenteari pirenti. Oquempevetaca icamaque, ajijeivetaca eiro aneajiritsi aisati. Meeca oquempetaca yaneanaji aisati, aneajeitajiri. Ipeavetaca, meeca aneajeitajiri aisati. Tsame aveshireimentajeiteari”.

¹ Aisati icantiri Jesoshi iroamere:

—Itimi ashitaarantincari quempoyejiniriri iirequite, maaroni. Impoiji icanteetiri: “Icoshitaquempi yora quempoyeavetimpiriri piirequite”.

² Impoiji icajemaqueri, isampitiri: “¿Paita ojita oca icanteetaquenari? ¿Paita picoshinerotantanari? Meeca poimpiajenari maaroni noirequite, pisanquenatenaro ivajipooe maaroni irevitanari. Meeca eiro noshinetajimpiritsi aisati noirequite”.

³ Ari iquenqueshiretanaca iriori: “Eiro meeca ishinetajanatsi novatorote nonquempoyejeneri iirequite. ¿Paita nanteri meeca? Te noshintsiteji nontsameetanteari. Aisati nopashiventaca noncanterime atiri impashitenname quirequi.

⁴ Ja, je niotaque meeca. Noncavintsaajeiteri maaroni irevijeitiriri novatorote. Impoiji, iraacameetsajeitena anta ivancoqui: eiro ishinetanana nashinoncaaveetea”.

⁵ Ari icajemajeitaqueri maaroni irevijeitiriri ivatorote. Isampitiri yora jivatatsiri yareetapaaja: “¿Jaoa icaratiri pivevitiri novatorote?”

⁶ Yacanaqueri: “Nirevitiri oshequi oja orivo. Ocarati nirevitiri jaachari virojaniqui 100”. Icanti: “Je, queario. Jeroca paperi osanquenataca pivevitiriri. Payero paperica, pisanquenateneri otsipa, pincante: ‘Nirevitimpi 50 virojaniqui jachari oja orivo’. Amataviterita novatorote”. Icantiri: “Je, ari”.

⁷ Ari ijataque jivatatsiri, ipocaque itsipa. Isampitiri: “¿Jaoa ocaratiri pivevitiri novatorote?” Yacanaqueri: “Oshequi nirevitiri tirico, ocarati jainchari coshitariqui 100”. Ari icantiri: “Jeroca paperica pisanquenatiniri peerani novatorote. Queario, ocarati pivevitiri 100. Tsame amataviterita. Payero oca paperica, pojocajero; pisanquenateneri otsipa, pincanteri: ‘Nirevitimpi 80 coshitari, jainchari tirico’”. Ari isanquenataquero.

⁸ Impoiji iotanaque yora ivatorote yamatavitaqueri. Icantaque: “Te oncameetsateji yamatavitaquena, iro cantaincha otimi ionirotantari irayero coiteimotacariri”. Queario yora tseancantatsiri ioniroti iomparitavacaajeita. Irintiquea yora quemisantatsiri te iriotasanoteji.

⁹ Meeca noncamantajeitempi: intimerica piirequite, pincavintsaajeiteri pishaninca, pimpajeiteri coiteimotariri iriori. Eiro ipeacotarotsi. Impoiji pincamajeitanaque, pojocajetero timimojeitimpiri, iro cantaincha iraacameetsajeitempi anta inquitequi yora picavintsaajeitaqueri. Tempa anta otimi pisavicanteari caari tsoncanetachane.

¹⁰ Eiorica picoshititsi capichaji, eiro picoshititsi aisati antearoite. Iro cantaincha pincoshiterica capichaji, picoshiticari aisati antearoite.

¹¹ Ariorica pincoshiyete quirequi, iriotanaque Tasorentsi te pinquenqueshireteriji iriori: impoiji eiro ishanincatimpitsi, eiro pineirotsi inampi.

¹² Ariorica pincoshiteri iirequite itsipapee, ¿paitaquea impashitantempiri Tasorentsi piirequite avirori?

¹³ Tecatsi pincantea pantaveeteneri apite pivatorote. Ariorica pinintasanoteri aparoni, eiro piquempetaritsi itsipa. Piveshirementeari aparoni, irinti itsipa, eiro. Aisati ariorica pishintsiventer quirequi, eiro pimatirotsi pishintsiventer Tasorentsi.

Yora Jesoshi yoametaqueri variseopee icoacaaqueriri Tasorentsi.

¹⁴ Ari iquemajeitaqueri variseopee icantaqueriri Jesoshi, irosati ishirontimentajeitan-tacari. Icoaque irashitaarantea oshequi, irootaque ishirontimentantariri Jesoshi.

¹⁵ Ari icantiri:

—Picoajeitaque irijijeitempi atiri picameetsajeitaque, iro cantaincha iojeitaquempi Tasorentsi. Ineacameetsavetimpi atiri, iro cantaincha iotaque Tasorentsi te pincameetsajeiteji.

¹⁶ Peerani ocameetsatini piquemisanteroni isanquenareni Moishishini aisati yora camantantatsiniri pavisacotantajari. Iro cantaincha areetapaaca meeca Joa, yora vaotisantatsiri. Onashita meeca icoacaaajeitaquempiri Tasorentsi. Yora Joa intanacaro icamantajeitaquempi cameetsatsiri: irotaintsi impincatsariventajeitempi Tasorentsi. Icoasanojeiveta atiri irineeri.

¹⁷ Coajica ompenanajea quipatsi aisati inquite, iro cantaincha eiro opeatsi irointi isanquenare Moishishi: icoi Tasorentsi pincanteani pinquemisantero piotanteari cameetsa pisavique.

¹⁸ Tempa ocanti: “Eiro paimentarotsi pijina”. Ariorica pojoquero pijinasanori paan-tearori otsipa tsinane, paimentearo pijina. Aisati te oncameetsateji payero tsinane joquiriri ojime.

*Yora Jesoshi iquenquetsatacotiri ashitaarantincari aisati Irasaro iriori.
(Mt. 19.1-12; Mr. 10.1-12)*

¹⁹ Ari icantajeitiri Jesoshi:

–Itimi aparoni shirampari ashitaarantincari, oshequi iitsaare cameetsamaotatsiri, oshequi yoaneencaca. Maaroni quitaiteriqui yoacaajeitacari ishaninca yoari pinatasano-tachari.

²⁰ Itimi aisati ashinoncaasanotachari pajitachari Irasaro. Osoncayetanaque isompopee opatsaayetanaqueri. Ari isavicapiniveta anta iqueapinitinta ashitaarantincari ivancoqui.

²¹ Oshequi yashinoncaaca, aasanotaqueri itashe. Icoaveta iroajerome yoari yoari-ayetaqueri ashitaarantincari quipatsiqui. Aisati yora otsitipee yatsoyetapaqueri ivat-saaropeequi.

²² Impoiji icamaque iriori. Ijatashitaqueri inampirepee Tasorentsi, yaavajiri, impoiji yaanajiri anta itiminta Avaramani. Ocameetsaitetinta catsini. Aisati icamaque yora ashitaarantincari.

²³ Oshequi yashinoncaaca meeca yora ashitaarantaveitachaniri anta Sharincaveniqui, oshequi inecatsticaro. Yamenanaque anta osamani itiminta Avarama. Ineaqueri Avarama, jeri aisati yora Irasaro.

²⁴ Icajemacotaqueri: “Apa Avarama, pineshinoncatajena. Pincanteri yora Irasaro irov-inquerota iracotsapaqui nijaqui, impoqueta aca nantsotantearori nija. Oshequi catsini nashinoncaaca aca paamariqui”.

²⁵ Iro cantaincha icantaqueri Avarama: “Notiomi, pinquenqueshiretea jaoca ocantani peerani pitimaveitani quipatsiqui. Cameetsa pisaviquini catsini, irintiquea Irasaroca oshequi yashinoncaaveitani. Meeca cameetsa isavicapaaque irinti, irompa avinti oshequi pashinoncaaca.

²⁶ Aisati pineaqueri nijantaitetacotaquempi, tecatsi inquenashitantempiri Irasaro. Aisati avirori, tecatsi pinquenashitantenari”.

²⁷ Ari icantiri: “Eiorica pimatirotsi pincavintsayena. Iro cantaincha pintianqueri Irasaro quipatsiqui: anta ivanconiqui apani.

²⁸ Aneatsiquera anta iypee, icarati apapacoroni. Nocoaque inquemisantacaapaajeri, ipoquicari aca. Pamene meeca narori, oshequi noquematsicataro catsini”.

²⁹ Iro cantaincha icantiri Avarama: “Otimi isanquenare Moishishi aisati isanquenare itsipapee quenquetsatacantantatsiniri. Irootaque inquemisantajeiteri irointi”.

³⁰ Ari yacanaqueri: “Je, aiuro onaveta. Iro cantaincha ariorica irineajeri camaintsiri intinaanaje, aitaque inquenqueshireitanajea, irojocajero caari cameetsatsi yanta-jeitiri”.

³¹ Icantiri Avarama: “Terica inquemisantero sanquenarentsi, eiro aisati iquemisantiritsi tinaajantsineri”.

17

Icantiri Jesoshi iroamerepee: “Pantacairicari pishaninca caari cameetsatsi”.

(Mt. 18.6-7; Mr. 9.42)

¹ Icantajeitiri Jesoshi iroamerepee:

–Noncamantempi: incanteani intime atiri antacaajeiterineri ishaninca caari cameetsatsi. Iro cantaincha iroashinoncaajeiteri Tasorentsi yora antacairiri ishaninca caari cameetsatsi.

² Aitaque iroashinoncaasanoteri antacaajeitiriri jananequipee caari cameetsatsi. On-cameetsateme irijivataqueme iroisoyeeterime mapiqui antearo, irovincanteetearirime. Irovinqueeterime, eiro yantacairime jananequi caari cameetsatsi.

³ Queariompia, pantacairicari pishaninca caari cameetsatsi.

Icantiri Jesoshi: “Pincavintsaapiniteri antitapinitimpirori paitapeerica”.

(Mt. 18.21-22)

Aisati icantiri:

–Ariorica pineacotaqueri pishaninca yantiro caari cameetsatsi, pinquenqueshireta-cayeari. Ariorica irojocajero yantiri, pincavintsayeri, paacameetsatajeri.

⁴ Ariorica inquishempi pishaninca, incoshitempi, incantimatempi, paitarica. Iro cantaincha ariorica incantempi: “Te oncameetsateji nantitaquempiri, pincavintsayena”, ari nocoaque pincavintsayeri. Ariorica oshequi irampiitajero irantitajemiro, aisati oshe-qui incantempi: “Pincavintsayena”. Ari nocoaque oshequi pincavintsayeri aisati, eiro piquishimentiritsi.

Icantiri Jesoshi: “Ariorica pinquemisante, oshequi irimatempiro Tasorentsi paitarica pincoacoteriri”.

(Mt. 21.22; Mr. 11.22-26)

⁵ Yora iroamerepee icantaqueri Avincatsarite:

–Noquemisantaveta. Nocoaque poametena nonquemisantasanotantajeari.

⁶ Ari yacanaqueri:

—Pinquemisanteme capichaji, pincoaquericame, pincanterime Tasorentsi imponquitireajero inchatora, iroviincaitero anta incajarequi. Ari inquemisantempime, iroviincaiterome.

Icanti Jesoshi: “Avirojei piquempejeitacari iratirite Tasorentsi”.

⁷ Aisati icantajeitiri Jesoshi:

—Oquempetaca itimi shirampari iratirite. Itsameetapinitiniri aisati yamenapinitiniri ivira. Ariorica impocaje iratirite pancotsiqui, ¿paita incantavaqueriri ivatorote? ¿Incanterimpa: “Caate, pisavicapee, poapeempa”? Eiro icantiritisi.

⁸ Tempa incanteri ivatorote: “Meeca povetsiquenarota noyeari, aisati nireri. Pamaquenaro. Ariorica nonquemanaquea, ari poyea avirori, aisati pire”.

⁹ Aisati eiro icantavetarisi: “Ariove, pimataquenaro”; tempa yametaclaro yantaveetapinitiniri ivatorote.

¹⁰ Aisati avirorije, ocameetsati pimatapinijeiteneri maaroni icoacaquempiri Tasorentsi. Impoiji oncameetsate pincante: “Apatiromo nomaquenari icoacaquenari. ¿Paita noshemetanteari? Te noncoyeji noncoacoteri Tasorentsi impinatena”.

Yoavisacojeitiri Jesoshi 10 patsaajeitatsiri.

¹¹ Ari yovaanaja Jesoshi, iquenayetanaque Samariaqui aisati Carireaque. Ishiretaca irareetea Jerosarequi.

¹² Ari yareetapaaca pashiniqui nampitsi, ineaajeitavaqueri patsaajeitatsiri, icarajeiti 10. Icatiajeitaca aiquetiji ara.

¹³ Icajemacojeitacari:

—Jesoshi, aviro nopincatsajeitiri, pincavintsaajeitena, poavisacojeitena.

¹⁴ Ari ineantacari Jesoshi, icantajeitiri:

—Pijajeite anta itiminta saserote, pinijapeempari.

Ari iquemisantajeitacari, ijaeitanaque. Anta nianqui avotsi yavisacojeitanaji.

¹⁵ Ari iojeitacari yavisacojeitaji, iro cantaincha ipianaja aparoni anta Jesoshiqui. Antarojenca icantacari:

—Tempa icameetsataque Tasorentsi, yoavisacotaquea.

¹⁶ Itiyeroashitapaacari Jesoshi, yoivotasanotashitacari, ipincatsatanotaqueri, ipasonquitasanotaqueri. Iponeaca yoca shirampari Samariaqui.

¹⁷ Ari icanti Jesoshi:

—Tempa icarajeiti noavisacojeitiri 10. ¿Jaoca itsipapee noavisacojeitiri?

¹⁸ Ipiashitajana yoca pashinisati atiri, ipasonquitacari, aisati ineametsatiri Tasorentsi. Irintipee ashanincasanoripee, ¿paita caari ipiantaja impasonquitanteariri Tasorentsi?

¹⁹ Impoiji icantiri tiyeroashitacari:

—Meeca pincataje, ocameetsati pijataje. Pishiretacari Tasorentsi, irotaque pavisacotantajari.

*Yoamejeitiri Jesoshi atiri jaoca icantari Tasorentsi ipincatsariventanti.
(Mt. 24.23-28, 36-41)*

²⁰ Ari yora variseopee isampijeitiri Jesoshi:

—¿Jaoca oncarate impoque Tasorentsi impincatsariventajeitajee?

Ari yacanaqueri:

—Ariorica impincatsariventante Tasorentsi, iro cantaincha eiro pineasanotiritisi.

²¹ Eiro pimatirotsi pincante: “Jeri yoca”, aisati: “Jeri yonta”. Queario, eiro iconijatasantotsi: ocameetsataque pimpincatsashireajeiteri maaroni.

²² Aisati icantajeitiri iroamerepe:

—Tempa noponeaca inquitequi, natiritapaaque, iro cantaincha eiro nocantani quiso noajempi. Coajica pincoajeivetanaquea pineajename aisati, iro cantaincha eiro pineajantsi.

²³ Impoiji incanteetempi: “Ipiaja Jesoshi, itimi anta”, pashini incanteete: “Jeri yora”. Iro cantaincha caarina. Eiro patsipetashitatsi pijatashitena.

²⁴ Ariorica omoncaratsanotaquea nompocanteari, ari piotasanotavaquea. Iquempetaca te irimaneaji itirei, aisati iporequi; aisati nonquempetajea narori, nompocajerica. Eiro nomanapaatsi, eiro picomitavaquea.

²⁵ Nojivatavaqueta nonquematsicatavaquearota oshequi, aisati intseencajeitavacuena savicajeitatsiri.

²⁶ Oquempetaca peerani itimantacari Noeni itseencajeitacari Tasorentsi, aisati inquempejeitea ariorica nompijaje narori, intseencajeite atiri maaroni.

²⁷ Yoapinijeita peerani, irapinijeiti, yaapinijeitiro ijinapee, yaacaayetiro irishintopee, paitapeerica. Icantaajeitani, irosati itetantanaca Noe ivitoqui. Impoiiji opoqui antearo incani, incajaretanaque maaroni. Icamajeitanaque maaroni tseencajeitantsiri.

²⁸ Aisati iquempjeitacani ishaninca Oroti, savicajeitatsiniri Soromaqui: yoapinijeita, irapinijeiti, iquenayetanaque iyompariyetanaca, ipanquiyetiro yoari, yovetsicanontayeta ivancopee.

²⁹ Iro cantaincha ijatantanacari Oroti, itiancaquero Tasorensi oshequi paamari, itaajeitaqueri maaroni soromasatini. Itseencajeitini, irootaque ipoyereajeitancariri Tasorensi maaroni, poyere.

³⁰ Aitaque oncanteari ariorica nompiaje. Intime oshequi tseencantatsineri, eiro iquenqueshiretiritsi Tasorensi.

³¹ Pamene, ariorica omoncarataquea nompocantajeiri, pintimerica saiteriqui, eiro piqueapanajantitsi pancotsiqui paantapanajantearori pivaararo. Aisati, pintimerica oantsiqui, eiro pipiapanajantitsi nampitsiqui paantapanajantearori pivaararo.

³² Piquempetarocari ijinani Oroti, pipitsoquicari.

³³ Picoicari poavisacotajea avisati, impoiiji pijaticari Sharincaveniqui. Iro cantaincha ariorica pincamimentena narori, pincantaitiyempani pisaviquimotena inquitequi.

³⁴ Ariorica nompocaje, intime apite maatsineri imaamentoqui. Aparo naanajeri nontsipatanaqueari, irinti itsipa, eiro naanajiritsi.

³⁵ Ontime apite tsinane ontsipatavacaquea ontononquero tirico. Aparo naanajero nontsipatanaquearo, irointi otsipa, eiro naanajirotsi.

³⁶ Intime apite shirampari anta oantsiqui, intsipatavacayea intsameete. Aparo naanajeri nontsipatanaqueari, irinti itsipa, eiro naanajiritsi.

³⁷ Ari iquemajeitancariri iroamerepee, isampitiri:

—Novincatsarite, ¿jaocampa pinijantajeiri oca picantaquenari?

Yacanaqueri:

—Jaocarica anta intimeri tseencantatsiri, yora iroashinoncayeri Tasorensi.

18

Yora Jesoshi iquenquetsatacotiri yora joeshi caari cameetsatsi.

¹ Pashiniqui quitaiteiri iquenquetsatacaajeitiri aisati Jesoshi iroamere. Icoaque iroame-teri inquenquetsatacapiniteri Tasorensi, inquearioventajeitero, eiro yoipacaajirotsi.

² Icantaajeitiri:

—Itimini anta nampitsiqui yora joeshitatsiri, caari pincatsatiri Tasorensi. Aisati te irioteniji incavintsayeri ishanincapee.

³ Otimi anta inampiqui aparoni tsinane, camajimentaaro. Ojashitapinivetari yora joeshi, ocantapinivetari: “Pamitacotena, te oncameetsateji iquisapinitana yora itsipa shirampari”.

⁴ Te incoaveteaji yoranqui iramitacotero, iro cantaincha iquenqueshiretanaca: “Te nonpincatsateriji Tasorensi, aisati te noninteji noncavintsayeri itsipapee noshaninca.

⁵ Iro cantaincha oshequi ashereaquena oca tsinane. Namitacoterota, impoiiji eiro opocashitapinitajanatsi, eiro ashereaquena oca tsinane. Namitacoterota, impoiiji eiro opocashitapinitajanatsi, eiro ashereaquena oca tsinane. Namitacoterota, impoiiji eiro opocashitapinitajanatsi, eiro ashereaquena oca tsinane.

⁶ Ari icanti Avincatsarite:

—Pamene, te incameetsateji yora joeshi noquenquetsatacotiri, iro cantaincha yamitacotaquero oca tsinane cantapinitiriri.

⁷ Irintiquea Tasorensi, icameetsataque. Ariorica incanteani incantapiniteri quemisantsiri, tempa iramitacoteri.

⁸ Queariotaque oca noncamantempiri: intsipaite iramitacojeiteri Tasorensi maaroni quenquetsatacaajeiterineri. Iro cantaincha ariorica nompiaje aca quipatsiquica ¿arimpa noneapeempi piquemisantajeiti, piquenquetsatacaajeitiri Tasorensi?

Yora Jesoshi iquenquetsatacotiri yora variseo aisati yora apatotiniriri oromasati quirequi.

⁹ Pashini aisati iquenquetsati Jesoshi. Iquenquetsatacotiri yora shemetatsiri, yora tseencajeitiriri itsipapee ishaninca. Icantiri:

¹⁰ —Ijataque apite shirampari ivancoqui Tasorensi, inquenquetsatacayeri Tasorensi. Variseo ini aparo, irinti itsipa yapatotiniri oromasati iirequite joriopee.

¹¹ Ari icatiapaaca yora variseo, icantavetapaacari: “Tasorensi, ariove, oshequi noncameetsataque nainti. Tecatsi nante, te nonquempeteariji yora coshitantatsiri, yora amatavitantatsiri, aavioncatsiri ijina. Aisati te nonquempeteariji yora aitiriri noshaninca iirequite.

¹² Nametacaro maaroni tominco notitapinita apite quitaitei, aisati nopaarantap-iniyetimpuro maaroni naayetiri. Naaquerica 10, aparoni nopaquempi”.

¹³ Irinti yora apatotapinitiniriri oromasati iirequite ishaninca, icatiapaaca irinti nijanteaji. Te irishemetaji irinti, irointi oshequi ipashiventacaacaro yantayetiri, irootaque caari yamenanta jenoqui, irointi iposanejitaca. Icanti: “Tasorensi, pincavintsaajena narori, te noncameetsateji catsini, ainiro oshequi nantane”.

¹⁴ Ari noncamantempi, oshequi onaveta irantane yora shirampari, iro cantaincha icavintsairi Tasorensi. Ariorica impiaje ivancoqui iriotanaque inecameetsatiri Tasorensi. Irintiquea yora variseo, te inquempeteariji. Eiro inecameetsatiritsi Tasorensi shemetatsiri. Irinti yora caari shemetatsi impeajeri pincatsaritajantsine.

Icoaque Jesoshi impocashijeiteri jananequipee.

(Mt. 19.13-15; Mr. 10.13-16)

¹⁵ Impoiji tsinaneppee amajeitniri Jesoshi otomipee, ocoaque impamijeiteri aisati incantiri Tasorensi iramitacoteri. Iro cantaincha ineantacarori iroamere, itsaneacovetacari impocashiteri.

¹⁶ Iro cantaincha icajemiri Jesoshi jananequipee, icantiri iroamere:

—Eiro pitsaneacotanaritsi, aitaque nocoaque impocashijeitena. Pineajeitaqueri iriorije: te intseencajeitenaji, irointi ishirejeitaquena. Maaroni quempejeitacariri irineajeiteri Tasorensi impincatsariventajeiteri.

¹⁷ Aisati, queariotaque oca noncamantempiri: maaroni caari quempetari jananequi iriori, eiro ineiritsi Tasorensi impincatsariventajeiteri.

Iquenquetsatacari Jesoshi ashitaarantincari.

(Mt. 19.16-30; Mr. 10.17-31)

¹⁸ Pashini quitaitei ijatashitaqueri Jesoshi aparoni ivincatsarite jorio. Icantapaaqueri: —Oametanari, oshequi picameetsati. Pincamantena: ¿paita nanteri nojatanteari anta inquitequi, noncantaitiyempani?

¹⁹ Icantiri Jesoshi:

—¿Paita picantantanari: “Picameetsati”? Itimi aparo cameetsatatsiri, yora Tasorensi.

²⁰ Piojeitiro maaroni icantiri Tasorensi: “Eiro paimentarotsi pijina, eiro paimentaritsi pijime, eiro picoshititsi, eiro pitseeyacotaritsi pishaninca, pimpincatsateri piri, aisati pimpincatsatero piniro”.

²¹ Yacanaqueri:

—Aitaque nocantani nomoncarataqueroni: nevancaritapani, irosati meeca.

²² Iquemantacarori oca, icantiri Jesoshi:

—Apanivaniji pimatero aisati: pimpimantajeitero maaroni timimojeitimpiri, pimpajeiteri ashinoncaincari ovinaro. Ariorica pimatero oca ontime oshequi timimojeitajempineri anta inquitequi. Ariorica pimpimantero pivaararo, pimpoque, poijatasanotanaquena.

²³ Iquemantacarori oca, oshequi yoashiretanaca. Ashitaarantincari ini, te incoyeji impimantero irovaararo, irointi yompetanacaro.

²⁴ Ineaqueri Jesoshi yoashiretanaca, impoiji icanti:

—Opomerentsitimotacari ashitaarantincari irijate anta ipincatsaritinta Tasorensi.

²⁵ Tempa opomerentsitimotarí cameyo inqueero omoro quitsapi, iravisantanajeari. Iri-oquea ompomerentsitimotasanoteari catsini irijate ashitaarantincari anta Tasorensiqui.

²⁶ Ari isampitiri yora quemavaqueriri:

—¿Ariompa? Pomerentsitaca. ¿Janicampa meeca avisacotajantsineri?

²⁷ Yacanaqueri Jesoshi:

—Oca caari imatapiniti atiri, imataquero Tasorensi irinti.

²⁸ Ari icantiri Petero:

—Oametanari, nojocajeitaquero maaroni noijajeitantaquempiri.

²⁹ Yacanaqueri:

—Queariotaque oca noncamantempiri: te pantsipetashitearóji. Ariorica pojocajeitajero pivancopee, pijinapee, pirementee, pitsiropee, piripee, piniropee, pitomipee, pishintopee: iro cantaincha irootaque pojocajeitantariri picoasanotaque impincatsariventempi Tasorensi, eiro patsipetashitarotsi.

³⁰ Aitaque impinataquempi Tasorensi meeca aca quipatsiquica, aisati impinataquempi anta inquitequi: paneantasanotajeari anta, pincantaitiyempani.

Icamantajeitiri Jesoshi iroamere: “Noncame”.

(Mt. 20.17-19; Mr. 10.32-34)

³¹ Impoiji icajemaqueri Jesoshi iroamerepee, icantaqueri:

—Tsame ajajeite meeca Jerosarequi. Timatsi isanquenatacotaquenaniri peerani yora quenquetsacantantatsiniri. Noponeaca inquitequi, natiritapaaque. Meeca anta Jerosarequi omoncarataquea maaroni isanquenatacotaquenaniri.

³² Iraacantena ashaninca arori, irayena itsipapee atiri. Irishirontimentajeitena, iroashinoncaajeitena, inquitiojena,

³³ impasanatena, iroyena. Oncarapaaque mava quitaiteri, nontinaanaje aisati.

³⁴ Iro cantaincha te inquemajeitavaqueroji icantajeivetacariri, icomijeitavacaro.

Yoavisacotiri Jesoshi caari amenatsi.

(Mt. 20.29-34; Mr. 10.46-52)

³⁵ Ari icaantanaca Jesoshi, iquenanaque avotsiqui, irotaintsi irareetea nampitsiqui pajitachari Jerico. Itimi anta avotsinampiqui shirampari caari amenatsi, icoacotapinijeitiri avisayetatsiri irineshinocatanaqueri, impayetanaqueri quirequi.

³⁶ Ari iqumavaque caari amenatsi ipocajeitapaaque oshequi atiri. Isampitiri itsipa:

—¿Janica pocatsineri?

³⁷ Yacanaqueri:

—Coraque Jesoshi, yora nasaretasati, yojajeitiri oshequi atiri. Iravisana je aca.

³⁸ Ari icajemacotavaqueri:

—Jesoshi, avi ro ishanincani Iravirini. Pincavintsaanaquenave.

³⁹ Ari icantajeitiri jivajeitiriri Jesoshi:

—Pimajerete.

Iro cantaincha, aiqero icantanaiti:

—Jesoshi, pincavintsaanaquenave.

⁴⁰ Ari icatiapaaca Jesoshi, icantanaque:

—Pamaqueri aca.

Ari yameetaqueri. Impoiji isampitiri:

⁴¹ —¿Paita picoaqueri?

Yacanaqueri:

—Novincatsarite, nocoaque namenaje narori.

⁴² Icantiri:

—Ari, aitaque pamenaje meeca. Pishiretaquena, irootaque pavisacotantajeiri.

⁴³ Irosati yamenantanaja. Ari yojatanaqueri Jesoshi, icantanaque:

—Yamenacaajana Tasorentsi, tempa icameetsataque.

Aisati iqumpejeitacari maaroni amenajeitaqueriri, icantajeitaque:

—Tempa icameetsataque Tasorentsi.

19

Yora Saqueo ineaqueri Jesoshi.

¹ Impoiji iquenanaque Jesoshi nampitsiqui, pajitachari Jerico.

² Itimi anta ashitaarantincari pajitachari Saqueo. Iriotaque iriori jivatacaajeitiriri yora apatotapinitiniriri oromasati iirequite jorio.

³ Icoaveta Saqueo irineerime Jesoshi, iro cantaincha te iranteariteji, icaajaniquitiji. Icarati oshequi atiri, yojocajeitavaqueri.

⁴ Ari ishianaca, ijvatanaque anta avotsiqui. Yataitapaaquero inchato anta otsapiqui, anta inquenanaquenta Jesoshi. Iramenavaqueri inquenapaaque ishaaviji.

⁵ Ari yareetantapaacari Jesoshi, yamenapaaque jenoqui, ineapaaqueri, icantiri:

—Saqueo, pishintsite paniireapaaje. Nocoaque meeca nosavique pivancoqui.

⁶ Ari ishitsitaque yaniireapaaji, icantaqueri:

—Tsamequeti novancoqui.

Ari oshequi iquimoshiretanaque Saqueo,

⁷ iro cantaincha iquisajeitanaca amenajeitaqueriri. Icantajeiti:

—Te incameetsanirotejive yora. ¿Paita ijatashitantariri Jesoshi anta ivancoqui?

⁸ Ari iqumpejitasanotapaacari Saqueo Jesoshi, icantiri:

—Novincatsarite, meeca nompaaarantajeitajeri ashinoncaincari cashetani timimojeitanari. Itimirica atiri namatavitiri nocoshitantariri, noimpiajeneri maaroni, aisati nompajeri aisati. Ocaratirica aparo nocoshitaqueri, nompajeri 4.

⁹⁻¹⁰ Ari icantiri Jesoshi:

—Meeca quitaiteri pavisacotaji, aisati iravisacotaje pishaninca aca pivancoqui. Noponeaca narori inquitequi, natiritapaaque: nocoaque namenacaajeitajeri ashinoncaajeitachari, nocoaque noavisacojeitempi maaroni. Tempa avi ro ishanincani Avaramani.

Yora Jesoshi iquenquetsacototiri pincatsari paqueriri ishaninca quirequi.

(Mt. 25.14-30)

¹¹ Ari iquemajeitaquero atiripee icantaqueri Jesoshi. Aisati iojeitaque irotaintsi irareetea Jerosarequi. Ijitatshijeitaca irotaintsi meeca impoque Tasorentsi impincatsariventante aca quipatsiqui,

¹² Irootaque ishiacantiriniri oca:

—Itimini aparoni shirampari, pincatsarivetachari. Impoiiji icajemaqueri pashini pincatsari anta pashiniqui quipatsi. Ari irijatanaque, impeaqueri pincatsarisanori impincatsariventanteariri ishaninca anta inampiqui.

¹³ Ari irotaintsi irijate, icajemaqueri iratirite caratatsiri 10, ipajeitaqueri oshequi quirequi. Icantaqueri: “Jerica aparoni quirequi, ipinataca oshequi. Nocoaque piomparijeitea. Ariorica nompiaje, namenapaajeri jaoca incarate quirequi pampatotenari”.

¹⁴ Ari ijatanaque impeantajeeri pincatsari. Iro cantaincha te impincatsajeiteriji ishaninca, oshequi iquisajeitaqueri. Itiancayevetacari aparopee ishaninca, icantavetacari yora itsipapee pincatsari: “Te nonintajeiteji impincatsariventajeitena yoranqui, te incameetsateji”.

¹⁵ Iro cantaincha ipeaqueri pincatsari, impoiiji ipianaja impincatsariventanteariri. Icajemacantajeitaqueri iratiritepee: yora ipajeivetari iirequite. Isampijeitaqueri: “¿Pishequiaquenarimpa noirequite?”

¹⁶ Ari icantiri yora jivatatsiri: “Pamene, meeca noshequiasanotaqueri quirequi. Aparo ishequiasanotanaque, icarataque meeca 10”.

¹⁷ Ari icantiri pincatsari: “Cameetsataque. Oshequi piotaque. Piquearioventaquenaro capichaji. Meeca nompeaquempi pincatsariveroneri oshequi nampitsi, oncarate 10. Pinquearioventenaro pimpincatsate”.

¹⁸ Ari ipocapaaque itsipapee, icantajeitapaqueri: “Jerica piirequite. Pipaquenari aparo, meeca icarati apapacoroni”.

¹⁹ Icanti: “Ari pimpincatsariventera atiri savicatsiri apapacoroni nampitsi”.

²⁰ Impoiiji ipocaque itsipa aisati, icanti: “Novincatsarite, jerica piirequite pipaquenari chapinqui. Noquempyeacquempiri novaniotequi.”

²¹ Oshequi notsaroacaquempi, niotaque oshequi pipincatsaritaque. Paapitsatiri itsipapee yashiyetari, aisati paayetiro oitsoqui caari pipanquiti”.

²² Impoiiji icantaqueri: “Te pincameetsateji, te pimatenarioji nocoacaavetaquempiri. Picantavetana: ‘Oshequi pipincatsarite, paapitsatiri itsipapee yashiyevetari, paayetiro oitsoqui caari pipanquiti’. Ari pivoveta, irootaque noquisantaquempiri meeca.”

²³ ¿Paita caari poantari noirequite vaancoqui? Poaquerime anta, ari intimeme meeca noirequite, aisati itsipa quirequi impaquenarime yora quempyeajanariri”.

²⁴ Irosati icantantari yora catiajeitainchari: “Paapitsatajari noirequite. Pimper yora ashitariri 10”.

²⁵ Ari icantajeivetari: “Novincatsarite, oshequi iirequite meeca. ¿Paitaquea pimpashitanteariri itsipa aisati?”

²⁶ Yacanaqueri: “Noncamantempi, intimerica ashitaarantayetachari, nompajeri aisati. Irinti yora caari ashitaarantacha, naapitsatajari ora capichaji timimovetariri.”

²⁷ Aisati itimi quisaquenari caari coatsine impincatsajeitena. Pamajeitaquenari, name-nacojeitempiri poajeiteri”.

Irootaque iquenquetsatacaajeitiriri Jesoshi atiripee.

Yareetapaaja Jesoshi Jerosarequi.

(Mt. 21.1-11; Mr. 11.1-11; Joa 12.12-19)

²⁸ Impoiiji yovaanaja aisati Jesoshi, irijate Jerosarequi.

²⁹ Irotapaintsi irareetearo nampitsi pajitachari Vetajaje aisati Vetania. Otimi anta toncaariqui pajitachari Orivomashi. Impoiiji itianquiri iroamere apite,

³⁰ icantaqueri:

—Pijate anta nampitsiqui, pineapaaqueri voro itsatacotaca anta. Tequera inquijacoyeeteari. Pintsatacoreapaaqueri, pamaquenari.

³¹ Ariorica irisampiyeeempi: “¿Paita pitsatacoreantariri?” Ari pincanteri: “Icoqueri Avincatsarite”.

³² Ari ijajeitanaque apite, ineapaaqueri icantaqueriri Jesoshi.

³³ Ari itsatacoreapaaqueri. Irosati isampitantacari ashitariri:

—¿Paita pitsatacoreantariri novorote?

³⁴ Yacanaqueri:

—Icoqueri Avincatsarite.

—Ari, paanaqueneri.

³⁵ Ari yaanaqueri anta Jesoshiqui. Yoanquetaqueneri imititsaqui iitsaarepee irisavican-teari Jesoshi, impoiiji iquijacotanacari.

³⁶ Ari yovaacotanaja anta avotsiqui, yoajeitiniri atiripee iitsaarepee avotsiqui, iraniitan-tanaqueari voro.

³⁷ Ari intanacaro meeca yoirincacotanaja. Yoijajeitanaqueri oshequi quemisantajeitatsiri, iveshireimentajeitanacari, icajemajeitanaque. Icantajeitanaque:

—Tempa icameetsataque Tasorentsi. Aneajeitaqueri itasoncaventapinijeitaquee.

³⁸ Icameetsataque Avincatsarite itiancaqueeri Tasorentsi. Cameetsa isavicajeitaque maaroni inquiresati, ineacameetsajeitaqueri Tasorentsi.

³⁹ Ari itimaiti anta variseopee, icarajeitaqueri atiripee. Icantavetari Jesoshi:

—Oametantatsiri, poimajerentajeiteri yora oijajeitimpiri.

⁴⁰ Yacanaqueri:

—¿Paita noimajerentanteariri? Ocameetsataque icantajeitaqueri. Irimajerejeiteme yocapee, irointi irineanatacaaque me Tasorentsi mapipee ompincatsatantenameri.

⁴¹ Ari iquempejijeitapaaque, meeca oconijatapaaque Jerosare. Iraacojeitaqueri Jesoshi savicajeitatsiri,

⁴² icanti:

—Nocoavetaca nosavicaaajeitempime cameetsa catsini, iro cantaincha te pincoajeiteji. Pitseencajeitaquena, meeca eiro pineanatsi nompincatsariventajeitempi.

⁴³ Coajica intime quisasanojeitempineri, inticasanojeitapaaquempi, irishoncajeitapaaquempi soraropee, eiro ishinejeitimpitsi pinquenana je jaocarica. Irimanajeitempi,

⁴⁴ intireajeitajero pivancopee, intireasanojeitajero catsini. Irovaaranteri savicajeitatsiri. Nopocashijeivetaquempi, nompincatsariventajeitempime, iro cantaincha te pimpincatsajeitavaquenaji, irointi pitseencajeitavaquena. Irootaque inquisajeitantempiri coajica soraropee.

Yora Jesoshi iquisajeitaqueri pimantayetatsiri anta ivancoqui Tasorentsi.

(Mt. 21.12-17; Mr. 11.15-19; Joa 2.13-22)

⁴⁵ Ari yareetapaaca Jesoshi ivancoqui Tasorentsi, yajeitapaaqueri pimantayetatsiri aisati amanantayetatsiri, yojocajeitaqueri saiteriqui. Itsoncajeitaqueri maaroni,

⁴⁶ icantaqueri:

—Tempa osanquenataca irineane Tasorentsi: “Nocoaque inquenquetsatacaapinijeitena atiri aca novancoquica, irootaque novetsicacantantarori”. Iro cantaincha avirojeitaque amatavitantatsiri, pipeaquero pivanco avirori.

⁴⁷ Impoiiji ipiapinita maaroni quitaiteri ivancoqui Tasorentsi, yoametantapinitaque. Iro cantaincha iquisajeitaqueri yora jivatacaajeitiriri saserotepee, yora oametantirori isanquenareni Moishishi, aisati yora pincatsariventajeitiriri savicajeitatsiri. Isampitavacaajeitaca:

—¿Jaoca ancantiriri Jesoshi, avacantanteariri?

⁴⁸ Iro cantaincha te iriojeiteji jaoca incantiriri, tempa itimi oshequi atiri pincatsajeitiriri, quemisantajeitiriri.

20

Isampitiri Jesoshi: “¿Janica tiancaquempiri?”

(Mt. 21.23-27; Mr. 11.27-33)

¹ Ari pashini quitaiteri itimi Jesoshi anta ivancoqui Tasorentsi yoamejeitaqueri atiripee, icamantaqueri jaoca incantajeiteari iroavisacotantajeari. Ari ipocajeitaque yora jivatacaajeitiriri saserotepee, yora oametantirori sanquenarentsi, yora jivatacaajeitantatsiri, maaroni.

² Icantajeitapaaqueri:

—Pincamantajeitena janica peaquempiri pincatsari: ¿Janica tiancaquempiri pantayetantarori oca?

³ Yacanaqueri:

—Aisati narori, timatsi nosampijeitempiri. Pincamantajeitena:

⁴ ¿Janicampa tiancaqueriri Joa ivaotisantanti? ¿Iriompa Tasorentsi tiancaqueriri? Terica, ¿jiriompa tianquiriri atiri?

⁵ Te irancajeiteriji, irointi icantavacaajeitanaca:

—¿Paita ancantiriri? Ancantiririca: “Irio Tasorentsi tianquiriri”, icantajeiteecari: “¿Paita caari piquemisantantari?”

⁶ Irompa ancantiririca: “Irio atiri tiancaqueriri”, tempa inquisajeitaquee atiripee. Ipitseeecari. Icantajeitaque iriori itiancaqueri Tasorentsi Joa ivaotisantanti.

⁷ Ari impoiiji icantajeiti:

—Te niojeiteji janicarica tiancaqueriri Joa.

⁸ Irosati icantantari Jesoshi:

—Aisati narori, eiro nocamantimpitsi janica tiancaquenari.

Yora Jesoshi iquenquetsatacotiri yora panquitirori ova.

(Mt. 21.33-44; Mr. 12.1-11)

⁹ Impoji aisati iquenquetsatacaajeitiri Jesoshi atiri, jero oca ishiacantiriri:

—Itimini panquitirori ova anta iipatsitequi. Impoji icantaqueri iratirite: “Pamenarorica, coajica ariorica oitsoquitanaque, paaqueyea avirori cashetani oitsoqui, cashetani pimpena narori”. Icantajeiti: “Ari cameetsa”. Impoji ijatanaque pashiniqui quipatsi, peerani ipeaca.

¹⁰ Impoji omoncarataca irayetero oitsoqui. Yora ashitarori irovate itiancaque yora inampire: “Pijataite anta otiminta novate, picoacotaiteiri yora amenanarori impaarantena cashetani”. Ari ijavetaca, iro cantaincha iquisajeitavaqueri, ipasanatavaqueri, yoipiavajiri. Tecatsi impavaqueri.

¹¹ Impoji itiancavetacari pashini inampire, iro cantaincha ishirontimentavacari, ipasanatavaqueri, yoipiavajiri. Tecatsi impavaqueri.

¹² Impoji itiancavetacari pashini aisati, iro cantaincha ipasanayetavaqueri, tac, tac, oshegui irirajanive. Yojoacanajiri aisati.

¹³ Iotantacari yora ashitarori, icanti: “¿Paita nanteri meeca? Irioyeata nontianqueri notomi nonintasanotiri. Ariorica irineaajeitavaqueri irinti, impincatsatavaqueri”. Ari itiancavetacari irirori.

¹⁴ Ineantajeitavacariri, icantavacaajeitanaca: “Pamenerite itomi ashitarori iipatsite. Ariorica incame iriri, iriotaque ashitajearoneri. Tsame avavaqueri, impoji ashijeitajeoro ainti quipatsi”.

¹⁵ Ari yaajeitavaqueri, shepi. Yaajeitanaqueri anta ocaratapaaque iipatsite, yoajeitaveri, shemi.

Irotaque iquenquetsatacaajeitaqueriri Jesoshi. Impoji isampijeitiri:

—Aamaaca, ¿jaoca incanteriri yora ashitarori iipatsite?

¹⁶ Tempa irijate irirori, inquisasajeitaveri tsameevetanariri iipatsite, iroapaaqueri. Impoji iramenaje pashini tsameetajenerine.

Ari icantajeiti quemajeitaveriri:

—Te oncameetsateji irimajeitero oca, eiro ishinetiritsi Tasorentsi.

¹⁷ Yamenajeitaveri Jesoshi, icanti:

—¿Pijivetacampa eiro imatirotsi? ¿Paitampa otimantacari oca sanquenarentsi? Tempa ocanti: “Itseencaquero yora vetsicavetarori pancotsi otincami, yojocajiro. Iro cantaincha ipeaquero Tasorentsi antearo otincami pancotsi”. ¿Paita oshiacantiriri?

¹⁸ Incarajaque maaroni pariatsiri mapiqui, ariorica ontsinacapaqueri atiri oca mapi, ompeaqueri ovane quipatsi, ontsoncaqueri. Narotaque shiaquerori mapi: nompoyerea-jeitaveri maaroni quisajeitaquenari.

Yoaletiri Jesoshi atiri inquemisanteri pincatsari aisati inquemisanteri Tasorentsi.

(Mt. 21.45-46; 22.15-22; Mr. 12.12-17)

¹⁹ Yora jivatacaajeitiriri saserotepee, aisati yora oametantirori Sanquenarentsi icoajeiveta irayerime meeca Jesoshi, tempa iojeitaque ishiacaventiri irirori. Irayerime, iro cantaincha itsaroacaajeitacari atiripee, icanti: “Eiro airitsi, iquisacoventaricari ashanincapee”.

²⁰ Impoji itiancaqueri saserote ishaninca:

—Meeca pijate pamatavitaiteiri yora Jesoshi. Pishiacantamempeapeempa picoaque pinquemisanteri, iro cantaincha, pincomitacayeari irineane. Ariorica incomitanaquearo incanteri, pishintsite pimpoque pincamantapeena. Impoji ancamanteri pincatsari icantaqueri.

²¹ Ari ijatashitaveri Jesoshi, icantapaaqueri:

—Oametanari, niojeitaque oqueariotasanotaque maaroni picantaquenari aisati maaroni poametaquenari. Te pamenashiteariri ashaninca piotanteari icameetsatirica, irointi piotasantaqueri iquenqueshiretiri. Aisati cameetsa poamejeitaquenaro icoacaajeitaquenari Tasorentsi.

²² Meeca pincamantena: ¿ocameetsatimpa ampajeitiri yora ivincatsarite oromasati airequite icoacotaqueeri? ¿Eirompa apiritsi?

²³ Ari iotaqueri Jesoshi icoajeiveta iramataviterime. Icantiri:

—¿Paitaquea picoantari pincomitacayenaro noneane?

²⁴ Poniajayenari iitsoqui piirequite. ¿Janica ishiavorotaqueri aca quirequiqui? ¿Janica ashitarori ivajiro isanquenataqueri?

Yacanaqueri:

—Iro ivoro ivincatsarite oromasati, aisati osanquenataca ivajiro: yora Sesari.

²⁵ Ari icantiri Jesoshi:

—Ocameetsataque pimpincatsateri yora Sesari, iro cantaincha ocameetsataque aisati pimpincatsatasanoteri Tasorentsi.

²⁶ Tecatsi icantajeitea incomitacayeari irineane Jesoshi, cameetsa yoametantasano-taque. Yoajeitanaqueri cavaco yora amataviterinemer, irootaque imajerejeitantacari. Tecatsi icantajeri aisati.

Yoamejeitiri Jesoshi saroseo: “Queario intinaajeitaje camayetainchari”.

(Mt. 22.23-33; Mr. 12.18-27)

²⁷ Impoiji ijatashitaqueri saroseo Jesoshi. Icantaque iriori saroseo eiro itinaajeitajatsi camayetatsiri, eiro ijajeititsi inquitequi. Ari icantapaaqueri:

²⁸ —Oametanari, peerani isanquenataqueroni Moishishi. Icanti ariorica iravetearo shirampari ijina, impoiji incamaque. Eirorica itimacairo ijananequite, cameetsataque irajero irirentini. Impoiji intimerica otomi irishiacantajeri itomini irirentini.

²⁹ Ariorica itimi shirampari irirenti 6. Yaavetaro ijina, impoiji incamaque. Te intimeji itomi.

³⁰ Impoiji yaavetajaro iriori irirentini. Aisati te intimacayeroji ijina itomi, impoiji incamaque iriori, toren.

³¹ Aisati iquempetaca pashini irirentini. Yaavetajaro tsinane, impoiji aisati incamaque. Aisati iquempejeitaca maaroni irirentini. Tecatsi timacayerone otomi.

³² Ari impoitanaque iroori tsinane, ocamaque.

³³ Meeca pincamantena: queariorica intinaajeitanaje maaroni camajeivetainchari, ¿janica jinantajarone oca tsinane? Tempa icarajeiveta aayevetaroniri 7.

³⁴ Ari yacanaqueri Jesoshi:

—Queario, aca quipatsiqui yamejeitacaro shirampari yairo ijina. Aisati tsinanepee aajeiti ojime.

³⁵ Ari irointinaajeitajeri Tasorentsi maaroni atiri inecameetsatiri, iro cantaincha anta inquitequi eiro yaajitsi ijina. Aisati tsinane, eiro aajitsi ojime.

³⁶ Aisati eiro anta icamajitsi aisati, inquempejeiteari maaroni inampirepee Tasorentsi, saviquimojeitiriri: te incamaajeiteji iriori. Icantani yaneajeiti. Aisati intomintasanojeiteari maaroni atiri yora irointinaajeitajeri.

³⁷ Peerani iotitani Moishishini intinaajeitanaje camayetatsiri. Iquenquetsatacotantarori totseequi otaavetaca, iquenquetsatacotiri aisati Avincatsarite. Icantini: “Iquemisantiri Avarama Tasorentsi. Aisati Isaca iquemisantaqueri, jeri aisati Jacovo”.

³⁸ Pineaquero, te incanteji: “Iquemisantaveitarini Avaramani”. Yaneanaji Avarama aisati itsipapee, irootaque icantantacari: “Iquemisantiri”.

³⁹ Impoiji icantayetiri aparopee oametantirori sanquenarentsi:

—Oametanari, cameetsa oca picantaqueriri.

⁴⁰ Ari itsaroacaajeitacari irisampitajerime aisati.

Yora Quirishito irio ishanincani Iravirini.

(Mt. 22.41-46; Mr. 12.35-37)

⁴¹ Pashini aisati icantaqueri Jesoshi:

—¿Paita picantajeitanti: “Iriotaque Quirishito ishanincani Iravirini”?

⁴² Tempa peerani ipampoyeaventirini Iravirini Tasorentsi, isanquenataquero oca: “Yora Tasorentsi, icantaqueri novincatsarite: ‘Notomi, pisavique aca nacosanoriqui, pincar-atena ampicsarijeite,

⁴³ irosati impincatsajeitanti maaroni quisajeivetaquempiri”.

⁴⁴ ¿Iriompa Quirishito ishanincani Iravirini? Iriorica ishanincani, ¿paita icantantirini peerani: “Novincatsarite”? Te pamejeivetearoji pimpincatsajeiteari impoitatsiri itimi.

Icanti Jesoshi: “Paamayeariyea oametantirori sanquenarentsi, yamatavitimpicari”.

(Mt. 23.1-36; Mr. 12.38-40; Ir. 11.37-54)

⁴⁵ Impoiji iquemajeitajeri atiri Jesoshi, yoamejeitajeri iroamerepee, icantaqueri:

⁴⁶ —Paamayeariyea yora oametantirori sanquenarentsi. Oshequi icoaque inque-naquenatsantsanayete. Icoaque aisati cameetsa iraacameetsajeitavaqueri ishaninca anta nampitsiqui. Aisati anta pancotsiqui apatojeitapinitari, icoaque irisaviquimotapinitari pincatsaripee. Aisati ariorica yampatojeita atiri yoajeita, icoaque quiso iroapinitari pincatsaripee.

⁴⁷ Oshequi ishiancantirota. Osamani iquenquetsatacaamempeacar Tasorentsi. Icoaque irijitashijeitantarini ishaninca iquemisantasanoti. Iro cantaincha yamatavitap-initiro camajimentaaro, icoshitantarori timimojeivetarori. Queariotaque oca noncaman-tempiri: iroasanquetaasanojeitajeri Tasorentsi, catsini.

21

Iquenquetsatacotiro Jesoshi tsinane paqueriri Tasorentsi maaroni timimovetaroni.
(Mt. 12.41-44)

¹ Ari isavicaque Jesoshi anta ivancoqui Tasorentsi. Yamenayetavaqueri ashitaarantincari yamayetaqueri iirequite anta inantariqui quirequi.

² Aisati ineaquero camajimentaaro amaqueri apite iitsouqui quirequi, caari pinatacha.

³ Icantì:

—Queario oca noncamantempiri: pitseenquitirocari yoca amaqueri oca camajimentaaro. Oshequi inecameetsatitacaro Tasorentsi yoca amaqueri, anaacotaqueri yama-jeivetacari yora ashitaarantincari.

⁴ Oshequi ivinaro yamavetacari iriori, iro cantaincha itimaarantaque oshequi catsini iquempoyeanontavajari iriori. Irompa oca, amaqueri maaroni timimovetaroni, te aneajeriji timaarrantajantsine, tecatsi amanantantearori oyeari.

Icantì Jesoshi: “Coajica intireetajero ivanco Tasorentsi”.

(Mt. 24.1-3; Mr. 13.1-4)

⁵ Ari iquenquetsatavacaajeitaca iroamerepee, icantajeiti:

—Tempa ocameetsatasanotaque ivancoca Tasorentsi. Aisati maaroni mapipee yovetsi-cantacarori, ocameetsajeitacae, aisati maaroni yoaneencajeitantarori anta otantoqui.

Iquemantajeitacariri, icantiri Jesoshi:

⁶ —Coajica intireetajero maaroni oca pineacameetsajeitiri meeca. Irojoqueetajero mapipeeca arejiqui.

⁷ Ari isampijeitacari:

—¿Jaoca oncarate omoncaratanteari oca picantaquenari? Aisati, ¿paita iotacaayenaneri irotaintsi omoncaratea?

Icantiri Jesoshi: “Coajica ompomerentsitimoteari atiripee”.

(Mt. 24.4-14; Mr. 13.5-8)

⁸ Icantacari:

—Paamayea, yamataviyeetimpicari. Impoque oshequi atiri cantempineri: “Naro nainti Quirishito”. Pashini incante: “Itiancaquena Quirishito noncamantempi irotaintsi impoque”. Iro cantaincha eiro piquemisantiritsi.

⁹ Pinquemapiniteri atiri incante irimanatavacaajeitea atiripee, aisati irojocajeiteri ivincatsarite. Iro cantaincha eiro pitsaroajeititsi. Aitacae incanteari inquisavacaapinijeitea, iro cantaincha tequera omoncarateaji.

¹⁰ Jero pashini icantaqueriri aisati:

—Yora atiripee irimanayeteri itsipapee atiri. Yora savicayetatsiri aparopeequi nampitsi irimanateri yora savicayetsiri pashinipeequi nampitsi.

¹¹ Aisati oshequi onicasanotanaquea quipatsi. Aajeiteri atiripee itashe, oshequi incamajeitanaque; aisati irojoquiijeitea itsipapee atiri, incamaarrantayetanaque iriori. Aisati, anta inquitequi pineaquero caari pineapinijeiti, oshequi pintsaroacayearo.

Yora Jesoshi icantaqueri iroamere: “Coajica irajeitanaquempi, inquisajeitempi atiripee”.

(Mt. 24.9-14; Mr. 13.9-13)

¹² Aisati icantajeitiri:

—Iro cantaincha irijivayeetempi inquisanayeetempi. Iraajeitanaquempi anta pancotsiqui yapatojeitanti, aisati iroiminqeayetempi caravosoqui. Iraajeitanaquempi aisati anta pincatsaripeequi, inquisatsajeitempi: “¿Paita piquemisantanirotantariri Quirishito?”
¹³ Iro cantaincha eiro pitsaroacaaritsi yora quisavetempineri, irointi pincamantajeiteri jaoca nocanta noavisacojeitaquempiri.

¹⁴ Eiro piquenqueshiretitsi: “Ariorica irayeetena, ¿paita noncanteriri?”

¹⁵ Ariorica iraanajempi noamejeitempi nainti paitarica pincanteriri. Eiro imatirotsi yora quishempineri impiatsatempi.

¹⁶ Noncamantempi: iraacantempi piripee, piniropee, pirentipee, pitsiropee, pishanincapee, maaroni. Iroarantempi aparopee.

¹⁷ Irojeitanaque atiri piquemisantanaquea, irootaque inquisajeitantempiri.

¹⁸⁻¹⁹ Iro cantaincha ariorica quiso poyena aisati pinquearioventenaro maaroni nocantajeitaquempiri, nonquempoyeasanojeitaquempi. Tecatsi catsini incantajeitempi yora quishempineri, eiro yaapitsatimpirotsi aparoni piishi. Aisati pincantaitiyempiani pinte inquitequi.

Icantì Jesoshi: “Yora soraro intsoncajeiteri jerosaresati”.

(Mt. 24.15-22; Mr. 13.14-20)

²⁰ Aisati icanti Jesoshi:

–Ariorica pineajeitavaqueri soraro irishoncajeitaquearo Jerosare, ari piojeitanaque irotaintsi intsoncajeitajero pinampi.

²¹ Ocameetsati irishiajeitanaque toncaariqui maaroni savicajeitatsineri. Aisati maaroni savicatsineri Joreaqui, irishiajeitanaque. Aisati yora jayetatsineri oantsipeequi, eiro ipiajeitanaja nampitsiqui.

²² Aitaque omoncarataquea maaroni oca isanquenatiniri peerani: “Iroasanquetaasanojeiteri Tasorentsi maaroni tseencajeitajeriri”.

²³ Ashinoncajeitanaquea maaroni tsinane tsomonteyetatsineri, aisati maaroni antso-taayerineri ojananequite. Oshequi irineacatsiyetearo yora savicajeitatsiri. Oshequi iroasanquetaajeiteri Tasorentsi.

²⁴ Irimanajeiteri oshequi atiri, incamaarantayetanaque. Itsipapee iroisoyeteri, iraanajeri otsipapeequi quipatsi. Intime pashinipee atiri Jerosarequi peerani, irosati incantan-teari Tasorentsi: “Moncarataca”.

Iquenquetsatacotaja irisati Jesoshi, jaoca oncanteari ariorica impiaje.

(Mt. 24.23-31; Mr. 13.21-27)

²⁵ Jeroca icantiriri aisati Jesoshi:

–Pineajeitavaqueri impashinijeitanaque inquiresati: yora catsirincaiteri, cashiri, impo-quiroppee, maaroni. Pineero caari pineapinijeiti. Aisati intsaroajeitanaque maaroni atiri, inquemajeitavaquero oneajatanaque antearoja incajare, soooo. Aisati irineavaquero antearoja otavoncajare. Iramenajeitavaquero, sorererere.

²⁶ Eiro jojeititsi atiri jaocarica incanteeteriri, irootaque intsaroasanojeitanaqueari catsini. Irishevayetanaquea impoquiroppee.

²⁷ Impoiji pineajeitavaquena, nompiaje aisati. Tempa noponeaca peerani inquitequi, natiritapaque. Ariorica nompiaje aisati, nonquenapaaje mencoriqui, nontasorentsi-tasanotapaque, nompincatsaritanotapaque.

²⁸ Ariorica pineajeitavaquero oca nocantajeitaquempiri, piveshireajeitanaquea, pame-najeitavaquena: irotaintsi noavisacotasanojeitempi.

Icanti Jesoshi: “Irotaintsi impoque Tasorentsi”.

(Mt. 24.32-35; Mr. 13.28-32)

²⁹ Impoiji ishiacantiniri oca:

–Ari pamenero iyera, jaoca ocantari. Terica iyera, ari pashini inchato pamenero.

³⁰ Ariorica ontimayetanaque oshi, eereshitanaque, ari piojeitanaque irootimatajantsi on-quimojantsitaje.

³¹ Aisati oquempetaca, ariorica pineaquero omoncarataquea maaroni nocamanti-tanaquempiri, piojeitanaque irotaintsi impincatsariventasanojeitempi Tasorentsi.

³² Ariorica pineajeitavaquero intanaquea oca nocamantaquempiri, ari eirotsitarica picamitsi, aitaque pineajeitavaquero omoncarataquea maaroni.

³³ Coajica, peerani, ompeanaquea quipatsi aisati impeajeitanajea maaroni inquite-quiniri: cashiri, catsirincaiteri, impoquiroppee, maaroni. Iro cantaincha eiro opeimatatsi irointi noneane catsini.

Icanti Jesoshi: “Paamaasanojeitajena”.

(Mt. 24.36-44; Mr. 13.33-37)

³⁴ Aisati icantiri:

–Paamaasanojeitajena: nomapocapaimpicari. Piquenqueshiretirocari caari cameetsa-tatsi. Pishinjujeitacari. Piquenqueshiretapinitirocari timajeitatsiri aca quipatsiqui.

³⁵ Aitaque nomapocapaaqueri maaroni savicajeitatsiri quipatsiqui. Iroashinonca-jeitea maaroni caari aamaventajeitachane.

³⁶ Paamaventea. Aisati pincanteri Tasorentsi iramitacotempi cameetsa parejeitanta-je-nari, eirotta piquemitsicarotsi maaroni oca nocamantaquempiri.

³⁷ Ari maaroni quitaiteriqui yoametantaque Jesoshi anta ivancoqui Tasorentsi. Maaroni tsiteniriqui ijatapiniti anta toncaariqui ipajiyetiri Orivomashi.

³⁸ Aisati maaroni quitaiteriqui ijajeitamanaji atiripee ivancoqui Tasorentsi iquemisan-tapinijeitiri.

22

Yoametavacaajeitaca saserotepee jaoca incantajeiteriri iraacantajeitanteeriri Jesoshi.

(Mt. 26.1-5, 14-16; Mr. 14.1-2, 10-11; Joa 11.45-53)

¹ Irotaintsi quitaiteri yoapinijeitantarori tanta caari iconoyeeti tapiacairori. Yapi-itapinijeitiro joriopee maaroni iquenqueshireantarori peerani anta Ejipitoqui yavisajeitanajiro oantatsiri ivancopee.

² Ari yoametavacaajeitaca yora jivatacaajeitiriri saserotepee aisati yora oametantajeitirori sanquenarentsi:

—¿Jaocasa ancantari Jesoshi avanteariri? Aamaaca ari inquisacotanaqueari atiripee.

³ Impoiji yora Satanashi ishintsinataqueri Jorashi Ishicariote, yora yoamevetacari Jesoshi: yoametaqueri iraacanteri.

⁴ Ari ijatashitaqueri yora saserotepee, icantapaaqueri:

—Namatcotempi paacanteri Jesoshi.

⁵ Iquemantavacariri, iquimoshirejeitanaque, icantajeitavaqueri:

—Ari, cameetsa. Ariorica ayeri, ari nonpinatempi quirequi.

⁶ Icanti:

—Ari. Namenasanoteri, impoiji noncamantempi jaoca pincanteari pimanacanteariri paacanteri. Eiroquea inajeitiritsi atiripee.

Yora Avincatsarite yoacaacari iroamerepee.

(Mt. 26.17-19; Mr. 14.12-16)

⁷ Ari moncarataca meeca vieshita. Meeca yoacaajeitacari atiripee ovisha, iquempetacari ishaninca peerani anta Ejipitoqui.

⁸ Ari Jesoshi itiancaqueri Petero aisati Joa, icantavaqueri:

—Pijate povetsicajeitapee avajeiteari, anquenqueshirejeiterota yavisantanacari peerani omaaantsiri.

⁹ Isampitiri:

—¿Jaoca picoaqueri novetsiquerori?

¹⁰ Yacanaqueri:

—Ariorica pareetea nampitsiqui, pineapaaqueri shirampari yaacotanajiro nija. Pijatanacari anta pancotsiqui, jaocarica inqueapajerri.

¹¹ Pincantapaaqueri yora ashitarori ivanco: “Icanti Avincatsarite: ‘¿Jaoca noacayeariri noamerepee?’”

¹² Ari ironijayempero anta oshitamencotanta jenoqui. Ovetsicajeitaca asavicajeitanteari. Ari povetsicajeitero avirori avajeiteari.

¹³ Irosati ijajeitantanaca, inajeitapaaquero icantaqueriri Jesoshi. Yovetsicajeitapaaquero yoari.

Yora Jesoshi yoamejeitaqueri iroamerepee iroimentapiniteari tanta.

(Mt. 26.20-29; Mr. 14.17-25; Joa 13.18-30; 1 Cor. 11.23-26)

¹⁴ Impoiji yareejeitapaaca maaroni, yoajeitapaaca.

¹⁵ Impoiji icantajeitaqueri Jesoshi:

—Oshequi nocoitacani tequeratani noncame, nontsipajeitanajempita meeca tsiteniriquica noacaajeitanajempita tanta.

¹⁶ Noncamantempi, eiro napiitajirotsi noajeero aisati aca quipatsiqui. Aintiquea noapaajeero anta ipincatsaritinta Tasorentsi.

¹⁷ Ari yaaquero tsota, ipasonquitaqueri Iriri, impoiji icanti:

—Paacojeitavaquero oca, pirajeitero.

¹⁸ Noncamantempi: eiro nirajirotsi ovaja aca quipatsiquica. Aintiquea nirapaajero aisati anta ipincatsaritinta Tasorentsi.

¹⁹ Impoiji yaaquero tanta, ipasonquitiri Iriri. Icarajaquero, ipajeitaqueri iroamere, icantiri:

—Jero oca tanta, poajeitearo. Narotaque camimentajeitempineri. Nocoaque poapinitero tanta pinquenqueshiretapinitantenari nocamimentajeitaquempi.

²⁰ Ari yoajeitaca, maaroni. Impoiji ipacojeitaqueri ovaja aisati. Icantajeitaqueri:

—Ariorica pirero oca, nocoaque piojeite nocamantajeitaquempi noavisacojeitempi. Irootaque niraja amparajatimentajeitempineri, noncamimentajeitempi noavisacojeitan-tempiri.

²¹ Impoiji icantajeitaqueri:

—Timatsi acarajeitaqueri meeca avajeitaca yora aacantenaneri iroacantantenari.

²² Noponeaca inquifequi, natiritapaaque noncamimentajeiteri maaroni atiri, iro cantaincha irashinoncaasanoitaquea yora aacantenaneri iroacantena.

²³ Iquemantajeitacariri, isampitavacaajeitaca:

—¿Janicampa aacantaniroterineri?

Yoamejeitaqueri Jesoshi iroamerepee jaoca incanteari impincatsaritanteari.

(Mr. 10.42-45)

²⁴ Ari anta icantavacaajeitanaca iroamerepee:

—¿Janica coajica jivatacaajeiteeneri? ¿Janica anaacojeiteeneri impincatsaritanote? ¿Naroitatsimpa jivatacaajeitajempine?

²⁵ Ari icantiri Jesoshi:

—Yamejeitaro yora atiripee ipincatsajeitaqueri ivincatsaritepee, iro cantaincha iper-anatapinijeitacari pincatsari ishanincapee. Jero icantashjeitaca: “Nintacojeitacari natiritepee”.

²⁶ Iro cantaincha eiro piquempejeitaritsi. Ariorica picaoque pimpincatsariventante, eiro pishemetitsi, irointi pamitacotapiniteri itsipapee.

²⁷ ¿Janica ipincatsatasanotiri atiri? ¿Yorampa vetsicapinitiniriri yoari? Teve. Tempa ipincatsayeetiri yora peranajeitariri inampirepee. Iro cantaincha te nomperanajeitempiji nainti, irointi nintacojeitaquempi.

²⁸ Quiso poajeitaquena peerani, piojeitaque opomerentsitomotapinijeitaquee.

²⁹ Irootaque nocantantimpiri meeca: oquempetaca incantena Apa nompincatsaritante, aisati noncantajeitempi pimpincatsarijeite.

³⁰ Pincaratapinijeitena avapinijeitea aisati irapinijeite anta nompincatsaritenta, aisati ampincatsariventajeiteri maaroni joriopee.

Icantiri Jesoshi Petero: “Meeca tsiteniriquica pincantapinite: ‘Te noneeriji Jesoshi’”.

(Mt. 26.31-33; Mr. 14.27-31; Joa 13.36-38)

³¹ Aisati icantiri Avincatsarite:

—Shimo, yora Satanashi icantaqueri Tasorentsi icoaque irineantempi, iriotanteari piquemisantasanotirica. Queariompia, icoaque irantacayempiro caari cameetsatsi.

³² Iro cantaincha noncanteri Tasorentsi iramitacotempi eiroquea pojocasanotantarotsi piquemisanti. Coajica, ariorica pinquenqueshirereempa aisati pinquemisantajena, pinquenqueshiretacaajeiteri maaroni piyemisantaririnte, pinquemisantacaasanojeiteri.

³³ Yacanaqueri Shimo:

—Tempa aviro novincatsarite, quiso noanaquempi; ariorica iroiminqueetempi, eiro nojoquimpitsi. Iroiminqueetenata narori. Ariorica iroyeetempi, nontsipatasanotanaquempi. Iroyeetenata narori.

³⁴ Icantaqueeri:

—Noncamantempi: meeca tsiteniriquica, eirotsitarica ineaji teapa, oncarate mava pincante: “Te noneeriji Jesoshi”.

Icanti Jesoshi: “Irotaintsi omoncaratea isanquenatacotaquenaniri peerani”.

³⁵ Impoiji icantajeitiri Jesoshi iroamerepee:

—Peerani notiancajeitaquempi piquenquetsatacaajeitaqueri atiripee. Nocantajeitavaquempi: “Eiro paanajirotsi pitsarate, piirequite, aisati otsipa piitsaare”. Meeca nosampijeitempi: “¿Pashinoncaajeitanacampa? ¿Otimaquempa coiteimojeitaquempiri?”

Yacajeitanaqueri:

—Te. Tecatsi.

³⁶ Impoiji icantajeitaqueri:

—Meeca noncantajeitempi: ontimerica pitsarate, paanajero. Intimerica piirequite, paanajeri. Terica ontime pivesamento, pimpimantero poicoro pamanantantearori aparoni.

³⁷ Aitaque omoncarataquea isanquenatacotaquenaniri peerani Isayashini: “Iroyeeteri, inquempetacanteeteri oayeri”. Queario, ontsataajeitaquea maaroni isanquenatacotaquenaniri peerani yora quenquetsatacantantsiniri.

³⁸ Impoiji icantajeitiri:

—Jero oca, Novincatsarite: apite ocarati avesamento.

Yacanaqueri:

—Ari, moncarataca.

Ari anta Jetsemaniqui iquenquetsatacairi Jesoshi Iriri.

(Mt. 26.36-46; Mr. 14.32-42)

³⁹ Impoiji isoquijanaji Jesoshi, ijatanaji anta ijatapinitinta: anta toncaariqui pajitachari Orivomashi. Yoijajeitanaqueri iroamerepee.

⁴⁰ Ari yareejeitapaaca, icantajeitaqueri:

—Meeca pincantajeiteri Tasorentsi iramitacojeitantempiri: pantirocari caari cameetsatsi.

⁴¹ Impoiji ari ijataque Jesoshi apaniro aiqetiji ara. Itiyeroapaaca, iquenquetsatacairi Iriri:

⁴² —Apa, pincoaquerica, poavisacotenaro oca nonquematsicataqueari. Iro cantaincha eiro pantirotsi nocoqueri narori, irointi picoacaquenari avirori.

⁴³ Impoiji ipocaque aparoni inampire Tasorentsi, intacotapaacari Jesoshi, ishintsitan-tacari.

⁴⁴ Oshequi iquematsicatacaro, aiqero ijatatii iquenquetsatacairi Iriri. Oshequi imasav-itanaque, ovitejatanaque quipatsiqui, oquempevetaca iriraja.

⁴⁵ Ari itsoncanaquero iquenquetsatacairi iriri, ijatanaji anta yoisavicanaquerinta iroamerepee, ineajeitapaatiiri maajeitaque ini. Oshequi yoashirejeitanaca incaranqui, irootaque imaojeitantacari.

⁴⁶ Icantajeitapairi:

—¿Paita pimaajeitantacari? Pintinaajeitanaje. Pincantajeiteri Tasorentsi eiroquea pantantarotsi caari cameetsatsi.

Yayeetaqueri Jesoshi.

(Mt. 26.47-56; Mr. 14.43-50; Joa 18.2-11)

⁴⁷ Ainiroquera iquenquetsatacaajeitiri Jesoshi iroamere, yareejeitapaaca oshequi atiri, ijivajeitapaqueri Jorashi. Iroamere Jesoshi inaveta, iro cantaincha icoaque iracantajeri meeca. Ijatashitaqueri, inintavoronirotapaaqueri.

⁴⁸ Icantavaqueri:

—Iro pinintavoronirotantanari, paacantena. Tempa piotaque naro poneainchari in-quitequi, natiritapaaque.

⁴⁹ Ari ineajeitavaqueri itsipajeitari Jesoshi. Isampijeitiri:

—Novincatsarite, ¿picoaquempa nompesheri?

⁵⁰ Ari ipeshitavaqueri iyempitasanori aparoni inampire yora ivincatsarite saserote, peti.

⁵¹ Icantiri Jesoshi:

—Ari inaji, eiro pantiritsi.

Impoiji yoipiajiniri iyempita, yoavisacotajiri.

⁵² Irio itsipajeitapaacari Jorashi yora jivatacaajeitiriri saserotepee, jeri aisati yora jivat-acaantatsiri anta ivancoqui Tasorentsi, jeri aisati savicacaantajeitatsiri. Icantavaqueri Jesoshi:

—¿Paita pamashitantanari pivesamentopee aisati inchaquipee? ¿Narompa coshinti?

⁵³ Tempa nocaratapinijeitaquempi anta ivancoqui Tasorentsi, iro cantaincha te payenaji. Ja, moncaratata meeca paantaquenari: meeca ipincatsaritanti camaari.

Icanti Petero: “Te noneeriji Jesoshi”.

(Mt. 26.57-75; Mr. 14.53-72; Joa 18.15-27)

⁵⁴ Impoiji yaasantaqueri Jesoshi, shepi. Yaajeitanaqueri anta ivancoqui ivincatsarite saserote. Osamanitanaque Petero, yoiatacoventavetanacari.

⁵⁵ Anta pancotsiqui, ocaraiteti, yoisheetiro paamari. Isavicajeitapaaque, icotsitajeitapaaca yora aajeitajeriri Jesoshi. Impoiji itsipajeitapaacari Petero.

⁵⁶ Impoiji aisati, opoqui aparoni inampire saserote. Ocatiapaaca, amenapaaqueri Petero, sorererere. Impoiji ocanti:

—Jeri yoca oijatiriri Jesoshi.

⁵⁷ Icantiri:

—Te nioteriji.

⁵⁸ Impoiji pashini amenaqueriri, icantiri:

—Aviro oijatiriri Jesoshi.

Icantiri:

—Teve. Te noiateriji.

⁵⁹ Ari osamanitapainti aisati, icantiri pashini:

—Queario yoijavetacari yoca shirampari, tempa aisati iponeaca iriori Carireaquí.

⁶⁰ Icantiri:

—Te nioteji paitarica picantaqueri.

Irosati ineantanaca teapa.

⁶¹ Yora Jesoshi ipitsocashitanacari Petero, yamenanaqueri. Irosati iquenqueshiretan-tanacaro icantaqueriri incaranqui: “Tequeratsitarica irineaje teapa, mava pincante: “Te nioteriji Jesoshi””.

⁶² Ari ijatanaque Petero, irasananacata, jii, jii. Oshequi yoashiretanaca, catsini.

Ishirontimentajeitacari Jesoshi.

(Mt. 26.67-68; Mr. 14.65)

⁶³ Yora shentajeitaqueriri Jesoshi ishirontimentajeitacari, aisati ipasanataqueri, tac, tac, tac.

⁶⁴ Impoiji ipashicajaquitaqueri aisati ipasavorotaqueri, icantaqueri:

—Pincamantenate janica pasavorotaquempiri. Iji, iji, iji.

⁶⁵ Icantani, oshequi yoashinoncaaqueri, ishirontimentacari.

Iquisajeitaqueri Jesoshi yora oametavacainchari.

(Mt. 26.59-66; Mr. 14.55-64; Joa 18.19-24)

⁶⁶ Ari meeca oquitaitetamanaji. Yapatojeitamanaja yora savicacantajeitatsiri, yora jivat-acaajeitiriri saserotepee, yora oametantirori sanquenarentsi, maaroni. Yaajeitanaqueri Jesoshi anta yoametavacaapinijeitanta.

⁶⁷ Isampijeitaqueri:

—Pincamantenate: ¿avirompa Quirishitotatsiri naamaajeitacari?

Yacanaqueri:

—Noncantempiricame: “Je, narotaque Quirishito”, eiro pishiretarotsi.

⁶⁸ Aisati, nosampitempiricame paitapeerica, eiro pacanatsi.

⁶⁹ Noponeaca nainti inquitequi, natiritapaaque. Irotaintsi nompianaje jenoqui, nosav-iqumitapaajeri Apa iracosanoriqui, noncaratapaajeri nontasoncantajeitaje.

⁷⁰ Isampijeitaqueri:

—¿Avirompa Itomi Tasorentsi?

Yacanaqueri:

—Je, narotaque.

⁷¹ Impoiji icanti:

—¿Paita ancoanteari itsipa camantacoterineri? Tempa aquemajeitaqueri, ijitasorentsinerotacateemi. Ainiro yantane.

23

Yaanaqueri Jesoshi anta Piratoqui, icantapaaqueri: “Ainiro yantane yoca namaquerica”.

(Mt. 27.1-14; Mr. 15.1-5; Joa 18.28-38)

¹ Ari ijajeitanaque, yaajeitanaqueri Jesoshi anta Piratoqui. Oromasati ini iriori, ipincatsariventajeitiriri joriopee.

² Icantapaaqueri:

—Ainiro yantanirotaqueri yoca. Yamatavijeitaqueri noshanincepee, icantajeivetacari: “Eiro pipiritsi pincatsari piirequite”. Aisati icantapiniti: “Narotaque Quirishito, pimpincatsajeitena nainti”.

³ Ari isampitiri Pirato:

—¿Queariompa? ¿Avirompa ivicatsarite jorio?

Yacanaqueri:

—Je, narotaque.

⁴ Impoiji yora Pirato icantajeitavaqueri:

—Te aneroji irantane yoca.

⁵ Aiquero icantajeiti:

—Iquisacaajeitacari atiripee, icantajeitaqueri atiri: “Tsame ajocajeri avincatsarite”. Intanacaro anta Carireaque, meeca iquenaquenayeti aca Joreaque, yamatavijeitaqueri maaroni.

Yaanaqueri Jesoshi anta Eroreshiqui.

⁶ Iquemantacarori Pirato icantajeitaqueriri, isampitaqueri:

—¿Iriompa carireasati yoca?

⁷ Yacanaqueri:

—Je, iriotaque.

Icantiri:

—Ari, paanajeri anta Eroreshiqui. Iriotaque pincatsariventajeitiriri carireasati. Savi-catsi meeca aca Jerosarequi. Ipoqui chapinqui.

⁸ Ari yaajeitanajiri anta. Ineantavacariri Eroreshi Jesoshi, iquimoshiretanaque. Oshequi iquemacotapinitaqueri, itasoncantayetaque, irootaque icoantavetacaniri irineeri. Icoaveta irineerime intasoncantayeteme.

⁹ Oshequi isampiyevetacari paitapeerica, iro cantaincha te iranqueriji Jesoshi.

¹⁰ Oshequi yapiiitapinitiniri yora amaqueriri:

—Te incameetsateji. Ainiro irantane.

¹¹ Impoiji ishirontimentajeitacari Jesoshi yora Eroreshi aisati maaroni soraropee. Impoiji iquitsaataqueri cameetsari quitsaarentsi, ishiacantamempeacari pincatsari, irishirontimentajeitantariri aisati. Impoiji itianquiri aisati anta Piratoqui.

¹² Ari peerani iquisavacaapinita Eroreshi aisati Pirato, iro cantaincha meeca intanacaro yaacameetsatavacaaja. Yojojajiro iquisavacaaveitani.

Yoacantaqueri Pirato Jesoshi, irinti Varavashi yoipacajiri.
(Mt. 27.15-26; Mr. 15.6-15; Joa 18.39-19.16)

¹³ Impoiji yapatojeitacari Pirato yora jivatacaajeitiriri saserotepee, pincatsaripee, aisati oshequi atiripee pashini.

¹⁴ Ari icantavaqueri:

—Pamene, incaranqui pamavetaquenari yoca, picantajeivetaquena yoamejeitaqueri atiri irojocajeitena narori, aisati iriori novincatsaririntepee. Pineajeitaquena nosampitaqueri paitaricapee, iro cantaincha noneacameetsatiri: te aneroji irantane.

¹⁵ Aisati iriori Eroreshi, inecameetsataqueri, irootaque yoipiantacariri aca. Pineaquero, tecatsi irante noacantanteariri.

¹⁶ Meeca nompasatacanteri, impoiji noimpacajeri.

¹⁷ Ari maaroni osarintsi ariorica omoncarataca oca vieshita iquenqueshiretantarori yavisantaniri peerani inampire Tasorentsi, yora oantatsiri, yora Pirato yoipacajiri aparoni shirampari yoimnqueetaqueri.

¹⁸ Ari itsipatavacajaiteaca icantajeitaqueri:

—Poacanteri yoca, irinti Varavashi poimpacajeri.

¹⁹ Ari yora Varavashi peerani icantajeitaqueri ishaninca anta Jerosarequi: “Tsame ajocajeri yora pincatsari”. Impoiji yoaqueri ishaninca, irootaque yoimnqueentacariri caravosoqui.

²⁰ Icoaveta Pirato iroimpacajerime Jesoshi, irootaque icoantavetacari iroimajerentajerime atiripee, iro cantaincha

²¹ aiqhero icantajeitanajatiiri:

—Pimpajacotacanteri. Pimpajacotacanteri.

²² Yapiivetajari aisati Pirato:

—¿Paita nompajacotacantanteariri? ¿Paita yantaqueri? Nosampijeivetaquempi, iro cantaincha tecatsi piotacaasanotena noacantanteariri. Nompasanatacanteri, impoiji noimpacajeri.

²³ Icantani icajemajeitanaque:

—Pimpajacotacanterive. Pimpajacotacanterive.

Aiqhero icantanaitii, irosati iqumisantantacariri Pirato,

²⁴ icantiri:

—Ari nomajeitempiro oca picoacaajeitaquenari.

²⁵ Yoipacaacantajiri Varavashi, aisati icantajeitaqueri:

—Paajeitanaqueriqueti Jesoshica, jaocarica pincanteriri.

Ijatacaajeitaqueri anta impajacoterinta.

(Mt. 27.31-32; Mr. 15.21-23; Joa 19.16-17)

²⁶ Ari yaajeitanaqueri Jesoshi anta impajacoterinta, iquenanaque avotsiqui. Jeri itonquojaitavacari shirenesati pajitachari Shimo. Iponeanaca oantsiqui. Ari iperanatavacari soraro yanatanaqueneri Jesoshi coroshi, ora impajacotanteariri. Yoijatapairi itapiiqui Jesoshi.

²⁷ Yoijajeitanaqueri oshequi atiri. Otimi aisati oshequi tsinane iraacojaitaqueriri. Oshequi oashiretacotacari, irootaque ocajemacojeitantacariri aisati. Jerosaresato onajeiti.

²⁸ Iro cantaincha yamenanaquero Jesoshi, icantajeitanaquero:

—Eiro piracojeitanatsi, avisati iracojeitajanchane, aisati piracojeiteri pitomipee.

²⁹ Coajica ompomerentsitimojeitempi, pashinoncaajeitanaquea. Pincantajeite: “Oquimoshiretaque caari timatsi otomi”.

³⁰ Incoajeivetea atiri ontijerime imperita.

³¹ Pamene, tecatsi nanteni nainti, iro cantaincha iroashinoncayena. Tempa coajica irashinoncaasanotaquea maaroni antirori caari cameetsatatsi.

³² Aisati anta yaayeetanajiri apite coshitantatsiri, intsipajeiteari iriori Jesoshi, impajacojeteri.

Ipajacotaqueri Jesoshi coroshiqui.

(Mt. 27.33-38; Mr. 15.22-32; Joa 19.18-24)

³³ Ari yareetacaajeitapaacari anta Caraveraqui, ipajacojeitapaqueri coroshiqui, tac, tac, tac. Irinti yora coshitantatsiri, ipajacotaqueri pashiniqui coroshi anta iracosanoriqui Jesoshi. Irio itsipa ipajacotaqueri anta irampatequi.

³⁴ Impoiji iquenquetsatacairi Jesoshi iriri:

—Apa, pincavintsayeri yocapee, eiro poasanquetaimentiriti yoaquena. Te irioteji paitarica yantiri.

Ari icoaajeitaeque soraropee irajaiteero iitsaareni Jesoshi. Icanti:

—Tsame ampishonquero mapijaniqui ayojeitanteari janicarica aitajerine iitsaareni.

Icanti itsipa:

—Jaa, jentsiqueti, aneantearo.

³⁵ Ari itimi anta oshequi atiri, amenajeitaqueriri, aisati itimi yora pincatsaripee, ishiron-timentajeitacari Jesoshi, iji, iji, iji; icanti:

—Yoavisacovetacari itsipapee, jentsite amenavaquerita ariorica irimatajea iroavisacotajea irisati. Iriotasanaotaquerica Quirishito, itiancane Tasorentsi, ari irimatajea irisati iroavisacotajea.

³⁶ Aisati iriori soraropee, ishiron-timentajeitacari. Ijatashitaqueri, imperime ovaja, quepishijari.

³⁷ Icantaqueri:

—Aviorica ivincatsarite jorio, jentsite poavisacotajea avisati: iji, iji, iji.

³⁸ Ainiro ipajacoyetaquero anta coroshiqui sanquenarentsi, otimi iitoqui Jesoshi, jenioquiji. Osanquenataca irineanequi quereshiasati, aisati irineanequi oromasati, aisati irineanequi jorio. Osanquenataca, ocanti: “Jeri yoca ivincatsarite jorio”.

Iquenquetsatacairi Jesoshi coshitantatsiri ipajacoyetiri.

(Mt. 27.39-53; Mr. 15.33-38; Joa 19.28-30)

³⁹ Aisati yora coshitantatsiri ipajacoyetaqueri, ishiron-timentacari iriori.

—Aviorica Quirishito, poavisacotajea avisati, aisati poavisacotena narori.

⁴⁰ Iro cantaincha iquisatsataqueri itsipa coshitantatsiri:

—Tempa pimpincatsateri Tasorentsi. Aisati avirori, irotaintsi pincame.

⁴¹ Ainiro antanepee arori ancamajeitanteari, irintiquea yoca, tecatsi irante incaman-teari.

⁴² Aisati icantiri:

—Jesoshi, ariorica pareetea anta pimpincatsaritentia, pinquenqueshiretapeena narori, poavisacotena.

⁴³ Yacanaqueri:

—Queario oca noncantempiri: meeca quitaiteri pintsipatanaquena anta ocameetsaitet-inta.

⁴⁴ Itampaticatapaaque meeca catsirincaiteri. Omapocashitanaca antearo otsitenitanaque. Ari otsitenitanaque irosati ishaaviniji.

⁴⁵ Aisati itsitenitanaque catsirincaiteri. Aisati otimi anta ivancoqui Tasorentsi oticaashiro nianqui. Ari omapocashitanaca, otseranaque, tsererere, tsati; apitemaotanaque. Impoiji antearojenca icantanaque Jesoshi:

⁴⁶ —Apa, meeca noncame. Aviro quempyeajenani.

Irosati icamantanaca, toren.

Yoashirejeitanaca maaroni neaqueriri Jesoshi icamaque.

(Mt. 27.54-56; Mr. 15.39-41)

⁴⁷ Ineantavacariri iyapanote soraro, icanti:

—Tempa icameetsataque Tasorentsi. Queario icameetsatasanotini yoca shiramparini. Te ontimeniji irantane.

⁴⁸ Aisati yora amenajeitiriri, iquenqueshirejeitanaca maaroni. Ipiajeitanaja nampisiqui, yoashirejeitanaca catsini.

⁴⁹ Irintiquea yora iojeitiririri Jesoshi, icatiajeitaca ara aiqetiji, yamenajeitanaque. Ocarajeitiri oca tsinaneppee poneachari Carireaque, tsipatapaacariri chapinqui Jesoshi.

Yoiminquetaqueri Jesoshi omoroqui.

(Mt. 27.57-61; Mr. 15.42-47; Joa 19.38-42)

⁵⁰⁻⁵¹ Ari itimi anta cameetsari shirampari, pajitachari Jose, arimateasati. Otimi Arimatea anta Joreaque. Ari icarajeitaqueri Jose yora itsipapee pincatsariyetatsiri, yoametavacaap-inijeita, iro cantaincha te incoaveteaji irinti impajacotacanteri Jesoshi. Ipincatsataqueri irinti Tasorentsi, yaamaajeitacari impoque impincatsariventajeitiri maaroni atiri.

⁵² Ari ijataque iriori, yameniri Pirato, icantaqueri:

—Nocoaque pishinetenari Jesoshini, naanajeri.

Icantiri:

—Ari, pijatequeti, paanajeri.

⁵³ Impoiji yoaniireajiri, yapinaicacotaqueri tocoyaqui, cameetsamaotatsiri. Yaanajiri anta oninta mapi, ora iroaquera imoqueeti, yominqueapaaqueri tsompoinaqui. Tecatsi itsipa iroyeete anta omoroquinta.

⁵⁴ Tempa irootaque Viereneshi icamantacari Jesoshi. Yovetsicajeitaquero atiri paitapeerica, tempa irotaintsi saavaro imaoreajeitanti.

⁵⁵ Ora tsinanepi oijatacojeitiri Jesoshi, amenacojeitaqueri yaajeitanaqueri omoroqui, anta yoajeitaqueri tsompoina.

⁵⁶ Impoiji opiajeitanaja anta ovancoqui. Ovetsicapaaquero casancajari aisati pashini casancatsiri. Impoiji saavaro omaoreajeitanaque, omoncarataquero isanquenare Moishishi.

24

Itinaanaja Jesoshi.

(Mt. 28.1-10; Mr. 16.1-8; Joa 20.1-10)

¹ Ari otomincotamanaji, tsiteniquera ojatamanaque tsinane anta yoyeetaquerinta Jesoshi. Aanaquero casancajari ovetsicaqueri. Oijatanaquero otsipapee tsinane.

² Ari yoyeetaqueri chapinqui omoroqui antearo mapi, itsinacacoyeetanaqueri omoroqui. Iro cantaincha areevetapaacaro oneapaatiro tivironcaja oni.

³ Oqueashivetapaacari Jesoshi omoroqui, iro cantaincha te oneapeeriji Avincatsarite.

⁴ Te iojeiteji paitarica onquenqueshirejeteri. Impoiji imapocashitapaacaro apite shirampari, icatiimotapaacaro quempeji. Oshipaquireamaotanaque iitsaare.

⁵ Oshequi otsarocaaavacari, oivotasanotanaca. Isampitapaquero:

—¿Paita picoantariri aneatsiri aca? Aca yoyeetapinitiri camasanoyetatsiri.

⁶ Te aneajeriji Jesoshi aca, tempa tinaanaja ini. Pinquenqueshiretero icamantitaquem-piri anta Carireaquei.

⁷ Tempa icamantitaquempi: “Noponeaca inquitequi, natiritapaque. Coajica irayena caari quemisantatsi, impajacotena coroshiqui. Oncarate mava quitaiteri ari nontinaanaje aisati”. Meeca omoncarataca icamantitaquempiniri.

⁸ Impoiji oquenqueshiretasanotaquero icamantitacaroniri Jesoshi.

⁹ Opianaja nampitsiqui, ocamantapaqueri iroamerepee aisati itsipapee quemisantatsiri.

¹⁰ Opajita oca tsinanepi Maria ora maquitarasato, Joana, Maria iriniro Santiago; aisati otimi otsipapee tsinane.

¹¹ Iro cantaincha te irishiretearoji yora quemisantatsiri oca ocamantavetapaacariri, ijitashijeiveta te ioteji.

¹² Iro cantaincha iriori Petero ishianaca anta omoroqui yoajeivetacarinta chapinqui Jesoshi. Yamenapaaquero tsompoina, ineapaaquero tocoya yapinaicacotantavetacariri. Impoiji ipianaja pancotsiqui, oshequi iquenqueshiretanaca.

Anta avotsiqui ineaajiri iroamere Jesoshi.

(Mr. 16.12-13)

¹³ Impoiji ijatanaque apite iroamere Jesoshi anta Emaoshiqui. Ariorica imponeaquea Jerosarequi, ocarati 11 quirometro irareetanteari nampitsiqui.

¹⁴ Ari iquenanaque, iquenquetsatavacaajeitaca. Iquenquetsacotaqueri jaoca icanteetiri Jesoshi, aisati maaroni yantayetiri iriori.

¹⁵ Ari iquenanaque, icantavacaanaca, irosati itsipajeitancari Jesoshi, quiso yoanaqueri anta avotsiqui.

¹⁶ Ineajeivetacariri, iro cantaincha te irishineteriji Tasorentsi iriojeitajeri.

¹⁷ Ari isampitiri Jesoshi:

—Incaranqui, piquenantacari avotsiqui, ¿paita picantavacaimentacari? ¿Paita poashirejeitancari?

¹⁸ Ari ipajita aparoni Quereojashi, yacanaqueri iriori:

—Iojeitaque maaroni jerosaresati: ¿paita caari piotanta avirori?

¹⁹ Isampitiri:

—¿Paitaquea?

Yacanaqueri:

—¿Tempa pinquemacoteri Jesoshini, yora nasaretasati? Iquenquetsatacapinijeitanaroni irineane Tasorentsi aisati oshequi itasoncantapiniyetini. Ineacameetsataqueri Tasorentsi aisati noneacameetsajeitaqueri narori.

²⁰ Yaajeitaqueri yora jivatacaajeitiriri saserote aisati avincatsaritepee. Icantajeiti te incameetsateji, ipajacotacantaqueri, icamaque toren.

²¹ Nojiivevetaca irio oavisacojeiteenemeri, pincatsariventajeiteenemeri. Meeca ocarataque mava quitaiteri icamantacari.

²² Ocarajeitaquena aparopee tsinane jatamanatsiri incaranqui anta noavetacarinta. Opiaja, omapocapaaquena,

²³ ocamantapaaquena: “Te noneapaajeriji Jesoshini, te aneajeriji. Irintiquea noneapaaque inampirepee Tasorentsi, icantaquena iriori: ‘Tinaanaja Jesoshi’”. Irootaque ocantaquenari.

²⁴ Impoiji ishiayetanaca aparopee anta, ineaquero ocantaquenari tsinanepée: irintiquea Jesoshi, te irineeriji.

²⁵ Impoiji icantaqueri Jesoshi:
—Te aneajeroji piojeitantari, pitseencaqueri yora quenquetsatirori irineane Tasorentsi. Te pinquemisantajeiteriji.

²⁶ Tempa icantajeiti irijivate Quirishito inquematsicataquearo maaroni oca, impoijiquea impincatsaritanotanaque.

²⁷ Ari yoametasanojeitanaqueri Sanquenarentsi, itsoteaquero maaroni quenquetsacotiriri iriori. Ijivataqueneri isanquenare Moishishini, impoiji yoamejeitiri isanquenare itsipapee quenquetsacantajeitatsiniri.

²⁸ Ari yareejeitapaaca nampitsiqui, iravisanaajeme Jesoshi,

²⁹ iro cantaincha icantaqueri itsipapee:
—Eirota pijatita, pisavicapee novancoqui. Ishaavijiiteanaji, irotaintsi ontsitenijencaitete.

Ari ijatapainti ivancoqui iriori.

³⁰ Impoiji itsipatavacaajeitaca, yoajeitaca. Impoiji yaaquero Jesoshi tanta, ipasonquitiri Tasorentsi, impoiji ipajeitacari itsipapee.

³¹ Irosati iquenqueshireantanaja, iojeitavajiri. Impoiji imapocanaja Jesoshi, ipeanaja.

³² Icantavacaajeitanaca:
—Tempa ocameetsatasanotaque icantaqueeri anta avotsiqui. Oshequi aquenqueshiretaquero, aquimoshirevatasanotaquero.

³³ Irosati ijajeitantanaja, ipiajeitanaja Jerosarequi. Ineapaaqueri yora iroamereni Jesoshi, icarataji 11, itsipajeitacari itsipapee quemisantatsiri, yapatojeitaca.

³⁴ Icantajeitavaqueri yora savicajeitatsiri:

—Quearioriteemi: itinaasanotanaja Avincatsarite. Ineaqueri Shimo.

³⁵ Irosati icamantantapaacari:

—Aisati narori, noneajeitacari anta avotsiqui, cameetsa catsini yoametaquena, iro cantaincha te niöveteariji. Impoiji anta novancoqui icarajaquero tanta, ipaquenaro, irosati niotantajari.

Ineajeitajiri iroamere Jesoshi.

(Mt. 28.16-20; Mr. 16.14-18; Joa 20.19-23)

³⁶ Ari ainirojeitatsi iriori anta pancotsiqui, iquenquetsatavacaajeitaca, irosati imapocantapaaajari Jesoshi, icatiimojeitapaajari nianqui. Icantapaaajiri:

—Pinquimoshirejeitanaque, maaroni.

³⁷ Yoajeitanaqueri cavaco, te iriojeitavaqueriji, ijtashijeivetavacari camaari. Itsaroajeitanaque.

³⁸ Isampitapaaqueri:

—¿Paita pitsaroacantanari? ¿Paita pitseencajeitantanari?

³⁹ Pamenajeitero naco aisati noiti oqueanaquena quiravo. Narotaque pocajantsiri. Jentsite, pimpamijeitena piojeitantenari. Pineaquena, otimi novatsa aisati notonqui, te nonquempeteariji camaari.

⁴⁰ Irosati yonijantajeitacari iraco aisati iiti.

⁴¹ Iro cantaincha tequera irishiretasanoteari itinaanaja. Iquimoshirejeivetaca, iro cantaincha itseencashirejeitaque. Icantiri Jesoshi:

—¿Timatsimpa avajeiteari?

⁴² Ari ipavaqueri shima shincorentsi,

⁴³ yoacari. Irirorijeji yamenashejeitacari, sorerere.

Ari yovecarataquero Jesoshi yoamejeitacari iroamerepee.

(Yan. 1.4-8)

⁴⁴ Impoiji icantajeitacari:

—Tempa chapinqui nocamantaquempi: “Oshequi nonquematsicataquearo, iroyeetena. Aitaque omoncarataquea maaroni isanquenatacotitaquenaniri Moishishini, aisati yora quenquetsatacaantatsiniri, aisati yora pampoyeaventajeitiriniri Tasorentsi”. Meeca moncarataca.

⁴⁵ Impoiji yoametasanojeitaqueri ocantayetiri Sanquenarentsi,

⁴⁶ icantajeitaqueri:

—Tempa ocanti Sanquenarentsi: “Incamaque Quirishito, oncarate mava quitaiteri ari intinaanaje aisati.

⁴⁷ Inquenquetsatacoyeeteri maaroni quipatsipeequi, irijivate aca Jerosarequi: inquemacojeitaqueri maaroni atiri. Incamantajeiteri atiri: ‘Pinquenqueshirejeitanaquea, pojocajeitajero caari cameetsatatsi pantajeitiri. Paventeari Tasorentsi iroavisacotantempiri’ ”.

⁴⁸ Ari pineajeitaquero meeca omoncarataca isanquenatacotitaquenaniri peerani.

⁴⁹ Meeca nontianquempiro icashiacaaquempiri Apa: ompocashitempi Ishire, quiso oajeitantempiri. Pisavicavaqueta aca nampitsiqui irosati ompocanteari. Impoiji irimat-acaajeitempi Tasorentsi pantajeitantearori paitapeerica incoacaayempiri.

Ijatanaji Jesoshi inquitequi jenoqui.

(Mr. 16.19-20; Yan. 1.9-12)

⁵⁰ Impoiji yora Jesoshi yaajeitanaqueri iroamerepee anta Vetaniaqui. Ari anta nianqui, yacotanaque Jesoshi, iquenquetsatacairi iriri, icantiri:

—Apa, jeri yoca noamereca: pintasoncaventajeiteri, poveshireacaajeiteari.

⁵¹ Irosati yovancantanaja inquitequi, ipeanaja.

⁵² Oshequi ipincatsajeitaqueri, impoiji ipiajeitanaja Jerosarequi, iquimoshirejeitanaque catsini.

⁵³ Ijatapinitaque anta ivancoqui Tasorentsi icantapinijeitaque:

—Tempa icameetsataque Tasorentsi.

Ari ocarati. Narotaque sanquenatirori: *Irocashi*

YORA JOA ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Intanacaro Joa iquenquetsataque.

¹ Iriotaque Quirishito intasanotarori itimi: irio Ashitarori Irineane oamejeitaqueeri. Itsipatarini Tasorentsi, tempa Tasorentsi ini iriori.

² Itsipatarini peerani iriori.

³ Iriotaque vetsicajeitirori maaroni, paitaricapee. Tecatsi imashiyetachane: eirome itimime eirole ovetsicayetame timayetaintsiri.

⁴ Iriotaque oanejeitaqueeri, quitaitetacojeitaqueeri: tempa iotacajeitaquee jaoca icantari Tasorentsi.

⁵ Peerani te ayojeiveitearini, oquempetimoveiteeni atimini tsiteniriqui; impoji ipocapaaque, iotacajeitapaaquee, meeca oquempetimotaquee iquitaitetacojeitaquee. Meeca eirole atimajitsi aisati tsiteniriqui.

⁶ Ari itimaveitani aparoni shirampari pajitachari Joa, itiancane Tasorentsi.

⁷⁻⁸ Iquenayetanaque, icamantacoyetapaaqueri yora quitaitetacojeitaqueeri, iquemisantajeitantariri maaroni atiri. Yora Joa caari ini quitaitetacotantatsi, irointiquea ineaqueri aisati iquenquetsatacotaqueri. Irootaque itiancantacariri Tasorentsi.

⁹ Ari impoji ipocapaaque aca quipatsiqui yora quitaitetacotasanoatantatsiri irinti, iotacajeitaquee arori, aisati iriori maaroni savicajeitatsiri.

¹⁰ Ari itimapaaque quipatsiqui, oca yovetsicaqueri peerani, iro cantaincha te iriojeitavaqueriji atiri, yora yovetsicajeitacari.

¹¹ Ipocavetapaaca inampiqui, ishanincavetapaacari joriopee, iro cantaincha te iraacameetsajeitavaqueriji.

¹² Irintiquea aacameetsatavaqueriri, yora quemisantajeitavaqueriri: itasoncacoventajeitaqueri, ipeajeitajiri itomi Tasorentsi.

¹³ Iriotaque Tasorentsi tomintajeitaqueeri arori, aisati maaroni quemisantajeitiriri iriori. Te inquempetariji ashijeitaqueeri aca quipatsiquica, itimacajeitiro irinti ijina itomi. Aisati tecatsi ancantajeite arori: "Nompeajeata nainti itomi Tasorentsi", eirole amatirotsi. Tempa icoashita irinti, irootaque itomintajeitantaqueeri, maaroni.

¹⁴ Tempa Tasorentsi ini yora Ashitarori Irineane: iponeanaca inquitequi, yatiritapaaque, itimimojeitapaaquee aca quipatsiqui. Yashi yoirole ineshinoncajeitaquee, queariotasanotaque oca yoamejeitaqueeri. Noneajeitavaqueri narori ipincasaritasanotaque, iquempetacari Tasorentsi; tempa iriotaque itomi irapintite.

¹⁵ Yora Joa icamantacotaqueri Quirishito, icantajeitaqueri atiri:

—Jeri yoca nocamantacotaqueri chapinqui: "Yanaacotaquena impoitapeenaneri, ipincasaritasanoti irinti. Te nompincasariteji narori. Tequerani nontimeni narori, itimitani irinti".

¹⁶ Yashi yoirole ineshinoncatantaque Quirishito, irootaque ineshinoncatanteeri arori. Aiquero ijatati ineshinoncajeitaquee.

¹⁷ Peerani yora Moishishini, isanquenatironi oca peranajeitaqueeri; irintiquea Quirishito ineshinoncajeitaquee, queariotasanotaque maaroni yoamejeitaqueeri.

¹⁸ Tecatsi atiri neerine Tasorentsi, aparini irinti ineiri itomi irapintite. Iquempetacari iriri, tempa quiso yoitarini, irootaque iotantacariri: meeca yoamejeitaquee jaoca icantari.

Intanacaro Joa icamantacotaqueri Jesoshi.

(Mt. 3.11-12; Mr. 1.7-8; Ir. 3.15-17)

¹⁹ Yora joriopee jerosaresati itiancayetaqueri saserotepee, jeri ishanincapeeni Irevi. Itiancaqueneri Joa, ari ijataque. Isampitapaaqueri:

—¿Janicampimpa? ¿Avirompa Quirishito naamaajeivetacari?

²⁰ Ari te irimanacoteaji. Icamantasanotavaqueri:

—Caarina noni Quirishito.

²¹ Yapiitajiri:

—¿Queariompa? ¿Avirompa Iriashini?

—Caarina.

—¿Avirompa camantantatsineri naamaajeitacari?

—Caarina.

²² Isampitajiri aisati:

—¿Janicampimpa? ¿Paitampa noncamantapeeriri tiancaquenari? ¿Paita pantiri?

²³ Icantiri:

—Narotaque iquenquetsatocotini peerani Isayashini, tempa isanquenatini: “Coajica impoque camantantatsineri, inquenquetsatapinite anta caaraiteriqui, incante: ‘Pinquengeshireempa, pinquemisanteri Avincatsarite iroameetsatantempiri’ ”.

²⁴⁻²⁵ Ari isampitaqueri:

—¿Queariompa? ¿Caarimpimpa Quirishito? ¿Caarimpimpa Iriashini? ¿Caarimpimpa yora camantantatsineri naamaajeitacari impoque? ¿Paitampa pivaotisantantariri ashanincepee?

²⁶ Yacanaqueri Joa:

—Iro novaotisantantariri nija. Timatsi meeca pashini shirampari caari piojeiti.

²⁷ Iriotaque impoitapeenaneri, pincatsaritanotatsiri ini. Oshequi nopincatsataqueri, te nompincatsateji narori.

²⁸ Aitaque icantapinita Joa anta Vetaniaqui. Otimi Vetania intatiqueronta Jorirani. Anta ivaotisantapinitinta.

Yapiitajiro Joa iquenquetsatocotajiri Jesoshi.

²⁹ Otsipani quitaiteri yamenanaque Joa, ineavaqueri Jesoshi, ipocapaaque. Icantiri atiripee:

—Jeritapaaque ovishatatsiri itiancaqueeneri Tasorentsi. Iriotaque oavisacojeiterineri maaroni atiri caari cameetsatsi.

³⁰ Iriotaque noquengetsatocotaqueri chapinqui: “Yanaacotaquena impoitapeenaneri, ipincatsaritanoti irinti. Te nompincatsariteji nainti. Tequerani nontimene narori, itimitani irinti”.

³¹ Te niövetearini narori, iro cantaincha meeca icoaque Tasorentsi iriojeiteri maaroni ajorioririnte. Irootaque nopocantacari narori novaotisantantayeti.

³²⁻³³ Icamantantaji Joa aisati:

—Te niövetearini narori. Iro cantaincha itiancaquena Tasorentsi, icantaquena: “Pivaotisantapiniteri pishanica nijaqui, poamejeiteri inquenqueshirejeitanaquea. Coajica pineavaquero aniireapee noshire. Janicarica aatapaaqueri, iriotaque yora pajeiterineri atiripee noshire”. Ari impoiji noneavaquero aniireapaaque Ishire Tasorentsi, oponeanaca inquitequi. Oshiavetapaacari sampaquiti: aatapaaqueri Jesoshi.

³⁴ Queario noneasanotaquero. Irootaque nocamantacotantacariri: “Iriotaque Itomi Tasorentsi”.

Intanacaro Jesoshi icoyeaqueri iroamerepee.

³⁵ Oquitaitetamani icatiaja Joa aisati ara, itsipatacari iroamere apite.

³⁶ Ipampoyeaqueri Jesoshi yaniiti anta avotsiqui. Icantiri:

—Jeri yonta ovishatatsiri itiancaqueeri Tasorentsi, iriotaque camimentajeiteeneri oameetsajeitajeeneri.

³⁷ Iquemantavacariri iroamere apite, yoijsajeitanaqueri Jesoshi.

³⁸ Ipitsocashitanacari iriori, ineavaqueri yoiyatapaaqueri. Icantavaqueri:

—¿Paita picoiri?

Icantanaqueri:

—¿Jaoca pisaviquiri maishitoro?

Acantiri maishitoro aneanequi arori: oametantatsiri.

³⁹ Ari icantiri:

—Poiyatanaquena, nonijayempero.

Irosati yoijsajeitantanacari, ineapaaquero ivanco isavicantari. Ari ishavijiiteanaque catsirincaiteri, irosati isaviquimojeitantapaacari.

⁴⁰ Ari ipajita aparone savicapaintsiri Antirishi, iriotaque irirenti Shimo Petero.

⁴¹ Impoiji ijatanaque Antirishi, icoapaaqueri irirenti. Ineantapaacari, icantapaaqueri:

—Noneaqueri Meshiashi.

Acanti Meshiashi aneanequi arori: Quirishito.

⁴² Icantiri:

—Tsame, poijsatanquena, pineapeeri.

—Tsame.

Ari yareetacaacari Jesoshiqui. Yamenavaqueri, icantavaqueri:

—Tempa aviro Shimo, itomi Jonashi. Coajica impajijeetajempi: Sejashi.

Acantajeitiri Sejashi aneanequi arori: Petero, mapitatsiri.

⁴³ Otsipaniqui quitaiteri ijataque Jesoshi pashiniqui quipatsi. Opajita quipatsi Carirea. Ari ineapaaqueri Jeripi, icantapaaqueri:

—Poijsatanquena.

⁴⁴ Yora Jeripi vetsairasati ini. Vetsaira irootaque inampi Antirishi, jeri Petero.

- ⁴⁵ Jeripi ineapaaqueri Natanaeri. Icamantapaaqueri:
 –Noneaqueriyea yora isanquenatacotitacani peerani Moishishini. Aisati camantan-tatsiniri isanquenatacotitajeitacarini iriori. Iriotaque Jesoshi, itomi Jose nasaretasati.
- ⁴⁶ Icantanaqueri Natanaeri:
 –Te incameetsajeiteji nasaretasati. ¿Icameetsatimpa iriori?
 Yacanajiri Jeripi:
 –Tsame, pamenaiteri, piotanteariri icameetsatirica.
- ⁴⁷ Ari iquempejijeitapaacari Jesoshi, ineavaqueri ipocapaaque, icantiri itsipajeitari:
 –Pamenerite yora Natanaeri. Iriotaque quempetasanotariri Ishiraeri: icameetsataque, te irioteji iramatavitante.
- ⁴⁸ Isampitapaaqueri Natanaeri:
 –¿Jaoca picantacari piotantavaquenari nocameetsati?
 Yacanaqueri Jesoshi:
 –Noneitaquempi anta pitsititaro iyera, tequerata incamantempi Jeripi.
- ⁴⁹ Icantaqueri:
 –Tempa aviro itomi Tasorentsi: pitsoteaquero maaroni, pioyetiro. Avirotaque pincat-sariventerineri joriopee.
- ⁵⁰ Icantiri Jesoshi:
 –Pamene, incaranqui nocantaquempi: “Noneitaquempi pitsititaro iyera”. ¿Irootaque-mpa piquemisantantaquenari? Ari pineaquero coajicani nontasoncantasanoyetanaque, impoiijiquea pinquemisantasanotanaquena.
- ⁵¹ Queario oca nocantimpiri. Aitaque pineaquero coajica inquite tsoompoina. Pineaqueri inampire Tasorentsi iraniireashitena, iroancanajea aisati. Tempa naro poneachari inquitequi, natiritapaaque.

2

Ijivataque Jesoshi itasoncantaque.

- ¹ Avisanaque mava quitaiteri, aitaque iquimoshirejeitanaque canasati. Otimi Cana Carireaqui. Yoveshireimentajeitacari aparoni shirampari aatsiri ijina. Ainiro iroori iriniro Jesoshi.
- ² Ari icajemacanteetaqueri aisati Jesoshi, aisati narori, jeri aisati itsipapee iroamerepee.
- ³ Ari nirajeitapaaque ovaja; nocarajeitakeri itsipapee pocajeitatsiri. Otsaatapaaca, te ontimeji aisati. Iriniro Jesoshi ocantiri otomi:
 –Te aneajeroji ovaja: ¿arimpa pimataquero pamitacoteri?
- ⁴ Icantiro:
 –¿Paita, ina, picantantanari? Tequeratsita omoncarateaji nontasoncantayete.
- ⁵ Iro cantaincha ocantiri nampirentsi:
 –Pinquemisanteriyea paitarica imperanataquempiri.
- ⁶ Onaque ara chomo, ocaratí 6. Yovetsiqueetiro mapi, antearo oni. Irootaque onantari nija iquivapinitantari joriopee.
- ⁷ Jesoshi icantajeitiri nampirentsi:
 –Pisaje nija chomoquira.
 Isajeitanaque, ijaajeitaquero.
- ⁸ Irosati icantantanacariri:
 –Pinquite meeca. Paacotanaqueneri peranatimpiri.
 Yaacojeitanaqueneri.
- ⁹ Ineantavacarori, opeanaja ovaja aisati. Te irioteji perantatariri nampirentsi jaoca oquenacotapaajiri. Irinti iotaintsi nampirentsi quitaquerori nija. Irosati icajemantacariri aatsiri ijina.
- ¹⁰ Icantiri:
 –Tempa iro ajivatapinitiri cameetsajari ovaja. Ariorica ashinjujeitanaquea ompococotapee masancajari. Aitaque ocantari amejeitari. Aviroyeata quempoyeaquerori cameetsajari. Iroaquera meeca pamacantajiro aisati.
- ¹¹ Otimi Cana anta Carireaqui. Ijivataque Jesoshi anta itasoncantaque. Nocarajeitakeri itsipapee iroamerepee noneajeitaquero, irosati noshirejeitantanacariri.

Isavicaque Jesoshi Caperenaogui.

- ¹² Irosati noirincantajeitanaca Caperenaogui. Itsipatanacaro Jesoshi iriniro, irirentipee, narori, itsipapee iroamerepee aisati. Nomaajeitanaque anta aparopee quitaiteri.

*Yoimisoquijaqueri pimantatsiri anta ivancoqui Tasorentsi.
 (Mt. 21.12-13; Mr. 11.15-18; Ir. 19.45-46)*

¹³ Irotimataintsi quitaiteri iquimoshirejeitantapinitari joriopee, ipajiyetiro: yavisantaniri. Iro iquenqueshiretiri quitaiteri peerani yavisantaniri inampire Tasorentsi anta Ejipitoqui: te iroyeriji itomipee jorio, irinti yoaque itomipee ejipitosati. Ari itoncaanaque Jesoshi Jerosarequi. Nocarajeitanaqueri itsipapee iroamerepee, noijajeitanaqueri.

¹⁴ Noneajeitapairi ivancoqui Tasorentsi pimantajeitiriri vaca, ovisha, sampaquiti, maaroni. Isavicajeitaque ara pinavacaayetariri atiri iirequite.

¹⁵ Ari yampitsataquero Jesoshi iviritsa impasatanteariri vaca. Irosati yoimisoquijacantajeitacariri ovisha, vaca, maaroni. Ipitamonquitaqueri imesatepee pinavacaariri iirequite, itequitaqueri iirequite.

¹⁶ Icantiri pimantajeitiriri sampaquiti:

—Poimisoquijajeitajeri yoca. Eiro pipimantayetitsi aca ivancoquica Apa.

¹⁷ Irosati noquenqueshireantajeitanajarori isanquenatitacaniri: “Icanti Quirishito: ‘Nontsaneacotearo, Apa, pivanco; irootaque iroimenteetenari coajicani”.

¹⁸ Icantanaque jorio:

—¿Paita pantantarori oca? ¿Paita pinijayenari niojeitantempiri avirorica Tasorentsi?

¹⁹ Yacanaqueri Jesoshi:

—Pintireajerorica oca ivancoa Tasorentsi, ari oncarate mava quitaiteri novetsicajero aisati.

²⁰ Irosati icantantanacari:

—Ocarati 46 osarintsi yovetsicanteetacarori pancotsica. ¿Ariompa oncarate mava quitaiteri povetsicantajejarori avinti?

²¹ Ja, irisati shiacantaincha. Tempa iriotaque shiaquerori ivanco Tasorentsi, tempa quiso yoaqueri.

²² Icamanaque, ocarataque mava quitaiteri itinaantanajari aisati. Impoiji, aitaque noquenqueshireajeitanajiro oca ishiacantaqueri. Aisati niotanaquero oquenquetsatacotaqueñiri peerani sanquenarentsi, moncarataca meeca maaroni oquenquetsatacotaqueñiri.

Intayetanaca iquemisantajeitakeri Jesoshi.

²³ Areetapaaja aisati yavisantaniri, iquimoshirejeitantari. Itimapaaji Jesoshi Jerosarequi, oshequi itasoncantayetapaaque. Ineayetaqueri atiri, irootaque iquemisantantajeitacariri oshequi.

²⁴ Yora Jesoshi ioti jaoca icantashirejeitari maaroni atiri, irootaque yaamaventantanacari: “Yayeetanacari”.

²⁵ Iojeitakeri atiri jaoca ocantajeitari iquenqueshirejeitiri. Iotashitaca, tecatsi camanterineri.

3

Yora Nicoremo yananincashitanaqueri Jesoshi.

¹ Itimini aparoni shirampari pincatsariventiriri joriopee, ipajita Nicoremo. Variseo ini.

² Ari yananincashitanaqueri Jesoshi, icantapairi:

—Niotaquempi, oametinari, piponeaca Tasorentsi; irootaque pipocantacari, poamejeitapeena. Eirome itsipatimpime Tasorentsi, eirome pitasoncantime.

³ Icantiri Jesoshi:

—Queariotaque oca noncamantempiri: yora caari apiitajanchane intimaje, tecatsi incantea irijate anta ipincatsaritinta Tasorentsi.

⁴ Icantiri iriori Nicoremo:

—Ariorica anteashiparitanaje, ¿jaoca ancantajeiri antimaje aisati? ¿Arimpa amatajearo ampianajero otsonmontequi anironi ontimacotantajeeri aisati?

⁵ Yacanajiri:

—Queariotaque oca noncamantempiri. Maaroni caari vaotisatajachane nijaqui, aisati maaroni caari ontimaje Ishire Tasorentsi, tecatsi incantea iraretea anta ipincatsaritinta Tasorentsi.

⁶ Tsinane, ariorica ontimeri otomi, irishanincatajeiri iriri. Aisati oquempevetaca Ishire Tasorentsi: ariorica ontimajeri atiri, irishanincatajeiri Tasorentsi.

⁷ Ariorica noncantempi: “Pampiitajea pintimaje”, eiro poanatsi cavoco.

⁸ Jaocarica oninti, ojeaoncaque tampea, piquemavaquero opoimatapaaque, sooo. Iro cantaincha te pioteji jaoca oquenapaaqueri, aisati te pioteji jaocarica ojateri. Aisati iquempevetaro maaroni otimajiri Ishire Tasorentsi.

⁹ Icantajiri Nicoremo:

—¿Jaoca ocantari oca pishiacantanari?

¹⁰ Yacanajiri iriori Jesoshi:

—¿Caarimpimpa oamejeitiriri ajorioririntepee? ¿Paita caari piotantavacaro oca nocantimpipi?

¹¹ Queariotaque oca noncamantempiri: nocamantacotiro nioyetiri aisati noneayetiri, iro cantaincha te pinquemisanteroji nocamantayevetimpiri.

¹² Jero noquenquetsavetimpiri ineeyetiri aca quipatsiquica, iro cantaincha te pinquemisantenaji. Nonquenquetsatemprome timayetatsiri inquitequi, ¿arimpa pinquemisantaquename?

¹³ Aitaque noponeari narori inquitequi, natiritapaaque; coajica nompianaje aisati. Noquenquetsatacotirorica inquite, niotaquero nocantaqueri.

¹⁴ Peerani anta caariteriqui yatsicajeitaqueri ashanincani oshequi maranquepee. Ari icantirini Tasorentsi: “Pishiacteri maranque, poatiacoteri inchaquiiqui iramenajeitanteriri atiripee, eiroquea icamajeitantatsi maaroni amenajeiterineri”. Ari yoatiacotaqueri Moishishi, yavisacojeitantajari oshequi atiri. Aisati narori iroatiacoeyetaquena, coajica.

¹⁵ Maaroni quemisantenaneri incantaitiyempani iraneajeitanaje anta inquitequi.

¹⁶ Inintasanojeitiri Tasorentsi maaroni atiri, irootaque itiancaquenanari aca quipatsiqui. Narotaque itomi irapintite. Incantaitiyempani iraneajeitapaaje inquitequi maaroni quemisantajectanari, eiro catsini ijatitsi ishaaviji maaroni quemisantajectanari.

¹⁷ Te iro intiancantena Apa noasanquetaajeiteri atiripee, irointi itiancaquena noavisacojeiteri.

¹⁸ Eiro yashinoncaajeitatsi maaroni quemisantanari. Iro cantaincha iroasanquetaajeitaqueri Apa maaroni caari quemisantanana. Iro iroasanquetaanteariri, itseencajeitana.

¹⁹ Nopoqui noamejeiteri atiri jaoca icantari Tasorentsi aisati iriotanteari intimajeite cameetsa: oquempvetaca noquitaitacovetacarari atiri. Iro cantaincha yantapinijeitiro caari cameetsatsi, te incoajeiteji iriojeitero oca noamejeivetacariri; oquempvetaca inintasanojeitiro tsiteniri irointi. Te incoajeiteji intimajeite quitaiteriqui, icantajeiti: “Ineiteerocarari Tasorentsi antayetiri, yoasanquetayeeccari”.

²⁰ Yora antajeitirori caari cameetsatsi iquisajeitana. Te incoajeiteji impocashitena: iotaque nonijaantiteri caari cameetsatsi yantajeitiri, irootaque caari ipocashitanana inquemisantanana.

²¹ Antirori cameetsayetsiri, iriotaque pocashitanari irinti. Nonijayetiri ocameetsajeitaque yantajeitaqueri. Tempa irio Tasorentsi antacaajeitiriri cameetsayetsiri, irootaque caari ipashiventanta ipocashitana.

Irootaque icantaqueriri Jesoshi Nicoremo.

Mavatanaque iquenquetsatacotiri Joa Jesoshi.

²² Irosati ijatantanaja Jesoshi Joreaque, nocarajeitanaqueri itsipapee iroamerepee, noijajeitanaqueri. Nosavicajeitapaaji anta, novaotisantantapaaji.

²³ Aisati iriori Joa, ivaotisantanti aisati Ainoqui, oquempjitaro Sarimi. Oshequitapai nija anta. Ijatashijeitanaqueri oshequi atiri irivaotisantanteariri.

²⁴⁻²⁵ Tequeratsita iroiminqueeteriji Joa. Yora iroamere, ipiatsatacarari aparoni jorio. Iro ipiatsatavacaimentari jaoca ancantajeitajeari ancameetsajeitantajeari.

²⁶ Irosati ipocashitantapaacarari Joa iroamere, icantapaqueri:

—Oametanari, jeri ivaotisantanti yoranqui pitsipatariranqui chapinqui intatiqueronta Jorirani. Yoranqui picantiri Quirishito. Irootaque ijatashijeitantanacariri maaroni atiri, meeca yojocajeitanaquee arori. ¿Paitaquea?

²⁷ Yacanaqueri Joa:

—Tecatsi amatashitea arori, irintiquea Tasorentsi jenoquisati matacayeerori maaroni cameetsayetsiri.

²⁸ Piquemajeitaquena nocantaqueri chapinqui: “Caarina noni Quirishito. Itiancaquena Tasorentsi nojivataqueri”.

²⁹ Yora aintsiri ijina, iriotaque aasantirori. Yora ishaninca icarajeitiri inquimoshireimenteari inquemavaqueririca irineanate. Aisati meeca noquempetari narori. Oshequi noquimoshireimentasanoatanaqueri iriori Jesoshi.

³⁰ Aiquero ijatati ipincatsaritasanotanaque irinti. Narori, te:

³¹ eiro nopincatsarititsi. Yoraquea poneachari jenoqui ipincatsariventasantanti irinti. Aroquea quipatsisati ashanincatasanojeitari savicajeitatsiri quipatsiqui, te ampincatsarijeiteji. Aquenquetsatacotiro oca aneyetiri aca quipatsiqui.

³² Yora poneachari inquitequi icamantacoyetiro paitarica ineyetiri aisati iquemayetiri anta. Iro cantaincha te intimasanoventeaji quemisantasanoatavaqueroneri icantaqueri.

³³ Irintiquea maaroni quemisantaquero, ioti irinti otampaticatasanoatque maaroni icantiriri Tasorentsi.

³⁴ Iriotaque Tasorentsi tianquiriri Jesoshi, meeca yoametapaaqueero irineane. Yora Tasorentsi te intsaneemparoji Ishire, quiso oajeitaquee.

³⁵ Apa jenoquisati inintiri Itomi, itiancaqueeri ipincatsariventajeitee maaroni.

³⁶ Maaroni quemisantajeiterineri Itomi Tasorentsi incantaitiyempani iranee inquitequi. Eiro ijatitsi inquitequi caari quemisanterine irinti, irosati incantaitiyempani Tasorentsi inquisheru irinti.

4

Ijati Jesoshi Carireaqi.

(Mt. 4.12; Mr. 1.14; Ir. 4.14)

¹⁻² Yora variseopee iquemacotaqueri Jesoshi, icantajeitiri atiri:

—Jesoshi yanaacotiri Joa yoametanti. Oshequi iquemisantacaaqueri atiri, oshequi ivaotisantanti.

Te iri Jesoshi vaotisaterine atiri, narojeitaque nainti iroamerepee vaotisantantsiri. Iotaque Avincatsarite icantaqueri variseopee,

³ yojocanajiro Jorea, ipianaja aisati Carireaqi.

Iquenquetsatacaaqueero Jesoshi samariasato.

⁴⁻⁵ Iquenajiro Jesoshi Samariaqui, noijatanaqueri narori. Narejeitapaacaro nampitsi samariaquiniri pajitachari Shicari. Oquempejitiro iipatsiteni Jacovoni: oca ipaqueriniri itomini Jose.

⁶ Otimi ara iyanareni Jacovoni. Imaotapaaque Jesoshi, tempa noponeajeitaca arejiqui. Isaviquimotapaaqueero iriori iyanareni. Irotimatainti intampiccate catsirincaiteri.

⁷ (-)

⁸ Notsipatacari itsipapee iroamerepee, nojajeitapainti nampitsiqui namanantapaintiro noyeani. (v 7) Irosati opocantapaaca tsinane samariasato, onquitaate nija. Icantavaquero Jesoshi:

—Pimpacotena nire.

⁹ Ocantiri:

—¿Caarimpimpa jorio? ¿Paita pamanantanari nija? Samariasato noni.

Te iraacameetsajeiteriji jorio samariasati, irootaque ocantantacariri.

¹⁰ Yacanaquero Jesoshi:

—Te pioteji paitarica inintacaquempiri Tasorentsi nomatempiri. Aisati te piotenaji narori, janicanarica. Nocantaquempi: “Pimpacotena nireta”. Iro cantaincha piotaque-name, pincantaquename avinti: “Aviro avinti penaneri nireri”. Irosati nompashitantemprome nija oaneantatsiri.

¹¹ Ocantanaqueri:

—Tecatsi pinquitaatanteari. Tsompoina oni nija. ¿Jaoa payerori oca nija ovaneantatsiri?

¹² ¿Panaacotirimpimpa yora Jacovoni, quianatironiri oca iyanareni? Irironi nijaca, irajeitironi itomipee iriori, aisati ivira. Irosati meeca nirajectiro narori. Ocameetsajataque nijaca: ¿pjiitimpimpa ari pimpajena nija anaacoteroneri oca ocameetsajati?

¹³ Yacanaajiro aisati:

—Irimirejeitanaje aisati maaroni irapinitirori oca nija.

¹⁴ Irintiquea yora iraqueoneri nija nompacheri nainti: eiro imiretajitsi aisati. Ora nija nomperiri amotoapaaque ishirequi, irootaque aneacaajerine incantaitiyempani.

¹⁵ Ocantanajiro tsinane:

—Pimpenaroqueti meeca ora nija picantaquenari, eiroquea nomiretantajatsi. Eiro natsipetajatsi nompocaje nonquitaataje aisati.

¹⁶ Icantanajiro:

—Pijate meeca, pincajemaitenari pijime, pimpiaje aisati.

¹⁷ Acanajiro:

—Te intimeji nojime.

Icantanajiro:

—Quearotaque picantaquenari: “Te intimeji nojime”.

¹⁸ Icarajeitaque pijime paavetacari apapacoroni. Yora pitsipatari meeca caari ini pijime. Queario picantaquena.

¹⁹ Ocantanajiro:

—Aviroyeata camantantatsiri: aparo meeca nosampitempi.

²⁰ Aca toncaarigu iquemisantapinijeitiri noshaninca Tasorentsi. Avirojei jorio, picantajeiti avirori cameetsa anquemisantajeite Jerosarequi. ¿Paitaquea anashitavacantacari?

²¹ Icantanajiro:

–Pinquemisantero oca noncamantempiri meeca. Coajica eiro piquenqueshiretajirotsi jaocarica pinquemisantereri Tasorentsi. Atsipetashita aquenqueshiretashitaro jaoca anquemisanteri, irointi cameetsatasanotatsiri anquenqueshiretero janica aquemisanteri.

²² Avirojei samariasati te piojeiveteariji yora piquemisantajeivetari. Narojei, jorio, noijeitiri nainti janica noquemisantajeitiri. Jorio irine oavisacotantatsineri.

²³ Moncarataca pinquemisantanojeiteri Apa: pincoaquerica, ari amitacojeitempi Ishire Tasorentsi, oametempiro quearioyetsatsiri. Aitaque icoaque Apa inquemisantajeiteri maaroni coyeroneri Ishire oamejeiteri.

²⁴ Te ontmeji ivatsa Tasorentsi, irointi Ishire. Coatsiri inquemisanteri Tasorentsi inquemisantanotero Ishire iriotantearori quearioyetsatsiri.

²⁵ Ocantanajiri:

–Niotaque impoqee Meshiashi, yora icanteetiri Quirishito. Irareetapeemparica iriota-caajeitapaajee maaroni.

²⁶ Icantanaquero:

–Narotaque nainti Quirishito neanataquempirica.

²⁷ Irootaque icantaquerori Jesoshi. Irosati narori, nocarajeitiri itsipapee iroamerepee, nareejeitapaaja. Noneapaaqueri iquenquetsatacairo tsinane, noajeitapaaque cavaco. Iro cantaincha te nosampitapeeri: “¿Paíta picantirori tsinane? ¿Paíta piquenquetsatacantarori?” Namenashitapaacari.

²⁸ Irosati ojocantanacaro ochomone, ojatanaque nampitsiqui. Ocamantapairi onampiquiniri:

²⁹ –Tsame, poijajeitanaquena. Nonijayempiri shirampari cantaqueinari maaroni, paitarica nantayetiniri. Irioyeata Quirishito.

³⁰ Irosati yojajeitancaro irameneri Jesoshi.

³¹ Irosatiquera nonajeitaque iyanareniqui, nocantavetari Jesoshi:

–Oametanari, poyea.

³² Icantana:

–Timatsi noari narori caari piojeiti avinti.

³³ Irosati nocantavacaajeitantanaca:

–¿Yameetinirimpa yoari?

³⁴ Icantanaquena:

–Nantiniri tiancaquenari inintacaanari: oquempetimotaquena noaca, te meeca nonquemeroji notashe.

³⁵ Ariorica pipanquitiro pivanquire, tempa picantavacaajeita: “Itsipasatinivani cashiri aajeitanteorori avanquire”. Pinquemisantajeitero noncamantajeitempiri meeca: piotavaquero noshicantempiri. Pamenajeitero panquirentsi: sampatanaque,

³⁶ moncarataca iraaenteearori. Impinateri ashitarori, impoiji inquimoshirejeitanaque: yora ashitarori, aisati iratiritepee, maaroni. Aviro noshicantiri aayetirori, irio Tasorentsi ashitarori. Ariorica pinquemisantacayeri atiri impinatempiri, aisati incantaitatitempani iranee maaroni pinquemisantacaajeiteri. Irampatojeiteri Tasorentsi maaroni irioriqui, anquimoshirejeitantaajeri, maaroni.

³⁷ Queariotaque oca icantapiniyeetiri: “Yora panquitaquerori, eiro yaayetirotsi; irinti pashini aajeroneri”.

³⁸ Notiancajeitaquempi nainti paajeitanteorori caari pipanquiti avirori. Timatsi pashini panquitaquerori, pimpoijeitajeri avirori. Ari pimocaratavacaaajeitaca pantajeitaquero noacoacaajeitaquempiri.

³⁹ Irosati aretantajari tsinane aisati maaroni oijajeitaquerori. Iro ipocajeitancari ishirejeitavacaro ocantapaqueriri tsinane. Ocantapaqueri onampipeequiniri incaranqui: “Icantaquena Jesoshi maaroni, paitarica nantayetiri: irioyeta Quirishito”.

Irootaque iquemisantajeitantanacari Jesoshi oshequi.

⁴⁰ Irosati ipocashijeitancari, icantapairi:

–Pisaviquimotanaquenatsita.

Ari isavicanaque apite quitaiteri,

⁴¹ iquenquetsatacaanaqueri. Iquemisantanojeitanaqueri oshequi.

⁴² Icantajeitaquero tsinane:

–Noquemisantavetacaro picantaquenari, iro cantaincha meecaquea noquemasanotaqueri iriori Jesoshi, irootaque noijeitancari queario oni picantaquenari. Iriotaque oavisacojeiteeneri. Iriotaque yoca Quirishito.

⁴³ Ari apite imaaque Jesoshi anta, irosati ijatantanajari. Ijatanaji aisati Carireaque. Narori, noijajeitanaqueri.

⁴⁴ Jero oca icantapinitiri Jesoshi: “Te impincatsatasanoteriji yora inampipeequiniri camantantatsiri, irointi itseencapinitiri ishanincasanori”.

⁴⁵ Ari nareejaitapaaja Carireaquei. Yaacameetsajeitavaqueri carireasati irinti. Ijajei-tanaque chapinqui iriori anta Jerosarequi, iquimoshirejeitinta. Aitaque anta ineyeta-
quero yantayetiri Jesoshi. Irootaque meeca ineacameetsajeitantariri.

Ipianaja Jesoshi Carireaquei, yoavisacotiri itomi pincatsari.

⁴⁶ Ipianaja aisati Jesoshi Canaqui: ora carireaquiniri. Anta chapinqui ipeaquero nija ovaja. Itimaiti Caperenaogui pincatsari, yojoquiitaca itomi.

⁴⁷ Iquemacotavaqueri Jesoshi, iponeanaja Joreaquei, yareetapaaja Carireaquei. Ari ijatashitanaqueri, icantapairi:

—Irotaintsi incame notomi. Tsame poavisacotajantenari.

⁴⁸ Icantaqueiri Jesoshi atiripee:

—Eirorica notasoncantayeti, ¿ariompa pinquemisantajeitena? Aitaque picantajeitari avirori, pitseencajeiti.

⁴⁹ Icantanjiri aisati:

—Intsipate apa, pijate novancoqui. Icamicari notomi.

⁵⁰ Icantanaqueri:

—Pijataje meeca. Eiro icamitsi pitomi, aitaque iravisacotaje.

Iquemisantaqueiri icantaqueiriri, ijatanaji.

⁵¹ Nianqui itonquiotavacari inampirepee, icantavajiri:

—Avisacotanaji pitomi.

⁵² Irosati isampitantavacari:

—¿Jaoca ocaratiri yavisacotantajari?

Yacanaajiri:

—Oshaiteji, itaanaji catsirincaiteri, aitaque opeanaja iyatsiire.

⁵³ Iquenqueshireanajiro aitaque icaratiri catsirincaiteri icantantacariri Jesoshi: “Eiro icamitsi pitomi”. Ari iquemisantanaque iriori. Aisati iquempejeitaja maaroni ishaninca, iquemisantajeitaji.

⁵⁴ Ari meeca isaviqui Jesoshi Carireaquei, iponeanaja chapinqui Joreaquei. Ocarati meeca apite itasoncantaque Jesoshi anta.

5

Yoavisacotiri mantsiari anta incajarequi.

¹ Irosati iquimoshirejeitantanaja aisati joriopee. Itoncaanaji Jesoshi Jerosarequi, tonca, tonca.

² Otsapiqui nampitsi otimi yoiminqeantapinitariri ovisha. Otimi anta quempeji incare. Irineanequi Evereo opajita Vetsata. Otimi anta pancotsipee apapacoroni.

³ Irootaque inariantajeitari joquijeitachari oshequi. Yapatojeita quitapoajari, mayempiri, choriveetsiri. Yoyeajeitiro nija oshevajatajea.

⁴ Yanireashitapinitiro incajare inampire Tasorentsi. Ishevajatacaapinitaro nija, irosati iqueajatantarori yora joquijeitachari. Jaocarica itimiri jivatasannotatsiri iqueajataque, yavisacotaji; opeanaja paitarica oavetariri.

⁵ Itimaiti ara aparoni shirampari joquijeitachari: ocarati 38 osarintsi yojoquiitantacari.

⁶ Ineapaaqueri Jesoshi inariaita. Iotacotapaaqueri aitaque ocaratiri yoshequitaquero osarintsi. Icantiri:

—¿Picoimpa pavisacotaje?

⁷ Yacanaqueri:

—Tecatsi queajatacayenase ariorica oshevajaveta nija. Irointita nopomerentsita narori, irosati yanaacotantanari itsipapee: iqueajatanaque irinti.

⁸ Icantanaqueri Jesoshi:

—Pintinaanaje, pajiricajero pinariantaveitari, paniitanaje.

⁹ Irosati yavisacotantanaja. Yajiricanajiro inariantaveitaniri, irosati yaniitantanaja.

Icantavacaimentaro quitaiteri imaoreantari.

Irootaque saavaro, quitaiteri imaoreanteetari.

¹⁰ Irootaque icantajeitantariri joriopee yora avisacotajantsiri:

—Irootaque meeca quitaiteri amaoreantajeitari. Te oshinetanteaji paanajero meeca pinariantari.

¹¹ Yacanaqueri:

—Yora oavisacotajanari irio cantanari: “Paanajero pinariantaitari, paniitanaje”.

¹² Irosati icantantanajari:

—¿Janicampa cantaquempiri?

¹³ Te irioteji iriori janicarica oavisacotajiriri. Itimaiti ara oshequi atiri, ipeimotanacari Jesoshi.

¹⁴ Impoiji ineajiri aisati anta ivancoqui Tasorentsi. Icantiri:
 –Pineaquero, avisacotajimpi meeca. Eiro pantajirotsi aisati caari cameetsatatsi. Apiita-jimpicari, omatasanoticari catsini.

¹⁵ Irosati ijtantanaja shirampari. Icamantapaajiri joriopee:

–Irio oavisacotajanari Jesoshi.

¹⁶ Irootaque iquisajeitantanacariri joriopee Jesoshi. Iro icoantacari iroyerime, inea-queri yoavisacotantaque quitaiteriqui imaoreantajeitari.

¹⁷ Iro cantaincha icantanaqueri:

–Irosati icantani Apa yantayetiro cameetsatatsiri. Aisati nonquempetacari narori: ¿paita-mpa noimpacaantearori saavaroqui?

¹⁸ Aiquero catsini icoasanotanaiti iroyerime. Ineaqueri Jesoshi yantaveetantaro quitai-teri imaoreantajeitari. Iquemaqueri aisati icanti: “Iriotaque Apa Tasorentsi”. Irosati icantantanaca joriopee:

–Ijitasorentsitacateemi, te incameetsateji.

Yora Jesoshi imoncarayetacari iriri, paitarica yantayetiri.

¹⁹ Yacanajiri Jesoshi:

–Queariotaque oca noncamantempiri. Naro itomi Tasorentsi. Te nantaveetashiteaji, irointiquea nomoncarayetaquero paitarica noneacotiriri yantiri Apa.

²⁰ Inintaquena iriori, yoameyetaquenaro maaroni nantayetiri. Coajica irimatacayena nomatasanyetero catsini nontasoncayete, poantenari cavaco.

²¹ Tempa yoitinaapiniyetiri Apa camayetatsiri, yoaneajiri. Aisati nonquempetea narori, noaneajeri janicarica noncoacayeri.

²² Eiro icantacoventiritsi Apa atiri, eiro catsini; irootaque itiancantaquenari nainti noncantacoventanteariri.

²³ Icoaque Apa impincatsajeiteri maaroni atiri. Aisati icoacaquena narori, impincatsajeitena maaroni. Yora caari pincatsatana narori, te impincatsateriji aisati Apa, yora tiancaquenari.

²⁴ Queariotaque oca noncamantempiri. Maaroni quemeroneri noneane, ariorica inquemisanteri tiancanari, incantaitiyempani iraneajeitanaje inquitequi. Eiro yoasanguetairitsi Apa. Incamavetaquea, iro cantaincha iraneanaje aisati.

²⁵ Queariotaque oca nocantimpiri. Irotimataintsi yora camavetainchari inquemajeitena noneanate: tempa naro Itomi Tasorentsi. Icantaitiyempani iraneajeitanaje maaroni quemajeitenaneri. Aitaquequea meeca omoncarataca inquemajeitantenari.

²⁶ Irisati aneashitacha Apa. Aisati icoacaquena narori nomoncaratacari, narosati aneashitacha narori.

²⁷ Tempa noponeanaca inquitequi, natiritapaaque. Irootaque itiancantanari noncantacoventeri maaroni atiri.

²⁸ Eiro poajeititsi cavaco. Coajica inquemajeitena noneanate maaroni yora tijajeivetainchari.

²⁹ Aitaque intinaajeitanaje antirori cameetsayetatsiri, iraneajeitanaje aisati. Aisati iriori antayetirori caari cameetsatatsi: intinaajeivetanajea, iro cantaincha noashinoncaasanojeiteri irinti.

³⁰ Tecatsi noncanta nantashitearo. Nocantacoventantirica, nomoncarataquero icantanari Apa. Tampatica nocantacoventanti. Te nantashitearoji paitarica nonintiri narori, irointi nantiniri Apa tiancanari inintacaaquenari iriori.

Apa icamantacotaqueri Itomi.

³¹ Aisati icantajeitiri Jesoshi:

–Narasatirica camantacotachaneme apaniro pincanteme: “Te ontampaticateji icantiri”.

³² Iro cantaincha ainiro pashini camantacotitananiri: yora Joani. Nioti queario oni icamantacotanari iriori.

³³ Pitiancayetaqueri pishaninca, pisampitacantaqueri. Ari icamantacotasantaquero queariotasannotatsiri, icamantaquempi: “Iriotaque Jesoshi Quirishitotatsiri, Itomi Tasorentsi”.

³⁴ Te oncantimoneentenaji incanterica atiri: “Icameetsati Jesoshi”, iro cantaincha noncoaque pavisacojeitaje, irootaque nocamantantimpirori oca.

³⁵ Yora Joa iquempevetacaro tsiomentotsi amorecasannotatsiri. Pineajeitavaqueri it-siojeitapaaquempi: tempa oshequi iotacaajeitauempi. Piquimoshireventajeivetavacari osamani.

³⁶ Timatsi aisati otsipa iotacaaquempiri, ora anaacotiriri Joa, piotasantantenari. Apa itiancaquena. Meeca nontsoteeneri icantaquenari. Paitarica nantayetiri narori, irootaque piotantenari itiancaquena Apa.

³⁷ Aisati icamantacotaquena Apa tiancaquenari. Queario, te pinquemapiniteriji irineanate, aisati te pineapiniteriji jaoca icantari.

³⁸ Iro cantaincha te pinquemisanteriji itiancane, irootaque caari pishiretantaro irineane.

³⁹ Pineanatapinijeitaquero Sanquenarentsi, tempa pijitashijeivetaca ariorica pineanatero, pincantaitiyempani paneajeitanaje. Tempa irootaque camantacotanari.

⁴⁰ Iro cantaincha te pincoyeji paventena noaneantajeitajempiri.

⁴¹ Te oncantimoneentenaji pineacameetsajeitanarica.

⁴² Niojeitimpi nainti, te pininteriji Tasorentsi.

⁴³ Itiancana Apa, irootaque nopocantacari. Iro cantaincha te pineacameetsajeitanaji. Ariorica impocashitempi irinti yora caari itiancane, irioquea pineacameetsajeitavaqueri irinti.

⁴⁴ Avisati neacameetsatavacaajeitacha. Aitaque picantajeitari. Iro cantaincha te pincoyeji irineacameetsajeitempi Tasorentsi. Iriotaque Tasorentsi apaniro. ¿Jaoca pincanteari meeca pinquemisantasanoteri?

⁴⁵ Eiro pijitashitatsi naro camantacotempineri Apaqui: “Ainiro, Apa, yantajeitiri yocapee”. Timatsi pashini camantacotempineri: iriotaque yora Moishishini, incanteri Apa: “Te inquemisantajeiteroji yocapee ora pisanquenatacaaquenari”. ¿Pijivetacampa ari irancacoventaquempi?

⁴⁶ Arime pinquemisantasanojeiterime Moishishini, aitaque pinquemisantajeitavaque-name narori. Isanquenatacotaquena iriori peerani.

⁴⁷ Niotaque te pinquemisanteroji isanquenatiniri. ¿Ariompa pinquemisantero nocantimpiri narori?

Irootaque icantajeitiriri Jesoshi joriopee.

6

Yoshequicaaquero Jesoshi tanta, jeri shivajaniqui.

(Mt. 14.13-23; Mr. 6.30-46; Ir. 9.10-17)

¹ Irosati imonteantajararo Jesoshi incajare pajitachari Tiveriashi, onta carireaquiniri; noijajeitanaqueri.

² Oshequi catsini oijajeitiriri. Ineacojeitaqueri itasoncacoventajiri joquitachari, irootaque yojajeitantanacariri.

³ Itoncaanaque Jesoshi toncaariqui. Isavicapaaque anta, nocarajeitaqueri itsipapee iroamerepee, notsipajeitanacariri.

⁴ Irotimatainsi inquimoshirejeitantajeiri joriopee. Ipajiyetiro quitaiteri “Yavisantaniri”.

⁵ Yamenanaque Jesoshi. Ineavaqueri oshequi atiri pocashijeitaqueriri, isampitiri Jeripi: —Jeripi, ¿jaoca amananterori meeca tanta iroajeiteari ashanincapee?

⁶ Iro icantashitantacariri, icoaque Jesoshi irineanteari Jeripi. Irinti Jesoshi, iotaque jaoca incanteriri.

⁷ Ari yacanaqueri:

—Amanantavetearorica tanta oshequi, ampinaventavetaquearorica 200 tenario, eiro inajeitarotsi. Ariorica ampavevetaqueari capichaji, eiro inajeitarotsi.

⁸ Ari itimi anta pashini iroamere, yora Antirishi. Iriotaque irirenti Shimo Petero. Icantiri:

⁹ —Oametanari, jericia aparoni evancari, timatsi itantane apapacoroni. Timatsi aisati ishivajaniquite apite. Iro cantaincha notseencaqueri: tempa oshequi catsini atiri.

¹⁰ Irosati icantantanacariri Jesoshi:

—Poisavicajeiteri maaroni atiri.

Ocasaveshiiteaquera. Icarajeitaque 5,000 shirampari savicajeitaintsiri.

¹¹ Irosati yaantacaro Jesoshi tanta. Ipasonquitacotaquero. Ipajeitaqueri savicajeitaintsiri. Aisati iquempetaqueri shivajaniqui, ipajeitaqueri. Aitaque ocarati icoajeitaqueri aitaque ocarati ipaqueriri.

¹² Iquemajeitanaca maaroni. Irosati icantajeitantajari Jesoshi iroamerepee:

—Paajeitajero timaantapaajantsiri, aparatacariri.

¹³ Iquemajeitacaro oca tanta apapacoroni. Yaajeitajiro timaantapaajantsiri. Itetajiro cantiriqui. Ijaajeitajiro ocarati 12.

¹⁴ Noneajeitaqueri itasoncaquero tanta, irosati nocantajeitantanacariri:

—Iriotasanoaque yoca camantantatsiri aquemacotaqueri, aamaajeiveitaniri peerani.

¹⁵ Iotavaque Jesoshi impocashijeiterime oajeitainchari iranaaquerime, impeajerime ivincatsarite. Irosati ipeapitsatantajari. Ijatanaji toncaariqui apaniro.

*Iplanaja Jesoshi Caperenaoqui.**(Mt. 14.24-33; Mr. 6.47-52)*

¹⁶ Ishavijiiteanaque, nocarajeitanajiri itsipapee iroamere, noirincajeitanaja incajarequi,

¹⁷ notejeitapaajaro pitotsi. Notiancajiro nomonteanaje intatiquero, anta Caperenaoqui. Tsitenitasanotana, tequeratsita intsipajeitajena Jesoshi.

¹⁸ Opocaque antearo tampea, oquisaatanaca incajare, soooo, irootaque otimantacari antearo omotoncane.

¹⁹ Aitaque nonajeitaque nianquijaqui. Osamani quipatsi, aamaaca ari ocarati 5 quirometero, arioricampa 6 nareetantajeari. Aiquero nocomajeivetaca. Irosati noneantavajari Jesoshi yanijjatapaaji incajarequi, te intsitiaquiiiteji. Iquempejitapaajaro pitotsi.

²⁰ Notsaroajeitanaque. Icantapaajana iriori Jesoshi:

—Narotaque, eiro pitsaroacaajeitanatsi.

²¹ Nocoajeivetanaca nontetavajerime, iro cantaincha noneacotashitapaaca naatacojeitapaaque otsapijaqui, anta nojajeitenta.

Icoajeitajiri Jesoshi.

²² Oshaiteji icatiajeitaca atiri intatiqueronta. Ineajeitavajana narori notejeitanaja novitoqui. Te intsipajeitanajena Jesoshi, nainti jajeitajantsi. Tecatsi pashini pitotsi vaatachane anta.

²³ Meeca yareejeivetapaaca tiveriashisati, iquenacotapaaque ivitoqui. Yaatacojeitapaaque quempeji yoacaajeitacarinta oshaiteji tanta. Icoavetapaacari:

—¿Jaocame Jesoshi? ¿Jaoca iroamerepee?

²⁴ Te irineajeitapaajeriji Jesoshi; aisati narorije iroamerejei, te irineajeitapaajenaji. Ari impoiiji itejeitanaja atiripee ivitopeequi, ijatacojeitanaji Caperenaoqui, icoajeitapaajiri Jesoshi.

Iriotaque Jesoshi shiirori oanarontsi aneacaaqueriri quemisantatsiri.

²⁵ Aitaque ineajeitapaajiriri intatiquero. Icantajeitapaajiri:

—Oametnari, ¿jaoca ocaratiri pareetantajari aca?

²⁶ Yacanajiri:

—¿Paitasa picoantanari? Queariotaque oca noncamantempiri: te iro pincoimentena pimpincatsatena, irointiquea picoimentana noacaquempi oshaiteniji tanta. Meeca piscoajeiveta noacaajeitajempi aisati.

²⁷ Ora ayeari ario onsoncanaquea. Eiro piquenqueshiretapinitirotsi. Naintiquea piquenqueshiretasanote nainti, naro materone noaneasanojeitempi pincantaitiyempani paneasanojeitantapaajeari anta inquitequi. Notimitani inquitequi, itiancaquena Apa quipatsiquica, natiritapaaque noaneajeitantajempiri.

²⁸ Isampitiri jorio:

—¿Jaoca noncanteari nantanteanariri inintacaanari Tasorentsi?

²⁹ Yacanajiri Jesoshi:

—Pinquemisantajeitena: irootaque inintacaajeitimpiri Apa.

³⁰ Irosati isampitantajari:

—¿Paita ponijayenari nonquemisantantempiri? Ariorica noneaquempi pintasoncante, ari niotaque queario picantaqueri.

³¹ Peerani yora ashanincani yoajeitaro mana anta caaraiteriqui. Ocanti sanquenarentsi: "Ipeetaqueri yoari yoajeitantarori. Oponeaca inquitequi". Tempa irio Moishishi pajeitakeriri, irootaque iojeitantanariri ashanincani ocameetsati iroiijajeiteri.

³² Icantanajiri Jesoshi:

—Queariotaque oca noncamantempiri. Te irio Moishishini perineri yoajeitari poneainchari inquitequi. Irinti Apa pajeivetacariniri. Meeca icoaveta impempi pashini poajeiteari, cameetsatanotatsiri, poneachari inquitequi.

³³ Noponeaca narori inquitequi, naniireapaaque quipatsiqui noaneajeiteri maaroni atiri: noshiaquero poyeameri impempimeri Tasorentsi.

³⁴ Icantanajiri:

—Irosati pincanteani, novincatsarite, pimpapinitenaro ora noyeyari picamantaquenari. Aiquero pimpapinitenaro.

³⁵ Icantanajiri iriori:

—Narotaque shiirori oanarontsi aneacantatsiri. Pocashitanari eiro aajiritsi itashe. Quemisantnari eiro imiretajitsi.

³⁶ Aitaque nocantajeivetaquempi. Pineajeivetaquena, iro cantaincha te pinquemisante-naji.

³⁷ Yora icantanari Apa: “Pinquempoyeajetenari”, iriojeitaque pocashitajenaneri. Pocashitapaajenaneri ei ro noipiavajiritsi.

³⁸ Te iro naniireantapeempa nantapeero nonintiri narori, irointi nante inintacaanari tiancanari. Irootaque naniireantapaacari.

³⁹ Yontapee noquempoyeaqueneri Apa, ei ro ipeatsi aparoni. Nontinaajeitajeri omoncaratapeemparica quitaitei. Irootaque inintacaanari Apa tiancaquenari.

⁴⁰ Maaroni neenaneri, ariorica inquemisantena, incantaitiyempani iraneanaje inquitequi. Nontinaajeitajeri coajicani, omoncaratapeemparica quitaitei. Irootaque inintacaanari Apa tiancaquenari.

⁴¹ Irosati icantimajeitantanacari joriopee. Iquemaqueri icantaqueri: “Narotaque shiirori oanaronsi, poneachari inquitequi”, irosati icantimajeitantanacari.

⁴² Icantajeiti:

—Tempa iriotaque Jesoshi, itomi Jose. Tempa aneapinijeitiri iriri, iriniro aisati. ¿Paita icantantari: “Noponeaca inquitequi”?

⁴³ Icantanaqueri iriori Jesoshi:

⁴⁴—Eiro picantimajeitanatsi. Eirome inintacairime Apa tiancaquenari, tecatsi pocashitimatenaneme. Iriotaque nontinaajeri coajicani omoncaratapeemparica quitaitei.

⁴⁵ Isanquenatacotitacarini peerani camantantsiniri: “Tasorensi iroamejeitajeri maaroni”. Maaroni quemavaquerori icantiri Apa, iriotavaquerorica, impocashitena noavisacotanteariri.

⁴⁶ Noponeanaca Tasorensiqui, irootaque noneantariri Apa. Tecatsi pashini neerine.

⁴⁷ Queariotaque oca nocantimpiri. Yora quemisantanari incantaitiyempani iraneajeitanaje inquitequi.

Iriotaque Jesoshi shiirori oanaronsi aneacantatsiri.

⁴⁸ Jero oca icantajeitiri aisati:

—Narotaque oanaronsi aneacaantatsiri.

⁴⁹ Yoajeivetacarini pishanincani mana peerani anta caaraiteriqui, iro cantaincha yan-teashipajeitanaque, icamajeitanaque.

⁵⁰ Oca oanaronsi noquenquetsacotiri oponeaca inquitequi. Eiro icamanetajitsi oaquearoneri irinti.

⁵¹ Narotaque shiirori oanaronsi aneatsiri, noponeaca inquitequi. Maaroni oyearoneri oca oanaronsi incantaitiyempani iraneajeitaje inquitequi. Nompajeiteri maaroni atiri iraneajeitantajeri: irootaque novatsa.

⁵² Irosati icantavacaajeitantanacari joriopee. Icantajeiti:

—¿Jaoca incanteari yoca impanteerori ivatsa avantearori?

⁵³ Icantajeitiri Jesoshi:

—Queariotaque oca noncamantempiri. Noponeaca inquitequi, natiritapaaque. Eirorica poarotsi novatsa, aisati eirorica pirirotsi niraja, ei ro paneajitsi.

⁵⁴ Maaroni oyearoneri novatsa, aisati ireroneri niraja, incantaitiyempani iraneaje inquitequi iriori. Nontinaajeri coajicani omoncaratapeemparica quitaitei.

⁵⁵ Novatsa irootaque oanaronsisanori. Niraja irootaque ireetasanoyeetiri.

⁵⁶ Oyearoneri novatsa aisati ireroneri niraja irosati incantea, quiso iroajena. Aisati nonquempetea narori, quiso noajeiteri.

⁵⁷ Aneatsiri ini Apa tiancaquenari: iriotaque oaneaquenari narori. Aisati inquempetea iriori oyearoneri novatsa, noaneajeiteri maaroni.

⁵⁸ Irootaque oca oanaronsi aniireapantsiri inquitequi. Te onquempeteeroji ora yoajeivetacaniri peerani pishanincani. Tempa icamajeitaje irinti. Yora oyearoneri oanaronsica nocantaquempiri incantaitiyempani iraneajeitanaaje irinti inquitequi.

⁵⁹ Aitaque ocanta icantajeitaqueriri Jesoshi anta pancotsiqui yapatojeitantari. Otimi anta Capereanaoqui.

Jero oca icantiriri Jesoshi quemajeivetacariri.

⁶⁰ Oshequi catsini quemajeivetacarori yoamejeivetacariri, irosati icantajeitantanaja: —Te oncameetsate oca icantiri, tecatsi ancantea anquemisantero.

⁶¹ Iotashitaca Jesoshi icantimentavacaajeitacarori yora yoamejeivetacariri. Icantanajiri:

⁶²—Terica oncameetsatimotempi oca nocantaquempiri. Peerani noponeanaca narori inquitequi, natiritapaaque. Coajica pineajeitavajena nompianaje aisati jenoqui. Impoiji, ¿paita pinquenqueshijeiteri?

⁶³ Ishire Tasorensi, irootaque oaneajeitajerineri maaroni savicajeitatsiri inquitequi. Eiro isavicajeititsi maaroni atiri. Oca nocamantaquempiri oshiavetaro Ishire Tasorensi: ariorica pinquemisantero, ari oaneaquempi inquitequi.

⁶⁴ Niotacojeitimpi: timatsi picarajeitica caari quemisantatsine.

Peerani iotitari Jesoshi caari quemisantajeitatsine. Aisati iotitacari aacanterineri coajicani.

⁶⁵ Icantanaqueri:

—Niotaque te pinquemisantajeitenaji maaroni, irootaque nocantantaquempiri incaranqui: “Eirome inintacairime Apa, tecatsi pocashitenaneme narori”.

⁶⁶ Irosati yojacaarantantanajari oshequi yora yoamejeivetacari. Te meeca irojajeitanajeriji.

⁶⁷ Irosati icantajeitantanajari Jesoshi:

—Noamerepee, ¿aisatimpa pojocajeitanajena avirori?

⁶⁸ Yacanaqueri Shimo Petero:

—Novincatsarite, eirorica noijatimpitsi, ¿janicampa noijatanajeri? Incantaitatiyempani iraneajeitanaje inquitequi maaroni quemisantajeitirori pineane.

⁶⁹ Noquemisantajeitimpi, niojeitanaquempi; avirotaque itiancane Tasorentsi, picameetsataque.

⁷⁰ Yacanajiri Jesoshi:

—Tempa nocoyeajeitaquempi. Picarajeiti aca 12, iro cantaincha aparo picarajeitica, iriotaque camaaritajantsineri.

⁷¹ Iquenquetsatacotaqueri Jorashi Ishicariote, yora itomi Shimo. Ainiroquera icarajeive-tana maaroni. Iriotaque aacanterineri Jesoshi coajicani.

7

Jero oca icantayetiriri carireasati, jeri jerosaresati.

¹ Irosati iquenantanaca Jesoshi Carireaquei. Icoaveta joriopee iroyerime, irootaque caari icoanta irijate Joreaquei.

² Irotimatainsi inquimoshirejeitanteari joriopee. Irotainsi irovetsicajeitero pancotsiniqui inquenqueshirejeitantearori iquenajeitanaque ishanincani caaraiteriqui.

³ Irirentipee Jesoshi icantajeitiri:

—Pijate meeca Joreaquei. Piniyaayetapeeri poamerepee anta paitarica pantayetiri.

⁴ Pincoaquericica iriojeitempi maaroni atiripee pinquenaquenayetanaque irineajeitan-tempiri. Eiro pimanirotsi paitarica pantayeteri. Ariorica pintasoncantayete, piniyaayeri maaroni atiri.

⁵ Te inquemisantajeiteji irirentipee iriori,

⁶ irootaque icantantacariri. Icantajeitanajiri Jesoshi:

—Tequerata omoncarateaji nomatantearori.

⁷ Avirojei, pijajeite avinti. Tecatsi incantea atiri inquisajeitempi avinti. Irompa nainti, iquisajeitaguena. Nocamantajeitaqueri: “Te oncameetsateji oca pantayetiri”, irootaque iquishimentaguenari.

⁸ Pintoncaajeitanaquetsita avinti Joreaquei. Eirotsita nojatita narori, tequeratsita omoncarateaji nojatanteari.

⁹ Aitaque icantajeitaqueriri Jesoshi. Isavicanaji Carireaquei.

¹⁰ Irinti irirentipee jajeitainsi Joreaquei, itoncaajeitanaque, tonca, tonca. Iquimoshirejeitapaaque. Impoitanaji iriori Jesoshi, itoncaanaji, iro cantaincha te irinijaantapeempaji: te incoyeji irineeyeteri.

¹¹ Icantana joriopee iquimoshirejeitanaque. Icoajeivetacari Jesoshi Jerosarequi, icantajeiti:

—¿Jaoca meeca yoranqui Jesoshi?

¹² Apatojeitainchari anta icantavacaajeitanaca. Icantacoyetiri Jesoshi:

—Cameetsari ini.

Pashini cantayetaintsi:

—Te incameetsateji, irointi yamatavitiri atiri.

¹³ Iro cantaincha itsarocaaajeitacari atiripee yora jivatacaajeitiriri, irootaque imanocajeitantarori icantacoyetiriri Jesoshi.

Yoametantaque Jesoshi anta ivancoqui Tasorentsi.

¹⁴ Yovaanajiro aisati iquimoshirejeitanaji. Itoncaanaque Jesoshi iriori ivancoqui Tasorentsi, yoametantapaaji.

¹⁵ Yoajeitanaque cavaco joriopee. Icanti:

—¿Jaoca icantari iotantarori paitapeerica? Tecatsi oameterine.

¹⁶ Yacanaqueri Jesoshi:

—Te naro iotashitearone oca noametimpiri, irinti iotacaanaro yora tiancaquenari.

¹⁷ Pincoasanoterica panteneri inintacaquempiri, aitaque piotanaque. Piotanaque itiancaquenarica Tasorentsi. Piotanaque noneaveetashitarica.

¹⁸ Yora neaveetashitachari icoi impincatsayeeyeteri iriori. Intimerica coatsiri impincatsayeeyeteri tiancaqueriri, icameetsati iriori; te irioteji iramatavitante.

¹⁹ Tempa irootaque icantajeitimpiniri Moishishini peerani: “Jeroca pantayeteri”. Iro cantaincha tecatsi aca matasanojeiteroneri oca icantaquempiniri. ¿Paita pisareantanari poyena narori?

²⁰ Yacajeitanaqueri apatojeitainchari:

—Yoitsaviaantaquempi camaari. ¿Janica sareimpiri iroyempi?

²¹ Yacanaqueri:

—Jero aparo notasoncantaque saavaroqui, meeca poajeitanaquena cavaco maaroni.

²² Icantimpiniri Moishishini: “Pintoyeantea”. Iro cantaincha caari ini Moishishini cantasanotatsine, irintiquea yora intasanotaroniri. Irootaque meeca pitoyeantantacari. Pitoyeantapinita aisati saavaroqui amaoreantari.

²³ Tempa pitoyeantapinita saavaroqui, pimoncaratantarori isanquenatiniri. Irosati saavaroqui noavisacotantariri yora shirampari. Aiquero piquisanaitiana. ¿Paitaquea?

²⁴ Ariorica pamenavoroteri pishaninca, eiro picantashitatsi: “Cameetsari ini. Yora pashini te incameetsateji”. Pijivateta piotasanoteri, impoiiquea piotanaque paitarica pinquenquetsatacoteriri. Aisati onquempetea, pinquenqueshiretasanotero nocantimpiri piotasanotantenari.

Iponeanaca Quirishito Tasorentsiqui.

²⁵ Irosati icantayetantanaca jerosaresati aparopee:

—¿Caarimpa yoca icoyeetiri iroyeeteri?

²⁶ Pameneri meeca, yoametantayeti, te irimaneroji. Tecatsi cantimeterine: “Pimajerete”. ¿Yaamaajeitarimpa avincatsarite iriosanotaque yoca Quirishito?

²⁷ Iro cantaincha ayotacojeitakeri arori jaoca iponeacari yoca. Impocasanotapaajerica Quirishito, tecatsi iotacoterine jaoca imponepari iriori.

²⁸ Yoametanti Jesoshi ivancoqui Tasorentsi, icanti:

—¿Piojeitanampa? ¿Piotimpa jaoca noponeacari? Te nompocashiteaji, timatsi tiancaqueri: icameetsatanotaque catsini. Te pioteriji avinti,

²⁹ narori notiri nainti. Iriotaque tiancaquenari, iriotaque noponeimotacari.

³⁰ Irosati icoajeitantavetacari irayerime. Iro cantaincha tecatsi ayerine. Tequeratsita omoncarateaji iranteetariri.

Irotaintsi irijataje Jesoshi.

³¹ Oshequi apatojeitainchari quemisantajeitaqueriri. Icantayeti:

—¿Ariorica impocapaaque Quirishito, iranaacotapeerimpa Jesoshi intasoncantayetapee?

³² Yora variseopee iquemajeitavaqueri atiri iquenquetsatacojeitakeri Jesoshi. Irosati itiantantacari variria irayerime. Iriojeitaque tiancaqueriri jivatacaajeitiriri saserotepee, variseopee aisati.

³³ Irosati icantantanacari Jesoshi atiri:

—Capichanivaniji nontsipajeitanajempi. Irotanaintsi nompianaje tiancanariqui.

³⁴ Pincoajeivetajenarica, iro cantaincha eiro pineajanatsi. Jaocarica nosavicapaaaje eiro pimatirotsi pijataje avirori.

³⁵ Icantanaque jorio:

—¿Jaocampa irijateri yoca eiro aneantajaritsi? ¿Ariompa irijatashiteri ashaninca savicayetatsiri pashinipeequi nampitsi? Irioyeata oamejeitapeerine itsipapee atiri.

³⁶ Jero icantaque: “Pincoajeivetajenarica eiro pineajanatsi. Jaocarica nosavicapaaaje eiro pimatirotsi pijataje avirori”. ¿Paita icantantari?

Nija oaneantatsiri.

³⁷ Irootaque quitaiteri ivecaratantarori iquimoshirejeitanaque. Irosati icatiantanaca Jesoshi. Icajemanaque:

—Maaroni miretatsiri impocashitenata irirapeeta,

³⁸ ontimanteari ishirequi quemisantinari nija oaneantatsiri, oncontejatapaaqueri. Aitaque oquenquetsatacotiro Sanquenarentsi nija nocantaquempiri.

³⁹ Iro ishacantaqueri nijatatsiri Ishire Tasorentsi, quiso oajeiterine quemisantajeiterine corajicani. Iro cantaincha tequeratsita iroancajeaji Jesoshi jenoqui, irootaque caariquera opocashitantari quemisantajeitatsiri.

Icantavacaimentajeitari Jesoshi.

⁴⁰ Apatojeitainchari ara iquemajeitavaqueri icantaqueriri Jesoshi, irosati icantayetantanaca aparopee:

—Iriotasanaque yoca camantantatsiri aamaajeitacari.

⁴¹ Pashini cantayetatsi:

—Iriotaque Quirishito.

Pashini cantatsi:

—¿Ariompa imponeempari Quirishito Carireaquei?

⁴² Tempa ocanti Sanquenarentsi: “Quirishito irio irishanincatajeari Iravirini. Imponeaquea Verequi, anta isavicaveitani Iravirini peerani”.

⁴³ Impoiji icantavacaimentajeitacari Jesoshi.

⁴⁴ Timatsi aparopee coayevetachari irayerime, iro cantaincha te irimateroji.

⁴⁵ Ipiajeitanaja variria. Yareetapaajari jivatacaajeitiriri saserotepee, jeri variseopee. Icantajeitavajiri:

—¿Paitasa caari pamantanari aca? Nocantavetimpi incaranqui: “Pamaquenari”.

⁴⁶ Yacanaqueri:

—Cameetsa ineanati yonta shiramparinta. Cameetsa yoametanti, tecatsi pashini quempetearine.

⁴⁷ Icantavaqueri:

—¿Yamatavitajimpimpa aisati avirori?

⁴⁸ ¿Iquemisantaquerimpa jivatacairiri ashaninca arori? Te inquemisanteriji. ¿Iquemisantaquerimpa variseo? Te.

⁴⁹ Yonta atirinta te irionirojeiteroji Sanquenarentsi. Te oncameetsateji impincatsajeiteri Jesoshi: iroasanquejeiteri Tasorentsi.

⁵⁰ Itimaiti ara Nicoremo, ananincashitanaqueriri Jesoshi chapinqui. Itsipatavacaajeita ivariseoririnte, icantanaqueri:

⁵¹ —¿Paita ocantiri Sanquenarentsi? ¿Oshinetantampa ancantashitea: “Te incameetsateji Jesoshi”? Tempa ocameetsati ajivatavaqueri anquemisanteri incantaqueeri. Tempa ocameetsati aisati ajivataque ayote paitarica yantayetaqueri.

⁵² Yacanajiri:

—Aviroyeata avirori carireasati. Pineanatanasotero Sanquenarentsi piotanteari te imponeempaji Carireaquei camantantatsiri.

⁵³ Irosati ijajeitantanaja maaroni ivancopeequi.

8

Tsinane aimentariri ojime.

¹ Yora Jesoshi ijatanaque toncaariqui, ipajiyeetironta Orivomashi.

² Oquitaitetamanaque ipiapaaja ivancoqui Tasorentsi. Maaroni atiri ijatashijeitajiri. Isavicapaaji, yoametaapaajiri.

³ Yamajeitapaqueneri aparoni tsinane, ineetaquero aimentacari ojime. Irio amirori oametantirori Sanquenarentsi, jeri variseopee. Isatecaquero nianqui,

⁴ icantapaqueri:

—Oametantatsiri, ineetaquero oca aimentacari ojime.

⁵ Peerani cantini Moishishini ocameetsati ampichanatero aimentariri ojime. ¿Paita picantiri avirori?

⁶ Ineantavetari, icoajeiveta incomitacayearime, irootaque icantantajeivetariri. Itsentanaque Jesoshi, isanquenatantanacaro iracotsapaqui quipatsi.

⁷ Yapiivetajari:

—¿Paita picantiri?

Icatianaja Jesoshi. Icantajeitiri:

—Timatsirica picarajeitica meeca caari antiro caari cameetsatatsi, irijivaterota impicheero; impoiji ari pimpichaajeitero maaroni.

⁸ Yoivotanaja aisati. Isanquenatanajaji aisati quipatsiqui.

⁹ Maaroni quemajeitavaqueriri, ijajeitanaji. Ijivajeitanaji yora anteashiparipee, impoijeitanajiri iriori maaroni evancaripee, ijajeitanaji. Apanivaniji irinti Jesoshi, jero iroori tsinane. Irosati ocatia ara.

¹⁰ Icatianaja aisati. Tecatsi irineaje, irointi tsinane apaniro. Icantiro:

—¿Jaoca meeca yoranqui quisajeitaquempiriranqui? ¿Tempa intimeji quishimentempirone pantiri?

¹¹ Ocantanaqueri iroori:

—Te aneajeriji, novincatsarite, jajeitanaji inaji.

Irosati icantantajaro:

—Aisati narori, eiro noquishmentimpirotsi. Pijataje meeca, eiro papiitajirotsi caari cameetsatatsi.

Irio Tasorentsi camantacotiriri Jesoshi.

¹² Ineanatajiri aisati Jesoshi atiri, icantajiri:

—Narotaque iotacaajeitiriri atiripee, oquempetaca noquitaitetacojeitiri. Eiro igue-nashiyetanajatsi tsiteniriqui oijajeitenaneri. Queario, naro iotacaajeitiriri atiripee, aisati oaneaajeiterineri.

¹³ Irosati icantantanacari variseopee:

—Avisati camantacotashitacha. Irootaque caari otampaticatanta picantayetaqueri.

¹⁴ Yacanajiri Jesoshi:

—Je, narosati camantacotacha, iro cantaincha otampaticati nocantaqueri. Iro otampaticatantacari nioti nainti jaoca noponeacari. Aisati nioti jaoca nojatajeri. Te piojeiteji avinti jaoca noponeacari, aisati te piojeiteji jaoca nojatajeri.

¹⁵ Piquempejeitacari pashinisati atiri: te piojeitenaji, iro cantaincha picantacoventashijeitaquena. Naintiquea, te meeca noncantacoventempiji.

¹⁶ Iro cantaincha, noncantacoventempime meeca, ontampaticateme noncantacoventempime. Niotaquempi; aisati quiso yoaquena Apa tiancaquenari, iotaquempi aisati. Nocarataque apite iotasanojeitimpiri.

¹⁷ Tempa ocanti Sanquenarentsi pineanatapinitiri: “Apiterica incarate camantacoterineri ashaninca, ari paamayeae queariotaque incanteri”.

¹⁸ Ari nocamantacotaja narosati, icamantacotana Apa tiancaquenari iriori; apite nocanta.

¹⁹ Icantanaqueri:

—¿Jaoca meeca piri?

Yacanajiri Jesoshi:

—Te piotenaji. Te piojeiteriji aisati Apa. Ariorica piojeitaquename piotaquerime aisati Apa iriori.

²⁰ Irootaque icantajeitaqueriri Jesoshi anta ivancoqui Tasorentsi. Icatianaja anta ipapinijeitirinta Tasorentsi quirequi. Tequera omoncarateaji incamanteari Jesoshi, irootaque caari imatanteetari irayeeteri.

Yora caari quemisantatsi, incanteani irantapinitero caari cameetsatatsi yantayetiri.

²¹ Yapiitajiri aisati:

—Irotimataintsi nojataje. Pincoacoajeivetajena pineajename aisati, iro cantaincha eiro pineajanatsi. Irotaintsi nojataje. Pincoajeivetea poijajeitena, iro cantaincha eiro pimajeitirotsi pijajeitaje nojatajenta narori. Irosati pincanteani pantapinijeitero caari cameetsatatsi irosati pincamanteari, irootaque pijajeitanteari Sharincaveniqui.

²² Icantajeitanaque jorio:

—Irisatiyeata oajanchane. Piquemaquerinea icantantari: “Irotaintsi nojataje, eiro pimajeitirotsi pijajeitaje nojatajenta narori”.

²³ Icantajiri Jesoshi:

—Avirojeitaque timajeitatsiri quipatsiquica. Noponeaca nainti jenoqui. Aca quipatsiquica irootaque pisavicantajeitari avirori. Te nosavicasanote narori quipatsiquica.

²⁴ Irootaque nocantantaquempiri incaranqui: “Irosati pincanteani pantapinijeitero caari cameetsatatsi irosati pincamanteari”. Eirorica piquemisantirotsi nocantaquempiri, irootaque pijatanteari Sharincaveniqui.

²⁵ Isampitajiri:

—¿Janicampimpa?

Icantanajiri iriori:

—Aitaque nocamantasanovetaquempi.

²⁶ Timatsi oshequi noncamantempimeri; otimi aisati pantayetiri noncantacoventantempimeri. Iro cantaincha cameetsataque tiancaquenari, timatsi icamantaquenari iriori: irootaque oca novaacqueneri atiri.

²⁷ Te iriojeiteriji joriopee irio iquenquetsatacotaqueri Jesoshi Iriri.

²⁸ Icantanajiri Jesoshi:

—Ariorica poatiacotaquena, aitaque piojeitanaquenari. Piojeitena noponeanaca inquitequi, natiritapaque. Aisati piojeitanaque tecatsi nantashitea nainti. Noneanatiro oca yoametaquenari Apa tiancaquenari,

²⁹ quiso yoana iriori. Irosati nantiniri narori paitarica inintacaquenari iriori, irootaque caari yojocantana.

³⁰ Aitaque ocantari icantaqueriri. Icarati oshequi quemisantajeitanaqueriri.

Yora camaari iririntajeitacari caari quemisantajeitatsi.

³¹ Irosati Jesoshi icantajeitantanajari joriopee quemisantajeivetacariri:

—Ariorica pincantaitatiyempani pishiretearo noneane, avirosanojeitaque noamere.

³² Aitaque piotavaquero queariotatsiri. Irootaque oipacaacoventajempineri. Eiro itimajitsi peranatajempineri aisati.

³³ Yacanaqueri:

—Narojeitaque ishanincani Avaramani. Tecatsi peranatenane. ¿Paitasa picantantanari: “Oimpacaacoventajempi queariotatsiri?”

³⁴ Yacanajiri Jesoshi:

—Queariotaque oca noncamantempiri. Timatsi peranajeitariri maaroni antajeitirori caari cameetsatatsi. Ora caari cameetsatatsi yantapinijeitiri, oshavietacari perana-jeitariri.

³⁵ Yora peranarontsi eiro icantatiani irisavicasanote ivancoqui peranatariri. Irintiquea itomi ashitarori ivanco incantatiyempani irisavicasanote irinti.

³⁶ Narotaque itomi Tasorentsi. Ariorica noimpacaacoventajempi, eiro yapiiyeeta-jimpitsi iromperanayeetajempi.

³⁷ Niotasanojeitaquempi, avirojeivetaca ishanincani Avaramani. Iro cantaincha te pinquemisanteroji noneane. Irootaque pisareantanari poyena.

³⁸ Ora icamantaquenari Apa, irootaque nocamantajeitimpiri. Ora icantimpiri pirinta-jeitari irootaque pantapinijeitiri avirori.

³⁹ Yacanaqueri:

—Nirintajeitacari Avaramani.

Incantanajiri Jesoshi:

—Avirome ishanincani Avaramani, aitaque pinquempejetejarime. Iquemisantini peerani iriori; pishanincataquearime, pinquempejetequearime avirori, pinquemisanta-jeitaquename.

⁴⁰ Narotaque neanavetarori queariotatsiri noquemiriri Tasorentsi. Iro cantaincha pisareajeitana poyena. Te inquempeteaniji irinti Avaramani.

⁴¹ Pantapinijeitiro avinti yantayetiri pirintasanotari.

Irosati icantajeitancacari:

—¿Pashinimpa ashitana? Apaniro ini nirintajeitari. Iriotaque Tasorentsi.

⁴² Icantajeitaqueri Jesoshi:

—Irioricame pirintajeiteame Tasorentsi aitaque pinintajeitaquename narori. Te nom-pocashiteaji; aitaque noponeacari Tasorentsiqui, iriotaque tiancaquenari.

⁴³ ¿Paita caari piotantavacaro nocantimpiri? Te pimateroji pinquemisantero noneane.

⁴⁴ Camaari ini pirintajeitacari. Irootaque picoantajeitacari pantapinijeitiniri ininta-caajeitimpiri. Oantatsiri ini peerani: irio nijantirori yoanti. Te inquenqueshireteroji quearioyetatsiri, irootaque caari icameetsatanta. Tseyari ini, irootaque itseeyantacari. Yashi yoiro itseeya. Iriotaque tseeയാചായetariri atiri.

⁴⁵ Irompa nainti nocamantavetaquempiro queariotatsiri, te pinquemisantenaji.

⁴⁶ ¿Timatsimpa aca neaqueenari narori nantiro caari cameetsatatsi? Tempa otampaticati nocantajeitaquempiri. ¿Paitampa caari piquemisantantana?

⁴⁷ Maaroni itomintajeitari Tasorentsi, iriojeitaque quemisantajeitirori irineane. Te intomintajeitimpiji avirori. Irootaque caari piquemisantantaro irineane.

⁴⁸ Irosati yacantanajari jorio:

—Queariotaque nocantaquempiri. Avirotaque samariasati, yoitsaviantaquempi ca-maari.

⁴⁹ Yacanajiri:

—Te nontsaviateji. Nopincatsatiri Apa. Irompa avinti te pimpicatsajeiteriji; pitseenca-jeitiri avinti.

⁵⁰ Te noncoyeji impincatsayeetena nainti. Irintiquea Apa coaintsi impincatsayeetena. Aisati iriotaque cantacoventajeiterineri maaroni tseencajeitanari.

⁵¹ Queariotaque oca nocantimpiri. Quemisantavaquerori noneane eiro icamanetajitsi.

⁵² Irosati icantantanajari joriopee:

—Meecaquea notasanojeitaquempi pitsaviataque. Camaque Avaramani. Aisati camantantatsiniri, camajeitaque iriori. Aiquero picanti: “Eiro icamitsi quemisantajeitirori noneane”.

⁵³ Camaque ashanincani Avaramani. Camajeitaque iriori camantantatsiniri. ¿Arimpa pi-jipincasaritashitaca? ¿Pijivetampa panaacojeitiri maaroni peeraniniri pipincasaritasano-taque avinti?

⁵⁴ Yacanajiri Jesoshi:

—Narosatiricame jitashitachaneme nopincatsaritaque, tempa nantsipetearome. Apa, yora picantajeitiri avirori: “Notasorentsite”, iriotaque pincatsaritacaaquenari.

⁵⁵ Te piojeiteriji. Nainti niotiri. Ariorica nocantaqueme narori: “Te nioteriji”, aitaque nonquempetaquempime, nontseeyaqueame narori. Irompa niotiri. Noquemisantiro irineane.

⁵⁶ Icamantacotaquenani pishanincani Avaramani, icantini: “Coajica ontme quitaieri noneanteariri Quirishito, irootaque noquimoshiretantacari”. Ari ineaquena, irosati iquimoshiretasanotantanacari aisati.

⁵⁷ Icantanaqueri jorio:

—Tequeratsita oncarate pisarintsite 50. ¿Piniirimpa Avaramani?

⁵⁸ Icantanajiri Jesoshi:

—Queariotaque oca noncamantempiri. Tequeratsitani intimeni iriori Avaramani, no-timitani nainti. Je, noneiri.

⁵⁹ Irosati yaantajeivetanaca mapi, impichaajeiterime. Iro cantaincha ipeapitsajeitana-jari ivancoqui Tasorentsi, ineaotashitapaaja jaocarica anta.

9

Yoavisacotiri Jesoshi quitapojari.

¹ Ari iquenanaque anta Jesoshi. Ineapaaqueri aparoni shirampari quitapojari. Aitaque icantitapaani iroaquera itimapaaque.

² Nocarajeitiri iroamerepee nosampijeitiri:

—Oametnari, ¿paitampa itimantapaari quitapojari? ¿Irompa yantayetiro caari cameet-satatsi ashitariri iquitapojatantacari itomi? ¿Irioricampa yoca antaquerori caari cameet-satatsi iquitapojatantacari?

³ Yacanaqueri Jesoshi:

—Tecatsi irante, iquitapojatashitaca. Aisati ashitariri, tecatsi irante. Iro iquitapojatan-tacari yoca intasoncacoventantajariri Tasorentsi. Icoacaajeitaqueri atiri iriojeitanaque queario itasorentsitaque. Ainiroquera meeca oquitaiteti.

⁴ Ocameetsatimotana nanteneri meeca tiancanari inintacaanari. Ariorica ontsiteni-tanaje, tecatsi matajerone irantaveetaje.

⁵ Ainiroqueratatsina quipatsiquica narotaque iotacaajeitaqueriri atiri.

⁶ Irootaque icantaqueriri, irosati iquitiojantanacaro quipatsi. Ocajavatsanaque oca iquitiojaqueri quipatsi, irosati ipatsanajaquitantacari quitapojari.

⁷ Icantajiri:

—Pijate anta Shiroequi, pinquivaquitajantea.

Incajare oni Shiroe. Acanti aneanequi arori: Itianqueetiri. Irosati ijatantanaca, iquivaquitapaaca. Ipiaja, amenanaji ini.

⁸ Itimi ara inampiquiniri, aisati yora neapinitiriri yamanantapiniti quirequi. Icantajei-tanaque:

—¿Caarimpa yoca yoranqui savicapinitatsiri amanantapinitatsiri quirequi?

⁹ Aparopee cantayetanaaintsi:

—Iriotaque.

Pashini cantayetatsi:

—Caari ini. Shiavetariri ini.

Icantanaque iriori:

—Narotaque.

¹⁰ Icantakeri:

—¿Jaoca icanteetajimpiri pamenantajari?

¹¹ Yacanaqueri iriori:

—Yora shiramparinta pajitachari Jesoshi icajavatsataquero quipatsi, ipatsanajaquitantajano noquiqui. Icantajana: “Pijate Shiroequi, pinquivaquitajantea”. Nojatanaque, noquivapaaja; irosati namenantanaja.

¹² Irosati icantantanajari:

—¿Jaocariqueame iriori?

Yacanajiri:

—Jaocarica, te nioteji.

Icantavacaimentajeitanacari Jesoshi.

¹³⁻¹⁴ Irootaque saavaro icajavatsatantacarori Jesoshi quipatsi yamenacantajariri quitapojaveitachaniri. Iro saavaro imaoreantevetari. Ari yayeetanaqueneri variseopee,

¹⁵ isampitavaqueri:

—¿Jaoca icantajimpiri?

Icantiri:

—Ipatsanajaquitanaque quipatsi noquiqui, irosati nojatantanaca noquivaquitaja. Meeca namenanaji.

¹⁶ Irosati icantantanaca variseo aparopee:

- Yora shirampari yantaveetantaro saavaro. Te imponeempaji Tasorentsiqui.
Pashini cantayetatsi:
—Irioricame antayetirori caari cameetsatatsi, eiro imatirome intasoncantayeteme.
Irosati icantavacaimentantajeitanacari.
¹⁷ Yapiitajiri isampitajiri:
—¿Paita pijitiri avirori yora amenacaajimpiri?
Icantaquaeri:
—Nojitiri itiancane Tasorentsi.
¹⁸ Yora joriopee te irishiretareoji iquitapoajaveitani. Icajemacantaqueri iriri, jero iriniro,
¹⁹ isampitavaqueri:
—¿Iriotaquempa yoca pitomi picantiriranqui: “Itimapaaque quitapoajari”? ¿Jaoca icantajari yamenantajari meeca?
²⁰ Yacanaqueri:
—Je, iriotaque notomi. Noneasanotiri yashi yoiro iquitapoajatapaaque.
²¹ Jaocarica icantajari yamenantajari, te nioteji narori. Te nioteji aisati janicarica amencacajiriri. Te irijananequitajeji meeca. Pisampiteri iriori. Irisati camantacotajanchane.
²² Yora ashitariri itsaroacaacari joriopee, iotaque aitaque yapatotimentajeitacari Jesoshi. Icantajeititaca: “Intimerica cantatsine: ‘Iriotaque Jesoshi Quirishito’, eiro ashinetajiritsi irinti intsipajeitee anquemisantajeite”. Irootaque itsaroajeitantanacari ashitariri,
²³ irootaque icantantanacariri: “Te irijananequitaje meeca notomi. Irio pisampite”.
²⁴ Ari yapiitajiri icajemajiri. Icantavaqueri:
—Tasorentsi pimpincatsate. Yora shirampari niojeitiri irio antayetirori caari cameetsatatsi.
²⁵ Irosati yacantanacari iriori:
—Irioricampa antayetirori caari cameetsatatsi, te nioteji narori. Apatiro niotaque noquitapoajaveitani, meeca namenajiri.
²⁶ Icantanajiri aisati:
—¿Jaoca icantajimpiri yamenacantajimpiri?
²⁷ Yacanajiri iriori:
—Aitaque nocamantavetaquempi incaranqui, iro cantaincha te pinquemisanteroji piquemavetaquenari. ¿Paita picoantari aisati pinquemajero? ¿Picoajeitajimpa avirori pimpeajeitajea iroamere?
²⁸ Irosati iquisatsatantanacariri, icantaquaeri:
—Avironirotaque avinti iroamere. Naro nainti iroamerepeeni Moishishini.
²⁹ Niojeiti iquenquetsatacaquerini Tasorentsi Moishishini peerani. Irompa yoranqui, te niojeiteriji jaocarica iponeacari iriori.
³⁰ Yacanajiri iriori:
—Iriotaque amenacaajanari. Piojeiteriquetite avirori jaocarica iponeacari, irootaque noantanaquempiri cavaco.
³¹ Ayotacojeitiri Tasorentsi, te inquemeriji antayetirori caari cameetsatatsi. Yora quemisantiriri Tasorentsi, antirori inintacaaqueriri, iquemapinitiri irinti.
³² Te anquemacotapiniteriji amenacayerine timapaatsiri quitapoajari.
³³ Eirome iponeame Tasorentsiqui, tecatsi irimateme.
³⁴ Yacanajiri:
—Peerani pitimantapaacari te pincameetsatapeeni. ¿Arimpa picoaque meeca poamejeitena?
Irosati yojocantanajari.
Iquemisantaque quitapoajaveitachaniri.
³⁵ Iquemacotajiri Jesoshi yojocajeitaqueri quitapoajaveitachaniri. Impojji ineapaajiri aisati, icantapaajiri:
—¿Piquemisantirimpa Atiritapaintsiri?
³⁶ Ari yacanaqueri:
—¿Jaoca itimiri, apa? Nonquemisanteri.
Yacanaqueri:
³⁷ —Tempa narotaque: noponeanaca inquitequi, natiritapaaque. Pineaquena, meeca noneanataquempi.
³⁸ Icantanaqueri:
—Noquemisantimpi, Novincatsarite.
Itiyeroashitanacari.
³⁹ Icantiri Jesoshi:

—Irootaque nopocantacari quipatsiqui noncantajeitantariri atiri jaoca incantajeiteari. Namenaajaiteajeri quitapoajavetachari. Yora amenajeivetachari nonquempetacantajeri quitapoajatatsiri. Pineaquero, niotacaajeiteri caari iojeitatsi; irinti iovetachari nompeapitsatajери iotantavetari.

⁴⁰ Yora variseopee itsipajeitacari, iquemajeitavaquero icantaqueriri. Irosati icantajeitantanaca aparopee:

—¿Jaocampa nocantajeitari narori? ¿Noquitapoajatimpa?

⁴¹ Yacanajiri Jesoshi:

—Pinquitapoajateme, eiro otimime pantane; iro cantaincha picantajeiveta: “Namena-jeiti”, irosati picantani pantapinijeitiro caari cameetsatsi.

10

Yora Jesoshi iquenquetsatacotiri ashitariri irovishate.

¹ Aisati yoametanti Jesoshi, icanti:

—Queariotaque oca noncamantempiri. Tempa yoiminqueapinitiri ashitariri irovishate itantoqui iquempeyantariri. Yora coshitiriri irovishate, te inqueapeeji omoroqui, ainti yataitashitapaaquero araquerora. Icanti: “Ineancari ashitariri”.

²⁻³ Intimerica iratirite shentimiriri omoro, ariorica impocapaaque irinti ashitariri, ari irashireavaqueneri, irishineteri iravisanaje. Ariorica inqueashitapaajeri, incajemapeeri ivajiropee, ari impocashijeiteri, eiro itsaroacaavacaritsi. Impoiji iraajeitanajeri anta paashitomashiqui,

⁴ irijivatanaquero. Ari iotsajeititiri irineane, irootaque yojajeitantariri.

⁵ Ariorica incajamaveteari caari ineapiniti, eiro iotsajeititavaqueritsi irineane. Eiro yojajeitiritsi, aintiquea irishiapitsajeitanaquero.

⁶ Aitaque ocantari ishiacaaventaqueneriri Jesoshi, iro cantaincha te iriojeitavaqueroji icantavetacariri.

⁷ Icantajeitaquero aisati:

—Queariotaque oca noncamantempiri. Narotaque shiacaventachari omoro tantorentsi iqueapinitantari ovisha.

⁸ Maaroni jivajeitaquenari, coshinti ini irinti, coshitantatsiri; irootaque caari iquemisantajeitantari ovishapee.

⁹ Narotaque iqueapinitantari, nareetacaajeiteari maaroni pocashijeitenane. Iriojeitaque avisacotajantsine. Inqueapinijeite, aisati irijatashitapinitero iroyeari.

¹⁰ Ipocashitiri coshinti icoshiteri ovisha, iroyeri, impoyereeri. Irompa nainti, nopocashitiri naneacaajeiteri oijajeitenaneri, naneacaasanojeitajeri inquitequi.

¹¹ Narotaque ashitariri cameetsari, irootaque nocoantacari noncamimenteriri novishate.

¹² Te nonquempeteariji oisantiniriri ashitariri. Caari ini ashitariri ovisha. Ariorica irineavaquero maniti impocapaaque, intsaroanaque, irishiapitsatanaquero; irojocanaquero ovishapee. Irosati iraaantapeempariri maniti ovisha, irovarayetapeeri.

¹³ Aitaque icantari oisantiniriri irovishate. Te inquenqueshireteriji ovisha, irinti iquenqueshireti quirequi impinayeeteri, irootaque ishiantanacari.

¹⁴ Narotaque ashitariri cameetsatsiri. Niotiri novishate. Yora nashijeitacari iojeitaquena iriori.

¹⁵ Aisati iquemepeta Apa, iotaquena; aisati niotiri narori. Coajica noncamimentajeiteri novishate noavisacotanteariri.

¹⁶ Ainiro aisati pashini, tequerata noviratajeari aca. Iriojeitaque nampatojeitajeri. Ariorica noneanateri iriotsatavaquena, inquempeavacantajeitajeari novishatepee maaroni. Apaniro nashijeitajeari maaroni.

Incamimenteriri Jesoshi irovishate.

¹⁷ Aisati icanti Jesoshi:

—Noncamimenteriri novishate, irosati naneantajeari. Irootaque inintacaanari Apa.

¹⁸ Tecatsi matashitenaneme iroyename, irointiquea nocoasanotaque noncamimenteriri novishate. Noncamavetaquea, aisati nontinaanaje: irootaque inintacaquenari Apa.

Icantavacaimentajeitacari Jesoshi.

¹⁹ Aitaque ocantari icantaqueriri Jesoshi. Irosati icantavacaimentajeitanacari joriopee.

²⁰ Timatsi icarajeiti oshequi cantayetatsiri:

—Yoitsaviantaquero camaari. Ishinquiventaitia. ¿Paita piquemisantantariri?

²¹ Icanti itsipapee:

—Te intsaviateji: tempa cameetsa yoametanti. Caari ini camaari: tempa icavintsaajiri quitapoajari, irootaque yamenacantajariri.

Iquempetasanotacari Jesoshi iriri.

²² Iquimoshireitaji aisati joriopee Jerosarequi. Iquenqueshiretaji ro yameetsayeetan-tajaroniri peerani ivanco Tasorentsi. Opariantsitapaaji.

²³ Yaniiveeti Jesoshi anta oveshintsayetacanta otincamipee pancotsi. Iro yovetsicacantini peerani Saromoni.

²⁴ Yapatojeitashitapaacari joriopee. Icantapaaqueri:

—Peerani pimanapitsataquenaro. Pincamantasanotena: ¿avirompa Quirishito?

²⁵ Yacanajiri:

—Aitaque nocamantajeivetaquempi. Iro cantaincha te pinquemisantavaquenaji. Paitarica nomayetaqueri, irotaque Apa tiancanari matacaaqueenarori. Oca nomayetaqueri, irotaque iotacayetempineri narotaque Quirishito.

²⁶ Aitaque nocantaquempi: “Avirojeitaque caari novishate, irotaque caari piquemisantantana”.

²⁷ Novishate iquemisantiro noneane. Niojeitiri, aisati iriori, yojajeitana.

²⁸ Aitaque naneacaajeitajiri. Incantaitiyempani iraneanaje inquitequi. Eiro yashinoncaajatsi. Noquempoyeasotaqueri, oquempetimotaquena najiricaqueri. Tecatsi aapitsatajenarine.

²⁹ Icantaquena Apa: “Pinquempoyeajenari”. Yanaacojeitiri maaroni itasoncantasanti, tecatsi aapitsatajerine aisati iriori Apa.

³⁰ Nomoncaratasanotacari Apa, imoncarataquena iriori.

³¹ Irosati yaantajeivetanaca mapi impichajeiterime.

³² Icantanajiri Jesoshi:

—Irotaque Apa tasoncacaaqueenari. Oshequi nonijayetaquempiro. ¿Paita pimpitseimentenari?

³³ Icantanajiri:

—Te iro nompitseimentempi pantiri cameetsatsiri. Aviro shirampari, iro cantaincha pijitasorentsishitaca, irotaque nompitseimentempiri.

³⁴ Yacanajiri Jesoshi:

—Tempa isanquenayeetinirini atiri: “Noncamantajeitempi: ‘Avirojeitaque tasorentsitsatsiri’”.

³⁵ Yora isanquenatiniri irineane Tasorentsi, icanteetiri: “Tasorentsitsatsiri”. Tecatsi ancantero ampashinitajero Sanquenarentsi.

³⁶ Inintacaquena Apa, irotaque itiancantaquenari aca quipatsiquica. Incaranqui nocantaquempi: “Narotaque Itomi Tasorentsi”. ¿Paita meeca picantantanari: “Pijitasorentsishitaca”? Itasoncantaque Apa.

³⁷ Terica nonquempeteari eiro piquemisantantsi.

³⁸ Irompa noquempetaririca, pinquemisantajeitena. Eiro piquemisantashitanatsi narori, irointi pinquemisantimentenaro nomayetaqueri. Pinquemisante, piotanteari iquempetaquena Apa. Aisati narori noquempetacari Apa. Piotasanotavaquero.

³⁹ Icoasanojeivetanaja aisati irayerime, iro cantaincha ipeimotanacari Jesoshi.

Imonteanajaro Jesoshi Jorirani.

⁴⁰ Ari imonteanajaro aisati Jesoshi Jorirani. Ijataji anta intacaronta peerani Joani ivaotisantaqueni. Aitaque itimapaajiri anta.

⁴¹ Oshequi pocashijeitajiriri aisati. Icantajeitapaaji:

—Te intasoncanteji irinti Joani, iro cantaincha queario oni maaroni icantacotaqueriri Jesoshica.

⁴² Oshequi quemisantajeitavaqueriri Jesoshi anta.

11*Iplanaja aisati Jesoshi Vetaniaqui.*

¹ Isaviqui Vetaniaqui shirampari pajitachari Irasaro, yojoquuitaca. Osaviqui aisati ivancoqui iritsiropee: jero Maria, jero Marita.

² Chapinqui osaitiri Maria Avincatsarite iitiqui. Iro osaitantari casanajari. Oshetantajari oishi aisati. Ari yojoquuitaca ojariri,

³ irotaque otiancantacariri camanterine Jesoshi. Arejiqui ijatashitaqueri. Ineantapaacariri icantapaaqueri:

—Novincatsarite, yora Irasaro pinintasanotiri, yojoquuitaca.

⁴ Iquemavaqueri Jesoshi, icantavaqueri:

—Yojoquivetaca, iro cantaincha eiro icamasanotitsi. Iro yojoquuitantacari, icoaque Tasorentsi impincatsanteeteariri, aisati impincatsanteetenari narori.

⁵ Jesoshi inintiro iroori Marita, ireento, jeri ojariri.

⁶ Ari iquemacotitacari yojoquuitaca, iro cantaincha apite quitaiteri isavicanaque.

⁷ Irosati icantantajana aisati icantajeitiri itsipapee iroamerepee:

—Tsame ampiajeitanaje aisati Joreaqui.

⁸ Nocantanaqueri narori:

—Chapingui, oametnari, anta impichaaquempime ashanincapee. ¿Ariompa pimpiashitanajeri aisati anta? Eiro ajatitsi: yoicari.

⁹ Yacanaquena:

—Noshiacantempero. Icontetapaaque catsirincaiteri, iquitaitetacotapaajee. Ariorica in-quianaje, ari ontsiteniiteanaje. Yora aniitatsiri quitaiteriqui, iniiro oquitaiteti quipatsiqui, irootaque caari itsitincanta.

¹⁰ Iro cantaincha itsitincajeita aniitatsiri tsiteniriqui. Iro itsitincantacari, tecatsi quitaitetacoterine.

¹¹ Aitaque icantaquenari. Irosati icantantanari:

—Maanaqueyeya Irasaro. Nojate meeca noncaocapaajeri.

¹² Nocantanaqueri:

—Maanaquerica, Novincatsarite, aitaque iravisacotaje.

¹³ Iro cantaincha, irointi iquenquetsatacovetacari Irasaro, icamaque. Narori, nojitashiv-etaca iro icantaquenari: “Imaashita, irimaoreanteari”.

¹⁴ Irosati icamantasanotantajanari:

—Camaaque Irasaroni.

¹⁵ Te nontsipatavaqueariri narori. Meeca pinquemisantajeitanaquena, irootaque no-quimoshiretantanacari. Tsame amenajeitaiteri.

¹⁶ Yora Tomashi ipajiyeeitiri Tsipari, icantajeitana:

—Tsame aijajeitanaqueri, iroavaqueeta arori.

Oquenquetsatacairi Marita Jesoshi.

¹⁷ Irotimataintsi inampini Irasaro. Niojeitaque icaratacotaque otsipasati quitaiteri yoiminguentacari Irasaroni omoroqui imperita.

¹⁸ Ora Vetania oquempejitaro Jerosare, ocarati 3 quírometero.

¹⁹ Iponeanaca Jerosarequi oshequi joriopee pocashitirori Marita, jero Maria. Icantapaa-
quero:

—Eiro poashiretacoshirearitsi pijaririni.

²⁰ Oquemacotavaqueri Marita quempejitapaaque Jesoshi. Osoquijanaque, ojataque otonguotavacari. Irointi Maria, ainiro osaviqui pancotsiqui.

²¹ Ocantavaqueri Marita Jesoshi:

—Ariorica pintimaiteme aca, Novincatsarite, eiro icamime jajini.

²² Niotaque meeca paitarica pincaiteriri Tasorentsi aitaque inquemisantaquempi.

²³ Icantanaquero Jesoshi:

—Aitaque intinaaje pijaririni.

²⁴ Ocantanajiri aisati:

—Ariorica omoncaratapaaquea intinaajeitantanajeari camajeitaintsiri, aitaque inti-naanaje iriori jajini. Niotaquero.

²⁵ Icantanajiro:

—Narotaque tinaajeitajerineri camajeitaintsiri, oaneajeitajerineri aisati. Incamajeive-taquea quemisantannari, iro cantaincha iraneanaje aisati.

²⁶ Maaroni aneajeitatsiri, inquemisantenarica iriori, eiro icamasanotitsi. ¿Pishiretacar-
ompa oca nocantaquempirica?

²⁷ Ocantanajiri:

—Je, Novincatsarite, niotaquempi, avirotaque Quirishito, Itomi Tasorentsi pocaintsiri quipatsiquica.

²⁸ Irosati opiantanaja ocajemi ro ireento. Ocamantatsatapaaquero:

—Areetapaaca Oametantatsiri, icajemacantaquempi.

²⁹ Ocantiro:

—Ari.

Intsipate ocatianaca, ojatashitanaqueri Jesoshi.

³⁰ Tequeratsita iraretea iriori nampitsiqui. Ainiroqueratatsi anta oneaitirinta Marita.

³¹ Ari ineaajeitavaquero quivantajeitirori ojatanaque, irosati yoijajeitantanacaro. Iji-
jeivetaca ario ojateri omoroqui yoiminguetaquerinta ojaririni. Aisati ijijeitiro ojate
iraacotajeari aisati anta.

³² Ari oneapaaqueri Jesoshi, ojatashitiri, otiyeroashitapaacari. Ocantapaaqueri:

—Ariorica pintimaiteme aca, Novincatsarite, eiro icamime jajini.

Itinaanaja Irasaro.

³³ Ineavaquero Jesoshi iraimotapaacari. Iraajeitaca joriopee tsipajeitarori. Irosati icantashiretantanacari iriori Jesoshi, yoashiretanaca.

³⁴ Icantanaque:

—¿Jaoca poaqueriri?

Icantanaqueri:

—Anta, Novincatsarite, noaqueri omoroqui. Tsame pamenaiteri.

³⁵⁻³⁶ Iraapaaca Jesoshi iriori. Irosati icantantanaca jorio:

—Pineaqueri, oshequi inintasanovetarini.

³⁷ Timatsi aparopee cantatsiri:

—¿Caarimpa yoca amenacaajiriri quitapoajari? Intimeme aca, ¿eirompa aisati yoavisacotajirime Irasaroni, eiro icamime?

³⁸ Icantashiretasanotanaji Jesoshi aisati. Iquempejitapaacaro omoro, ora imorotashiy-eetaqueriri imperitaqui. Yashitacoyeetantacari mapi.

³⁹ Icantapaaque Jesoshi:

—Pintivironcajero mapica.

Ocantanaqueri Marita:

—Novincatsarite, otsipasatitanaque quitaiteri icamantacari. Shititanaque.

⁴⁰ Icantanajiro:

—Tempa nocantaquempi: “Pinquemisantaquenarica aitaque pineaquero intasoncante Tasorentsi”.

⁴¹ Irosati itivironcanteetajaro mapi. Yamenanaque Jesoshi jenoqui, icantanaque:

—Ariove, Apa, niotaque piquemaquena.

⁴² Niotaque irosati picanta piquemapinitana. Jeri oshequi catiimojeitanari. Nocoaque iriojeite pitiancaquena, irootaque noquenquetsatcantimpiri.

⁴³ Irosati icajemasantantanaca:

—Irasaro, pintinaanaje, pimpocaje.

⁴⁴ Irosati isoquijantanaja camavetainchari. Ora chapinqui yoisotanteetavacariri tocoyatsa: iracoqui, iitiqui, maaroni. Ipashicavorotanteetavacariri paanio. Icantiri Jesoshi:

—Poisoreajeri, pishineteri irijataje.

Icantayetiri oametavacainchari.

(Mt. 26.1-5; Mr. 14.1-2; Jr. 22.1-2)

⁴⁵ Joriopee, yora tsipajeitarori Maria, ineacojeitaqueri Jesoshi. Oshequi quemisanta-jeitanaqueriri;

⁴⁶ itsipapee ijatashitaqueri variseopee, icamantacotapaaqueri Jesoshi.

⁴⁷ Yora jivatacaajeitiriri saserotepee, jeri aisati variseo, yapatojeitaqueri pincatsaripee oametavacaajeitainchari. Icantavacaajeitaca:

—¿Paíta antajeiteri? Yora shirampari oshequi itasoncantapinitaque.

⁴⁸ Ariorica ashinetajeri aisati, ario inquemisantajeitanaqueri maaroni atiri; impoiji ipocashijeiteecari oromasati, itireayetirocari ivanco Tasorentsi. Ipyereaajeiteecari, maaroni.

⁴⁹ Itsipajeitari anta Caijashi iriori. Meeca osarintsi ipincatsariventiri saserotepee. Icantanaque iriori:

⁵⁰ —Tecatsi piojeite avinti. Te pinquengueshirempaji. Pamenajeite: ocameetsatimoejeite incameta shiramparinta aparoni, iroavisacojeitantajeeri eiro apoyereaajeitantsi.

⁵¹ Te icantashitearaji oca. Iriotaque pincatsariventajeitiriri maaroni saserotepee. Yoametiri Tasorentsi, iotantacari incamimentajeiteri Jesoshi maaroni joriopee.

⁵² Te apaniro incamimentajeiteri joriopee, irointi incamimentero maaroni atiri intomintajeitari Tasorentsi. Inashijeiveta, isavicajeiti nampitsipeequi arejipeequiniri, iro cantaincha incamimentero irampatojeitantariri maaroni.

⁵³ Irosati isareajeitantariri iroyeri Jesoshi.

⁵⁴ Irootaque caari meeca iquenapinitantaja Jesoshi anta yoshequitanta joriopee, te ironijaapeempariji. Ijatanaji quipatsiqui pajitachari Ejerai, otsapitapaacanta caaraiteri. Aitaque isavicapaajiri, icarajeitana, aisati maaroni itsipapee iroamerepee.

⁵⁵ Irotimataintsi Yavisantaniri, inquimoshirejeitanaque noshanincapee. Meeca itoncaajeitanaque Jerosarequi iroameetsatantajeeri, inquemisantantariri Tasorentsi. Ijajeitanaque maaroni savicaajeitatsiri jaocarica,

⁵⁶ icoajeitapaajiri Jesoshi. Iqueajeitapaaque ivancoqui Tasorentsi, icantavacaajeitapaaja:

—Paamaaca, ¿ari impoque Jesoshi? Eiorica ipoquitsi iriori inquemisante.

⁵⁷ Aitaque icantacantaque jivatacaajeitiriri saserotepee, jeri variseopee:

—Piotaqueririca jaocarica inaqueri Jesoshi, pincamantenata.

Icoajeitanaque iraacanteri.

12

Anta Vetaniaqui osaitiri tsinane Jesoshi.

(Mt. 26.6-13; Mr. 14.3-9)

¹ Ocaranivani 6 quitaiteri inquimoshireventearo Yavisantaniri. Yareetaja Jesoshi Veta-
niaqui, anta isaviquinta Irasaro camavetainchari: yora yoitinaajiri Jesoshi, yoaneajiri.

² Aitaque icarajeitiri Irasaro Jesoshi, yoajeita. Marita irootaque amacoyetiniriri yoari.

³ Maria amaqueneri Jesoshi casancajari, cameetsajatasannotatsiri. Opinatasanotaca.
Quejitsi oni, ojaacaro voteyajaniqui. Osaitiri iitiqui, irosati oshetantajari oishi. Oti-
manaque ojencaare, otsoteanaquero maaroni pancotsi.

⁴ Ari itimaiti ara Jorashi Ishicariote. Iroamere Jesoshi inaveta, iriotaque aacanterine
coajicani. Icantanaque:

⁵ —¿Paitampa caari pipimantantaro casancajarica? Opinaveta 300 tenario, ampayetajer-
imeri iriori ashinoncaincari. Paparajatashitacaro maaroni.

⁶ Icantashita: te irineshinoncateriji ashinoncaincari. Iquempoyeajeivetanari noirequite
maaroni, iro cantaincha coshinti ini. Ari icoshitaarantitavajanari, irootaque iquishimen-
tantarori te omperinji ovinaro casancajari.

⁷ Icantiri Jesoshi:

—Oncanteata. Iotaque noncame, irootaque osaitantanari tequeratsita noncame.

⁸ Incantaitatitempani incarajeitempi ashinoncaincari, ari pineshinoncatapinitatiy-
erini. Irompa nainti eiro nocantatiani noncarajeitempi. Eiro osamanitajitsi pineshinon-
cantantajenari aisati.

Oshequi quemisantajeitiriri Jesoshi.

⁹ Oshequi jorio quemacojeitajiriri Jesoshi itimapaaji anta, ijatashijeitanaqueri. Aisati
ijatashijeitanaqueri irineeri Irasaro, yora camavetainchari yoitinaajiri.

¹⁰ Isareajeitacari jivatacaajeitiriri saserotepee iroyeri aisati Irasaro.

¹¹ Ari Oshequi joriopee neacojeitaqueriri Jesoshi yoitinaajiri Irasaro, irootaque yojocajei-
tantanajarori iquemisantavetari saserotepee, iquemisantajeitantajariri Jesoshi irinti.

Yora jerosaresati ipincatsajeitavaqueri Jesoshi.

(Mt. 21.1-11; Mr. 11.1-11; Jr. 19.28-40)

¹² Oquitaitempani aisati. Oshequi catsini pocaintsiri inquimoshirejeite. Iquemaco-
jeitajiri Jesoshi impoque Jerosarequi.

¹³ Ari ijajeitanaque itonquojeitavacari. Yajeitaqueneri tsiaroshi. Icajemajeiti:

—Jeri yoca oavisacotajeeneri, icameetsatasanoti. Iriotaque itiancane Avincatsarite.
Iriotaque yoca pincatsariventajeitajerine ashanincapee, maaroni.

¹⁴ Ineapaaqueri Jesoshi aparo voro caariquera iquijacoyeeta. Iriotaque iquijacota-
paacari. Aitaque peerani isanquenatacotitari:

¹⁵ “Savicajeitatsiri Sioniqui, eiro pitsaroashitatsi. Jeri yoca pocaintsiri, iriotaque pincat-
sariventajeitempine; iquijacotapaacari vorojaniqui”.

¹⁶ Tequeratsita notacojeiteri oca isanquenatacotitacariniri peerani: ijatanaji Jesoshi
jenoqui, impoiiquea noquenqueshireajeitanaquero. Aitaquequea imoncarataquero
maaroni isanquenatacotitacariniri.

¹⁷ Ari chapiniqui icajemiri Irasaro: “Pincontetapaaje”, ari icontetapaaji. Camasano-
vetainchari, iro cantaincha yoitinaajiri: nocarajeiti oshequi neacojeitiriri, impoiiji nocaman-
taacojeitaquero ora noneajeitaqueri.

¹⁸ Ari iquemacojeitaqueri atiri itasoncantayeti Jesoshi, irootaque ijatashijeitantacariniri
itonquojeitavacari.

¹⁹ Icantavacaajeitanaca variseo:

—Pineaquero, tecatsi ancantanirojeiteri. Yoijajeitaqueri maaroni atiri.

Icoajeiti pashinisatipee atiri irineeri Jesoshi.

²⁰ Itoncaajeitanaque Jerosarequi oshequi atiri inquimoshirejeite, inquemisantajeite.
Icarajeitiri pashinisatipee atiri, iroaquera peajanacha jorio.

²¹ Ijatashijeitapaqueri iriori Jeripi, yora vetsairsati. Otimi Vetsaira Carireaqu. Ican-
tapaqueri:

—Apa, nocoi noneeri Jesoshi.

²² Jeripi ijatashitanaqueri icamantaitiri Antirishi. Irosati ijatantanaja apite, icamantiri
Jesoshi.

Incamaque Jesoshi, intinaanaje.

²³ Icantavaqueri:

—Noponeanaca inquitequi, natiritapaaque; irotaintsi meeca impincatsayeetena.

²⁴ Queariotaque oca noncamantempiri. Ariorica ompariye quipatsiqui apaitsoqui ro tirico, eirorica otijatsi, irosati oncantea: apaitsoqui onapaaque. Irompa ontijaquearica, ari oshiocanaque, oshequiasanotanaque aisati oitsouqui.

²⁵ Timatsi atiri quempoyeavetachari irisati, te incoyeji irashinoncayea, yatsipetashitaca iquemoyeaca irisati; eiro yaneasanotajitsi inquitequi iriori. Irintiquea caari quempoyeaca irisati meeca, incantaitatitempani iraneanaje irinti inquitequi.

²⁶ Maaroni coatsiri irantayetenaro nocoacairiri, iroi jatentata; incarajeyenaya jaocarica nontimeri narori.

²⁷⁻²⁸ Aisati impinateri Apa. Meeca noquenqueshiretanaca. ¿Paita noncanteriri meeca Apa? ¿Noncanterimpa: “Apa, irotaintsi iroashinonqueetena, poavisacotena”? Eiro nocantiritsi. Irootaque nopocantacari quipatsiqui nonquematsicatearo meeca.

Irosati iquenquetsacantacariri iriri:

—Apa, nocoque impincatsajeitempita atiripee, irineacameetsajeitempita.

Irosati noquemajeitancacariri Apa anta inquitequi, icanti:

—Aitanaque niotacaajeitiri nopincatsaritananotaque. Coajica niotacaajeitajeri aisati.

²⁹ Ari iquemajeivetavacari catiajeivetainchari, iro cantaincha te iriotasannotavaqueroji. Icantashjeitanaca:

—Otirei.

Pashini cantayetanaintsi:

—Ineanatiri inampire Tasorentsi.

³⁰ Icantiri Jesoshi:

—Te naro iroamete: avirojeivetaca avinti yoamejeivetaca.

³¹ Meecaquea incantacoventajeiteri maaroni tseencantayetatsiri: “Ainiro pantane, aitaque noasanquetimentempiro”. Meeca aisati irojoqueri Apa yora pincatsariventajeitiriri tseencantatsiri.

³² Irotaintsi iroatiacoyeetena, irosatiquea nampatojeitantariri maaroni atiri, impocashjeitena.

³³ Irootaque incantaqueriri Jesoshi. Icamantitacari jaoca incanteari incamanteari coajicani.

Ipiatsayetacari Jesoshi.

³⁴ Yacanaqueri atiri:

—Oamejeitee Sanquenarentsi: “Irosati incantaitatitempani Quirishito iranee”. ¿Paita picantiri? ¿Paita picantantarori avirori: “Iroatiacoyeetaqueri Atiritapaintsiri”? ¿Janicampa yora Atiritapaintsiri camatsineri?

³⁵ Yacanajiri Jesoshi:

—Ainiroquera oquitaiteti, iro cantaincha eiro meeca osamanitajitsi ontsitenitantajeri. Paniitanaque meeca, omapoquimpicari tsiteniri. Ariorica paniitanaje tsiteniriqui, eiro piotitsi jaocarica pinquenajereri.

³⁶ Ainiroquera noquitaitetacotimpi, niotacaimpi; picoaquerica pinquemisantena, pinquemisantenata meeca. Impoiji pinquempejeiteri pishanincepee: pinquitaitetacoteri, piotacaajeiteri iriori.

Irosati ijatantanaja, imanapitsatanajeri.

Caari iquemisantanta joriopee.

³⁷ Ineajeivetacari oshequi atiri itasoncantayeti Jesoshi, iro cantaincha te inquemisanteajeitavaqueriji.

³⁸ Imoncarajeitaquero isanquenatacotitacaniri peerani Isayashini: “Novincatsarite, eiro ishequitasanotitsi quemisantavaqueroneri ora ancamanteriri. Irineajeivetempi pintasoncante, iro cantaincha eiro iquemisantimpitsi”. Camantantatsiniri inaveitani Isayashini.

³⁹⁻⁴⁰ Icantitacani aisati: “Yora Tasorentsi inquitapojatacayeri tseencajeitiriri, impeitaqueri iquenqueshireantavetari. Icantari: ‘Ineicari. Ioticari. Yaventanacari. Noavisacotiricari’”. Irootaque caari imajeitantaroro tseencantatsiri inquenqueshireempa.

⁴¹ Peerani ineaqueri Isayashini ishiquaireaque Avincatsarite, impoiji iquenquetsacotiri.

⁴² Aisati oshequi jivatacaajeitiriri joriopee, iquemisantajeivetanacari Jesoshi. Iro cantaincha itsaroacaajeitacari variseopee, irootaque caari icamantantari ishaninca: “Noquemisantiri Jesoshi”. Iquenqueshireti: “Iquishmentanaricari noquemisantiri Jesoshi, eiro ishinetanatsi nampatojeiteari noshaninca nonquemisantajeite”.

⁴³ Yora variseopee icoapinijeiti irineacameetsajeiteri atiri, te irio incoye irineacameetsateri Tasorentsi irinti.

Cameetsa anquemisanteri Jesoshi.

⁴⁴ Irosati icajemantanaca Jesoshi:

—Maaroni quemisantanari, te naro inquemisantasanote, irintiquea iquemisantasano-taque tiancaquenari.

⁴⁵ Maaroni neaquenari, irinti ineaque aisati tiancaquenari.

⁴⁶ Irootaque nopocantacari nonquaitetacoteri atiri, niotacaasanojeiteri. Yora quemisantanari, eiro yatsipetajaro intimaje tsiteniriqui; tempa ioyetaque.

⁴⁷ Yora quemayevetacarori noneane: eirorica iquemisantiro, eiro noasanquetiritsi nainti. Te iro nopocantea quipatsiquica noasanquetaayeteri atiri, irointi nopocanta noavisacojeiteri.

⁴⁸ Maaroni tseencaquenari, caari quemisantiro noyenquetsare, timatsi oasanquetaajeiterineri coajicani. Jero oca noneane nocantavetacari: coajica omoncaratapeemparica, iroasanquetimenteritiseenquiro noneane. Te noneaveetashiteaji.

⁴⁹ Apa tiancaquenari, iriotaque cantavaquenari: “Iroyea oca pineanatapeeri. Jero oca pincantapeeriri”.

⁵⁰ Yora quemisantavaquerori irineane Apa, incantaitiyempani iraneanaje inquitequi. Niotaqueero oca. Oca nocantaquempiri, nomoncarataquero icantaquenari Apa.

13

Yora Jesoshi iquiviniri iroamerepee iiti.

¹ Tequeratsita inquimoshireventajeitajearo Yavisantaniri. Aitaque iotaque Jesoshi omoncarataca irojocantanajearori quipatsica, impiantanajeari iririqui. Icantatiani inintajeitaqueri yashijeitacari quipatsiquiniri. Meeca inintasanojeiteri.

² Ari noajeitaca, notsipajeitacari Jorashi Ishicariote, yora itomi Shimo. Iquenqueshireacaacari camaari iraacanteri Jesoshi coajicani.

³ Iotaque Jesoshi itiancaqueri Iriri impincatsariventajeiteri maaroni atiri. Iotaque aisati iponeaca Tasorentisiqui, impiashitanajeri aisati.

⁴ Ari yoacaajeitaquena Jesoshi, impoiji icatianaca. Yojoquireaquero yoicoro. Ishiticatsaquitanaacaro ishevorotantari.

⁵ Irosati isantacaro nija metaroqui, irosati iquivantajeitaquenarori noitipee: narori, aisati itsipapee iroamerepee. Iro ishetantajanarori noiti ishevorotantari.

⁶ Irovetaincha inquinaquiiitapeerime iriori Petero, icantavaqueri:

—Tempa avirotaque Novincatsarite, te oncameetsateji pinquivenaro noiti narori. Oncameetsateji noquivempirime piiti avinti.

⁷ Yacanaqueri Jesoshi:

—Te piotacoteroji meeca oca nantaquempiri. Aitaque piotajero coajicani.

⁸ Icantanaqueri:

—Eiro piquivanarotsi noiti catsini.

Yacanaqueri:

—Eirorica noquivimpitotsi piiti, eiro aquempeavacaatsi coajicani.

⁹ Irosati icantantacariri:

—Jentsite, Novincatsarite, pinquivenaro noitipee, naco, noito, maaroni.

¹⁰ Icantanajiri Jesoshi:

—Eiro yapiitajatsi inquivajea caajeitaintsiri. Quitejeivetaquempi avinti, iro cantaincha te pinquitejeiteji maaroni.

¹¹ Iotaque Jesoshi janica aacanterineri. Irootaque icantantacari: “Te pinquitejeiteji maaroni”.

¹² Itsoncajeitaquena iquivajeitaquenaro noiti maaroni. Iquitsaatajaro aisati yoicoro. Aisati isaviquimojeitajana, icantana:

—¿Piojeitaquempa meeca paita nantantayetarori ocapee?

¹³ Tempa picantapiniijeitana: Oametantatsiri, aisati Pincatsari. Queariotaque oca picantaqueenari. Narotaque oamejeitimpiri, pincatsariventajeitimpiri.

¹⁴ Pineaquena meeca, noquivajeitaquempiro piiti. Aitaque pinquempetavacaajeiteari avirori, pinquivavacayea piitiqui.

¹⁵ Naro onijaaquempirori. Aitaque meeca pinquempjeitavacayea avirori, pinquivavacaajeitea.

¹⁶ Queariotaque oca nocantimpiri. Inampire te iranaacoteriji nampitariri impincatsarite. Aisati itiancane eiro yanaacotiritsi impincatsarite yora tianquiriri.

¹⁷ Ariorica piquemavaquero oca noametimpiri, pimataquero nocoacampiri pinquimoshirejeitanteari.

¹⁸ Timatsi meeca aparoni nocamantacotasantiri, te maaroni nonquenquetsatacotem-
piji. Nocoyeajeitaquempi, tempa niojeitaquempi. Ainiro Sanquenarentsi caariquera
moncaratacha, ocanti: “Yora oacotaquenari notantane, iraacantena”.

¹⁹ Aitaque nocamantitajeitaquempi tequeratsita irayeetena. Ariorica piotaque omon-
carataca nocantimpiri, aitaque pishiretearo naro nainti isanquenatacotitaniri.

²⁰ Queariotaque oca nocantimpiri. Ariorica iraacameetsayeetavaqueri notiancane,
aisati narori, iraacameetsatena. Ariorica iraacameetsatavaquena narori, aisati inquem-
peteri iriori tiancanari, iraacameetsateri.

Incanti Jesoshi: “Iraacanteetena”.

(Mt. 26.20-25; Mr. 14.17-21; Ir. 22.21-23)

²¹ Irosati yoashiretantanaca Jesoshi, icamantajeitana:

—Queariotaque oca noncamantajeitempiri. Timatsi aca aacantenaneri.

²² Ari namenavacaajeitanaca, te nioteji janicarica icantacotaqueri.

²³ Narotaque iroamere inintasanotiri Jesoshi, ainirona narori, notiinatacari inejiqui.

²⁴ Ijicotaquena Shimo Petero, icantana:

—Pisampiteri. ¿Janica iquenquetsatacotiri?

²⁵ Irosati notiinatasanotantancariri aisati inejiqui Jesoshi. Nosampitaqueri:

—Novincatsarite, ¿janicampa aacantempine?

²⁶ Yacanaquena:

—Ariorica novincaquero tantaca, yoca nompaqueri, iriotaque aacantenaneri.

Irosati yovincantanacaro tanta, ipaqueri.

²⁷ Irosati iquenqueshiretacaantancariri Satanashi Jorashi iraacanteri Jesoshi. Icantana-
queri Jesoshi:

—Ora piquenqueshiretiri panteri, pimateroqueti.

²⁸ Yora oajeitainchari ara te iriotavaqueroji icantaqueriri.

²⁹⁻³⁰ Ari yaanirotavaquero tanta, irosati ijatantanaca iraacantanteariri. Yora Jorashi
iriotaque quempoyeaquenariri noirequite maaroni. Ijatantacari, yaamaanaca aparopee
icantiri Jesoshi: “Pamanantaite ayeari anquimoshireventearo Yavisantaniri”. Pashini
yaamaaca icantiri: “Pijate pimpashiyetaiteari ashinoncayetachari”. Ari ijatantancari,
otsitenitanaji.

Icamantajiri iroamere irijataje.

³¹ Impoiji icantanaquena Jesoshi:

—Noponeanaca narori inquitequi, natiritapaaque. Irotaintsi meeca impincatsajeitena
atiripee, aisati niotacaajeiteri impincatsajeiteri Apa.

³² Aisati inquempetea Apa iriori, iriotacaajeiteri atiri impincatsajeitena narori. Meeca
irimatero, eiro isamanitirotsi.

³³ Meeca, noamerejei, eiro osamanititsi nojocajeitantanajempiri. Aitaque nocaman-
titacari joriopee, aisati meeca noncamantajeitempi avirori: anta nojatajenta, eiro pi-
matirotsi pijataje avirori.

³⁴ Pashini noncantajeitempiri meeca: pinintavacaajeitea maaroni. Oquempetaca narori
nonintajeitempi, aisati pinquempetavacaajeitea avirori, pinintavacaajeitea.

³⁵ Ariorica pinintavacaajeitaquea, aitaque iriojeitaquempi maaroni atiri: avirojeitaque
noamere.

Incante Petero: “Te noneeriji Jesoshi”.

(Mt. 26.31-35; Mr. 14.27-31; Ir. 22.31-38)

³⁶ Icantanaqueri Shimo Petero:

—¿Jaoca pijatajeri, Novincatsarite?

Yacanaqueri:

—Anta nojatajenta, eiro pimatirotsi pojatanaquena meeca. Coajicaquea aitaque poi-
jatanajena.

³⁷ Icantanaqueri Avincatsarite:

—¿Paitampa caari nomatantearo noijatanaquempi meeca? Iroyeeteerica, iro cantaincha
nintacotanaquempi.

³⁸ Yacanajiri Jesoshi:

—¿Ariompa pintacotasannotanaquena? Queariotaque oca noncamantempiri: eirotsitarica
inei teapa, pincantaque: “Te noneeriji Jesoshi”. Oncarate mava pincantaque.

14

Iraanajeri Jesoshi quemisantatsiri Apaqui.

¹ Aisati icantajeitana Jesoshi:

—Eiro picantashirejeititsi, irointi pishireteari Tasorentsi. Aisati narori, pishiretena.

² Anta inampiqui Apa otimi oshequi pancotsipee. Eiro oshequitime, aitaque noncamantaquempime te oshequiteji. Nojate anta novetsicanontapeempi pisavicantajeiteari avirori coajicani.

³ Ariorica nomatempiro pisavicanteari, nmpiashijeitajantempi aisati, naajeitajan-tempi. Aitaque pintsipajeitapaajena nosaviquinta narori.

⁴ Piojeitaque jaoca nojatajeri. Piojeitaque aisati jaoca nonquenajerri.

⁵ Icantanaqueri Tomashi:

—Te niojeiteji jaocarica pijatajeri. ¿Jaoca noncanteari niotanteari jaoca pinquenajerri?

⁶ Icantanajiri Jesoshi:

—Tempa narotaque nijaanajempironeri pinquenantanajeari, aisati narotaque oametap-inijeitaquempirori queariotasanotatsiri, aneacaajeitaquempiri. Tecatsi pincantea pijatashiteri Apa, narotaque aajeitanajempine.

⁷ Piojeitaquenaricame, aisati piojeitaquerime Apa iriori. Meeca piojeitaqueri. Aitaque pineajeitaqueri.

⁸ Icantanaqueri Jeripi:

—Novincatsarite, ponijayenari piri; irootaque aparoni nocantimpiri, aitaapaji.

⁹ Icantanajiri Jesoshi:

—Peeranitaque notsipajeitaquempi. ¿Tequerampa piotimatena? Maaroni neaquenari, ineakeri Apa iriori. ¿Paita picantantanari meeca: “Ponijayenari piri”?

¹⁰ ¿Tequerampa piotimateji noquempetacari Apa? Aisati iquempetana iriori. Te noncantashiteaji. Iquempetaquena Apa, iriotaque matacaanarori notasoncanti.

¹¹ Tempa nocamantimpi noquempetacari Apa. Aisati iquempetaquena iriori. Pishiretearo oca nocamantaquempiri. Pineasanojeitaquena notasoncantaque, pinquemisantimentasanotenaro.

Ariorica irijataje Jesoshi, oshequi irimateneri quemisantatsiri.

¹² Jero aisati icantajeitana Jesoshi:

—Queariotaque oca noncamantempiri. Maaroni quemisantannari inquempjeitena, intasoncante iriori. Nompianaje Apaqui, irootaque iranaacojeitantenari intasoncantasanojeite iriori.

¹³ Ariorica pishiretaquena, aitaque nomataquempiro paitarica pincoacoteriri Apa. Oca nomatempiro irineapincatsatanteeteariri Apa. Tempa narotaque Itomi.

¹⁴ Pishiretenarica, aitaque nomataquempiro paitarica pincanteriri.

¹⁵ Pinintanarica, pinquemisantajeitena paitarica noncamantajeitempiri.

¹⁶ Narotaque quenquetsatacayerine Apa. Noncanteri, irootaque intiancantajeitempirori pashini Amitacotajempineri. Irosati oncanteani ontsipajeitempi irointi:

¹⁷ Irootaque Ishire Tasorentsi, oamejeitempironeri maaroni quearioyetsatsiri. Te iriojeiteroji irinti tseencantatsiri, irootaque caari opocashijeitanti ontsipajeiteari. Aitaque quiso oajeitaquempi, oncantaitiyempani. Irootaque piojeitancarori avinti.

¹⁸ Eiro nojoquimpitsi apaniro, aitaque nmpiashijeitajempi.

¹⁹ Irotaintsi nojataje. Eiro ineajeitajanatsi tseencantatsiri, avintiquea neajeitajenane. Nashi noiro nanei, irootaque paneantajeitanajeari avirori: pincantaitiyempani inquitequi.

²⁰ Ariorica nontinaanaje, impoijiquea piojeitanaque noquempetacari Apa. Piquempjeitaquena avirori, aisati noquempejeitaquempi narori: aacameetsatavacaajeitaca.

²¹ Maaroni iotavaquerori nocantiriri, inquemisantaquerorica aisati, iriotaque nintanari. Apa ario irinintaqueri nintaquenari. Aisati narori ario nonintaqueri. Niotacaasanojeiteri jaoca nocanta.

²² Ainiro anta pashini Jorashi, caari ini yora Ishicariote. Isampitiri:

—Novincatsarite, piotacaasantaquena narori jaoca picanta. ¿Paita caari piotacantari tseencantatsiri iriori?

²³ Yacanaque Jesoshi:

—Ariorica pinintena, pinquemisantero noneane, irosati irinintantempiri Apa iriori. Impoiji nompocashijeitajempi quiso noantempiri.

²⁴ Irintiquea caari nintana, eiro iquemisantirotsi noneane. Oca nocantaquempirica, caari nashi noneane, irointi irineane Apa tiancaquenari.

²⁵ Ainiroqueratatsi nocarajeitimpi, aitaque nocamantitaquempiro.

²⁶ Toti Apa pishiretaquena, irootaque intiancantempirori Ishire, Amitacojeitajempineri. Oamejeitapaajempi maaroni. Irootaque quenqueshireacaajeitajempironeri maaroni nontajeitaquempiri.

Icamantajeitajari Jesoshi iroamere: “Nojataje”.

²⁷ Aisati icantajeitana Jesoshi:

—Noquimoshiretanaque narori, te noncantashireteji. Noninti pinquempetena, pinquimoshireitanaque avirori. Eiro imatirotsi atiri iroimoshirenquempi. Eiro meeca picantashiretitsi, irointi piveshireajeitanaquea.

²⁸ Aitaque piquemaquero nocantajeitaquempiri. Nojatanaje, coajica nOMPIASHIJEITAJANTEMI aisati. Yanaacotana Apa itasorentsitasanoti. Arioricame pinintajeitaquenename pinquimoshireimentajeitaquearome nocamantaquempiri: “Nojatanaje Apaqui”.

²⁹ Meeca nocamantitaquempiro tequeratsita nojataje. Ariorica piotaque omoncarataca nocamantaquempiri, pinquemisantajeitaque.

³⁰ Eiro osamanitajitsi nonquenquetsatacaajempi aisati. Quempejitapaaque pincatsariventajeitiriri tseencantatsiri. Tecatsi incantea iriori impincatsariventena.

³¹ Meeca irojeitanaquero atiri nonintiri Apa, tempa nantapinitiniri paitarica inintacaquenari. Ari, pincatijaitanaje. Tsame avajeitanajea.

15

Yora Jesoshi irisati shiacantajancha ovorentsa ova.

¹ Jero aisati ishiacantaquenari Jesoshi:

—Narotaque quempetarori ovorentsasanori ova. Iriotaque Apa tsameetacotirori.

² Ipesayetiro ojempequi caari oitsoquitatsi. Irompa irointi oitsoquitatsiri yoameetsataquero oitsoquitasanotantanaqueari.

³ Oca noamejeitaquempiri, aitaque oameetsashirejeitaquempi.

⁴ Quiso poajeitena. Aisati narori, quiso noajeitempi. Ojempequi ova, ariorica onchaoreanaque ovorentsa, eiro omatajatsi oitsoquitaje, tempa oncamaque. Aitaque piquempjeitarori avirori. Eirorica quiso poajeitanatsi, eiro pimatirotsi cameetsayetatsiri.

⁵ Narotaque quempetarori ovorentsa. Avirojeitaque quempejitarori ojempequi. Maaroni quiso oanari irio majeitajerone paitarica noncoacaayeretiri. Quiso noyeri narori. Ariorica pintentareajeitanajena, tecatsi pimatimataje.

⁶ Yora caari quiso oana, inquempetacaanteeteri ojempequi ova, impesheetero, peti. Impoiji ompirijatanaque, irampatoyeetajero coajicani, irojoqueetero paamariqui, ontayea, pomein.

⁷ Irosatirica quiso poajeitena, aisati ariorica pishiretearo noneane, pincantena paitarica picoayetiri: aitaque nomataquempiro.

⁸ Ariorica pimayetaquero paitarica noncoacayempiri, impincatsayeetanteariri Apa. Impoiji iriotasanojeitempi avirotsanotaque noamere.

Yora Jesoshi ishanincatacari maaroni iroamerepee.

⁹ Jero aisati icantajeitanari Jesoshi:

—Inintana Apa. Aisati noquempejeitimpi narori, nonintajeitimpi. Quiso poajeitena, anintavacaajeitanteari.

¹⁰ Pinquemisanterorica nocantajeitimpiri, irosati noncanteani nonintajeitimpi narori. Noquemisantiro icantaquenari Apa, irosati icantani iriori, inintana.

¹¹ Noquimoshiretanaque narori. Iro nocamantantimpirori oca pinquempetantenari, pinquimoshireitanteari avirori. Nocoaque pinquimoshiretsanojeitanaque maaroni.

¹² Jero oca noncamantempiri: tempa nonintajeitimpi narori. Aisati pinquempetea avirori, pinintavacaajeitea.

¹³ Yora intacotariri ishaninca, incamimentaqueririca, iriotaque nintasanotiriri.

¹⁴ Ariorica pimajeitaquero nocantaquempiri, avirotsanotaque noshaninca.

¹⁵ Eiro meeca nocantajeitajimpitsi nonampire, te irioteji nampirentsi paitarica yantiri nampitariri. Iro cantaincha niotacaajeitajimpi paitarica icantaquenari Apa, irotaque noshanincatasanotantajimpiri.

¹⁶ Te aviro coyeajeitenane; naro nainti coyeajeitimpiri. Nontianquempi pimatantearori paitarica noncoacaayetempiri. Eiro patsipetarotsi paitarica pantayetenari. Pishiretenarica, aitaque irimatempiro Apa paitarica pincanteriri.

¹⁷ Nampiitajempiro oca noncamantajeitajempi: pinintavacaajeitea maaroni.

Yora tseencantatsiri iquishiri Jesoshi aisati inquisajeitaqueri maaroni quemisanteajeitiriri.

¹⁸ Pashini aisati icantaquena Jesoshi:

—Ariorica inquisajeitaquempi tseencantatsiri, piotasante naro ijivataque iquisaquena peerani.

¹⁹ Yora tseencantatsiri inintavacaaca. Arioricame pinquempetarime avirori, aitaque irinintajeitaquempime. Iro cantaincha te pinquempejeitajeari. Nocoajeitaquempi, irotaque iquisajeitantaquempiri.

²⁰ Pinquengushireajero nocantaquempiri chapinqui: “Yora inampire te iranaacoteriji nampitariri impincatsarite”. Ari iquisajeitaquena. Aisati inquempejitempi avirori, inquisajeitempi. Te inquemisanteroji nocantajeivetacariri. Aisati avirori, eiro iquemisan-tajeitirotsi pincamantajeiveteariri.

²¹ Iriotaque Tasorentsi tiancaquenari. Iro cantaincha te iriojeiteriji iriori, irootaque inquisajeitantempiri.

²² Ari nopocashivetacari, noquenquetsatacaavetacari. Eirome nopocashitirime, eiro otimimotirime meeca irantane. Iro cantaincha meeca tecatsi incantajeite incante: “Te aneroji nantane”.

²³ Yora quisaquenari iquisaqueri Apa iriori.

²⁴ Tempa ineaajeivetaquena notasoncantayeti. Nomayetaquero caari imayeti atiri iriori. Eirome ineaajeivetaquename, eirome otimimotirime irantane. Aiquero ineaivetaquena, iquisaquena. Aisati iquisaqueri Apa iriori.

²⁵ Aitaque icantajeitari. Moncaratapaaca oca isanquenayeetiniri: “Iquisashijeitaquena, tecatsi nantavetea”.

²⁶ Ari nontiancajeitajempi Amitacotempineri, ora Ishire Tasorentsi. Omponeaquea Apaqui, cameetsa oamejeitapeempi. Ariorica ompoaque oncamantacotapaajena narori.

²⁷ Aisati avirori, pincamantacojeitajena narori. Tempa avirojeitaque tsipatapini-jeitaquenari peerani.

16

Icantiri Jesoshi: “Coajica inquisajeitempi”.

¹ Aisati icantana:

—Nocoi eiro pojocajirotsi piquemisanti, irootaque nocamantantajeitimpirori oca.

² Coajica pincoajeivetea pincarajeiterime ajorioririnte anta apatojeitapinitanta, iro cantaincha iroimpiavajempi. Coajica iroyempi aisati. Aiquero yora quisajeitaquempineri iramaaya yantiniri Tasorentsi inintacaaqueriri.

³ Te iriojeiteriji Apa, aisati narori te iriojeitenaji, irootaque inquisajeitantempiri.

⁴ Ariorica omoncarataquea oca nocamantaquempiri, aitaque pinquengushireana-quoero nocamantitaquempiniri, irootaque meeca nocamantantimpirori. Peerani notsi-patimpini, irootaque caari nocamantitimpini peerani, meecari meeca irootaji nojataje, irootaque nocamantasanotantimpiri.

Ompocapaaque Ishire Tasorentsi.

⁵ Aisati icantana Jesoshi:

—Meeca nojatanaje tiancaquenariqui. Iro cantaincha te pisampijeitenaji: “¿Jaoca pijata-geri?”

⁶ Meecaquea, meeca, nocamantaquempi, irootaque poashiretasanojeitantanacari.

⁷ Tampatica nocamantaquempiro oca. Ocameetsatimotimpi nojataje. Eiorica nojata-jitsi, eiro opocashijeitimpitsi Amitacojeitempineri. Ariorica nojatanaje, aitaque nontian-cajeitapaaquempiro.

⁸ Areetapeemparica, iotacaajeitapaaqueri tseencantatsiri te oncameetsateji yantayetiri. Iotacaajeitapaaqueri aisati jaoca incantajeitajeari incameetsatantajeari. Aisati iotaca-ajeitapaaqueri jaoca incanteari Tasorentsi iroasanquetanteariri maaroni tseenguiriri.

⁹ Te inquemisantajeitenaji, irootaque iroasanquetamentanteariri caari cameetsatatsi.

¹⁰ Coajica nompeimotanajempi, nojatanaje Apaqui, irootaque iotacantajeitapeempariri atiri nocameetsataque.

¹¹ Iotacaajeitapeeri iroasanquejeiteri Tasorentsi. Tempa irisati oasanquejeiterineri yora pincatsariventajeitiriri tseencantatsiri.

¹² Ainiroquera oshequi noncamantajeitempimeri, iro cantaincha eiro pimajeitirotsi pojeitavaquero meeca.

¹³ Queariotasanoataque maaroni oamejeitempi Ishire Tasorentsi. Ariorica ompoca-paaque, iotacaapeempiro maaroni queariotatsiri. Eiro oametantashitapaatsi. Paitarica oquemaqueri irootaque oamejeitapeempiri. Oametempi jaoca incanteeteari coajicani.

¹⁴ Oca nocantajeitimpiri, irootaque oametempineri; iotacantempiri nopincatsaritaque. Maaroni icantayetanari Apa, nocamantayetajimpiri aisati narori,

¹⁵ irootaque nocantajeitantaquempi: “Oca nocantayetaquempi, irootaque oame-tempineri”.

Icantiri Jesoshi: “Poashirejeivetaquea, impoiiji pinquimoshirejeitanaje”.

¹⁶ Aisati icantana Jesoshi:

—Capichanivaniji eiro pineajanatsi. Osamanitimaataque capichaji, ario pineajena aisati.

¹⁷ Irosati nocantavacaarantantanacari:

—¿Jaoca ocantari oca icantaqueeri? “Capichanivaniji eiro pineajanatsi. Osamanitimataque capichaji, ario pineajena aisati”. Icanti aisati: “Nojataje Apaqui”.

¹⁸ ¿Paitasa icantantari: “Capichanivaniji”? Te ayotacotavaqueri icantaqueeri.

¹⁹ Iotaque Jesoshi nocoajeiveta nosampiterime. Icantanaquena:

—¿Pisampitimentavacaarompa nocantaquempiri? “Capichanivaniji eiro pineajanatsi. Osamanitimataque capichaji pineajena aisati”.

²⁰ Queariotaque oca noncamantajeitempiri. Ario piraacojeitanaquena, maaroni, poashirejeitanaquea. Irinti quimoshirejeivetachane tseencantatsiri. Poashirejeive-taquea, iro cantaincha pinquimoshirejeitanaje aisati.

²¹ Ariorica omoncaratata otimiri tsinane otomi, oquemaatsitacari. Itimanaquerica ojananequite, te onquenqueshireajeroji oquemaatsitacari, irointi oquimoshireimentiri yora timaintsiri.

²² Aitaque pinquempjeitaqueari meeca avirori, poashirejeivetanaquea. Iro cantaincha aitaque noneajeitajempi aisati. Pinquimoshirejeitanaque, tecatsi oashiretacaajempine aisati.

²³ Meeca, eiro pisampijeitajanatsi paitarica. Queariotaque oca nocantimpiri. Ariorica pishiretaquena, impaquempi Apa paitarica pincantajeiteriri.

²⁴ Peerani te pishirejeitenani, te pinquenquetsatacaajeiterini Apa. Meecaquea pin- quenquetsatacaapiniteri. Paitarica pincanteriri, aitaque inquemisantaquempi, pin- quimoshirejeitasanotantanaqueari.

Jesoshi icamantacotasantiri Apa.

²⁵ Aisati icantaquena:

—Ari noshiacaventapinitimpironi paitarica, iro cantaincha coajica eiro noshiacaventa- jimpirotsi. Aitaque tampatica noncamantacotasanteri Apa, eiro nomanapitsata- jimpirotsi.

²⁶⁻²⁷ Impoiji pishiretanaquena, pinquenquetsatacayeri Apa. Avirojeitaque nintaque- nari. Pishiretacaro noponeaca Tasorentsiqui, irootaque inintajeitantimpiri Apa. Ari inintasanojeitaquempi, irootaque impajeitantempirori maaroni coiteimojeitimpiri. Nat- sipetashitarocari namanacoventajeitajempi aisati.

²⁸ Nosavicaveitani irioriqui, irosati nopocantacari quipatsiquica. Meeca nojocanjero quipatsica, nompishitanajeri Apa.

²⁹ Nocantiri:

—Meecaquea picamantasanotaquenaro. Te pishiacaventajaneroji.

³⁰ Meeca nojeitaque pitsotencajeitiro piojeitiro maaroni, irootaque noquemisantan- tacari piponeaca Tasorentsiqui. Tecatsi meeca nosampitajempiri.

³¹ Yacanajana Jesoshi:

³² —¿Ariompa piquemisantasanotaque meeca? Irotaintsi iroimishiyeetempi, pijajei- tanaje pinampipeequi. Pojocajeitanajena apaniro. Aitaque irotaintsi omoncaratapeempa meeca. Iro cantaincha te apaniro none, quiso yoana Apa irinti.

³³ Iro nocamantantimpirori oca piveshireanteari. Aitaque piveshireimentajena. Aca quipatsiquica iroashinonqueetempi, iro cantaincha piveshireajeitanaquea. Nanaacojeita- queri maaroni timajeitatsiri quipatsiquica, nopincatsaritananoti nainti.

17

Irisati cantacoventashitacha Jesoshi.

¹ Irootaque icantajeitanari Jesoshi, irosati yamenantanaca jenoqui. Icanti:

—Apa, moncaratapaaca. Meeca piotacaajeiteri atiri nopincatsaritananoti: tempa nara- taque pitomi. Aisati nonquempetea, niotacaajeiteri pipincatsaritananoti avirori.

² Tempa aitaque pitiancaquena nompincatsariventajeiteri maaroni atiri, irootaque nomatantarori naneacaajeitajiri maaroni picoyeaquenari. Iro picoyeantacari incantaiti- tatiyempani iraneajeitanaje iriori aviroriqui.

³ Aviro Tasorentsi, apaniro pini. Cameetsa iriojeitempi maaroni atiri. Cameetsa iriote naro pitiancane, naro Jesoquirishito. Maaroni iotanari incantaitatiyempani irane- inquitequi.

⁴ Aca quipatsiqui nomajeitaquempiro maaroni pinintacaaquenari, irootaque ipincatsa- tantimpiri atiri.

⁵ Peerani, Apa, tequeratani avetsiqueroni quipatsi, notsipatimpini, nopincatsaritaqueni. Meeca pinquempetacaajena aisati, nompincatsaritaje, nontsipatajempi.

Incantacoventiri Jesoshi iroamerepee.

⁶ Ari yovaaairo aisati, icantiri Iriri:

—Jeri yoca atiripee quipatsiquiniri pashijeitacari. Picantaquena: “Pinquempoyeaje-nari”. Ari niotacaajeitaqueri jaoca picantari. Iquemisantajeitavaquero pineane.

⁷ Meeca iojeitanaque aviro avinti intasanotarori maaroni poamejeitaquenari.

⁸ Maaroni poametaquenari, novaqueneri noamerepee, noametasanojeitaqueri maaroni. Iojeitavaquero. Iotasanoavaque aviro tiancaquenari. Ainiro ishire iriori iquemisantarori aviro tiancaquenari.

⁹ Iriojeitaque nocantacoventaqueri. Te noncantacoventeriji irinti tseencantatsiri, irintiquea yoca noquempoyeajimpiri. Tempa avirotaque ashijeitariri,

¹⁰ aisati nashijeitacari narori. Aisati nashije narori, pashijeitacari avirori. Iquemisantajeitana, irootaque ineapincatsajeitantanari.

¹¹ Eiro notimanajitsi aisati quipatsiquica, irioquea irinti timajeitanajantsine, naintiquea nainti piashitanajempine. Aviro, Apa, cameetsari. Tempa picantani pitasoncanti. Meeca aviro quempoyeajeitajerine yoca noquempoyeaequempiri, inquempeavacaanteari. Nocoaque irimoncarajeitajeeta aquempeavacaajeita arori.

¹² Nocarajeitancariri, tempa pimatacaaquena, irootaque nomatantarori noquempoyeantacariri. Nojocacoventaajeitaqueri: tecatsi ashinoncachane, apaniro irashinon-cayea Jorashi, iriotaque jatatsineri Sharincaveniqui. Aitaque omoncarataquea ocaman-tacotitarini sanquenatachaniri peerani.

¹³ Meeca nompiashitanajempi. Ainiroqueratsina quipatsiquica, nocamantajeitiri oca, inquimoshirejeitasanotanteari, inquempetena narori noquimoshireti.

¹⁴ Noametaqueri pineane, meeca iquisajeitanaqueri tseencantatsiri. Iro iquisantacariri, te inquempepariji. Iquempetana narori, te nonquempepariji tseencantatsiri.

¹⁵ Jeri itimajeiti noquempoyeaequempiri quipatsiquica. Te noncantempiji: “Paanajeri”. Apatiroti nocantimpi: “Pojocacoventeri. Yantiricari camaari”.

¹⁶ Te inquempepariji tseencantatsiri. Iquempetana narori, te nonquempepariji.

¹⁷ Piotacaajeiteri queariotasnotatsiri, inquearioventantempirori maaroni picoacairiri. Ora pineane, irootaque queariotasnotatsiri.

¹⁸ Pitiancaquena nojatashitaririri atiri noquenquetsatacaajeitiri. Aisati narori no-quempetaqueri, notiancajeitaqueri irijatashitantariri atiri inquenquetsatacaajeiteri.

¹⁹ Noquearioventimpiro maaroni, iojeitantarori queariotatsiri, irosati inquearioventa-jeitantempirori iriori.

Icantacoventaajeitiri Jesoshi maaroni quemisantiriri.

²⁰ Jero aisati icantiriri Jesoshi iriri:

—Nocantacoventaajeitiri noamereca. Aisati noncantacoventaajeiteri yora iquemisantacaajeitiri: yora quemisantajeitanari, maaroni.

²¹ Nocoaque inquempeavacaajeitanajea maaroni. Tempa aquempeavacaaca, Apa, arori. Aisati nocoaque inquempeajeitajee iriori quemisantajeitanari, irosati inquemisantanteari atiri pitiancasanotaquena.

²² Pitasoncacoventaquena noquempetantaquempiri avirori, aisati notasoncacoventa-jeitaqueri iriori, inquempetavacaajeitantajeari. Irimoncarajeitajee arori, aquempeava-caaca.

²³ Iquempetaquena narori. Noquempetaquempi avirori. Irootaque inquempetava-caasanojeitanteari, irosati iriojeitanteari atiri pitiancaquena. Iriojeitanaque pininta-quena, aisati piquempejeitaqueri, pinintasanoejeitaqueri maaroni.

²⁴ Tequerani ontimeni quipatsi, tempa pinintitanani, irootaque pipeantaquenari pin-catsari. Meeca, Apa, nocoaque intsipajetena iriori irineantenari nompincatsaritanano-tanaque. Tempa picantana: “Pinquempoyeajeitenari”, aitaque nomataquempiri.

²⁵ Picameetsatasanoaque, Apa. Te iriojeitempiji tseencantatsiri, iro cantaincha ni-otimpi nainti. Aisati iojeitaquempi yocapee pitiancaquenari,

²⁶ niotacaajeitaqueri jaoca picantari avirori. Aitaque nampiitajeri niotacaasanoteri, pinintasanoejeitanteariri, pinquempetacanteri narori pinintasanotana. Aisati inquempea-jeitena.

Irootaque icantiriri Jesoshi Iriri.

18

Yaantanacariri Jesoshi.

(Mt. 26.36-56; Mr. 14.32-52; Ir. 22.39-53)

¹ Ari yovecarataquero Jesoshi iquenquetsatacairi iriri, irosati nojajeitantanaja: Jesoshi, aisati maaroni iroamerepee. Nomonteanajaro pirijavinteni pajitachari Seroni. Nojajei-tanaji panquiveerentsiqui anta.

² Aitaque anta ijatacaapinijeitanari Jesoshi, irootaque iotantarori iriori Jorashi, yora aacanterineri.

³ Yora jivatacaajeitiriri saserotepee, jeri variseopee itiancajeitavaque soraro, jeri variria. Ijivajeitapaqueri Jorashi. Yamajeitapaaque tsiomentotsi, sampi, yoantamento aisati;

⁴⁻⁵ ipocashijeitapaqueri Jesoshi. Iotaque iriori Jesoshi jaoca incanteriri. Ijatanaque itonquiotavacari, icantavaqueri:

—¿Janica picoiri?

Yacanaqueri:

—Yora Jesoshi nasaretasati.

Icantavaqueri:

—Narotaque.

⁶ Icantantavacariri Jesoshi: “Narotaque”, irosati ipiantanaca itapiiqui. Ipariajeitanaque quipatsiqui, tiriquicn.

⁷ Yapiitajiri:

—¿Janica picoasanotiri?

Yacanajiri iriori:

—Yora Jesoshi nasaretisati.

⁸ Icantajiri:

—Aitaque nocantajeivetaquempi: “Narotaque Jesoshi”. Naroricampa picoiri, pishinejeiteri irijajeiteta yoca notsipajeitacarica.

⁹ Moncaratapaaca icantaqueriri Jesoshi Iriri: “Yoca picantaquenari: ‘Pinquempoyenari’, tecatsi ashinoncachane”.

¹⁰ Irosati Shimo Petero yaantanacaro isavirite. Ipesaqueri inampire ivincatsarite saserotepee: ipeshitaqueri iyempita iracosanoriquiniri. Ipajita nampirentsi Marico.

¹¹ Irosati icantantanacari Jesoshi Petero:

—Poimpiajero pisavirite poantaroriqui. Irootaque inintacaaquenari Apa irayeetena. ¿Nonsaneapitsatearimpa?

Yayeetanaqueri Jesoshi Anashiqui.

(Mt. 26.57-58; Mr. 14.53-54; Ir. 22.54)

¹² Irosati yajeitantanacari Jesoshi. Irio aajeitanaqueriri soraropee, iyapitanote, variria. Ari yoisojeitakeri.

¹³ Ijivatapainti yaanaqueneri Anashi. Iriotaque iriconquiri Caijashi. Ari iquenquetsatacairi Jesoshi. (v 24) Impojji icanti yora Anashi:

—Paanajeri anta Caijashiqui, irisampitavaquerita iriori paitapeerica.

Yora Caijashi, iriotaque meeca ivincatsarite saserotepee,

¹⁴ cantaqueriri joriopee: “Ocameetsatimotimpi incameta shiramparinta aparoni, irav-
isacojeitantajeri ashanincapee”.

Irisati manacotaincha Petero.

(Mt. 26.58-70; Mr. 14.66-68; Ir. 22.55-57)

¹⁵ Shimo Petero iriotaque oijatacoventavetanacariri Jesoshi, itsipatari pashini iroamere. Yora ivincatsarite saserote iotiri yora tsipatariri Shimo, irootaque ishinetantacariri iriori ipocaque ivancoqui, itsipatapaacari Jesoshi.

¹⁶ Irinti Petero icatiapaaca ashitacorontsiqui araquerora. Isoquijanaji yora itsipatapaacari, icantapaaquero shentirori ashitacorontsi:

—Pishineteri inqueapee iriori.

Ocantiri:

—Ari.

Irosati iqueantapaacari Petero iriori.

¹⁷ Ora nampirentsi ocantavaqueri:

—¿Caarimpimpa avirori iroamere Jesoshi?

Icantiro:

—Caarina.

¹⁸ Ocatsincaiteaque. Yoisajeitauero paamari nampirentsipee, jeri soraropee. Yaquitsiantajeitaca paamariqui. Aisati iriori Petero itsipajeitapaacari yaquitsiantapaaca.

Yaanajiri aisati Jesoshi Caijashiqui.

(Mt. 26.59-66; Mr. 14.55-64; Ir. 22.66-71)

¹⁹ Yora ivincatsarite saserote isampitaqueri Jesoshi:

—¿Janica poametapinitiri? ¿Paita poametapinijeitiriri?

²⁰ Yacanaqueri Jesoshi:

—Iquemajeitaquena maaroni atiri noametantiri. Noametantapiniti anta yapatojeitan-tari. Aisati noametapinitantaque ivancoqui Tasorentsi. Tecatsi nomanapitsateri ashan-inca.

²¹ ¿Paita pisampitantanari narori? Pisampijeiteri irinti quemajeitaquenari paitarica nocantaqueriri. Iojetaquero iriori.

²² Irosati ipasavorotantanacari aparoni soraro catiainchari ara. Icantiri:

—¿Arimpa ampiatsateari ivincatsarite saserote?

²³ Yacanaqueri:

—Terica oncameetsate nocantaqueriri, piotacayenaro. Irompa ocameetsatirica nocan-taqueriri, ¿paita pipasavorotantanari?

²⁴ (-)

Yapiitaja Petero imanacotaja irisati.

(Mt. 26.71-75; Mr. 14.69-72; Ir. 22.58-62)

²⁵ Ainiroquera Shimo Petero yaquitsiantaca. Irosati icantanteetacari:

—Tempa aviro iroamere Jesoshi.

Irisati manacotanaincha, icantanaque:

—Caarina.

²⁶ Itsipajeitari aparato inampire Caijashi. Iriotaque ishaninca yora ipesaquemipitavetacari Petero. Icantaqueiri:

—Tempa noniimpi panquirentsiqui, pitsipatari Jesoshi.

²⁷ Yapiitajiro Petero imanacotaja. Irosati ineantanaca teapa.

Yaanaajiri Jesoshi Piratoqui.

(Mt. 27.11-14; Mr. 15.1-5; Ir. 23.1-5)

²⁸ Capichaji quitaiteiri yojocajeitanaquero ivanco Caijashi. Yayeetanaqueri Jesoshi ivan-coqui Pirato, yora pincatsaritatsiri. Caari ini jorio, irootaque caari icoajeitana joriopee inqueajeitapee ivancoqui. Icant:

—Irotaintsi avajeitimentearo Yavisantanari. Ariorica ajate ivancoqui Pirato, eiro am-atirotsi avajeitea, eiro ineacameetsajeiteetsi Tasorentsi.

²⁹ Irosati isoquijashijeitantanacariri Pirato. Icantajeitavaqueri:

—¿Paitampa yantaqueri yoca shiramparica pamantaquenariri?

³⁰ Yacanaqueri iriori:

—Ainiro yantayetiri. Eirome yantirome caari cameetsatatsi, eiro namimpirime.

³¹ Irosati icantantavetacari Pirato:

—Paajeitanajeri avinti. Tempa otimi sanquenarentsi oametimpiri poasanquejeitan-teriri. Pimamateriquetite avinti poasanquetayeri.

Icantanaqueri iriori:

—Te irishineyeetenariji noyeri.

³² Irootaque icantaqueri omoncaratantacari icantitacari Jesoshi. Tempa icantitani: “Impajacoyeetena”.

³³ Irosati ipiantanaja Pirato ivancoqui. Icajemacantajiri Jesoshi aisati. Icantiri:

—¿Avirompa ivincatsarite joriopee?

³⁴ Yacanaqueri Jesoshi:

—¿Piovetaquenampa? ¿Paita pisampitantanari? ¿Timatsimpa pashini camantaquempiri?

³⁵ Yacanaqueri Pirato:

—¿Narompa meeca jorio? Iriotaque pishaninca amajeitaquempiri aca, jeri jivataca-jeitiriri saserotepee iriori. ¿Paita pantaqueri iquisajeitantaquempiri?

³⁶ Yacanaqueri Jesoshi:

—Te nompincatsariventante aca quipatsiqui. Nompincatsariventanteme aca, aitaque inquisacoventajeitaquename nonampire. Eirome ishinetirime joriopee iramename. Iro cantaincha te aca nompincatsariventante.

³⁷ Irosati icantantacari:

—¿Ariompa? ¿Avirotaquempa pincatsari?

—Je, narotaque Pincatsari. Queario picantaquena. Nocamantajeitiri atiripee queario-tasanotatsiri. Irootaque notimantacari, irootaque nopocantacari quipatsiquica. Maaroni yora iotavaquerori queariotasanotatsiri, iriojeitaque quemisantanari.

³⁸ Icantiri iriori Pirato:

—¿Paita ojita oca picantiri: “Queariotasanotatsiri”?

Irosati isoquijashitantanajari joriopee, icantajeitiri:

—Nosampivetaquempi incaranqui, te pincamantenaji paita yantasanotaqueri noa-maanteariri.

Iroimpacajerime Pirato Jesoshi.

(Mt. 27.15-31; Mr. 15.6-20; Ir. 23.13-25)

³⁹ Pashini icanti aisati:

—Ariorica omoncaratapaaja Yavisantaniri, noimisoquijapinitimpiri aparo yoimingueetiri. Tempa aitaque ocantari amejeitari. ¿Picoimpa noimpacajempiri pivincatsariteca?

⁴⁰ Irosati icajemantajeitanaca maaroni:

—Eiro poipacananaritsi yora. Irio poimisoquijajenari Varavashi irinti.

Yora Varavashi coshinti ini.

19

¹ Irosati yaacantantacariri Pirato Jesoshi, ipasatacantaqueri.

² Yora soraro itapoyetaqueneri iramatseere quemariiti. Yamatsetacaacari. Iquitsaataqueri quitioncari.

³ Ipcashitapinijeitaqueri, icantamempeashijeitacari:

—¿Avirompa pincatsariventiriri jorio? Iji, iji, iji.

⁴ Ipasavorotantapaacari iraco. Isoquijashitanajiri Pirato joriopee aisati. Icantajeitiri:

—Jeri yoca, namajimpiri aisati. Nosampivetaquempi, iro cantaincha tecatsi pincamanajeitena niotanteari paita piquisantacariri.

⁵ Isoquijanaji Jesoshi iriori. Yamatsetacaro quemariiti, iquitsaatata quitioncari. Icantajeitiri Pirato:

—Jerica.

⁶ Yamenajeitavaqueri jivatacaajeitiriri saserotepee, soraro aisati. Icajemajeitanaji:

—Pimpajacotacanteri, pimpajacotacanteri.

Icantiri Pirato:

—Paajeitanaqueri avinti, pimpajacojeiteri. Nosampitacovetacari, tecatsi nonquemacoteri irante.

⁷ Yacanajiri jorio:

—Timatsi sanquenarentsi oametanari ocameetsati incame jitasorentsitachari. Tempa icanti iriori: “Narotaque Itomi Tasorentsi”, irootaque ocameetsatantacari incame.

Yapiitajiri Jesoshi, isampitajiri aisati.

⁸ Iquemantavacariri Pirato icantajeitaqueriri, aiqero ijatatii itsaroasanotanaque.

⁹ Ipianaja, iqueanaji ivancoqui. Icantapaajiri Jesoshi:

—¿Jaoca piponeari avirori?

¹⁰ Te iranqueji Jesoshi iriori. Irosati icantantanacari Pirato:

—¿Paita caari pacantana? Naro pincatsari. Noncoaquerica, ari nomatero noimpacacoventajempi. Aisati oquempeta, noncoaquerica, nomatero nompajacotacantempi. Tempa piotaquero.

¹¹ Yacanaqueri Jesoshi:

—Eirome ishinetimpime Tasorentsi, tecatsi pincantename. Yora amacantaquenari aca, irio antasanotaquerori caari cameetsatsi irinti.

¹² Irosati icoantavetanaja Pirato iroimpacajerime. Iro cantaincha icajemajeitanaji joriopee aisati:

—Ariorica poimpacajeri yora, te pishanicateariji Shisari. Jeri yora cantashitachari: “Narotaque pincatsari”. Tempa iriotaque quisaqueriri pivincatsarite.

Ipajacotacantaqueri Jesoshi.

¹³ Iquemantacariri Pirato icantajeitaqueriri, isoquijacaanajiri Jesoshi. Isavicapaaque anta icantacoventantapinitinta. Anta yovetsiqueetironta mapi, ipampaiteyeetironta. Icanteetiro evereo “Cavata”.

¹⁴ Itampaticati meeca catsirincaiteri, irotaintsi quitaiteri iquenqueshiretantarori Yavisantaniri. Irosati icantajeitancari Pirato:

—Jeri yoca pivincatsarite.

¹⁵ Icajemajeitanaque iriori:

—Payeri. Paanaqueri anta. Pimpajacotacanteri.

Isampitiri:

—¿Nompajacotacanterimpa pivincatsarite?

Yacanaqueri jivatacaajeitiriri saserotepee:

—Te nompincatsarite, apaniro irinti Shisari.

¹⁶ Irosati ipajacotacantancari.

Ipajacotaqueri Jesoshi anta Coricotaqui.

(Mt. 27.24-50; Mr. 15.21-41; Ir. 23.25-49)

¹⁷ Irio soraro aajeitanaqueriri. Irisati aanajiro Jesoshi coroshi. Yojocanajiro nampitsi, yareetapaaca toncaariqui pajitachari litontsini. Evere ipajitiro: "Coricota".

¹⁸ Aitaque ipajacoyeetaqueriri coroshiqui. Itsipatacari apite shirampari. Ipajacoyeetaqueri iriori coroshiqui pashini. Yoyeetaqueri Jesoshi nianqui. Aparo yoyeetaque iracosanoriqui Jesoshi, irio itsipa irampatequi.

¹⁹ Pirato isanquenatacantaque cantatsiri: "Jesoshi nasaretasati, iriotaque ivincatsarite jorio". Ipatacacotacantaquero coroshiqui.

²⁰ Oquempjitaro nampitsi aitaque ipajacotaqueriri Jesoshi. Oshequi jorio neanataquerori isanquenatiri. Osanquenavetaca irineanequi jorio, oromasati, aisati irineanequi quireshiasati.

²¹ Yora jivatacaajeitiriri saserotepee icantiri Pirato:

—Eiro pisanquenatirotsi: "Iriotaque ivincatsarite jorio", irointi pisanquenate: "Irio cantashitachari: 'Naro ivincatsarite jorio'".

²² Yacanaqueri Pirato:

—Aitanaque, nomataquero: nosanquenatacantaquero.

²³ Ari ipajacotaqueri soraro. Yovojeaquero iitsaareni, otsipasatitapaaque, irosati ipavacaantacaro. Te orimpiteaji iroicoroni, intani itijeetiro maaroni.

²⁴ Irootaque icantavacaantajeitacari:

—Eiro atsereirotsi. Tsame antanatiteri, ayotanteari janica ashitajearone.

Aitaque icantari soraro. Imoncarataquero Sanquenarentsi cantatsiri: "Impavacayearo noitsaareni. Irantanatitajeitakenaro noicoroni".

²⁵ Ora iriniro Jesoshi ocatiapaaca quempeji ipajacotaca. Ainiro otimi ireento, aisati opajita iroori Maria. Irootaque ijina Quereojashi. Otimi ara aisati Maria maquitarasato.

²⁶ Ineajiro Jesoshi iriniro, aisati ineaquena narori. Narotaque iroamere inintasanotiri. Icantaquero:

—Ina, jeri yora, pintomintajeari.

²⁷ Icantaquena:

—Jero ora, pinirontajearo.

Irosati naantanajaro novancoqui.

²⁸ Totanaque Jesoshi aitaque moncarajeitaca maaroni. Irosati icantantanaca:

—Nomireni.

Iro icantantari imoncarataquero ocantiri Sanquenarentsi.

²⁹ Otimi ara choncorina, ojaaca quepishijari. Yoviinqueetaquero atsimiicajitirori. Yoaqueneri sataamentotsiqui. Ijicotacotaqueneri ivantequi Jesoshi.

³⁰ Yatsimiicavaquero, irosati icantantanaca:

—Aitaque meeca, nomoncarataquero icoacaanari Apa.

Irosati yoivotantanaca, icamaaque, toren.

Isataaqueri Jesoshi.

³¹ Meeca yovetsiquimentajeitiro jorio Yavisantaniri. Onquitaitetamanaque, iro saavaro irimaoreantasanojeiteari. Te incoajeiteji jorio yora pajacojeitachari iroavisayero saavaro coroshiqui, irootaque icantajeitantarari Pirato:

—Pincarajacantitajeiteri ivoripee, irosati pimpajacoreacantantajeariri.

³² Irosati ijatashijeitantanajari soraro, icarajavoritaqueri yora itsipatacari Jesoshi. Aisati icarajitaqueri iriori pashini.

³³ Yovaashivetapaacari iriori Jesoshi, incarajiterime iriori; iro cantaincha ineapaaqueri camaque irinti, irootaque caari icarajitantari irinti ivori.

³⁴ Iro cantaincha aparo soraro isataapaaqueri imerequiqui. Ocontejatapaaque iriraja, tsiquiririri. Nija aisati.

³⁵ Naro neacotaqueriri, meeca narotaque camantacotaqueriri. Nioti queario oni noca-mantimpiri, pinquemisantantajeari avirori.

³⁶ Aitaque icanteetaqueriri, irootaque omoncaratantacari Sanquenarentsi cantatsiniri: "Eiro icarajiteetiritsi itonqui aparoni".

³⁷ Timatsi pashini isanquenayeetiniri: "Aitaque irameneeteri Quirishito, yora irisatayeeteri".

Yovimqueetaqueri Jesoshini omoroqui.

(Mt. 27.57-61; Mr. 15.42-47; Ir. 23.50-56)

³⁸ Itimi anta Jose arimateasati. Iroamere Jesoshi inaveta, iro cantaincha imanaquero. Iro imanantacaroni, itsaroacaacari ivincatsaritepee jorio. Ijatashitaqueri meeca Pirato, icantapari:

—Pishinetajenari Jesoshini, naanajerita.

Icantiri:

—Paanajeri.

Irosati ijatantanaca, yaanajiri.

³⁹ Ijatanaque iriori Nicoremo. Iriotaque jatashitiriniri peerani Jesoshi tsiteniriqui. Yaacotanaqueneri intiritanteariri. Iconoaquero oyashi inchato pajitachari mira, ovane inchato pajitachari aroeshi. Aamaaca otenati 45 quiro.

⁴⁰ Yaajeitanaqueneri Jesoshini. Iro tocoyatsa yapinaicacotantacariri, itsipataquero casancajari. Irootaque yametari joriopee, ariorica yovetsiquiri camatsiri.

⁴¹ Otiminta panquirentsi quempeji ipajacojeitaquerinta. Anta panquirentsiqui otiminta iroanteariri camatsiri, iroaquera imoqueetiro.

⁴² Irotaintsi inquee catsirincaiteri, omoncaratanteari Yavisantaniri. Ineaquero Jose oquempejitaque omoro, irootaque yoantacariri Jesoshini anta.

20

Ocoavetari Maria Jesoshini.

(Mt. 28.1-10; Mr. 16.1-8; Ir. 24.1-11)

¹ Otomincotapaaque. Tsiteniquera ojatamanaque Maria maquitarasato anta omoroqui yoavetacarinta Jesoshini. Oneapaatiro jocanaja mapi yashitacotantevetacariri.

² Narotaque iroamereni inintasanotiniri Jesoshi. Notsipatari anta Shimo Petero. Jero oshiashitapaaquena Maria. Ocantapaaquena:

—Yayeetajiri Avincatsariteni. Te aneajeriji yoavetacarinta. Te nioteji jaocarica yoyeetajiriri.

Yamenajeivetajari Petero, jeri Joa.

(Ir. 24.12)

³ Irosati nojatantanaca apite. Nojatanaque yoavetacarinta.

⁴ Noshianaca apite, nanaacotaqueri nainti Petero. Naro anaacotaqueriri nareetapaaca anta yoavetacarinta.

⁵ Noivotapaaca, namenapaaque tsoompoina. Noneajiro tocoyatsa ovaja omoroqui, iro cantaincha te nonqueapejei.

⁶ Impoitapaaji iriori Shimo Petero. Irinti queapaintsi tsoompoina. Irosati ineapaaque iriori tocoyatsa.

⁷ Ora panio ipashicantevetacariri iitoqui, te ontsipatearoji tocoyatsa. Apitivitaja, ovashitaja iroori.

⁸ Ari noqueanaque narori, noneapaaquero, irosati niotantanaca tinaanaja Jesoshi.

⁹ Tequerata nonquenqueshiretajeroji Sanquenarentsi cantatsiri: “Incamavetaquearica Quirishito, aitaque intinaanaje”.

¹⁰ Irosati nopiantanaja novancoqui.

Oneaqueri Maria Jesoshi.

(Mr. 16.9-11; Ir. 24.10)

¹¹ Irointi Maria catianaincha saiteriqui, iraacotaqueri. Oivotanaca, amenanaque tsoompoina.

¹² Oneaqueri apite inampire Tasorentsi, iquitsaataro quitamarori. Isavicaque yoavetacarinta Jesoshini. Isavicaque aparoni iitoyeevetacari Jesoshini, irio itsipa iitiqui.

¹³ Icantiro:

—Tsinane, ¿paita piraantari?

Ocantajiri iroori:

—Yayeetanajiri novincatsariteni. Te nioteji jaocarica yoyeetajiriri.

¹⁴ Irosati opitsocantanaja. Oneaqueri Jesoshi icatiapaaca, iro cantaincha te iotavaqueriji.

¹⁵ Icantiro:

—Tsinane, ¿paita piraantari? ¿Janica picoiri?

Ojitavaqueri irio tsameetacoyetirori panquirentsipee. Ocantiri:

—¿Avirompa aanajiriri novincatsariteni? Pincamantajenate jaocarica poajiriri. Aitaque naajanteri narori.

¹⁶ Icantanajiro iriori:

—Maria.

Opitsocanaca iroori, ocantanaqueri:

—Oametanari.

¹⁷ Irosati avitsanotantacariri. Icantanajiro:

—Poimpacajena: tequeratsita novajenoquea Apaqui. Meeca nocoaque pijatashijeiteri quemisantajeitanari, pincamantajeitapaajeri meeca novajenocajea Apaqui. Tempa irotaque Tasorentsi. Tempa irisati Piri avirori, piotiri Tasorentsi ini, irotaque pipincatsantacariri avirori.

¹⁸ Irosati opocashitantajanari narori, aisati itsipapee iroamerepee, ocamantajeitapaajana:

—Noneajiriyea Avincatsarite.

Ocamantapaaquena icamantayetaquerori Jesoshi.

Intapaajari Jesoshi, inijaapaajari iroamereni.

(Mt. 28.16-20; Mr. 16.14-18; Ir. 24.36-49)

¹⁹ Ishaavijiiteanaji meeca, napatojeitaja, nocarajeitajiri itsipapee iroamere. Notsarocaaajeitanacari jivatacaajeitiriri noshanincepee, yora ocantaqueriri Jesoshi, irotaque noyavitantacarori ashitacorntsi. Imapocashijeitapaajana Jesoshi, icatiapaaja nianqui. Icantajeitapaajana:

—Piveshireajeitanajea.

²⁰ Irosati injantajeitapaaquenaro iraco, aisati imerequi. Noneajeitavajiri Novincatsarite, irosati noquimoshirejeitantanaja.

²¹ Yapiitajana:

—Piveshireajeitanajea. Tempa irio tiancaquenari Apa peerani, aisati meeca nonquemetacayempi avirori, nontianquempi.

²² Irosati itasoncantajeitanaquena, joo. Icanti:

—Meeca ompocashijeiitempi Ishire Tasorentsi, quiso oajeitanaquempi.

²³ Ariorica pineaqueri ashaninca iquemisantanaquena, irosati pincantanteariri: “Incavintsayempi Tasorentsi avirori, eiro iquishimentimpirotsi pantayetiri”. Irotaque pincanteriri: tempa aitaque incavintaasanoteri Apa yora pincanteri. Pincanteririca itsipapee: “Te pinguemisanteji, irotaque inquishimentempirori Tasorentsi pantayetiri”, aitaque inquishimentaqueri.

²⁴ Ipcashijeitanaquenari, te aneriji irinti Tomashi, yora ipajiyeetiri Tsipari; aparoni peaincha.

²⁵ Ari ipocapaaji iriori, nocamantavajiri:

—Noneajeitajiriyea Avincatsarite.

Icantanaque:

—Nocoi noneero iraco, ora oqueaqueri quiravo, noninti noiminqeero nacotsapaqui. Aisati noninti noiminqeero naco imerequiqui. Eirorica noiminqeirotsi, eiro noquemisantitsi.

Yapiitajiri ineajeitajiri Jesoshi iroamere.

²⁶ Avisanaque 8 quitaiteri, ari napatojeitanaja aisati pancotsiqui, itsipajeitajana iriori Tomashi. Oshequi catsini notsarocaaajeitacari quisajeitanari, irotaque noyavitantacarori ashitacorntsi. Imapocapaajana aisati Jesoshi, icatiashitapaajana nianqui. Icantajeitapaajana:

—Piveshireajeitanajea.

²⁷ Irosati icantantanacari Tomashi:

—Pamenero naco. Pancote, poiminqeero pacotsapaqui aca. Pancote aisati, poiminqeero paco nomerequiqua. Eiro pitseencajanatsi aisati, pinguemisante irointi.

²⁸ Irosati yacantanacari Tomashi:

—Avirotasanaotaque novincatsarite, avirotasanaotaque notasorentsite.

²⁹ Icantanaqueri Jesoshi:

—Meeca pineajana, irotaque piquemisantantajanari. Timatsi caari neenane, iro cantaincha inquemisantajeitena; inquimoshiretasanojeitanaque irinti.

³⁰ Oshequi catsini itasoncantayetaque Jesoshi. Narojeitaque iroamere, noneajeitaqueri, iro cantaincha te nosanquenajeiteroji maaroni aca.

³¹ Nosanquenajeitaquero oca pinguemisantantajeitairiri Jesoshi iriotaque Quirishito, yora Itomi Tasorentsi. Ariorica pinguemisantajeitaqueri, aitaque iraneacaajeitajempi anta inquitequi, pincantaitatijempani.

21

Mavatanaque inijaajari Jesoshi iroamerepee.

¹ Irosati inijaantajeitajana aisati Jesoshi, aisati itsipapee iroamerepee. Noneajeitajiri otsapijaqui incajare Tiveriashi. Aitaque ocantari.

² Napatojeitaca, nocarajeitiri Shimo Petero, jeri iriori Tomashi: icanteetiri aisati Tsipari. Jeri Natanaeri ponechari Canaqui, onta carireaquiniri. Narojeitaque itomipee Severeo. Jeri aisati apite pashini iroamere Jesoshi. Napatojeitaca maaroni.

³ Icantajeitana Shimo Petero:

–Nojate nonquitsate.

Nocantajeitanaqueri:

–Narosati, noijajeitanaquempi.

Ari nojajeitanaque. Notejeitapaaca pitotsiqui. Noquitsajeivetaca, irosati noquitaiteta-cotantacari. Tecatsi naye.

⁴ Oquitaitetamanaji, irosati icatiantapaaja Jesoshi otsapijaqui. Te niojeitavajeriji.

⁵ Icantajeitana:

–Ayompari. ¿Chorampa shima?

Nacajeitanaqueri:

–Te aneeriji.

⁶ Icantajeitana:

–Pinquitsataje aisati pacosanoriqui, aitaque paye.

Ari noquitsajeitanaji. Naajeitaque oshequi catsini shima, te naaveacoteriji nontetaco-teri pitotsiqui.

⁷ Naro iroamere inintasanotiri Jesoshi. Nocantiri Petero:

–Ja, iriotaqueyeatsi Avincatsarite.

Ari isapocaquero Shimo iitsaare incaranqui, irointi itorosate. Iquemantaquenari, irosati iquitsaatantanajaro iitsaare. Ishiticatsaquitanaja. Ipiincacotanaquero iitsaare, pocn; yamaatashitanajiri, yaatapaaji.

⁸ Nimpoitacojeitapaaji narori, nonoshicacojeitiri shima. Quempejitapaaji otsapija, aamaaca ocarati 100 metero.

⁹ Nomitajeitanaque quipatsiqui. Noneapaaque oparasheti paamari, itashitiri shima. Otimi aisati tanta.

¹⁰ Icantajeitavaquena Jesoshi:

–Pamaquenari meeca shima piquitsataqueri.

¹¹ Itetapaaja aisati Shimo Petero, inoshicacotajiri shima quipatsiqui. Jaasanotaca antearipee shima, icarati 153. Yoshequiasanovetaca catsini, iro cantaincha te ompesanaqueji noquitsatantariri.

¹² Icantajeitana Jesoshi:

–Pimpocajeite meeca poajeitapeempa.

Notsaroacaacari noncanterime: “¿Janicampimpa?” Maaroni niojeitaqueri Avincatsarite ini.

¹³ Irosati iquempejijeitantaquenari Jesoshi. Yaaquero tanta, ipajeitakuena. Aisati shima, ipajeitakuena maaroni.

¹⁴ Icamavetaca Jesoshi chapinqui, itinaanaja. Mavatanaque meeca injaajana.

Icantiri Petero.

¹⁵ Noajeitaca. Irosati isampitantajari Jesoshi:

–Shimo, itomi Jonashi, ¿panaacojeitaquerimpa yocapee, pinintasanotana avinti?

Yacanaqueri iriori:

–Aviro, Novincatsarite, iotatsiri nonintimpi.

Icanti:

–Pimperer novishajaniquite iroyea.

¹⁶ Yapiitajiri aisati isampitajiri:

–¿Pinintanampa?

Yacanajiri aisati:

–Je, Novincatsarite. Aviro iotatsiri nonintimpi.

Icantiri:

–Pinquempoyeajeitenari novishate.

¹⁷ Mavatanaque isampitiri:

–¿Pinintasanotanampa?

Irosati iquencheshireantanaca Petero. Iro iquencheshireantanacari, mavatanaque isampitaqueri: “¿Pinintanampa?” Yacanajiri aisati:

–Avirotaque, Novincatsarite, iotirori maaroni. Plotana avinti nonintasanotimpirica.

Icantiri:

¹⁸ –Pimperer novishate iroyea. Queariotaque oca noncamantempiri: peerani, ainiro-quera pevanariveitani, piquitsaatapiniveitaroni piitsaare. Pijatapiniyetini jaocarica pinintiri: tecatsi tsaneempineri. Iro cantaincha ariorica panteashiparitasanotapaaque,

pancotsaye pacoqui, irosoyeetempi, inquitsaatajempi itsipapee. Iraanaquempi tenta pincoavetea pijate.

¹⁹ Aitaque icantaqueriri. Yoametaqueri jaoca incanteari incamanteari Petero iriori. Ariorica irineeteri incamaque, irioyeetanaque ipincatsaritasanoti Tasorentsi. Irosati icantantanajari:

—Tsame, poijatanaquena.

Inintane Jesoshi.

²⁰ Ipitsocanaca Petero. Ineaquena noijatanaqueri, tempa naro iroamere Jesoshi inintasanotiri. Chapinqui noacaajeitantariri Jesoshi, naro sampitaqueriri: “Novincatsarite, ¿janicampa aacantempineri?”

²¹ Ineantaquenari Petero, ijicotana, aisati isampitiri Jesoshi:

—Novincatsarite, ¿jaoca incanteeteriri coajica yora?

²² Icantanaqueri:

—Noninterica intimavaqueta aca irosati nompiantajeari, eiro piquenqueshiretirotsi. Poijatenata nainti.

²³ Yovaajeitaquero maaroni quemisantatsiri icantiriri Jesoshi. Ijijeivetaca eiro nacamitsi. Iro cantaincha te incanteriji Jesoshi: “Eiro icamitsi Joa”. Irointiquea icantavetari: “Noninterica intimavaqueta aca irosati nompiantajeari, eiro piquenqueshiretirotsi”.

²⁴ Narosanaque iroamereni Jesoshi, sanquenatirori oca. Ayojeitaque queariotasana-taque oca nosanquenataqueri.

²⁵ Timatsi oshequi pashini yantayetaqueri Jesoshi. Ariorica nontsoteaquerome nosanquenatacotaquerome maaroni, eiro onarome quipatsiquica sanquenarentsi. *Joa*

YANTAYETINIRI ITIANCANENI JESOSHI

Icamantiri Irocashi jaoca ocantari inquenquetsatacayeriri.

¹ ¿Ainirompi Tiojiro? ¿Tecatsimpa oyempine? Peerani nintantacarori nosanquenatantaquempiironiri, noquenquetsatacaimpironi maaroni yantayetiniri Jesoshi. Aisati noquenquetsatacaimpiro maaroni yoametantayetiniri.

²⁻³ Ari oshequi inecatsitacaro, icamaque, itinaanaja aisati, irosati yonijaantapaajariri iroamerepeeni. Oshequi inecatopinijeitajiri yantayetapaajiri, irootaque iotasanoantajariri itinaanaja. Ocarati 40 quitaiteri yonijaapinitantajariri. Iquenquetsatacotaquero jaoca icantari Tasorentsi ipincatsariventanti. Itiancajeitaqueri iroamerepee, iriotaque yora icoyeajeitaqueri. Iro cantiriri Ishire Tasorentsi. Impoiji yoancajiri Tasorentsi inquitequi, irosati narori novecaratantacarori noyenquetsare peerani. Meeca novaajempiro: noncamantajeitempiro yantayetiri iriori iroamereni Jesoshi, yora itiancanaqueri peerani.

Yoverantasanotanacarori Jesoshi irineane.

⁴ Ari yoacajeitajari Jesoshi. Icantasantaqueri:

—Eirota pojoquitarotsi Jerosare; nocoaque poyeavaquerota icashiacaaquempi Apa: ora piquemitaquenari peerani nocamantitaquempi.

⁵ Yora Joani ivaotisaajeitaquempi nijaqui iojeitantacari atiri piquemisantajectirini. Iro cantaincha eiro osamanititsi ompocashijeitempi Ishire Tasorentsi, quiso oajeitempi iriojeitanteari atiri queario piquemisantaquena narori.

⁶ Yora apatotimentacariri, isampijeitiri:

—Novincatsarite. Arojeitaque ishanincani yora intacaroniri Ishiraeri. Peerani itimaveitani pincatsariventaveitariniri ashanincani; meecampa, tecatsi. ¿Ariompa meeca pincanteri pashini impincatsariventajeitajena? Oshequi nocoajeitaque.

Yacanaqueri:

⁷ —Te incoacayempiji Apa piojeitero jaoca oncarate. Osamanitatsirica, irompa jaocarica oncarate. Irintiquea Apa apaniro cantatsine.

⁸ Coajica intasoncaventajeitempi, aisati ompocashijeitempi Ishire. Nocoaque pinquenquetsatacojeitena anta Jerosarequi, pintsoteaquero Jorea. Pinquenquetsajeite anta Samariaqui, aisati pintsoteanaquero anta pashinipeequi quipatsi.

Yoajenocantanajari Jesoshi.

⁹ Irootaque icantanaqueriri Jesoshi. Ari yamenajeitavajiri, irosati yoajenocantanaja jenoqui, ipeanaja mencoriqui.

¹⁰ Ari yamenajeitavajiri sorerere, ijatanaji. Ari imapocapaqueri apite shirampari, icatiimojeitapaacari. Quitamarori iitsaare.

¹¹ Icantapaqueri:

—¿Ainirompi, carireasati? ¿Paita pamenantarori inquite? Pineavajiri yora Jesoshi yoajenocanaja inquitequi. Iriotaque piajantsineri coajica aisati. Ariorica impiaje aisati, inquempetapaajea meeca ijatantanajari.

¹² Ari ipiajeitanaja Jerosarequi iroamereni Jesoshi. Iponeanaja toncaariqui opajitana Orivomashi. Oquempjeitaro Jerosare, te arejiteji.

¹³ Ari yareejeitapaaja, yatajeitapaaji oshitamencotanta jenoqui. Anta imaapinijeitinta yora Petero, jeri Joa, Santiaco, Antirishi, Jeripi, Tomashi, Varitorome, Mateyo, Santiaco itomi Arijeo, Shimo yora Shintsitsatsiri. Aisati imaapinitinta Jorashi, yora itomi Santiaco, maaroni.

¹⁴ Ari yapatojeitaja aisati iquenquetsatacaajeitiri Tasorentsi. Itsipajeitari irirentipeeni Jesoshi, jero Maria irinironi, jero otsipapee tsinane. Aitaque icantani iquenquetsatacaapinijeitiri Tasorentsi.

Icoyeanacariri Matiashi poyeetajariri Jorashi.

¹⁵ Ari pashini quitaiteri yora Petero icatiimojeitanacari iyemisantaririntepee. Aamaaca carajeiti 120. Icanti:

¹⁶ —Noyemisantaririnte, moncarataca ocantiniri Sanquenarentsi. Peerani oametirini Ishire Tasorentsi Iravirini iquenquetsatacotantariniri Jorashini: yora jivajeitaqueriri aajeitaqueriri Jesoshi.

¹⁷ Aitaque acarajeiveitarini. Peerani itsipajeiveiteeni intacojeitantani, iro cantaincha

¹⁸ impoiji yaacantanirotaqueri Avincatsarite, ipinatashiyeevetacari quirequi. Yaave-tacari, impoiji yoipiajiniri, iriotaque quirequi yamanantanteetajarori quipatsi. Impoiji

irisati shiticajancha, shiti; itsatanaca. Impoiiji ipesacotanaque, peti; iquenaitaque tirin; ipitiancapaaca; irosati itsirajantapaaca imotijaqui, tsira, osoquijanaque iramporetsa.

¹⁹ Iojeitaqueri maaroni jerosaresati. Irootaque ipajitanteetarori quipatsi yamanantee-tiri Asererama. Acantiri aneanequi arori: “Ivinaroni Jesoshi yoanteevetacariniri”.

²⁰ Aitaque isanquenayeetironi peerani pampoyeantsi cantatsiri: “Oncaarapancoite-tanaque ivanconi aacanterineri Avincatsarite, eiro itimajitsi timantitajearine”. Aisati ocantini pampoyeantsi: “Ocameetsati intimaje poyeetajearineri quenquetsatacantajantsineri”.

²¹⁻²² Tsame meeca ancantieri itsipa: “Pimpoyeetajeari Jorashini”: tempa irootaque icooaqaqueeri Tasorentsi. Iriotaque ancantieri tsipatitapinijeiteniri peerani: neasantotiriri Joani ivaotisantantini, aisati neapinitiriri Jesoshi. Acoaque neaqueriri itinaanaja aisati ijatanaji jenoqui: ancantieri incarajeitee anquenquetsatacojeiteri Jesoshi. ¿Janicampa meeca ancantieri?

²³ Ari icanti itsipa:

—Iriorica yoca Jose Varasavashi, ipajiyeetiri aisati Joshito. Terica, iriorica yoca Matiashica.

Ari icajemiri apite:

—Caate aca nianqui.

²⁴ Impoiiji iquenquetsatacairi Tasorentsi, icantieri:

—Novincatsarite, aviro avinti iotirori jaoca icantajeitari maaroni atiri. Jeri yoca apite. Piotacayenari janicarica picoasanotaqueri avinti

²⁵ poyeetajearine Jorashini. Tecatsi incantea meeca iriori inquenquetsataje aisati irintacotantaje: tempa camaque ini, janirotaque anta Sharincaveniqui.

²⁶ Impoiiji ipishoncajeitiro mapijaniqui iriotanteari janicarica icooaqaqueeri Tasorentsi, irio icoyeaque Matiashi. Ari icaraveita itiancane Jesoshi 11. Meeca icarajeitajiri aisati Matiashi.

2

Quitaiteri ipajiyeetiri: “Pentecoshiteshi”.

¹ Ari omoncaratapaaja meeca quitaiteri ipajiyeetiri: “Pentecoshiteshi”. Ari yapatojeitaca Jerosarequi quemisantajeitatsiri.

² Omapocashitapaacari, iquemavaquero shiavetarori tampea antearo, oneapaaque, sooo. Oponeanaca jenoqui, otsoteapaaquero pancotsi isavicajeitantari.

³ Aisati oconijatimotashitapaacari shiavetacarori paamari, ovaraapaaca; opomencajeitapaquera iitopeequi maaroni savicajeitaintsiri, pomein.

⁴ Otimantashirejitapaacari Ishire Tasorentsi. Irosati ineanatantanacaro otsipapee neantsipee, imajeitaquero ora oneaveetacaaqueriri Ishire Tasorentsi.

⁵ Ari isaviqui anta Jerosarequi joriopee, quemisantasanotatsiri, iponeayetaca pashinipeequi quipatsi, jaocaricapee.

⁶ Iquemantajeitavacariri ineanajeitanaque, irosati yapatojeitantaca oshequi atiri. Iquemajeitapaquero irineanesanori. Te iriotacotapeeriji.

⁷ Yoajeitapaaque cavaco, iquenqueshireajeitapaaca, isampitavacaajeitapaaca:

—Tempa carireasati inajeiveta yoca neaveetaintsirica.

⁸ ¿Jaoca icantacari iquemantajeitajarori maaroni aneanepee?

⁹ Meeca acarajeitaqueri paratosati, merosati, eramitasati. Jeri savicatsiri Mesopotami-aqui, Joreaqui, Caparoshiaqui, Pontoqui, Ashiaqui,

¹⁰ Jirijiaqui, Pampiriaqui, Ejipitoqui. Aisati acarajeitaqueri poneayetainchari otsapitapaaca Iriviaqui anta oquempejitapai Shirene. Jeri aisati acarajeitaqueri quivantatsiri poneayetachari Oromaqui.

¹¹ Acarajeitaqueri joriosanotatsiri aisati peajanchari jorio. Acarajeitiri queretasati aisati aravesati. Iro cantaincha aquemajeitakueri ineanajeitantaro aneanesanoripee. Iquenquetsatacotiri Tasorentsi, jaoca icanta itasoncantayeti.

¹² Ari yoajeitanaque atiripee cavaco, te iriotacoteriji. Isampitavacaajeitanaca:

—¿Paitaquea iquemantarori aneane?

¹³ Irinti pashini, ishirontimentajeitanacari, icanti:

—Ishinqueijeitaca yonta, iji, iji, iji.

¹⁴ Ari ainiro anta iriori Petero, icarajeitiri itsipapee itiancane Jesoshi. Quimojenca icamantaqueri:

—Nojoriorinte: maaroni aviro savicajeitatsiri aca Jerosarequi, piojeitavaquero oca noncamantempiri, pinquemisantajeitavaquena.

¹⁵ Pijitashijeivetacari ishinquijeitaca yocapee. Ja, te irishinquijeiteaji. Tempa ash-inquitapinijeita tsiteniriqui, iro cantaincha oquitaitetamani meeca, tequera irijeno-quitapeeji catsirincaiteri. Tequera omoncarateaji ishinquitapiniyeeta,

¹⁶ irointi oca piquemaqueri icamantacotiri camantantaveitachaniri peerani Joirini:

¹⁷ "Icanti Tasorensi: 'Coajica irineajeitero maaroni atiri nontianqueneri Noshire. Inca-mantantayete itomipee, irishintopee. Yora evancaripee irioshoretashitearo paitapeerica. Aisati irimishiveetashitea anteashiparipee.

¹⁸ Jeri quemisantajeitenane: shiramparipee, tsinaneppee, nontiancajeiteneri Noshire, inquenquetsacotantenari.

¹⁹ Ari nomatero coajica caari pineapiniti inquitequinta jenoqui, aisati aca quipatsiqui: poajeitanaquero cavaco. Aitaque pineajeitero coajica irirajani camajeitatsineri, aisati pineavaquero ontaajeitanaquea pancotsipee: oshequi oncatchajencatanaque.

²⁰ Irijivate intsivacanaque catsirincaiteri; aisati yora cashiri, inquitoncatanaque, irishi-anaquero irajantsi. Impoijiquea omoncaratapaquea quitaiteiri irareetantapaajeari Avin-catsarite. Oshequi irimatapaque, iriotacojeitaqueri maaroni atiri.

²¹ Iroavisacojeitea maaroni aventajeitearine". Irootaque isanquenatiniri Joirini.

²² Aisati icanti Petero:

—Noshaninca. Pinquemisantavaquero oca noncamantempiri, nonquenquetsacoteri Jesoshi, yora nasaretasatani. Itasoncantayeti, imayetaquero caari aneapiniti. Aisati imayetaquero paitapeerica, ayotantariri itasorensitasanotaque. Tempa pineapinijeita-queri avirori, piotitacari. Tempa irio Tasorensi matacaqueriri.

²³ Peerani aitaque iotacotitarini, icantitani: "Aitaque oncantere, impimanteeteri yora Jesoshi". Irio caari cameetsatatsi oaqueriri, iro cantaincha pipajacotacantajeitaqueri avirori, poamaacantajeitaqueri.

²⁴ Ari oshequi iqumatsicayetacaro, icamanaque, torein. Iro cantaincha yoitinaajiri Tasorensi, te incoacayeriji incamasanote.

²⁵ Tempa isanquenatitacaroni peerani Iravirini irineane Jesoshi: "Niotaque quiso yoaquena Novincatsarite, isavicaque nacosanoriqui yamitacotapinitantanari, caari noashiretanta.

²⁶⁻²⁷ Oshequi noquimoshireventaqueri, otimantari nocantantariri: 'Apa, oshequi noveshireaca. Niotaque eiro pojocanatsi anta ishaaviji. Aisati eiro pishinetanatsi nom-patsaye, tempa pineacameetsatana. Niotaque pimataquenaro oca picantaquenari.

²⁸ Piotacaquenaro noncanteani naneasanotanaje, quiso avavacayea, noncanteani novshireimentanaquempiri". Irootaque irineane Jesoshi isanquenatiniri Iravirini.

²⁹ Ari yovaajiro aisati Petero:

—Meeca, noshaninca, noncamantasanotempi. Icamaque intacantaqueeri Iravirini, itijaca. Timatsiquera meeca itijacanta.

³⁰ Camantantatsiniri inaveitani. Iotasannotironi icantitariniri Tasorensi: "Queariotaque oca noncamantasanotempiri, eiro namatavitimpitsi. Coajica impincatsariventante pis-hanincasanori, poyetajempineri".

³¹ Pineaquero, tequeratsitani intinaajeji Quirishito, iro cantaincha iotacotitacaroni Iravirini. Tempa isanquenatini: "Incante Quirishito: 'Apa, niotaque eiro pojocanatsi anta ishaaviji, aisati eiro pishinetanatsi nompatsaye'".

³² Iriotaque Jesoshi yoitinaajiri Tasorensi. Aitaque noneajeitaqueri narori, meeca nocamantasanotaquempiro.

³³ Impoiji yoancajiri anta iracosanoriqui, icaratantapaajariri ipincatsariventanti. Irosati quiso oantacariri Jesoshi Ishire Tasorensi, ora icashiacaqueriri Iriri. Meecaquea, itiancajeitaquenaro narori aca: irootaque pineantajeitaquenari aisati piquemajeitanta-quenari.

³⁴ Pamene, te irio quenquetsacotajanchane irisati Iravirini peerani, irintiquea iquen-quetsacotiri Quirishito. Te irovajenocajeaji irinti Iravirini jenoqui, irintiquea Quirishito. Tempa isanquenatitani peerani: "Tempa irio Tasorensi cantiriri Avincatsarite Quirishito: 'Pisavicapee aca nacosanoriqui, pincaraterna ampincatsariventante

³⁵ irosati impincatsajeitantempiri maaroni quisajeivetimpiri'".

³⁶ Aisati icantajeitiri Petero:

—Tempa arojeitaque ishanincani Ishiraerini. Cameetsa iriotasanojeitero ashaninca-jei oca nocantaquempiri: pipajacotacantavetacari Jesoshi, iro cantaincha yoitinaajiri Tasorensi, ipeavajiri aisati Pincatsari, irisati Quirishito.

³⁷ Iquemantajeitavacarori oca, oshequi iquenqueshiretasanojeitanaca. Isampijeitiri Petero:

—Noshaninca, ¿jaoca noncantajeiteari?

Yacanaqueri:

³⁸ —Pinquenqueshireajea, eiro piquempetajatsi peerani. Paventajeitajeari Jesoquirishito aisati pivaotisamentajeitajeari, incavintsaajeitantempiri Tasorentsi, eiro iquenqueshireacotajimpirotsi aisati caari cameetsatatsi pantajeiveitaniri. Irootaque quiso oajeitantempiri aisati Ishire intianquempiri.

³⁹ Irootaque icashiacaajeitaquempiri avirori; aisati icashiacaajeitaqueri iriori pishanincatajeari coajicani, jeri aisati maaroni arejipeequiniri iriori. Irootaque icashiacaajeitaqueeri maaroni; irootaque icoacaajeitaqueeri Avincatsarite, ariorica anquemisanteri.

⁴⁰ Oshequi pashini icamantanojeitiriri, icoaque inquemisantacayeri. Jero oca icantiqueriri aisati:

—Poavisacojeitea. Pishiajeitaricari timajeitatsiri meeca: yora caari cameetsajeitatsi.

⁴¹ Ivaotisajeitaca maaroni quemisantajeitaquerori irineane, aamaaca icarajeitaque 3,000.

⁴² Icantatiani iquemisantapinijeitiro oca yoamejeitiriri. Icantatiani cameetsa iquempavacaajeitaca: itsipatavacaajeitaca icarajapinijeitiro tanta, iquenqueshirejeitancariri yora camimentajeiteeri, aisati iquenquetsatacapinijeitiro Tasorentsi.

⁴³ Yora quemisantatsiri imatapinitaqueneri atiripee caari ineapinijeiti, aisati imayetaquero paitarica iotantacariri queario itsipatari Tasorentsi. Yoajeitanaqueri cavaco maaroni.

⁴⁴ Ari iquempavacaajeitaca quemisantajeitatsiri. Te irimashitsajeiteji, irointi ipavaacapinijeita timimojeitiriri, paitaricapee.

⁴⁵ Ipimantajeitiro irovaararo, iipatsite aisati. Ipaarantajeitiri maaroni ishaninca coiteimojeitariri.

⁴⁶ Maaroni quitaiteeri ijatapinijeiti anta ivancoqui Tasorentsi. Aisati icarajajeitaquero tanta ivancopееqui iriori, iquenqueshireantariri camimentajeitaqueeri. Ariorica yojajeita, iquimoshiretasanojeiti, aisati cameetsa ipashitavacaajeitaca.

⁴⁷ Icantajeiti:

—Cameetsa ini Tasorentsi.

Jeri yora maaroni timajeitatsiri ineacameetsajeitaqueri quemisantatsiri. Icantatiani maaroni quitaiteeri iquemiantaque pashini atiri, yoshequicaasanojeitaqueri Avincatsarite.

3

Icamantanti Petero anta ivancoqui Tasorentsi.

¹ Pashini quitaiteeri, jenoquiquera catsirincaiteeri, irotaintsi omoncaratea iquenquetsatacaantapinariri jorio Tasorentsi. Itoncaanaque Petero, jeri Joa anta ivancoqui Tasorentsi.

² Ainiro isavicaque anta aparoni shirampari, choriveetatsiri iitiqui. Aitaque icantitapaa peerani, iroaquera itimapaaque. Ari maaroni quitaiteeri yameetapinitiri omoroqui pancotsi ipajiyeeitiri: “Cameetsari omoro”. Aitaque yoyeetapinitiriri omoroqui iramananteariri iirequite queayetsiri.

³ Yora Petero, jeri Joa irovetaingha inqueajeitapeeme pancotsiqui, iro cantaincha inevaqueri, icantavetavacari:

—Pincavintsayena noshaninca, pimpena quirequi.

⁴ Ari yamenapaaqueri Petero, icantiri:

—Pamenenate.

⁵ Yamenasanovetavacari, ijitashivetaca ari impaquerime paitarica.

⁶ Iro cantaincha icantanaqueri:

—Tecatsi noirequite, iro cantaincha nocoaque noncavintsayempi. Noncanteri Jesoquirishito, yora nasaretasati iraniitacaajempi irinti, paniitantajeari.

⁷ Yajiricaqueri iracosanoriqui, yoatiaqueri. Intsipaita yavisacotaji, ishintsitanaji iitiqui.

⁸ Ishintsiti icatianaja, cati. Icatiasanotanaja, yaniitanaji. Itsipatanacari, iqueanaque pancotsiqui. Isapocasapocatanaque, icantanaque:

—Cameetsa ini Tasorentsi.

⁹ Ineajeitavaqueri maaroni atiri: yaniitanaji. Iquemajeitavaqueri icantanaji:

—Cameetsa ini Tasorentsi.

¹⁰ Ari iojeitavaqueri, iriotaque yoca savicaveitachaniri omoroqui, amanantaveitachaniri quirequi. Ineajeitavaqueri yavisacotaji, irootaque yoajeitantanacariri cavaco. Te iriotacoteriji.

¹¹ Ari yajiricasanotajiri Petero, jeri Joa. Inajeitaque anta yapatotapinijeitanta: irio Saromo vetsicacantironiri peerani pancotsi. Irosati ishishitantapaacari maaroni atiri, yoajeitanaqueri cavaco.

¹² Inevaqueri Petero, icantavaqueri ijorioririnte:

—Noshaninca, ¿paita poajeitantanacari cavaco? ¿Paita pamenantajeitanari, sorerere? Eiro pijitashitanatsi naro Tasorentsi naniitacantajariri yoca choriveitachaniri. Eiro aisati pijitanatsi noquemisantasanoti nomatantajariri.

¹³⁻¹⁴ Irinti Tasorentsi oavisacotajiriri. Peerani iquemisantaveitarini Avarama, Isaca, Jacovo, jeri aisati maaroni intacaroniniri. Ocameetsati pinquempjeiteari iriorini, pinquemisantajeiteri Tasorentsi. Iriotaque neacameetsantanotiriri Jesoshi, icanti: “Pineaqueri, icameetsatasanoti Notomi, yantaquenaro maaroni nocoacaaqueriri”. Queario icameetsasanoti Jesoshi, catsini. Iriotaque paacantaqueri. Iro iroimpacaajerime Pirato, aiqvero picantacoventatiiri: “Te noncoyeji poimpacaajeri”, irinti picoaqueri yoipacajimpiri oantatsiri.

¹⁵ Poacantaqueri oaneajeitiriri atiri. Icamavetapainta, impoiiji yoitinaajiri Tasorentsi. Aisatitapaaji, noneajeitajiri.

¹⁶ Jeri yoca shirampari: iquemacotantavacariri Jesoshi, iquemisantaque, irootaque yavisacotantajari. Jerica pineaqueri. Tempa piojeitiri. Ari iquemisantaque, irootaque itecatsitantajari. Pineaqueri meeca yaniitanaji.

Aisati icantajeitiri Petero:

¹⁷ —Ari noshaninca, meeca niotaque te piojeiveiteani avinti. Aisati iquempeta avincatsaritepee, te iriojeiveiteani.

¹⁸ Imataquero Tasorentsi oca icantitaniri peerani: “Coajica oshequi inquematsicataro Quirishito, incamentajeiteri atiri iroavisacotantajariri”. Tempa iquenquetsacotitarini Quirishito maaroni yora camantantatsiniri.

¹⁹ Pinquengheshirejaitanaque, eiro piquempjeitajatsi peerani, irointiquea pinquemisantajeite; impoiiji incavintsayempi Tasorentsi: iroameetsajeitempi, eiro iquengheshireacotajimpirotsi aisati caari cameetsatatsi pantaveitaniri. Irosati intspajeitan-tempiri Avincatsarite, iriveshireacaaajeitempi.

²⁰ Aisati intianquempiri Jesoshi, yora Quirishitotatsiri. Tempa peerani icamantasano-taquempini.

²¹ Incantaitatiyempani intimapaaje anta jenoqui, irosati iroameetsatantayetaquearori maaroni, paitapeerica. Tempa irootaque icantiniri peerani yora camantantatsiniri, yora yoameetsajeitiri Tasorentsi: iriotaque neanatacaajeitiriniri maaroni.

²² Icantini Moishishi: “Yora Avincatsarite Tasorentsi intianquempiri camantajempineri, inquempetajena narori itiancaquena. Avirotaque irishanincatajeari. Paitarica incaman-tempiri, pinquemisantavaqueri.

²³ Irinti maaroni caari quemisantiri iriori, eiro quiso yoiritsi ishaninca, irointiquea intsoncajeitajeri”.

²⁴ Iquenquetsacotitaroni peerani maaroni camantantajeitatsiniri oca pineayetaqueri meeca. Jeri yora Samoiriniri, intacaroniniri, jeri aisati maaroni impoijeitiriri. Iquenquetsacojeitiro, maaroni.

²⁵ Aitaque ashanincajeitacari yora camantantatsiniri. Peerani icantirini Tasorentsi Avarama: “Coajica iriveshireimentajeiteari maaroni atiri pishanincani: yora Quirishito pocatsineri”. Moncaratata icantaqueriniri. Ocameetsati meeca piveshireimentajeiteari.

²⁶ Itiancaqueri aroriqui, ijivajeitaquee yoamejeitaquee. Ainiro pantajeitiro caari cameetsatatsi, iro cantaincha ipocashjeitimpi iroavisacojeitempi eiro pashinoncanta; icoaque iroveshireacaaajeitempi.

4

Yora oametavacainchari, yapatotashijeitacari quemisantatsiri.

¹ Irosatiquera iquenquetsatacairi Petero ishaninca, ari ipocapaque saserotepee. Jeri aisati jivatacairiri atiri anta ivancoqui Tasorentsi. Jeri saroseopee.

² Icantashirejaitanaque, icantavacaanaca:

—Paitateemi yoametantariri atiri. Jero icamantaqueriri: “Intinaye camajeitatsiri: tempa itinaaja Jesoshi”. Te oncameetsateji oca yoamejeitiriri.

³ Ari ishaaviniji catsirincateri, irosati yaantacari, tapi. Yajeitanaqueri, yoiminqueajeitapaqueri, ari iquitaitacojeitaque.

⁴ Iro cantaincha iquemisantaque oshequi quemajeitavaqueriri Petero, aamaaca icarajeiti 5,000 shirampari, quemisantajeitaintsiri.

⁵ Oquitaitetamanaji yapatojeitaja aisati anta Jerosarequi pincatsaritatsiri, savicacantantatsiri, oametantirori sanquenarentsi.

⁶ Icarajeitiri Anashi, yora ivincatsarite saserote. Aisati yapatotiri Caijashi, Joa, Arijan-tero, jeri maaroni ishaninca ivincatsarite saserote.

⁷ Ari icajemacantaqueri quemisantatsiri, isatecaqueri nianqui, isampjeitaqueri:

—¿Janica matacaaquempirori oca? ¿Janicampa cantaquempiri?

⁸ Ari oametaqueri Ishire Tasorentsi Petero, omatacaasanotaqueri. Iquenquetsatacaajeitaqueri apatotimentajeitariri:

⁹⁻¹⁰ —¿Iriompa pisampitacoventiri yora choriveitachaniri ineshinocatiri Tasorentsi? Pineaqueri, avisacotanaji ini. ¿Picoaquempa piote jaoca icantacari yavisacotantajari? Pinquemajeitavaquero oca. Aisati ocameetsati iriojeitavaquero maaroni ashanincapee. Iriotaque Jesoquirishito, yora nasaretasati, oavisacotajiriri. Pipajacotacantavetacari, iro cantaincha yoitinaajiri Tasorentsi.

¹¹ Iriotaque Jesoshi shiacantachari mapitatsiri itseencaqueri vetsicavetarori pancotsi: iro cantaincha ipeaqueri Tasorentsi itincamitantarori. Avirojeitaque avinti shiaqueriri vetsicavetarori: pitsencaqueri Jesoshi.

¹² Iro cantaincha te intimeji pashini oavisacotantatsineri: te intimeji aca quipatsiqui pashini oavisacojeiteeneri: apaniro Jesoshi.

¹³ Ari yoajeitanaqueri cavaco yora pincatsaripee, icanti:

—Pineajeitaqueri, te intsaroajeitanaqueji iriori. ¿Paita caari itsaroacantajeitee? Aisati te intsoteavetearoji sanquenarentsi, te irishitoriotasanovetearoji, iro cantaincha oshequi ioti. ¿Paitaquea iotacairiri? ¿Iriompa oametiriri Jesoshi, yora quiso yoaveitaniri?

¹⁴ Ari inajeitaqueri itsipatacari yora yoavisacoyeetajiri. Tecatsi incantea incanti-menteri.

¹⁵ Ari itiancajiri:

—Pisoquijajeitanaje anta; ari coajica noncajemajempi aisati.

Ari isoquijajeitanaji. Impoiji icantavacaajeitanaca iriori pincatsaripee:

¹⁶ —¿Jaoca ancantiriri yonta? Iojeitanaqueri maaroni jerosaresati itasoncaventaqueri yora choriveitachaniri. Tecatsi ancante: “Te irimateroji”.

¹⁷ Te oncameetsateji inquenquetsatacaajeitajeri pashini atiri. Tsame ancantasanoterita: “Eiroyea meeca piquenquetsatacotajiritsi yora Jesoshi”.

¹⁸ Ari yapiitajiri, icajemajiri. Icantasanotiri:

—Eiroyea meeca piquenquetsatacotajiritsi Jesoshi. Eiroyea picamantacotajiritsi.

¹⁹ Yacanaqueri:

—Tempa inaejeitee Tasorentsi. Pincamantasanotenate: ¿cameetsampa nonquemisan-tempi? Tempa irio Tasorentsi nonquemisanteri.

²⁰ Tecatsi noncantea meeca nojocajero noquenquetsatacotiro oca noneasanotaqueri, aisati oca noquemasanotaqueri.

²¹ Ari yapiitajiri aisati icantasanovetajari, irosati itiancantajari. Tecatsi irante impasatimenteriri. Ineajeitavetacari atiri oca imataqueri, icantapinijeitanaque: “Cameetsa ini Tasorentsi, oshequi imatacaajeitaqueri quemisantatsiri”, irootaque caari ipasatantari.

²² Peerani imoncarataquero 40 irosarintsite choriveitachaniri. Ari oshequi iquenqueshirejeitaquero atiri yoavisacotiri Jesoshi, iojeitancari itasorentsitaque.

²³ Ari yoimpacaaajeitajiri pincatsaripee, impoiji ijajeitanaji quemisantatsiri ishanincaqui. Icamantapaaqueri oca icantavetacari yora cantavetacari.

²⁴ Iquemantavacarori oca, iquenquetsatacaajeitaqueri Tasorentsi. Antearojenca icanti:

—Novincatsarite. Aviro vetsiquirori inquite, quipatsi, incajare, maaroni; aisati povetsi-cajeitaqueri maaroni timantajeitarori.

²⁵ Aisati peerani poametaquerini noshanincani Iravirini, yora quemisantimpiri. Oametaqueri pishire, isanquenatantarori oca: “¿Paita itseencajeitancari yora pashinisatipee atiri? ¿Paita iquenqueshiretashitantarori caari cameetsayetatsi?”

²⁶ Yora ivincatsaritepee iraimanajeiveteari Pincatsarisanori, aisati yora Quirishitotatsiri; incoajeivetea intsoncajeiterime”.

²⁷ Aca nampitsiquica yapatojeitaca yaimanajeivetacari pitomi Jesoshi, yora pineacameetsatiri. Tempa pipeaqueri Quirishitotasanotatsiri. Icarajeiti aimanajeitantachari Eroreshi, Pontsio Pirato, joriopee, pashinisatipee atiri, maaroni.

²⁸ Peerani piotitani, picantitani: “Aitaque oncanteari”. Ari meeca imataquero yocapee.

²⁹ Meeca, Novincatsarite, piotaquero oca icantasanovetaquena: “Eiro piquenquetsatacotajiritsi Jesoshi”. Tempa narotaque quemisantimpiri. Pimatacaasanotena eiro not-saroantatsi nonquenquetsatanotero pineane.

³⁰ Pintasoncaventante, poavisacotanteariri mantsiaripee; pimatapinitero caari inep-inijeiti, piotacajeiteri atiri queario iriotaque Jesoshi pitomi, aisati pineacameetsatiri.

³¹ Aitaque icantajeitiriri Tasorentsi. Impoiji onicanaca pancotsi isavicajeitantari. Otasoncaventajeitapaqueri Ishire Tasorentsi, irosati cameetsa iquenquetsatantarori irineane Tasorentsi, te intsaroimateji.

Yaacameetsatavacaajeitaca yora quemisantatsiri.

³² Oshequi icarati meeca quemisantatsiri, cameetsa isavicajeitaque, aisati imoncar-
atavacaajeitaca: paitarica icoajeitiri aisati paitarica iquenqushirejeitiri. Te irimashit-
sajeiteji, irointi ipavacaajeitacaro maaroni coiteimojeitariri.

³³ Jeri iroamereni Jesoshi, icamantapinitiri atiripee:

—Itinaasanotaja Avincatsarite Jesoshi.

Aisati icantajeiti atiripee:

—Tempa icameetsajeiti quemisantajeitsiri.

³⁴⁻³⁵ Yora maaroni ashiyetachari iipatsite aisati ivanco, ipimantajeitiro. Oca opinayetari,
yamajeitaqueneri iroamereni Jesoshi, ipapaaqueri. Irosati ipaarantaqueriri itsipapee
iriori coiteimotariri, caari yashinoncaajeitanta quemisantajeitatsiri.

³⁶ Icarajeitiri quemisantatsiri ishanincani Irevi, pajitachari Jose. Pashini ipajitiri yora
itianqueetiri: Verenave. Ocanti ivajiro aneanequi arori: “Veshireacaantachari”. Iriotaque
poneachari Tsipirequi.

³⁷ Yashivetaro quipatsi, impoiiji ipimantiro. Yaanaque ovinaro, ari ipapaaqueri yora
iroamereni Jesoshi.

5

¹ Iro cantaincha itimi pashini shirampari pajitachari Ananiashi, iro ijina Sajira. Ipiman-
tiro iipatsite,

² yaarantavaji ovinaro nianqui. Irointi cashetani aisati yaanaque, ipapaaqueri
iroamereni Jesoshi. Icantapairi:

—Jeri yoca quirequi, iriotaque maaroni ovinaro noipatsiteni nopimantaqueri.

Iotaque aisati ijina iroori iramataviterime.

³ Iro cantaincha icantavaqueri Petero:

—Ananiashi, tempa paarantavaji ovinaro piipatsite. Yoametaquempi Satanashi, picoan-
tavetacari pamataviterome Ishire Tasorentsi.

⁴ Tempa iro piipatsiteni onaveitani, tempa iriotaque pashi ovinaro. Ocameetsati
pinquempoyeri ovinaro. ¿Paita picantanirotantari: “Jeri yoca maaroni ovinaro noipat-
siteni”? Pamatavivetaquena narori, iro cantaincha tecatsi pincerteri pamataviteri irinti
Tasorentsi.

⁵ Iquemantavacariri Ananiashi, irosati itaantanaca, poron. Icamanaque, toren. It-
saroasanojeitanaque catsini maaroni neajeitaqueriri.

⁶ Impoiiji yovetsicajeitaqueri evancaripee itijeri, yaanaqueri, itijiri.

⁷ Osamanitapainti capichaji, ari oqueapaaque ijinani iroori. Te ioteji camaque ojimeni.

⁸ Icantavaquero Petero:

—¿Pipaquenarimpa maaroni quirequi, ora ovinaro piipatsiteni pipimantaqueri?

Ari acanaqueri:

—Je, nopaquempiri maaroni.

⁹ Irosati icantantacaro iroori:

—¿Paita piquempetantariri pijimeni, pamataviterome Ishire Avincatsarite? Jeritapaaji
tijaitiriri pijimeni: irisati aanaquempine avirori.

¹⁰ Irosati oteimotantanacari, ocamanaque. Iqueapaaji yora evancari, ineapaaquero,
camaque. Ari yaanaquero, itijaitiro iroori, itsipatajantiro ojimeni.

¹¹ Ari itsaroajeitanaque maaroni yora quemisantajeitatsiri, aisati itsaroajeitanaque
maaroni quemacojeitaqueriri.

Yora oametavacainchari, iquishimatiri iroamereni Jesoshi.

¹² Oshequi itasoncaventanti yora iroamereni Jesoshi. Oshequi imayetaqueneri atiri,
irosati yoantajeitanacari cavaco. Ari yapatojeitaca anta pancotsiqui yovetsicacantirini
Saromoni.

¹³ Oshequi ipincatsajeitaqueri atiripee, irootaque itsaroacantajeitacariri intsipajeita-
jearime. Iro cantaincha icantajeiti atiripee:

—Icameetsatasanojeiti quemisantajeitiriri Jesoshi.

¹⁴ Aiquero ijatatii yoshequiasanotanaque quemisantiriri Avincatsarite. Oshequi icara-
jeiti shirampari, jero tsinane.

¹⁵ Yoapiniyetaqueri atiri mantsiaripee anta avotsiqui: yoiponaayetiri shitashintsiqui,
oncanteata ariorica iravisanaque Petero, intsimancayetanaqueri iravisacotantajeiri.

¹⁶ Aisati yapatotashitaca oshequi atiri, poneayetachari nampitsipeequi anta otsapiyeta-
paa Jerosare. Yamayetaqueneri mantsiaripee, jeri aisati neiriri camaari. Yoavisacojeitajiri
maaroni.

¹⁷ Ari ocantimoneentanacari ivincatsarite saserote, jeri itsipapee: iriojeitaque saroseo-
tatsiri.

¹⁸ Ari yaacantaqueri yora iroamereni Jesoshi, yoiminqeacantavetacari caravosoqui.

¹⁹ Iro cantaincha yanaincaque inampire Avincatsarite, yashitareapaajiniri ashitacorontsi, yaanajiri saiteriqui. Icantiri:

²⁰ –Pijataje anta ivancoqui Tasorentsi, pincatiapaaje. Pincamantasanojeiteri atiri jaoca incantajeari intimantajeari inquitequi, incantaitatiyempani.

²¹ Yacanaqueri:

–Je, ari noncamantajeitaqueri.

Ari iroaquera oquitaitetamani ijatanaque ivancoqui Tasorentsi, yoametantapaaji.

Jeri ivincatsarite saserote, itsipajeitacari ishanincapee anta pashiniqui pancotsi. Yapa-tojeitiri oametavacainchari: yora ivincatsaritepee jorio. Ari icantiri variria:

–Pijajeite anta poiminqeiquerinta oshaiteji quemisantiriri Jesoshi, pamajeitenari.

²² Ari ijatashivetari, te irineapaajeriji. Irosati ipiantaja, icantapaqueri:

²³ –Te aneajeriji. Noneapaaquero pancotsi, ashitasanovetaca ashitacorontsi, oyavivetaca. Ainiro icatiavetaca shentavetarori omorope. Iro cantaincha nashitareavetapaacaro omoro, noquea vetapaaca; tecatsi noneapaaje tsoompoina.

²⁴ Iquemantavacariri, icantavacaanaca:

–¿Jaocaquea meeca iquenanjiri?

–Jaocateemi.

–¿Jaocaqueame ancanteriri?

²⁵ Irosati yareetantapaacari aparo camantapaqueriri, icantapairi:

–Yora shirampari poiminqeacantavetacari, catiajeitapaaja anta ivancoqui Tasorentsi. Yoamejeitapaajiri atiri.

²⁶ Irosati ijatashitantajariri capitano, yaajeitanaqueri variripee, iro cantaincha itsarocaacari ashanincapee; icanti:

–Iquisacoventaricari atiripee quemisantatsiri, ipitsecari.

Irootaque cameetsa yaantanacariri, te inquisanatanacheriji.

²⁷ Ari yaanaqueri, yoatiapaqueri anta itiminta oametavacainchari. Icantavaqueri ivincatsarite saserote:

²⁸ –¿Paita piquenquetsacantajariri aisati atiri? Tempa nocantasanovetimpi: “Eiro picamantacotajiritsi Jesoshi”. Meeca aiqero poamejeitatiiri maaroni jerosaresati. Jero oca picantacotaquena: “Irio saserotepee oacantaqueriri Jesoshi”. Te oncameetsateji picantajeitaqueri. Pimajerejeite, eiro picamantantajitsi aisati.

²⁹ Yacanaqueri Petero:

–Eiro noquemisantiritsi atiri, irintiquea nonquemisantanoteri Tasorentsi.

³⁰ Queario avirojeitaque oacantaqueriri Jesoshi. Pipajacotacantaqueri coroshiqui. Irinti oitinaajiriri Tasorentsi, yora iquemisantiniri ashanincani peerani.

³¹ Yoancajiri anta iracosanoriqui. Ipeajiri Jivatacaajeitaqueeri, aisati Oavisacojeitaqueeri. Icoacaajeitaqueeri ajorioririnte inquenqueshirejitanaquea, impoiji incavintsaajeit-eri, eiro iquenqueshiretajirotsi aisati caari cameetsatatsi yantajeitaqueeri.

³² Aitaque noneasanotaquero yantayetaqueri Jesoshi, aisati niotaque quiso oajeitiri Ishire Tasorentsi maaroni quemisantajeitiriri. Irootaque noquenquetsatacapinitiriri atiri. Tecatsi noncantea nomajerete.

Impoiji icantajeiti itsipapee iroamereni Jesoshi:

–Queario oca icantiri Petero.

³³ Ari iquemantajeitavacariri, iquisajeitanaqueri, icoajeivetanaca iroyerime.

³⁴ Ari icatianaca ishaninca pajitachari Camariyeri. Variseo ini, irisati oametantirori sanquenarentsi. Maaroni inecameetsajeitiri atiri. Icantiri:

–Noshaninca, nocoaque irisoquijajeitanaque quemisantiriri Jesoshi, eiro iquemantaro noncantempiri. Impoijiquea impiaje aisati.

Ari itiancajeitaqueeri saiteriqui.

³⁵ Impoiji icantiri:

–Noshaninca. Quearioya, pantiricari quemisantiriri Jesoshi.

³⁶ Jeri itimaveitani peerani yora Teorashi, oshequi ishmetaqueni. Ari yapatotashivetacari oshequi iratiritepee, naamaaca icarajeiti 400. Yoyeetaqueri, impoiji injantareava-caajeitanaca oijajeivetariri. Ipeashijeitanaca, tecatsi anquemacotajeri aisati.

³⁷ Impoitiri aisati Jorashi, yora carireasati. Anta isanquenatacojeitanta, aisati ijivatana-queri aparopee atiri. Aisati iriori, yoyeetaqueri. Yovaraanaca oijajeivetariri, tecatsi aisati anquemacotajeri.

³⁸ Ari meeca noncamantempi, eiro pineashirenquiritsi yocapee, incanteata. Iriorica tianquiriri atiri iquenquetsati, tempa aisati impeajeitanajea iriori.

³⁹ Iriorica tianquiriri Tasorentsi, tecatsi pincanteri poimajerenter. Piquishimatiricari Tasorentsi.

⁴⁰ Ari onimojeitanaqueri iriori. Icajemajiri aisati, ipasanatacaantaqueri. Impoiji ican-tasanovetari:

–Eiro aisati piquenquetsatacotajiritsi Jesoshi.

Irosati itiancantajariri.

⁴¹ Ari ijajeitanaque, Iquimoshirejeitanaque, icantajeiti:

–Ineacameetsajeitee Jesoshi, irotaque ishinetaqueeri aneacatsimentajeitacari.

⁴² Maaroni quitaiteri yoametantapiniti anta ivancoqui Tasorensi, aisati pancotsipeequi. Icantani: yoametantapiniti, icamantantapiniti. Icantapinitiri ishaninca:

–Iriotaque Jesoshi yora Quirishitotsiri aamaajeitaniri peerani.

6

Icoyeaqueri intacotantachaneri.

¹ Yoshequiantacari quemisantatsiri, jeri iquisashireanaca yora iotirori quirieco. Icantavacaanaca:

–Maaroni quitaiteri, ariorica intacotanta, te irintacotearoji ashaninca arori: oca cama-jimentaaro. Apaniro intacotaro irointi iotirori evereo.

² Ari yora iroamereni Jesoshi yapatojeitaqueri maaroni quemisantatsiri. Icantiri:

–Te oncameetsateji nojocajero noquenquetsatapinitiro irineane Tasorensi, nompan-tayempirori poyeari.

³ Meeca, noshaninca, pincoyeanonlea 7 shirampari, yora pineacameetsatasanotiri. Pincoyeaqueri timatsiri iotantari, quemisantasanotirori Ishire Tasorensi. Noncanterita iriori irintacotantea.

⁴ Irompa nainti, apatiroti nonquenquetsatacoteri Tasorensi, aisati noncanteani non-quenquetsatero irineane.

⁵ Onimojeitacari oca icantaqueriri. Icoyeaqueri Ishiteva: quemisantincari ini, quemisantasanotirori Ishire Tasorensi. Icoyeaqueri Jeripi, Pirocoro, Nicanori, Timo, Parimenashi. Aisati icoyeaqueri Nicorashi, yora peajanchari jorio, poneachari Antioquiaqui.

⁶ Irosati yonijaantapaacari. Icantajeitiri Tasorensi: “Pamitacojeiteri yocapee irintacotantea”, aisati yajiricainataqueri iitoqui.

⁷ Oshequi icarati quemajeitaquerori irineane Tasorensi. Aiquero ijatatii yoshequiti quemisantatsiri anta Jerosarequi. Aisati oshequi catsini icarati saserote shiretararori oca aquemisantiri.

Yora Ishiteva, iriotaque icoyeane Tasorensi.

⁸ Catsini icameetsashiretaque Ishiteva. Oshequi itasoncacairi Tasorensi. Imatanoyetiniri atiri caari ineapinijeiti. Imataqueneri paitaperica iojeitantacari Tasorensi ini Jesoshi.

⁹ Ainiro yapatotapinijeitanta anta ivancoquinta Tasorensi atiri yora ipimanteevetari peerani, iro cantaincha yoipacajiri amanantavetariri. Aisati anta yapatotanta shirenesati, arejantiriasati, poneachari Shirishiaqui, Ashiaqui. Ijatashijeivetacari Ishiteva, iquisat-sajeivetacari aisati ipiatsajeivetacari.

¹⁰ Iro cantaincha oshequi ioti Ishiteva yoametanti, tecatsi incantajeiteri impiatsasano-jeiteari. Ainiro iotantari, cameetsa ineanati aisati, tempa oametaqueri Ishire Tasorensi.

¹¹ Ari oshequi iquisajeitaqueri yoranqui, icantiri pashini ishanincapee:

–Pamene, nocoaque pintseeyacoteari Ishiteva. Ariorica pimajeitero nocantaquempiri, nonpinatemp quirequi. Jero oca pincantacotashiteariri: “Noquemaqueri Ishiteva, itseenquimataqueri Moishishi. Aisati iquempetaqueri iriori Tasorensi, icantimataqueri”.

Icantiri:

–Ari, noncamantajeiteri ashanincapee.

¹² Iquemantacariri atiripee, iquisajeitanaca: savicacantantsiri, oametantirori san-quenarentsi, maaroni. Jentsipaite ijatashijeitaqueri Ishiteva, yaapaintiri, tapi; yaajeitana-queri anta yoametavacaapinijeitanta pincatsaripee.

¹³ Yaanajiri aisati iriori yora tseeyachari, icantanirotapaaqueri:

–Aitaque icantani Ishiteva, icantapiniti: “Te oncameetsateji ivanco Tasorensi”. Aisati iquempetiro isanquenare Moishishi, itseenpinitiro.

¹⁴ Noquemaqueri, icanti: “Yora Jesoshi, nasaretasati, intireajero oca pancotsica. Impashinero oca ameyetacari, aisati impashiniyetajero yoameyetaqueeniri Moishishi”.

¹⁵ Yamenajeitaqueri maaroni savicajeitantsiri, sorerere. Ishipaqueavorotanaque Ishiteva, iquempetanacari inampire Tasorensi.

7

¹ Isampitiri ivincatsarite saserote:

—¿Queariompa oca icantaqueri?

²Yacanaqueri Ishiteva:

—Novincatsarite, pinquemisantajeitavaquena. Peerani isavicantaveitaniri anta Mesopotamiaqui intacantaqueeniri Avaramani, inijaapaacari Tasorentsi, yora cameetsatsiri.

³Ari icantapaqueri: “Pojocanajero piipatsiteca, pijate anta pashiniqui quipatsi ora nonijayempiri”.

⁴Irosati yojocantanajero iipatsite careasati, yovaanaja anta Jaraqui. Aitaque icamapaaqueri iriri, irosati yovaacaantajariri Tasorentsi aca aipatsitequica.

⁵Iro cantaincha, te imperiji iipatsite, te impimateriji capichaji irisavicanteari. Aisati tequerani intimeni itomi. Iro cantaincha icantitacari: “Intime pitomi, aisati nompempi piipatsite avirori. Aisati nompajeiteri maaroni impojeitempineri intimaje”.

⁶Aisati icantaqueri Tasorentsi: “Coajica intimaje poyeetajempineri iipatsitequi pashin- isati atiri. Peerani catsini iromperanatasanoteari, oncarate osarintsi 400 iroashinon- caasanoteri.

⁷Impoijiniquea noasanquetaqueri yora peranavetearineri. Irintiquea pishanincani, noimpiajeitajeri aca quipatsiquica, impoiji inquemisantaquena aca.

⁸Nocoaque meeca pintoyeantea iriotanteari atiri piquemisantaquena aisati pin- quenqueshiretantearori nocantaquempiri”. Ari impoiji itimanaque itomi, yora Isaca. Ocarataque quitaiteiri 8, irosati itoyeantacari. Itimaque itomi iriori Isaca, ipajitakeri Jacovo. Itomipee iriori Jacovo icarajeitaque 12. Tempa iriojeitaque intacantajeitaqueeri.

⁹Ari yovaajiniri Ishiteva, icantiri:

—Ari yantearijeitanaque, iquisajeitakeri irirenti, pajitachari Jose. Ipimantajeitakeri, impoiji yayeetanaqueri Ejipitoqui.

¹⁰Ari yoashinoncaajeivetacari savicajeitatsiri, iro cantaincha yoavisacotiri Tasorentsi. Itasoncacoventiri, irootaque inecameetsatantariri ivincatsarite ejipitosati, pajitachari Jarao. Ineaqueri otimimotiri iotantari, irootaque ipeantajariri iriori ivincatsaririnte. Ipincatsariventajetiri maaroni ejipitosati, aisati ishaninca Jarao.

¹¹Impoiji otashentsiteanaque maaroni Ejipitoqui, aisati Cananaqui. Oshequi yashinon- caajeitaca, tecatsi iraanajero intacantaqueeri iroajeitajeri.

¹²Iriori Jacovo iquemacotaquero ari otimaqueri tirico anta Ejipitoqui. Ijivataqueri itiancaqueri itomipee: “Pijajeite Ejipitoqui pamanantaitero ayeari”. Ari yamanantaiti, aisati ipianaja.

¹³Impoiji otsoncaja, itiancagiri aisati: “Pijajeite pamanantajante aisati”. Ari ijajeitanaji aisati, jeri ineajeitapaajiri pincatsari. Icantavaqueri: “Narotaque Jose pipimantakeri peerani”. Aisati icantiri Jarao: “Jeri yoca iyentisanoripee narori”.

¹⁴Impoiji icantiri aisati: “Pincantaiteri apa impoque aca, aisati maaroni ishaninca”.

¹⁵Irosati ijatantanacari Jacovo anta Ejipitoqui, yaajeitanaqueri ishaninca, icarajeiti 75. Ari icamapaaqueri. Aisati iquempejeitacari maaroni itomipee, icamajeitaque iriori.

¹⁶Impoiji yaatonquijeitanajiro itonquini Jacovoni, itijapaajiro anta Shiquemiqui, ari opajitari quipatsi yamanantiniri Avarama. Irio pimantirori quipatsi itomipee Emori. Ipinataqueri quirequi.

¹⁷Irosati yovaajiniriri Ishiteva, icantiri:

—Irotanaintsi omoncarataquea icantitacaniri Tasorentsi. Icarati oshequi ashaninca arori, yoshequi anaque anta Ejipitoqui.

¹⁸Impoiji ipincatsariventanti pashini, caari iotacotiri Jose.

¹⁹Yamatavijeitiri ashanincani. Ishintsitsanajeitiri, yaajeitakeri itomipee, yoitajeita- queri.

²⁰Irosati itimantanaca Moishishi. Aitaque icanta Tasorentsi, inecameetsatiri. Icarati mava cashiri iqueveanaque anta ivancoqui iriri, imanapitsataqueri ejipitosati.

²¹Te irimateroji irimanageri aisati ivancoqui, irootaque yovetsicantacanariri pitotsi- janiqui, imanavetacari otsapijaqui eni. Iro cantaincha oneaqueri irishinto Jarao, aaqueri. Oyeveajiri onampiqui, oquempetacantajiri otomisanori.

²²Yoametasanotiri ejipitosati maaroni ocarayeti ioyetiri iriori. Cameetsa ineaveeti. Imatanoyetiro paitapeerica yantayetiri.

Jero aisati icantiriri Ishiteva:

²³—Ari ocarati irosarintsite Moishishi 40, irosati ijatantanacari irineeri ishaninca: yora ijorioririnte.

²⁴Ineapaaqueri aparo, yashinoncaaca: ipasanatiri ejipitosati. Ari iquisacoventapaacari Moishishi ashaninca, irosati yoantapaacariri ejipitosati.

²⁵ Ijivetaca iriori Moishishi ari impincatsajeitavaquerime ishanincapee, aisati ijivetaca ari iriojeitavaqueri iriotaque cavintsajeitajerine. Ijivetaca irioteme itiancaqueri Tasorentsi, iro cantaincha te impincatsajeitavaqueriji.

²⁶ Oquitaitetanaji ineaqueri ishaninca apite, iquisatsatavacaana. Icoaveta iroimajerenterime. Icantiri: “Tempa pishanincatavacaaca. ¿Paita piquisavacantajeitacari?”

²⁷ Ari itatsincavaqueri yora quisasanotainchari, icantiri: “¿Janicampa peaquempiri meeca novincatsarite? ¿Picoaquempa pimperanajeitena?”

²⁸ ¿Picoaquempa meeca poyena narori, pinquempetacantena yoranquini ejipitosati poaqueri oshaiteniji?”

²⁹ Iquemavaque icantaqueriri, irosati ishiantanaca Moishishi, itsaroanaque. Irosati isavicantapaaca nampitsineentsiqui anta lipatsitequi Matia. Yaapaaque ijina, impoiji itimanaque itomi apite.

³⁰ Ari yovaajiniri Ishiteva iquenquetsatacaajeitiri:

—Ocarataque 40 osarinti isaviquimotiri Moishishi iriconquiri. Irosati inijaantacari inampire Tasorentsi, anta amorequimotaqueri totseequishi. Ocaaraitetinta anta, oquempejitaro toncaari pajitachari Shinai.

³¹ Yamenanaquero, irosati yoantanacaro cavaco: “Otaavetaca totseequishi, iro cantaincha te ontsongueaji. ¿Paitaquea?” Ari ijatashitaquero, icoaveta iramenasanoterome. Irosati iquemantacari Avincatsarite,

³² icantiri: “Narotaque Tasorentsi, icantani ipincatsajeitaquena pishaninca: yora Avarama, Isaca, jeri yora Jacovo, maaroni”. Jaa iriori Moishishi itsaroasanotanaque, te iramenajeriji.

³³ Icantiri aisati Tasorentsi: “Pipincatsatanarica, pisapatoreempa, picatiantacaro meeca quipatsi noameetsantiri, oca nopashinitiri.

³⁴ Noneaqueri anta Ejipitoqui pishaninca nocoyeaqueri, oshequi yashinoncaajeitaca. Noquemaqueri icavintsajeitaca, meeca nocavintsajeitiri. Irootaque nopocashitantariri noimpacacoventajeri. Meeca, nontianquempi Ejipitoqui”.

³⁵ Tempa peerani itseenqueevetacari yora Moishishi, icantirini: “¿Janicampa peaquempiri novincatsarite?” Iriotaque yoca itiancaqueri Tasorentsi. Ipeajiri pincatsaritatsiri, aisati oavisacojeitiriri ashaninca. Irio tiancaqueriri inampire Tasorentsi, yora ineaqueri peerani anta totseequishiqui.

³⁶ Yaajantiri ishaninca, imayetaquero caari ineapinijeiti, aisati itasoncacoventanti. Imayetaquero anta Ejipitoqui, incajarequi Quitioncajaroni, jero aisati anta caaraiteriqui. Ocarati 40 osarinti imatapiniyetaquero.

Aisati icanti Ishiteva:

³⁷ —Iriotaque yoca Moishishi cantiriri ajorioririnten: “Oquempetaca narori itimacaaquena Tasorentsi, aisati inquempeteri pashini ashaninca intimacayeri: camantan-tapaatsineri iriori”.

³⁸ Peerani iquenaquenajeitantaniri ashaninca anta caaraiteriqui, ijivajeitakeri yora Moishishini. Anta toncaariqui pajitachari Shinai iquenquetsatacairi inampire Tasorentsi. Iquemavaquero Moishishi irineane Tasorentsi, irosati yovaajeitancanariri intacantaqueeri, iotantacari Tasorentsi. Irosati yovaajeitantaqueero meeca arori.

³⁹ Iro cantaincha te incoyeji intacantaqueeri inquemisanteri Moishishi, irointiquea itseencaqueri. Icoajeiveta impianajeme Ejipitoqui.

⁴⁰ Icantajeitiri Aaro: “Yora Moishishi iriovetaca aajeitajanteeri anta Ejipitoqui, yama-jeivetaquee aca. Iro cantaincha ijataque chapinqui Shinaiqui. Meeca te ayotacoteriji paitanirica oqueriri caari ipocantaja. Povetsicajeitajena pashini atasorentsite, ampincatsajeitajero iroori”.

⁴¹ Ari yovetsicajeitiro, ishiantiriri vacajaniqui. Icoi impeajerome itasorentsite. Yoaquero ovisha, yamashiyetacano, ipashiyetacaro. Iquimoshireventashivetacaro yovetsicane.

⁴² Ishemanaca Tasorentsi, yojocanaqueri: ishinejeitiri ijitasorentsitashiyetari catsir-icaiteri, cashiri, impoquiropee, paitapeerica. Tempa irootaque isanquenatocotiniri peerani yora Amoshini. Jero oca isanquenatiniri: “Noshaninca, jero oca icantimpiri Tasorentsi: ‘Ishaninca Ishiraeri, anta ocaaraiteapaaquenta pisavicaveitani 40 osarinti. Iro cantaincha te poapinitenariji poshiiri, te pintaapinitenariji: te pimpincatsatimajeitana-ji catsini.

⁴³ Irointi pipincatsatashitacaro ipajiyetiri Maroco. Aisati pipincatsatashitacari impo-qui pajitachari Ireja. Aisati pipincatsatashitacaro povetsicajeitiri. Irootaque nontian-cteariri vavironiasati irajeitanaquempi inampiqui, imperanajeitempi” . Irootaque isanquenatiniri peerani Amoshini.

⁴⁴ Irosati yovaaqueneri aisati Ishiteva:

—Peerani anta caaraiteriqui otimimoveitarini ashanincani cajo, onantari isanquenare Moishishi. Irio vetsicacantirori Tasorensi. Imoncarataqueneri Moishishi icantaqueriri.

⁴⁵ Impoiji yaaajeitanaquero ashanincani jaocarica ijayetiri. Ijivajeitaqueri Josoe iipatsitequi pashinipee atiri. Itiancajeytiri Tasorensi atiripee, otimantari isavicantari ashanincani. Quiso yoajectiro cajo, irosati itimantacari Iravirini iriori.

⁴⁶ Yora Tasorensi inecameetsatiri Iravirini. Icantavetarini iriori: “Apa, tempa aviro Tasorensi, ipincatsatimpini Jacovoni. Nocoaque pishinetena meeca novetsiquempiro pinampitanteari”.

⁴⁷ Iro cantaincha irinti Saromoni vetsicasanotirori pancotsi.

⁴⁸ Te irisavicantearoji Tasorensi oca pancotsi yovetsicayetiri atiri. Tempa irio savicasanotatsiri inquitequinta jenoqui. Tempa aitaque icantita camantantatsiniri:

⁴⁹ “Icanti Avincatsarite: ‘Irootaque inquite nosavicasanotantari. Ora quipatsi, te iro nonampi. ¿Jaoca pincanteari povetsicantenari pancotsi nosavicanteari? ¿Arimpa nonaquearo pancotsi?’

⁵⁰ Tempa narotaque vetsicajeitaquerori maaroni timayetsiri”.

⁵¹ Noshaninca, te pincoyeji piote. Pishiajeitaqueri pashinisati atiri: te pinqueshireempa. Te pinquemisantajejeji. Aitaque picantaitatiani pipiatsatacaro Ishire Tasorensi. Pishiaqueri intacantimpiniri.

⁵² ¿Timatsimpa camantantatsiniri caari iquishini pishanincani? Teve aneeriji, tempa iotaca iquisajeitaquerini. Yoajeitaquerini maaroni camantantajeivetachaniri; icantini: “Coajica impoque cameetsatasanotatsiniri”. Ipocavetaca, iro cantaincha te pimpincatsajeitavaqueriji avinti, irointi paacantaqueri, poacantaqueri.

⁵³ Piojeivetaro irineane Tasorensi yoamevetimpiri inampire, iro cantaincha te pinquemisanteroji.

Irootaque icantiriri Ishiteva.

⁵⁴ Ari iquemajeitavaquero oca icantaqueriri, irosati iquisajeitananaca. Oshequi iquisajeitananacari, yatsicanajitimentajeitanacari irajiqui, taquiririri.

⁵⁵ Irompa irinti Ishiteva, iveshireimentashiretasanotacaros Ishire Tasorensi. Yamenasanotanaque inquitequi, ineaquero ishiquaireane Tasorensi. Jeri ineaqueri Jesoshi aisati, icatiaca iracosanoriqui Tasorensi.

⁵⁶ Icantanaque:

—Jaa, yonta noneasanotaqueri inquitequi, icatiaca Atirivetapaintachaniri anta iracosanoriqui Tasorensi.

⁵⁷ Shintsi icajemajeitanaque, yovijeitanaquero iyempita, ishiashijeitapaacari. Yaaajeitaqueri, shepi;

⁵⁸ yaaajeitanaqueri anta ovecaratapaacanta nampitsi. Irosati ipichaanajeitantacari. Yora pichaaqueriri, isapocaquero yoicoro, yoaquero iitiqui Saoro, icantiri:

—Pamenenaro noicoro, nompichaavaquerita.

Icantiri:

—Ari.

Evancari ini Saoro iriori.

⁵⁹ Ari ipichaanotaqueri Ishiteva, irosati iquenquetsatacantanacari Tasorensi, icantanaque:

—Novincatsarite Jesoshi, paavajero noshire.

⁶⁰ Itiyeroanaca, antearojenca ineanatanaque, icanti:

—Novincatsarite, te oncameetsate oca yantajeitaqueri, iro cantaincha eiro piquishimentirtsiti.

Irootaque icantaqueriri, irosati icamantanaca, torein. Icantanaque Saoro iriori:

—Ariove, camanirotaque ini; inearove.

8

Ijati quemisantatsiri anta Samariaqui.

¹ Irosatiquea intantanacari iquisajeitiri quemisantatsiri anta Jerosarequi. Itoncajeitananaca maaroni, ishiajeitanaca Joreaqi, aisati Samariaqui. Irinti timajeitanaintsi yora iroamerepeeni Jesoshini.

² Ari itijaqueri Ishitevani. Irio tijaqueriri quemisantasantatsiri. Oshequi iracojeitaqueri.

³ Irinti Saoro, icoaveta intsoncajeiterime yora quemisantatsiri. Ijatashijeitiri ivancopeequi, inoshicajeitiri shirampari, tsinane, maaroni. Yoiminqueajeitaqueri.

Iquemisantaque savicatsiri otsipapeequi nampitsi.

⁴ Yora shiajeitanainchari, iquenaquenayetanaque otsipapeequi nampitsi. Iquenquetsajeitaquero irineane Tasorentsi.

⁵ Yora Jeripi yareetapaaca nampitsiqui, onta Samariaquiniri. Icamantacotapaaqueri Quirishito.

⁶ Iquemajeitantacariri, aisati inajeitantacariri itasoncantayeti, iquemisantasanojeitavaqueri atiripee.

⁷ Yoavisacojeitiri oshequi neiriri camaari, antearojenca icajemajeitanaque camaaripee, irosati ijatantanaja. Yoavisacojeitiri oshequi choriveetatsiri, aisati amashitachari iitiqui.

⁸ Irosati iquimoshirejeitantanaca yora savicajeitatsiri nampitsiquinta.

⁹⁻¹¹ Itimi aisati anta shirampari pajitachari Shimo. Peerani oshequi osarintsi ish-eripiariveitani. Yoajeivetarini cavaco maaroni samariasati, irootaque ishemetantacariri oshequi. Ipincatsajeivetacariri atiripee: pincatsaripee, iratiritepee, maaroni. Icantajeiti:

—Tempa iriotaque Shimo yoca matirori itasorenca Tasorentsi. Tempa irio pincatsaritatsiri. Tsame ampincatsajeiteri.

¹² Iro cantaincha impoiiji yareetapaaca Jeripi, icamantacotaqueri Tasorentsi, jaoca icanta ipincatsariventanti. Aisati icamantacotaqueri Jesoquirishito. Ari ivaotisaajeitaqueri quemisantajeitaintsiri: shirampari, tsinane, maaroni.

¹³ Aisati iquempetaja Shimo irirori, iquemisantaji, ivaotisataja. Impoiiji quiso yoanaqueri Jeripi. Ineacoyetaqueri paitarica yantayetaqueri, aisati itasoncantasanoyeti. Irosati yoantanacariri cavaco.

¹⁴ Yora iroamereni Jesoshi savicatsiri Jerosarequi iquemacojeitaqueri samariasati, iquemisantajeitaquero irirori irineane Tasorentsi, irosati itiancantacariri Petero, jeri Joa.

¹⁵ Ijajeitanaque anta. Icantirori Tasorentsi: “Pintasoncaventajeiteri samariasatipee, quiso oajeitantariri Pishire”.

¹⁶ Iro cantaincha tequerata quiso oajeiteri, apatiroquera ivaotisatimentajeitacariri Avincatsarite Jesoshi.

¹⁷ Ari yajiricainatapaaqueri iitopeequi, irosati yaashirejeitantacaro Ishire Tasorentsi, otasoncacaajeitaqueri.

¹⁸ Ineacotaqueri Shimo. Iotanaque ariorica yajiricainatapaaqueri, yaashirejeitaquero irirori Ishire Tasorentsi, irosati icantantacariri:

¹⁹ —Jerica quirequi, nocoaque poametenana nontasoncante narori, nonquempetempi avirori. Nocoaque ariorica najiricainateri noshaninca, iraashirejeitantarori Ishire Tasorentsi.

²⁰ Icantanaqueri Petero:

—Pijate Sharincaveniqui, paanajeri aisati piirequite. Pijitashivetaca avirori ari pamanantero itasorenca Tasorentsi: apaniro imatacanti Tasorentsi.

²¹ Tecatsi pincantea pinquempetena: ioti Tasorentsi te pincameetsashireteji.

²² Te oncameetsateji oca piquenqueshirevetacariri. Pinquenqueshiretanaquea, pojoquero caari cameetsatsiri pantayetiri. Pincanteri Avincatsarite: “Pincavintsayena”.

²³ Niotaquempi, oshequi pishemeti, aisati pashi poiro te pincameetsateji.

²⁴ Yacanaqueri Shimo, icanti:

—Pincanterite Tasorentsi incavintsayena oncanteataquea eiro nojatantatsi Sharincaveniqui.

²⁵ Yora Petero aisati Joa, icamantacotiro irineane Avincatsarite, iquenquetsacotiro. Iquenayetanaque oshequi nampitsipeequi Samariaqui, icantajeitirori savicajeitatsiri:

—Ariorica pinquemisanterori Jesoshi, iroavisacotempi Tasorentsi, iraaajeitanaquempi inquitequi.

Irosati ipiajeitantanaja Jerosarequi.

Iquemisantaque etiopiasati.

²⁶ Ari ineanatirori inampire Avincatsarite, icantirori Jeripi:

—Meeca pijatanaque, pinquenanaque anta avotsiqui quenantachari caaraiteriqui: ora poneachari Jerosarequi, jatatsiri irosati Casaqu.

²⁷ Ari ijatanaque, iquenanaque avotsiqui. Itonquiotavacariri shirampari poneachari Etiopiaqui. Aitsoquireari ini. Irisati ovincatsaririnte Cantasheshi, yora quempoyeinirori maaroni oirequite. Irootaque iroori ivincatsarote etiopiasati. Ari ijaiti anta Jerosarequi, iquemisantaitirori Tasorentsi.

²⁸ Meeca ipiaja, isavicaque ishiacomentoqui, ineanatiro isanquenareni Isayashini, camantantaveitachaniri.

²⁹ Iro Ishire Tasorentsi cantaqueirori Jeripi:

—Pijate anta, pintonquiotavaquearo shiacomentotsinta.

³⁰ Ishiashitanacariri, iquemapaaqueri ineanatiro. Icantapaaqueri:

—¿Piotaquerompa oca pineanatiri?

³¹ Yacanaqueri:

—Teve nióteroji. ¿Jaoca noncanteari notantearori? Tecatsi oametenarone. Pinte-tapeempa, pisaviquimotapeena aca.

³² Jero oca ocantiri sanquenarentsi ineanatapai: “Ariorica yoyeetiri ovisha, imajere-tashitanaca. Ariorica yameeyeetiri ovishajaniqui, imajeretashita. Aisati inquempeteari Quirishito iriori, irimajerete.

³³ Iroashiventeeteri, eiro otampaticatitsi incantacoyeeteri. Impoiiji iroyeeteri. Eiro itimitsi irinti itomipee”.

³⁴ Isampitiri:

—Pincamantenate. ¿Janicampa iquenquetsacotiri yora camantantatsiniri? ¿Irisatimpa quenquetsacotashitacha? ¿Pashinimpa iquenquetsacotiri?

³⁵ Irosati icamantananacari Jeripi, icamantacotiri Jesoshi. Ijivataqueneri ocantiri ora Sanquenarentsi, yoametasanotaqueri.

³⁶ Alquero ijatacairiri avotsiqui, Irosati ineantapaacaro nija. Icantaqueri:

—Jero oca nija. ¿Cameetsanimpa novaotisatea?

³⁷ Yacanaqueri:

—Piquemisantantiririca Quirishito, cameetsa pivaotisataquea.

Icantiri:

—Noquemisanti. Iriotaque Jesoquirishito Itomi Tasorentsi.

³⁸ Yoatiauero shiacomentotsi. Ari yaniireajeitanaque, itsipatavacaanaca apite, yanii-jatanaquero nija, ivaotisataqueri.

³⁹ Ari yaatanaji, irosati quiso oantanacari Jeripi Ishire Avincatsarite. Te irineavajeriji aisati yora itsipavetacari. Apaniro yovaanaja iriori, iquimoshiretanaque.

⁴⁰ Irintiquea Jeripi inecatashitapaaca nampitsiqui anta opajitanta Asoto. Ari yovaanaca, iquenquetsayetanaque nampitsipeequi:

—Pinquemisantajeiteri Quirishito pavisacojeitantajeari.

Irosati yareetantanaja anta Sesareaqui.

9

Ipashinitantajari Saoro.

¹ Ari yashi yoiro iquisa Saoro. Isareavetacari iroajeiterime maaroni quemisantajeitiriri Avincatsarite. Irosati ijatashitanacari ivincatsarite saserote, icantiri:

² —Nocoaque pisanquenateneri yora quemisantacajeitiriri ajorioririnte anta Tamashicoqui, pincanteri: “Pamitacojeiteri Saoro iraajeiteri maaroni quemisantajeitiriri Jesoshi. Nocoaque iraajeiteri: shirampari, tsinane, maaroni. Impoiiji iroisojeiteri, iramajeiteri aca Jerosarequi”.

Ari isanquenatiniri, ipavaqueri.

³ Impoiiji ijatanaque, icantanaca, icantanaca: irotapaintsi Tamashico. Omapocapaa-queri amorecatsiri, amorecacotapaaqueri, morec: oponeca inquitequi.

⁴ Iparianaque quipatsiqui, tiricn, iquematiro irineane Jesoshi:

—Saoro, Saoro: ¿paita piquisantanari?

⁵ —¿Janicampi, Novincatsarite?

⁶ —Narotaque Jesoshi, piisane. Pijate, povaanaquea nampitsiqui. Coajica incaman-teetempi paitarica panteri.

⁷ Ari icatiajeitaca yora shirampari itsipajeivetacari, yoajeitaque cavaco. Iquemashitac-aro irineane, iro cantaincha tecatsi irinee.

⁸ Iriori Saoro, icatianaja. Yoquireavetanaja, te irimatajeaji iramenaje, irootaque yacat-satantanajariri, yareetacaacari Tamashicoqui.

⁹ Ocarati isavichashitaca mava quitaiteri. Te irineajeji, te iroajeaji, te irirajeji.

¹⁰ Ari itimiri anta Tamashicoqui quemisantatsiri, pajitachari Ananiashi. Ineashitavacari Avincatsarite, icantapaqueri:

—Ananiashi.

Yacanaqueri:

—¿Paita, Novincatsarite? Ainirona aca.

Icantiri:

¹¹ —Meeca pijate anta avotsiqui ipajiyeetirinta: “Tampaticari”. Pincoapaaqueri shiram-pari pajitachari Saoro, yora tarisotsati. Pincoapaaqueri anta ivancoqui Jorashi. Ainiro iriori, iquenquetsatacaana.

¹² Nomishitacaacari, ineaquempi piqueashitapaaqueri, pajiricainatapaaqueri; ineaca yamenanaji.

¹³ Yacanaqueri:

—Oshequi noquemacotiri, iquenquetsacoyeetiri yora picantaquenari. Oshequi yoashinoncaajetitiri quemisantajetitimpiri anta Jerosarequi, icantirive.

¹⁴ Tempa itianquiri aca yora jivatacaajetitiriri saserote iraaajetitantaquenari, maaroni aventajetitimpiri. Oshequi notsaroacaacari.

¹⁵ Iro cantaincha icantiri:

—Pijate. Tempa iriotaque nocoyeaqueri. Iriotaque quenquetsacotajenaneri. Inquenquetsacaaajeteri joriopee, pashinisatipee atiri, pincatsaripee, maaroni.

¹⁶ Aisati nonijayeri jaoca oncarate irineacatsitimentena.

¹⁷ Ari ijatanaque Ananiashi, iqueapaaque pancotsiqui. Yajiricapaqueri, icantiri:

—Saoro, avirotaque noyemisantaririnte. Itiancaquena Avincatsarite Jesoshi, yora onijaaquempiri anta avotsiqui piquenapaquenta. Itiancana pamenantajeari, quiso oasano-tantempiri Ishire iriori.

¹⁸ Irosati opariantanaja iroquiquiniri shiavetarori iventaqui shima, yamenasanotanaji. Ari ijatanaque, ivaotisataca.

¹⁹ Aisati yoaja, ishintsitanaji. Aparopee quitaiteri itimimovetanacari quemisantatsiri anta Tamashicoqui.

²⁰ Impoiji icamantantayeti anta pancotsiqui yapatojeitanta joriopee. Icantapinijetitiri:

—Iriotasanoaqueyeata Jesoshi Itomi Tasorentsi.

²¹ Yoajeitanaqueri cavaco yora quemajeitavaqueriri. Icantajeti:

—Tempa iriotaque yora tsoncajeterinemeru quemisantatsiri anta Jerosarequi. Tempa irootaque ipocashitantavetacariri aca iroisojeterime quemisantiriri Jesoshi, iraaajetanaquerime anta saserotepeequinta.

²² Aiquero ijatatiini Saoro iquenquetsati, tecatsi intsaroacaimateari. Yoajeitavaqueri cavaco yora joriotatsiri. Iotacaasanotaqueri, icanti:

—Yora Jesoshi, iriotaque Quirishitotatsiri.

²³ Ari avisanaque oshequi quitaiteri, irosati isareantajeivetacari iroyerime.

²⁴ Iro cantaincha iotacotaqueri Saoro isareacari. Maaroni quitaiteriqui, tsiteniriqui, yamenajeivetacaro joriopee iqueantapinitari nampitsi, icoajeivetaca iravaquerime Saoro, iroyerime.

²⁵ Iro cantaincha, osaite yaanaqueri iroamerepee tantotsiqui, ora shoncarori nampitsi; yataitacaanaqueri, impoiji yoaniireacojeitajiri cantiriqui araquerora. Irosati ishi-antanaja, te irineajeitavajeriji oyerinemeru.

²⁶ Ari yareetapaaca Jerosarequi. Icoaveta intsipajeitapeemparime quemisantajeitatsiri, iro cantaincha itsaroacaajeitavacari. Ijithashivetacari te inquemisanteji.

²⁷ Impoiji yaanaqueri Verenave, ijivatanaqueri anta itiminta iroamereni Jesoshi. Ica-mantapaaqueri:

—Queario, iraaajeterime Saoroca ayemisantaririnte anta Tamashicoqui, iro cantaincha anta avotsiqui ineaqueri Avincatsarite, iquenquetsatacaqueri. Iquemisantaque, impoiji anta Tamashicoqui iquenquetsatacotapinitiri Jesoshi, te intsaroacayeariji tseencantatsiri.

²⁸ Ari yaacameetsajeitaqueri quemisantatsiri, cameetsa itimimotaqueri iriori anta Jerosarequi. Icantani Saoro, quiso yoajeitaqueri ayemisantaririnte. Cameetsa iquenquet-satacotasanotiri Avincatsarite.

²⁹ Iquenquetsatacaajeivetacari joriopee iotirori quirieco, iro cantaincha ipiatsajeitavacari; icoajeivetanaca iroyerime,

³⁰ iro cantaincha iotacotaqueri iyemisantaririnte, irosati yaantanajari Saoro anta Sesareaqui. Impoiji itiancajeitaqueri Tarisoqui.

Itasoncantayeti Petero anta Iriraqui.

³¹ Cameetsa itimajeti quemisantajeitatsiri anta Joreaque, Carireaque, Samariaqui. Aiquero ijatatii iquemisantajeitanaque. Yamejeitaca ipincatsajetitiri Avincatsarite. Aisati oshequi oveshireacaasanojeitacari Ishire Tasorentsi.

³² Ari iquenaquenayetanaque Petero iquivantayetiri quemisantayetatsiri, irosati yaree-tantacari Iriraqui. Anta isaviqiqui oshequi quemisantatsiri.

³³ Ineapaqueri shirampari pajitachari Eneashi. Ocarati osarinti 8, inareaca imaamen-toqui, ichoritaque.

³⁴ Icantapaaqueri:

—Eneashi, iriotaque Jesoquirishito oavisacotajempine. Pincatianaje, povetsicajero pi-maamento.

Jentsipaite itinaanaja.

³⁵ Ineajeitaqueri irirasati, jeri saronasati; irosati iquemisantajeitantanajari Avincatsarite.

³⁶ Otimaveta Jopequi quemisantatsiri pajitachari Tavita. Acanti aneanequi arori: Maniro. Cameetsa oca antayetiri: ashi oiro intacotantayeta.

³⁷ Omantsiatanaque, impoiji ocamaque, torein. Ari iquivatsempequieetaquero ovat-sani, impoiji yoaquero anta shitamencotsiqui, onta jenoquijiniri.

³⁸ Jero Iriira oquempjitaro Jope. Yora quemisantajectatsiri, iquemacotaqueri Petero, inapaaque anta. Itiancaqueri apite shirampari:

—Pishintsite, pincantaiteri Petero impoque.

Ari ijataque, icantasanotapaaqueri:

—Pishintsite poiijatanaquena pamenapeero tsinane, camaque oni.

³⁹ Ari ijatanaque Petero, yoijatanaqueri. Yareetacaacari, yaanaqueri anta pancotsiqui jenoquiji. Oshonquimentajeitacaro maaroni camajimentaaro, iraajectaca. Onijaayetiri oicoropee, aisati oitsaasesanoripee. Ocantajeitaque:

—Tequerani oncameni Tavita, otijayetanaroni maaroni ocapee.

⁴⁰ Ari yoimisoquijapaaqueri maaroni atiri. Itiyeroanaca, iquenquetsatacairi Tasorensi. Ipitocashitanacaro camaintsiri, icantiro:

—Tavita, pintinaanaje.

Oquireanaji, oneaqueri Petero, irosati osavicanataja.

⁴¹ Yaavacotiro, yoatijiro. Icajemajeitiri aisati quemisantajectatsiri, aisati iroori icaje-majeitiro camajimentaaro, maaroni. Icantajeitavaqueri:

—Jero, aneanaji.

⁴² Ari iquemacojeitacuero maaroni jopesati. Icarati oshequi quemisantayetanajiriri Avincatsarite.

⁴³ Oshequi quitaiteri isaviqui Petero Jopequi. Isaviqui ivancoqui Shimo, yora vetsicapinitiriri meshinantsi.

10

Iquemisanti Coronerio, yora capitanoatsiri.

¹ Ari itimaiti anta Sesareaqui shirampari pajitachari Coronerio. Iriotaque iyapitanote oshequi soraro, poneayetachari Itariaqui.

² Quemisantasanoatsiri ini, ipincatsatiri Tasorensi. Aisati iquempejitari maaroni ishanincepee iriori, saviquimojeitiriri. Oshequi icavintsaajeitiri atiripee. Icantani iquenquetsatacairi Tasorensi.

³ Ishaavijitanaque catsirincaiteri ineashitavacari inampire Tasorensi, iconijatasanotapaaque. Iquempejitapaacari, icantapaaqueri:

—Coronerio.

⁴ Yamenasanotavaqueri, sorerere. Itsaroasanotanaque catsini. Icantavaqueri:

—¿Paita, Novincatsarite?

Icantiri:

—Iquemaquempi Tasorensi piquenquetsatacapinitaqueri, aisati ineaquempi pintacotapinijeitacari atiripee.

⁵ Icoaque meeca pintin角度 aparopee shirampari anta Jopequi. Pincajemacanteri yora Shimo, ipajiyetiri aisati Petero.

⁶ Irio isaviquimotiri pajitachari aisati Shimo, yora vetsicapinitiriri meshinantsi. Otimi ivanco otsapijaqui incajare.

⁷ Ari iplanaja inampire Tasorensi, yora neanaitiriri. Icajemaqueri Coronerio inampire apite, aisati soraro aparo. Quemisantasanoatsiri ini soraro. Icarajeitiri amitacojeitiriri Coronerio.

⁸ Icamantajeitacueri maaroni oca icantaqueriri inampire Tasorensi, impoiji icantiri:

—Nocoaque pijajeite Jopequi, pamenaiteri yora Petero.

Ari ijajeitanaque.

⁹ Oquitaitetamanaji, itampaticatapaaque catsirincaiteri. Iquenapaaque, irosati iquempejitantapaacaro nampitsi. Iriori Petero, yataitanaque jenoqui, iquenquetsatacairi Tasorensi.

¹⁰ Itasheavetaca, icoaveta iroyeame. Ainiroquera ovetsiquiniri iroyeari, omapocapaaqueri ineashitacaro.

¹¹ Ineaquero inquite tsoompoina. Oaniimaotapaaca quipatsiqui shiavetarori tocoya antearo. Yajiriqueetaquero anta ocaramaotapaaque.

¹² Iteyetaca yora caari yoyeeta; jeri iteyetaca maranquepee, vanquiyetachari, maaroni.

¹³ Iquemavaqueri Tasorensi, icantiri:

—Petero. Jeri yoca, poyeri, impoiji poyeari.

¹⁴ Icantanaqueri:

–Novincatsarite, eiro noaritsi. Te nameteariji caari yoyeeta, caari icoacayeetana noyeari.

¹⁵ Yapiitajiri:

–Tempa narotaque Tasorentsi, nocamantimpi nainti: “Cameetsari ini, poyeari”. Eiro picantashitaritsi avirori: “Te incameetsateji”.

¹⁶ Yapiitajiniri aisati:

–Poyeri, poyeari.

Irosati yoancacotanteetajariri jenoqui.

¹⁷ Te iriotacoteroji Petero oca ineaqueri. Irosati yareetantapaaca pancotsiqui itiancane Coronerio. Isampitacotapaaqueri:

–¿Jaoca ivanco Shimo, yora vetsicapinitiriri meshinantsi?

Icamanteetiri:

–Irootaque oca ivanco.

¹⁸ Ari isampitajiri:

–¿Ariompa isaviquimotimpiri yora Shimo Petero?

Icanteetiri:

–Je, aitaque isaviquiri.

¹⁹ Irosatiquera iquenqueshiretiro Petero ineaqueri. Ari ocantaqueri Ishire Tasorentsi:

²⁰ –Jerijeitapaaque shirampari, coimpiri. Pijate, paniireashitanaqueri. Eiro pican-tashiretitsi, poijsaaitanaqueri. Tempa narotaque amajeitaqueri.

²¹ Ari yaniireashitapaaqueri, icantapaaqueri:

–Narotaque picoiri. ¿Paita pipocashitantanari?

²² Ari yacanaqueri iriori:

–Itiancaquena Coronerio, yora capitantotsiri. Icameetsashiretasanoti, aisati ipincat-satiri Tasorentsi. Maaroni joriotatsiri inecameetsajeitiri. Icantiri inampire Tasorentsi: “Pincajemacanteri Petero pivancoqui. Pinquemisantavaquero irineane”. Irootaque itian-cantanari aca.

Ari icantavaqueri:

²³ –Pinqueapee.

Ari ineshinoncatavaqueri. Ari oquitaitamanaji yojatanaqueri, itsipajeitanacari iyemisantaririnte aparopee, yora jopesati.

²⁴ Aparo imaaajeitanaque nianqui, irosati yareetantamanaca anta Sesareaqui. Yoyea-queri Coronerio anta, yapatojeitaqueri maaroni ishaninca aisati itsipatapinijeitari.

²⁵ Iqueapaaque Petero. Yovetsatavacari Coronerio, impoji itiyeroashitavacari iitiqui.

²⁶ Ari yoatijiri Petero, icantiri:

–Pincatianaje. Te naro Tasorentsi, tempa narosati narori atiri, aquempetavacaaca.

²⁷ Ari iquenquetsatavacaaca, iqueapaaquero pancotsi. Ineapaatiiri oshequi apato-jeitainchari,

²⁸ icantapaaqueri:

–Naro jorio. Piojeiti avirori te irishinetenaji noshaninca nontsipajeiteari pashinisatipee atiri. Aisati te irishinetenaji nonquivanteri. Iro cantaincha yoametaquena Tasorentsi te oncameetsateji nompinqueri pashini atiri, te oncameetsateji noncante: “Te incameet-sateji”.

²⁹ Ari picajemacantaquena, irosati nopocantanaca, te nonquisotanaque. Meeca nosampitempl, ¿paita picajemacantantanari?

³⁰ Icantiri Coronerio:

–Ocarati meeca 4 quitaiteri, ishaavijitanaque catsirincaiteri, iquempetaca meeca. No-quenquetsatacairi Tasorentsi aca novancoqui. Noneaqueri aparoni shirampari, icatiimo-tapaaquena. Iquitsaataro shipaquireatsiri iitsaare.

³¹ Icantapaaquena: “Coronerio. Iquemavaquero Tasorentsi piquenquetsatacaqueriri. Iotaquempi pintacotantayeta.

³² Piantianque anta Jopequi, pincajemacanteri Shimo, ipajiyeetiri aisati Petero. Isav-iquimotiri itsipa Shimo, yora vetsiquiriri meshinantsi. Otimi ivanco otsapijaqui incajare”.

³³ Intsipaita nocajemacantaquempi, irosati pipocantacari. Meeca nocarajeitaqueri iriori Tasorentsi aca. Nocoajeitaque nonquemajeitero oca inintacaquempi Avincatsarite.

³⁴ Ari ineaetanaque Petero iriori, icanti:

–Meeca niotasanotaque te irinashitacaajeiteji Tasorentsi, tempa icanti: “Piquem-petavacaajeitaca, eiro pipincavacaajeitatsi”.

³⁵ Te inquenqueshiretacoteeroji onashiyetarica aneane aisati ameyetari, irointi inea-cameetsajeitaqueri maaroni pincatsajeitiriri, aisati maaroni antapinitirori cameetsayet-at-siri.

³⁶ Naro jorio. Piojeitavaquero irineane Tasorentsi ijivajeitaquena, iotacaajeitaquena. Cameetsa oca icamantaquenari: “Ariorica pinquemisantajeiteri Jesoquirishito, cameetsa nosavicacaajeitempi, pinquempetavacantajeiteari”. Tempa iriotaque Jesoshi Avincatsarite maaroni,

³⁷ piojeitavaquero. Ijivataque Joani iquenquetsatacotaqueri, icanti: “Cameetsa pivaotisantimentajeiteri Quirishito”. Impoiji iquenquetsatacotaqueri itsipapee, intanacaro anta Carireaqui. Yovaacaanacaro maaroni nampitsipeequi anta Joreaqui.

³⁸ Icamantajeitiri atiri jaoca icantaqueriri Tasorentsi Jesoshi, yora nasaretasati, itiancantacariri Ishire, aisati ipantacariri itasorenca; irootaque iguenaquenayetantacariri, yantantayetacarori cameetsayetatsiri. Yoavisacojeitiri neajeitiriri camaari. Quiso yoiri Tasorentsi, irootaque imatantacariri.

³⁹ Noneajeitavaquero yantayetiri anta inampipeequi noshaninca, aisati anta Jerosarequi. Noneaquero yoanteetacariri, ipajacotanteetacariri coroshiqui.

⁴⁰ Omavatapaaque quitaiteri itinaajiri Tasorentsi, yonijaajanari.

⁴¹ Te ironijaajeiteriji maaroni, naroejitaque nainti, yonijaajiri. Icoyeaquena Tasorentsi, irootaque noneantavajariri. Icamasanovetaca, itinaanaja aisati. Impoiji noacaavajiri, aisati niracaavajiri.

⁴² Icantaquena: “Pincamantajeiteri atiri: ‘Inintacaqueri Tasorentsi Jesoshi incantacoventajeiteri maaroni atiri: aneatsiri aisati camaintsiri’ ”.

⁴³ Tempa peerani iquenquetsatacotirini Quirishito yora camantantatsiniri, icantajeitini: “Ainiro yantajeitavaquero maaroni atiri caari cameetsatatsi; iro cantaincha ariorica inquemisanteri Quirishito, incavintsajeiteri irinti, eiro iquishimentiritsi yantajeitiri, eiro iquenqueshireacotiritsi”.

⁴⁴ Ainiroquera iquenquetsati Petero, irosati opocashitantacariri Ishire Tasorentsi. Aisati opocashijeitavaquero maaroni quemajeitavaquerori icantaqueriri.

⁴⁵ Ari yoajeitanaque cavaco yora jorio, quemisantatsiri: yora tsipatariri Petero. Ari iojeitaque itiancasanotaquero Tasorentsi Ishire, quiso oantacariri pashinisati atiri. Irootaque yoajeitantanacariri cavaco.

⁴⁶ Iquemajeitavaquero ishaninca Coronerio ineanatantashitanacaro pashinipee neantsi, aisati icantajeiti:

—Cameetsa ini Tasorentsi.

Ari icantanaji Petero:

⁴⁷ —Iquempetaquee arori, yaashirejeitavaquero Ishire Tasorentsi. Tempa ocameetsati irivaotisajeitea.

Icantiri itsipapee jorio:

—Je, cameetsataque.

⁴⁸ Irosati icantantariri Petero ishaninca Coronerio:

—Pivaotisantimentajeiteari Jesoquirishito, iriojeitantempiri atiri pipincatsajeitavaquero.

Icantajeitanaqueri:

—Jentsiqueti pivaotisatena.

Ari ivaotisajeitavaquero. Impoiji icantajeitavaquero:

—Pisaviquimotanaquenatsita aparopee quitaiteri, poametasanotajena aisati.

11

Iquemajeitavaquero jerosaresati iquemisantaque itsipapee atiri.

¹ Iquemacojeitavaquero joresati: jeri yora itiancaneppee Jesoshi, jeri maaroni quemisantajeitatsiri. Icamanteetiri:

—Iquemisantaqueri Jesoshi pashinisatipee atiri; irio quemisantacaajeitavaqueriri Petero.

² Itoncantanajari Petero Jerosarequi, iquishimentajeitavaquero ijorioririnte: quemisantatsiri inaveta.

³ Icantajeitavaquero:

—¿Paita pijatashitantariri pashinisati atiri? ¿Paita poimotantariri iriori? Te oncameetsateji.

⁴ Itsoteasanotaqueneri Petero, icantiri:

⁵ —Meeca noncamantempi. Anta notimaitinta Jopequi, noquenquetsatacairi Tasorentsi. Noneashitavacaro, noneaquero shiavetarori tocoya antearomaronca. Yajiriqueetaquero anta ocaramaoyetapaaque, oponeaca inquitequinta, oaniimaotimotapaaquena.

⁶ Namenasanotavaquero sorerere: noneaquero caari avajeita: chancho, maranque, vanquiyetachari, maaroni.

⁷ Noquemaqueri Tasorentsi, icantaquena: “Meeca poyeri; poyeari”.

⁸ Iro cantaincha nocantavetacari: “Novincatsarite, eiro noaritsi. Te nameteariji caari yoyeeta, caari icoacayeetana noyeari”.

⁹ Apitetaque Yapiitaquena, icantana: “Tempa narotaque Tasorentsi cantimpiri: ‘Cameetsari ini’. Eiro picantashitaritsi avirori: ‘Te incameetsateji’”.

¹⁰ Aitaque apiitaca mava. Irosati ovancantanaja inquitequi.

¹¹ Irosati yareetantapaaca mava shirampari anta pancotsiqui notimaitinta. Iponeanaca Sesareaqui, itianqueetaquenari.

¹² Irosati ocantantaquena Ishire Tasorentsi: “Poiijatanaqueri, eiro piquisotanaquetsi”. Ari noiijatanaqueri. Aisati yoiijatanaquena iriori ayemisanrarinte, icarajeiti 6. Noqueajeitapaque ivancoqui yora cajemacantaquenari.

¹³ Iquenquetsatacaavaquena, icamantavaquena jaoca icantacari ineantacariri inampire Tasorentsi. Yonijantapaacariri, icantiri: “Pintianque anta Jopequi. Pincajemacanteri Shimo: ipajiyeetiri aisati Petero.

¹⁴ Iriotaque oametapeempirone irineane Tasorentsi, pavisacotantajeiri. Aisati inquempejeitajea iriori maaroni pivancoquiniri”.

¹⁵ Nintantacarori noquenquetsatacaqueri, ari opocashijeitaqueri Ishire Tasorentsi. Oquempetacaajeitaquee intantaqueeri arori.

¹⁶ Noquenqueshiretanaquero irineane Avincatsarite icantitacari: “Yora Joa ivaotisantaroni nija, irompa irompa nainti nontianquempiro Ishire Tasorentsi”.

¹⁷ Peerani aquemisantajeitantariri Avincatsarite Jesoquirishito, itiancaqueero Tasorentsi Ishire. Meeca imoncaratajiniri iriori itsipapee atiri. ¿Arimpa nontsaneaquarei? Tempa irio Tasorentsi.

¹⁸ Iquemajeitantavacarori oca, tecatsi incantanaqueri impiateari, irointi icantajeiti:

—Cameetsa ini Tasorentsi. Tempa icoacairi aisati pashinisatipee atiri iquenqueshirejeitiri, irijajeitantajeiri iriori anta jenoqui.

Icamantanti anta pashinipeequi nampitsi.

¹⁹ Ari iquisacoyetanacari Ishitevani. Meeca iquisheetanaqueri maaroni quemisanta-jeitatsiri, irosati ishajeitantanaca pashinipeequi quipatsi: Jenishiaqui, Tsipirequi, Antioquiaqui, maaroni. Anta te inquenquetsatacayeriji pashinisati atiri, irinti itsatayetiri ijorioririnte.

²⁰ Ainiro iconoayetacari itsipapee quemisantatsiri, poneayetanaainchari Tsipirequi, jero Shirenequi. Yareetantanacari irinti anta Antioquiaqui, iquenquetsatacappaqueri caari joriyoetatsi. Icantajeitiri:

—Pinquemisantajeiteri Jesoquirishito pavisacotantajeiri.

²¹ Itasoncacoventapinitiri Avincatsarite, itimantacari oshequi catsini quemisanta-jeitavaqueriri, aventajeitariri.

²² Ari anta Jerosarequi iquemacojeitaqueri quemisantatsiri. Itiancaqueri Verenave anta Antioquiaqui.

²³ Yareetapaaca iriori, iotapaaqueri ineshinoncatiri Tasorentsi. Iquimoshiretapaque, icantajeitiri:

—Quearioyeya, quiso poajeiteri yora Avincatsarite, pinquearioventeneri maaroni icoacajeitimpiri.

²⁴ Cameetsari ini iriori Verenave. Quiso yoasanotiro Ishire Tasorentsi, yashi yoiro iquemisantasanoti. Aisati aiqero ijatati yoshequajeitanaque quemisantajeitiriri Avincatsarite.

²⁵ Impoiji yovaanaca Verenave Tarisoqui, icoapaaqueri Saoro. Ineapaajiri, irosati yoiijatantajariri Antioquiaqui.

²⁶ Anta yapatotapinitirinta quemisantatsiri. Icantani, ocarati aparoni osarinti. Yoametaapaqueri oshequi catsini atiri. Aitaque anta intanacaro ipajiyeetiri quemisantatsiri: “Quirishitianotatsiri”.

²⁷ Irosati yareejeitantapaaca Antioquiaqui pashini camantantatsiri, iponeanaca iriori Jerosarequi.

²⁸ Icarataqueri aparoni, pajitachari Acavo. Icatiapaaca anta yapatojeitanta, oametaqueri Ishire Tasorentsi, icantantari:

—Coajica intasheajeitanaque atiripee anta Joreaqui.

Ainironi ipincatsariventanti Caraorio, omoncarataja icantitaniri Acavo.

²⁹ Icantajeiti quemisantatsiri:

—Tsame ancavintsaajeiteri ayemisanrarinte anta Joreaqui, ampacanteri paitarica icoajeitiri.

³⁰ Jaocarica ocarayetiri timimoyeteeri, aitaque oncarate ampacantayeriri.

Aitaque imataquero icantaqueri. Yapatotaqueri quirequi, ipavaqueri Verenave, jeri Saoro. Icantaqueri:

—Jeri yoca quirequi: paajeitanaqueneri quenquetsatacantatsiri anta Jerosarequi, incavintsaajeitantariri ashinoncaajeitachari.

Ari yaanaqueneri jerosaresati, ipapaaqueri quenquetsatacantatsiri. Ari yovaajeitaqueneri iriori ashinoncaajeitachari.

12

Eroreshi Aquiripa, iriotaque quishiriri quemisantatsiri.

¹ Impoiji yora pincatsari Eroreshi iquisayetaqueri aparopee quemisantatsiri.

² Yoacantaqueri Santiaco, iro ipesanteetacariri saviri, peti. Irio irirentini Joa.

³ Ionirotaque Eroreshi onimojeitaqueri joriotatsiri, irootaque yaacantantavetacariri Petero aisati.

⁴ Iro yaacantantacariri quitaiteri yoantapiniyeetarori tanta caari tapiacha. Ijithashiveta ariorica omoncarataquea quitaiteri Yavisantaniri, iramenacojeiteri joriopee iroyeri. Yaaqueri, impoiji ipaqueri 16 soraro, irishentantariri.

⁵ Ari yominqueaqueri. Yora quemisantatsiri iquenquetsatacaasanojeitiri Tasorentsi, icantiri: “Poavisacotajeri Petero”.

⁶ Ari otsitenitanaque, iro osaitequera iroisoquijerime Eroreshi, iroacaantantaririme. Icoaveta iramenajeiterime atiri incamaque. Ainiro inaveta Petero caravosoqui, imanaque; isatecaqueri apite soraro. Yoisotantacariri apite carenatsa. Ishentavetaro ashitacorontsi itsipapee soraro.

⁷ Ari imapocapaaqueri anta inampire Avincatsarite. Oconijaiteashitimotanacariri. Itin-capaaqueri imerequiqui, icaocapaaqueri. Icantaqueri:

—Pishintsite pintinaanaje.

Irosati oisoreashitantanaja carenatsa iracoquiniri, yoisotantavetacariri.

⁸ Aisati icantiri:

—Pinquitsaatajae, pisapatotajea.

Ari iquitsaataja, isapototaja. Aisati icantajiri:

—Pampinaicajeoro poicoro, poijatanaquena.

⁹ Isoquijanaji, yoijatanaqueri. Te irioteji Petero queariosanotaquerica yoavisacotajiri inampire Tasorentsi. Yaamaaca imishitaca.

¹⁰ Yavisanaqueri shentavetariri aparo, jeri aisati itsipa yavisanaqueri. Yareetacaro onta ashitacorontsi, onta iquenantapinitari nampitsiqui. Ashitareimotashitanajari. Yavisana-jiro, yovaanaca anta avotsiqui. Irosati injantareantanajari inampire Tasorentsi.

¹¹ Iotacotaja Petero, icanti:

—Meeca niotasanotaque itiancaquenari Novincatsarite inampire. Yojoacaoven-taquena iroyename Eroreshi. Aisati iquempetacoventaquena, yojocaacoventaquena jaocarica incantenameri noshanincapee.

¹² Iquenqueshiretanaquero, irosati iijatantaca ovancoqui Maria, iriniro Joa. Ipajiyetiri Joa aisati Maricoshi. Anta yapatojeitacanta oshequi quemisantatsiri, iquenquetsataca-jeitiri Tasorentsi.

¹³ Iposanavetapaaro Petero ashitacorontsi, ora otsapiquiniri: toc, toc. Ari ocatiashive-tanacariri nampirentsi pajitachari Irrore.

¹⁴ Iotsatavajiri irineane Petero, oquimoshiretasanotanaque. Iro cantaincha te ashitare-anagueneriji, ainti oshishitanaca. Ocamantajeitiri quenquetsatacaajeitiriri Tasorentsi:

—Jeritapaaji Petero omoroquinta.

¹⁵ Icantajeitavaquero:

—Pishinquiventacateemi.

Aiquero ocantanaitii:

—Queariosanotaque.

Icantaquero:

—Caari ini Petero, irintiata inampire Tasorentsi, amenacoventiriri.

¹⁶ Aiquero catsini iposanaitiuro, toc, toc, irosati yashitareantajanari. Ari ineajeitavajiri, yoajeitavaqueri cavaco, icantavacaajeitanaja:

—¿Jaoca iquenapaajiri?

¹⁷ Ari yacotashitanaqueri, icantiri:

—Pimajerejeite.

Impoiji icamantajeitapaajiri jaoca icantajiriri Avincatsarite, yoimisoquijantajariri. Aisati icantiri:

—Pincamantaiteri Santiaco, aisati pincamantajeiteri ayemisanraririnte.

Irosati isoquijantanaja, ijatanaji imanapitsatacari soraropee.

¹⁸ Oquitaitetamani oshequi icantavacaimentajeitacari soraropee:

—¿Jaocaquea meeca icantanajari Petero?

¹⁹ Icoacantavetacari Eroreshi, te irineajeriji. Isampinatiri soraro shentavetariri:

—¿Jaocaqueame iquenanjari?

Yacanaqueri:

—Caa, jaocarica, te nioteji; te noneavajeriji.

Ari iquisaqueri Eroreshi soraropee, yoacantajeitaqueri, shemi. Ari impoiji yojocanajiro Eroreshi Jorea, yovaanaja anta Sesareaqui, irosati isavicanapaaaja.

²⁰ Ari anta Tiroqui aisati Shiroqui aajeitaqueri savicajeitatsiri itashe, te ontimasanoteji iroajeiteari. Peerani icantiri iriori Eroreshi:

—Pincavintsaajeitena, nocamicari. Pimpapinijeitenaro noyearchi.

Ari ipapinijeivetacari, iro cantaincha meeca iquisajeitaqueri. Oshequi iquenqueshirea-jeitanaca tirosati aisati shirosati. Icantavacaajeitaca:

—Itsaneapitsajeiteerocari avajeiteari. Tsame ancantari Varashito iramitacojeitee ampit-simareacaajeari: tempa iriotaque inampire Eroreshi. Ariorica incantari, iraacameetsajeitajee aisati, eiroquea itsaneapitsatanteerotsi ayeari.

Icantiri Varashito; impoiji icantiri iriori:

—Ari, namitacojeitempi. Noncantari novincatsarite incajemajeitempi, iraacameetsajeitempi.

²¹ Ari pashini quitaiteri icajemajeitaqueri Eroreshi, yaacameetsajeitaqueri. Yoaneencaro pincatsari iitsaare, isavicaque anta ivincatsarimentoqui. Oshequi ishemetaque, iquenquetsatacaajeitaqueri. Icantiri:

—Eiro piquenqueshirejeitatsi. Nompajeitempi maaroni coiteimojeitaquempiri.

²² Irosati iquimoshirejeitantanaca pocajeitaintsiri, icantajeitaque:

—Te irio atiri aquemajeitaqueri, irinti Tasorentsi. Cameetsa ini.

²³ Ari oshequi ishemetaque Eroreshi, iveshirementacaro icantajeitaqueriri atiri. Iro cantaincha ishemacari Avincatsarite, itiancaqueri inampire:

—Te impincatsatenaji Eroreshi. Pijate pojoquitacayeari.

Ari ijataque, yojoquitacaacari, impoiji icamanaque, torein, irosati yoantacari quenitsi.

²⁴ Irosati iquenacaantayetancaro quemisantatsiri irineane Avincatsarite. Yoshe-quianaque quemisantajeitatsiri.

²⁵ Iriori Verenave, aisati Saoro intacotanta anta Jerosarequi. Irosati ipiantanaja Antioquiaqui, itsipatanajari Joa, ipajiyeetiri aisati Maricoshi.

13

Ijati Saoro aisati Verenave anta Tsipirequi.

¹ Icarajeitiri quemisantatsiri anta Antioquiaqui camantantatsiri, aisati oametantatsiri: jeri Verenave, aisati Shimo Nijeri. Iroshio shirenesati, Manaemi ishaninca pincatsari Eroreshi, Saoro, maaroni.

² Ari pashini quitaiteri yapatojeita iquemisantajeitiri Avincatsarite, tecatsi iroajeiteari. Irosati icantantacari Ishire Tasorentsi:

—Pincantajeiteri Verenave aisati Saoro: “Pimateneri Tasorentsi paitarica incoacayempiri”.

³ Ari impoiji yajiricainajeitaqueri iitoqui, irosati icantantariri:

⁴⁻⁵ —Pijate pantero icoacampiri Tasorentsi, naroquea canterineri Tasorentsi iramitacotempi.

Ari otiancaqueri Ishire Tasorentsi, irosati ijatantacari anta Sereoshiaqui. Yojatanacari Joa Maricoshi iramitacotanteariri. Ari itetapaaca pitotsiqui. Otiancacotiri tampea, iquenacotanaque Tsipirequi. Otimi anta nampitsiqui pajitachari Saramina: yareejeitan-tapaacari anta, iquenquetsatapaaquero irineane Tasorentsi anta pancotsiqui yapatotap-inijeitantari joriopee.

⁶ Impoiji itsoteajeitanacuero maaroni nampitsipeequi anta Tsipirequi, maaroni. Impoiji yareejeitapaaca Pajoshiqui. Anta ineapaaqueri sheripiaritatsiri, pajitachari Varijesoshi. Jorio ini. Irishiyerime camantantatsiri, icantapiniti:

—Naro quenquetsaritori irineane Tasorentsi.

Ja, itseeanyi.

⁷ Itsipatapinitari pincatsaritatsiri pajitachari Serijio Pavoro. Ainiro iotantari iriori. Icajemacantaqueri Verenave, jeri Saoro: icoaque inquemero irineane Tasorentsi.

⁸ Iro cantaincha itsaneavetacari yora sheripiari: te irinintacaavetariji inquemisante yora pincatsaritatsiri.

⁹ Ari iotacotaqueri Saoro, pajitachari aisati Pavoro. Oametasanotiri Ishire Tasorentsi, yamenasanotanaqueri sheripiari,

¹⁰ icantanaqueri:

—Pamatavitantasanotaque. Te catsini pincameetsateji: piquempetacari camaari. Te pininteroji cameetsayetsiri, irointi picoasanotaque pamatavitante. Picoaque pamatavi-jeiteri maaroni coatsiri irioteri Novincatsarite. ;Eirompa piquenqueshiretatsi?

¹¹ Meeca intasonquempi Novincatsarite pinquitapoojaquitanaque. Osamanitanaque, eiro pamenitajatsi.

Irosati icamarajatantanaca, otsiteniiteacotanaqueri. Ipamipamitanaque, pami, pami; icanti:

—Teve namenajeve. Pancatsatanajenave.

¹² Ari ineavaqueri yora pincatsaritatsiri, aisati iquemiro irineane Avincatsarite, irosati iquemisantantanaca. Icanti:

—Cameetsave oca icamantacotiriri Avincatsarite.

Yovaanaja camantantatsiri anta Ashiaqui.

¹³ Iponeanaja Pavoro Pajoshiqui, itetanaja pitotsiqui, itejeitanaja aisati maaroni icara-jeitiri. Iquenacotanaque anta Perejequi, ora Pampiriaquiniri. Iriori Joa yojocanajiri, ipianaja iriori Jerosarequi.

¹⁴ Impoiji itsipapee, yovaajeitanaja aisati. Yareejeitapaaca anta pashiniqui Antioquia: ora Pishiriaquiniri. Quitaiteiri imaoreantajeitari iqueajeitapaaque pancotsiqui yapatojeitan- tani, ari isavicajeitapaaque.

¹⁵ Ineanayeetiro isanquenareni Moishishi, aisati isanquenareni camantantatsiniri. Yora jivatacantantatsiri anta pancotsiqui, icantavaqueri:

—Noshaninca, pincoaquericca avirori pinquemisantacayeri ashanincapee aca, pinca- manteriqueti.

¹⁶ Ari icatianaca Pavoro, yacotashitaqueri yoimajerentajeitaqueri. Icanti:

—Noshaninca, ariorica pipincatsataqueri Tasorentsi, pinquemisantajeitavaquena.

¹⁷ Meeca nonquenquetsatacotempiri Tasorentsi iquemisantiniri Ishiraerini. Peerani icoyeaqueri intacantayetariniri inquemisanteri. Impoiji, itimantacari ashanincani anta Ejipitoqui, yoshequicaaqueri. Itasoncavoventajeitiri, irosati ishinetantacari peranave- tarini ijajeitanaque.

¹⁸ Ocarati 40 osarinti itimajeiveitani ashanincani anta caaraiteriqui, iro cantaincha oshequi itseencajeitaqueri Tasorentsi.

¹⁹ Icoajeivetaca irareejeiteame Cananaqui, iro cantaincha isaviqui pashinisatipee atiri, ticaajeivetavacariri. Inashiyetaca iriori, ocarati irineanepee 7. Impoiji itasoncaventiniri Tasorentsi ashanincani, itsoncajeitaqueri savicajeiveitachaniri. Impoiji ipaqueri ashan- incani ipatsite, icantiri: “Jero oca, pisavicajeitanteari”.

²⁰ Ari ocarataque osarinti isavicajeitaque 450. Te intimeji pincatsariventasanojeite- rineri, irinti ijivatashijeivetacariniri itsipapee savicacantayetatsiri. Impoiji ijivatacanti yora camantantatsiniri pajiveitachaniri Samoiri.

²¹ Impoiji icantaqueri ashanincani Tasorentsi: “Nocoajeitaque pincatsariventasano- jeitenaneri”. Ari icoyeaqueneri Saoro, ipincatsariventantariniri ashanincani. Irio iriri iriori Saoro ipajita Shishi. Iriojeitaque ishanincapeeni Vejami. Ocarati 40 osarinti ipincatsariventantaque Saoro,

²² impoiji icanti Tasorentsi: “Eiro ipincatsariventantajitsi aisati Saoro, te incameetsateji, irinti pincatsaritajantsine Iraviri, yora itomi Jese. Irio noneacameetsatanotaqueri, irantenaro irinti maaroni nonintacayeriri”.

²³ Iriotaque ishanincani Iravirini oavisacotajeeri: ipajita iriori Jesoshi. Tempa icantini Tasorentsi: “Irio ishanincani Iravirini oavisacojeiterineri atiri”. Moncarataca meeca icantitacaniri.

²⁴ Ijivataqueri Joa iquenquetsatacaajeitaquerini maaroni ashaninca: “Pinquen- queshirejeitajea, eiro piquempejeitajatsi peerani, impoiji novaotisajeitempi, aisati iroavisacojeitempi Tasorentsi”. Impoijiquea iquenquetsatapaaque Jesoshi.

²⁵ Iriori Joa irotaintsi incame, ari icanti: “Te narosano yora piquenqueshirejeivetari. Te nar Quirishito oavisacojeitempineri, irintiquea impoitapeenaneri. Oshequi nopincatsa- tasanotaqueri narori; irompa nainti, te nompincatsatimateaji”.

²⁶ Ari yovaajiniri aisati Pavoro, icantiri:

—Noshaninca, tempa ashanincajeitarini Avaramani, tsame anquempetasanojeiteari, ampincatsatasanojeiteri Tasorentsi. Meeca noncamantajeitempi: ariorica ampincatsa- tasanajeiteri Jesoshi, ari iroavisacojeitee.

²⁷ Te iriojeitavaqueriji jerosaresati, itseencajeitavaqueri. Aisati iquempjeitavaqueri ivincatsaritepee, te iriojeiteriji Quirishito ini. Maaroni saavaro ineanatapienjeivetaro isanquenayetiniri camantantatsiniri, iro cantaincha te inquemasanotavaqueroji, irootaque caari iojeitantar oquenquetsatacotiri Jesoshi. Iriotaque oquenquetsatacotiri Sanquenarentsi: “Iroyeeteri Quirishito”. Ari yoacantajeitavaqueri ashanincajei Quirishito, iro cantaincha te irioteriji.

²⁸ Tecatsi irantavetea, yoacantashitacari. Icantacoventashitacari Pirato: “Poacanteri”.

²⁹ Moncarayetaca maaroni isanquenatacotitacarini: oshequi yoashinoncaqueri, ipajacotaqueri coroshiqui, icamanaque, torein. Impoiji yoaniireajiri, yoqueri anta omoroku imperita.

³⁰ Icamasanovetaca, iro cantaincha yoitinaajiri Tasorentsi.

³¹ Ari acarataque oshequi quitaiteri inijaapinijeitajari iroamere, yora tsipajeitapaajariri chapinqui Jerosarequi: yora ponechari Carireaquei. Iriojeitaque meecca camantajeitiriri atiri.

Jero aisati icantajeitiriri Pavoro:

³²⁻³³ —Ocameetsataque icamantaqueriniri peerani Tasorentsi ashanincani. Isanquenatacaqueri peeraniniri otimantacari pampoyeantsi, oca apitetaintsiri. Ocantini: “Incanteri Tasorentsi Quirishito: ‘Ariorica nontinaajempi noncantajempi notomi’”. Meecca noncamantajeitempi: imataquero Tasorentsi icantaqueriniri ashanincani: yoitinaajiri Jesoshi, ayojeitantacari Quirishito ini.

³⁴ Jeroca pashini icantaqueriniri Tasorentsi: “Notiomi, nomoncaratasanotempiro maaroni nocantaqueriniri Iravirini: nontasoncacoventempi pimpincatsaritanotanteari. Queariotasanotaque: tempa narotaque cantaquempiri”. Irootaque, noshaninca, piojeitantacari yoitinaasanotajari Tasorentsi Quirishito, irootaque ipincatsaritanotantajari. Icamasanovetaca, yoitinaajiri, te impatsayeji quipatsiqui.

³⁵ Tempa irootaque oca isanquenataqueniri pashini pampoyeaveitachaniri: “Tasorentsi, niotaque eiro pishinetiritsi pitomi impatsaye quipatsiqui: tempa oshequi pineacameetsataqueri”.

³⁶ Pinquenqueshireteri peerani Iravirini, imoncarataqueneri Tasorentsi maaroni icoacairiri. Impoiji icamaque iriori, torein. Itijeetaqueri, itsipayeetaqueri ishanincapeeni, irosati ipatsaasanotantanaca.

³⁷ Irompa irinti Jesoshi itinaajiri Tasorentsi, te impatsayeji irinti.

³⁸⁻³⁹ Meecca, noshaninca, piojeitavaquero oca. Ainiro pantajeitavaqueri caari cameetsatatsi, iro cantaincha aneatsi meecca irinti Jesoshi, icavitsaajeitatuemp. Te incoacayempiji pijajeite Sharincaveniqui, irointi icoaque iroameetsajeitempi, iroavisacojeitempi. Ocar meecca isanquenare Moishishi, tecatsi oncantea oameetsajeitempi.

⁴⁰ Paamaventeayea, piquempetaricari yora iquenquetsatacotiniri camantantatsiniri icantini:

⁴¹ “Pamene, tseencantatsiri, pinquenqueshirejeitanaquea: pijajeiticari Sharincaveniqui. Coajica pineajeitena nontasoncantasanotanaque, nomayero caari pineapinijeiti. Ariorica noncamantavetempi paitarica nanteri, eiro piquemisantanatsi”.

Irootaque icantaqueriri Pavoro ijorioririnte.

⁴² Ari isoquijajeitanaji, icantasanojeitavajiri:

—Coajica otsipani saavaro pimpcajanteya aisati. Pashini pinquenquetsatacaajeitenaro niotasanotanteari.

⁴³ Ari ijajeitanaji. Jeri Pavoro iquenanaaji avotsiqui, itsipatanajari Verenave. Yoijajeitanaqueri quemisantatsiri: jeri joriosanori aisati peajanchari jorio. Ari icantaqueri Pavoro:

—Pinquemisantasanoteri Jesoshi irineshinoncatantempiri Tasorentsi.

⁴⁴ Ari otsipani saavaro yapatojeitaca oshequi nampitsiquiniri. Te irishequiteji caari apatotacha. Yapatotimantaro inquemisantero irineane Tasorentsi.

⁴⁵ Yora ivincatsaritepee jorio ineaqueri apatojeitainchari, irosati ocantimoneentantacari. Icantajeiti:

—Te oncameetsateji oca icantiri Pavoro, aisati te incameetsateji iriori. Oshequi yamatavitanti.

⁴⁶ Cameetsa yacasananotaqueri Pavoro, jeri Verenave. Te intsaroashiretanaquejei, icanti:

—Avirojeitaque nintavetacari nocamantajeivetaquempiro irineane Tasorentsi, iro cantaincha pitseencavaquero avinti. Meecca niotaque te pincoyeji pincantaitatiyempani paneasanotaje anta inquitequi. Meecca nojatashiteri irinti pashinisati atiri, niotaque inquemisante irinti.

⁴⁷ Irootaque nojatashitantariri, tempa icantitaquena Novincatsarite: “Tempa avirotaque notiancaqueri pincamantayeteri pashinisatipee atiri, iravisacotantajeiri iriori. Pinquenquetsatacaajeiteri maaroni, pintsoteajeitanaquero maaroni nampitsipeequi”.

⁴⁸ Iquemantajeitavacari yora caari joriotatsi, iquimoshirejeitanaque. Icantajeiti:

—Cameetsa oni irineane Avincatsarite.

Ari itimi oshequi caari joriotatsi icoyeaqueri Tasorentsi intime inquitequi, incanteani: iriojeitaque quemisantajeitaintsiri, maaroni.

⁴⁹ Otsoteayetanaca irineane Avincatsarite maaroni nampitsipeequi anta.

⁵⁰ Irinti ivincatsarite jorio, oshequi iquisajeitanaca. Ijatashijeitiro quemisantincaro shanincatacariri savicacaantayetatsiri, aisati ijatashijeitajuera savicacaantajeitatsiri iriori. Icantajeitiri:

—Tsame, anquisajeiteri yora Pavoro, jeri Verenave. Te incameetsateji.

Irosati itiancantajariri:

—Tsame pijajeitaje. Eiro pipocajitsi aisati aca nonampiquica.

⁵¹ Ari iriori, ipacaraanajiniri quipatsi iitiquiniri, pacara, pacara. Icantiri:

—Meeca piojeitauena eiro nopiajatsi. Te pincoajeiteji pinquemisante.

Irosati yovaantanaca Iconioqui.

⁵² Ari iquimoshiretasanojeitanaque quemisantatsiri anta. Quiso oasanojeitajuera Ishire Tasorentsi.

14

Yovaanaja Pavoro anta Antioquiaqui.

¹ Anta Iconioqui iqueapaaque Pavoro, jeri Verenave, anta pancotsiqui yapatojeitantari jorio, iquenquetsatapaaque. Iquemisantavaque oshequi catsini jorio, aisati caari joriotatsi.

² Yora jorio, caari quemisantatsi, yoamejeitajuera pashinisatipee atiri, iquisajeitajuera quemisantajeitatsiri.

³ Ari osamani isavicapaaque Pavoro, iquenquetsatocotapinitiri Avincatsarite, te intsaroyeji. Yora Avincatsarite, imatacaqueri quemisantatsiri itasoncantayeti, imatacaqueri paitarica caari ineapiniyeti. Iotacaqueri atiri queariotasanotaque ineshinoncatasanotaque.

⁴ Iro cantaincha icantavacaajeitanaca nampitsiquiniri. Itimi aparopee quempeyetanacariri jorio. Irio itsipa quempeyetanacariri quemisantatsiri.

⁵ Jeri yora jorio, caari joriotatsi, pincatsaritatsiri: icoajeivetaca iroatsinayerime, impichaanaterime Pavoro, jeri Verenave.

⁶ Ari iotanaque, irosati ishiajeitantanaca anta Irishitaraqui. Impoiji yovaanaja Terevequi. Irootaque oca nampitsi Iricaoniaquiniri. Aisati ijati otsapiyetapaa,

⁷ icamantajeitapaqueri atiri jaoca incanteari iravisacotantajeiri.

⁸ Anta Irishitaraqui isavicaque shirampari yamashita iitiqui. Choritatsiri ini. Aitaque icantitapaani iroaquera itimapaaque. Te iraniitimateji capichaji.

⁹ Iquemisantajuera Pavoro. Ari yamenapaaqueri iriori iotacotaqueri, iquenqueshiretiri Tasorentsi, iravisacotantajeiri.

¹⁰ Antearojenca icantaqueri:

—Pincatiasanotaje.

Ari imitajaitanaque iriori, mita, irosati yaniitantanaja.

¹¹ Oshequi catsini icarati neaquerori oca imataqueri Pavoro. Ari ineantantajeitaro irineane iricaoniasati, antearojenca icantajeitanaque:

—Yaniireashitapaaque tasorentsitatsiri, iquempetapaacari shirampari.

¹² Iriori Verenave ipajitashitari Seoshi. Yora Pavoro quenquetsatacaantatsiri, irootaque ipajitantacariri iriori Eremeshi.

¹³ Anta oquempejitaro nampitsi ovanco Seoshi. Jeri yora saserotementarori Seoshi, yamajeitajuera toropee, aisati inchateaquei. Yamayetaqueri anta iqueapinitiro nampitsi, icarajeitajuera oshequi ishanincepee. Icoajeivetaca iroyenerime toropee; imperime Verenave, jeri Pavoro.

¹⁴ Iquemantavaitiari iriori, itsereanaquero iitsaare. Ishiashijeitanacari apatotimentariri. Icajemaque,

¹⁵ icanti:

—Ashaninca. ¿Paita pantajeitiri? Aisati aquempeavacaajeita, atiri anajeiti. Iro nopocantacari noncamantempro pojocajero caari cameetsatsi pantayetiri. Eiro meeca patsipetashitajarotsi pimpincatsatashitajeero pivetsicayetiri. Pinquenqueshirejeiteri Tasorentsisanori irinti, yora aneasanotatsiri. Iriotaque vetsicajeitirori inquite, quipatsi, incajare, maaroni; yovetsicajeitiri aisati maaroni timantajeitarori.

¹⁶ Peerani ishinejeitimpi maaroni caari joriotatsi paitarica pameyetacari.

¹⁷ Iro cantaincha yovetsicaquempiro Tasorentsi iotacaajeitimpi. Ineshinoncajeitaquempi. Yoariajeitimpipro incani. Itimacayetiro oitsoquitapinitantari inchatopee. Iquemacaapinitimpipro poari. Yoimoshirencapinijeitimpi. Iriotaque yoca nocoacaquempi pimpincatsateri: eiroquea pipincatsatanatsi nainti.

¹⁸ Oshequi icamantanavetacari, iro cantaincha irovetanaincha iroashiteanarime toro.

¹⁹ Jeri ipocapaaque joriopee, poneayetachari Antioquiaqui aisati Iconioqui. Yamatavitaapaaqueri oshequi atiri, icantiri:

–Oshequi yamatavitanti Pavoro: pinquisheru.

Ari ipichaaajeitaqueri, ijijeivetacari camasanotaque. Inoshicanaqueri, yojocaitiri anta otsapitapaaca nampitsi.

²⁰ Ari ijatashijeitaqueri quemisantatsiri, ishoncapaacari; irosati itinaantanaja. Ipi-ajeitanaja nampitsiqui. Oquitaitetamanaji yovaanaja Pavoro Terevequi, itsipatanajari Verenave.

²¹ Iquenquetsatacotapaaquero jaoca icantari Tasorentsi yoavisacotanti. Iquemisanta- caaqueri oshequi atiri. Impoiji ipianaja Irishitaraqui, Iconioqui, Antioquiaqui.

²² Aiquero ijatatiini iquemisantasanotacairi quemisantatsiri. Icantasanotiri:

–Eiro pojoquirotsi oca piquemisantaqueri. Oshequi anquematsicataquearo paitari- capee, irosatiquea ajatantanaqueari anta ipincatsaritinta Tasorentsi; iro cantaincha eiro ashemarotsi.

²³ Jaocarica anta yapatotapinijeitari quemisantatsiri, icoyeaqueneri jivatacaajeiter- ineri. Impoiji iquenquetsatacaajeitiri Tasorentsi, aisati itijeita. Impoiji aisati icantajeitiri Avincatsarite:

–Jerica quemisantaajeitimpiri. Pojocacoventajeiteri.

²⁴ Ari iquenanaque Pishiriaqui, irosati yareetantanaca Pampiriaqui.

²⁵ Icamantantiro irineane Tasorentsi anta Perejequi, irosati yovaatanaja anta Atarayaqui.

²⁶ Irosati itetantanaja pitotsiqui, iquenacotanaji Antioquiaqui. Aitaque anta itianquee- taquerinta peerani, icanteetirini Tasorentsi: “Jeri yoca, pineshinoncateri irimatantem- pirori paitanirica pincoacayeriri”. Tempa aitaque imataquero.

²⁷ Ari yareetapaaja. Yapatojeitaqueri quemisantaajeitatsiri. Iquenquetsatacaajeitaqueri maaroni yantacaajeitaqueriri Tasorentsi iriori. Aisati icantiri jaoca icantari ishinejeitan- tajariri pashinisatipee atiri iquemisantaajeitantajari.

²⁸ Ari osamanitanaque itimimotaqueri iyemisantaririnte anta.

15

Icoaveta jorio inquempetearime itsipapee atiri yameyetacari iriori.

¹ Ari yareejeitapaaca Antioquiaqui joriopee poneachari Joreaquu. Yoametapaaqueri ayemisantaririnte, icantapaaqueri:

–Isanquenatini Moishishi: “Pintoyeantea”. Eirorica piquemisantiri, eiro pavisacotajitsi.

² Ari ipiatsatavacari Pavoro, itsipatari Verenave. Te capichaji incantavacayea: oshequi yoametavacaaca. Ari itianquiri Pavoro, Verenave, aisati aparopee pashini. Icantavaqueri:

–Pijajeite Jerosarequi anta itiminta iroamereni Jesoshi, aisati yora quenquetsatacaan- tatsiri. Pisampitacoventapaaqueri icantiri yoca. ¿Queariompa icoacaajeitaquena non- toyeanajeitea?

³ Iriio tiancajeitiriri quemisantatsiri anta Antioquiaqui. Ari ijatanaque, iquenanaque Jenishiaqui. Yovaanaca, irosati Samariaqui. Icamantapiniyetiri joriopee quemisantatsiri:

–Oshequi iquemisantaajeiti meeca pashinisatipee atiri, yojocajeitiro yamejeivetari peerani.

Ari iquimoshiretasanajeitavaque maaroni quemajeitavaqueriri.

⁴ Anta yareejeitapaacanta Jerosarequi, yaacameetsajeitavaqueri quemisantaajeitatsiri: iroamereni Jesoshi, quenquetsatacaantatsiri, maaroni. Icamantapaaqueri:

–Oshequi imatacaaquena Tasorentsi noquemisantacaajeitiri itsipapee atiri anta otsipa- peequi nampitsi.

⁵ Ari icatiayetanaca aparopee variseo, quemisantatsiri inaveta iriori. Icantiri:

–Aitaque incanteari intoyeantea itsipapee atiri. Ocameetsati antsoteaquero isan- quenareneni Moishishi, maaroni.

⁶ Ari impoiji yapatojeitanaja aisati iroamereni Quirishito, quenquetsatacaantatsiri, maaroni. Icoajeitaque iriotanaque paitarica incanteriri antioquiasati.

⁷ Oshequi yoametavacaajeitaca. Impoiji icatianaca Petero, icantajeitiri:

—Noyemisantaririnte. Peerani icoyeaquena Tasorentsi, piojeitaquero: tempa pinea-cojeitaquena. Aitaque icoyeaquena noncamantajeiteri pashinisati atiri jaoca incanteari inquemisantantajeiri, iravisacotantajeiri.

⁸ Tempa irio Tasorentsi iotirori aquenqueshirejeitiri. Iriotaque tianquiniriri itsipapee atiri Ishire, ayojeitancari yavisacojeitaji. Tempa meeca iquempejeitaquene arori.

⁹ Queario, aitaque amoncarajeitacari iriori. Tempa aisati icanti Tasorentsi: “Pimoncar-atavacajaiteca”. Iquemisantaque itsipapee atiri, irosati yoameetsashireantajariri.

¹⁰ Meeca, ꝑicoaquempa pincanteri Tasorentsi: “Te pioteji”? Jero oca picoaque pimpomer-entsitacaasanoteari ayemisantaririnte. Arojeitaque jorio, amejeivetaro, iro cantaincha te amateroji antsoteajeitero, aisati maaroni ashanincani, te irimajeiteroji. ꝑJaoca incanteari itsipapee atiri irimatantearori? Oshequi opomerentsitaca.

¹¹ Ineshinoncatajeje Jesoquirishito, irootaque avavisacotantajari. Tempa maaroni ashirejeitaro oca. Aisati irishiajeitajeje arori itsipapee atiri.

¹² Imajerejitanaque maaroni apatojeitainchari. Iquemisantajeitavaqueri Verenave, aisati Pavoro. Icantaqueiri:

—Imatacaaquena notasoncacoventiri itsipapee atiri. Imatacaaquena caari ineapinjieiti, irootaque iojeitancari queario Tasorentsi ini Jesoshi.

¹³ Impojji imajeretanaque apatojeitachari. Impojji aisati iquenquetsati Santiago, icanti:

¹⁴ —Noyemisantaririnte, pinquemisantena. Iquenquetsatacaimpi Shimo jaoca icanta Tasorentsi intantajarori ineshinoncajeitajiri pashinisati atiri. Aitaque icoyeaqueri iquen-quetsatacotantajariri.

¹⁵ Omoncarataca oca isanquenatitacani camantantsiniri pajitachaniri Amoshi. Isanquenatini:

¹⁶⁻¹⁸ “Icanti Avincatsarite: ‘Coajica nompiapaaje quipatsiqui, novetsicapaajero aisati inampini Iravirini itirevetacari. Novetsicajero aisati maaroni pancotsi. Nocoaque iraventajitena maaroni itsipapee atiri, nocoaque inquemisantajeitena’. Irootaque icantiri Avincatsarite, vetsiquirori peerani maaroni timajeitatsiri”.

¹⁹ Irootaque nocantancari nainti te oncameetsateji ampomerentsitacayeari yora pashinisatipee atiri. Iquemisantiririca Tasorentsi, moncarataca.

²⁰ Iro cantaincha, tsame ampacanteri sanquenarentsi. Ancamanteri oca: “Paamavente-aro yovetsicane atiri ijitasorentsitashitari: amatavitashijeitimpicari. Eiro pineavintsatirotsi tsinane caari pai. Eiro poaritsi ampitsiitachari, poacotarocari ivatsa iriraja”.

²¹ Tempa maaroni savaroqu, ariorica yapatotapinijeita ajorioririnte, icantani itsaneapinitacaro oca nocantimpiri: tempa itsaneajeitacaroni peerani Moishishi. Eirorica yantajeitiro oca, ari ocameetsati iraacameetsajeiteri ashaninceapee.

Irootaque icantaqueriri Santiago.

²² Ari onimojeitaqueri maaroni quemisantajeitatsiri, icanti:

—Cameetsataque. Irootaque ancamanteriri antioquiasati.

Ari icoyeajeitaqueri apite jivatacaajeitiriri quemisantatsiri: Jorashi Varasavashi, aisati Shirashi. Icantaqueiri:

—Avirojei oijajeiterineri Pavoro aisati Verenave anta Antioquiaqui. Pincamantapa-queri ayemisantaririnte nocantaqueri aisati pimpapeeri sanquenarentsica.

²³ Jero oca ocantiri sanquenarentsi isanquenatiniri: “ꝑAinirompi noyemisantaririnte? ꝑTecatSIMPA oyempine? Aca Jerosarequi nocarajeitiri iroamereni Jesoshi aisati itsipapee quenquetsatacaantatsiri. Meeca nosanquenajeitimpiro caari joriotatsi, savicajeitatsiri anta Antioquiaqui, Shiriaqui, aisati Shirishiaqui.

²⁴ Noquemacotaqueri yora nocarajeivetari: oshequi iquenquetsatacaamempeaquempi, icomitacaquempi. Icantashiretacaquempi. Te naro tianquerine.

²⁵ Aitaque onimojeitaquena maaroni narori nontianquempiri yoca nocoyeaqueri. Intsi-patanaqueari Verenave, jeri Pavoro: yoca nonintane.

²⁶ Iriojeitaque caari tsaroatsi incamimentero Avincatsarite Jesoquirishito.

²⁷ Nontianquempiri Jorashi, jeri Shirashi. Incamantasanotempiro iriori oca nosanquenatimpiri.

²⁸ Ari onimotaquero Ishire Tasorentsi, aisati onimotaquena narori noncamantempiro oca. Eiro noperanatimpitsi, irointi apatiroti pimatero oca.

²⁹ Eiro poaritsi yora yoyeevetacananiri yovetsicane atiri: caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Ariorica poyeari, oshequi inquenqueshiretanaque joriopee. Eiro pineavintsatirotsi tsinane caari pai. Ariorica pimayetaquero oca, cameetsataque. Ari cameetsa pintimajeite”. Irootaque isanquenatiniriri antioquiasati.

³⁰ Ari ijajeitanaque Antioquiaqui yora itianquiri. Yapatojeitapaacari quemisantajeitatsiri, ipapaaqueri sanquenarentsi.

³¹ Ineanajeitavaquero, irosati iquimoshirejeitanaca.

³² Irisati camantantatsiri iriori Jorashi, aisati Shirashi. Oshequi iquenquetsatacaapaqueri iquimoshiretacaapaqueri, iquemisantacaasanojeitapaqueri.

³³ Osamani isaviquimotaitiri, impoiji ipianaja aisati Jorashi. Yovetsatavajari yora iyemisantaririntepee, icantavajiri:

—Cameetsayea pijataje.

Irosati ipiantanaja anta itiminta tiancaqueriri.

Yapiitajiro iquenaquenayetaji Pavoro.

³⁴ Irinti Shirashi icoaque irisavicanaaje Antioquiaqui.

³⁵ Irosati isavicanapaaca Pavoro, jeri Verenave. Yoametantanaque, icamantantanajiro irineane Avincatsarite. Itsipajeitacari aisati oshequi pashinipee, icamantantajeiti.

³⁶ Pashini quitaiteri icanti Pavoro:

—Verenave. Tsame anejanteri aisati ayemisantaririnte anta maaroni nampitsipeequi: yora peerani acamantajeitaitiri irineane Avincatsarite. Amenajanterita jaocarica icantajeitacari.

³⁷ Icoaveta Verenave iraanajerime aisati Joa. Ipajiyetiri aisati Maricoshi.

³⁸ Iro cantaincha Pavoro, icantaqueri:

—Peerani anta ajatantacari Pampiriaqui, yojocanaquee. Te intsipatanaqueeji anta aquenquetsatinta. Eiro meeca aanajiritsi.

³⁹ Ari ipiatsatasannotavacaaca, irosati injantareavacantanaca. Yora Verenave, yaanaqueri Maricoshi. Itetanaca pitotsiqui, ijataque Tsipirequi.

⁴⁰ Irintiquea Pavoro, yaanaqueri iriori Shirashi. Icantajeiti quemisantatsiri:

—Novincatsarite, pineshinoncajeiteri yoca, quiso poanaqueri cameetsa.

⁴¹ Ari iquenaanaque Shiriaqui, aisati Shirishiaqui. Anta iquemisantacaasanojeitaqueri quemisantatsiri.

16

¹ Impoiji yareetapaaja Terevequi, aisati Irishitaraqui. Itimaiti anta quemisantatsiri pajitachari Timoteo. Irootaque irinirontari jorio. Irompa irinti iriri, te irijorioteji. Quemisantatsiri oni iriniro.

² Icantajeiti quemisantajeitatsiri anta Irishitaraqui aisati Iconioqui:

—Icameetsati Timoteo.

³ Icoaque Pavoro intsipatanaqueari. Iotacojeitiri joriopee iriri, caari ini jorio iriori, icantantariri Timoteo:

—Ariorica pintoyeantea, iracameetsajeitempi jorio.

Icantiri:

—Ari.

Ari yaanaqueri, itoyeantimentanacari joriopee, timayetatsiri anta nampitsipeequi.

⁴ Impoiji iquenantanjari nampitsipeequi, yoamejeitaqueri maaroni icantayetiri jerosaresati: yora iroamere Jesoshi aisati jivatacaajeitiriri quemisantatsiri. Icantiri:

—Ariorica inquemisanteri itsipapee atiri Quirishito, eiro acantiritsi: “Pimpeajea jorio”.

⁵ Ari iquemisantacaasanojaqueri maaroni quemisantatsiri. Maaroni quitaiteripee ai- quero ijatatiini yoshequiasanotanaque.

⁶ Iquenaanaque Jirijiaqui, Carashiaqui. Tempa ocantitacari Ishire Tasorensi:

—Eiro picamantantitsi anta Ashiaqui.

⁷ Yareetanaca Mishiaqui, ari icoavetaca irijateme Vitiniaqui. Iro cantaincha aisati te oshineteriji Ishire Jesoshi.

⁸ Iquenaanaque Mishiaqui, irosati yoirincantanaja Toroarequi: ari noneavaqueriri narori.

⁹ Tsiteniriqui imishitacari Pavoro aparo maseroniasati. Icatiimotapaacari, icantasano- tapaaqueri:

—Pimpoque aca Maseroniaqui, pintacojeitena.

¹⁰ Irosati nocoantanaca jaoca nonquenanteari nareetanteari Maseroniaqui. Niotanaque itiancaquena Tasorensi anta noncamantanteari savicajeitatsiri jaoca incantajeiteari iravisacojeitantajeari.

Ijati Pavoro Eoropaqui.

¹¹ Anta Toroarequi notejeitanaca pitotsiqui. Aacotanaquena tampea Samotorashiaqui. Oquitaitetamanaque aisati novaamanaja Neaporishiqui.

¹² Novaanaja aisati Jiriposhiqui. Irootaque intapaarori nampitsi Maseroniaquiniri. Inampitapaaro meeca poneachari Oromaqui. Ari notimajeitapai aparopee quitaiteri.

¹³ Ari saavaroqui nosoquijanaji omoroqui tantorentsi shoncarori nampitsi, nojatanaque anta otsapijaqui eni. Naamaapaacari aitaque anta iquenquetsatacapinitiri joriopee Tasorentsi. Nosavicapaaque, noquenquetsatacapaaquero tsinanepee apatojeitainchari.

¹⁴ Otimaiti aparo quemavaquenari pajitachari Iriria. Oponeanaca peerani nampitsiqui anta Tiitiraqui. Irootaque quemisantiriri Tasorentsi. Opimantapiniyetiro tocoya quisaaripee. Iotacaquero Avincatsarite oquemisantavaquero icantayetiri Pavoro.

¹⁵ Ovaotisataca, otsipajeitacari maaroni savicajeitatsiri ovancoqui. Ocantasano-taquena:

—Ariorica piotaquena noquemisantasanotiri Avincatsarite, pijajeite novancoqui, pisav-iqumotanaquenatsita.

Ari ocoacaaquena, irosati nocantantacari:

—Tsamequeti.

¹⁶ Ari nojajeitanaque anta iquenquetsatacapiniyeetirinta Tasorentsi. Otonquio-tavaquena nampirentsi, iotacairo camaari. Iotashita, oquenquetsatacotitaro paitarica tequeratsita oneeroji. Irootaque yaantayetacari oshequi quirequi yora nampitarori. Icantapinitiri atiri:

—Pincoaquerica pinquemero, pimpinatena.

¹⁷ Ari oijajeitanaquena. Ocajemi, ocanti:

—Yoca shirampari, iriojeitaque quemisantiriri Tasorentsi, yora jenoquiniri catsini. Incamantajeitempi jaoca pincanteari pavisacotantajeari.

¹⁸ Aitaque ocantapinita maaroni quitaiteriqui. Ishemanacaro Pavoro, ipitsocashitanacaro, icantanaqueri camaari:

—Iriotaque Jesoquirishito noquemisantiri, irootaque nocantantimpiri: pojocanajero.

Irosati yojocantanajaro.

¹⁹ Iotanaque yora nampitarori, icantaniroti:

—Eirove, tecatsi ancantajea meeca aantajeariri quirequi.

Irosati yaantacari Pavoro aisati Shirashi, tapi. Inoshicanaqueri nampitsiqui, nianqui: anta itiminta pincatsaritatsiri.

²⁰ Yaanaqueri pincatsariqui, icantapaaqueri:

—Iquenqeshiretacaajeitakuena maaroni savicajeitatsiri aca anampiqui. Tempa jorio ini iriori.

²¹ Icamantacotiro oca yameyetacari iriori. Te oncameetsateji anquemisantavaquero icantaqueeri, te oncameetsateji ameyetearo. Tempa ashanincajeitacari arori oromasati.

²² Iquisajeitanaca maaroni apatojeitainchari, irosati icantantari comantanti:

—Pisapoquiteri iitsaare Pavoroca, jeri Shirashica; pimpasatsempequijeiteri.

²³ Oshequi ipasanataqueri, impoiji yoiminqueaqueri caravosoqui. Icantasanotiri catsini yora shentiriri:

—Cameetsayea pishentasanoteri, ishiacari.

²⁴ Iquemaquero oca icantasanotaqueriri, yoiminqueaqueri. Aisati itsinacaquuitaqueri inchatoqui.

²⁵ Nianquiite tsiteniri, ari iquenquetsatacaajeitiri Tasorentsi, ipampoyeaventajeitaku-
queri. Iquemisantajeitiri itsipapee yoiminqueeyetiri.

²⁶ Omapocashitanaca onicanaca quipatsi, aisati onicanaca pancotsi, jero maaroni ot-incamipee, nica, nica, nica. Intsipaita ashitareajeitanaca ashitacorontsipee. Irosati onijantareantanaca tsinacaquiivetacariri iitiqui.

²⁷ Itinaanaca shentiriri. Ineaquero ashitacorontsi, ashitareajeitanaca. Ijtitashive-taca shiajeitanaca yora yoiminqueajeitiri, irosati yaantanacaro isavirite, irovetanaincha iroashitanajeame irisati.

²⁸ Ari intsipaita icajemacotanaqueri Pavoro:

—Eiro poashitajatsi avisati. Irosati nocantajeita maaroni aca, te noshiyeji.

²⁹ Icantiri variria inampire:

—Pamaquena tsiomentotsi.

Ari yamaqueneri, irosati iqueantanaca anta yoisovetacarinta. Ipioncanaque, itiyeroimotapaacari Pavoro, jeri aisati Shirashi.

³⁰ Impoiji yaanaqueri saiteriqui. Icantiri:

—Noshaninca, zjaoca noncanteari narori navisacotantajeari?

³¹ Yacanaqueri:

—Pinquemisanteri Novincatsarite Jesoshi, iroavisacotantajempiri. Aisati inquempejeit-eari maaroni pishaninca.

³² Icamantasanotiri irineane Tasorentsi. Aisati ishanincapee iriori, icamantajeitiri.

³³ Irosati osaite yaantanacari, iquiyayetajiniri oca yaaveaqueri ipasanataqueri, impoiji yaavintajiri. Irosati ivaotisantantaja, icarajeitakueri maaroni ishaninca.

³⁴ Ari yaanaqueri ivancoqui, yoacaapaacari. Iquemishirejaitantanacari maaroni ishaninca. Iquemoshirejaitantanacari maaroni ishaninca.

³⁵ Ari oquitaitetamanaji, jeri yora pincatsari itianquiri variria:

–Pijate caravosoqui, pincamantaiteri iroimisoquijajeri quemisantatsiri.

Ari ijataque, icamantapaqueri shentiriri:

–Pintiancajeitajeri irijatajeta.

³⁶ Irosati icantantajari iriori:

–Icantajana pincatsari nontiancajemp. Meeca pisoquijanaje, cameetsa pijataje.

³⁷ Iro cantaincha icantiri Pavoro:

–Jampa noshanincatacari oromasati. Te irisampitacoventenaji pincatsari, te irioteji ainirorica nantane. Ipasatacantashitaquena, aisati yoiminqeacantashitaquena. Tempa ineajeitaquena maaroni savicajeitatsiri yoashinoncaquena: ijijeiveta ainiro nantane. ¿Ariompa meeca irimanaquero iroimisoquijacantajana? Tempa eiro. Impoqueta iriori, iriotsitaquea oimisoquijajantene iriojeitanteari ishanincapee tecatsi nante.

³⁸ Ari ipianaja variria, icamantapaajiri. Iotantacari pincatsari ishanincatacari Pavoro oromasati, ari itsaronaque.

³⁹ Ipocapaaque, cameetsa iquenquetsatacapaaqueri. Irosati yoimisoquijantapaajari:

–Meeca pijataje, pojocanajero nonampi.

⁴⁰ Ari isoquijanaji, iquenanaji ovancoqui Iriiria. Ineapairi ayemisanrarinte, icantapaqueri:

–Cameetsayea pintimajeite.

Irosati yovaantanaja pashiniqui nampitsi.

17

¹ Iquenanaque Pavoro Antiporishiqui, Aporoniaqui, irosati yareetantaca Tesaronicaqui. Ari anta otimi pancotsi yapatotantari jorio,

² irosati iqueantapaaca. Aitaque icantatiani yametapinitaro iquenquetsatacapinijeitiri jorio. Ocarati mava saavaro yoamejeitiri ocantayetiri Sanquenarentsi.

³ Ari yoametasanotapaqueri. Iotacaasanotaqueri, icantiri:

–Aitaque ocantitani Sanquenarentsi: “Irineacatsitaquearo yora Quirishito. Incamaque, irosati intinaantajeari”. Iriro nocamantacotiri Jesoshi, iriotaque Quirishito.

⁴ Iquemisantavaquero aparopee icantaqueriri, irosati yoiijaitantanacariri Pavoro, jeri Shirashi. Aisati iquempjeitaca oshequi caari joriotatsi, quemisantatsiri: yoiijaitanajeari Pavoro. Aisati oquempetaca iroori tsinane, ishanincapee pincasaritatsiri. Oquemisantajeitaque. Te aparopee one iroori.

⁵ Ari oshequi iquisanaca joriopee, yapatojeitaqueri caari cameetsajeitatsi, aisati perayetachari. Iquisacaajeitacari timajeitatsiri nampitsiqui. Ijajeitanaque ivancoqui Jaso, icoajeivetapaacari Pavoro, jeri Shirashi. Icoavetaca iranaquerime anta yapatojeitacanta atiri, inquisajeiterime.

⁶ Te irineapeeriji, irinti inoshicashitanaca Jaso, jeri aparopee quemisantatsiri aisati. Yaanaqueri anta savicaaantatsiriqui. Icajemajeitapaque:

–Jeri yoca quisacaantajeitaqueriri maaroni savicajeitatsiri. Jeri yoca Jaso aacameetsataqueriri.

⁷ Yoametanajeiti, icanti: “Eiro pimoncaratiniritsi Sesari icantimpiri. Timatsi pashini pincasaritatsiri, yora Jesoshi”.

⁸ Ari iquemantavacarori oca, iquisajeitanaca atiripee, aisati yora savicaaantatsiri.

⁹ Icantanaque Jaso, aisati itsipapee:

–Jerica quirequi: pinquempoyeajenari piotantenari eiro noshiapitsatimpitsi, tecatsi nante. Ontimerica nantane, ari paasanoterita noirequite.

¹⁰ Irosati itiancantajari. Ari otsitenitanaque. Itiancajari Pavoro aisati Shirashi. Iriro tiancajibiri ayemisanrarinte. Yovaanaca Vereaque. Yareetantapaacari, irosati ijatantapaaca yapatotapinitanta jorio.

¹¹ Iriro irinti cameetsasananotaintsiri, te irishiyeriji yora tesaronicasati. Icoasanotaque inquemisantero Sanquenarentsi. Ineanatapinitiro maaroni quitaiteiriqui iriotanteari queariosanorica oca icantaqueriri.

¹² Oshequi iquemisantajeitaque iriori. Oquemisanti tsinaneppee caari joriotatsi, ishanincapee pincasaritatsiri, maaroni. Aisati iquemisanti shiramparippee, te aparo irine: oshequi catsini.

¹³ Ari icamantantiro Pavoro irineane Tasorentsi anta Vereaque. Iotacotaqueri joriotatsiri, yora tesaronicasati. Ipocapaaque iriori, iquisacaapaacari atiri, icantashiretaqueri. Icantiri:

–Eiro piquemisantajeitiritsi Pavoro, irointiquea pinquisajeiteri.

¹⁴ Yora quemisantatsiri intsipaite itiancaqueri Pavoro anta incajarequi. Irinti savi-canaaintsi Shirashi, jeri Timoteo.

¹⁵ Ainiro aanaqueriri Pavoro anta Atenashiqui. Icantavajiri Pavoro:

—Ariorica pareetajea pinampiqui, pincamantapaajenari Shirashi aisati Timoteo intsipaite impocajeta.

Ari ijatanaque, icamantapaajiri.

Yantayetapairi Pavoro anta Atenashiqui.

¹⁶ Ari yoyeapaajiri Pavoro anta Atenashiqui. Irio yoyeapaajiri Shirashi aisati Timoteo. Ineapaaquero anta nampitsiqui oshequi catsini yovetsicashiyetari ijtasorentsishiyetari, irosati yoashiretantanaca.

¹⁷ Aisati anta Atenashiqui oshequi yoamejeitiri joriopée aisati caari joriotatsi: yora quemisantajeitiriri Tasorentsi. Oshequi yoametavacaajeitaca. Aisati iquempetacaapinitacari maaroni atiri anta nampitsiqui nianqui.

¹⁸ Yoametapaquero coopinitatsiri iriote paitaricapee, icarajeitiri iroamereni Epecoreo. Aisati icarajeitiri caari intacotacha irisati: yora icanteetiri eshitoico. Yora Pavoro icamantacotiri Jesoshi, aisati icanti:

—Intinaaje camajeitatsiri.

Icanti aparopee quemavaqueriri:

—¿Paita icantaqueri yoca neaveetashitachari?

Icanti pashini:

—Icamantacotiri pashinisati tasorentsitatsiri.

¹⁹ Yajiricaqueri, yaanaqueri anta yapatotapinijeitanta, icantajeitiri:

—¿Cameetsampa niotero oca iroaqueratatsiri poametantiri?

²⁰ Te nonquemapiniteroji oca picantaqueri. Nocoajeiti niotero jaoca ocantacotari oca.

²¹ Aitaque icantari atenashisati: te intsameeteji, iriointi icoaque inquemisantashiyetari quenquetsatacaajeitiriri iroaquerayetatsiri caari iquemapinijeiti. Aisati iquempejeita poneayetachari paricoti, iquenquetsatacotashiyetaró paitapeerica.

²² Anta icatiaca Pavoro nianqui, icantiri:

—Atenashisati. Niotacotaquempi avirori, pashi poiroy piquemisantayeveta.

²³ Anta noquenaquenayetinta noneayetaquero oca piquemisantashiyetari. Aisati noneapaquero anta poapinitiniri pitasorentsipaitaricapee. Ainiro osanquenataca, ocanti: “Anquemisantanteariri tasorentsitatsiri caari ioyeeti”. Yora caari pioti: piquemisantashitari, iriotaque yoca noncamantempiri.

²⁴ Yora Tasorentsisanori, iriotaque vetsiquirori quipatsi. Yovetsicajeitiri maaroni timantajeitarori. Iriotaque vetsicayetirori inquite aisati quipatsi. Te irisavicantearoji ora pancotsi yovetsiquiri atiri.

²⁵ Aroquea ainti, tecatsi ancanteri intacojeiteari. ¿Ariompa incoanaque intacotearine? Tempa iriotaque oaneajeiteeri, intacojeiteeri irinti. Tempa iriotaque paqueerori maaroni, paitaricapee.

²⁶ Aparoni yovetsicavetaca peerani, iriotaque intanacaroniri; meeca ashequiajeitanaque, atsoteajeitanaquero maaroni quipatsipee. Iriotaque Tasorentsisanori cantatsiri jaocarica irisavicajeiteri maaroni atiri, aisati jaocarica oncarate intsoncajeitanteariri; iriotaque cantacantirori.

²⁷ Itimacaajeitaquee ancoanteari ayojeiteri, aisati aneantajeiriri coajica. Iro cantaincha, te irarejeiteji.

²⁸ Iriotaque ovaneajeiteeri. Iriotaque shevatacaajeiteeri. Iriotaque timacaajeiteeri. Tempa aitaque icantitani pishaninca pampoyeapinitatsiri: “Arojeitaque itimacaane Tasorentsi”.

²⁹ Arojeitaquerica itimacaanepee Tasorentsi, te oncameetsateji meeca ashiancanteri oro, perata, mapi, yovetsicanepée atiri. Aisati eiro ashiancantiritsi paitarica iquenqueshiretiriri atiri.

³⁰⁻³¹ Peerani te irioveiteani ashanincani, ari tecatsi incantimenteriri Tasorentsi inquisimenterini yantajeitiniri. Iro cantaincha loti irinti jaoca oncarate incantacoventanteariri maaroni atiripee. Timatsi shirampari pajitachari Jesoshi, icamasanovetaca. Impoiji itinaajiri Tasorentsi, iotantajeitariri maaroni atiri. Ipeaqueri iriori cantacoventantatsineri. Cameetsa incantacoventante. Irootaque icantantajeitariri atiri meeca: “Pinquenqueshirejeitanaquea, paventajeiteeri Tasorentsisanori”. Aitaque icantajeitiri maaroni atiri, jaocarica isavicajeitiri.

Irootaque icantiriri Pavoro.

³² Ari iquemantajeitavacariri icanti: “Itinaanaja camavetainchari”, ainiro shirontimenaarantacariri; iro cantaincha icantanaqueri pashinipee:

–Coajica pashini pampiitajenaro oca aisati.

Irosati ijatantanaja Pavoro.

³³⁻³⁴ Itimaarantaque quemisantavaqueriri, irosati yoiyatantanacari iriori. Ipajita aparoni quemisantatsiri Tionishio: iriotaque pincatsaritatsiri anta nampitsiqui, icarajeitiri ivincatsaririnte yoametavacaajeitaca. Aisati oquemisanti tsinane pajitachari Tamarishi. Icaratiri aisati itsipapee quemisantaajeitatsiri.

18

Icamantanti Pavoro anta Corintoqui.

¹ Impoiji yojocanajiro Pavoro Atenashi, yovaanaja anta Corintoqui.

² Anta ineapaaqueri joriotatsiri pajitachari Aquira. Pontosati inaveta, iponeanaca meeca Itariaqui. Iroaquera yareetapaaca. Itsipatapaacaro ijina, Pirishira. Iro ipocantacari, yora pincatsari pajitachari Caraorio iquisajeitaqueri jorio savicajeivetachari Oromaqi, itiancajeitaqueri:

–Pijajeite pashiniqui quipatsi, eiro pisavicajeititsi aca.

Ari isavicajeitapaaque Corintoqui. Impoiji yareetapaaca Pavoro, isaviquimotapaqueri.

³ Aisati iquempetavacaajeitaca, iojeiti yantiro tocoyapanco. Irootaque isaviquimotantapaacariri, itsipatavacaaca anta yantavejeiti.

⁴ Maaroni saavaroqui yoametavacaajeitaca anta pancotsiqui yapatojeitantari. Iquemisantacaasanojeitaqueri joriotatsiri, caari joriotatsi aisati.

⁵ Impoijiquea iponeanaja Maseroniaqui Shirashi aisati Timoteo. Irosati yareetantapaajariri. Ineapajiri Pavoro, iquenquetsati iriori. Icamantapinivetacari joriotatsiri:

–Iriotaque Jesoshi yora Quirishitotatsiri aamaajeitaniri peerani.

⁶ Ipiatsajeitavacari aisati icantimajeitaqueri, irootaque itequimotantanajariri iitsaare iriojeitanteari irotajatsi irijataje. Icantanaqueri:

–Avisati jatacantajanchane anta Sharincaveniqui: te aneroji nantane nainti, tempa nocamantavetaquempi. Meecaquea nojatashiteri irinti pashinisati atiri, nonquenquetsatacaajeiteri.

⁷ Ari yovaanaja anta, iquenanaajiro ivancoqui Tishio Joshito: iriotaque quemisantiriri Tasorentsi. Isavicanampitiro pancotsi yapatotantapinitari.

⁸ Yora Quirishipo iriotaque quenquetsatacaantatsiri anta pancotsiqui yapatotantari. Cameetsa iquemisantaqueri Avincatsarite. Aisati iquempejeitaca maaroni savicajeitatsiri ivancoqui, iquemisantajeiti. Aisati iquempetaarantaca oshequi corintosati. Iquemavaquero irineane Tasorentsi, iquemisantavaquero, irosati ivaotisantantajeitaca.

⁹ Ari tsiteniriqui ineashitacari Pavoro yora Avincatsarite, iquemaqueri icantiri:

–Eiro pitsaroitsi. Pincamantante, eiro pimajeretsi.

¹⁰ Quiso noaquempi. Aca nampitsiqui, tempa icarati oshequi quemisantanari. Tecatsi incanteetempi iroashinonqueetempi.

¹¹ Irosati isavicananaca aparo osarintsi, oquimojantsivetapaaja aisati. Yoamejeitaqueri corintosati irineane Tasorentsi.

¹² Ipincatsariventanti meeca Cario acayasati. Irosati joriopee iquisantanacari Pavoro. Yaanaqueri anta itiminta oametavacainchari.

¹³ Icantapaaqueri:

–Jeri yoca shirampari, icantanerotiri atiri: “Pinquemisantajeiteri Tasorentsi”, iro cantaincha icantashitacaro irineane Tasorentsi.

¹⁴ Irovetanaincha irineaveetanaqueme Pavoro, ari yora Cario icantiri joriotatsiri:

–Aviro jorioyetsatsiri, pashereajeitaquena. Irooricame iranterome yoca caari cameetsatsi, irooricame iroanteme, aitaquemequea oncameetsateme pamaquerime aca.

¹⁵ Jero meeca picantavacaimentacaro oca yoametantiri. Picantavacaimentacari atiripee. Picantavacaimentacaro Sanquenarentsi. Aviroyeate. Oshequi pashereajeitaquena: eiro pipocashitanatsi.

¹⁶ Pijanirojeitaje.

Ari ijajeitanaji.

¹⁷ Yora atiripee yaajeitaqueri Soshiteneshi, shepi; ipasanaajeitaqueri, tac, tac. Yora ipasataqueri iriotaque quenquetsatacaantatsiri anta pancotsiqui yapatojeitantari. Ineacovetacari Cario ipasajeitaqueri, iro cantaincha tecatsi oncantimoneentanaqueari, tecatsi incantajeiteri.

¹⁸ Oshequi quitaiteri isavicanaji Pavoro, impoiji ijatanaji, yojocanajiri ayemisantaririnte. Itetapaaca pitotsiqui, aacotanaqueri tampea Shiriaqui, icantanaca, shiririri. Itsipatanacaro Pirishira, jeri ojime, Aquira. Timatsi icashiacaqueriri Pavoro Tasorentsi, irootaque yameetantarori iishi anta Senquereshiqui.

¹⁹ Yareejaitantanacari Ejesoqui, ari yojocanajiri itsipataniri. Yovaanaja apaniro Pavoro anta pancotsiqui yapatopinitanta jorio, iquenquetsatacaapaaqueri.

²⁰ Icantajeivetavacari:

—Osamanita pisavicanaquetsita, poamejeitena.

Iro cantaincha te incoyeji iriori.

²¹ Icantanaqueri:

—Oshequi noshiretanaca meeca, iro cantaincha, ariorica incoacaaquena Tasorentsi, nompiaje, coajica.

Irosati itetantanaja aisati pitotsiqui, aacotanaqueri tampea, icaantanaca aisati shiririri.

²² Yareetapaaca Sesareaqi, irosati yovaantanaca Jerosarequi, iquivantapaqueri ayemisantaririnte. Impoiji yovaanaja aisati Antioquiaqui, iponeanaca peerani.

Mavatapaaque iquenayetaque Pavoro.

²³ Osamani isavicanaque Pavoro Antioquiaqui, impoiji ijataji aisati. Iquenaquenayetanaque Carashiaqui, aisati Jirijiaqui. Yoametasanojeitaqueri maaroni quemisantatsiri.

²⁴ Yareetaca Ejesoqui jorio pajitachari Aporo, arejantiriasati ini. Cameetsa iquenquetsatapiniti, iotasannotiro Sanquenarentsi.

²⁵ Icamanteetiri jaoca icantaniri Joani, aisati jaoca ocantari maaroni iquenquetsacotiririri Jesoshi, iro cantaincha tequera inquemacotasnotero maaroni yantayetiri iriori Jesoshi. Itsoteasantaquero yoametanotiro maaroni ioyevetari.

²⁶ Ari iquenquetsatacotasanotiro anta pancotsiqui yapatojeitanti. Te intsaroyeji, cameetsa iquenquetsati. Iquemantavacari Aquira, jero Pirishira, icantiri Aporo:

—Nocoaque nonquenquetsatacayempi apaniro.

Icanti:

—Ja, tsamequeti.

Ari apaniro itsoteaqueneri, yoamejeitaqueri jaoca icantari Jesoshi, aisati jaoca ancantajeitari ajajeitanti anta Tasorentsi.

²⁷ Impoiji icanti Aporo quemisantajeitatsiri:

—Nocoaque nojate meeca Acayaqui, noamejeiteri savicajeitatsiri anta.

Ari icantajeitavaqueri:

—Cameetsataque pijate, poamejeiteri cameetsa. Jeroca sanquenarentsi paajeitanaqueneriri.

Jero oca isanquenatavaqueneriri iyemisantaririnte anta: “Paacameetsajeitavaqueriyea Aporo, pinquemisantajeitavaqueri”.

Ari peerani ineshinoncatitacari Tasorentsi acayasati, irootaque iquemisantajeitanti-jari. Meeca, yareetantacari Aporo, oshequi intacojeitapaacari.

²⁸ Yoametasanotiri iotasannotantajari. Iquemajeitiri atiri yoametanotiro Sanquenarentsi, icanti:

—Iriotaque Jesoshi oquenquetsatacotiri Sanquenarentsi, iriotaque Quirishitotatsiri.

19

Ijataque Pavoro Ejesoqui.

¹ Isavicaque Aporo Corintoqui, iriori Pavoro iquenanaque toncaariqui, yareetapaaca Ejesoqui. Ineapaaqueri aparopee quemisantatsiri.

² Icantapaaqueri:

—Peerani, piquemisantajeitantacari, ¿paashiretaquerompa Ishire Tasorentsi?

—Te. Te nonquemacoteroji.

³ —¿Paita pivaotisatimentari?

—Novaotisatimentari Joa.

⁴ Ari icantiri:

—Ariorica iquenqeshiretanaca atiri, ivaotisatiri Joa iriotanteariri atiri te incoyeji irampiitapinitero caari cameetsatsi, irointi icoaque inquemisanteri Tasorentsi. Tempa icantitarini: “Pinquemisantajeiteri yora impoitapeenane, iriotaque Jesoshi”.

⁵ Ari iquemantajeitavacarori oca, ivaotisatimentajeitanacari Avincatsarite Jesoshi.

⁶ Yajiricainataqueri Pavoro itoqui, irosati opocashitantacari Ishire Tasorentsi, ineavevantajeitanacaro pashinipee neantsi, icamantantajeiti.

⁷ Aamaaca icarajeiti 12 shirampari vaotisajectainchari.

⁸ Ari ijatapiniti Pavoro pancotsiqui yapatotantari, icarati mava cashiri iquenquetsatacantayetaque. Te aneeriji tsaneacotearine. Oshequi icamantacotaqueri Tasorentsi, jaoca icanta ipincatsariventanti. Impoiji oshequi yoametavacaajeitaca.

⁹ Aparopee, te aneroji iquenqueshireantari, te incoyeji inquemisante. Icantajeitiri yora atiripee:

–Te oncameetsateji oca yoametantiri Pavoro.

Irosati yojocantanajari Pavoro, yaanaqueri quemisantajeitatsiri. Iquenquetsatacaapinitiri maaroni quitaiteriqui anta yoametantapinitinta Tirano.

¹⁰ Icantatiani apite osarintsi, irootaque iquemantacarori maaroni ashiasati irineane Avincatsarite. Iquemajeitaquero: joriopee, caari joriotatsi, maaroni.

¹¹ Itasoncantayeti Pavoro, imatantarori caari aneapiniti. Irio matacairiri Tasorentsi.

¹² Ipamititiri atiri ivaniote Pavoro, aisati yoicoro, irosati yavisacotantajari. Aisati iriori mantsiari, yaanaqueneri, yoavisacotajiri. Aisati yoavisacotajiri neiriri camaari.

¹³⁻¹⁴ Ainiro anta jorio, quenaquenayetatsiri, oavisacotapinivetariri neiriri camaari: iriojeitaque itomipee Esheva, icarajeiti 7. Jorio ini Esheva, ishanincatacari saserote. Ineajeivetacari Pavoro yoavisacotiri neiriri camaari. Icoajeiveta inquempetearime, icantashitantariri itsipa camaari:

–Ainiro Jesoshitatsiri iquenquetsatacotiri Pavoro. Iriotaque amitacotanari noavisacoteri yoca neaquempiri. Pojocanajeriqueti iravisacotantajeiri.

¹⁵ Yacanaqueri camaari:

–Noneiri Jesoshi. Noneiri Pavoro. Irompa avinti, te noneaniretempiji. ¿Paita nonquemisantantempiri?

¹⁶ Irosati imitajashitantanacari, mita; yantapaaqueri apitero. Imataqueri, irosati ishiatsempejujeitantanaca, yojocanaquero pancotsi. Oshequi yoatsinaqueri.

¹⁷ Iquemacojeitaqueri maaroni ejesosati: jorio, caari joriotatsine, maaroni. Itsaroajeitanaque aisati icantajeitaque:

–Icameetsati Avincatsarite Jesoshi: imatacairi quemisantasanotiriri yoavisacotiri neiriri camaari. Irinti shemetatsiri, tecatsi matacayerine.

¹⁸ Impoiji ipocapaaque oshequi quemisantatsiri, icantajeitapaaque:

–Ainiro nantayetiro caari cameetsatatsi, nocoaque iroameetsatena Tasorentsi.

¹⁹ Oshequi sheripiaritatsiri yamayetaquero sanquenarentsi yashiyetari: irootaque oamejeitiriri isheripiaritantari. Yapatojeitaquero, irosati itaimotantacari maaroni atiri. Icantajeiti:

–Te noncoyeji namatavijeitajeri aisati noshaninca.

Imoncarajeitaquero ovinaro sanquenarentsi, opinajeitaca S/50,000.

²⁰ Oshequi iquenacayetanaquero irineane Avincatsarite, aisati itimi oshequi quemisantajeitavauerori.

²¹ Impoiji ishoretaca Pavoro irijate Jerosarequi, irosati ijatantanaca. Iquenanaque Maseroniaqui, jero anta Acayaqui. Icantitaca:

–Nintanaquearo nojate Jerosarequi, impoiji nojatanaque Oromaqui.

²² Itiancaque apite amitacotapinitiriri maseroniasatipee: yora Timoteo, jeri Erashito. Iriori Pavoro, osamani itimanaque anta Ashiaqui.

Iquisajeitanaca ejesosati.

²³ Te meeca capichaji incantavacaimentearo oca acamantacotaqueriri Avincatsarite.

²⁴ Itiminta vetsicapinitirori perata pajitachari Irimitirio. Ishiacantapinitiro ovanco Aretemisa iquemisantapinijeitantarori ishaninca. Ora Aretemisa irootaque ijitasorentsi-jeitane. Ainiro yora amitacotiriri, vetsicapinitiniriri ora pancotsijaniqui; ari ipinatapinitiri oshequi perata, yaajeitantari oshequi quirequi. Iro cantaincha te meeca iramanantajeroji quemisantajantsiri, irosati iquenqueshiretantanaca Irimitirio.

²⁵ Ari yapatojeitiri maaroni iratiritepee, icantajeitiri:

–Antapinijeitiro oca shiacaantsi aajeitantari airequite oshequi.

²⁶ Meeca pineaqueri Pavoro, aisati piquemacotaqueri: yamatavijeitiri oshequi atiri, ipashinijeitantajari. Icantaniroti: “Caari oni Tasorentsi oca yovetsicayetiri atiri”. Te apatiro iroametante aca: irotaintsi intsoteero Ashiaqui iroametantayete.

²⁷ Itseencajeitanaqueecari maaroni atiri, aisati itseencanaqueroecari maaroni avetsicajeitiri. Tempa opincatsarotasanoti Aretemisa: iquemisantajeivetacaro maaroni ashiasati, jeri maaroni atiri. Ipincatsajeivetaro meeca, iro cantaincha inquemisantajeiteririca Pavoro, irojocacaajeiteri iquemisantiro.

²⁸ Iquemantajeitavacarori oca, iquisajeitanaca. Icajemajeitanaque:

–Opincatsarotasanoti Aretemisa, oca pincatsariventajeitiriri ejesosati.

²⁹ Icajemajeitanaque savicajeitatsiri nampitsiqui. Ishiajeitanaca maaroni anta yantaveetapinijeitinta. Inoshicajeitanaqueri Cayo, jeri Arishitaraco, sorororo. Maseroniasati ini apite, tsipatapinitariri Pavoro.

³⁰ Icoaveta Pavoro irojatacoventanaquerime anta, iro cantaincha te irishineteriji quemisantatsiri.

³¹ Ainiro itimi aisati aparopee pincatsaritatsiri, poneachari Ashiaqui, nintiriri Pavoro. Itianquiri ishaninca, camantapaqueriri:

—Eiro catsini poijatiritsi anta: yoimpicari.

³² Icajemajeitanaque apatojeitainchari, onashiyetaca icantayetiri. Icajemashijeitanaca. Te iriojeiteji oshequi paitarica yapatotimentari.

³³ Ainiro anta Arijantero, itiancane jorio, isatecaqueri nianqui. Yacotashitanaqueri maaroni atiri, iriotanteari icoaque inquenquetsatacaajeiterime.

³⁴ Iro cantaincha iojeitancari irio jorio, icajemapinijeitanaque maaroni:

—Opincatsarotasanoti Aretemisa, oca pincatsariventiriri ejesosati.

Osamani icajemajeitanaque, ishirincanaca catsirincaiteri.

³⁵ Yoimajerentajeitaqueri yora sanquenatapinitatsiri anta nampitsiqui. Impoiji icantajeitiri:

—Noshaninca. Tempa arojeitaque pincatsajeitirori Aretemisa, aisati ashentapinitiniro ovanco. Tempa aisati ashentapinitiro oca shiaquerori, pariapaintsiri jenoqui. Ayojeitanaquero oca,

³⁶ tecatsi tseenquerone oca nocantaqueri. Cameetsa meeca pimajerejeitanaque. Eiro pishintsititsi panteri yoca shiramparipee.

³⁷ Jerica pamaqueri, tecatsi incantero ovanco, aisati te incantimateroji atasorentsita.

³⁸ Jeri aisati yoca Irimiritiro, icarajeitiri pashini antirori perata. Incoaquerica incantacoteri, cameetsa iranaajeri anta savicacaantatsiriqui, impoiji iroametavacaajeitea anta. Irijatequeti anta incantacoventavacayea.

³⁹ Otimirica pashini picoaqueri piote, ari pincanteri coajica yora oametavacaachari, irampatojeitajarica.

⁴⁰ Jero aca meeca apatojeitaca, aquisatsatavacaajeitaca. Icamantacotashiteecari aquisajeitaqueri avincatsarite, impoiji tecatsi ancantea ancantacoventajea arosati.

⁴¹ Icantantarori oca, itiancajeitajiri maaroni apatojeitainchari:

—Meeca aitapaaji, pincatsimareajeitanaje, pijajeite pivancopeequi.

20

Ijatanaque Pavoro Jerosarequi.

¹ Ari imajerejeitanaque ejesosati. Impoiji iriori Pavoro icajemajeitiri quemisantajeitatsiri, yoametasanojeitiri. Impoiji ijatanaji, yovaanaja Maseroniaqui.

² Anta oshequi iquenaquenayetanaque, oshequi yoametantayetanaque. Irosati yareentananaca Quireshiaqui.

³ Icarati mava cashiri isavicapaaque. Irovetaincha intetearome pitotsi irijatanteameri Shiriaqui. Irosati iotacotantacariri jorio, yaimanavetacari iroyerime. Irosati iquenqeshiretantanaca:

—Nompianajeta anta Maseroniaqui.

⁴ Ari ijatanaque, icarajeitanaque Sopatoroshi itomi Piro vereasati, Arishitaraco, jeri Seconto tesaronicasati, Cayo terevesati, Timoteo, Tiquico, jeri Torojimo ashiasati, maaroni.

⁵ Ijvajeitanaquena Toroarequi, yoyeajeitaquena anta.

⁶ Avisanaque quitaiteri yoanteetapinarori tanta caari tapiacha, impoiji noponeanaja Jiriposhiqui, noquenacotanaque pitotsiqui. Ocarati 5 quitaiteri naretantajari Toroarequi, anta itiminta oyeajeitaquenari. Irosati nosavicantapaaca ocarati 7 quitaiteri.

⁷ Otomincotapaaque. Napatojeitaca nocarajajeitaquero tanta noquenqeshirejiantajariri Jesoshi icamimentajeitaquae. Iquenquetsatacaajeitana Pavoro. Ishiretaca irijatamane, irootaque yosamanitantanacarori iquenquetsatanaque, vero, vero. Irosati nianquiteni.

⁸ Otimaque oshequi tsiomentotsi anta napatojeitacanta. Iro napatojeitancari shitamencotsi onta jenoquiniri; mavatapaintsiri, jenoqui anta.

⁹ Isavicaque omoroqui yora evancari pajitachari Eotico. Osamani iquenquetsataque Pavoro, irootaque aantapaacariri ivochoquine. Irosati ipariantanaca: iquenaitanaque, sheroo, tirin, anta quipatsiqui. Ari naniireashijeitanaqueri, itinayeevetapaacari; camaque ini, torein.

¹⁰ Ari yaniireapaaque Pavoro iriori. Itsentetashitapaqueri, yavitsanotapaqueri. Icanti:

—Eiro poashiretacotaritsi: aneatsi ini.

Ari itinaanaja, aisatitanaji.

¹¹ Ari nataijeitanaji, icarajapaaquero Pavoro tanta, noajeitaca. Impoiji iquenquetsatacaajiri, irosati oquitaitetantanaja. Irosati ijatantanaja.

¹² Yayeetanajiri evancari ivancoqui, aneanaji. Te capichaji iroveshireajeitanaquea.

¹³ Nojivatanaque pitotsiqui, noquenacotanaque Asoqui; irinti Pavoro iquenanaque avotsiqui.

¹⁴ Ari ineapaajanari Asoqui, irosati notetantanajariri pitotsiqui. Novaajeitanaja Mitirenequi, nocaantanaca, shiririri.

¹⁵ Oquitaitetamanaji novaanaja aisati. Nomontetacotanacaro Quio. Omavatanaque quitaiteri, irosati anta Samoshiqui. Quitaiteri pashini nareetanaca Miretoqui.

¹⁶ Iquenqueshiretaca Pavoro iravishitanaquearo Ejeso, eiro itimaanitapaajitsi Ashiaqui. Icoasanotaque irareetitajea Jerosarequi, irimoncaraapeemparo quitaiteri pajitachari Pentecoshiteshi.

¹⁷ Itiancaque Ejesoqui, icajemacantaqueri quenquetsatacaqueriri quemisantajeitatsiri anta.

¹⁸ Ari yareejeitapaaca ejesosati, irosati icantajeitantavacari:

—Piotacotasanotaquea jaoca nocantari notimimotantajeitaquempiri. Iroaquerani nareetaca Ashiaqui, aitaque nocantitapaaca, irosatitatsi meeca.

¹⁹ Anta oshequi nantaveetapinitiniri Avincatsarite, teyea iro noshemete. Niraacotapinitaquempi. Aisati ocantimoneentaquea anta yaimanavetaquea joriopee iroyename.

²⁰ Notsotaquero, tempa aitaque nocamantajeitaquempiro maaroni oca cameetsayetatsiri. Te nomajeretashiteaji. Noamejeitimpi anta yapatojeitacanta atiripee aisati anta pivancopeequi.

²¹ Nocamantajeitiri jorio, jeri caari joriotatsi, maaroni: “Pinquenqueshirejeitanajea piojeitantajariri Tasorensi. Pinquemisanteri Novincatsarite Jesoshi”.

²² Ari meeca nojate Jerosarequi, ojatacanaquea Ishire Tasorensi. Te nioteji jaocarica incanteetenari anta.

²³ Apatiro niotaquero oca ocamantaquenari Ishire Tasorensi. Maaroni nampitsiqui ocamantapinitana: “Queario iroisoyeetempi, iroashinoncaeyeetempi”.

²⁴ Te noncoasanoteji noncantaitiyempani nontime aca quipatsiqui, irointiquea noncoasanotaque nomateneri Avincatsarite Jesoshi paitarica inintacaquenari. Aisati noncoasanotaque nontsoteeneri oca nantaveetapinitiniri. Ocameetsati oca nocamantapinitjeitimpiri: “Ineshinoncajeitaquee Tasorensi”.

²⁵ Niotaque meeca eiro aneavacaajatsi aisati. Nocarajeivetaquempi, nocamantajeitaquempiro jaoca icantari Tasorensi ipincatsariventanti.

²⁶ Irootaque meeca nocamantantimpirori oca. Ariorica iroasanquetaarantempi Tasorensi, te naro oasanquetacantempine: tempa nocamantitaquempini peerani.

²⁷ Te nontsaroyeji, notsotaquempiro maaroni icantayetiri Tasorensi.

Irootaque icantajeitiriri Pavoro.

²⁸ Jero oca icamantajeitiriri aisati:

—Queariompia, pojocaacoventajeiteri piyemisanteririnte anta. Tempa avirojeitaque ocoyeane Ishire Tasorensi. Pamenacoventeri maaroni quemisantajeitatsiri, pintacojeiteari. Tempa iriojeitaque yoavisacojeitaqueri Jesoshi, icamimentajeitaqueri, yaparajati-mentajeitaqueri iriraja.

²⁹ Coajica, nojatanajerica, impocashitempi amatavitempinemeri: noshiacantaqueri catsimayetatsiri. Eiro ipeacotimpitsi, yoashinoncaimpicari. Niotaquero oca.

³⁰ Timatsi aca picarajeitica quenquetsatacaavetempineri, iro cantaincha eiro otampaticatasanotitsi iroamejeitempi. Yojocacaimpicari piyemisanteririnte, iroijatanteariri iriori.

³¹ Queariompia, pinquenqueshiretero. Ocarati mava osarintsi noametapinitaquempi. Nocantatiani: tsiteniriqui, quitaiteriqui. Aisati niraacotapinitaquempi.

³² Nocantiri Avincatsarite: “Pojocaacoventajeiteri ejesosati, aisati pineshinoncateri quemisanteri pineane”. Aitaque omataca irineane oquemisantacaasanotaquempi, oavisacojeitaquempi. Tempa picarajeitiri quemisantajeitiriri icoyeaqueri.

³³ Te noncoitayereriji iirerequisite pashini atriri. Te noncoitayereriji iitsaare.

³⁴ Piojeitaque narosatiquea antaveetanontacha, naantayetarori maaroni coiteimotari, aisati nintacojeitari notsipajeitari.

³⁵ Nomayetaquero maaroni oca piojeitanteari avirori pintacotantajeitea. Pinquempejeitena narori, pantaveetasanojeite, pintacotantajeiteariri ashinoncaincari. Pinquenqueshiretero irineane Avincatsarite Jesoshi, icantitaniri: “Iro cameetsatasanotatsiri ampashitantea. Te iro cameetsatasanotatsine aashitearo paitarica impashiyeteeri”.

³⁶ Irootaque icantajeitaqueriri Pavoro ejesosati. Impoiji itiyeroanaca, icarajeitiri ejesosati maaroni, iquenquetsatacaajeitiri Tasorentsi.

³⁷ Iraajeitanaca maaroni. Yavitsanojeitavajiri, inintavorojeitavajiri.

³⁸ Yoashiretacojeitanacari iquemaqueri icantanajiriri: “Eiro pineajanatsi aisati”. Yoajeitavajiri anta pitotsiqui, yamenavajiri ijatanaji.

21

¹ Irosati nojocajeitanajari quemisantacaajeitiriri ejesosati. Notejeitanaca pitotsiqui, tampatica noquenacotanaque Coshiqui, nocantanaca shiririri. Oquitaitetamaque novaamanaja Irorashiqui, irosati novaantanaja Pataraqui.

² Noneapaaquero anta pitotsi monteachaneri Jenishiaqui. Notetapaaca, noquenacotanaque.

³ Noneantanacarori Tsipire, noquenampitanaquero nampatequi. Nanaanaquero, irosati Shiriaqui, naatapaaque Tiroqui. Anta nampitsiqui yoaniitanaquero marinero ovaararontsi.

⁴ Nocoayetapaqueri narori quemisantatsiri. Noneantapaacariri nosaviquimotapaqueri 7 quitaiteri. Oamejeitaqueri Ishire Tasorentsi, icantajeitanariri Pavoro:

—Eiro pijatitsi Jerosarequi: yoashinonqueetavaquempicari.

Iro cantaincha te inquemisanteriji Pavoro.

⁵ Ari omoncarataja notetantanajari aisati, nojajeitanaji. Itsipajeitanaquena quemisantajeitatsiri irosati otsapitapaa nampitsi, icarajeitanaquero ijina, jeri itomipee. Notiyeroajeitanaca anta otsapijaqui, noquenquetsatacaajeitaqueri Tasorentsi. Impoiji novetsatavacaajeitanaja.

⁶ Notetanjaro pitotsi, ari ipiajeitanaja iriori ivancopeequi.

⁷ Ari noponeanaca Tiroqui, noquenacotanaque, novaanaaja aisati Toremairaqi. Noquivantapaqueri ayemisanrarinte. Aparo nomaaque.

⁸ Oquitaitetamaque, novaamanaja aisati. Nareetantapaacari Sesareaqui, noquivantapaqueri Jeripi, yora quenquetsatacaantatsiri. Ari oshequi nosaviquimotapaqueri. Iriotaque icarajeitiri yora intacotantachari sietetatsiri.

⁹ Timatsi otsipasato irishinto, timashitachari; ocamantantejeiti iroori.

¹⁰ Oshequi nomaanaque. Jeri yareetapaaca camantantatsiri pajitachari Acavo, iponeanaca iriori Joreaqi.

¹¹ Ipocashitapaquena, yaapaaquero ishiticatsaqui Pavoro. Irisati oisotashitajancha iitiqui, iracoqui. Icanti:

—Aitaque ocanti Ishire Tasorentsi: “Aisati inquempeyeetaqueri yora ashitarori ishiticatsaqui. Iroisoteri jorio, yora jerosaresati: oiso, oiso. Imperi pashinisati atiri, iranaqueri”.

¹² Noquemantavacarori oca, nocarajeitaqueri maaroni ashaninca, nocantajeivetari Pavoro:

—Eiro pijatitsi Jerosarequi.

¹³ Yacanaquena:

—¿Paita piraantari? ¿Paita picantashiretacaantanari? Tempa naro quemisantiriri Avincatsarite Jesoshi. Iroisoyeenata anta Jerosarequi, iroyeenata: te nontsaroacayeariji.

¹⁴ Te inquemisantenaji, irosati nomajeretantanaca. Nocantajeiti:

—Aitaque oncanteata paitarica icoiri Avincatsarite.

Yarejeitanaca Jerosarequi.

¹⁵ Impoiji novetsajeitanajari sesareasati, novaanaaja Jerosarequi: noquenanaaji avotsiqui.

¹⁶ Itsipajeitanaquena aparopee quemisantatsiri, sesareasati. Yaanaquena anta ivancoqui Manaso, yora tsipiresati: iriotaque intacantarori iquemisanti. Nomaimotapaqueri iriori.

¹⁷ Nareetantapaacari Jerosarequi, yaacameetsajeitavaquena ayemisanrarinte, iquimoshireventavaquena.

¹⁸ Oquitaitetamani iquivantajantiri Pavoro Santiago, noijatanaqueri narori. Anta yapa-tojeitacanta maaroni quenquetsatacaantatsiri.

¹⁹ Novetsatavacaajeitaca, impoiji itsoteaqueneri Pavoro, iquenquetsatacapaaqueri:

—Itiancaquena Tasorentsi noquenquetsatacaajeitiri oshequi pashinisatipee atiri. Icarajeiti oshequi quemisantajeitiriri.

²⁰ Iquemantavacarori, icantajeiti:

—Cameetsa ini Tasorentsi.

Impoiji icantajeitiri:

—Pamene, Pavoro, amoncaratavacaajeitaca aquemisantajeitiri Jesoquirishito. Iquemisantajeitaque oshequi catsini ajorioririnte, iro cantaincha aisati iquemisantasanojeitacuero isanquenatiniri Moishishi.

²¹ Oshequi iquemacojeitacuero picantiriri ajorioririnte, saviqumotiriri pashinisati atiri: “Pojoquero isanquenare Moishishi. Eiro pitoyeantajeitiritsi pitomi. Pojocajeitajero oca amejeiveitaniri arori”.

²² ¿Jaoca pincanteari? Aitaque inquemacojeitacuempi, areetapaaquempi: inquisajeitavaquempi.

²³ Pinquemisantero oca noncantempiri: jerica itsipasati shirampari, timatsi icashia-caacariri Tasorentsi.

²⁴ Paanajeri maaroni ivancoqui Tasorentsi, pincanteri Tasorentsi iroameetsantajeit-empi. Pimpinateneri yocapee paitarica, irameetantearori iishi. Impoiji iriojeitanaque ajorioririnte te ontampaticateji oca iquemacotaquempiri. Iriotanaque pimoncarataquero isanquenare Moishishi.

²⁵ Ja meeca yora pashinisati atiri, yora quemisantatsiri: nopacantaqueri iriori sanquenarentsi. Jero oca nocantaqueriri: “Eiro poitaritsi ivatsa yoyeetaquenerori yovetsi-queetiri, caari oni Tasorentsi. Eiro poacotarotsi ivatsa iriraja. Eiro poaritsi ampitsi-itachari. Eiro pineavintsatirotsi tsinane caari pai”.

²⁶ Ari iquemisantaqueri Pavoro. Oquitaitetamanaque yaanaqueri evancari, icantajeita-queri iroameetsanteariri, aisati iqueajeitapaaque ivancoqui. Icamantapaaqueri anta:

—Oncarate 7 quitaiteri nomoncaratanaquearori nantajeiteri iroameetsatantenari Tasorentsi, impoiji noajeiteneri virantsi, nompajeiteri.

Yoiminqueaqueri Pavoro.

²⁷ Irovetaíncha omoncarateame 7 quitaiteri. Ineajeitaqueri anta ivancoqui Tasorentsi joriopee, poneachari Ashiaqui. Iquisacaacari apatojeitainchari, impoiji yaajeitaqueri Pavoro, shepi.

²⁸ Icajemajeitanaque:

—Noshaninca, pamitacojeitena. Iriotaque yoca quenaquenayetatsiri amatavijeitiriri atiri; icantanirotaqueri: “Te incameetsateji joriopee. Te oncameetsateji isanquenare Moishishi. Te oncameetsateji ivanco Tasorentsi”. Irootaque icantajeitiriri atiri. Pamenete meeca yamanirotaqueri aca pashinisati atiri, caari ocameetsatantanaja meeca oca pancot-sica cameetsavetachari.

Irootaque icantajeitaqueriri.

²⁹ Chapinqui ineavaqueri Pavoro anta nampitsiqui, itsipavetari Torojimo: yora ejes-
sosti. Ijitashijeitavacari iriotaque iqueacaapaqueri ivancoqui Tasorentsi, irootaque
icantantacari: “Yamanirotaqueri aca pashinisati atiri”.

³⁰ Ari iquisajeitanaca maaroni nampitsiquiniri, yapatojeitanaca anta. Yaaqueri Pavoro
shepi, inoshicanaqueri saiteriqui, sorororo. Irosati yashitantanacaro ivanco Tasorentsi.

³¹ Irovetaíncha iroyerime, iro cantaincha iquemacotaqueri yora iyomantante so-
raropee, carajeitaintsiri 600. Icamanteetiri:

—Iquisajeitanaca maaroni jerosaresati.

³² Ishintsiti yaanajiri soraro, jeri capitantotsiri, ishiashijeitanacari. Ineanta-
jeitavacariri atiri, yoipacaajeitanaquero ipasajeitiri.

³³ Ari ipocapaaque comantanti, yaapaaqueri Pavoro. Yoisotacantaqueri. Iro yoisotanta-
paacariri apite carenatsa. Isampitacotiri:

—¿Janicampa yoca? ¿Paita yantaqueri piquisajeitancariri?

³⁴ Ipashiniyetanaquero icantayetanaqueri. Icajemajeitanaque, tecatsi incantea coman-
tanti iriotacoteri, irootaque yaacantantancariri anta ivancoqui soraro.

³⁵ Yareetapaaacaro ataímentotsinta, oshequi itatsincajeitanaqueri. Irosati yoancacaan-
tapaacari soraro.

³⁶ Yoijatanaqueri oshequi atiri, icajemajeitanaque:

—Paanirotaqueri.

³⁷ Irovetaíncha inqueacaapeerime Pavoro pancotsiqui. Icantiri yora comantanti:

—¿Cameetsampa nonquenquetsatayempi?

Icantiri:

³⁸ —¿Piotirompa quirieco? ¿Tempa aviro ejipitosati, yora quisacaacariri atiri chapinqui?
¿Tempa aviro aanajiriri chapinqui 4,000 oantatsiri anta caaraiteriqui?

³⁹ Yacaqueri:

—Te. Nainti jorio. Noponeanaca Tarisoqui, ora shirishiaquiniri. Iotacojeitiro nonampi.
Meeca noncamantempi: pishinetena nonquenquetsatayeri atiri.

⁴⁰ Ari ishinetaqueri, icantiri:

–Jentsiqueti, pinquenquetsatacayeri.

Irosati icatiantapaaca ataimentsiqui, cati. Impoiji yacotashitanaqueri atiri. Imajere-jentanaque, irosati iquenquetsatacaajeitantacari. Iro iquenquetsatacaantariri evereo.

22

Iquenquetsatacaqueri Pavoro joriopee.

¹ Jero oca icantajeitiriri Pavoro ijorioririnte:

–Noshaninca. Meeca narosati camantacotchane. Pinquemisantajeitavaquena.

² Iquemantavacariri ineanatantaro evereo, aiquero catsini imajeretasanojeitanaque. Ari icantanaque:

³ –Narotaque jorio. Ari otimaquenari ina anta Tarisoqui, onta shirishiaquiniri. Aca nampitsiquica ari nantearitaqueri. Yoametaquena Camariyeri, itsoteasanotaquenaro oca icantajeitiri intacantaqueeri. Nocoasnotaque noshintsiteneri Tasorentsi paitarica nantiniriri, noquempevetaquempi avirori meeca.

⁴ Noquisasanotiri oametantirori oca iroaqueratatsiri, irootaque noantayetariri, noisotacantayetaqueri, aisati noiminueacantayetaqueri shirampari, tsinane, maaroni.

⁵ Iotana ivincatsarite saserote queariotaque oca nocantaquempiri. Aisati iquempejeitanaja maaroni savicacaantajeitatsiri: yora oametavacainchari, iojeiti. Iriojeitaque panarori sanquenarentsi isanquenatiniri tamashicosati. Itiancaquena nonquisajeitan-tearirime quemisantajeitiriri Jesoshi. Nojavetaca Tamashicoqui naayerime savicatsiri anta, noisoterime. Namaquerime aca iroasanquetantearirime saserotepee.

⁶ Noquenanaque avotsiqui, noquempejitapaacaro Tamashico. Ari icarataque tampatica catsirincaiteri. Omapocapaaquena, amorecacotapaaquena amorecatsiri, oponeanaca inquitequi.

⁷ Notaanaque quipatsiqui, porocn. Noquemaqueri icantaquena: “Saoro. Saoro. ¿Paita piquisantaquenari?”

⁸ Nacanaqueri: “¿Janicampi Novincatsarite?” Icantaquena: “Narotaque nainti Jesoshi, nasaretasati: narotaque piquisaqueri”.

⁹ Ineajeitaquero notsipajeitari oca amorecatsiri, iro cantaincha te inquemajeitavaque-roji icantaquenari Jesoshi.

¹⁰ Nocantiri: “¿Paita plicoacaquenari nanteri?” Icantana Pincatsari: “Pincatianaje, pijate Tamashicoqui. Anta incamanteetempi paitarica panteri”.

¹¹ Oshipaquireacotasannotanaquena amorecatsiri, irootaque caari noneantaja. Ari yacatsatanaquena notsipajeitari, irosati nareetapatapaaca Tamashicoqui.

¹² Itimi anta shirampari pajitachari Ananiashi. Iquemisantasannotiro isanquenare Moishishini. Ineacameetsajeitiri maaroni jorio, savicajeitatsiri anta.

¹³ Ipocashitaquena, iquempejitapaquena, icantapaaquena: “Saoro, aviro noyemisan-taririnte. Pamenanaje”. Irosati namenantanaja, noneaqueri.

¹⁴ Aisati icantana: “Icoyeaquempi Tasorentsi plotantearori icoacaquempiri iriori. Icoyeaquempi pineanteariri yora Cameetsatasannotatsiri. Aisati icoyeaquempi pinque-masanotanteariri iriori.

¹⁵ Aisati pinquenquetsatacoteri. Pincamanteri maaroni atiri oca pineaqueri aisati oca piquemaqueri.

¹⁶ ¿Paita poisamanincantacarori? Tsame, pivaotisatea. Ainiro caari cameetsatsi pantayetiniri, iro cantaincha ariorica paventeari Tasorentsi, iroameetsantajempi”.

¹⁷ Ari impoiji nopianaja Jerosarequi. Noquenquetsatacaavetacari Tasorentsi anta ivancoqui, impoiji te niotacoteaji.

¹⁸ irointi noneashitareri Avincatsarite. Icantaquena: “Pishintsite, pojocanajero Jerosare, pishianaque. Eiro iquemisantetirotsi oca piquenquetsatacotaquenari”.

¹⁹ Nocantiri: “Novincatsarite, iojeitaque notsoteaquero maaroni pancotsi yapatojei-tantari, naajeitaqueri quemisantimpiri. Noiminueacantaqueri, aisati nopasanatacanta-queri.

²⁰ Narotaque oacantaqueriri Ishitevani: yora camantacotimpiri. Nocatiaca ocaaquiji, nocantiri: ‘Cameetsa incame’. Namenaqueneri oaqeriri iroicoropee”.

²¹ Iro cantaincha icantaquena: “Tsame pijate. Nocoaque nontianquempi arejiqui, anta itiminta pashinipee atiri”.

²² Iquemisantajeivetacari joriopee, iro cantaincha iquemajeitantavacarori oca, icajema-jeitanaque. Icantajeiti:

–Pojocanirotanajeri. Te oncameetsateji iranee: poyeri, incameta.

²³ Icajemajeitanaque, iquisajeitanaca, irootaque ipishoncajeitantanacarori iroicoropee aisati quipatsipane.

²⁴ Ineantajeitacariri comantanti iquisajeitaca, irosati icantantacariri soraro:

–Paanaqueri, pinqueacaanaqueri anta; pimpasanateri incamantantempiri paitarica yantaqueri iquisajeitantacariri ishaninca.

²⁵ Ari yoisovetacariri impasatantearirime. Ari itimi anta capitanotatsiri, icantiri Pavoro:

–Narotaque shanincatariri oromasati. Tequera piotacojeitena otimirica nantane, çarimpa pimpasatashitena?

²⁶ Iquematiiri, ijatashitaqueri comantanti. Icantapaaqueri:

–¿Paita poyeriri? Irinti ashaninca arori.

²⁷ Ari ipocashitaqueri comantanti, icantiri:

–Pincamantasanotenate. ¿Pishanincatarimpa oromasati?

Icantiri:

–Je, noshanincajeitacariri.

²⁸ Icantanaque comantanti:

–Oshequi nopinaventaqueri oromasati noshanincatantacariri.

Icanti Pavoro:

–Aitaque notimaqueri noshanincatantacariri.

²⁹ Intsipaita itiancajiri yora pasaterinemeri. Irinti comantanti, itsaroanaque. Iotaque yoisotashitacariri shanincatantacariri oromasati: te oncameetsateji iroisotashiteari.

Yaanaqueri Pavoro anta inaquentaa oametavacainchari.

³⁰ Icoaque comantanti iriotasanote paita icantacotantariri joriopee Pavoro. Oquitaite-tamanaque yoisoreajiri. Yapatotacantaqueri jivatocajeitirisi saserote, jeri maaroni oametavacajeitainchari. Irosati yoirincacantanacariri Pavoro, yaanaqueri anta.

23

¹ Yamenasanotapaaqueri maaroni oametavacainchari. Icantiri:

–Noshaninca. Nioti ineacameetsatasanotaquena Tasorentsi. Nocantatiani cameetsa nosaviquini, irosatitansi meeca.

² Yora Ananiashi ivincatsarite saserote, icantiri tsipatariri anta:

–Pimpasavanteniroteri.

³ Icantanaque Pavoro:

–Avirotaque avinti inquishe Tasorentsi; ainiro pantane: oshequi pamatavitanti. Jero meeca pisaviqui aca, picoaque pimoncaraterome Sanquenarentsi, pincantacoventante-narime. Iro cantaincha pipasatacantaquena, te pimoncarateroji Sanquenarentsi.

⁴ Icantanaque catiainchari ara:

–Iriotaque picantaqueri ivincatsarite saserote.

⁵ Yacanaqueri:

–Te nioteji iriorica ivincatsarite saserote. Ocanti Sanquenarentsi: “Eiro picantimatiritsi pincatsariventiriri pishaninca”. Niotaqueme, eiro nocantirime.

⁶ Iotaque Pavoro anta iconoayetacariri saroseopee, jeri aisati variseopee. Icajimanaque:

–Noshaninca. Narotaque variseo. Narotaque itomi variseo. Niotaque intinaajeitaje maaroni camajeitantsiri, irotaque iquishimentaquenari meeca yoca.

⁷ Iquemantajeitavacariri oca icantaqueriri, iquisatsatavacaajeitanaca variseopee jeri saroseopee. Iquisavacaajeitanaca.

⁸ Icantapinijeiti saroseo: “Eiro itinaajatsi camajeitantsiri. Te aneriji Tasorentsi in-ampire. Te aneroji ashire arori”. Iro cantaincha icantajeiti variseo: “Antinaajeitanaje. Timatsi inampire Tasorentsi. Timatsi ashire maaroni”.

⁹ Ari iquisatsatavacaajeitanaca. Icatianaca oametantirori sanquenarentsi, variseo ini. Icantasanotanaque:

–Tecatsi nonquemacoteri yoca, yantaquero caari cameetsatatsi. Ariorica yoametaqueri Tasorentsi. Ariorica yoametaqueri inampire.

¹⁰ Aiquero catsini iquisatsatavacaajeitanaca. Yaamaanaca comantanti ari impicharea-jeitanaqueri Pavoro. Itiancaqueri soraro:

–Pijate, paajanteri.

Ari yaniireajeitanaque, ijajeitanaque nianqui, yaapitsajeitavajiri. Yaanajiri anta pancotsiqui.

¹¹ Aparo imaque, otsitenitanaji aisati, iconijatimotapaaqueri Avincatsarite. Icantapaa-queri:

–Piveshireanaquea. Piquenquetsatocotaquena aca Jerosarequi, aisati pinquempetajea coajica anta Oromaqui.

Yaanajiri Pavoro Sesareaqui.

¹² Ari oquitaitetamanaji, yora joriopee, isareajeivetacari Pavoro iroyerime. Icantava-caajeitaca:

—Meeca, eirositarica airi, eiro avajatsi, aisati eiro irajitsi. Ariorica amatavitavacaajeitea, tempa ari iroasanquetaquee Tasorentsi.

¹³⁻¹⁴ Yanaajeitaquero 40 shirampari sareavetacariri iroyerime. Ijatashijeitiri jivatacaajeitiriri saserotepee, jeri aisati savicacaantayetatsiri. Icantapaaqueri:

—Eirotsitarica noiri Pavoro, eiro noitajatsi, aisati eiro niritajatsi. Eirorica nomajeitiro, nocoajeitaque iroasanquejeitena Tasorentsi.

¹⁵ Pincarajeiteri maaroni oametavacainchari, pincantaiteri yora comantanti: “Pamaquenari Pavoro, nocoaque niotacotasanoteri, paitarica yantiri”. Irootaque pincanteriri. Naroquea nainti, novetsicajeititaquea noantavaqueariri nianqui, tequeratsita irareetea.

¹⁶ Jeri otomi iritsiro Pavoro, iquemacoventaqueri iriconquiri isareacari iroyeeteri. Ari ijatanaque anta ivancoqui soraro, icamantapaaqueri Pavoro.

¹⁷ Irosati icajemacantantacariri iriori aparo capitanoatsiri, icantiri:

—Paanaqueri yoca evancari anta itiminta comantanti. Timatsi incamanteriri.

¹⁸ Irosati yaantanacariri anta. Icantapaaqueri:

—Icajemaquena Pavoro, yora aiminqueiri oshaiteji. Icantaquena: “Paanaqueneri comantanti yoca. Timatsi incamanteriri”.

¹⁹ Ari yacatsanaqueri aiqetiji ara. Imanacaacari, isampitaqueri:

—¿Paita ojita oca pincamanteneri?

²⁰ Icantiri:

—Icantavacaaca joriopee, incoacojeitaquempi paanajeneri Pavoro anta yoametavacaajeitacanta. Icoaque iramatavitempi, incante icoaque irisampitacoventasanoteri coqui.

²¹ Iro cantaincha, eiro piquemisantiritsi. Timatsi shiramparipee, yavisajeitaquero 40 icarajeiti, sareacariri iroyeri. Icantajeitaque: “Eirotsitarica airi, eiro avajatsi, aisati eiro irajitsi. Eirorica airitsi, acoaque iroasanquetaajeiteeta Tasorentsi”. Meeca yovetsicajeitaca. Yoyeaquempi meeca, panteneri oca incoacotempiri.

²² Ari itianquiri comantanti yora evancari. Icantavaqueri:

—Eiro picamantiritsi ashanincapee oca picamantaquenari.

²³ Impoiji icajemiri apite capitano. Icantiri:

—Ariorica onianquittimatanaque, povetsicajeiteri 200 soraro, 70 quijacotearineri cavayo, jeri 200 ajiriqueroneri isataamento. Irijajeite Sesareaqui.

²⁴ Povetsiqueneri Pavoro cavayo, inquijacotanaqueari. Cameetsa paajeitanaqueri anta itiminta pincatsari Virishi.

²⁵ Impoiji isanquenatiniri sanquenarentsi, iquempetaquero oca:

²⁶ “¿Ainirompi Virishi? ¿Tecatimpa oyempine? Narotaque Caraorio Irishiashi sanquenatimpirori oca. Oshequi nopincatsatimpi.

²⁷ Pineavaqueriya yoca shirampari nontianquempiri. Irovetaingcha iroajeiterime chapinqui joriopee. Icamanteetana ishanincatacariri oromasati, irosati nojatashitantacariri, notsipatanacariri soraro, noavisacotajiri.

²⁸ Nocoanaque niote paita incantacoteriri, naanaqueri anta yoametavacaajeitanta.

²⁹ Noquemapaaqueri, icantavacaimentajeitaro sanquenarentsi. Iro cantaincha tecatsi incantacoteri aiminqueanteariri aisati avanteariri.

³⁰ Timatsi camantapaaquenari isareetacariri iroyeeteri, irootaque nontiancantempiriri. Nontianquempiri coajica yora quisaqueriri irijatashitempi incamantacotasanoteri Pavoro”. Irootaque isanquenatiniriri, impoiji ipavaqueri soraro:

—Jerocha paanajeneri Virishi, aisati paanajeri Pavoro.

³¹ Ari iquemisantaqueri soraro, yaanaqueri Pavoro. Tsiteniriqui yareetacaacari Antipatirishiqui.

³² Oquitaitetamanaque ipiajeitanaja soraro inampiqui. Irinti tsipatasanoanacariri Pavoro yora quijacojeitariri cavayo.

³³ Yareejeitantapaacari Sesareaqui, ipapaaqueri pincatsari sanquenarentsi. Aisati iriori Pavoro, yonijaapaaqueri.

³⁴ Ineanatavaquero sanquenarentsi, irosati isampitantavacari:

—¿Jaoca opajitari piipatsite piponeantacariri?

Yacanaqueri Pavoro:

—Noponeanaca Shirishiaqui.

³⁵ Icantiri pincatsari:

—Coajica impocavaquetsita camantacotempineri, ari nonquemisantaquempi.

Impoiji icantiri soraro:

—Pashitacoteri anta ivancoqui Eroreshi, pamenasanoteriyea.

24

¹ Ocarataque quitaiteri apapacoroni, ari ijatanaque Ananiashi, yora ivincatsarite saserote, itsipatanacari aparopee savicacaajeitantsiri. Jeri aisati itsipatanacari amita-cotiriri, pajitachari Teretoro. Ijatashjeitanaqueri pincatsari, incantacojeiteri Pavoro.

² Icajemeetaqueri, impoji iquenquetsati Teretoro. Iquenquetsatacaapaqueri Virishi, ineshinoncatamempeacari, aisati incantacotashitacari Pavoro, icanti:

³ —Meeca, novincatsarite, nopasonquijeitimpi. Cameetsa pipincatsariventajeitaquena, irootaque cameetsa nosavicaajeitancari aca. Poameetsajeitaquenaro paitaricapee, irootaque nopasonquitimentaquempi maaroni.

⁴ Meeca eiro nosamanitimpirotsi. Aitaquenea pametaro pineshinoncatanti, capichaji nocoaque pinquemisantavaquena.

⁵ Noneaqueri yoca Pavoro, oshequi ineashirencanti. Iquisacaajeitacari joriopee maaroni nampitsipeequiniri. Iriotaque jivataciriri quemisantajeitiriri yora nasaretasati.

⁶ Irovetanaincha impincacayenarome ivanco Tasorentsi, irosati naajeitancari. Irovetanaincha mononcaraterome isanquenajeitananiri Moishishini, noncantacoventan-tearirime yoca.

⁷ Iro cantaincha yareetapaaca Irishiashi, yora comantanti. Itatsinquimentayetapaquena-ri, yaapitsatapaquenari. Itiancaquena nopocantacari aca, noncantacoventanteariri Pavoro.

⁸ Meeca, pisampiteri, piotanteari queariorica oca nocantacotaqueriri.

⁹ Icantajeitanaque joriopee:

—Queariotaque oca icantaqueri. Aitaque ocantacari.

¹⁰ Ari yora pincatsari icantaqueri Pavoro irineanate iriori. Ari icanti:

—Niotaque ocarati meeca oshequi osarintsi pipincatsariventajeitiri noshaninca, irootaque noquimoshoretantancari. Meeca narosati camantacoventanjchane.

¹¹ Jentsite, pisampitacoventajeitena. Iroaqueratsiquera ocarati 12 quitaiteri nojatan-taitari Jerosarequi. Nojaiti noquemisantaiti.

¹² Tecatsi neenaneri nompiatsatavacayempaji anta ivancoqui Tasorentsi, aisati te nom-piatsatavacayempa anta pancotsiqui napatotantari, nampitsiqui, tecatsi. Aisati te nampa-tojeiteri oshequi atiri.

¹³ Tecatsi incantea meeca iriotacaasanotempi oca icantacotashitaquenari.

¹⁴ Meeca noncamantasantotempi. Noquemisantiri yora Tasorentsi iguemisantiniri in-tacantani. Noquemisantajeitiro isanquenareni Moishishi, aisati iroori isanquenareni camantantajeitatsiniri. Queario, ainiro yoametaquenari Jesoshi ayojeitanteari ajajeitan-tajeiri inquitequi, iro cantaincha icantashjeitaca yocapee te oncameetsateji anquemisan-teri.

¹⁵ Noquempejeitacari iriori, niotaque irointinaajeitajeri Tasorentsi maaroni camajeive-tainchari: cameetsatsiri, caari cameetsatsi, maaroni.

¹⁶ Irootaque nocoasanotantacari noncameetsashiretimoteri Tasorentsi, aisati atiri. Tempa ineajeitaquena. Nocoaque nontime cameetsa, niotanteari ineacameetsataquena.

¹⁷ Notimavetaca anta arejiqui oshequi osarintsi, meeca nopiaja. Namaqueneri noshan-inca ipacantashiyetacari savicayetatsiri otsipapeequi nampitsi. Aisati nopashitapaacari Tasorentsi paitarica.

¹⁸ Pamenete meeca, ineaquena yoca anta ivancoqui Tasorentsi, noquemisantaque. Tecatsi nampatotacayeari, aisati tecatsi nonquisacayeari.

¹⁹ Itimi anta ivancoqui Tasorentsi joriopee poneayetachari Ashiaqui, iriotaque quisaca-ajeitacari atiripee. Ontimeme nantayetiri, tempa impoqueme iriori incantacoventena.

²⁰ Iro cantaincha ¿paita icantajeitiri yocapee? ¿Paita iotacotanari anta yoameta vacaa-jeitacanta? ¿Timatsimpa nantaqueri?

²¹ Apatiroti nocantacari chapinqui: “Niotaque intinaajeitanaje maaroni camajeive-tainchari, irootaque picantacoventantaquenari meeca”.

²² Iotasanoi iriori Virishi oca acamantacotiriri Tasorentsi. Icantanaque:

—Aitapaajitsita meeca. Coajica impocavajetsita comantanti Irishiashi, ari noncanta-coventempi.

²³ Icantiri capitano:

—Paanajeri Pavoro, poimiqueajeri: pamenasanoteri, iro cantaincha pishineteri pai-tanirica incoyeri. Aisati pishineteri ishaninca irintacoteari.

²⁴ Pashini quitaiteri ipocapaaque Virishi. Itsipatapaaro ijina pajitachari Toroshia. Jorio oni. Icajemacantiri Pavoro inquemisantanteariri. Iquenquetsatacotiro jaoca ancanteari anquemisanteri Jesoquirishito.

²⁵ Aisati iquenquetsatacotiro jaoca ancanteari ancameetsashiretanaje, aisati antime cameetsa. Aisati iquenquetsatacotiri Tasorentsi, jaoca incanteari coajicani incantacoventanteariri maaroni atiri. Ari itsaroanaque Virishi. Icanti:

—Meeca pijataje. Coajica, tecatsirica nante, ari noncajemacantajempi aisati.

²⁶ Ari oshequitaque icajemacantapinitaqueri, ijitashitaca Virishi ari impashitana-jearime quirequi irishinetantearirime irijatantajeari. Ari iquenquetsatacapinitaqueri, iro cantaincha te imperiji quirequi.

²⁷ Apitetaque avisanaque osarintsi. Ipyeetajari Virishi yora Porishio Jeshito. Icoaque inquimoshiretacayempari joriopee, irootaque caari ishinentantajari Pavoro irisoquijanaje.

25

Yaventacari Pavoro Sesari.

¹ Ari yareetanaca Jeshito anta impincatsariventantenta. Mava imaapaaque Sesareaqui, irosati yovaantanaja Jerosarequi.

² Jeri yora jivatacaajetitiriri saserotepee, jeri pincatsariventiriri jorio, icantacojeitiri Pavoro. Icantiri Jeshito:

³ —Pinquimoshiretacayena. Pamacantenari Pavoro aca Jerosarequi.

Ari isareavetacari irimapocavaquerime nianqui, iroavaquerime.

⁴ Icantiri Jeshito:

—Irisavicavaquetsita Sesareaqui. Eiro osamanititsi nompiaje.

⁵ Ari otimirica yantane, nocoaque intsipatanaquena pincatsariventimpiri, incantacotanteariri.

⁶ Ari aamaaca isavicaque anta 8 quitaiteri, ariorica 10. Te iroanayeroji 10. Irosati ipiantaja Sesareaqui. Oquitaitetamanaque isavicaque anta ivincatsarimentoqui. Ica-jemacantiri Pavoro.

⁷ Yareetapaaca, ari ishoncavacari yora poneachari Jerosarequi. Oshequi icantacotasanovetacari, iro cantaincha tecatsi incante iriotacotasanotanteariri Jeshito.

⁸ Irisati cantacoventavajanacha Pavoro, icanti:

—Tecatsi noncantero Sanquenarentsi iquemisantiri joriopee. Tecatsi noncantero ivanco Tasorentsi. Aisati oquempetaca, tecatsi noncantimateri Sesari.

⁹ Iro cantaincha Jeshito icoaque inquimoshiretacaajeiteri joriopee. Icantiri Pavoro:

—Piquemaque meeca icantacojeitimpiri yocapee. ¿Picoimpa pijate Jerosarequi? Anta ari noncantacoventajempiri.

¹⁰ Yacanaqueri Pavoro:

—Noshanincatacari nainti oromasati, aivetacanea aca pincantacoventenameri. Piotasanotaque tecatsi noncanteri joriopee.

¹¹ Nantaquerorica caari cameetsatsi, ainirorica nantane iroyeetantenari, ari. Cameet-sataque iroyeetenata. Iro cantaincha ariorica icantacotashijeitana, tecatsi pincantea pishinetacoventena. Nocoaque pintianquena meeca Sesariqui, incantacoventena irinti.

¹² Ari iquenquetsatacaqueri Jeshito yora oametavacainchari. Impoiji icantiri Pavoro:

—Meeca picoaque nontianquempi Sesariqui. Aitaque nontianquempi irioriqui, incantacoventantempiri.

Iquenquetsatacaqueri Pavoro Aquiripa.

¹³ Jaocarica ocarati imaaque. Jeri yareetaca pincatsari Aquiripa, itsipataro Venenise. Ipoqui iquivantiri Jeshito.

¹⁴ Isavicapaaque oshequi quitaiteri, ari iquenquetsatacotaqueri Pavoro:

—Timatsi aca shirampari yoiminqeaaqueri Virishi.

¹⁵ Nojatantacari Jerosarequi, icantacotaqueri joriopee: yora jivatacaajetitiriri saserote, savicacaajetitantsiri, maaroni. Icoacotaquena noncantacoventashiteari Pavoro: “Ainiro yantane”.

¹⁶ Iro cantaincha nocantaqueri: “Naro oromasati. Te nameteaji noshinetacantashiteari tequeratsitarica incantacoyeeteri. Inquemavaquerotsita oca pincantacoteri. Impo-ijiquea irisati cantacoventajanthane”.

¹⁷ Irosati yapatujeitantaca aca, ari te nosamaninqueroji. Oquitaitetamanaque nosavi-caque aca novincatsarimentoqui, nocajemacantaqueri Pavoro.

¹⁸ Ari nojivetaca incantajeite yantasanotiro caari cameetsatsi. Iro cantaincha, tecatsi incantacotasanajeiteri.

¹⁹ Iquisatsatimentavacaacaro oca yaamaashiyetari iriori. Aisati iquisatsatimentava-caacari Jesoshini. Icaamaque, iro cantaincha icanti Pavoro: “Anejji”.

²⁰ Te nioteji jaoca noncanterori nosampitacoventantearori oca icantayetiri. Nosampive-tacari icoaquerica irijate Jerosarequi, anta noncantacoventantearirime.

²¹ Iro cantaincha icoanaque incantacoventeri irinti Sesari, yora Aocoshito. Ari nocantaqueri soraro irishenteri, irosati nontiancanteariri anta Sesariqui.

²² Icanti Aquiripa:

—Nocoaque nonquemisanteri nainti.

Icantiri:

—Aitaque, osaitequera pinquemamaneri.

²³ Oquitaitetamaque ijataque Aquiripa, jero Verenishe. Ari yoaneencasanojeitanaca apite. Iqueanaque anta yapatotapiniyeetanta. Icarajeitaqueri comantantipee, aisati pincatsariyetsiri: yora savicajeitsiri anta. Yora Jeshito, icajemacantaqueri Pavoro. Ari yamapaaqueri soraropee. Icanti Jeshito:

²⁴ —Pincatsari Aquiripa. Maaroni aviro nocarajeitiri aca. Jeri yoca. Ipcashjeitaquena maaroni joriopee: jerosaresati, jeri yoca savicayetatsiri aca. Icantacovetari yoca: “Te oncameetsateji intime”.

²⁵ Iro cantaincha tecatsi niotacoteri noamaanteariri. Jero meeca yaventacari Sesari, ari meeca nocoi nontianqueri irioriqui.

²⁶ Iro cantaincha te nioteji paitarica noncamantasanoteriri avincatsarite. Irootaque nocajemacantaquempiri avinti, asampitacoventanteariri. Impoiijiquea ontime nosanquenatacotanteariri.

²⁷ Jeri yoca noiminqeakeri. Te oncameetsateji nontiancashiteari, tecatsirica noncamantacoteri.

26

¹ Yora Aquiripa icantiri Pavoro:

—Meeca noshinetempi avisati cantacoventachane.

Irosati yacotashitantanacari Pavoro, impoiiji icantacoventaja irisati:

² —Pineaquena, pincatsari Aquiripa. Meeca noncamantempi paita iquishimentantaquenari nojrioririnte. Noquimoshireventaquempi,

³ piotasantiro maaroni yameyeteri noshaninca, aisati pioyetero maaroni icantavacamentajeitari. Nocoaque pinquemisantasanotena, eiro pishemanatsi.

⁴ Iotacotitajeitaquena noshanincapee, peerani ainironi nevancaritapaini. Nosaviquini Jerosarequi, nocarajeitaqueri noshaninca. Irosatitisi meeca iotana.

⁵ Tempa quemisantincari variseotatsiri. Peerani novariseoveitani narori, noquempetasanoveitarini. Iotasanojeitaquena noshanincapee, incoaquericame incamantajeitimpime.

⁶ Nocoasanotaque noneeri icashiacaacariri Tasorentsi noshanincani, irootaque meeca picantacoventimentaquenari.

⁷ Peerani itimini Jacovoni itomini 12, ijoriojeitini. Meeca icoajeitaque maaroni ishanincani irineeri yora Quirishitotatsiri iquenquetsatacotiniri Tasorentsi. Coajicani irointinaajeitajeri maaroni camajeitatsiri. Icantatiani yaamaajeivetacari: quitaiteriqui, tsiteniriqui. Meeca nocantaque ipocasanotaque, irootaque icantacotantanari meeca noshaninca.

⁸ ¿Pijitimpa eiro imatirotsi Tasorentsi irointinayeri camajeitatsiri? ¿Paita pitseencantari?

⁹ Nojtitashiveitani narori peerani cameetsa nonquisheri yora quemisantajeitiriri Jesoshi nasaretetsati.

¹⁰ Aitaque nomavetacaro anta Jerosarequi. Noiminqeayetaqueri oshequi icoyeaneppee Tasorentsi. Irootaque tiancaquenari jivatacaajeitiriri saserote. Nocoaveitani incamajeiteme quemisantajeitiriri Jesoshi.

¹¹ Aitaque oshequi noashinoncaapiniveitarini anta maaroni pancotsipeequi yapatojeitantari. Nocoacavetari incantimaterime Tasorentsi. Nocaantirive, noijajeitanaqueri pashinipeequi nampitsi, nonquisanteariri.

¹² Irootaque nojtitashitantavetacariri tamashicosati, itiancana jivatacaajeitiriri saserote nayerime.

¹³ Ari nocaantanaca, itampaticataque catsirincaiteri. Ari noneavaquero anta avotsiqui amorecatsiri, oponeanaca inquitequi, morec. Oshipaquireasanotapaaque catsini, te oshiyeriji catsirincaiteri. Oshoncapaaquena, aisati iriori nocarajeitaqueri.

¹⁴ Notaajeitanaque quipatsiqui, porocn. Irosati noquemantacariri, iquenquetsatacaana everequequi. Icantaquena: “Saoro, Saoro. ¿Paita piquisantanari? Ariorica nonquenquetsatacayempime, ¿paita pipiatsatantanari? Tempa pashinoncaja avisati”.

¹⁵ Nacanaqueri: “¿Janicampi, Novincatsarite?” Icantaquena: “Narotaque Jesoshi, piisa-neentane.

¹⁶ Pintinaanajequeti, pincatianaje. Nocoaque nompeajempi intacojeitearine atiripee, camantajeiterineri; irootaque noquenquetsatcantimpiri meeca. Pincamanteri atiri oca pineaqueri, aisati oca nonijayempiri, coajica.

¹⁷ Jaocarica incantavetempiri pishaninca, jeri pashinisatipee atiri, ari noavisacotempiri: eiro noshinejeitiritsi iroashinoncaajeitempi. Iro nontiancantaquempiri

¹⁸ Irojeitantaajari. Oquempetimovetacari otsitenitimovetacari: te irojeitenaji, irinti Satanashi amatavejjeitiriri. Pijatahijeiteri, poamejeiteri iraventantenari, impoiji onquempetimotajeari intime quitaiteeriqui. Impoiji noameetsajeiteri, eiro noquenqueshireacotajiritsi caari cameetsatsi yantajeivetari; incarajeiteri maaroni quemisantajeitanari, aisati nosavicacajeiteri cameetsa”.

¹⁹ Irootaque noneaqueri aisati irootaque icantaquenari Jesoshi. Te nompateariji, irointi notsoteaqueneri icantaquenari.

²⁰ Nintanacari yora tamashicosati, nocamantaqueri. Impoiji anta Jerosarequi nocamantanaque. Aisati notsoteajetaqueri anta Joreaqui. Nocamantajetaqueri yora pashinisatipee atiri, maaroni. Nocamantajeitiri: “Pinquenqueshirejeitanaquea, paventajeiteari Tasorentsi. Cameetsayea pisavicajeite, irojeitantaajari atiri queario piquemisantasanojeitaque”.

²¹ Ari noquenquetsatocotaqueri Jesoshi, irootaque yaajeitantaquenari joriopee anta ivancoqui Tasorentsi, iroyename.

²² Icantatiani Tasorentsi intacotana: peerani, irosatitatsi meeca. Irootaque nomatantaroni noquenquetsatacaajeitiri pincatsaritatsiri, caari pincatsaritatsine, maaroni. Ari noametantapinitiro isanquenare camantantatsiniri, aisati isanquenareni Moishishi. Nocamantacotiri iquenquetsatocotiniri peerani: moncarataca iquenquetsatocotiniri, aneayetaquero.

²³ Tempa irootaque icantitaniri: “Irineacatsitearo Quirishito, incamaque. Impoiji irijivajeiteri maaroni camajeitaintsiri, intinaanaje. Incamantajeiteri jorio, jeri pashinisati atiri: ‘Meeca piotasanojeiteri Tasorentsi’ ”.

²⁴ Aitaque ocantari icantaqueriri Pavoro. Antearojenca icajemanaque Jeshito:

—Pitsaviataqueteemi, piomempeavetaca.

²⁵ Yacanaqueri:

—Te nontsaviateji, niotasanotaque. Queariotaque catsini oca nocamantaquempiri.

²⁶ Yoca Aquiripa iojeitiro oca nocantaqueri, irootaque cameetsa noquenquetsatacaasanotantacariri. Tecatsi nomaneri, niotasanotaque itsoteaquero, iotavaquero; te omaneaji.

²⁷ Pincatsari Aquiripa: tempa piquemisantiro isanquenajeitaqueniri camantantatsiniri. Niotaque piquemisantaquero.

²⁸ Yacanaqueri:

—Irovetaincha pinquemisantacayenarime Quirishito.

²⁹ Yacanaqueri:

—Irovetaincharica pinquemisante, irompa osamaniquerarica, te nioteji. Iro cantaincha nocantaqueri Tasorentsi pinquempetantajenari narori. Aisati nocoacajeivetacari inquempejeteiname maaroni quemajeitaquenari meeca: apatiro te noncoacayempiji irosotanteetempiro oca carenatsa.

³⁰ Icatianaca pincatsaritatsiri: yora Aquiripa, jeri Jeshito, aisati oquempetaca Venise, ocatianaca iroori. Aisati iquempejeitanaca maaroni saviquimojeitiriri, icatiajeitanaca.

³¹ Ijajeitanaque, icantavacaajeitanaca:

—Tecatsi irante Pavoro incamanteari. Tecatsi irantavetea, yoiminqeashyeetacari.

³² Yora Aquiripa icantiri Jeshito:

—Eirome yaventarime Sesari, antianquerime irijatajetame.

27

Ijataque Pavoro Oromaqui.

¹ Ainiro anta iyapitanote oshequi soraro, pajitachari Jorio. Ipajiyeyetiri soraropee Aocoshita. Icanteetiri:

—Ainiro meeca antearo pitotsi, paanajeri Pavoro Itariaqui, jeri yonta pashini yoisoeyetiri.

Aisati icanteetana:

—Pincoaquericapojatanaqueri Pavoro, pintetearo onta pitotsinta inquenanteari iriori.

² Ari notejeitanacaropitotsi poneachari Ataramishiaqui, irovetaincha ojate nampit-sipeequi anta otsapijaqui Ashia: anta oatapinitanta pitotsi. Ari noquenacoyetanaque, notsipatanacari Arishitaraco. Iponeanaca iriori Tesaronicaqui, ora maseroniaquiniri.

³ Oquitaitetamañaque nareetaca Shiroqui. Yora Jorio, ineshinoncataqueri Pavoro: ishinetaqueri ijati iquivalentiri ishaninca anta, ari intacojeitavacari.

⁴ Irosati novaantanaja aisati. Iro oimpiacotajename tampea, irootaque noquenantanacari Tsipirequi, antaqueronta.

⁵ Nomonteanajaro incajare oquempjitaro Shirishia, aisati Pampiria. Novaanaja, nareetanaca Miraqui, ora irishiaquiniri.

⁶ Ari ineapaaquero capitano pitotsi poneachari Arejantiriaqui: ojateme Itariaqui, irosati notejeitantanacaro.

⁷ Ocarati oshequi quitaiteri noquenacojeitanaque, jentsiquero. Opomerentsitimo-
taquena, iro cantaincha noquempjitaacaro Jeniro. Te oshinetenaji tampea, irootaque
noshoncantanacarori Quereta. Noquenanaque antaqueronta, anta quempjei Saramona.

⁸ Opomerentsitimo-
taquena, iro cantaincha noshoncancanacaro ora ovoyeja. Impoiji naree-
tanaca anta ipajjyeetiri: Cameetsajari. Oquempjitaro nampitsi pajitachari Irasea.

⁹ Meeca operaniitanaque, avisanaque meeca quitaiteri ititantapiniyeetari. Ari ocoven-
catasanotanaque noquenacotanaque: irotaintsi oshequi tampea, oshequi omotoncane.
Icamantavetacari Pavoro:

¹⁰ —Noshaninca, niotaque ompomerentsitimo-
taquene anquenacojeitanaque meeca. Ay-
eeari antearo tampea. Otsitiicari pitotsi, otsoncacari vaararonsi, aisati atsitiajeiticari
arori.

¹¹ Yora capitano, te inquemisanteriji Pavoro; iquemisantsanotiri yora jivatiriri
marinero, irinti. Aisati iquemisantiri yora ashitarori pitotsi. Icantajeiti iriori:

—Tsame avaajeitanaja.

¹² Irotajantsi ompocanteari antearo tampea, iro cantaincha te oncameetsatimoteriji
nosavicasanojeite anta. Yora oshequiainsiri icoajeitaneque novaajeitanaja. Icoavetaca
nareeteame Jenishiaqui, anta queretaquiniri. Anta onapiniti pitotsi, ocameetsatimo-
jeitiri nosavicajeiteame anta. Icoaque anta iroyeavaquerotame tampea, ompeantajeri.
Ocameetsati intsacoterome pitotsi Jenishiaqui: te aneasanoteriji tampea anta.

¹³ Ari impoiji cameetsa ojeaoncaque tampea: ojati anta noshirejeivetacanta nojateme.
Ijitashijeiveta ari nareejeiteame Jenishiaqui, irosati novaantanaja. Noquenacotanaque
otsapijaqui Quereta.

¹⁴ Iro cantaincha, te osamaniteji, ari omapocaquena antearo tampea, icanteetiro Nore-
shite. Oponeanaca quipatsiqui,

¹⁵ otiancasanotaquero pitotsi nianquijaqui; tecatsi oncantea ojate oquenapaaquenta
tampea. Ari noshinetacotanaca, aiquero otiancasanotirori.

¹⁶ Noquenacotanaque anta ovoyejajaniquiqui pajitachari Caora. Aisati oponeanaca
tampea ovoyejaqui. Opomerentsitimojeivetaquena, iro cantaincha nomataquero naasan-
otavaquero pitotsijaniqui: ora onoshicapinitiri opatiqui.

¹⁷ Impoiji yoancaquero marinero. Ari yaamaacaro ari ontsipareanaquea taaverapee
yovetsicantarori antearo pitotsi, irosati yoisotantacarori. Aisati itsaroajeitanaque ojoca-
cojeitename quipatsiqui, anta Shiritequi, irootaque yaajeitantajarori maaroni tocoyatat-
siri. Ishinetaquero pitotsi, icanti:

—Aanaquerota tampea, tecatsi ancantero.

¹⁸ Oquitaitetamañaque, aiquero catsini otiancacotasanojeitaguena tampea. Ari yoviin-
cajeitaquero vaararonsi, pocn, pocn, pocn.

¹⁹ Omavatapaaque quitaiteri yoviincashitacaro aisati ovaararo pitotsi, soocatsa, ma-
aroni.

²⁰ Ari ocaratanaque oshequi quitaiteri: te inconijatajeji catsirincaiteri, aisati impoiquero,
tecatsi. Ocantatiani tampea, antearo ojeaoncaque, sooo. Nojiivevetaca eiro navisacojeita-
jitsi.

²¹ Avisanaque oshequi quitaiteri, te noajeiteaji. Icatianaca Pavoro, icantaque:

—Noshaninca, pinquemisantaquename, oncameetsataqueme. Eirome ajoquirome
Quereta, eiro otsitiime pitotsi, eiro otsoncame maaroni.

²² Iro cantaincha piveshireajeitanaquea meeca. Coajica ontsitianaque pitotsi, iro can-
taincha eiro atsitiajeititsi ainti.

²³ Iriotaque Tasorentsi jocaacoventaquenari. Noquemisantiri nainti. Osaite noneaqueri
inampire,

²⁴ icantaquena: “Pavoro, eiro pitsaroitsi. Aitaque pareetaqueari Sesari. Picantaqueri
Tasorentsi incavintsajeitiri maaroni picarajeitaqueri aca: ari iquemisantaquempi”.

²⁵ Meeca, piveshireajeitanaquea. Noquemisantiri Tasorentsi, niotaque ontsataquea
maaroni icantayetaquenari.

²⁶ Ario coajica ojocacotaquene tampea ovoyejaqui, eiro acamajeititsi.

²⁷ Ocaratanaque meeca 14 quitaiteri, meeca otsitenitanaque. Noquenacotashitanaca incajarequi pajitachari Atiria. Onianquitetanaque, yaamaaca marinero ari noquempejitanacaro otsapijaqui.

²⁸ Ineantacaro, osanajatirica. Ocarati 37 metero. Oshamaniji yapiitaquero. Ocarati meeca 28 metero niotantacari quempejitapaaque quipatsi.

²⁹ Itsaroajeitanaque, icanti:

—Queariyea, atsitincacotarocari mapi.

Anta opataquiqui yoviincaquero 4 otsatocotantari pitotsi, otsatacojatantacari nianquijaqui. Icoasanotanaque onquitaitetaje.

³⁰ Icoasanovetanaca yora marinero iravisacotanaque, iroviinquerome pitotsijaniqui inquenacotanteameri otsapijaqui. Icoaveta irijocajeitename narori. Icoajeivetaca iramatavijeitename, icantajeivetana:

—Noviinquerota otsatocotantari pitotsi, onta otsoviquiniri. Iro naantajarori pitotsijaniqui, noviinquero ara, onquisotanteari antearo pitotsi.

Ja, icoajeiveta irijocajeitename.

³¹ Yora Pavoro icantaqueri capitano, jeri soraropee:

—Eirorica quiso yoiri marinero pitotsi, tecatsi pincantea avirori pavisacojeitaje. Eiro pishinetiritsi irijocajeitee.

³² Irosati ipesantacaro soraro socatsa: oca otsatocotantaveitaniri pitotsijaniqui. Yoviincaquero, pocn.

³³ Irotanajantsi onquitaitetaje, icantajeitaqueri Pavoro:

—Tsame, poajeitavaqueata. Ocarati meeca 14 quitaiteri pinashitaca, te poajeiteaji.

³⁴ Meeca nocantasanoatquempi, poajeitea. Oshintsitacajempi. Piotasanotanaque: tecatsi oyempine catsini.

³⁵ Icantantarori oca, ipasonquitaqueri Tasorentsi, noneajeitaqueri. Icarajaquero tanta, ijivataque yoanaca.

³⁶ Yoveshireajeitanaja maaroni, yoajeitanaca.

³⁷ Nocarajeitaque maaroni tetarori pitotsi 276.

³⁸ Iquemajeitanaca, ari yoviincajeitaquero maaroni tirico, irosati opijoncatantanaja pitotsi.

³⁹ Ari oquitaitetasanotanaji, te iriojeitajeroji quipatsi. Iro cantaincha ineaquero otsantsajatanaque irosati anta quipatsiqui, otiminta impanequi. Icoajeivetaca iraatocapeeme anta.

⁴⁰ Yojocajiro otsatocotantaveitaniri incajarequi. Ari itsatacoreajiro soocatsa oisotantaveitaniri oomaro. Yovancajiro tocoya, ora otsoviquiniri. Aacotanaquena tampea, icoajeiveta iraatocapeeme impanequiqui.

⁴¹ Iro cantaincha navicacotapaaque nianquijaqui, eentapaaca quiripequiriqui. Avicasanotapaaque otsoviqui. Oquisotasanoatpaaque, te oshevatajeaji. Ora omotoncane ocarajaquero opataquiqui, patire.

⁴² Icoajeiveta soraro iroajeiterime maaroni yora yoiminqeajeitaqueri. Iquenqueshiretanaca:

—Yamaatanaquecari, ishiapitsatanaqueecari.

⁴³ Iro cantaincha icoaque capitano iroavisacoteri Pavoro. Te irishinejeiteriji iroajeiteri. Icantajeitaqueri maaroni iojeitatsiri yamaati:

—Pijivajeite pimitajajeitanaque, pamaajeitanaque irosati anta quipatsiqui.

⁴⁴ Avirojei caari iotatsi pamaate, jero oca taavera, aisati carajayetaintsiri: irootaque pamaatananaqueari.

Aitaque ocantacari, navisacojeitaji. Naatajeitapaaji anta quipatsiquinta.

28

Isavicajeitapaaque Marataqui.

¹⁻² Naajeitantapaacari, ineshinoncatasanojeitavaquena yora savicatsiri. Icaman-tavaquena:

—Opajita oca ovoyejaca Marata.

Ari yoisavaquenaro paamari, icajemajeitauena:

—Caate pimpoque aca, pintatapee paamarica.

Opariaque incani, ocatsincaiteanaque.

³ Yaayetapaaque Pavoro inchajempequi, aripati. Yoisapaaquero paamariqui. Ocatsirin-catanaque, irosati isoquijantanaca maranque, irosati yatsicantapaacari iracoqui, shepi.

⁴ Ineajeitatiiri itsatanacari iracoqui, icantavacaajeitanaca:

—Iriitatsi oantatsiri. Ineacarove. Te intsitiaveteaji anta incajarequi, iro cantaincha irineashiitetearota meeca.

⁵Iro cantaincha itecanaqueri maranque paamariqui, teca, pomein; te inquematsicatear-
iji.

⁶Ijtashijeivetaca ari irishintsitanaqueme ireeretacaanaquerime; irishintsite intaanaqueme, incamaqueme. Osamani yamenashejeitaqueri, sorerere. Ineaqueri tecatsi oaquerine. Impoiji iquenqueshirejeitanaja aisati, icantajeiti:

—Iriotaque tasorentsitsitsiri caari icamanta.

⁷Ainiro quempeji ora iipatsite yora pincatsariventiriri savicajeitatsiri. Ipajita Povirio. Yaacameetsajeitavaquena. Ocarataque mava quitaiteri cameetsa ineshinoncajeitavaquena.

⁸Ainiro iponaaca iriri iriori imaamentoqui. Icatsirincataque, ishijataca. Iquivantaqueri Pavoro, iquenquetsatacaqueri Tasorentsi, aisati yajiriquiri, yoavisacotaqueri.

⁹Imatantarori oca, ipocashijeitaqueri maaroni pashini mantsiajeitatsiri. Yoavisacojeita-
jiri.

¹⁰Oshequi ipincatsajeitavaquena savicajeitatsiri. Irotaintsi nojate, ipajeitavaquena paitarica coiteimotaquenari.

¹¹Ari icarati mava cashiri, irosati notejeitantanaca pitotsiqui poneachari Arejantirriaqui. Otimantacari chapinqui antearo tampea, ainiro onaque pitotsi anta ovoyejaqui. Ainiro isheroncayetiri anta otsoviqui, ishiacantaqueri tsipari.

¹²Naatapaaque Shiracosaqui, ocarati mava nomaanaque.

¹³Novaanaja aisati, noshoncanajaro anta otsapijaqui, irosati Irequio. Oquitaitetama-
naque oponeanaca tampea irampatequi catsirincaiteri. Irosati oquitaitetamaque nareetantacari Posoriqui.

¹⁴Noneapaaqueri ayemisanrarinte. Icoaque nosaviquimotanaqueri 7 quitaiteri. No-
vaanaja, irosati nareetantanaca Oromaqui.

¹⁵Ari iquemacojeitavaquena ayemisanrarinte, irosati ipocashijeitantaquena, inton-
quijeitavaquena. Osamani iponeayetanaca. Iponeanaca Jororeapioqui, aisati Tireshi Taverinashiqui. Pavoro, ineantacari, ipasonquitaqueri Tasorentsi aisati iveshireanaca.

¹⁶Nareetantacari Oromaqui, ishineyeetaqueri Pavoro isavicapaaque ivancoqui iriori. Itsipatacari aparo soraro, ameniriri.

¹⁷Mava imaapaaque, impoiji icajemacantaqueri jivayetiriri joriopee. Yapatojeitan-
tacari, icantaqueri Pavoro:

—Noncamentajeitempi, noshaninca. Te noncantimateriji ashanincapee arori. Aisati tecatsi noncantacotero oca yamejeiveitaniri ashanincani peerani.

¹⁸Iro cantaincha yoisoeyeetaquena anta Jerosarequi, icantiri oromasati: “Payeri yoca”. Isampitacoventaquena pincatsari, impoiji icoaveta iroimisoquijacantajename. Iotaque tecatsi nanteri noncamentari.

¹⁹Iro cantaincha ipiatsatavacari joriopee, irootaque naventantacari Sesari. Tecatsi noncantimateri ashaninca.

²⁰Irootaque nocajemacantantaquempiri, noquenquetsatacaajeitauempiri. Peerani aamaajeivetacari Quirishito impocantari. Meeca nocamantajeitiri ashaninca yareetaita, irootaque yoisoeyeetantaquenari carenatsaqui.

²¹Yacajeitanaqueri:

—Tecatsi noneero sanquenarentsi poneachane Joreaqui, quenquetsatcotempineri. Aisati te intimeji ashaninca cantacotempineri.

²²Iro cantaincha nocoajeitauque pincamantena paitarica piquenqueshireyetiri. Onashitaca oca piquemisanriri: niotaque oshequi iquishimentajeitacaro anta maaroni nampitsipeequi.

²³Ari iotacaajeitauqueri jaoca oncarate quitaiteri incantavacaimentajeitantarori. Ari oshequi ijajeitanaque ivancoqui. Icamantasanotavaqueri jaoca icanta Tasorentsi ipincatsariventanti. Intamanacaro, irosati itsitenitacotanaquero. Icoaque iriotacaasanotaqueri isanquenatacotiri Moishishini, jeri maaroni camantantatsiniri: tempa isanquenatacotau-
queri Jesoshi.

²⁴Iquemisantaqueri aparopee, itseencaqueri pashini.

²⁵Ipiatsatavacaanaca, impoiji iteentareavacaanaca. Icantaque Pavoro:

—Queario oca ocantaqueri Ishire Tasorentsi. Osanquenatacaqueri Isayashini, camantantatsiniri. Isanquenataqueneri iriori ashanincani.

²⁶Icantini: “Pijate anta joriopeequi, pincamantapeeri: ‘Otimaveta piyempita pinque-
manteameri, iro cantaincha te piotavaqueroji. Poquireavetanaja, pamenavetanaja, iro cantaincha te pamenasanoteji’.

²⁷ Te meeca aneroji atiri iquenqueshireantari. Te inquemisanteji, te irameneji. Icantashirejeitaque: 'Amenicari. Aquemisanticari. Ayotasanoticari. Aquenqueshiretacari. Avavisacotacari' ”.

²⁸ Piojeitavaquero meeca: yoavisacotanti Tasorentsi. Meeca itianquiri quemisantatsiri iriotacaajeiteri pashinisati atiri. Inquemisantajeitavaque irinti.

²⁹ Iquemantavacarori joriopee oca icantaqueriri, ijajeitanaque, iquisatsatavacaajeitanaca.

³⁰ Ocarati apite osarintsi isavicaque Pavoro pancotsineentsiqui, ipinataquero. Yaa-cameetsajeitaqueri maaroni quivantajeitiriri.

³¹ Icantani, icamantacotapinitiri Tasorentsi, jaoca icantari iriori ipincatsariventanti. Icamantacotapinitaqueri Avincatsarite Jesoquirishito, te irimaneroji. Te intimeji tsaneacotearine iquenquetsati.

Narotaque sanquenatimpirori: *Irocashi*

YORA PAVORO ISANQUENATINIRI OROMASATI

Ivetsajetari Pavoro quemisantajeitatsiri anta Oromaqui.

¹ ¿Ainrompi oromasati? ¿Tecatsimpa oajeitempine? Narotaque Pavoro sanquenajeitim-pirori oca. Itiancaquena Jesoquirishito nantaveetiniri. Icoacaquena noncamantajeiteri atiri jaoca icantari Tasorentsi yoavisacotanti. Tecatsi pashini incoacayenari.

²⁻³ Tempa peerani icamantajeitaquerini Tasorentsi yora quenquetsatacotaqueriniri imponeaquea inquitequi Itomi, irantiritapaaque, iroavisacojeiteri maaroni caari cameet-sajeitatsi. Icantaqueerini irishanincatajeari Iravirini. Impoiji isanquenatacotaquerini yora quenquetsatacantatsiniri, irootaque otimantacari meeca irineane Tasorentsi.

⁴ Impoiji ipocaque Jesoquirishito aca quipatsiquica, yoyeetaqueri, impoiji itinaanaja. Ayojeitaque ainiro itasorenca, iriotaque itomi Tasorentsi, aisati quiso oaqueri Ishire Tasorentsi. Irootaque apincatsajeitancariri.

⁵ Aquemisantaqueri, irootaque icavintsaajeitantaqueeri Tasorentsi, aisati itiancajeitan-taqueeri anquemisantacaajeiteri maaroni itsipapee atiri.

⁶ Aisati avirorijeji, icoacaquempi pishanincajeiteari Jesoquirishito.

⁷ Oshequi inintajeitaquempi Apa Tasorentsi, aisati maaroni itsipapee quemisanta-jeitiriri. Meeca nocoaque incanteani incavintsaasanojeitempi, aisati cameetsa irisavica-caajeitempi. Aisati inquempetacaajeitempi Avincatsarite Jesoquirishito.

Incantiri Pavoro: “Nocoaque nojate pinampiqui, noneempi”.

⁸ Meeca noncamantempi: jaocarica nojayetaqueri noquemacotapinitaquempi piquemisantanojeitaque. Iquemacojeitaquempi maaroni atiripee, savicayetatsiri jaocaricapee, irootaque nopasonquitantacariri Tasorentsi, tempa narosati narori quemisantiriri Jesoquirishito.

⁹ Ioti Tasorentsi nocantapinitiri iramitacojeitempi. Noquearioventiniri nantaveetiniri, aisati nocantani noquenquetsatacotiri Itomi: nocamantajeitiri atiri jaoca icanta yoav-isacotanti.

¹⁰ Aisati nocantiri Tasorentsi: “Nocoaque, Apa, pincoacayena nareejeiteari oromasati”.

¹¹ Oshequi noquenqueshirejeitimpi noneajeitempi: nocoaque omatacaajeitempi paitapeerica ora Ishire Tasorentsi, pinquemisantanojanteariri.

¹² Aisati ariorica aneavacaajeitea aquemisantanojeitaque, ari aveshireimentavaca-ajeitea.

¹³ Nocoaque piojeitero, noyemisantaririnte, oshequi nocoapiniveta nojashijeitem-pime, iro cantaincha te incoacayenaji Tasorentsi nojashitempi. Nocoaveta namitaco-jeitempime, oquempetaca namitacojeitaqueri itsipapee ashaninca anta pashinipeequi nampitsi.

¹⁴ Nocoasanoaque nonquenquetsatacaapiniteri yora quereshiasati aisati yora itsipapee atiri; yora iovetachari aisati yora caari iotatsi. Tempa itiancaquena Tasorentsi nonquen-quetsatacaajeiteri maaroni.

¹⁵ Irootaque nocoasanojantacari nonquenquetsatacaajeitempi ara Oromaqui aisati.

Incantaqueri paitarica inquenquetsatacoteri.

¹⁶ Te nompashiventeaji nocamantajeitiri atiri jaoca icanta Quirishito icavintsa-ajeitaquee. Intasoncaventeri Tasorentsi maaroni quemisantajeiterineri, iroavisacojeiteri. Ijivataque iotaque jorio, iro cantaincha ocameetsati iriojeite meeca maaroni itsipapee atiri.

¹⁷ Pineaquero, ariorica anquemisantanoaque, iroameetsajeitaquee Tasorentsi. Tempa peerani isanquenatacairi Tasorentsi yora Avacoconi: “Iroameetsajeiteri Tasorentsi maaroni quemisanterineri, cameetsa irisavicaajeitanteari anta inquitequi”.

Yora itsipapee atiri te iriojeiteriji Tasorentsi.

¹⁸ Itimi Tasorentsi inquitequi, iro cantaincha iotacaajeitaquee iquisaqueri maaroni caari quemisantiri, aisati maaroni antapinitirori caari cameetsatatsi, aisati iriori yora maaroni caari coatsi inquemisantero oca cameetsatatsiri.

¹⁹ Incoajeitaquericame iriojeiteme jaoca icantari Tasorentsi, iriojeiteme. Te ompomer-entsitimoveteariji, tempa yoamejeivetari.

²⁰ Peerani oconijataque maaroni yovetsicajeitiri, ayojeitancacari itimi Tasorentsi, aisati otimi itasorenca. Conijatasanoaque. Tecatsi incantajeitea tseencantatsiri incantajeite: “Te niotacoteriji Tasorentsi”.

²¹ Tempa iojeivetari, iro cantaincha te impincatsajeiteriji. Icavintsaapinijevetari, iro cantaincha te impasonquiijeiteriji iriori. Te inquenqueshirejteaji: yatsipetashitacaro inquenqueshiretashitacaro paitapeerica; meeca te aneajeiteroji iotantari.

²² Icantajeiveta: “Oshequi nioti nainti”, iro cantaincha te iriotsanoteji.

²³ Icameetsatasanotaque irinti Tasorentsi, icantani itimi inquitequi, iro cantaincha te impincatsajeiteriji atiripee. Jero ishiacantajeitaqueri tsimeripee, poshiniripee, maranquepee, maaroni: joo, irointi ipincatsatashitaro yovetsicashiyevetari.

Iroasanquetaajeiteri Tasorentsi yora caari joriotatsi.

²⁴ Oshequi icoajeitaque atiri iquenqueshiretapinijeitaquero caari cameetsatsi, imayempitavacaapinijeita; icanti Tasorentsi: “Ari incanteata, eiro iquemitsi”.

²⁵ Ari peerani iosanojeivetari jaoca icanta Tasorentsi, iro cantaincha yamatavijeitaja irisati. Ipincatsatashijeitacaro maaroni yovetsicajeiteri Tasorentsi, iquemisantashijeitacaro. Irintiquea yora vetsicajeitirori, te impincatsajeiteriji iriori. Tsame ainti aneacameetsajeiteri, ancantaitiyempani. Tempa aitaque ancantajeitari.

²⁶ Ari ishinetaqueri Tasorentsi yantanirojeitaquero paitarica icoajeitaqueri. Te oncoyeji tsinane aye ojime, irointi ocoaque otsinampairo otsinaneronte.

²⁷ Aisati iquempetaca shirampari: te incoyeji iraye ijina, irointi itsinampaapinitiri ishampiririnte. Paitapeerica yantajeitaqueri, iro cantaincha te irioteji impashiventea. Impoiji yoasanquejeitaqueri Tasorentsi, inecarove.

²⁸ Ari te incoajeiteji impincatsajeiteri Tasorentsi, irootaque icantantari Tasorentsi: “Incanteata. Inquenqueshireterota caari cameetsatsi, aisati eiro itimitsi cameetsa”.

²⁹ Imatapinijeitaquero caari cameetsayetatsi: yashi yoiro te incameetsajeiteji, in-
evetitacari ishaninca yashiyetari, icoaque iroashinoncaayeteri itsipapee, iquisavacaajaitaca, yoavacaajaitaca, iquisatsatavacaajaitaca, yamatavitantapinijeiti, itsimaavacaajaitaca, yaamaacotavacaajaitaca,

³⁰ icantimatavacaajaitaca, iquisajeitaqueri Tasorentsi, icantimajeitaqueri ishaninca, inintajeitaja irisati, ishemejeiti, icoacoayetaque irantajeitero pashinipee caari cameetsayetatsi, ipiatsajeitacari ashijeitariri,

³¹ te aneajeiteroji iojeitantari, te inquemisantajeiteji, te irinintavacaajeiteaji, te incavintavacaajeiteaji.

³² Iojeivetaro icantiri Tasorentsi: “Maaroni antapinijeitirori caari cameetsatsi irija-
jeite Sharincaveniqui”, iro cantaincha itsataa yantashijeitacaro aisati yantacaajeitaqueri pashinipee.

2

Aisati iriori jorio, eiro yavisacotashijeitajatsi.

¹ Naamaaca itimi jorio cantatsiri: “Ineashiitetararove irintipee, te incameetsajeiteji”. Iro cantaincha noncamantempi; queariompia, ariorica pincantacoteri itsipapee atiri: “Ainiro yantane”, ainiro pantane avirori, piquempejeitacari yora picantacovetacari.

² Ayojeitaque ocameetsati iroasanquetaajeiteri Tasorentsi yora antirori caari cameetsatsi.

³ Iro cantaincha avirori, picanti: “Ainiro irantanejei irinti”, aisati piquempejeitacari, pantapinijeitiro avirori caari cameetsatsi. ¿Pijitashitampa eiro yoasanquejeitimpitsi avirori Tasorentsi?

⁴ Pamene, oshequi ineshinoncajeitaquempi, icavintsaasanojeitaquempi, te intsipaite irishemempi: osamani icoavetaca pinquenqueshirejteajeame, pojocajeitajerome caari cameetsatsi pantajeitiri. Iro cantaincha, te pimajeiteroji.

⁵ Te pinquenqueshireteroji icantiri Tasorentsi, te pinquenqueshireempaji. Aiquero pijatati pantapiniitaquero caari cameetsatsi, irootaque iroasanquetimentempiri Tasorentsi. Queario, coajica inquisasanojeiteri maaroni antirori caari cameetsatsi. Iro cantaincha ayojeitanaque icameetsasanoti Tasorentsi, eiro iquisashitaritsi atiri, iotasanotaqueri maaroni, jaocarica icantajeitari.

⁶ Iroasanquejeiteri maaroni caari cameetsatsi, irisavicacaajeiteri cameetsa anta inquitequi maaroni cameetsajeitatsiri.

⁷ Ariorica acoasanotaque aneajeiteri Tasorentsi aisati ancameetsasanotanaque, aisati ancantaitiyempani antime inquitequi, tsame anquearioventajeitero maaroni icoacaajaitaqueeri Tasorentsi. Impoiji irisavicacaajaitajee inquitequi, ancantaitiyempani asaviquimojeitajeri.

⁸ Iro cantaincha ainiro irinti caari cameetsatsi, caari coatsi irietero icoacaavetariri Tasorentsi: icoashijeita irantapinitero caari cameetsatsi. Ari inquisasanojeiteri Tasorentsi, iroasanquetasanojeiteri.

⁹ Irimoncaratavacaajeitea jorio aisati itsipapee atiri: ariorica incanteani irantero caari cameetsatatsi, ari irashinoncaajeitea, iroasanquejeiteri Tasorentsi.

¹⁰ Iro cantaincha maaroni antapinitirori cameetsatatsiri irineapaajeri Tasorentsi inquitequi, irineacameetsatavajeri iriori, irisavicacaajeiteri cameetsa: jorio, itsipapee atiri, maaroni. Amoncaratavacaajeitaquea.

¹¹ Yora Tasorentsi te irinashitacaajeiteariji itsipasatipee atiri: ioti aquempetavacaajeitaca.

Timatsi iotacaajeivetariri yora caari joriotatsi.

¹² Yora itsipapee atiri te irineeroji isanquenareni Moishishi, iro cantaincha ainiro yantayetiri, aisati irijate Sharincaveniqui. Iro cantaincha eiro icantiritsi Tasorentsi: “¿Paita caari piquemisantantaro isanquenatiri Moishishi?” Iro cantaincha irinti iovetarori isanquenare ainiro yantayetiri, aisati irijate Sharincaveniqui; ari iroasanquetasanoteri Tasorentsi, incanteri: “Te pinquemisantasanoeroji oca isanquenatiniri Moishishini”.

¹³ Te irineacameetsatashiteariji Tasorentsi quemashijeivetarori irineane, irintiquea ineacameetsatasanojeiti quemisantasanoirori.

¹⁴ Pameneri yora itsipapee atiri, piote jaoca icantajeitari. Te irineeroji Sanquenarentsi, iro cantaincha ainiro imayetaquero ocantayetiri. Pineaquero, iotashiyeta itimi cameetsa.

¹⁵ Ariorica irisavique cameetsa, ayojeitaque iovetaro iriori ocantiri Sanquenarentsi. Ainiro iquenqueshireantavetari: iojeitaque ocameetsatirica yantajeitiri.

¹⁶ Coajica incanteri Tasorentsi yora Jesoquirishito: “Aviro iotirori jaocarica ocantari yantajeitakeri atiripee, pitsoteaquero maaroni iquenqueshirejeitiri. Meeca aviro cantatsine jaocarica irijajeiteri. Aviro cantatsine ariorica aneacameetsateri, ariorica avashinoncayeri”. Irootaque nocamantajeitiriri narori, inquenqueshirejeitanteari, iroavisacojeitanta-jeari.

Yora jorio iojeivetaro isanquenareni Moishishi: ariorica irantero caari cameetsatatsi, ontimasanote irantane.

¹⁷ Iro cantaincha, avirorica jorio, queariompia. Picanticari: “Niotiro nainti isanquenare Moishishi. Noshanincatasanoacari nainti Tasorentsi”. Pishemeticari.

¹⁸ Piojeitiro icoacaajeitakeeri Tasorentsi. Peerani piovetacaroni Sanquenarentsi, irootaque piojeitantavetacaroni cameetsayetatsiri.

¹⁹ Meeca pijitashijeiveta pimatero piotacaajeiteri maaroni caari iojeitatsi. Oquempevetaca pintsiotacojeiterime maaroni timajeitatsiri tsiteniriqui.

²⁰ Piotacaajeiterime maaroni caari iojeitatsi, oquempevetaca poamejeiterime jananequipee. Queario piojeivetaro Sanquenarentsi, tempa cameetsa oamevetaquempi, te amatavitanteji.

²¹ Pamene, poamejeiterime itsipapee, iro cantaincha ¿paita caari piotanta avirori? Tempa oncameetsateme poametaavacaajeiteame avirori. Jero picantajeitakeri itsipapee: “Eiro picoshititsi”. Tempa picoshiti avirori.

²² Picantajeivetari: “Eiro paimentarotsi pijina”. Tempa paimentaro avirori pijina. Picantajeivetari: “Eiro picantirotsi povetsicane: ‘Irio Tasorentsi’. Caari oni”. Iro cantaincha ¿pipincatsatasanoiririmpia avinti Tasorentsisanori?

²³ Pishemejeitaque, picantajeiveta: “Niotiro nainti irineane Tasorentsi”. Iro cantaincha terica pimoncarayeteroji ocantayetiri, tempa pitseenciaqueri Tasorentsi.

²⁴ Jero oca isanquenayeetiniriri peeraniniri: “Ainiro yantayetiri ajorioririnte caari cameetsatatsi, irootaque icantimajeitantariri itsipapee atiri Tasorentsi, icantajeiti: ‘Te incameetsateji Tasorentsi, eiro aquemisantiritsi’ ”.

Jaoca icanta quemisantasanoatsiri.

²⁵ Pamene, ariorica piquemisantaquero irineane Tasorentsi, te pantsipetashiteaji pijoriotaque, tempa piotakeri Tasorentsi. Iro cantaincha terica pinquemisanteri, pantsipetashita pijoriotashiveta.

²⁶ Ariorica inquemisante caari joriotatsi, tempa irineacameetsateri Tasorentsi iriori. Inquempetacayeari jorio, quemisantsiri iriori.

²⁷ Avirorica jorio, piovetarorica isanquenare Moishishi; iro cantaincha terica pinquemisantasanoero, ¿ocameetsatimpa? Teve, te oncameetsateji. Jeri yora caari joriotatsi: te irineeroji Sanquenarentsi, iro cantaincha ariorica irisavique cameetsa, ari irimataquero icoacaqueriri Tasorentsi. Tempa ocameetsatasanoti oca.

²⁸ ¿Jaoca icantari quemisantasanoatsiri? ¿Joriompa inajeiti? Teve. ¿Iriompa toyea-jeitachari? Teve, caari ini.

²⁹ Irinti quemisantincari yora quenqueshiretapinitiriri Tasorentsi. Te iro irineacameetsatimentero itoyeanta, irointiquea ineacameetsatimentero iquemisantiri. Eirorica ineacameetsatiritsi atiri, irintiquea Tasorentsi neacameetsaterine.

3

¹ Naamaaca picantaque: “¿Natsipetashitampa nojoriotaque? ¿Natsipetashitampa no-
toyeanta?”

² Te pantsipevetearoji pijoriotaque. Tempa irio jorio yoametiri Tasorentsi.

³ Queario, te inquemisantajeiteji maaroni, ainiro amataviyeterinemeru Tasorentsi. ¿Ari-
ompa iramatavitaqueri Tasorentsi yora quemisantiriri?

⁴ Teve, eiro yamataviritiritsi. Ariorica iramatavitantajeite maaroni atiri, iro cantaincha
tecatsi incantea Tasorentsi iramatavijeitee irinti. Tempa peerani isanquenatini Iravirini,
icanti: “Otampaticatasanotaque, Tasorentsi, pineane: te pintseeyaji. Tecatsi incantea atiri
impiatsajeitempi”.

⁵ Naamaaca itimi cantashitachari: “Arriorica nantero caari cameetsatatsi, impoiji iri-
ojeite noshaninca icameetsatanotaque Tasorentsi, te inquempetenaji narori. Impoiji
ariorica impincatsajeiteri. ¿Paita meeca inquishmentantenarori Tasorentsi caari cameet-
satatsi nantayetiri? Tempa irootaque irineacameetsatanteariri noshaninca”.

⁶ Teve. Te oncameetsateji oca yaamaayevetari. ¿Arimpa iramatavitaquee Tasorentsi?
Icanti intianqueri antapinitirori caari cameetsatatsi Sharincaveniqui.

⁷ Pineaquero, ¿ocameetsatimpa nontseeya niotacantearimeri atiri te intseeyaji Tasorentsi,
impoiji impincatsateri? Impoiji oncameetsateme nontseeya, eirome iquishmentanarome
Tasorentsi nontseeya. Iro cantaincha, te oncameetsateji oca icantiri.

⁸ ¿Ocameetsatimpa antapinitero caari cameetsatatsi inkuimoshiretanteari Tasorentsi?
Teve, eiro antirotsi. Ocameetsati intianqueri Tasorentsi Sharincaveniqui
cantashinroyetarori oca, aitanaguempaquea irineashiietearotave coajicani. Iro
cantaincha itimi cantacotashitanari: “Yoametiri Pavoro ashaninca yantiro caari
cameetsatatsi”. Itseeyashita iriori.

⁹ Ari arojei jorio. ¿Ocameetsatimpa ancante: “Te incameetsajeiteji itsipapee atiri, aroquea
ainti, acameetsajeiti”? Te oncameetsateji ancantero oca. Tempa amoncaratavacaajeitaca,
ainiro antanejei maaroni: aroripee, aisati iriori itsipapee atiri.

¹⁰ Tempa aitaque ocanti Sanquenarentsi: “Te intimeji cameetsatatsineri, tecatsi catsini.

¹¹ Te intimeji coatsine irioteri Tasorentsi, aisati te intimeji coatsine irioteri icoacaque-
riri.

¹² Iquishimanataqueri Tasorentsi, yantajeitiro caari cameetsatatsi. Te intimeji cameet-
satatsine, tecatsi catsini.

¹³ Te oncameetsateji catsini iquenquetsatashiyetari. Oshequi itseeya. Oshequi catsini
iquisatsajeitiri ishanincapee.

¹⁴ Oshequi yoamaimanatiri ishaninca, iquisatsatpinijeitiri.

¹⁵ Aisati yoashiyetacari ishanincani, shemi, shemi.

¹⁶ Jaocarica ijayetaqueri, yoashinoncaayetaqueri ishaninca.

¹⁷ Te irioteji catsini incavintsante, irineshinoncatante.

¹⁸ Te impincatsajeiteriji Tasorentsi”. Irootaque isanquenatacaqueriniri Tasorentsi
peeraniniri.

¹⁹ Ayojeitaque meeca irashinoncaasanotea maaroni jojeivetaraji isanquenareni
Moishishi. Jojeiveta paita icoacaqueriri Tasorentsi, tecatsi incantajeite: “Te nioteji”.
Tempa iroashinoncaajeiteri maaroni atiri antirori caari cameetsatatsi.

²⁰ Tecatsi incante atiri: “Nomajeitaquero maaroni ocantiri isanquenareni Moishishi,
meeca irineacameetsatena Tasorentsi”. Teve, te irimateroji. Tempa irootaque Sanquenar-
entsi oamejeiteeri ainiro antane.

Yoavisacojeitaqueri Tasorentsi maaroni quemisantajeitaqueriri Quirishito.

²¹ Meeca noncamantempi: yora Moishishini aisati yora camantantatsiniri icamanta-
jeitaquee jaoca ancanteari irineacameetsatanteeri Tasorentsi. Te incamanteeji amoncar-
atero Sanquenarentsi,

²² irointi icamanteeni ariorica aquemisantaqueri Jesoquirishito, ineacameetsajeitaquee
Tasorentsi. Aitaque amoncaratavacaajeitaca, arojeitaque jorio aisati itsipapee atiri:

²³ ainiro antajeitaqueri caari cameetsatatsi, maaroni. Te antajeiteroji cameetsayetatsiri
icoacaajeitaqueeri Tasorentsi.

²⁴ Ariorica aquemisantajeitaqueri Jesoquirishito, yoavisacojeitaquee Tasorentsi, ineac-
ameetsajeitaquee. Tempa ineshinoncajeitaquee: te inquenqueshireteroji aisati caari
cameetsatatsi antajeitaqueri.

²⁵⁻²⁶ Itiancaqueri itomi, icamimentaquee, aparajatimentajeitae iriraja. Meeca, ari-
orica aquemisantaqueri, moncarataca, eiro iquenqueshiretajiroti aisati antajeitaqueri.
Aisati peerani, tequeratani impoqueni aca quipatsiqui Jesoshi, te iroasanquejeiterini
Tasorensi yora quemisantatsiniri. Iotitani coajica incamimentajeiteri iriori Jesoshi.
Irootaque ayojeitancari icameetsasanaotaque Tasorensi aisati ineacameetsajeitaqueri
maaroni quemisantajeitiriri Jesoshi.

Tecatsi ancantajeitea arori ashemete, te amateroji avavisacotajea arosati.

²⁷ Tecatsi meeca ancantea ashemete. Tecatsi ancantea aisati avavisacotajea arosati.
¿Paita caari amatantaro? Tempa irinti quemisantatsiri yoameetsatiri Tasorensi.

²⁸ Pineaquero, ariorica aquemisantaque, yoameetsataquee Tasorensi. Te incantajeit-
eeji: “Pimoncarajeitero isanquenare Moishishi pavisacojeitantajeari”.

²⁹ ¿Apanirompa yoavisacojeitiri Tasorensi jorio? Tempa aisati yoavisacojeitaqueri
pashinipee atiri aisati.

³⁰ Itimi aparoni Tasorensi, icavintsaajeitae maaroni. Iotaque amoncaratavaca-
jeitaca. Ariorica inquemisante jorio, iroavisacoteri. Ariorica inquemisante itsipapee atiri,
iroavisacoteri.

³¹ Ariorica aquemisantaqueri Jesoshi, ¿ocameetsatimpa ajocajero Sanquenarentsi? Teve,
eiro ajocajirotsi. Ariorica aquemisantaque, irootaque amatantearori ocamantajeitae-
eri.

4

Ineacameetsataqueri Tasorensi Avaramani.

¹ Piojeitae jaoca icantaniri ashanincasanorini Avaramani. Meeca noncamantempi:

² te iroavisacotajeaji irisati. Iroavisacoteame irisati, irimaterome irishemeteme, in-
canteme: “Oshequi nocameetsataque, navisacotantajari”. Iro cantaincha tempa iotaque
Tasorensi te incameetsateji Avaramani.

³ ¿Paita ocantiri Sanquenarentsi? Tempa ocanti: “Iquemisantaqueri Avaramani
Tasorensi, irootaque ineacameetsatantarini”.

⁴ Noshiantempiro: intimerica tsameetenerine ivatorote, tempa ocameetsati impina-
teri. ¿Ocameetsatimpa incanteri: “Jeri yoca, nompashitempiri”? Te oncameetsateji: tempa
pomerentsitaca itsameetiniri.

⁵ Irinti Tasorensi, inashita: eiorica amayetirotsi cameetsayetatsiri, iro cantaincha
ashiretaririca, aitaque iroameetsajeitee. Eiro apomerentsiventaritsi ampinateri.

⁶ Pineaquero, tecatsi antasanote iroameetsatanteeri Tasorensi, iro cantaincha
irivshireacaajeitee, ariorica anquemisanteri. Tempa irootaque icantaqueniri Iravirini:

⁷ “Iquimoshirejitaque maaroni atiri yora icavintsaiki Avincasarite. Eiro iquen-
queshiretajiroti aisati caari cameetsatatsi yantayetiri.

⁸ Queario, inquimoshiretasanaotaque, iotaque eiro iquishmentiriti yantayetiri”.

⁹ Ari, ¿janica iquenquetsatacotiri Iravirini? ¿Apanirompa ajorioririnte? Tempa iquen-
quetsatacotiri aisati maaroni itsipapee atiri. Tempa ayojeiti iquemisantaque Avaramani,
irootaque yoameetsatantariri Tasorensi.

¹⁰ Iro cantaincha ¿jaoca icantacari yoameetsatantariri Tasorensi? Tequerani irijori-
oteni, tequerani intoyeanteani.

¹¹ Pineaquero, tequerani intoyeanteani ishiretarini Tasorensi, yoameetsatantariri.
Impoijiquea itoyeantaca, iojeitancari ishaninca ijivataque iquemisantaque. Meeca
ayojeitae aitaque inquempejeiteari iriori itsipapee atiri: eiro ijititsi ariorica intoyeantea
irineacameetsatanteeriri Tasorensi, irointiquea inquemisante. Tempa yora Avaramani
iriotaque intasanotacarori iquemisanti.

¹² Aisati inquempejeiteari maaroni ashanicapee arori, ariorica inquemisante. Eiro
ijititsi ariorica intoyeantaquea, ari iravisacotaje, irointi ocameetsati inquemisante irav-
isacotantajeari. Inquempeteari Avaramani, tequerani intoyeanteani peerani.

Jero oca icantiriniri Tasorensi Avaramani.

¹³ Ari iquemisantaque Avaramani, irosati yoameetsatantariri Tasorensi, impoiji can-
taqueri: “Nocoacaquempi coajica pimpincatsaventajeiteri maaroni quipatsisati. Pincar-
ajeiteri maaroni quempejeitempineri piquemisanti, pimpincatsariventantajeite”. ¿Paita
icantantarini oca? ¿Imoncarayetironimpa isanquenare Moishishi? Teve, tequerani onti-
meni. Iro icantantarini, ishiretarini.

¹⁴ Irioricame incanteme yora coavetachari irimoncaraterome isanquenare Moishishi,
iramataviterime Avaramani. Tecatsime incanterime shiretariri.

¹⁵ Iroashinoncaajeiteri Tasorentsi maaroni caari moncaratiro isanquenare Moishishi, inquisaqueeri. Iro cantaincha eiroricame otimime isanquenare, tecatsime inquisihimeteemeru Tasorentsi.

¹⁶ Ariorica ashiretacari Tasorentsi, tempa imoncarataquero icantaqueeri. Queario, ineshinoncajeitaqueri maaroni quempejeitariri Avarama. Te apaniro irineshinoncajeiteri jorio, irointi ineshinoncajeitaqueri maaroni quemisantatsiri. Tempa iriotaque Avarama intacarori iguemisantaque; ariorica aquemisantaque, aquempejeitajari.

¹⁷ Tempa icantaquerini peerani Tasorentsi: “Avirotaque intasanotacarori, impoiijuea inquempejeitempi oshequi itsipapee atiri”. Iriotaque Tasorentsi quiso oaqueriri Avaramani. Aisati yoaneajiri camayevetaichari, tempa irisati timacaajeitirori maaroni aneajeitaqueri.

¹⁸⁻²⁰ Iotacotaca Avaramani yanteashipataque, irotimataintsi incame. Aamaaca ocarataque irosarintsite 100. Aisati iotiro ijina, shiravaro oni. Te intimeji itomi catsini, iro cantaincha icamantaqueri Tasorentsi: “Irishequianaje pishanincasanori”. Te intseenqueriji Tasorentsi, irointi iquencheshiretaquero icantaqueriri, iotaque queario icantaqueriri, irimoncarataquero maaroni. Tequerani intimeni ishanincani, iveshirementacari Tasorentsi, icanti: “Tempa icameetsataque Tasorentsi”.

²¹ Iotasanotini ainiro itasorencia Tasorentsi, tecatsi pomerentsitimotearine; iotasanotini irimatero maaroni icantaqueriri.

²² Irootaque icantantacari Tasorentsi: “Ishiretaquena Avarama, irootaque noneacameetsatantari”.

²³⁻²⁴ Irootaque icantaqueriniri Avaramani, irosati meeca icantajeitaqueeri arori; ayojeitaque ariorica ashiretari Tasorentsi, ineacameetsajeitaquee, iquempetacaantajeitaquee te anteroji caari cameetsatatsi. Tempa iriotaque oitinaajiriri Avincatsarite Jesoshi.

²⁵ Otimi antajeitiri caari cameetsatatsi, irootaque icamimentantajeitaqueeri Jesoshi. Impoiji itinaanaja aisati, irootaque ayojeitantacari maaroni ineacameetsajeitaquee, oquempetaca te antapiniteroji caari cameetsatatsi.

5

Ineacameetsajeitaquee Tasorentsi ayojeitantacari antime inquitequi, ancantaitiyempani.

¹ Ari icamimentajeitaquee Avincatsarite Jesoquirishito, yoavisacojeitaquee. Meeca ashirejeitacaro maaroni icantaqueeri Tasorentsi, irootaque ineacameetsajeitantajeeri, oquempetaca te anteroji caari cameetsatatsi; meeca yaacameetsajeitaquee, maaroni.

² Aquemisantaqueri Quirishito, irootaque icavintsantaqueeri Tasorentsi, icantiani. Oshequi aveshirementacari, ayojeitaque aneajeitajeri anta ipincatsaritanotinta.

³ Aisati, ariorica aquemaatsicatacaro paitapeerica, cameetsa aveshirementeari Tasorentsi. Ayojeitaque ariorica aquemaatsicatacaro, yamitacotaquee amavetantarori, eiro ashemantatsi.

⁴⁻⁵ Aisati ariorica ayoti amavetiro, yamitacotaquee Tasorentsi aquearioventaquero antaveetiniri Tasorentsi. Ariorica aquearioventiniri paitapeerica, ayotanaque ashiretacaro icantaqueeri, aisati ayotanaque te iramatavijeiteji. Tecatsi incantee iramatavijeitee, tempa quiso oajeitaquee Ishire, irootaque meeca inintasanajeitantaqueeri catsini. Aveshirementacari.

⁶ Peerani ashinoncaasanojeitaca, tecatsi ancantea avavisacotajea arosati. Impoiji omoncaratantacari, ipocaque Quirishito. Te ampincatsaveteariji, iro cantaincha icamimentajeitaquee.

⁷ Ari te aneapiniteriji atiri coatsiri incamimenteru itsipapee cameetsatatsiri, iroavisacotanteariri. Iro cantaincha aamaaca itimi aparopee camimentiriri cameetsatatsiri.

⁸ Arojeiquea ainti, te ancameetsajeiteji, iro cantaincha itiancaqueri Tasorentsi Itomi icamimentajeitaquee. Tempa irootaque ayojeitantacari icavintsasanojeitaquee, inintasanajeitaquee.

⁹ Aparajatimentaquee iriraja, icamimentajeitaquee. Meeca ineacameetsataquee Tasorentsi, oquempetaca te anteroji caari cameetsatatsi. Coajica, inquisheri Tasorentsi maaroni antapiniteroji caari cameetsatatsi, irompa ainti, aitaque iroavisacojeitaquee.

¹⁰ Peerani aquisaveitarini Tasorentsi, iro cantaincha icamimentajeitaquee Itomi, meeca aneacameetsataqueri Tasorentsi; aisati iriori, ineacameetsataquee. Meeca eiro icamajitsi aisati Jesoshi, irointi yaneeasnotaji, imatantarori itasoncaventapinijeitaquee meeca.

¹¹ Aisati ayojeitaque ariorica aquemisantaqueri Avincatsarite Jesoquirishito, ineacameetsajeitaquee Tasorentsi. Tempa irootaque aveshirementantariri meeca.

Yantaqueri Aran aisati yantaqueri Jesoquirishito.

¹² Peerani intanacaro caari cameetsatsi aparoni shirampari, yora Aran; irootaque icamantacari impoiji. Aisati aquempejeitacari arori, aisati iriori maaroni pashinipee atiri; antajeitaquero caari cameetsatsi: ashi avajeitiro. Irootaque meeca acamanejeitanti arori maaroni: ashi airo acamajeti maaroni.

¹³ Peerani te ontimeni isanquenareni Moishishi. Yantapinijeitaquero atirini caari cameetsatsi, iro cantaincha te iriotasanojeiteni paita icoacaasanotaqueriri Tasorentsi: pineaquero, te ontimeni irineane.

¹⁴ Iro cantaincha icamajeitaque maaroni atiri: yora Aran, iriotaque nijantaquerori, irootaque icamajeitancari maaroni impoitiriri itimi, irosati itimantacari Moishishi. Oamaajeitaqueri yantiniri Aran, te iro oamayerine yantayetiri iriori. Yora Aran ishiavetari pashini pocatsiri impoiji,

¹⁵ iro cantaincha inashita aisati. Otimi yantaqueri Aran icamajeitancari atiri. Iro cantaincha icavintsaasanojeitaquee Tasorentsi, te inquishmentasanojeitiroji antayetiri, irootaque itiancantacariri yora impoitatsiri ipoqui: yora Jesoquirishito.

¹⁶⁻¹⁷ Oca yantaqueri Aran oamaajeitaqueri oshequi atiri, irointi oca yantaqueri Quirishito oaneajeitajiri oshequi atiri. Meeca icavintsaasanojeitiri Tasorentsi oshequi atiri, te inquneshiretacotajeriji yantajeitaqueri, irointi incameetsajeitaqueri maaroni quemisantiriri Quirishito. Yoaneajeitaqueri maaroni, incantaitiyempani irisavique inquitequi.

¹⁸ Yantaquero caari cameetsatsi aparoni shirampari: yora Aran, irootaque ajajeitan-teameri Sharincaveniqui arori. Iro cantaincha ainiro yantaqueri pashini shirampari, yora Quirishito. Yoameetsajeitaquee irinti, asavicajeitantajeari inquitequi, ancantaitiyempani.

¹⁹ Te inquemisanteriji Aran Tasorentsi, irootaque caari acameetsajeitanta. Iquemisan-taqueri Quirishito iriri, irootaque yoameetsajeitantaqueri.

²⁰ Isanquenatacaqueri peerani Tasorentsi Moishishi ayojeitancari te oncameetsateji catsini oca antajeitaqueri. Te ancameetsateji catsini, iro cantaincha oshequi catsini icavintsaajeitaquee Tasorentsi.

²¹ Ari te ancameetsajeiteji, irootaque acamajeitancari, iro cantaincha aquemisanta-jeitaqueri Avincatsarite Jesoquirishito, irootaque icavintsaajeitantajeari Tasorentsi. Te inqunishmenteroji antajeitaqueri, irointi yoameetsajeitajee ancantaitiyempani asaviquimojeitajeri anta inquitequi.

6

Ariorica avaotisajeitaja aquempetacantajeitaca atsipajeitacari Quirishito acamajeitaque aisati atinaajeitanaja.

¹ ¿Paita antajeiteri meeca? ¿Antapinijeitajerompa caari cameetsatsi incavintsapinijeiteeri Tasorentsi?

² Teve. Eiro catsini antapinitajirotsi aisati caari cameetsatsi. Oquempetaca acamaque, eiro amatantaro antapinitajero aisati. ¿Paitasa, meeca, antapinitantajarori?

³ Ariorica aquemisantaqueri Quirishito aisati avaotisamentajeitacari, oquempetaca acarajeitaqueri acamajeitaque.

⁴ Aisati oquempetaca acarajeitaqueri atijajeitaca, aisati oquempetaca atinaajeitanaja. Meeca anashijeitaja, aquempejeitacari Jesoshi: icamaque, impoiji itasoncasanotajiri Apa Tasorentsi itinaantanajari aisati. Meeca inashitanaja, te inqunempeteajeji peerani.

⁵ Ari piquempejeitacari Quirishito. Oquempetaca picarajeitaqueri picamajeitaque, aisati oquempetaca picarajeitaqueri pitinaajeitanaja: paneajeitanaji, iro cantaincha pinashijeitanaja maaroni. Te inqunempeteaji Quirishito peerani; aisati avirorijeji, te pinquempeteajeji peerani.

⁶ Peerani oshequi picoapinijeitini pantapinijeitironi caari cameetsatsi, iro cantaincha oquempetaca pitsipatacari Quirishito pipajacojeitaca coroshiqui, picamajeitaque: ¿paitam-pa pincoantajeari aisati pampiitajero caari cameetsatsi? Peerani oquempetaca avirojeji iratiritepee camaari, yantacaapinitaquempi caari cameetsatsi; iro cantaincha meeca oquempetaca picamaque, tecatsi incantea iromperanatajempji aisati.

⁷ Pineaquero, ariorica incamaque atiri, eiro itimitsi omperanajeitajearineri. Meeca avirori, eiro pantajirotsi meeca caari cameetsatsi.

⁸ Ariorica picarajeitaqueri Quirishito picamajeitaque, ayojeiti pincarajeiteri aisati pisaviquimoteri anta isaviquinta iriori.

⁹ Ayojeitaque icamaque, aisati itinaanaja. Eiro icamajitsi aisati: tecatsi incantajea incamaje aisati.

¹⁰ Icamantacari Jesoshi, icamimentaqueeero caari cameetsatatsi antajeitaqueri. Moncar-ataca: eiro icamajitsi aisati. Meeca aneanaji: quiso yoajiri meeca Tasorentsi, incantaitatdiyempani.

¹¹ Aisati aviroripee, piquempejeitaca picamasanojeitaque, eiro pantantajarotsi caari cameetsatatsi; iro cantaincha yoaneajeitajimpi aisati Jesoquirishito, piojeitantajariri Tasorentsi.

Iquenquetsatacotiri pincatsatiriri camaari aisati pincatsatiriri Tasorentsi.

¹² Tempa oquempetaca picamaque: eiro meeca pantapinitajirotsi caari cameetsatatsi, eiro piquenqueshiretajirosi.

¹³ Ari oquempvetaca picamaque, eiro pishinetantajaritsi meeca camaari irantacaap- initempiro caari cameetsatatsi. Aisati oquempvetaca yoaneajimpi Tasorentsi, irootaque pishinetanteariri irantacayetempiro cameetsayetatsiri.

¹⁴ Eiro meeca pantajirotsi caari cameetsatatsi. Te aneroji peranatempine pantero paitapeerica, irointi icavintsajeitaquempi Tasorentsi, ineshinoncajeitaquempi.

¹⁵ ¿Paita anter meeca? Ayojeitaque te ontmeji peranajeitane aisati ayojeitaque icav- intsaapinijeitaque Tasorentsi. ¿Ocameetsatimpa antashitapinitearo caari cameetsatatsi? Teve, te oncameetsateji.

¹⁶ ¿Janicampa pimpincatsatasanoteri? Ariorica pimpincatsateri camaari, irantacaap- initempiro caari cameetsatatsi, iro cantaincha impoiji pijate Sharincaveniqui. Iro cantain- cha ariorica pimpincatsateri Tasorentsi, irantacaapinitempiro cameetsayetatsiri.

¹⁷⁻¹⁸ Peerani pipincatsaveitarini camaari, meeca pipincatsatajiri Tasorentsi. Piquemisantajiro maaroni yoamejeitajimpiri iriori, irootaque nopasonquitantariri meeca. Pantapiniveitaroni caari cameetsatatsi, meeca pantapinitiro cameetsayetatsiri.

¹⁹ Noncamantempiro piojeitantearori, pinquemajeitantearori. Oquempetaca peerani pipincatsaveitarini camaari pantantaroniri caari cameetsatatsi, ocameetsati meeca pimp- incatsajeiteri Tasorentsi pantajeitantearori cameetsayetatsiri, pincameetsatasanojeitan- teari.

²⁰ Peerani, pipincatsajeiveitarini camaari, te pimpincatsajeiterini Tasorentsi.

²¹ Iro cantaincha oshequi meeca pipashiventacaajaro pantajeiveitaniri: ¿paita imp- inatempimeri camaari? Pantajeiveitanarini, irootaque pijatanteameri Sharincaveniqui.

²² Meeca tecatsi incante camaari iromperanajeitajempi aisati: tempa meeca pipincat- sajeitajiri Tasorentsi. Iroameetsajeitempi irinti, irisavicacaajeitempi inquitequi: pincan- taitatdiyempani.

²³ Pantapinijeivetacaro caari cameetsatatsi, pijajeitanteameri Sharincaveniqui. Iro can- taincha piquemisantaqueri Jesoquirishito, irootaque icavintsantaquempiri Tasorentsi, irisavicacaajeitempi inquitequi, pincantaitatdiyempani.

7

Ariorica aquemisanti, te omperanajeiteji isanquenare Moishishi.

¹ Tequerarica, noyemisantaririnte, pinquemasanajeite. Avirojeitaque nojrioririnte, noquenquetsatacaajeitiri. Ariorica incame ashaninca, tecatsi incantea inquemisantero icantavetacari Moishishini.

² Noshiacantempiro oca. Ocanti Sanquenarentsi: “Ariorica aye tsinane ojime, quiso oanaqueri, irosati incamanteari. Te oncameetsateji ojocashitajeari”. Iro cantaincha ariorica incamaque, te aneajeriji ojime.

³ Iro cantaincha ainrorica ojime, te oncameetsateji aimenteari. Ariorica incamaque ojime, ari ocameetsati aaje aisati pashini ojime, meecaquea te aimenteariji ojimeni. Tecatsi tsaneajeearone aaje.

⁴ Aisati, noyemisantaririnte, icamaque Quirishito: aisati oquempvetaca picarajeita- queri, picamajeitaque. Meeca eiro operanatajimpitsi isanquenare Moishishi, tempa oquempvetaca picamaque. Irointi yoaneajeitajimpi aisati Tasorentsi pimajeitantearori maaroni icoacaajeitaquempi.

⁵ Peerani aquemisantaveitarini camaari. Acoapiniveitaroni antapinitironi caari cameetsayetatsi, ora itsaneapitsavetaqueeri Tasorentsi. Aitaque acantajeitaniri, antapini- jeitironi, irootaque ajajeitanteameri Sharincaveniqui.

⁶ Iro cantaincha oquempetaca acamajeitaque. Eiro meeca aquenqueshirejeitajirotsi icantajeitiri jorio, yamejeitari iriori. Meeca te antapiniteroji ocantiniri isanquenatiniri peerani, irointiquea antapinite ocoacaajeitaqueeri Ishire Tasorentsi.

Iquenquetsatacotaquero isanquenare Moishishi.

⁷ ¿Paita nocantajeitimpiri? ¿Nocantimpimpa te oncameetsateji isanquenareni Moishishi? Teve, te noncantempiji. Eirome otimime, eiro niotime te oncameetsateji nantayetiri.

Eirome ocantime: “Eiro pinevetarotsi yashiyetari itsipapee”, eiro niotime te oncameetsateji.

⁸ Oamevetaquena te oncameetsateji nonevetearo paitapeerica, niövetaro; iro cantaincha aiqhero nojatatii nonevetasanotanacaro paitapeerica. Eirome otimime Sanquenarentsi, eiro niotime te oncameetsateji nonevetearo.

⁹ Peerani, tequerani nioteroni Sanquenarentsi, noquimoshiretashiveitani. Iro cantaincha impoiiji oametaquena otimi nantane, irootaque noashiretantacari. Niotanaque nojateme Sharincaveniqui.

¹⁰ Nojivetaca ariorica nanterome maaroni ocantiri Sanquenarentsi noncantaitiyempani nontimeme inquitequi, iro cantaincha tecatsi noncanea nomatero. Oametaquena meeca otimi nantane, irootaque nojatanteameri Sharincaveniqui.

¹¹ Oshequi noquenqueshiretaquero caari cameetsatsi, namatavitantajari narosati, irootaque caari nantantaro ocantiri Sanquenarentsi. Impoiiji niotaque nojate Sharincaveniqui.

¹² Pineaquero, ocameetsataque isanquenareni Moishishi: irootaque irineane Tasorentsi, ocameetsatasanotaque.

Icantiri paita antapinitantarori caari cameetsatsi.

¹³ Ari ocameetsati Sanquenarentsi, iro cantaincha ¿paita nojatanteameri Sharincaveniqui? ¿Irompa Sanquenarentsi jatacayenaneme? Teve, irointi nantaquero caari cameetsatsi, irootaque nojatanteameri Sharincaveniqui. Tempa oametajana Sanquenarentsi te oncameetsateji catsini oca nantayetaqueri.

¹⁴ Ocameetsataque irointi, tempa irio sanquenatacaantirori Tasorentsi; narori, te noncameetsateji nainti, catsini.

¹⁵ Te niotacoteaji narosati: nocoaveta nontimeme cameetsa, iro cantaincha, te nomateroji. Nantapinitiro caari nocoasanoveta.

¹⁶ Niotaque te oncameetsateji oca nantayetaqueri, niotaque ocameetsati oca oametantiri Sanquenarentsi.

¹⁷ Te noncoaveteaji nantero paitapeerica, iro cantaincha nashi noiro te noncameetsateji, irootaque nantashitantarori.

¹⁸ Niotaque te noncameetsateji catsini. Ariorica nocoaveta nanterome cameetsayetsasiri, iro cantaincha te nomateroji.

¹⁹ Te nantapiniteroji cameetsatsisiri nocoavetari nantemeru, irointi nantapinitiro caari cameetsatsi caari nocoaveta nantero.

²⁰ ¿Paita nantashitantarori caari nocoaveta nantero? Aitaque nashi noiro te noncameetsateji, irootaque nantashitantarori.

²¹ Aitaque nocantani: nocoavetaca nosaviqueme cameetsa, iro cantaincha omapocaquena nantaquero caari cameetsatsi.

²² Noquenqueshiretasanovetacaro irineane Tasorentsi, nocoasanovetaca nanterome icoacaquenari.

²³ Oshequi noashiretasanovetaca catsini. Oshequi noquenqueshirevetacari Tasorentsi, nocoavetaca nanterome icoacaquenari. Iro cantaincha tecatsi noncanea nantero, irointi omapocaquena nantaquero caari cameetsatsi.

²⁴⁻²⁵ Oshequi nashinoncaavetaca. Noquenqueshirevetaca nanterome icantaquenari Tasorentsi, iro cantaincha nashi noiro te noncameetsateji. ¿Janica amitacotenaneri eiro nantapinitantajarotsi aisati caari cameetsatsi? Iriotaque Avincatsarite Jesoquirishito amitacotenaneri. Irootaque meeca oshequi nopasonquitantariri Tasorentsi.

8

Amitacojeitaquee Ishire Tasorentsi.

¹ Ariorica anquemisantajecteri Jesoquirishito, aisati antapinitero icoacaqueeri Tasorentsi, eiro yoasanquetaajeteetsi. Eiro meeca antapinijeitirotsi caari cameetsatsi acoiri arori.

² Ari peerani nashi noironi nantapinitironi caari cameetsatsi, nojateme Sharincaveniqui. Iro cantaincha noquemisantaqueri Jesoquirishito, oavisacotantajanari Ishire Tasorentsi, oaneantajanari. Osavicacaajena coajica anta inquitequi, noncantaitiyempani.

³ Pineaquero, tecatsi oncanea oavisacojeitee isanquenare Moishishi: ashi airo te oncameetsateji. Te amajeiteroji ocantaqueeri. Iro cantaincha yoavisacojeitaquee Tasorentsi, irinti. Itiancaqueri Itomi aca quipatsiqui, yatiritapaaque, iquempetasanotapaaquee arori, iro cantaincha te iranteroji caari cameetsatsi. Icamimentaquee arori, ipashinitacaajee eiro aquempetantajatsi perani.

⁴ Meeca, ariorica anquemisantero Ishire Tasorentsi, ari amataquero ocantaqueeri Sanquenarentsi. Peerani ashi aironi te ancameetsateji, te amateroni ocantaqueeri.

⁵ Yora caari cameetsajeitatsi iquenqueshiretapinitiro irantero caari cameetsatatsi. Irinti iotirori Ishire Tasorentsi icoaque irantero ocoacaqueriri iroori.

⁶ Ariorica anquenqueshiretero acoashiyetari arori, ajate Sharincaveniqui. Ariorica anquenqueshiretero Ishire Tasorentsi, ari cameetsa ancantaitiyempani asaviquimojeiteri Tasorentsi.

⁷ Ariorica antayetero acoaqueri arori, atseencaqueri Tasorentsi: te ancoyeji antayetero icoacaajeivetaqueeri. Eiro amatirotsi.

Jaoca icanta yora caari cameetsayetatsi.

⁸ Te irineacameetsateriji Tasorentsi maaroni antayetirori caari cameetsatatsi.

⁹ Iro cantaincha avirojei avinti, te pinquempeteiteari iriori. Quiso oajeitaquempi avirori Ishire Tasorentsi. Yora caari quiso oi Ishire, te irioteriji Quirishito.

¹⁰ Oshequi pantaquero caari cameetsatatsi, irootaque pincamajeitanteari, iro cantaincha pishanincatacaririca Quirishito, yoameetsataquempi Tasorentsi, pincantaitiyempani pisaviquimoteri.

¹¹ Tempa yoitinaajiri Jesoshi. Meeca ariorica quiso oaquempi Ishire, irointinaajeitajempi aisati, iroaneajeitajempi aisati. Iro irimatantajempiri pishiretcaro Ishire.

¹² Meeca, noyemisantaririnte, atsipetashitacaró aquemisantiri camaari, atsipetashitaro antiro caari cameetsatatsi.

¹³ Ariorica pantapinitero aisati, pijate Sharincaveniqui. Iro cantaincha ariorica pinquemisantero Ishire Tasorentsi, eiro pantajirotsi aisati caari cameetsatatsi, impoijiquea pisavique inquitequi, pincantaitiyempani.

Itomintajeitari Tasorentsi maaroni quemisantiriri.

¹⁴ Maaroni quemisantirori Ishire Tasorentsi, iriojeitaque itomipee Tasorentsi.

¹⁵ Pamene, ariorica quiso oajeitaquee Ishire, arojeitaque Itomi. Te anquempeteiteari iratiritepee, aisati eiro atsaroacaaritsi. Eiro aquempetajatsi peerani atsaroacaajeivetarini. Tempa queario, acantiri meeca: "Apa".

¹⁶ Ariorica ayotaque quiso oajeitaquee Ishire Tasorentsi, aisati oamejeitaquee, irootaque ayojeitancari itomintajeitaquee Tasorentsi.

¹⁷ Arojeitaquerica itomipee, ari impajeitaquee Tasorentsi maaroni icoacaaqueeri ontimimojeitee coajicani, anquempeteiteari Quirishito. Meeca aitaque anquempeteiteari aneacatsitaquearo paitapeerica, iro cantaincha coajica anquempeteitajeari cameetsa asaviquimojeiteri Tasorentsi, aveshireimentajeiteari.

Coajica eiro aquenqueshiretajirotsi paitapeerica aquematsicavetacari meeca.

¹⁸ Coajica cameetsa catsini irisavicacaajeitee anta inampiqui, impoiji eiro aquenqueshiretajirotsi paitapeerica aquematsicavetacari meeca.

¹⁹ Ayojeitaque maaroni catsini yovetsicajeitaquee Tasorentsi irisavicacaasanojeitaquee cameetsa, aisati impeajeitajee pincatsaritajantsineri. Yaamaajeitacari maaroni catsini: "¿Jaoca oncarate intasoncaventajeitajeri maaroni itomipee?"

²⁰⁻²¹ Yatsipetashita itimayetaque maaroni yovetsicajeitiri Tasorentsi: icamapinijeitaque iriori poshiniripee, panquirentsipee, maaroni; eiro aneajiritsi aisati coajicani. Tecatsi irantajeivetea icamajeitancari, irointi icamajeitancari otimi yantaqueri peerani Aran. Iotaque Tasorentsi coajica eiro oquempetajatsi meeca, irointi iroameetsatasanojeitajeri aisati, oquempetaca iroameetsatasanojeitajee arori: tempa arojeitaque itomipee maaroni.

²² Ayojeitaque icatsinatapinijeitini maaroni yovetsicane Tasorentsi, aisati icamajeitini: icantani, irosati meeca.

²³ Aisati arorijeji quemisantatsiri, ashinoncaajeivetaca, ainiro aquemaatsicajeitacari. Timatsi Ishire Tasorentsi, quiso oajeitaquee, amitacojeitaquee; iro cantaincha acoajeitaque inquempetacaantasanojeitee Tasorentsi itomi. Impoiji eiro aquematsicatarotsi paitapeerica, eiro acamajitsi.

²⁴ Ariorica ayotaque irimatero Tasorentsi icantaqueeri, aquemisantaqueri avav-
isacotantajari. Iro cantaincha tequera irimateroji, tequera irimoncarajeiteroji maaroni icantaqueeri arori. Omoncarataquearica, ¿arimpa ayeacotajero irimateero icantaqueeri?

²⁵ Ariorica ayotasanotaque irimoncarateero icantaqueeri, cameetsa ayeacotero, eiro ashematsi.

Amitacojeitaquee Ishire Tasorentsi, ocantiri Tasorentsi iramitacojeitee.

²⁶ Te ayotasanajeiteji arori, iro cantaincha amitacojeitaquee Ishire Tasorentsi. Te ayotasanajeiteji anquenquetsatacayeri Tasorentsi cameetsa, iro cantaincha ioti irointi

Ishire, ocantacoventajeitaquee; cameetsa catsini oquenquetsatacairi, eiro amatirotsi anquempetearo.

²⁷ Iotasanoataquee Tasorensi, aisati iotaquero paitarica ocantiriri Ishire. Ariorica ocantacoventaquee, iotaque maaroni icoacaaqueeri Tasorensi.

Icoacaaqueeri Tasorensi.

²⁸ Ayojeitaque ariorica anintaqueri Tasorensi, aisati ariorica antapinitaqueri icoacaajeitaqueeri, irosati incanteani intasoncacoventajeitee. Ariorica ompomerentsitimoventaquee, iro cantaincha eiro ishineteetsi avashinoncayea.

²⁹ Peerani catsini iotiteeni anquemisanteri, irotaque icantitantaniri: “Incameetsatanaque quemisantenaneri, inquempejeiteari Notomi”. Tempa iriotaque Itomi Tasorensi yora Jesoquirishito. Iriotaque itomisanori peerani catsini, itimitani; impoijeitajee itomintajeitajee arori, ashanincatavacaajeitajantajari.

³⁰ Peerani icantitani: “Nontomintajeiteari”, impoji itomintasanotaquee; impoji aisati yoameetsataquee, iquempetacaantajee te anteroji caari cameetsatsi. Aisati icanti: “Coajica cameetsa irisaviquimojeitena aca inquitequi”.

³¹ Tempa ocameetsajeitaque oca. Pineaquero, itasoncaventasanajeitaquee Tasorensi: ¿Janica meeca oashinoncaajeitajee? Tecatsi catsini.

³² Te intsaneempariji Itomi, irointi itancaqueri aca quipatsiqui icamimentajeitaquee. Tempa ayojeitaque aisati coajica impapinijeitee maaroni coiteimojeitaqueeri.

³³ Tempa icoyeajeitaquee Tasorensi, iquempetacaantaquee te anteroji caari cameetsatsi: ¿Janica meeca cantatsine ainiro antane?

³⁴ ¿Janicampa oashinoncaajeiteeneri? Tecatsi: tempa icamimentajeitaquee Jesoquirishito yoavisacojeitajee. Aisati itinaanaja, isaviquimotiri Iriri, icaratiri ipincatsariventaajeitaquee, aisati icantacoventajeitaquee.

³⁵ ¿Janicampa jocacayerineri Quirishito inintajeitee? Tecatsi catsini. Intimerica oashinoncaajeiteeneri, quisajeiteeneri; ariorica ompomerentsitimojeitee paitapeerica, ariorica ayee atashe, eirorica otimitsi anquitsaateari, ariorica antsaroacayearo paitapeerica, intimerica oayeteeneri; iro cantaincha icantani Quirishito, inintasanajeitaquee.

³⁶ Onquempetajee isanquenataqueroni peerani: “Noquemisantaquempi, Tasorensi, irotaque isareantapiniyeetaquenari iroyeetena. Inquempetacaantena ovisha yoapiniyetiri”.

³⁷ Queario oshequi inintajeitaquee Quirishito, icantani: itasoncaventajeitaquee, irotaque aveshireimentasanajeitancacari.

³⁸⁻³⁹ Queario, te intimeji jocacayerineri inintajeitaquee: eiro imatirotsi inampirepee Tasorensi, camaaripee, pincatsaripee, jenoquisati, quipatsisati, maaroni yovetsicajeitaqueri Tasorensi, eiro imatirotsi. Ariorica ancamaque, ariorica aneanaje, eiro imajeitirotsi meeca, aisati eiro imatirotsi coajica. Aquemisantaqueri Avincatsarite Jesoquirishito, meeca inintasanajeitaquee, aisati quiso yoajeitaquee maaroni.

9

Oshequi icavintsaajeitaqueri Pavoro ijorioririnte.

¹⁻³ Oshequi noquenqueshireacotaqueri maaroni noshanincasanori, yora nojorioririnte. Queariotaque oca nocantaqueri, iotaque Quirishito te nontseeyaji. Aisati quiso oaquena Ishire, iotacaaquena queario nocantaque. Noashiretacotacari noshaninca, te inquemisanteji. Arioricame nomaterome noavisacoterime noshaninca, nojatetame Sharincaveniqui iravisacotantajeameri; nojatericame anta, eiro noneirime nainti Quirishito; pineaquero, oshequi nocoaque iravisacojeitajee.

⁴ Ishanincajeitacari Ishirairini aisati itomintajeivetarini Tasorensi. Ineajeitaqueri itasoncantaque, aisati iquemajeivetaroni icantavetariri, jojeivetaro Isanquenare Moishishi, jojeiveta jaoca incanteameri inquemisanterime, timatsi icashiacaajeitarini,

⁵ iriojeitaque ishanincani yora intacaroniri peerani, iriojeitaque ishaninca Quirishito. Tempa iriotaque Quirishito Tasorensi, ocameetsati ancantaitatijempani aneacameetsajeiteri aisati ampincatsatanajeiteri maaroni. Aitaque ancantajeiteari.

⁶ Jojeivetaro irineane Tasorensi, iro cantaincha te inquemisantajeiteji. ¿Paita caari iquemisantajeitanta? ¿Yamatavitaquerimpa Tasorensi? Teve, te iramataviteriji. Pamene, maaroni ishanincani Ishirairi te inquempetasanojeiteariji: te inquemisantajeiteji maaroni.

⁷ Aisati te inquempetasanojeiteariji Avaramani maaroni ishanincani. Tempa icantaquerini peerani Tasorensi: “Irio pishanincatasanojeiteari maaroni ishanincani yora Isaca”.

⁸ Meeca noncamantempiro oca ishiacantiri. Te intominteariji Tasorentsi maaroni ishanincani Avaramani. Apaniro ishanincajeitacari yora ishanincani Isaca. Tempa icantiri Tasorentsi:

⁹ “Apanivaniji osarintsi ontimeri Sara otomi”.

¹⁰ Otsipani osarintsi itimaque Isaca. Impojii yantearitanaque, yaaque ijina, pajitachari Ereveca. Iriroqueto otomontetaque, iriotaque tsipari.

¹¹⁻¹³ Ainiroquera iriori otomontequi iriniro, tequera iranteroji cameetsatsiri aisati tequera iranteroji caari cameetsatsi, iro cantaincha otimi icocaitacariri Tasorentsi. Ari icantitaro Tasorentsi: “Yora jivatatsineri intime impincatsateri yora oijatapeerine”. Tempa iriotaque oquenquetsacotaqueniri Sanquenarentsi: “Icanti Tasorentsi: ‘Nonintasanoteri Jacovo, irinti Esao eiro nonintasanotiritsi’ ”. Pineaquero, iotitani Tasorentsi icocaitacariniri: impojii imatacaqueri.

Jaoca icantiriri Tasorentsi jorio aisati itsipapee atiri.

¹⁴ ¿Arimpa ancante: “Te oncameetsateji oca yantiri Tasorentsi”? Teve, eiro acantitsi.

¹⁵ Tempa peerani icantirini Moishishi: “Tempa narotaque cantatsine janicarica noneshinoncateri, aisati janicarica noncavintsayeri”.

¹⁶ Te irio atiri cantatsine, irinti Tasorentsi. Ioti irinti janicarica irineshinoncatasanoteri.

¹⁷ Tempa peerani osanquenatacani icantiriri yora ivincatsarite ejipitosati: “Nompeajempi pincatsaritajantsine, iriojeitanteari atiri oshequi notasorentsitaque, aisati oshequi impincatsajeitantenari maaroni savicajeitatsiri”.

¹⁸ Pineaquero, tempa iriotaque cantatsine janicarica irineshinoncateri. Tempa aisati iriotaque cantatsineri janicarica impeajeri tseencantatsineri.

¹⁹ Naamaaca meeca pincantena: “¿Arimpa? Queariorica picantaqueri, ¿paita inquishimentantenarori nantayetiri? Tempa nantayetaquero icoacaaquenari iriori”.

²⁰ Pamene, aviro atiri: te oncameetsateji pimpiatsateari Tasorentsi, oshequi ipincatsariti irinti. Noshiacantempiro coviti. Ocantirompa vitseirori: “¿Paita caari povetsicantana narori cameetsa?”

²¹ Ora vitseirori, tempa irootaque coatsiri jaoca oncanterori quipatsi. Tempa ocameetsati ovetsicaque aparo cameetsatasanotsiri, irointi otsipa eiro oameetsantiro.

²² Ariorica incoaque Tasorentsi, tempa ocameetsati iroashinoncaayeteri iisane. Tempa ocameetsati iriotacajeiteri atiri ainiro itasorencia. Iro cantaincha te iroashinoncaajeiteriji yora caari cameetsajeitatsi, irointi yamavetiro yantayetiri, icavintsaqueri.

²³ Irio icavintsaasanotaqueri yora jatatsineri inquitequi; icoacaaqueri iriojeite oshequi icavintsanti, aisati oshequi ipincatsariti.

²⁴ Arojeitaque icoyeajeitaqueri, ayojeitantajariri: jorio, aisati caari joriotatsi.

²⁵ Tempa peerani isanquenatacojeitaqueeni yora Oseashi: “Icanti Tasorentsi: ‘Caari inaveitani noshaninca, iro cantaincha meeca noshanincatacari. Caari inaveitani nonintasanotiri, iro cantaincha meeca nonintasanotajiri’ ”.

²⁶ Jero icantini: “Caari inaveitani noshaninca”. Irio iquenquetsacotaqueri yora peajanchaneri itomipee Tasorentsi; tempa irio Tasorentsi aneasanotsiri.

²⁷ Jero aisati oca isanquenataqueniri Isayashi. Iquenquetsacotaqueri joriopee: “Incarajeitaque ishanincani Ishiraeri oshequi catsini. Oquempetaca eiro amatirotsi iotero jaoca acaratiri ovane impanequi, aisati iriori joriopee, eiro amatiritsi ayojeiteri maaroni, jaocarica incarajeiteri. Iro cantaincha eiro yoshequitasanotitsi avisacotajantsine.

²⁸ Coajica irimatero Tasorentsi maaroni icantaqueri: irimapocajeiteri maaroni tseencantatsiri, iroashinoncaajeiteri. Intsoteasanojeiteri, maaroni”.

²⁹ Tempa aisati isanquenatini: “Eirome icavintsaajeiteeme Tasorentsi, eirome ishanincajeiteeme, tempa intsoncajeiteeme maaroni, anquempajeitearime yora soromasatini aisati yora comorasatini”.

Icamantiri paita caari iquemisantanta joriopee.

³⁰ ¿Paita aisati noncamantempiro? Yora itsipapee atiri te incoajeiveiteani iroameetsateri Tasorentsi, iro cantaincha meeca iquemisantajeitajiri, irootaque yoameetsajeitantariri.

³¹ Irinti yora joriopee icoajeiveta iriori irimayeterome icantayetinirini Moishishini incameetsatanteameri, iro cantaincha te irimajeiteroji.

³² ¿Paita caari yoameetsatantari Tasorentsi? Te inquemisantajeiteriji, irointi icoajeiveta irantero paitapeerica. Oshequi icomitaro, te iriojeiteji inquemisanteri Jesoshi.

³³ Peerani isanquenatironi oca icantaqueniri Tasorentsi: “Nontiancaveteanari joriopee notomi, iro cantaincha eiro iojeitavaqueritsi. Oquempetaca ariorica intsinquearo mapi, impariaque; te iriojeiteriji Quirishito ini, irootaque iroashiretanteari. Iro cantaincha eiro yoashiretatsi irinti quemisanterineri, irointi iriveshireimentasanojeiteari”.

10

¹ Noyemisantaririnte, oshequi catsini nocoaque iravisacojeite maaroni nojorioririnte, oshequi nocantapinitiri Tasorensi: “Pinquemisantacaajeitajeri noshaninca, iravisacojeitajeari”.

² Niotaque oshequi icoajeiveta inquearioventenerime Tasorensi paitapeerica yantimiriri, irishintsiventeneri maaroni. Iro cantaincha te iriojeiteji paitarica icoacaasanojeitaqueriri.

³ Te iriojeiteji jaoca icantajeeri Tasorensi yoameetsatantajeiteeri. Icoajeiveta iroameetsajeiteame irisati, te incoyeji iroameetsajeiteri Tasorensi, irinti.

⁴ Pamene, ipocaque Quirishito, icamimentajeitaquee. Meeca, ariorica anquemisanteri iriori, iroameetsajeitajee. Atsipetashitacaro meeca antayetaquero icantimiriri Moishishi avavisacotanteameri.

Jaoca ancanteari avavisacojeitajeari.

⁵ Peerani yora Moishishi iquenquetsatocotaqueri yora coatsiri irimoncarayetero Sanquenarensi: “Intimerica coavetachaneri irimoncarayeterome iroameetsatanteameri, oncameetsateme irimoncarajeiterome maaroni, incantaitatitempani. Eirome icomitarome catsini”.

⁶ Iro cantaincha ariorica aquemisantaji irootaque acameetsatantajeri, eiro acantitsi: “Pomerentsitaca avavisacotajee. Tsame ajatashiteri Quirishito anta jenoqui, ameri aca iroavisacojeitajee”. Teve, eiro acantashitatsi;

⁷ aisati eiro acantashitatsi catsini: “Tsame ajate Sharincaveniqui, aintinaajeri Quirishito, iroavisacojeitajee”. Teve, eiro acantitsi catsini. Jampa tinaanaja ini peerani.

⁸ Ariorica aquemisantaque, aitaque avavisacotaca: eiro acoitisi amayetero pomerentsiyetatsiri. Tempa timatsi aca irineane Tasorensi: te ompomerentsiteaji pinquenquetsatocotero aisati pishiretearo. Irootaque oca nocamantapinitimpiri: pinquemisante pavisacotantajeri.

⁹ Ariorica pincamanteri itsipapee atiri pipincatsataqueri Jesoshi, aisati ariorica pishiretearo yoitinaajiri Tasorensi, aitaque pavisacotajee.

¹⁰ Pineaquero, ariorica ashireteari Tasorensi, irineacameetsajeitee; aisati ariorica ancamanteri itsipapee atiri aquemisantaqueri Jesoquirishito, aitaque avavisacotajee.

¹¹ Tempa ocantini Sanquenarensi: “Eiro ipashiventatsi yora quemisantatsiri”.

¹² Amoncaratavacaajeitaca: jorio aisati itsipapee atiri. Icarati Avincatsarite apaniro. Aventajeitacari, irootaque ipincatsariventajeitantaqueeri, ineshinoncajeitantaqueeri maaroni.

¹³ Tempa aisati ocantini Sanquenarensi: “Iraisacojeitaje maaroni aventajeitearineri Avincatsarite”.

Oshequi itseencantajeiti joriopee.

¹⁴ Eirorica iquemisanteri Tasorensi atiri, ¿jaoca incanteari iraventanteariri? Eirorica iquemacotiri, ¿jaoca incanteari inquemisantanteariri? Eirorica itimitsi camanterine, ¿jaoca incanteari inquemacotanteariri?

¹⁵ Eirorica itimitsi tianquerine camantantatsineri, ¿jaoca incanteari irijatanteari? Tempa ocantini Sanquenarensi: “Tempa oshequi aveshirementacari yora camantajeiteerori irineane Tasorensi, tempa aneacameetsajeitiri”.

¹⁶ Iro cantaincha te inquemisantajeiteji maaroni. Tempa irootaque icantaqueniri peerani Isayashi: “Novincatsarite, nocamantajeivetacari, iro cantaincha icarati oshequi caari quemisantatsi”.

¹⁷ Eirorica icamanteeteetsi, eiro amatirotsi anquemisante. Tempa icamanteetaquee icamimentaquee Quirishito, yoavisacotantajeeri.

¹⁸ Tempa iquemajeitaque maaroni joriopee. Queario, iquemajeivetaca. Jero ocantini Sanquenarensi: “Jtaque camantantatsiri maaroni quipatsiqui, iquemajeitaqueri maaroni savicajeitatsiri”.

¹⁹ Tempa iojeiveta jorio inquemisantajeite itsipapee atiri iriori. Aitaque icamantaquerini peerani Moishishi: “Icanti Tasorensi: ‘Coajica pinquisaneenteri itsipapee atiri pitseencajeivetacari. Iro pinquisanteariri noavisacojeitajeri’”.

²⁰ Impoiiji aisati isanquenatini Isayashi: “Icanti Tasorensi: ‘Te incoavetenaji yora atiripee, iro cantaincha iojeitaquena meeca: niotacaasanojeitaqueri.”

²¹ Irinti yora joriopee nocantapinivetacari, iro cantaincha ipiatsataquena, te incoyeji inquemisantena”. Irootaque isanquenatiniri.

11

Jaoca incanteari yora joriopee.

¹ Naamaaca pisampitena meeca: “¿Ariompa? ¿Eirompa meeca yaacameetsatiritsi Tasorensi maaroni joriopee, yora itomintajeivetari?” Teve, eiro. Tempa narotaque narori jorio. Noshanincatacari Avaramani aisati Vejameni.

²⁻³ Narojeitaque jorio. Tempa peerani icoyeajeitaquena Tasorensi, irosati meeca yaacameetsajeitantanari. Tempa piojeiti ocantini Sanquenarensi. Oquenquetsatacotaquerini Iriashi peerani, iquenquetsatacairi Tasorensi, icantiri: “Novincatsarite, teve incameetsajeiteji yoca nojorioririnte. Yoapiniyetiri yora quenquetsatacotimpiri. Yojoca-caayetajiri ishaninca iquemisantajeivetimpi. Meeca icoajeitaque iroyena narori. Apaniro noquemisantimpi nainti”.

⁴ Tempa piojeitaquero aisati ora yacanaqueriri, icantirini: “Timatsiquera 7,000 shiram-pari quemisantasanotanari. Te impincatsajeiteroji iriori ora Vari ijitasorensiyevetari”.

⁵ Aisati oquempetaca meeca. Timatsi aisati icoyeane Tasorensi, ineshinoncajeitaqueri.

⁶ Pineaquero, ineshinoncajeitaqueri, te incanteriji iranterero paitapeerica. Incanterime irantayeroero paitapeerica, te irineshinoncateriji.

⁷ Ari, ¿jaoca ocantari meeca? Icoajeivetaca irineacameetsajeiterime Tasorensi, iro cantaincha, te. Ineacameetsayetaqueri aparopee: yora icoyeayetaqueri. Irintiquea itsipapee, te incoajeiteji inquemisante catsini.

⁸ Tempa aisati ocantini Sanquenarensi: “Ipeapitsataqueri Tasorensi iquenqueshireantavetari. Ineayevetacaro paitapeerica, iquemayevetacaro, iro cantaincha te inquemisant-teji. Aitaque icantajeitani, irosati meeca”.

⁹ Aisati icantini Iraviri: “Iveshireinentavetacaro paitapeerica, iro cantaincha yamatavi-jeitaja irisati. Impojiji incamajeite, irineacatsitimentajeitearo yantayetiri.

¹⁰ Eiro coajica oimitsi iotantari, eiro iojeititsi. Incanteani irashinoncayea”.

Jaoca icantari jorio aisati itsipapee atiri.

¹¹ Ari itseencajeitaque joriopee: ¿inquisajeiterimpa meeca Tasorensi? Teve, eiro iquishir-itsi. Irointi yoavisacojeitaqueri itsipapee atiri incoanteari joriopee inquempejeitajeari iriori, inquemisantaje.

¹² Itseencajeitaque, te incoajeiteji inquemisante, iro cantaincha yavisacojeitaji itsipa-pee. Coajica, ariorica inquemisantasanojeite joriopee iriori, tempa aiqero irijatatiye inquemisantasanojeite aisati itsipapee iravisacojeitantajeari.

¹³ Te avirojei jorio. Piojeiti itiancaquena Tasorensi noquenquetsatacaajeitaquempi. Nocoasanotaque nomajeitaquero icoacaquenari.

¹⁴ Nocoaque nonquenqueshiretacaajeiteri aisati nojorioririnte, iravisacotaarantanta-jeari iriori.

¹⁵ Itseencajeitaque meeca, irootaque caari yaacameetsajeitantari Tasorensi; avintiquea yaacameetsajeitaquempi. Iro cantaincha coajica iracameetsajeitajeri iriori, tempa oncameetsasasanotaque. Irijajeiteme anta Sharincaveniqui oshequi, iro cantaincha coajica irijajeite oshequi anta inquitequi.

¹⁶ Pamene, ineacameetsataquerini Tasorensi Avaramani, tempa aisati irineacameet-sateri ishanincani. Noshiacantempiro aisati inchato: ariorica ocameetsataque ovaritsa, tempa aisati ocameetsataque ojempequi iroori. Oquempetaca icameetsataqueni Avaramani, aisati inquempeteari coajica ishanincani, incameetsajeitanaque.

¹⁷ Meeca noshiacantempiro inchato pajitachari orivo. Ocameetsataque ovaritsa, iro cantaincha te ontimizeji oitsoqui ojempequi. Irootaque ipesanteataro, yojoqueetajiro. Yaaque pashini ojempequi, irointi orivoniro. Ipatacaquero, irointircampa timatsine oitsoqui. Iro ovaritsa shiocacayeroneri. Ora ojempequini oshiacantiri jorio; ora iroaquera ipatacaqueri oshiacantaquempi avioririje, tempa avirotaque pashinisi atiri.

¹⁸ Meeca eiro pishemetitsi avirori: “Nocameetsati nainti, te nonquempeteariji yora jorio”. Pamene, te pintimashiteaji apaniro, eiro pimatirotsi apaniro.

¹⁹ Naamaaca picanti: “Yojocaqueri Tasorensi jorio, quiso noyeri nainti. Tempa no-cameetsasasanoti”.

²⁰ Queario, itseencaqueri, yojocantavetacariri. Piquemisantajeiti avinti, irootaque quiso poajeitantacariri. Pishemeticari, pimpincatsasasanoteri.

²¹ Pamene, yojocaqueri iriori jivataintsiri, aisati avirori, yojocajimpicari.

²² Piojeitaque icavintsantaque Tasorensi, iro cantaincha aisati yoasanquetaajeitaqueri yora antirori caari cameetsatsi. Ariorica pincanteani pinquemisanteri, ari incanteani incavintsajeitempi. Eirorica piquemisantasasanoti, irojocanajempi avirori.

²³ Aisati iriorije: ariorica inquemisantajeite, iracameetsajeiteri Tasorensi, tempa iriotaque Pincatsarisanori. Iriotaque cantacoventerineri jaocarica incantajeiteriri atiri.

²⁴ Peerani te piojeiveitearini, iro cantaincha meeca yaacameetsajeitaquempi. Ariorica inquemisante yora iojeivetariri, tempa aisati iracameetsajeitajeri iriori.

²⁵ Noyemisantaririnte, timatsi noninti noncamantempiri caari piojeiveta. Iro noncamantempirori te nonintegi pishemete. Pamene, itseencajeiveta yora joriopee meeca, iro cantaincha eiro icantatiani. Ariorica omoncarataquea inquemisantajeite itsipapee atiri, ari omoncarataquea aisati inquemisantajeitaje aisati jorio.

²⁶ Queario iravisacojeitaje coajica, maaroni. Tempa peerani ocantini Sanquenarentsi: "Icanti Tasorentsi: 'Irijiotiqaue yora oavisacojeiterineri, inquemisantacaajeiteri ishaninca, irojocacaajeiteri itseencanti."

²⁷ Nomoncarataquero coajica maaroni nocantitacariniri ishanincani peerani: noavisacojeiteri, eiro noquishimentiriti caari cameetsatatsi yantajeitaqueri".

²⁸ Meeca iquisajeitaqueri, aisati itseencajeitaqueri; irotaque meeca yoavisacojeitantaquempiri Tasorentsi avinti. Iro cantaincha inintitarini yora intacantacariniri, aisati meeca inintajeitaqueri maaroni.

²⁹ Te iramatavitanteji Tasorentsi: eiro yaapitsatajeerotsi paitarica ipajeitaqueeri, eiro yojocajiriti yora icoyeaqueri.

³⁰ Peerani te pinquemisanten, iro cantaincha itseencasanojeitaqueri jorio, irotaque icavintsaajeitantaquempiri avinti.

³¹ Meeca te inquemisanteji jorio, iro cantaincha coajica inquemisantaje aisati, inquempejeitempi avirori. Impoiji aisati incavintsaajeitajeri Tasorentsi, inquempetacaantajeitajempi avirori icavintsaajeitajempi.

³² Icanti Tasorentsi: "Ainiro irantanejei maaroni atiri, iro cantaincha nocoaque noncavintsaajeiteri maaroni, noavisacojeiteri".

³³ Tempa oshequi icameetsataque catsini. Ainiro iotantari, oshequi ioti. Te amateroiji ayotero iquenqueshiretiri iriori, te ayoyeteroiji yantayetiri.

³⁴ Tempa irotaque ocantiri Sanquenarentsi: "¿Timatsimpa iotirori iquenqueshiretiri Avincatsarite? ¿Timatsimpa oametiriri yantayetantarori paitaricapee?"

³⁵ ¿Timatsimpa paqueriri paitaricapee ipinatantariri?"

³⁶ Pineaquero, iriotaque vetsiquirori maaroni. Itasoncaqueri maaroni, itimajeitanacari. Tempa iriotaque ashijeitariri maaroni timajeitatsiri. Tsame meeca maaroni ampincatsatasanojeiteri, ancantaitiyempani. Aitaque ancantajeiteari.

12

Icantiri: "Pimpashinitanaje".

¹ Noyemisantaririnte, tempa oshequi icavintsaasanojeitaquee Tasorentsi. Irotaque nocoacaasanotantaquempiri eiro pantashitarotsi avirori paitapeerica, irointi pincanteri intianquempi irinti. Aneatsimpiguera, cameetsa pisavique iriveshireimentantempiri: irotaque icoacaajeitajeqeriri maaroni quemisantajeitiriri.

² Eiro piquempejeitaritsi tseencantatsiri, irointi pashini pinquenqueshiretapinitaje. Pitotasanotero icoacaquempiri Tasorentsi: ocameetsatasanotaque. Ariorica pantapinitero oca, moncarataca: irineacameetsajeitempi Tasorentsi.

Icantiri: "Eiro pishemetitsi".

³ Icantaquena Tasorentsi: "Poamejeiteri oromasati", irotaque nocamantajeitantimpirori oca. Eiro pishemetitsi, eiro pijititsi panaacojeitaqueri itsipapee pipincatsariti. Pinquenqueshirejteia jaoca picantari, piojeite imatacaasanotimpirica Tasorentsi piquemisantiri.

⁴ Pamene jaoca acantajeitari: otimi aqui amenantari, ayempita aquemantari, avante aneanatantari, aco ajiricantari, aiti aniitantari, maaroni.

⁵ Aisati aquempejeitacari maaroni quemisantajeitiriri Quirishito: acarajeitaque oshequi, ashanincatavacaajeitaca. Iro cantaincha onashiyetaca antajeitaqueri.

⁶ Tempa oshequi ineshinoncajeitaquee maaroni. Imatacaajeitaquee amayetaquero paitapeerica, iro cantaincha onashiyetaca. Eiro aperaventarotsi amayetero. Ariorica irimatacaquempi pinquenquetsatayeri pishaninca, pinquemisantasanote cameetsa pinquenquetsatacanteariri pishaninca.

⁷ Ariorica irimatacaquempi pintacoteari itsipapee, ari pimatero cameetsa. Ariorica irimatacaquempi poametante, ari poametante cameetsa.

⁸ Ariorica irimatacaquempi piveshireacaayeari itsipapee, ari cameetsa piveshireacaajeiteari. Aisati ariorica incantempi pimpashiyeteari ashinoncaincari paitapeerica, pimpasanoteri: eiro pimashitsatitsi. Ariorica pamitacoteari itsipapee, eiro piperataritsi. Ariorica pincavintsayeri, ari pinquimoshiretasanotanaque.

⁹ Pinintasanoeiteari pishaninca, eiro picantashitaritsi: "Nonintaquempi", irointi pinintasanoteri. Eiro catsini picairotsi caari cameetsayetatsi, irointi pincoasanotaque pantayetero cameetsatasanotatsiri.

¹⁰ Pinintasanotavacaajeitea maaroni: tempa piquempetavacaajeitaca, piquemisanta-jeiti. Pincoasanojeite piveshireacaajeiteari itsipapee.

¹¹ Eiro piperatatsi, irointi pincoasanojeite pishintsiventeneri Avincatsarite maaroni incoacaajeitempiri.

¹² Piojeitaque irimataquempiro Tasorentsi maaroni icantaquempiri: meeca piveshirei-mentearo. Ariorica ompomereentsitomotempi paitapeerica, eiro pishemarotsi. Pincan-teani pincanteri Tasorentsi: "Pamitacotena".

¹³ Pimpapiniteri piyemisantaririnte coiteimotariri. Pincavintsaapiniteri neajeitempiri.

¹⁴ Pincanteri Tasorentsi incavintsaajeiteri quisajeitaquempiri, eiro pipiataritsi.

¹⁵ Ariorica inquimoshiretanaque pishaninca, pinquimoshiretasanotanaque avirori. Ariorica iroashiretea pishaninca, pinquenqueshireacoteri.

¹⁶ Paacameetsatavacaajeitea, maaroni. Eiro pitseencayetiritsi pishaninca. Eiro pipin-quiritsi ashinoncaincari, irointi paacameetsateri.

¹⁷ Ariorica irantimotempi pishaninca caari pinintacairi, eiro piquishiritsi. Cameetsa pisavique iriojeitantempiri atiri picameetsataque.

¹⁸ Pincoasanojeite paacameetsajeiteri itsipapee, maaroni.

¹⁹ Noshaninca, oshequi nonintajeitaquempi. Eiro pipiataritsi antanajeitaquempiri. Iriroquea irinti Tasorentsi oasanquetaajeiterineri. Tempa peerani icantini: "Noasanque-taajeiteri nainti, nompiateari. Tempa naro pivincatsarite.

²⁰ Ariorica ayeri quisaquempiri itashe, pimperi iroyea. Ariorica ayeri imire, pimpacoteri irire. Impoiji ariorica impashiventanaquea, eiroquea iquisantajimpitsi aisati".

²¹ Eiro pishinetaritsi caari cameetsayetsi irantacayempiro paitapeerica, irointiquea pincavintsayeri, ponijayeri cameetsayetsari.

13

Ocameetsati ampincatsajeiteri pincatsariventajeiteeri.

¹ Pinquemisantajeiteri pincatsariventajeitiriri pishanincapee: tempa irio Tasorentsi nintacaaqueriri ipincatsaritantacari. Eirome inintacairime, eirome ipincatsariventan-time.

² Yora piatariri ivincatsarite, aisati iquempetaqueri Tasorentsi, ipiatariri iriori. Tempa iriotaque nintacairiri ipincatsariventanti. Coajica iroasanquetaajeiteri maaroni pia-jeitacariri.

³ Yora savicatsiri cameetsa te intsaroacayeariji pincatsari, irintiquea yora antapinitirori caari cameetsatsi. Ari, eiorica picoitsi pintsaroacayeari pincatsari, pintime cameetsa; impoiji irineacameetsatemp.

⁴ Queario, inintacairi Tasorentsi ipincatsariventanti ontimanteari pisavicaajeitanteari cameetsa. Iro cantaincha terica oncameetsateji pantayetiri, ari pintsaroacaaqueari. Te irantsipetashiteaji ipincatsariventanti. Inintacairi Tasorentsi iroasanquetaajeiteri maaroni antirori caari cameetsatsi.

⁵ Te ancoyeji iroasanquetaajeitee Tasorentsi, aisati te ancoyeji anquenqueshiretea, irootaque ocameetsatantari ampincatsateri avincatsarite.

⁶ Irootaque aisati pipaarrantantariri pincatsaripee piirequite. Pipinataqueri irimatantearori inintacairiri Tasorentsi: ipincatsariventajeitaquempi.

⁷ Pimpajeiteri maaroni coiteimotacariri: pimperi quirequi, paitapeerica. Pinquemisan-tajeiteri aisati pimpincatsajeiteri.

Cameetsa anintavacaasanojeitea, maaroni.

⁸ Eiro piveiyetiritsi pishaninca paitapeerica, irointi pinintavacaajeitea. Ariorica anin-tavacaajeitea, ari amoncaratero isanquenyetiniri Moishishini, maaroni.

⁹ Icantini: "Eiro paimentarotsi pijina, eiro paimentaritsi pijime, eiro poantitsi, eiro picoshititsi, eiro pinevetarotsi yashiyetari pishaninca". Oshequi aisati icantiniri. Impoiji aisati icantini: "Oquempetaca picavintsaaja avisati, pincavintsaajeiteri itsipapee, pininta-jeiteri". Ariorica amajeitaquero oca, tempa amoncarataquero maaroni icantiniri.

¹⁰ Ariorica aninteri ashanincapee, tecatsi ancantea ancantimajeiteri, amoncaratan-tearori maaroni icantiniri Moishishi.

Eiro osamanititsi impocashijeitajee Avincatsarite.

¹¹ Eiro osamanititsi impocashijeitajee Avincatsarite iraajeitanajee antsipajeitanteariri. Peerani aquemisantantacari, ajitashijeivetaca ari osamanitanaque. Meeca aamaa-jeitacariri, irootaque ocameetsatantari antime cameetsa.

¹² Ariorica antapinitiro caari cameetsatsi, oquempetaca ariorica atimaque tsiteniriqui, amanantarori antayetiri. Ariorica atimi cameetsa, oquempetaca atimaque quitaieriqui, te ampashiventacayearoji antayetiri. Ari meeca oshiavetacarori irootajantsi

quitaiteiri, tempa irotaintsirica impocaje Avincatsarite iriori. Eiro antapinitirotsi meeca caari cameetsayetatsi, irointi tsame antimajeite cameetsa.

¹³ Tsame meeca cameetsa antimajeite. Eiro antayetajirotsi caari cameetsayetatsi, eiro ashiniquijeitajatsi, eiro antirotsi caari ai, eiro antiritsi caari ai, eiro aquisavacaajatsi, eiro anevetasanotarotsi vaararonsi,

¹⁴ Eiro antayetirotsi caari cameetsatatsi acoayetiri aisati aquenqueshireyeteri. Irointiquea tsame ancantari Avincatsarite Jesoquirishito intasoncaventajeitanteeri cameetsa asavicajeitanteeri.

14

Ocameetsati iraacameetsatavacaajeitea maaroni quemisantatsiri aisati caari quemisantajeitatsi.

¹ Incoaquerica itsipapee quemisantatsiri incarajeitempi pinquemisantajeite, ari paacameetsajeitavaqueri. Tequerarica iriotasanoyetero maaroni icoacaajeitaqueeri Avincatsarite, iro cantaincha eiro picantavacaimentarotsi ioyevetari iriori.

² Oquempetaca timatsi cantatsiri ocameetsati avajeiteari paitapeerica: ivatsa, maaroni. Iro cantaincha itimi caari iotasanotatsi: jivetachari te oncameetsateji ayeari ivatsa.

³ Ariorica pametari poapinitari ivatsa, eiro picantimatiritsi yora caari oari. Aisati, terica poapiniteari ivatsa, eiro picantitsi: “Te incameetsateji yora oariri ivatsa”. Tempa iriojeitaque itomipee Tasorentsi, yaacameetsajeitakeri iriori.

⁴ Tempa iriotaque Tasorentsi ivincatsarite. ¿Ocameetsatimpa pincante avirori: “Te incameetsateji yora, te inquemisanteriji ivincatsarite”? Tempa Tasorentsi cantatsineri irinti ocameetsatirica yantayetaqueri, aisati yamitacotaqueri imayetaquero cameetsayetatsiri.

⁵ Aisati itimi pashini cantatsiri: “Te omoncaratavacaajeiteaji quitaiteeripee, anashitacaajeitearo aparopee quitaiteeri anquemisantasanteariri Tasorentsi”. Irio itsipa icanti: “Ocameetsateji maaroni quitaiteeripee anquemisantanteariri, te onashiyeteaji”. Ari ocameetsati piojeite paitarica picoiri avirori, iro cantaincha eiro picantavacaimentarotsi quitaiteeripee.

⁶ Yora cantatsiri: “Nonashitacaajaro aparopee quitaiteeri noquemisantantajari”, tempa icoaque impincatsateri Avincatsarite. ¿Paita antsaneacotanteariri? Yora pashini, yoari ivatsa, ipasonquitiri Avincatsarite, aisati ipincatsatiri. ¿Paita antsaneacotanteariri? Aisati yora caari oari ivatsa, ipasonquitiri Avincatsarite aisati ipincatsatiri iriori. Tempa aisati ocameetsati.

⁷ Te antimashijeiteaji, eiro apincatsatajatsi arosati. Eiro acantitsi paitarica antayeteri meeca, aisati jaocarica oncarate ancame.

⁸ Meeca aneajeitasee arori, cameetsa ampincatsajeiteeri Avincatsarite, anteneri iriori maaroni icoacaajeitaqueeri. Iriotaque nintacayeeneri jaocarica oncarate ancame, iro cantaincha ancanteani ampincatsajeiteeri. Icantani ipincatsariventajeitiri aneatsiri aisati camaintsiri, maaroni.

⁹ Icoaque Quirishito impincatsariventajeiteeri aneajeitatsiri aisati camajeitatsiri, irotaque icamantacarai aisati itinaantajari.

¹⁰ ¿Paita picantacotantacariri piyemisantaririnte: “Te incameetsateji”? ¿Paita pitseencantayetacariri? Eiro pipeacotarotsi oca: coajica aneajeiteeri Tasorentsi, impoiiji incante irinti ocameetsatirica antajeitakeri arori.

¹¹ Jeroca ocantiniri Sanquenarentsi: “Icanti Avincatsarite: ‘Nocantani naneasanoti nainti, queariotaque oca noncamantempiri. Coajica intiyoashijeitena atiri impincatsajeitena. Incantajeitena: Picameetsataque’ ”.

¹² Queario, coajica aneajeiteeri, aisati ancamantajeiteeri maaroni antayetaqueri aca quipatsiqui, impoiiji incantacojeitee ocameetsatirica antayetaqueri.

¹³ Ari meeca te oncameetsateji ancantacotashiteari ayemisantaririnte: “Te oncameetsateji yantayeteri iriori”. Queariompia, pantacairicari caari cameetsatatsi.

¹⁴ Yoametaquena Avincatsarite Jesoshi, irotaque niotantacarai ocameetsataque maaroni yoyeeyeteri. Ocameetsati ayeari ivatsa. Iro cantaincha yora jitashitachari te oncameetsateji ayeari, ari eiro yoaritsi irinti; te oncameetsateji iroyeari.

¹⁵ Aisati avirori, ariorica poimoteari piyemisantaririnte ipinquiri iriori, aitaque poashiretacaaqueari: te oncameetsateji. Ariorica pinquenqueshiretacayeri, te pinintasanoteriji. Tempa icamimentaqueri Quirishito iriori, meeca eiro pitseencacairitsi.

¹⁶ Pijijeiveta ocameetsayetaque pantayetaqueri, iro cantaincha queariompia, icanti-matimpicari itsipapee.

¹⁷ Ariorica apincatsataqueri Tasorentsi, eiro aquenqueshireyetrotsi avayetari aisati irayetiri; irointi anquemisantero Ishire Tasorentsi ancameetsatanteari, asavicanteari cameetsa, anquimoshirejianteari.

¹⁸ Ariorica cameetsa aquemisantaquero, ari cameetsa antaveeteneri Quirishito. Impoiji irineacameetsajeitee Tasorentsi aisati ashanincapee.

¹⁹ Tsame meeca aacameetsajeiteri ayemisantaririnte, maaroni; aisati inquempeteer iriori, iraacameetsajeitee. Aisati avametavacaajeitea cameetsa anquemisantasanojeitanti.

²⁰ Pioterica ari pojocacayeri pishaninca iquemisanti, eiro poimotashitaritsi ivatsa. Queario ocameetsati ayeari paitapeerica, iro cantaincha te oncameetsateji ajocacayeri ashaninca iquemisanti.

²¹ Te oncameetsateji pantero paitapeerica pojocanteariri pishaninca iquemisanti: eiro poashitaritsi ivatsa, eiro pirashitarotsi cachojari, paitapeerica, maaroni.

²² Ariorica piotaque ishinetaquempi Tasorentsi paitapeerica, eiro picantapinjieitiritsi yora caari ametaro, eiro picantavacaimentarotsi. Ariorica piotasanoaque ocameetsataque pantayetaqueri, tempa pinquimoshiretasanotanaque.

²³ Iro cantaincha pijiterica te oncameetsateji paitapeerica yantayetiri piyemisantaririnte, eiro pantashitarotsi, otimicari pantane. Terica piote inintacaquempiro Tasorentsi pantero, te oncameetsateji pantashitearo.

15

¹ Pineaquero, ariorica aquemisantasanoaque aisati ayojeitaque ocameetsayetaque oca noquenquetsatacotaqueri, iro cantaincha ocameetsati anquenqueshiretacojeiteri yora caari quemisantasanoatatsi, caari iotasanoatatsi. Eiro antashitarotsi acoayevetari arori,

² irointi anquenqueshiretacojeiteri ayemisantaririnte, inquimoshirejianteari iriori. Aisati amitacojeiteri iriotasanoanteari, inquemisantasanoanteari.

³ Tempa aisati iriori Quirishito, te irantashitearoji icoavetari iriori. Tempa isanquenat-acotirini peerani: "Yora Quirishito icantiri iriri: 'Iquisajeitaquena maaroni quisajeitaquem-piri avirori'".

⁴ Itimacaaqueero Tasorentsi maaroni isanquenareni peeraniniri ayojeitantarori cameetsayetsiri antayeri, amavetantarori anquematsicayetearo paitapeerica, aveshireimentantariri Tasorentsi, aisati ayotasanoanteari coajica antime cameetsa anta inampiqui.

⁵ Tempa yamitacotapinijeitaquene amavetantarori aquematsicayetacari paitapeerica, aisati yoveshireacaajeitaquene. Nocoaque meeca iramitacojeitempi paacameetsatavaca-ajeitea. Irootaque icoacaajeitaquempiri aisati Jesoquirishito.

⁶ Impoiji amoncaratavacaajeitea ancantajeite: "Tempa icameetsataque Apa Tasorentsi aisati Avincatsarite Jesoquirishito".

⁷ Tempa yaacameetsajeitaquene Quirishito. Meeca pinquempjeiteari, paacameetsatava-acaajeitea maaroni, impoiji irineacameetsajeiteri atiri Tasorentsi.

⁸ Peerani ipocantacari Quirishito aca quipatsiqui, intacojeitacari ijorioririntepee io-jeitantacari te iramatavijeiteriji Tasorentsi. Aisati iotacaajeitaqueri irimoncarajeitero maaroni icantaqueriniri ishanincani.

⁹ Aisati icoaque iriojeite itsipapee atiri ineshinoncaajeitaqueri, incantanteari iriori: "Tempa icameetsataque Tasorentsi". Irootaque ocantiniri Sanquenarentsi: "Noncanta-tajeiteri itsipapee atiri: 'Icameetsataque Tasorentsi, tsame ampampoyeaventajeiteri'".

¹⁰ Otimi pashini Sanquenarentsi cantatsiri: "Caarimpi pinajeveta jorio, iro cantaincha pincarajeiteri iriori piveshireimentajeiteari Tasorentsi".

¹¹ Pashini aisati osanquenataca, ocanti: "Maaroni caari joriotatsi incantajeite: 'Tempa icameetsati Tasorentsi'. Irineacameetsajeiteri maaroni".

¹² Aisati yora Isayashini icantini: "Intime ishanincani Jese, impoque impincatsariventa-jeiteri itsipapee atiri, iriojeitanaque iroavisacojeiteri".

¹³ Tempa ayojeitaque irimoncarateenero Tasorentsi maaroni icantaquero. Piquemisanta-jeitaqueri, irootaque nocoantacari iroimoshirencajeitempi, cameetsa irisavicacaajeit-empi. Impoiji ontasoncaventajeitempi Ishire Tasorentsi piotasanoanteari eiro ya-matavitimpitsi Tasorentsi, intsoteaquempiro maaroni icantaquempiri.

Icantiri Pavoro: "Oshequi nocoaque nonquenquetsate".

¹⁴ Meeca, noyemisantaririnte, niotaque picameetsajeitaque, aisati piotasanojeitaquero irineane Tasorentsi pimajeitantarori poametavacaajeitaca.

¹⁵ Meeca oshequi nosanquenajeitaquempiro, noquenqueshiretacaquempiro maaroni oca eiro pipeacotantarotsi. Queario, ineshinoncataquena Tasorentsi,

¹⁶ irootaque itiancantaquenari nonquenquetsatacaajeiteri yora caari joriotatsi. Nocamantajeitaqueri atiri jaoca icanta Jesoquirishito yoavisacojeitantaqueeri. Impoiji oameetsatanojeitaqueri Ishire Tasorentsi maaroni, aisati yaacameetsajeitaqueri Tasorentsi.

¹⁷ Irootaque noveshireimentantaquempiri: icoyeaquena Jesoquirishito nocamantajeitaquempi jaoca icanta Tasorentsi.

¹⁸ Eiro noquenquetsatacotashiyetatsi paitapeerica, iotaquea nonquenquetsatacotero imatacaaqueenari. Ineajeitaquena itsipapee atiri, aisati iquemajeitaquena, irootaque iquemisantantayerariri Tasorentsi.

¹⁹ Otasoncacaquena Ishire Tasorentsi, nomayetantarori paitapeerica caari ineapiniti atiripee.

Ari noquenquetsatacaajeitaqueri atiripee anta Jerosarequi, osamani anta Iririaqui, maaroni nampitsipeequi. Nocamantajeitaqueri jaoca icanta Quirishito yoavisacotanti.

²⁰ Nocoasantaque nonquenquetsatacaajeiteri yora caari iojeitiri Quirishito. Te noncoyeji nimpoitapeeri narori jivatatsiri iquenquetsatacairi.

²¹ Tempa ocanti Sanquenarentsi: “Inquemero yora caari quemaveitaroni; iriotajeri yora caari oveitarini”.

²² Ari oshequi noquenquetsatacaajeitaqueri caari iotatsi, irootaque caari nareetanta aviroriqui.

²³ Iro cantaincha notsoteajeitaquero nampitsipee aca, noquenquetsatacaajeitaqueri savicayetatsiri, aisati oshequi osarintsi nocoaveta noneempime,

²⁴ irootaque nojantanteari coajica pinampiqui. Jaocarica oncarate nosaviquimojeitempi, impoiji nocoaque navisanaque anta Eshipaneauqui. Nocoaque aisati ponijayenaro jaocarica nonquenanteari.

²⁵ Iro cantaincha nintapaintearota nojatapainte Jerosarequi, naajeitajeneri ayemisanantaririnte

²⁶ iirequite ipacantiriri yora maseroniasati aisati yora acayasati. Yapatojeitiniriri ashinoncaincari quirequi.

²⁷ Aitaque icoaque irineshinoncajeiteri joriopee anta Jerosarequi. Te irishanincaveteariji, iro cantaincha tempa iriojeitaque intacariri icamantajeitaqueri jaoca incanteari iravisacotantajeari. Icantajeiti: “Tempa irio quemisantacaajeiteeri joriopee, irootaque ocameetsatantari meeca ancavintsaajeiteri iriori. Ampajeiteri quirequi iramanantantearori coiteimotacariri”.

²⁸ Ariorica nompapaaqueri quirequi yapatojeitiniriri, ari nojate pinampiqui. Impoiji novaanaaea, irosati Eshipaneauqui.

²⁹ Niotaque ariorica nareetapaaquempi nonquenquetsatacaapaaquempi piveshireimentasanotanteariri Quirishito.

³⁰ Meeca, noyemisanantaririnte, tempa aquempetavacaajeitaca aquemisantaqueri Avincatsarite Jesoquirishito, aisati oamejeitaquee Ishire Tasorentsi anintavacaajeitaca. Nocoaque meeca pincantajeiteri Tasorentsi intasoncacoventanteari,

³¹ eiro yaantanatsi yora tseencantatsiri anta Joreauqui. Aisati pincanteri iroamejeiteri yora jerosaresati inquimoshireimentanteariri quirequi ipacantiriri iyemisanantaririnte.

³² Impoiji ariorica irinintacayena Tasorentsi, nareejitapaaquempi, oshequi nonquimoshiretapaaque. Impoiji oshequi aveshireacotavacaajeitea maaroni.

³³ Tempa isavicacaajeitaquee cameetsa Tasorentsi, maaroni. Nocoaque quiso iroajeitanaquempi. Aitaque incanteari.

16

Ivetsajeitari oromasati.

¹ Meeca noncamantempi: coajica ojatashitempi oneempi ayemisanantaroronte Jeve. Oponeaca Senquereshiqui, anta oshequi intacojeitacari maaroni quemisantatsiri.

² Paacameetsajeitavaquero, tempa irootaque quemisantiriri Avincatsarite. Pintacojeitearo, pimpayetero maaroni coiteimotearoneri. Tempa intacojeitacari oshequi ayemisanantaririnte; aisati narori, intacotapinitaquena.

³ Novetsajeitaro Pirishira aisati Aquira. Oshequi yamitacojeitaquena iriori nantaveejitiniriri Jesoquirishito.

⁴ Peerani irotaintsi iroyeetename, iro cantaincha oavisacotaquena Pirishira aisati iriori Aquira. Oavisacotantaquenari, irotaintsi iroyeeterome iroori, aisati ojime. Oshequi nopasonquijeitaquero: narori aisati maaroni ayemisanantaririnte, yora caari joriojeitatsi.

⁵ Novetsajeitari maaroni quemisantapinitatsiri ara ovancoqui. Novetsatari aisati Epeneto, nonintasanotaqueri iriori. Peerani noquenquetsatacantariri yora acayasati, iriotaque jivataintsiri iquemisantaqueri Quirishito.

⁶ Novetsatari Maria, tempa oshequi intacojeitaquempi iroori.

⁷ Novetsajeitari noshaninca Antoronico aisati Joniashi. Peerani notsipajeitacari yoiminguetaquena caravosoqui. Oshequi inecameetsajeitaqueri yora itiancanepee Quirishito. Ijivajeitaquena narori, iquemisantitacani irinti peerani.

⁸ Novetsatari Ampiriashi, iquemisantaqueri Avincatsarite, oshequi nonintaqueri iriori.

⁹ Novetsatari Orovano, oshequi icarajeitaquena noquenquetsacotaqueri Jesoquirishito. Aisati iriori Eshitaquishi, novetsatari; oshequi nonintaqueri.

¹⁰ Aisati novetsatari Apereshi; yora Quirishito, oshequi inecameetsaqueri. Novetsatari Arishitovoro, aisati ishaninca, maaroni.

¹¹ Novetsatari noshaninca Erorio. Novetsajeitari ishaninca Narishiso, yora quemisan-tiriri Avincatsarite.

¹² Novetsajeitari Tirijena, jeri Tirijosa, tempa irisati antaveetiniriri Avincatsarite. Aisati oquempetaca Pereshira, novetsatari. Oshequi nonintaquero.

¹³ Meeca satari Rojo, yora quemisantasantiriri Avincatsarite. Aisati novetsatari iriniro, oshequi intacotaquena noquempetacaantaquero iro ina.

¹⁴ Novetsajeitari Ashinquirito, Jereconte, Eremashi, Patorovashi, Eremeshi, jeri maaroni ayemisanraririnte tsipajeitariri.

¹⁵ Aisati novetsajeitari Jiroroco, Joria, Nereo, aisati iritsiro, ora Orimpashi, aisati maaroni quemisantaajeitatsiri tsipajeitariri, maaroni.

¹⁶ Ariorica pineavacaajeitea, paacameetsatavacaajeitea, pinintavacaajeitea. Ivetsajeitimpi maaroni quemisantaajeitiriri Quirishito savicajeitatsiri otsipapeequi nampitsi.

¹⁷ Meeca noncantempi, noyemisanraririnte: piojeiteri yora oamejeitiriri ayemisanraririnte icantavacaajeitea, aisati piojeiteri antacairiri caari cameetsatsi, jeri aisati cantimpiri: “Te oncameetsateji pinquemisantero oca yoamejeitaquempiri”. Eiro pitsipajeitaritsi, eiro poijajeitiritsi.

¹⁸ Te iranteneriji irinti icoacaajeivetariri Avincatsarite Quirishito, irointi yantashijeitaro icoayetiri iriori. Cameetsa ineanaveta, iro cantaincha icoaque iramatavijeiteri caari timatsine iotantari.

¹⁹ Iojeiti atiri piquemisantasantaque, irootaque noveshireimentantaquempiri. Iro cantaincha nocoaque piasanojeite pantero maaroni cameetsayetsatsiri; irointi caari cameetsatsi, eiro pantimatirotsi catsini.

²⁰ Tempa Tasorentsi savicacaajeitimpiri cameetsa. Eiro osamanititsi iranaacotasantaqueri Satanashi eiro yantacantajimpitrotsi aisati caari cameetsatsi. Nocoaque meeca irineshinoncaajeitimpi Avincatsarite Jesoquirishito.

²¹ Ivetsajeitimpi Timoteo; itsipataquena nantavejeitiniriri Jesoshi. Aisati ivetsajeitimpi noshaninca Iroshio, Jaso, jeri Soshipatere.

²² Narotaque nainti Tereshio sanquenatiniriri Pavoro oca. Aisati narori, noquemisaniriri Avincatsarite. Novetsajeitimpi narori.

²³ Aisati ivetsajeitaquempí iriori Cayo. Nosaviquimotiri aca ivancoqui. Aisati ipocapiniti quemisanta yetatsiri aca ivancoqui, oshequi yaacameetsajeitaquena, ineshinoncajeitaquena.

²⁴ Ivetsajeitimpi Erashito, yora quempoyeajeitiniriri iirequite savicajeitatsiri aca. Aisati ivetsajeitimpi ayemisanraririnte pajitachari Coarato.

Ivecarataquero isanquenare.

²⁵ Tsame meeca ampincatsajeiteri Tasorentsi. Iriotaque matacaaqueeri aquemisan-tasanotantacariri, ariorica ashiretasanojeitacaro oca noquenquetsacotaqueriri Jeso-quirishito. Peerani catsini te iriojeiteni yora intacarori impoque Quirishito iroavisaco-jeitee. Te incamanterini Tasorentsi,

²⁶ iro cantaincha meeca iotacaajeitaquee. Isanquenatacaqueri yora camantantatsiniriri peerani, aisati itiancajeitaquena narori nocamantajeitaqueri maaroni atiripee: “Ocameet-sati pinquemisantaajeiteri Tasorentsi”. Tempa ocameetsati anquemisanteri iriori, te inca-maneteji irinti, icantatiani yanei.

²⁷ Oshequi ioti catsini irinti, apaniro ini. Tsame, maaroni quemisantaajeitiriri Jeso-quirishito, ancantajeite: “Tempa icameetsasantaque Tasorentsi”. Aitaque ancantajeit-eari, maaroni.

Narotaque sanquenajeitimpirori: *Pavoro*

IJVATAQUE PAVORO ISANQUENAJEITAQUENERI CORINTOSATI

Yovetsajeitari Pavoro corintosati.

¹⁻² ¿Ainirompi, corintosati? ¿Tecasimpa oajeitempine? Narotaque Pavoro sanquena-
jeitimpirori oca. Tempa icoyeaquena Tasorentsi, irootaque itiancantaquenari Jeso-
quirishito, icoacaquena nonquenquetsatacoteri. Nocarataqueri aca Soshiteneshi nosan-
quenajeitimpiro maaroni quemisantajeitatsiri ara. Piquemisantaqueri Jesoquirishito,
irootaque yoameetsajeitantaquempiri; meeca pishanincatacari Tasorentsi. Piquempe-
jeitacari maaroni aventajeitacari Avincatsarite Jesoquirishito, irootaque yoavisacotan-
tacari. Tempa meeca ashanincajeitacari maaroni quemisantajeitiriri, jaocarica isavica-
jeitiri.

³ Nocoaque irineshinoncajeitempi Apa Tasorentsi, aisati nocoaque cameetsa irisavica-
caajeitempi. Aisati inquempejeitempi iriori Avincatsarite Jesoquirishito.

Iveshireimentajeitari Pavoro corintosati.

⁴ Piquemisantaqueri Jesoquirishito, irootaque ineshinoncajeitantaquempiri Tasorentsi,
irootaque meeca nocantantariri: “Ariove pimatacaajeitaqueri corintosati”.

⁵ Oshequi itasoncacoventajaquempi, cameetsa isavicacaajeitaquempi, iotacaasano-
jeitaquempiro paitapeerica icoacaajeitaquempiri.

⁶ Tempa moncarataca nocantajeitaquempiri peerani: imajeitaquempiro Jesoquirishito
maaroni.

⁷ Tempa iriotaque Avincatsarite: paamayeari, irosati impocantajeari. Tempa ita-
soncacoventaquempi pimatantacarori pantiniri paitarica icoacaajeitaquempiri, tecatsi
coiteimotempine aisati.

⁸ Incantaitiyempani intasoncacoventasanojeitempi; impoji, ariorica impocaje,
irineacameetsajeitapaajempi. Eiro iquishimentapaimpirotsi pantayevetari.

⁹ Eiro yamatavijeitimpitsi Tasorentsi, tempa icoyeaajeitaquempi pishanincatanteariri
Itomi: tempa iriotaque Avincatsarite Jesoquirishito.

Icantiri: “Pinintavacaajeitea”.

¹⁰ Noyemisantaririnte, tempa apincatsajeitiri Jesoquirishito. Irootaque meeca nocan-
tajeitantimpiri cameetsa pinintavacaajeitea, eiroquea piquisavacaajeitatsi. Pinquem-
petavacaajeitea, eiro picantavacaimentajeitarotsi paitapeerica.

¹¹ Irootaque nocantantimpiri oca icamantapaaquena atirite Coroe oshequi picantava-
caajeitaca.

¹² Ainiro cantayetaintsiri: “Noquemisantiri narori Pavoro”. Pashini cantajeitaintsi: “Irio
noquemisantiri Aporo”. Pashini cantajeitaintsi: “Irio noquemisantiri Sejashi”. Pashini
cantajeitaintsi aisati: “Noquemisantaqueri nainti Quirishito”. Irootaque nocantantimpiri:
“Eiro picantavacaajeitatsi”.

¹³ ¿Itsipareacampa Quirishito? Te, apaniro ini. ¿Nopajacotimentaquempimpa narori? ¿Pivaoti-
satimentaquenampa narori? Teve.

¹⁴ Meeca nopasonquitiri Tasorentsi te novaotisajeitempiji. Irinti apaniro novaotisata-
queri Quirishito, aisati Cayo.

¹⁵ Meeca tecatsi incantashiyetea: “Novaotisatimentacari Pavoro”.

¹⁶ Aisati novaotisataqueri Eshitejana, aisati ishaninca. Te nonquenchireteriji
pashini novaotisataqueririca.

Iovetari atiri aisati ioyetiri Tasorentsi.

¹⁷ Te iro intiancantena Quirishito novaotisatante, irointiquea itiancantana nocamanta-
cotiro cameetsatatsiri. Nocamantantirica, te noshemetsatacayeroji noneane. Noshemet-
satacayerome, eiro ocameetsatime. Pijijeiticari icoacaquempi Tasorentsi piojeite os-
hequi pavisacotantajeari. Tempa iriotaque Quirishito camimentajeitaqueeri, irootaque
yoavisacojeitantaajeeri: irootaque irointi nocoaque niotacaajeitempi.

¹⁸ Ariorica acamantavetari yora jatatsineri Sharincaveniqui: “Icamimentaquempi
Quirishito coroshiqui, icoaveta iroavisacojeitajempime”, tempa ishironimentajeitaquee.
Iro cantaincha ainti, avavisacojeitaca, ayojeiti ainti ainiro itasorenca Tasorentsi imatanta-
rori yoavisacojeitaquee.

¹⁹ Aitaque isanquenayeetini: “Icanti Tasorentsi: ‘Nompeitajeri iotantavetari yora
ioyevetachari. Nompeapitsatajeri quenqueshireavetachari ora iquenqueshireantavetari’
”.

Itsarojeitaqueri yora corintosati.

²⁰ ¿Jaoca incanteari meeca iotincari? ¿Jaoca incanteari meeca oametantirori Sanquenar-entisi? ¿Jaoca incanteari aisati yora oametavacainchari? Tempa itseencaquero Tasorentsi maaroni iojeivetari atiripee.

²¹ Yatsipetashita atiri iojeivetaro paitapeerica: te iriojeiteriji Tasorentsi. Ioti irinti, irootaque icoantacari iroavisacojeiteri maaroni quemisantirori nocamantajeitaqueri. Iro cantaincha ishironmentashitaquena tseencantatsiri.

²² Icoaque jorio antasonqueneri paitapeerica iriotanteari itsipataquee Tasorentsi. Yora caari joriotatsi yoamemashitavacaapinitaro paitapeerica.

²³ Iro cantaincha nocamantiri atiri: “Icamimentaquee Quirishito coroshiqui yoavisacojeitaquee”, irootaque iquisantaquenari jorio. Irinti caari joriotatsi, ishironmentajeitaquena.

²⁴ Iro cantaincha itimi icoyeajeitaqueri Tasorentsi iroavisacoteri: jorio, aisati caari joriotatsi. Iotacaajeitaqueri iriori ainiro itasorena Quirishito, iroavisacotenteari.

²⁵ ¿Paita itseencajeitantariri Tasorentsi? Tempa irio anaacotasantantatsiri loti. Tempa irisati anaacotasantantatsiri ishintsiti. Te aneeriji atiri quempetearine.

²⁶ Pinquenqueshireempa, noyemisantaririnte, jaoca picantajeitari. Oshequi itseencajeitaquempi pishaninca, icantajeiti: “Te iriojeji quemisantatsiri”. Queario, te pimpincatsarijeiteji, aisati te pashitaaranteaji, irootaque itseencajeitantimpiri.

²⁷ Ishironmentajeivetatuquempi atiri, te impincatsajeivetempiji, iro cantaincha icoyequempi Tasorentsi iroavisacojeitempi. Iriotacaasanojeitempi, impeajeitempi pincatsaritatsineri. Impoijiquea impashiventajeitanaquea shironmentajeivetimpiniri, tseencajeivetimpiniri.

²⁸ Icoyeeasantaqueri Tasorentsi yora caari pincatsatachane, yora ipiincayeevetari atiri, yora itseencanayeevetari: irio itomintasanajeitari. Irintiquea yora pincatsarivetachari aisati iojeivetachari iroashinoncaajeiteri.

²⁹ Tecatsi meeca incantea atiri irishemetimoteari Tasorentsi.

³⁰ Piquemisantaqueri Jesoquirishito, irootaque yoaneajeitantaquempiri Tasorentsi, irisavicacaajeitempi inampiqui. Tempa iriotaque Jesoshi iotacaajeitaqueeri, oameet-sajeitaqueeri, shanincajeitaqueeri, oavisacojeitaqueeri.

³¹ Tempa aitaque isanquenaeyeritroni: “Eiro ashemetitsi, irointi aneameetsatasan-oteri Avincatsarite irinti”.

2

Jaoca icantari Pavoro icamantapiniti.

¹ Nareentapaaquempiri, noyemisantaririnte, nocamantacotapaaqueri Tasorentsi. Te noshemetsatapeeroji noneane, te noamemashiyetapeempiroji nioyetiri; apatiro noameta-paimpiro icantiri Tasorentsi.

² Iotaca noquenquetsatacotapaaqueri Jesoquirishito, icamimentajeitaquee coroshiqui. Tecatsi pashini nonquenquetsacote.

³ Nopashiventashireavetapaaca, notsaroashireavetapaaca, nopioncapaaca.

⁴ Pamene, noquenquetsatacapaaquempi aisati nocamantapaaquempiro irineane Tasorentsi, iro cantaincha te noamemashitapeempiroji nioyetiri. Iotacaasantaquempi Ishire Tasorentsi queariotaque irineane, aisati itasoncacoventajeitaquempi piotantarori queario noametaquempiri.

⁵ Ora iojeitiri atiri, tecatsi oncantea oavisacojeitempi, irointi itasoncacoventaquempi Tasorentsi pavisacojeitantacari.

⁶ Ariorica noametapinitiri quemisantasantatsiri, queario notsoteaqueneri irinti noametasanojeitiri, niotaque iquemavaquero nocantaqueriri. Iro cantaincha te noamemashiteariri ioyetiri atiripee aisati ivincatsaritepee. Eiro oavisacojeitiritsi ora yoametavacaashiyetari.

⁷ Irointiquea noquenquetsatacoti ioyetiri Tasorentsi. Peerani imanavetacaro, te ayo-jeiveitearoni. Peerani, tequerani irovetsiqueroni paitapeerica, icantitani: “Nosavicacaa-jeiteri cameetsa aca nonampiqui maaroni yora pincatsajeitenaneri, coajica”.

⁸ Te iriojeiteroji peerani yora pincatsaritepee. Iriojeitaquerome, eirome ipajacotirime Avincatsarite, yora cameetsatasantatsiri.

⁹ Irootaque isanquenatacotitaqueeniri: “Timatsi yovetsicaqueri Tasorentsi. Te irineap-initeroji atiri, te inquemacotapiniteroji, te inquenqueshiretapiniteroji. Iro cantaincha yovetsiquiniri maaroni nintasanotiriri”.

¹⁰ Irootaque iotacaajeitaqueeri Tasorentsi ainti, iro vaajeerori Ishire. Iotasanojeita-queri maaroni Ishire, otsoteaquero maaroni iquenqueshiretaqueri Tasorentsi.

¹¹ ¿Janica iotirori iquenqeshiretiri ashaninca? Tempa apaniro iotiro irinti. Aisati oquempetaca, tecatsi ioterone iquenqeshiretiri Tasorensi: apaniro ioti Ishire irointi.

¹² Pamene, te anquemisantashitearoji ioyetiri atiripee, irointi aquemisantaquero Ishire Tasorensi. Irootaque ayotantacarori icoaque Tasorensi irinshinoncajeitee, irisavica-caajeitee cameetsa.

¹³ ¿Piquemaquerompa nocantaquempiri? Te irioteroji atiripee, aisati te iroamejeiteeroji, irointi oamejeiteerori Ishire Tasorensi. Oamejeitaqueri yora otimantashiretari, iquemajeitantarori irinti.

¹⁴ Yora caari otimantashireta Ishire Tasorensi, te inquemavaqueroji ocantayetiri, irointi ishirontimentacaro. Tecatsi incantea inquemero. Iro caari iquemantaro, te ontimantashiretearaji. Apaniro iquemajeitiro otimantashiretasanotari, irinti.

¹⁵ Iquemajeitaquero iriori maaroni, iro cantaincha yora tseencantatsiri, tecatsi inquemasanote irinti.

¹⁶ Pamene, ¿timatsimpa iotirori iquenqeshiretiri Avincatsarite? ¿Timatsimpa materone iroameteri Tasorensi? Te intimeji catsini. Iro cantaincha niotiro nainti iquenqeshiretiri Quirishito, tempa yoametaquena.

3

Iquisavacaajeitaca corintosati.

¹ Noyemisanrarinte, te noncantempiji quemisanriri Ishire Tasorensi, ainti nocantaquempi caari quemisanriro. Piquempetaca iroaquera piquemisantaqueri Quirishito, piquempejeitaca jananequi.

² Irootaque noamejeitantimpirori peerani caari pomerentsitatsi: oquempetaca niraacaquempiro tsomitsi; te nompempiji ivatsa, tequera pimateroni. Irosati picanta meeca, te pimateroji.

³ Tequera pinquemisanteroji Ishire Tasorensi. Ariorica pininatavacaajeitaca, aisati piquisavacaajeitaca, tequera pinquemisanteroji. Piquempetacari caari quemisantayetatsi.

⁴ Jero icanti aporo: “Noquemisantiri Pavoro”. Icanti pashini: “Noquemisantiri Aporo”. Tempa piquempejeitari caari quemisantatsi.

⁵ Pamene, ¿jaoca icantari Aporo? Aisati ¿jaoca nocantari narori picantavacaimentanantari? Narojeitaque iveranaro Tasorensi, quemisantacaquempiri. Nantiniri Avincatsarite icoacaquenari.

⁶ Oquempetaca nopanquitaquero narori oitsoqui. Irio saitacotirori Aporo. Irintiquea Tasorensi shiocacaquerori.

⁷ Notsataaca nopanquitashitaro: tempa noquenquetsatacaajeitaquempi. Impoiji Aporo isaitacotashitaro: yoamejeitaquempi. Apaniro irinti Tasorensi ishioacairo: iro quemisantacaasanojeitaquempiri.

⁸ Aisati imoncaratavacaaca yora panquitirori aisati yora saitacotirori. Imoncaratiniri yora ashtarori panquirensi ipinajeitiri.

⁹ Aisati oquempetaca, nomoncaratacari Aporo nantiniri Tasorensi icoacaajeitaquenari. Avirojei pishiajeitaquero iroane Tasorensi.

Aisati pishiacantaquero ivanco yovetsicaqueri.

¹⁰ Noshiacantaqueri iotasanotatsiri yovetsiqui pancotsi. Ineshinoncataquena Tasorensi, irootaque ishinetaquaenari noatiaquero otincami. Ainiro pashini, ovaavaquerori. Ariorica yovaavaquero, iramayearoyea, icomitarocari.

¹¹ Iro otincami pancotsi oshiacantaqueri Quirishito, iro shiaquerori otincamisanori. Te intimeji pashini shiyerone otincami.

¹² Yora ovaavaquerori, ¿paita irovetiscantarori? Iroorica oro, iroorica perata, iroorica mapi marereatatsiri; iroorica inchato, iroorica saveshi, iroorica compiroshi. ¿Ariompa onquisotaque? ¿Eirompa oquisotitsi?

¹³ Onconijatanaque coajicani yovetsicayetiri. Iriotaquero Tasorensi, iriotasanotero. Ariorica ovetsicaquea pancotsi cameetsatanotatsiri, eiro otaatsi; irompa ariorica ovetsicavetaquea caari quisotatsi, ario ontaaquea. Irineantearo Tasorensi aisati maaroni antajeitaqueri, iriotanteari ocameetsatanotirica.

¹⁴ Ariorica oncameetsatanote antajeiteneriri, oshiaquero quisoyetatsiri avetsicantayetarori; ari cameetsa impinajeitee.

¹⁵ Terica oncameetsateji antayeteri, onquempetearo avetsicantaro caari quisotatsi; ontayea irointi, oshiaquero tecatsi amatanote. Ariorica avavisacotajea, iro cantaincha tecatsi timimoteeneri, onquempetimoataque otaacojeitaque maaroni timimojeiteeri: apaniro ainti avavisacotajea.

¹⁶Tempa arojeitaque shiaquerori pancotsi isavicantari Tasorensi. Tempa aisati oquempetaca osavicantajeitaque Ishire.

¹⁷Eirorica picavintsairo isavicantari Tasorensi, eiro aisati icavintsaimpitsi avirori. Ocameetsatsanoti isavicantari Tasorensi: tempa avirojeitaque isavicantari.

¹⁸Eiro pamatavitajatsi avisati. Ari picarajeitiri jivetachari iotasanoti paitapeerica. Te oncameetsateji irishemete. Ariorica irishemeventero ioyetiri, eiro iotacairitsi Tasorensi. Iro cantaincha incanteririca: "Te nioteji, poametenä", ari iroametasanoteri.

¹⁹Itseencaquero Tasorensi maaroni ioyevetari atripee. Tempa aitaque isanquenayee-tini: "Yora tsimeripee ijivetaca tecatsi ayerineri, iro cantaincha omapocaqueri oashirensi aavaqueri, oamaaqueri. Aisati iquempejeitaca maaroni shemetimantarori ioyetiri: ir-impapoqueri Tasorensi, iroashinoncaajeiteri".

²⁰Aisati isanquenayee-tini: "Ioti Avincatsarite te oncameetsateji iquenqueshireyeta-queri iotasanovetachari".

²¹Eiro pishemetimentiritsi atiri, te oncameetsateji. Yovetsicajeitaquempiro Tasorensi maaroni timayetatsiri poveshireimentantarori iroori. Irootaque nocantantimpiri:

²²itiancaquena Tasorensi namitacojeitantempiri, aisati itiancaqueri Aporo, aisati Sejashi iriori, iramitacojeitantempiri. Yovetsicajeitaquempiro maaroni timayetatsiri quipatsiqui, piveshireimentantarori. Aneatsimpirica, piveshireempa. Pincamaquerica, aisati piveshireanaquea. Piveshireimentearo timayetatsiri meeca, aisati timayetatsineri coajica.

²³Aisati oquempetaca, pamitacojeitiri Quirishito, iveshireimentaquempi. Yamitacotiri iriori Tasorensi, iveshireimentacari iriori.

4

¹Meeca piojeitaquena narojeitaque iveranaro Quirishito. Itiancajeitaquena Tasorensi novaaqueneri atripee oca imanapitsaveitariniri peerani.

²Aitaque icoasanotaque ariorica novayempiro, eiro namatavijeitimpitsi.

³Te oncantimoneentimatenaji paitarica pincantacotashijeitenari, ainirorica nantane; aisati te oncantimoneentimatenaji paitarica incantacotashijeitenari atripee. Tecatsi noncanta noncantacotajeta narosati: "Nocameetsati".

⁴Noquenqueshiretaca narori tecatsi nantane, iro cantaincha eiro nocantashitatsi: "Nocameetsataque". Irintiquea Avincatsarite cantacotenaneri irinti, nocameetsatirica.

⁵Irootaque meeca noncantantempirori: meeca te oncameetsateji ancantacotashiteari itsipapee: "Ainiro irantane"; coajicaquea ari ayotasanajeitanaque. Tempa impocaje Avincatsarite, inquitaitetacojeitapaajero maaroni manavetachari meeca tsiteniriqui. Ironijayero paitarica acoasanojeitiri maaroni. Acameetsatirica, ari incantajeitee Tasorensi: "Picameetsati".

⁶Pamene, noyemisanraririnte. Narosati quenquetsatacotacha, aisati noquenquetsatacotiri Aporo piojeitanteari eiro pipincatsatashitantaritsi atiri. Ariorica pincante: "Nonintasanotiri aparo", pitseenquiricari itsipa.

⁷¿Paita pishemetimentiri? Tempa Tasorensi pashijeitimpirori maaroni timimojeitaquempiri. Meeca ¿paita pishemetantacari, oquempetaca te impashitempiro?

⁸Piquempetacari ashitaarantachari: pijivetaca tecatsi coiteimotempine. Pijitashijeivetaca piotasanojeiti: te pincoyeji oamejeitempineri. Pijitashijeivetaca pipincatsatanotaque, pitseencaquena narori, piquempetacantaquena naro patirite. Ja, nocoavetaca pimpincatsaritasanojeiteme, antsipatavacayeame ampincatsariventantajeiteme.

⁹Ari nocarajeitaqueri itsipapee itiancane Tasorensi, oquempetimotaquena ipeajeitaquena nampirensi: itseencajeitaquena atripee. Aisati oquempetaca isareetaquena iroyeetena; yamenashejeitaquena maaroni: inampirepee Tasorensi, aisati atripee.

¹⁰Nopincatsataqueri Quirishito, irootaque picantajeitantanari: "Te pioteji". Iro cantaincha piquemisantajeitaqueri avirori Quirishito, irootaque picantantari: "Niojeitaque narori". Picantajeiti: "Tecatsi irimatimate iriori Pavoro, oshequi amajeitaque ainti". Oshequi pineapincatsatashitaja avisati, nainti pitseencajeitaquena.

¹¹Ari notasheapinitaqueri, nomiretapinitaqueri, noquitsaatsaratani nomaatsara, ipasanatapiniyeetanani, noquenaquenatapinitaqueri; irosati meeca.

¹²Nocantatiani nopomerentsitapinitacaro nantaveeti. Ariorica iquisatsayeetaquena, nocantiri Tasorensi: "Pineshinoncatajeri yora quisaquenari". Ariorica iquisasanoyee-tana, te nomplateariji.

¹³Ariorica itseeayocyeetaquena, cameetsa noneanatavaqueri. Queario, ipinquee-taquena, iquempetacanteetaquena cajara, icanteeti: "Te incameetsateji Pavoro".

¹⁴Te iro nosanquenatantempiro oca novashiventaaajeitempi, irointi noshiacantimpi notomipee nonintasanotiri; nocoaque noncavintsayempi, nonquenqueshiretacayempi.

¹⁵ Timatsi oshequi oamejeitimpiri piquemisantiri Quirishito, iro cantaincha te intimeji oshequi ashitempineri. Pamene, nocamantajeitaquempiro oca cameetsatsiri piquemisantantacariri Jesoquirishito, irootaque apaniro nainti noshiaçantantimpiri no-tomipee, nishintopee.

¹⁶ Irootaque nocantasanojeitantimpiri: “Pishiasanojeitena”.

¹⁷ Notiancaquempi Timoteo, noshiaçantaqueiri iriori notomi nonintasanotiri. Iqueari-oventiniri Avincatsarite paitarica yantiniriri. Inquenqueshiretacayempiro jaoca ocantari nocamantacotapinitiri Quirishito, jaocarica anta yapatotimentariri.

¹⁸ Pishemetaarantaque, pijitaarantavetaca eiro nojatashitimpitsi narori.

¹⁹ Ariorica inintacaquena Avincatsarite, nocoaque intsipaite nojatashijeitempi. Eiro noquemisantashitapaarotsi irineane yora shemetatsiri, irointi niotapaaque otimirica imatacaqueriri Tasorentsi.

²⁰ Ariorica ipincasariventaquee Tasorentsi, eiro aneanatashiveeta, irointi amayetero icoacaqueeri.

²¹ ¿Paita picoajeitaqueri? ¿Picoajeitaquempa nonquisatsajeitapeempi? ¿Irompa picoajeitiri nonintajeitapeempi, cameetsa noneshinoncajeitapeempi?

5

Iconoayetacari quemisantatsiri caari cameetsatsi.

¹ Icamanteetana picarajeitaqueri airori iashiane. Yaanirotajiro shirampari irinirotsori yaavetari iriri. Tecatsi quempetearineri: yora caari ioterine Tasorentsi te iraaipiniteroji yaavetari iriri.

² Avintiquea pishemenirojeitaque. ¿Paita caari poashirejeitanta? Ariorica pampatoti-mentapinitiri Tasorentsi, eiro pishinetiritsi imocanirotapee iriori.

³ Te noncarajeivetempiji, iro cantaincha noquenqueshireacojeitaquempi. Oquempeti-motaquena ariorica nosaviquimojeitaquempi, nocantantimpiri te oncameetsateji

⁴ irantero iashiane. Itasorentsitaque Avincatsarite Jesoshi, irio matacaaqueenarori nocantacoventantariri yoranqui. Ariorica pampatojeitea, piojeite noquenqueshirejeitaquempi narori.

⁵ Pishineteri Satanashi iraanerotanajeri, iroasanquetayerita. Impoiji ariorica inquenqueshiretajea, ari iravisacotaje coajica impocajerica Avincatsarite Jesoquirishito.

⁶ ¿Paita pishemenirojeitancari? Tempa piojeiti otimirica tapiacaarori tanta capichaji, omatasanotaquero maaroni tanta, otapiacaajeitacaro.

⁷ Pojocajeri yora noshiaçantimpiri tapiacaarori tanta, pinquempejeitantarori tanta iroaquerari, caari tapiacha. Eiorica pojoquiri, iquempejeitaricari iriori itsipapee quemisantatsiri. Pineaquero, yoyetaqueri Quirishito, ishiaqueri ovisha yoantapiniyee-tariri ora quitaiteri Yavisantaniri.

⁸ Meeca, ariorica aveshireimenteari, tsame ancameetsatanaque: eiro amatavitantitsi. Eiro aquisatsi, eiro antapinitirotsi caari cameetsatsi.

⁹ Nosanquenatantimpirori peerani, nocantajeivetaquempi eiro piconoaritsi antirori tsinane caari yai.

¹⁰ Te nonquenquetsacoteriji caari quemisantatsi antirori caari yai, yora coasanotirori yashiyetari ishaninca, amatavitantatsiri incoshite, quenquetsatacaavetarori yovetsicas-hiyetari. Te noncantempiji: “Eiro pitsipataritsi caari quemisantatsi”. Tecatsi pincantajeite pojocavacayea, tempa pincanteani pineapiniteri irisavigue.

¹¹ Iro cantaincha nosanquenatacotiri yora cantatsiri: “Narotaque piyemisantaririnte”. Ariorica yantiro tsinane caari yai, eiro quiso poajeitiritsi. Aisati pinquempejeiteri yora coasanotirori yashiyetari itsipapee, aisati quenquetsatacaavetarori yovetsicashiyetari impeemeri itasorentsita, quisatsatashitariri ishaninca, aisati shinquitachari, aisati coshi-tantatsiri. Aitaque nocantaquempi, eiro poimotaritsi quempetariri nocantaquempi.

¹² ¿Arimpa pincante jaoca incanteari caari quemisantatsi? Eiro. Tempa irinti pincante yora piyemisantaririnte.

¹³ Irintiquea Tasorentsi oasanquetayerineri caari quemisantatsi. Meeca pojocajeitajeri yora caari cameetsatsi picarajeivetari: eiro pijitashitaritsi quemisantatsiri.

6

¹ Ariorica pinquisaqueri piyemisantaririnte, ¿ocameetsatimotimpimpa paventapeempari caari quemisantatsi incantantempiri jaocarica pincantajeiteari? Tempa oncameetsateme paventapeemparime piyemisantaririnte irinti.

² Tempa pioti yora quemisantatsiri yoameesantiri Tasorentsi irimatero incantacoventajeiteri maaroni atiri, jaocarica incantajeiteari. Ariorica pincantacoventajeiteri coajica

maaroni atiri, ¿paitaquea caari pimatantaro meeca pincantacoventajeiteri piyemisantaririnte?

³ Tempa pioti pincantajeiteri coajicani inampire Tasorentsi jaocarica incantajeiteari. Pincantacoventajeiteririca iriori, ¿eirompa pimatiri pincantacoventajeiteri meeca pishaninca aviriori?

⁴ Otimirica meeca piquisavacaimentari, ¿paita paventantariri yora caari quemisantatsi incantantempiri jaocarica pincantajeiteari? ¿Paita incantempiri iriori?

⁵ Iro nocantantimpiri, nocoaque pimpashiventanaquea. ¿Tecatsimpa quemisantatsiri ioterone incanteri itsipapee jaocarica incanteari?

⁶ Iro cantaincha piquisaqueri piyemisantaririnte, aisati paventacari caari quemisantatsi.

⁷ Patsipetashijeitaro paventajeitacari joeshi, tecatsi incantea iramitacojeitempi. Te oncameetsateji paventeari. Iro cameetsavetachari pishineteri incoshiyeetempita.

⁸ Te oncameetsateji pantavacaajeitea. Jero aisati picoshitavacaajeita. Pantapiniijeitiri piyemisantaririnte.

⁹⁻¹⁰ Yora caari cameetsatsi eiro yareetatsi anta ipincatsaritinta Tasorentsi. Tempa piotiro, eiro picomitarotsi. Eiro ijatitsi anta ipincatsaritinta yora antirori tsinane caari yai, aisati yora quenquetsatacaashitarori yovetsicashiyetari, aisati aimentarori ijina, aisati tsinampairiri ishiramparirinte, aisati coshitantatsiri, aisati coasanotirori yashiyetari itsipapee, aisati shinqitachari, quisatsatiriri ishaninca, aisati amatavitiiriri ishaninca icoshitantariri. Tecatsi catsini incantajeitea iriori irareetajea anta ipincatsaritinta Tasorentsi.

¹¹ Aitaque piquempejiveitaniri. Iro cantaincha yoameetsajeitaquempi Avincatsarite Jesoquirishito, aisati Ishire Tasorentsi: yaacameetsataquempi, ipeaquempi itomi Tasorentsi.

¹² Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate: tempa antsipetashitaquearo. Te ancoyeji ametasanotearo caari inecameetsata itsipapee quemisantatsiri.

¹³ Otimi avari aquemari. Aisati otimi asheito onantari avari. Iro cantaincha coajica eiro otimajitsi ayeari aisati asheito iroori. Impeajero Tasorentsi, eiro otimitsi inquitequi. Tempa atsipetashitaro anevetaro paitapeerica. Te iro irovetsicantee antero caari ai, irointi yovetsiquimentee Avincatsarite anquenqueshirejianteariri iriori. Aisati iquempeta, iquenqueshiretapinijeitaquee arori.

¹⁴ Otimi itasorencia Tasorentsi, irootaque imatantarori yoitinaajiri Avincatsarite, aisati irimatantajeitajeeri aroripee.

¹⁵ Avatsapee arori irootaque iraco Quirishito iriori: iyempita, iroqui, iiti, maaroni. Tempa piotiro oca. Arojeitaquerica ivatsa Jesoshi, ¿ocameetsatimpa antero tsinane neayetiiriri itsipapee shirampari? Tempa oquempevetaca antacaqueri Jesoshi tsinane. Teve, te oncameetsateji.

¹⁶ Ariorica yantiro shirampari tsinane, oquempetomotacari Tasorentsi yaasanoaquero. Tempa piotiro. Isanquenayeeti: “Apite inaveitani shirampari aisati tsinane, iro cantaincha ariorica iraavacayea irampanirojeitanaque, te oncameetsateji irijocavacayea”.

¹⁷ Iro cantaincha ariorica quiso airi Avincatsarite, aquempetacari iriori.

¹⁸ Eiro pantirotsi catsini caari pai, eiro pantiritsi catsini caari pai. Paitapeerica pashini pantayetaqueri, poashinoncaqueri itsipapee pishaninca; iro cantaincha yora antirori otsipapee tsinane, yashinoncaja irisati.

¹⁹ Tempa pioti otimantacaro pivatsa Ishire Tasorentsi. Itiancaquempiro Tasorentsi quiso oantaquempi. Te meeca aviro pincatsariventachane avisati, irinti Tasorentsi pincatsariventimpiri.

²⁰ Yoavisacotantajimpiri, oshequi opomerentsitimovetacari: tempa itianquiri itomi icamimentaquee. Meeca, paitapeerica pantayetaqueri, pimataqueneri Tasorentsi, irineacameetsatanteeteariri.

7

Iquenquetsatacotiri aatsinemeru ijina.

¹ Ari chapinqui pisanquenatantaquenari, timatsi pisampitaquenari. Meeca nanaaquempi. Queario ocameetsatasanoti eiro paitsi pijina.

² Iro cantaincha ariorica pintimashitea, pantirocari tsinane caari pai; aisati tsinane, antiricari shirampari caari ai. Irootaque ocameetsatantari paasanoteta pijina, aisati aasanoteta tsinane ojime.

³ Cameetsa irishinetearo ijina oneeri, aisati onquempeteri iroori, oshineteari irineero.

⁴ Ijina eiro opincatsatajatsi irosati, irointi ocameetsati ompincatsateri ojime. Aisati inquempetea iriori ojime, eiro ipincatsatashitajatsi irisati, irointi impincatsatero ijina.

⁵ Eiro pitsaneapitsatarotsi pijina; aisati tsinane, eiro pitsaneapitsataritsi pijime. Ariorica pincantavacayea: “Eirotcita aneavintsatavacaajatsi aparopee quitaiteiri; iotea anquensatsacayeri Tasorentsi”, ari cameetsa. Iro cantaincha impoiiji pineavintsatavacayea aisati. Pamene, terica pimatero pimaashitea, yantacaimpicari Satanashi caari cameetsatatsi.

⁶ Te noncantasanovetempiji: “Payero pijina”, iro cantaincha pincoaqueric paye, ocameetsati paye.

⁷ Nocoavetaca pinquempjeitenename narori, iro cantaincha inashitacaaajeitaquee Tasorentsi, te amoncaratavacaajeiteaji. Jeri aparo, timatsi imatacaqueri. Jeri itsipa, onashita imatacaqueriri iriori.

⁸ Yora caari aatsi ijina, aisati camajinantachari, noncamantajeitempi: cameetsa pinquempjeitena narori, pintimashijeitea. Aisati onquempjeitea tsinane, cameetsa ontimashijeitea iriori.

⁹ Iro cantaincha eirorica pimatirotsi pintimashitea, cameetsa paajeta aisati. Cameetsa paye, te oncameetsateji pincoashiveetea paye. Aisati oquempeta tsinane, te oncameetsateji oncoashiveetea ayeta.

¹⁰ Meeca noncamantasanotero aatsiri ojime. Te naro camantasanoterone, irintiquea Avincatsarite camantasanoterone: te oncameetsateji pojoqueri pijime.

¹¹ Ariorica pojoqueri, ari pintimashitanotanaquea. Eirorica pitimashitatsi, pampiitajeri paajeri aisati pijimentavetacari. Aisati, te oncameetsateji irojocajero shirampari ijina.

¹² Meeca noncamanteri itsipapee, te irio Avincatsarite camanrineri: otimirica ayemisanrarinte ijina caari quemisantatsi, ariorica ocoaque aasanoteri, te oncameetsateji irojocajero.

¹³ Aisati, tsinane, iriorica pijime caari quemisantatsi, ariorica icoaque quiso iroasantempi, te oncameetsateji pojocajeri.

¹⁴ Otimirica tsinane quemisantatsiri, irinti ojime te inquemisante. Iro cantaincha te inquempetariji itseencaririnte; inashitacaari Tasorentsi, icanti: “Iriotaque ojime quemisantinari. Iriotaque iriri otomipee. Nocoacaasanojeitaqueri inquemisantajeitajena maaroni”. Aisati oquempetaca ijina quemisantatsiri, terica onquemisante. Te onquempetajeiroji itseencaroronte; inashitacaacaro Tasorentsi, icanti: “Irootaque ijina quemisantinari. Irootaque iriniro itomipee. Nocoacaasanojaquero onquemisantajena, aisati nocoasanotaque inquemisantajeite itomipee quemisantinari”.

¹⁵ Terica onquemisante ijina ayemisanrarinte, oncoaqueric ojocajeri, ari ojocajerita. Aisati ojime ayemisanrarinte, terica inquemisante iriori: incoaqueric irojocajero, ari irojocajerota. Tecatsi meeca canterine yora quemisantatsiri quiso iroantearori ora coatsiri ojocajeri. Aisati onquempetariji quemisantatsiri tsinane. Ariorica icoaque ojime irojocajero, tecatsi canterine quiso oanteariri. Te incoyeji Tasorentsi anquisavacaajeitea.

¹⁶ Tsinane, ariorica quiso poyeri pijime caari quemisantatsi, tempa ariorica poavisacotacantajeri. Aisati oquempetaca avirori, shirampari: ariorica quiso poyero pijina caari quemisantatsi, tempa ariorica poavisacotacantero?

¹⁷ Aitaque icoyeajeitaquempi Tasorentsi. Cameetsa pantajeiteneri Avincatsarite paitarica icoacaimpiri avirori. Irootaque nocantajeitaqueriri quemisantatsiri jaocarica yapatojeitacari.

¹⁸ Peerani icoyeajeitaquempi Tasorentsi. ¿Pijivataquempa pitoyeantaca? Aitanaji, eiro pipeajirotsi. Avirori pashini, terica pintoyeantea, eiro picoitsi meeca pintoyeantea, aitanaji.

¹⁹ Ariorica pitoyeantani, tecatsi oncantempi oavisacotempi. Aisati oquempetaca, terica pintoyeantea, tecatsi oncantempi. Iro cameetsatsanotatsiri anquemisantero icantajeiteeri Tasorentsi.

²⁰ Jaocarica picantajeitaniri peerani icoyeantaquempiri, aitaque pincanteari.

²¹ Icoyeanquempiri Tasorentsi, ¿avirorica pimantaari? Eiro piquenqueshiretirotsi. Iro cantaincha iroimpacajempirica amanantimpiri, cameetsa pisoquijanaje.

²² Icoyeanquempiri Avincatsarite, avirorica pimantaari pinaveitani, ari oquempetaca yoimpacacotentajimpi: eiro meeca iperanantimpitsi camaari. Avirorica caari pimantaari pinaveitani, meeca oquempetaca yamanantimpi Quirishito, meeca incantempi iriori paitapeeric pantayeteneriri.

²³ Oquempetaca yamanantaquempi iriori, oshequi pivinaro: tempa oshequi ipomentsiventaquempi yoavisacotaquempi. Eiro pipeajatsi meeca ivimantane atiri.

²⁴ Irootaque, noyemisanrarinte, noncamantantempirori oca: jaocarica picantajeitaniri peerani icoyeantaquempiri, aitaque pincanteari; iro cantaincha, quiso poanajeri Tasorentsi.

²⁵ Meeca nonquenguetsatacoteru caari neavintsatiri shirampari. Tecatsi incantasan-otena Avincatsarite, iro cantaincha noncamantempi noquencheshiretiri narori. Ineshinoncataquena, irootaque caari namatavitantimpi. Piojeitiro oca.

²⁶ Irotaintsi ompomerentsitimotasanojeitee, irootaque noquencheshiretantacarori oca. Jaocarica picantajeitari meeca, aitaque pincanteari.

²⁷ Paaquerica pijina, eiro pojocajirotsi. Pitimashitarica meeca, eiro picoitsi paye pijina.

²⁸ Ariorica paye pijina, cameetsa. Aisati ariorica aye ojime ora caari neavintsatiri shirampari, cameetsa; iro cantaincha oshequi pinquematsicajeitaquearo. Ariorica paye, oshequi ompomerentsitimotasanojeitaquempi. Te noninteji ompomerentsitimotempi, irootaque nocantantimpiri: "Eiro pai meeca".

²⁹ Meeca noncamantempi, noyemisantaririnte: eiro osamanititsi irojocacaashiyee-tempiro pantayevetanariri Avincatsarite icoacaimpiri. Otimirica pijina, iro cantaincha pinquearioventeneri iriori Tasorentsi icoacaimpiri.

³⁰ Ariorica poashiretaquea, ariorica pinquimoshiretaque; iro cantaincha eiro piquencheshiretirotsi, irointi pinquearioventero pantaveeteneri. Ariorica pamanantayete, iro cantaincha eirorica osamanititsi pineero pamanantayeveteari.

³¹ Eiro osamanititsi piveshireimentearo timayetsiri quipatsiqui, impoji eiro pimatirotsi piveshireimentearo. Cameetsa pisavicajeveta meeca, ainiro pamejeitacari, iro cantaincha opashiniyetanaque maaroni aneayetiri quipatsiqui; coajica ompomerentsitimotempi.

³² Nocoaque eiro picantashiretapinitanaque. Yora timashitachari, iquenqueshiretapini-tiro icoayetiri Avincatsarite, icoaque inquimoshiretacayeri.

³³ Irintiquea yora aatsiri ijina, iquenqueshiretapinitiro maaroni yantapiniyetiri ishan-ina: icoaque inquimoshiretacayero ijina,

³⁴ oshequi iquenqueshireyetaque paitapeerica. Ora tsinane timashitachari aisati caari neavintsatiri shirampari: oshequi oquenqueshirejeitiro icoayetiri Avincatsarite, oca-mantaqueri: "Paitarica pincoacayenari, ari nomataquempiro. Paitarica pincoacayenari nonquencheshireteri, ari nonquencheshiretero". Iro cantaincha ora aatsiri ojime oquenqueshiretiro maaroni yantapiniyetitiri atiri, ocoaque onquimoshiretacayeri ojime.

³⁵ Iro nocamantajeitantimpirori oca, nocoaque namitacojeitempi, te noninteji nom-pomerentsitacayempi. Noninti cameetsa pisavicajeite, aisati piojeite pantasanojeiteneri Avincatsarite paitapeerica incoacayempiri.

³⁶ Pamene, otimirica pishinto caari neavintsatiri shirampari. Ariorica pineaquero anteorotaque, picoaque meeca paacayero; ari cameetsa. Ayeta, eiro otimitsi pantane.

³⁷ Ariorica pincoasanote pintsanemparo, ari ocameetsasatanoti, eiro piquemisan-tashitaritsi yora ashereayetimpiri, irointi pantero picoasanotiri avirori, paitarica piquencheshiretiri.

³⁸ Pineaquero, ariorica paacayero pishinto, ocameetsati; iro cantaincha ariorica pintsa-neemparo, ocameetsasatanoti.

³⁹ Ariorica aye tsinane ojime, ari quiso oanaqueri, irosati incamanteari. Ariorica incamaque, ari oshinetantari aajeta pashini ojime onintasanotiri. Iro cantaincha apatiro aaje quemisantiriri Avincatsarite.

⁴⁰ Ariorica oncantatiyempani ontimashitea, naamaaca onquimoshiretasananotaque. Ari naamaaca yoametaquenaro Ishire Tasorentsi oca nocamantaquempi.

8

Iquenquetsatacotiri ivatsa yoyeeinirori yovetsicashiyetari ijitasorentsitiri.

¹ Meeca noncamantempiro jaoca pincanteriri ivatsa yoyeeinirori yovetsicashiyetari ijitasorentsitiri. Ijijeiveta atiripee iotasanoi jaoca incanteriri ivatsa. Iro cantain-cha, ariorica ayotashitea, ashemeticari. Te incoacaasanoteeji Tasorentsi ayotashitea, irointi icoacaasanotaquee anintavacaajeitea avametavacaasanotantanaqueari antiman-tajeiteari cameetsa.

² Itimirica jivetachari ioti, irisati amatavitajancha: te iriotasantejei.

³ Iro cantaincha ariorica aninteri Tasorentsi, iroamejeitee irinti.

⁴ Pisampitacovaqueri ivatsa yoyeetaquenero ijitasorentsitiri yovetsiqueetiri. Ari ayojeiti te ontasorentsiteji yovetsicashiyeeitari. Itimi apaniro Tasorentsisanori, te intimeji itsipa.

⁵ Ainiro timayetsiri anta inquitequi aisati aca quipatsiqui ijitasorentsitashitari atiri. Ainiro onaveta oshequi ijitasorentsitashiyetari, oshequi ivincatsaritepee.

⁶ Ayojeiti ainti itimi apaniro Tasorentsi, yora Apa. Iriotaque timacaquerori maaroni aneayetiri, aisati yovetsicajeitaquee arori. Irisati vetsicanontaincha. Timatsi aisati

Avincatsarite apaniro: yora Jesoquirishito, vetsicajeitirori maaroni timayetatsiri, vetsica-jeitaqueeri aisati arori.

⁷ Iro cantaincha ainiro ayemisantaririnte caari iojeitiro oca nocamantaquempiri. Peerani yameyataroni aparopee iquenquetsatacapiniveitaroni yovetsicashiyetari atiripee. Ariorica yoarini ivatsa yoyeetiniro, ijivetacarini ashisanori yora ijitasorensiyeetiri. Te iriovetaeji; ariorica iroashiteari meeca ivatsa yoyeetiniro yovetsiqueetiri, oshequi inquenqeshireanaquea, irijivetea te oncameetsateji iroyeari.

⁸ Ariorica ayeari ivatsa, tecatsi oncantimoneenteari Tasorensi. Ayearirica, tecatsi incantee ivatsa. Antitearirica, eiro yoameetsashireteetsi.

⁹ Cameetsani poyeari, iro cantaincha pantacairicari caari cameetsatatsi yora caari iotatsi.

¹⁰ Irineempirica caari iotatsi poaca anta ovancoqui ijitasorensiyeetiri, icanticari: "Ioti irinti. Nonquempeteari, noyeari ivatsa yoyeetiniro ijitasorensiyeetiri".

¹¹ Piotasanoti, ocameetsatantari poari. Irintiquea, te irioteji. Ariorica iroashiteari, oshequi inquenqeshiretanaquea: "Terica oncameetsateji nantaquerica. Otimi meeca nantane". Iriotaque piyemisantaririnte, icamimentaqueri Quirishito.

¹² Te oncameetsateji pantacayeri caari cameetsatatsi. Te iriovetaeji, piquenqeshire-tacairicari. Aisati irineacotaquempi Quirishito, te oncameetsateji pantaqueri. Tempa icantaquee: "Pinintajeiteri pishaninca, eiro pantacairitsi caari cameetsatatsi".

¹³ Irootaque nocantantimpiri: ariorica noaqueari ivatsa, irosati nantacanteariri noyemisantaririnte caari cameetsatatsi, eiro catsini noajaritsi ivatsa aisati. Nantacairicari caari cameetsatatsi.

9

Icantiri Pavoro: "Pinquempejeitena".

¹ Tempa ishinetaquena Tasorensi paitapeerica. Tempa itiancana. Tempa noneasanta-queri Avincatsarite Jesoshi. Tempa iriotaque matacaaqueenarori noquemisantacaaque-mpiri.

² Terica iriojeiteji itsipapee itiancaquena Tasorensi, iro cantaincha piotasanoejitaque avinti itiancaquena. Avirojei iotacajeiterine atiripee itiancana Avincatsarite.

³ Ainiro tseencaquenari, cantanari: "Te intianquempiji Tasorensi". Jero oca nocantava-queriri:

⁴ "Tempa ocameetsati ayea aisati ire.

⁵ Ariorica nonquenayetanaque nonquenquetsatacyeteri ashaninca; ontimeme nojina, tempa oncameetsateme nontsipatanaquearome. Aitaque imatapiniyetiro itsipapee itian-cane Avincatsarite, aisati irirentipee, aisati Sejashi.

⁶ ¿Apanirompa nompomerentsiventaro nompinatero noyeari? Aisati iquempetana Ver-enave, ipomerentsiventaro iriori yoari.

⁷ Noshiacontempiro: tempa ipinatapiniyeetiri soraro. Ariorica apomerentsitaro apan-quitiro ova, tempa aisati avaquearo. Ariorica ashentapinitiri avirapee, tempa irapinitiro otsomi". Irootaque nocantaqueriri yora tseencaquenari.

⁸ Noquenquetsatacotaquero anepinijeitaqueri, iro cantaincha ¿paita ocantiri isanque-natiniri Moishishi?

⁹ Jero oca ocantiri: "Eiro pipashicavantetiritsi vaca aticaitirori tirico itaquireantarori". ¿Apanirompa vaca iquenqeshiretiri Tasorensi? Teve.

¹⁰ Tempa aisati arori oshiacantaquee isanquenareni. Oamejeitaquee paitarica anta-jeitaqueri. Ariorica inquivanetaquero quipatsi impanquitantearori, icoaque yora quia-vaneteroneri iraarantayetajero oitsoqui, coajica. Aisati iquempetaca yora taquireeroneri, icoaque iraarantayetajero oitsoqui iriori.

¹¹ Pamene, oshiacantaca nopanquitiro pishirequi irineane Tasorensi. ¿Opomerentsiti-motimpimpa meeca pimpaarantenaro noyeari, noitsaare, paitapeerica?

¹² Ariorica pipaarantashiyetari itsipapee, tempa oncameetsateme pimpaarantaque-name narori. Iro cantaincha tecatsi pimpena. Piquemisantaquero peerani oca cameetsa-tatsiri nocamantacotiriri Quirishito. Oshequi opomerentsitimotaquenani, iro cantaincha te noncoyeniji nojocayempiro piquemisantaqueni, irootaque caari nocoacotantimpini paitapeerica.

¹³ Pamene. Yora antaveetatsiri ivancoqui Tasorensi yaapinitiro yoari anta, yoaro. Aisati yora oaqueneriri Tasorensi virantsipee anta yoapinitinirinta, yoaarantari ivatsa. Tempa piotiro.

¹⁴ Aisati oquempetaca, icanti Avincatsarite: "Cameetsa impaaranteeteri coiteimotariri yora quenquetsatirori oca cameetsatatsiri".

¹⁵ Oncameetsateme naarantitempirome paitapeerica, iro cantaincha tecatsi naitempi. Aisati te iro nosanquenatimentempi pimpantenari paitapeerica. Noquimoshiretaque tecatsi noncoacotempini; arioricame ayename notashe, eiro nocantimpitsi: “Pimpena noyeyari”. Ayenata, noncameta.

¹⁶ Ariorica nocamantacotiro oca cameetsatatsiri, tecatsi noncantea noshemete. Tecatsi noncantea nomajerete, aisati nonquencheshiretea: “Te nomateneri Novincatsarite icoacaavetaquenari”.

¹⁷ Noncoasanotericame nocamantanti, impinatename Tasorentsi. Iro cantaincha te noncoaveteaji, tempa iperanataquena.

¹⁸ ¿Paita meeca impinatenari? Oncameetsataqueme noncoacojeitempime, iro cantaincha te noncoyeji. Apatiro noveshireimentaquempi piquemisantajeiti.

¹⁹ Impinayeetename, nompeaqueame iratirite pinatenanemeri, incantapinitename paitapeerica nantapinitenerimeri. Iro cantaincha nopomerentsiventashijeitacari oshequi atiri noquemisantacantajariri.

²⁰ Ariorica nocarajeitaqueri jorio, noquempejeitacari iriori, noquemisantacantajariri. Ariorica nocarajeitaqueri quemisantirori isanquenare Moishishi, noquempejeitacari iriori, noquemisantacantajariri. Iro cantaincha te nompincatsatearaji meeca isanquenare Moishishi, te nompomerentsiventearaji.

²¹ Ariorica nocarajeitaqueri caari quemisantiro isanquenare Moishishi, noquempejeitacari iriori, noquemisantacantajariri. Te noavisajeroji icantiri Tasorentsi; noquemisantajeitaquero icantiri Quirishito.

²² Aisati, ariorica nocarajeitaqueri caari matasanotiro inquemisante, noquempejeitacari iriori, noquemisantacantacantajariri. Aitaque noquempejeivetacari maaroni atiripee noquemisantacantajeitacariri.

²³ Iro noquemtapinijeitantariri irioripee inquemisantajeitantarori oca cameetsatatsiri nocamantajeitiriri. Aisati narori, noveshireimantearo oca cameetsatatsiri.

²⁴ Pamene, tempa piojeiti ishijaitanaca oshequi shirampari iriojeitanteari janicarica anaacotantaintsineri. Iranaacotantaque apaniro yora shiasanotanainchari, ari impeeteri icanteetiro premio. Aisati pishiyeri avirori, pishiasanotanaque, paantearori premio. Ariorica pishintsiventero icoacaimpiri Tasorentsi, ari paaque.

²⁵ Irisati cavintsajanacha maaroni coatsiri iranaacotante ariorica irishiyee. Irootaque icavintsantari irisati irimatantearori irishiasanote iraatantearori amatseerentsi. Oshintsiti opatsai, iro cantaincha oca amatseerentsi ayeri arori, eiro opatsaitsi irointi, irootaque ocameetsantari ashintsiventasantero.

²⁶ Te nontipitipiyetanaque noshianaca, irointi catinca noshianaca nomatantearori nanaacotante. Pashini noshiantempiri capojavacaachari. Icapojavacaasanotaca iriotanteari janicarica anaacotantaintsineri. Oquempevetaca aisati nocapojasanotiri itsipa, te noncapojaiteashiteaji; noquearioventiniri Tasorentsi icoacaanari,

²⁷ Iro cantaincha te iriveshireempaji Tasorentsi. Te iriveshireimantajeitaraji oshequi yora atiripee, irootaque icamajeitancari anta caaraiteriqui.

10

Iquenquetsatacotiri jorioni, peerani; aisati yoametaqueri quemisantatsiri.

¹ Meeca, noyemisantaririnte, noncamantempi piotanteari jaoca icantajeitari jorioni anta caaraiteriqui, peerani. Otsimancapinijeitanaquerini mencori; aisati otencareajataqueneri incajare, nianqui yanijeitanaque pirijapatsariqui.

² Anta mencoriqui aisati incajarequi yoamejeitiri Tasorentsi iojeitancari iquemisanta-jeitaqueri peerani Moishishi.

³ Yoapinijeitacaro yoari ipapinijeitaqueriri Tasorentsi.

⁴ Irapinijeitanaquero nija ipapinitiriri, ora soquijatsiri mapiqui. Yoaqueneri Tasorentsi ora mapi, oshiacaventiri Quirishito, oijajeitanaqueriri.

⁵ Iro cantaincha te iriveshireempaji Tasorentsi. Te iriveshireimantajeitaraji oshequi yora atiripee, irootaque icamajeitancari anta caaraiteriqui.

⁶ Pinquencheshireajeitero oca piojeitanteari icoacaimpiri Tasorentsi. Piquempejeitari-cari jorioni: picoirocari caari cameetsatatsi.

⁷ Eiro piquemisantirotsi ijitasorentsitashiyetari. Aitaque imataarantaquero peerani. Osanquenatacani: “Isavicajeitaque atiri, yoajeitaca aisati iraaajeitaque. Impoiji icatiajeitanaca, imaticajeitanaque, omaninquejeitanaque”.

⁸ Queariyee, aquempejeitaricari arori: ineavintsataarantavacaaca caari yai, irootaque icamaarantancari 23,000 atiri aparoni quitaiteri.

⁹ Ineantaarantacari Avincatsarite, iriotanteari inquisheririca, irosati itiancantacanari oshequi maranque. Ari yatsicajeitaqueri, icamajeitaque. Queariya, ashiiricari arori, aneantaricari Tasorentsi.

¹⁰ Aisati icantimataarantanaqueri, irootaque ipoyerearantantacariri yora inampire Tasorentsi. Queariya, aquempejeitaricari arori.

¹¹ Iro imatantayetacarori oca, anquenqueshireanteari. Isanquenayeetironi, ayojeitan-tajari meeca. Irovetainja omoncaratajea impocantajeari Jesoquirishito.

¹² Meeca, ariorica picanti: "Noncantatijempani nainti nonquearioventero non-quemisante", nocantimpi narori: "Paamaventea, pantirocari caari cameetsatatsi".

¹³ Ainiro aquenqueshirejeitiro antero caari cameetsatatsi: ashi avajeitiro maaroni atiri. Iro cantaincha ariorica aventeari Tasorentsi, iramitacojeitee eiro antantarotsi. Eiro yamataviteetsi, iramitacotasanojeitee eiroquea antantarotsi caari cameetsatatsi aquenqueshirevetacari.

¹⁴ Irootaque, nonintane, noncamantantempirori oca: "Eiro catsini piquemisantirotsi yovetsicashiyeetari ijitasorentsitiri".

¹⁵ Ainiro piotantari, meeca pinquenqueshirejeitero oca nocantimpiri.

¹⁶ Ariorica ancanteri Tasorentsi: "Irove, Apa, aviro panarori oca nireri", tempa aquem-petavaapinijeitaca, aveshireimentajeitaro iriraja Quirishito yaparajatimentaquee. Aisati, ariorica acarajapinitiro tanta, tempa aquempetavaapinijeitaca, aveshireimenta-jeitaro ivatsa, aquenqueshirejeitiri icamimentajeitaquee.

¹⁷ Ari ocarati avapinijeitari tanta aparato. Aisati oquempeveta, oshequi anajeiveta, iro cantaincha amoncaratavacaajeitaca, ashanincajeitacari Quirishito: tempa apaniro ini irinti.

¹⁸ Pinquenqueshirejeitero yamejeitacari joriopee. Ariorica yoajeitacari ivatsa yoiniriri Tasorentsi, tempa ishanincatavacaajeitaca iriori.

¹⁹ Jero oca nosampitempiri: ¿Tasorentsimpa oca yovetsiqueeyetiri? Tempa yatsipetashita yoapinitiniro ivatsa.

²⁰ Jero oca noncamantasanotempiri. Ainiro yoaqueneri ivira. Iro cantaincha caari oni Tasorentsi yoaqueneri, irinti camaari. Te nonintacayempiji pishanincateari camaari.

²¹ Ariorica pirimenteri Avincatsarite, eiro pimatirotsi pirimenteri camaari aisati. Ariorica poimenteari Avincatsarite, eiro pimatirotsi poimenteari camaari aisati.

²² ¿Arimpa picoaque inquisaquempi Avincatsarite? ¿Panaacojeitirimpa pishintsitasanoti?

²³ Icanteeti: "Ocameetsati nantero paitapeerica caari itsaneacotee Jesoshi", iro cantaincha ariorica antashitearo paitapeerica, tecatsi amate, tempa antsipetashitearo. Eiro amitacojeiteetsi paitapeerica antashiyeveteari.

²⁴ Eiro piquenqueshireacotapinitirotsi picoayevetari avirori, irointi pinquenqueshireacotapiniteri icoayetiri itsipapee.

²⁵ Ariorica ipimantayeti ivatsa, poyeari. Eiro pisampitacoventiritsi: "¿Jaoca pairiri? ¿Irimpa yoyeetinirori ijitasorentsiyeetiri?" Ariorica pamananeri ivatsa, eiro pisampitacoventiritsi, pijitacari ariorica poyeari eiro picameetsashiretanajitsi.

²⁶ Ocantini Sanquenarentsi: "Irio Avincatsarite ashiyetarori quipatsi aisati maaroni timantajeitarori".

²⁷ Ariorica incajemempi caari quemisantatsi iroacayempi. Ariorica picoaque pijate, poajeiteariyea maaroni impajeitavaquempiri. Eiro pisampitacoventiritsi ivatsa, eiro pijititsi ariorica poyeari, eiro picameetsashiretanajitsi.

²⁸⁻²⁹ Iro cantaincha incanteempirica: "Jeri yoca ivatsa, yoyeetinirori ijitasorentsiyeetiri". Ari pinquenqueshireteri yora camantaquempiri: yaamaacari ariorica iroyeari, eiro icameetsashiretanajitsi. Irijiterica te oncameetsateji iroyeari, eiro poaritsi avirori. Avinti piovetaca tecatsi incantempi ivatsa, iro cantaincha pincavintsayeri yora caari iotatsi.

Naamaaca intime cantatsineri: "Ishinetana Tasorentsi noyearchi paitapeerica, ¿paita itsaneacotashitantanariri yora caari iotatsi?"

³⁰ Ariorica avapinijeitari, acantapinijeitiri: 'Irove, Apa, aviro panariri noayetari'. Ariorica ampasonquiteri, ¿paita icantimentanteeriri ayearirica?"

³¹ Ari noncamantempi. Ariorica poajeitea, aisati ariorica pirajeite; iro cantaincha paitapeerica pantayeteri, panteneri Tasorentsi icoacaimpiri, iriveshireimentantempiri. Impojiquea incantajeite atiri: "Tempa icameetsati Tasorentsi. Cameetsa isavicaajeitiri quemisantajeitiriri".

³² Pantacairicari caari cameetsatatsi yora jorio, yora caari joriotatsi, aisati yora quemisantajeitiriri Tasorentsi.

³³ Paitapeerica nantayetiri, noninti namitacojeiteri atiri. Te naro intacotajanchane narosati, irointi nintacotapinijeitari iriori itsipapee atiri. Iro nomatapinijeitantanariri iravisacojeitantajeari.

11

Antayetiri tsinane quemisantayetatsiri.

¹ Pimoncarajeitaquena, noquempetaca narori nomoncaratacari Quirishito.

² Piquenqueshiretapinitaquena, aisati piquenqueshiretiro maaroni noametaquemperi, irootaque noneacameetsatantaquemperi.

³ Jero oca, piotero: irio Quirishito cantajeitiriri atiri paitarica irantajeiteri; irio shirampari cantajeitiriri ijina; aisati irio Tasorensi cantiriri Quirishito.

⁴ Pamene yora shirampari, ariorica iquenquetsatacairi Tasorensi, aisati ariorica icamantanti, te irameteaji impashicainatea. Ariorica impashicainatea, te impincatsateriji Quirishito.

⁵ Irointiquea tsinane, ariorica oquenquetsatacairi Tasorensi, aisati ariorica ocamantanti, opashicainatapinitaca. Terica ompashicainatea, te ompincatsateriji ojime: oquempetimotacaró ameeitiro oishi.

⁶ Terica oncoyeji tsinane ompashicainatea, ari ocameetsati aisati ameeitirota oishi. Iro cantaincha ariorica opashiventaca ameeitiro, cameetsa ompashicainatea.

⁷ Te oncameetsateji impashicainatea shirampari: iquempvetacari Tasorensi, aisati ipincatsatiri. Aisati oquempetaca tsinane, opincatsatiri shirampari.

⁸ Ijivataqueri yovetsiqueetiri shirampari. Iro imerequi yovetsiqueeti tsinane; irointi omerequi tsinane, te irovetsiqueetero shirampari.

⁹ Yovetsiqueetiri peerani shirampari, impoiiji yovetsiqueetiniri tsinane. Irointi tsinane, tecatsi irovetsiqueetene.

¹⁰ Ocameetsati ompashicainatea tsinane iriotantajeiteari inampire Tasorensi opincatsatiri ojime.

¹¹ Pamene, te ontimashiteaji tsinane, te intimashiteaji shirampari. Icoaque Avincatsarite ancoiteavacayea.

¹² Iro imerequi shirampari yovetsicaqueri tsinane, aisati meeca otimapinitiri tsinane otomi. Irinti Tasorensi vetsicajeitiriri maaroni.

¹³ ¿Paita piquenqueshiretiri avirori? Ariorica onquenquetsatacayeri tsinane Tasorensi, ¿cameetsampa ompashicainareajea?

¹⁴ Te amejiteaji anquishipejeite arori shirampari. Eirome apashiventame intimeme quishipenti.

¹⁵ Irointi tsinane, tempa aneacameetsajeitiro oquishipetirica oishi: irootaque opashicainatari.

¹⁶ ¿Timatsimpa coatsiri impiatsatena? Noncamantempi: nametacaró oca nocamantaquemperi, aisati yamejeitacaró maaroni quemisantajeitiriri Tasorensi.

Yoametantiro yoimentapinijeitari Jesoshi.

¹⁷ Timatsi pashini noncamantempi. Te noneacameetsatero oca pantajeitiri ariorica papatojeita: te oncameetsateji, te oameetsashirejeitempiji.

¹⁸ Nojivate noncamantempiro oca. Icamanteetana ariorica papatojeita piquemisantantapinitari, picantavacaajeita. Naamaavetaca queario icamanteetana.

¹⁹ Picantavacaajeitaca piojeitancariri janicarica quearioventasanotirori iquemisanti.

²⁰ Ariorica papatojeita, poajeiveta, iro cantaincha te poimentajeiteariri Avincatsarite.

²¹ Ariorica poapinijeita, paanontajeitanaca poari avirori, poapitsajeitacari itsipapee. Te poyeavacaavaqueaji. Itasheanaque aparopee, ishinquitana itsipapee.

²² ¿Paitasa pantajeitiri? Tempa otimi pivanco poanteari, piranteari. ¿Pipincaquerimpa yora pocashitiriri inquemisanteri Tasorensi? ¿Pishirontimentarimpa yora caari ashitaaran-tacha? ¿Jaocampa noncantempiri? ¿Ariompa noneacameetsatempi? Teve.

²³⁻²⁵ Irio Avincatsarite ometanarori oca novaquempirica. Peerani, tsiteniriqui, ari yaaquero Avincatsarite Jesoshi tanta. Icantiri Iriri: "Irove, Apa, aviro panarori oca noyeeari", impoiiji icarajaquero. Icantanti: "Jero oca tantaca: ariorica poapinitearo, pinquenqueshiretapinijeitena. Tempa narotaque camimentajeitempineri". Ari yoajeitaca. Impoiiji yaaquero aisati iramento. Icantajeitiri: "Jero oca oja, ariorica pirapinijeitero, pinquenqueshirejeitena, piotasanajeite amparajamentajeitempi niraja pavisacojeitan-tajeari. Ariorica noncamimentempi, piotanaque eiro namatavitimpitsi, nomatempiro maaroni nocamantaquemperi". Irosati yanancantana ja tsiteniriqui, irosati yaanteetacari.

²⁶ Ari meeca poapinijeitearo, pirapinijeitero, poametantapiniteariri atiri icamimenta-jeitaquee Avincatsarite. Pimatapinijeitero, irosati impocantajeari.

²⁷ Ariorica poimenteari, ariorica pirimentero, pinquenqueshireempa: eiro pan-tashitarotsi. Ainiro irantane yora antashitarori: itseenquiro ivatsa Avincatsarite, itseenquiro iriraja.

²⁸ Pijivate piotacotea avisati, otimirica pantane. Piotacotearica te aneeroji pantane, ari poyearo, aisati pirero.

²⁹ Te oncameetsateji avashiveetearo, aisati irashiveetearo. Terica anquenqueshire-tasanoteri Avincatsarite, tempa avamempeacaró, iramempeacaró: ontime antane.

³⁰ Irootaque pojoquiitaarantacari, aisati caari pishintsiyetanta. Irootaque aisati icamaarantacari pishanincapée.

³¹ Ariorica ayotacotea arosati otimirica antane, ocameetsati ajivate anquenqueshireempa ancameetsatantajeari; impojiquea, ariorica avajeitimenteari Quirishito, eiro yoasanqueteetsi Tasorentsi.

³² Tempa aisati ocameetsati incantacoventee Avincatsarite, aisati iroasanquete, oncanteataquea eiro ajatantatsi Sharincaveniqui. Te incoacaajeiteji antsipajeiteari maaroni yora tseencantatsiri.

³³ Meeca, noyemisanrarinte, ariorica pampatojeitea poimentajeiteari Avincatsarite, poyeavacaavaqueatsita.

³⁴ Ariorica pintasheasanotaque, pijivate poyea anta pivancoqui. Eiro papatotashijeitatsi pinquemantearori poyeari: otimicari pantane. Ariorica nareetempi nontsoteapeempiro, noameyetempiro pashini.

12

Iquenquetsatacotiro omatacaajeitaqueeri Ishire Tasorentsi.

¹ Meeca, noyemisanrarinte, noameyetempiro maaroni omatacaajeitaquempiri Ishire Tasorentsi. Te noncoyeji pincomijeitearo, irointi nocoaque piojeitavaquero.

² Piojeiti peerani te pinquemisanrajeiveiteani. Piquemisanashyveitaroni povetsicas-hiyetari, pijitasorentsiivetari. Tempa omasontijeitaque iroori.

³ Nocoaque piojeitavaquero oca. Ariorica oneaveetacaqueri Ishire Tasorentsi atiri, eiro icantitsi: "Te incameetsateji Jesoshi". Aisati oquempetaca, eirome oametirime, eiro icantime: "Irio novincatsarite Jesoshi".

⁴ Onashiyetaca omatacaajeitaqueeri, iro cantaincha apaniro oni Ishire Tasorentsi.

⁵ Onashiyetanaca oca antajeitiniriri Avincatsarite, iro cantaincha apaniro ini irinti.

⁶ Onashiyetaca antajeitaqueneriri, iro cantaincha apaniro ini irinti Tasorentsi. Tempa iriotaque matacaajeiteerori maaroni.

⁷ Oamejeitaquee Ishire intacotavacantajeitacari.

⁸ Iotacaayetaqueri aparopee, cameetsa iquenquetsatantacari; irio itsipapee oameta-queri, cameetsa yoametantaqueerori ioyetiri. Ocarati oameyetiriri apaniro: ora Ishire Tasorentsi.

⁹ Irosati matacaayetiriri itsipapee ishijeitacaro icantayetiri Tasorentsi; itsipapee omatacaqueri yoavisacoyetiri mantsiaripee.

¹⁰ Irosati matacaayetiriri itsipapee itasoncantayeti. Pashini omatacaqueri icamantan-tayeti. Pashinipee iotacaqueri ioyetavaqueri quenquetsatacaantatsiri: iriorica quenquetsatacairiri camaari, irompa terica irio. Pashini, omatacaayetiri ineanatashiyetaro pashinipee neantsi. Pashini aisati omatacaayetiri yovaajeenero ora icantaqueeri.

¹¹ Onashiyetaca oamejeitaqueri, iro cantaincha aparoni oni oamejetiriri: irootaque Ishire Tasorentsi. Paitarica onintacaayetiriri, irootaque oameyetiriri, omatacaqueri.

¹² Pamene: apaniro onaveta avatsa, iro cantaincha ainiro aiti, aco, aqui, ayempita, maaroni. Oshequi onaveta, iro cantaincha apaniro onaveta avatsa. Aisati iquempeta iriori Quirishito.

¹³ Apaniro onaveta Ishire Tasorentsi. Otasoncavacantajeitaquee, irootaque ashanin-catavacajeitantacari, oquempetacaajeitaquee apaniro anajeiti. Acarajeitiri jorio, itsipapee caari joriotatsi; itsipapee pimantaari inaveta, pashinipee te impimanteeteriji. Quiso oajeitaquee Ishire Tasorentsi: apaniro oni.

¹⁴ Apaniro oni avatsa, iro cantaincha timatsi aniantari, ajiricantari, amenantari, aquemantari, oshequi.

¹⁵ Te oncanteji aiti: "Te naro iraco, te naro ivatsa iriori". Tempa irootaque aiti avatsa, te onashiteaji.

¹⁶ Te oncanteji ayempita: "Te naro iroqui, te naro ivatsa iriori". Pineaquero, tempa irootaque ayempita avatsa, te onashiteaji.

¹⁷ Ioteamerica avatsa apajaquironi, ¿jaoca ancanteameri anquemanteameri? Ioteamerica aquemantari, ¿jaoca ancanteameri anquemeencanteameri?

¹⁸ Iro cantaincha cameetsa yovetsicayetaquero Tasorentsi avatsa: aquemantari, amenantari, aniantari, maaroni. Paitarica icoiri, imayetaquero.

¹⁹ Iotaquearicame aqui anaqueme, ¿jaoca ancanteameri?

²⁰ Apaniro oni avatsa, iro cantaincha otimi aiti, aqui, ayempita, aco, maaroni.

²¹ Tecatsi oncantea aqui oncantero aco: "Te pincanteji". Aisati aito, te oncanteroji aiti: "Te nonintempiji". Teve, te oncanteroji.

²² Timatsi avatsapeequiniri paitapeerica, ajivetaro otimashita, iro cantaincha ocameetsatanotaque otimayeti.

²³ Aisati oquempeta, ainiro apashiventacari, iro cantaincha ocameetsati onttime. Apashiquiro caari acoi onconijate.

²⁴ Te ampashiqueroji caari apashiventaca. Iro cantaincha cameetsa yovetsicayetaquero avatsa yora Tasorensi. Ocameetsati ontimajeite ora caari aneacameetsaveta.

²⁵ Imataquero oca oncavintsavacaajeitanteari aiti, aqui, maaroni. Tecatsi oncantajeitea onquisavacaajeitea.

²⁶ Ariorica ocatsitaque aparo, ari aquemaquero maaroni avatsapeequi. Tecatsirica oyerone aparo, tempa aquimoshireventajeitaquero.

²⁷ Avirojeitaque ivatsa Quirishito. Avirojeitaque iiti, iraco, iroqui, iyempita, maaroni.

²⁸ Ari acarajeiti oshequi quemisantajeitiriri Tasorensi. Ijivataque Tasorensi itiancaqueri aparopee iquenquetsati. Pashini itiancaqueri icamantanti. Pashini itiancaqueri yoametanti. Impoji pashini itiancayetaqueri itasoncantayetaque, pashini yoavisacoyetiri mantsiaripee, pashini intacotanta, pashini icantayetiri quemisantatsiri paitarica irantayeteri, pashini ineanatashiyetaro pashinipee neantsi.

²⁹ ¿Itiancajeitaqueempa anquenquetsate maaroni? ¿Acamantantajeitimpa maaroni? ¿Avametantajeitimpa maaroni? ¿Atasoncantajeitimpa maaroni?

³⁰ ¿Avisacojeitirimpaa maaroni mantsiaripee? ¿Amajeitaquerompa maaroni aneanatashiyetaro otsipapee neantsi? ¿Amajeitaquerompa maaroni avaaqueneri ashaninca oca icantiriri?

³¹ Iro cantaincha cameetsa pincoacotasoteri Tasorensi irimatacayempiro cameetsatatsiri. Meeca noametasanotempiro cameetsatanotatsiri.

13

Cameetsa anintavacaajeitea.

¹ Ariorica amatero aneanatashitearo otsipapee neantsi, ariorica amatero anquemero irineane inampirepee Tasorensi, iro cantaincha eirorica anintajeitiri itsipapee, tempa antsipetashijeitaquearo, ayotashiyevetearo aneaveete. Aquempetarocari campana, ocantashita, teeiin, teeiin. Aquempetarocari tamporo ocantashita, tin, tin, tin.

² Ariorica ayotitayetearo caariquera ineeti, ariorica ayotitayetearo maaroni imanayevetacari Tasorensi, ariorica amayero maaroni ioyetiri atiri, ariorica anquearioventero anquemisantasanoteri Tasorensi, irootaque amatantearori avaaayetajero toncaaripee: iro cantaincha eirorica anintasanotiri itsipapee, antsipetashijeitearo ayotashivetearo maaroni, eiro acameetsatitsi.

³ Ariorica ampashiyeteari ashinoncaincari maaroni timimojeiteeri, ariorica anquearioventeneri Tasorensi anquenquetsatacoteri, irootaque inquisanteeri atiri, intaimentee-tanteerori; iro cantaincha eirorica anintasanotiri itsipapee, antsipetashijeitearo maaroni, tecatsi amatimateneri Tasorensi.

⁴ Ariorica anintasanojeitiri itsipapee, eiro ashintsititsi anquisheru, irointi aneshinoncateri, eiro aquishmentiritsi imayetaqueri iriori, eiro ashemetitsi.

⁵ Ariorica anintasanoteri itsipapee, eiro antirotsi caari cameetsayetatsi apashiventacari, eiro antirotsi acoasanotiri arori, irointi anteneri inintacayeeri iriori; eiro ashemaritsi, eiro aquenqeshiretapiniriti caari cameetsatatsi yantayetiri.

⁶ Ariorica aninteri itsipapee, eiro aveshirementarotsi caari cameetsatatsi, irointi aveshireimenea queariotasnotatsiri,

⁷ eiro aperataritsi, eiro aamaaritsi, eiro atseenquiritsi, irointi ancavintsayeri aisati intacoteari.

⁸ Eiro acantatiani ancamentante, eiro acantatiani aneaveetashitearo otsipapee neantsi. Eiro acantatiani ayotashivetearo paitapeerica, irointiquea ancantaitatitempani anintavacaajeitea.

⁹ Te ayotasanojeiveteaji, te ancamentantasanojeiveteaji.

¹⁰ Coajica omoncarataquearica cameetsatanotatsiri, eiro acoajirotsi oca cameetsayevetachari.

¹¹ Peerani ajananequiveitani, aquempeveitani jananequi aneaveetashita, ayotashiveta capichaji, aquenqeshireaveta capichaji. Antearitantapaacari, ajocanaquero ajananequiveitani.

¹² Meeca oquempetaca amenaatocotaqueri Tasorentsi amenaarontsiqui, te inconi-jatasanojeji. Coajica amenavorotasanotapeeri inquitequi. Meeca ayojeivetari capichaji, coajica ayotasanojeitapaajeri, oquempetaca iotasanoataquee meeca.

¹³ Meeca acantatiani aquemisantajeitaqueri Tasorentsi, ayojeiti eiro yamataviteetsi, anintavacaajeitaca. Iro cameetsatasanotaintsiri anintavacaajeitaca.

14

Iquenquetsacotiri neanatashiyetarori otsipapee neantsi, aisati camantantatsiri.

¹ Pincoasanojeite pinintajeiteri itsipapee. Aisati pincoasanotero pimatero maaroni omatacaaqueeri Ishire Tasorentsi, pincamantantajeiteariri itsipapee.

² Ainiro atiri omapocashitacari ineanatashitanacaro otsipapee neantsi. Te inquemavaqueriji atiri, irintiquea Tasorentsi. Tecatsi quemavaquerone icantiriri. Omanavetaca oca oneanatacairi Ishire Tasorentsi.

³ Iro cantaincha yora oametantirori irineane Tasorentsi, yoametaqueri atiri, iveshireacaacari, iquimoshiretaacaqueri.

⁴ Yora neanatashitarori pashinipee neantsi yoametaja irisati, iro cantaincha yora camantantatsiri yoamejeitiri maaroni iyemisantaririnte.

⁵ Nocoaveta pineanatero otsipapee neantsi, iro cantaincha nocoasanoataque poametantero irineane Tasorentsi. Oshequi imataque irinti camantantatsiri: iotacaajeitiri iyemisantaririnte. Intimerica ovaayeeroneri irineane yora neanatashitachari, ocameetsati aisati. Irirojeitavaquero quemisantatsiri, inquemavaquero.

⁶ Pamene, noyemisantaririnte: noneanatashitapeempirome otsipasato neantsi, tempa nantsipetashitaquearome. Nocoapinitaque namitacajeitimpi, tempa irootaque noca-mantantampirori caari pioti, irootaque niotacaantaquempirori. Tempa nocamantimpirori irineane Tasorentsi. Tempa noametaquempi.

⁷ Te aneeji shiovirentsi, jaaviquirentsi, caari oni atiri. Ariorica osamejencataque, joa, joa, joa, te ayoteji paitarica oncantemeri.

⁸ Pamene, itioyeetiniri soraro iriotanteari irimanatea, tiii, tiii. Iro cantaincha ariorica osamejencataque, ¿ariompa iriojeitaque irovsicajeitaquea irimanatanteari?

⁹ Aisati piquempetacaro. Ariorica pineanatashitearo caari iquemeetavaque, vero, vero, ¿jaoca incanteari inquemanteetavaquearori pincanterimeri? Tempa ari pantsipetashitaquearome pineaveeteme.

¹⁰ Aca quipatsiqui ainiro oshequi neantsipee. Onashiyetanaca, iro cantaincha te incomi-jencatearoji yora ashitarori irineane.

¹¹ Iro cantaincha terica anquemavaquero irineane neanavetachari, te irishanincateeeji, aisati te ashanincateariji iriori.

¹² Tempa picoajeitaque omatacaajeitimpi Ishire Tasorentsi, ari pincoasanoataque meeca omatacaayempi poametasanoteri piyemisantaririnte.

¹³ Irootaque noncamantantampirori oca: ariorica pineanatero neantsi caari ioyeiti, iro cantaincha pincanteri Tasorentsi iramitacotempi pimatantearori povaayeneri piyemisantaririnte picantavetacariri.

¹⁴ Ariorica noneanatanteri Tasorentsi neantsi caari noneanatapiniti, noquenquetsacaavetacari noshirequi, iro cantaincha te nioteroriji noncantayeterimeri.

¹⁵ ¿Paita nanteri narori? Ariorica nonquenquetsacayeri Tasorentsi, nonquenquetsacayeri noshirequi, iro cantaincha oncameetsate aisati nonquenqueshiretero paitarica noncantariri. Ariorica nompampoyeaventeri Tasorentsi, nompampoyeaventeri noshirequi, iro cantaincha ocameetsati aisati nonquenqueshiretero paitarica nompampoyeaventeriqueriri.

¹⁶ Pamene, ariorica pinquenqueshiretaquea: "Icameetsatasanoti Tasorentsi", iro cantaincha pincomitsatearorica pineane, ¿jaoca incanteari inquemantajeitearori yora iroaquera tsipajeitimpi? Eiro iotavaquerotsi paitapeerica pincanterimeri.

¹⁷ Ariorica pimpasonquitasanoteri Tasorentsi, iro cantaincha terica onconijateji, tecatsi pincantea poameteri itsipapee.

¹⁸ Nanaacojeitaquempi noneanatashitaro neantsi caari ioyeeti, irootaque nopasonquitanteriri Tasorentsi.

¹⁹ Iro cantaincha ariorica ampatotimentajeiteari Tasorentsi, nonintasanotaque noneanatanteraro noquemasanotaqueri, noametanteariri itsipapee. Ariorica noneanatashitearome oshequi neantsi caari iquemeeti, eiro ocameetsatime. Nantsipetashitearome, vero, vero. Cameetsataque noneanatero aparopee neantsi iquemajeitakeri.

²⁰ Meeca, noyemisantaririnte, eiro pishiiritsi jananequi: pinquenqueshiretasanotanaquea. Eiro catsini piquenqueshiretirotsi caari cameetsatatsi: pinquempetajeari iroaquera timatsi, te inquenqueshireteroji iriori. Iro cantaincha ariorica pinquenqueshiretasanotanaquea, cameetsa pinquempeteari antearipee, timatsiri iotantari.

²¹ Jero oca ocantiniri Sanquenarentsi: "Icanti Avincatsarite: "Nocantavetacari joriopee, iro cantaincha te inquemisantenaji. Coajica nontianqueneri itsipapee atiri, nashitaroji irineane, incamantaveteari, iro cantaincha aisati iriori, eiro iquemisantavaquenatsi" ".

²² Irootaque noncamantantempirori oca: ineanatashiyeetacaro otsipapee neantsi iriojeitanteari caariquera quemisantatsi yoametaquee Tasorentsi. Te irineanatashiyeeteneri quemisantatsiri iroameteri. Ocameetsati avameteri quemisantatsiri irineane Tasorentsi. Tequera avameteriji irinti caari quemisantatsi: tequera inquemeroji.

²³ Pamene, noncamantantempiro: pampatotimentajeitarica Tasorentsi, ariorica pineanatashijeitaquearo otsipapee neantsi caari iojeiti: vero, vero. Jeri inqueapee itsipapee atiri, caari quemisantatsi; tempa incantapaaque: "Jo, pamenerite yoca, itsaviataque".

²⁴ Iro cantaincha ariorica poametante aneanequi, ari inquemapaquero caari quemisantatsi, ariorica itsipapee atiri. Inquemapaquempi, iriotanteari te incameetsateji, otimi irantane. Onquenqueshiretacayeri maaroni iquemajeitapaqueri.

²⁵ Inquenqueshiretanajero maaroni imanavetacari ishiquei. Intiyeroashiteari Tasorentsi, impincatsateri. Incantempi: "Queario, itsipatasanojeitaquempi Tasorentsi".

²⁶ Pineaquero, noyemisantaririnte. Ariorica pampatojeitea, cameetsa impampoyee aparo, iroametante itsipa, incamantante pashini, itsipa irineanatero neantsi caari pique-majeiti, pashini irovaajeneri quemisantatsiri icantaqueriri. Iro cantaincha, paitapeerica pantajeiteri, pantero poamejeitanteariri piyemisantaririnte.

²⁷ Intimerica neanantantearoneri neantsi caari iquemeeti, cameetsa irineanate ariorica apite, ariorica mava: eiroquea oshequi. Eiro itsipatavacaaajeitatsi irineanajeite. Irijivate aparo, impoiteri itsipa. Cameetsa intime ovaajenerine pishaninca icantaqueriri.

²⁸ Terica intime ovaajenerine icantiriri, cameetsa irimajeretanaque, eiro ineanatashijeitatsi apatojeitainchari, irointi cameetsa irineanashirete ishiquei, aisati irineanateri Tasorentsi ishiquei.

²⁹ Cameetsa iroametantero irineane Tasorentsi, incarataque camantantatsineri apite, ariorica mava. Irintiquea itsipapee, inquenqueshiretasanoeiteero icamantayetaqueriri.

³⁰ Ariorica iroameteri Tasorentsi pashini savicatsiri caari iojeiveta, ocameetsati irimajeretanaque. Ariorica irivecarataquero yora jivatatsiri iquenquetsati, ari impoiji iriori iroametante.

³¹ Cameetsa incamantacotero irineane Tasorentsi apaniro, impoiji aparo pashini, iriojeitanteari maaroni, inquimoshirejeitanteari.

³² Yora camantantirori irineane Tasorentsi, cameetsa irimajerete, ariorica ijivataque ineanataque itsipa.

³³ Te incoyeji Tasorentsi onconoanatavacaaeye aneaneppee tecatsi anquemantavaquearori, irointi icoaque amajerejeitanaque anquemajeitantearori.

Ariorica yapatotimentapinitari Tasorentsi maaroni yoameetsajeitiri, amejeitaca
³⁴ tsinane omajerejeitaque. Te oshinetanteaji oneanate. Cameetsa onquemisante, tempa aitaque ocanti Sanquenarentsi.

³⁵ Ocoirica iote paitapeerica, cameetsa osampiteri ojime anta ovancoqui. Te oncameetsateji oneanate pampatotimentajeitarica Tasorentsi.

³⁶ Pamene, te avirojei intearone poametantajeiteero irineane Tasorentsi. ¿Pijitaquempa apaniro piotiro?

³⁷ ¿Picarajeitirrimpa camantantatsiri? ¿Picarajeitirrimpa quemisantirori Ishire Tasorentsi? Nocoaque iriotavaquero iriori oca: oca nosanquenatimpiri, irootaque irineane Avincatsarite.

³⁸ Eiriorica iquemisantirotsi pishaninca oca, eiro piquemisantajeitiritsi iriori.

³⁹ Meeca, noyemisantaririnte, pincoasanojeite pincamanteri itsipapee irineane Tasorentsi. Iro cantaincha eiro pitsaneacotaritsi irineanayeetero neantsi caari piquemajeiti.

⁴⁰ Poameetsatero paitapeerica pantayeteri. Te oncameetsateji pineanaveete: pimajerejeite maaroni, pinquemisanteri aparo neanatsineri.

¹ Meeca, noyemisantaririnte, nonquenqueshiretacaajempio aisati nocamantitaquem-piri: tempa ocameetsataque, piquemisantitavacaro; irosati meeca picanta piotasano ti queariotaque, te ontseeantsiteaji.

² Irootaque oavisacojeitempineri, ariorica pincantatiyempani pinquemisantasanotero. Iro cantaincha ariorica pinquemisantamempeashitearo, eiro oavisacotimpitsi.

³ Nojivati novaquempio oca icamantiteetaquenari: ainiro antajeitaqueri caari cameetsatatsi, irootaque icamimentantajeitaqueeri Quirishito. Imoncarataquero ocamantacotitariniri Sanquenarentsi.

⁴ Yoiminguetaqueri omoroqui. Ocarataque mava quitaiteri itinaantanajari aisati. Imoncarataquero aisati ocamantacotitariniri Sanquenarentsi.

⁵ Inijaacari Sejashi, aisati inijaajeitajari yora iroamereni, icarataque 12.

⁶ Impoiji inijaajeitajari oshequi ayemisantaririnte, yapatotavacaajeita. Yanaaquero 500 neajeitaqueriri. Aneatsiquera oshequi, iro cantaincha icamaaranataque aparopee.

⁷ Impoiji inijaajari Santiaco, aisati inijaajari maaroni itiancaneepe.

⁸ Impoitajana narori, inijaajana. Oquempvetaca impoiji notimaque.

⁹ Itiancaquena, iro cantaincha te nonquempeteariji itsipapee itiancane, te noncameet-sateji: tempa noquisaveitarini maaroni quemisantariri Tasorentsi.

¹⁰ Ineshinoncataquena Tasorentsi, irootaque noquempetantajari meeca. Te irantsipetashiteaji ineshinoncataquena. Ipomerentsiventajari Tasorentsi itsipapee yora itianquiri, iro cantaincha nanaacojeitajiri nainti, nopomerentsiventasanotajari. Te nomatashitearoji narori, irointi ineshinoncataquena, nomatantacarori.

¹¹ Ariorica noquenquetsatacaajeitimpi, iriorica itsipapee itiancane quenquetsataca-ajeitimpiri: te ompashiniteji. Aitaque omoncaratavacaaca nocamantajeitimpiri: ariorica piquemisantaquero, aitaque pavisacotaje.

¹² Pamene, nocamantajeitaquempi: "Icamaque Quirishito, itinaanaja aisati". Piquemisantajeitaquena. ¿Paitasa picantaarantacari te intinaayeji camayetaintsiri?

¹³ Eirome itinaajame camaintsiri, eirome itinaajame iriori Quirishito.

¹⁴ Eiroricame itinaajame, natsipetashitacarome nocamantantayeti, patsipetashitacar-ome avirori piquemisantajeitaque.

¹⁵ Aisati piotaqueme notseeyacotacari Tasorentsi. Pineaquero, tempa nocamantacota-queri: "Yoitinaajiri Quirishito", iro cantaincha eirome itinaajame camayetaintsiri, eirome yoitinaajirime iriori.

¹⁶ Eirome itinaajame camaintsiri, eirome itinaajame Quirishito iriori.

¹⁷ Eirome itinaajame, patsipetashitacarome piquemisantajeitaque; ainirome ontimi-motempime caari cameetsatatsi,

¹⁸ aisati incanteanime irijatapiniteme Sharincaveniqui camajeitatsiri, aisatime iriori yora quemisantajeivetariri Quirishito.

¹⁹ Aisati arori, eirome atinaajame, atsipetashitacarome aquemisantavetacari meeca Quirishito, avashinoncaasanotaqueame, anaacojeitaquerime maaroni atiri ashinonca-ajeitachaneri.

²⁰ Iro cantaincha itinaasanotaja Quirishito, ijivajeitaqueri maaroni pashini camajeitatsiri.

²¹ Timatsi yantaqueri yora Aran, irootaque acamajeitantacari meeca. Aisati iquem-petacari, timatsi yantaqueri iriori itsipa shirampari, yora Quirishito, irootaque antinaa-jeitantajeari.

²² Ashanincajeitacari Aran, irootaque acamajeitantacari. Aisati oquempetaca, ashanin-cajeitacari Quirishito, irootaque iroaneajeitantajeari.

²³ Ijivajeitaquee iriori. Impoiji, ariorica impocaje, intinaajeitanaje maaroni quemisan-tajeitiriri. Aitaque oncanteari: ariorica omoncarataquea, antinaajeitanaje, maaroni.

²⁴ Impoiji irivecarayero maaroni, impoyereajeri Quirishito maaroni caari pincatsari: pincatsarijeivetachari, jivatacantantavetachari, savicacaantatsiri, maaroni. Incanteri Tasorentsi: "Meeca, Apa, pimpincatsariventer avinti maaroni timajeitatsiri".

²⁵ Impincatsariventante Quirishito irosati intsoncajeitantajeari maaroni quisajeive-tacariri.

²⁶ Impoiji eiro icamajitsi aisati atiri.

²⁷ Ocantini Sanquenarentsi: "Ipeaqueri Tasorentsi Quirishito pincatsariventiriri maaroni timajeitatsiri". Tempa ocanti: "Maaroni timajeitatsiri", iro cantaincha eiro ipincatsariventiritsi Iriri: tempa iriotaque peaqueriri pincatsari.

²⁸ Coajica aitaque iranaacojeiteri Quirishito maaroni timajeitatsiri, impincatsariventaj-eiteri maaroni. Apaniro irinti Iriri, tecatsi incanteri impincatsariventer irinti. Incanteri: "Apa, aviro nopincatsati, panaacojeitana maaroni, pipincatsaritanotaque avinti". Queario, Tasorentsisanori ini irinti, pincatsarisanori ini.

²⁹ Pamene, timatsi vaotisatimentariri camaintsiri. Eirome itinaajame camaintsiri, tempa irantsipejeitearome.

³⁰ Aisati, eirome atinaajame, tempa nantsipetashitearome nopomerentsiventapinitaro noquenquetsati.

³¹ Piquemisantajeitaqueri Avincatsarite Jesoquirishito, irootaque noveshireimentanta-jeitaquempiri: queario oca nocantaquempiri. Aisati oquempetaca, queario oca noncamantempiri: te nioteji jaocarica oncarate iroimenteetenaro noquenquetsati. Maaroni quitaiteri timatsi coavetachari iroimentenaro.

³² Anta Ejesoqui iquisasanotaquena savicayetatsiri, oshequi opomerentsitimotaquena. Oquempetimovetaquena noipivajiri maniti oyenanemeri. Oshequi opomerentsitaca. Pamene, eirome atinaajame, tempa nantsipetashitaquearome. Eirome atinaajame, eiromo aquenqueshiretirime Tasorensi: tsame avajeitea, tsame ashinquirijeitea; impoiji anca-maque, ari acarati.

³³ Eiro pishinetiritsi tseencantatsiri iramatavitempi. Tempa queario icanteeti: "Eiro quiso poiritsi tseencantatsiri: yantacaimpirocari caari cameetsatatsi".

³⁴ Pinquenqueshireempa, eiro papiitajirotsi aisati caari cameetsatatsi. Picaratapini-jeitiri caari iojeitiri Tasorensi: ¿paíta caari pipashiventanta?

³⁵ Ariorica irisampitee tseencantatsiri: "¿Jaoca incanteari intinaantanajeari camaintsiri? ¿Jaoca oncanteari ivatsa, ariorica intinaaje?"

³⁶ Te inquenqueshireempaji. Eirorica opanquitatsi oitsoqui quipatsiqui, eiro oshio-quitisi.

³⁷ Ariorica ampanquitero oitsoqui, te ampanquitacoteroji ovatsa, ominca, oshi, maaroni: atsatairo apanquitiro oitsoqui. Ariorica ampanquitero arori tirico, ariorica pashini oitsoqui,

³⁸ iro cantaincha itimacaaquero Tasorensi ovatsa, ominca, oshi, maaroni; imataquero inintacaaquerori. Tirico oitsoquitacairo oitsoquisanori iroori. Caniri otimi ovatsasanori iroori. Aisati oquempejeitaca maaroni shiocayetatsiri.

³⁹ Te irimoncaratavacaajeiteaji maaroni timajeitsiri. Ainiro atiri, inashita iriori poshiniri. Inashita aisati vanquitachari. Inashita aisati shima.

⁴⁰ Ainiro timatsiri quipatsiqui, aisati timatsiri inquitequi. Icameetsajeitaque, iro cantaincha inashiyetaca, te irimoncaratavacaajeiteaji.

⁴¹ Iporei catsirincaiteri. Inashita yora cashiri, iquitasanteti irinti. Inashita aisati yora impoquiro, iquitaporoquiti. Aisati inashijeitaca impoquiropee: aparo quitasantevetachari, yorari pashini, te.

⁴² Aisati ashiaquero arori, ariorica antinaanaje: eiro aquempetajatsi meeca. Intijeete, ari ampatsaajeitanaque. Antinaajerica, eiro apatsaajitsi aisati.

⁴³ Te oncameetsateji oca intijeeterica, iro cantaincha oncameetsatanotaque tinaajan-cheri. Meeca te ashintsiteji, irompa antinaanajerica, ashintsitanotanaje.

⁴⁴ Oca avatsa itijeetiri, tempa ametacaró quipatsi atimajeitantaro. Ariorica antinaanaje, onashitanajea avatsa, ametantapaajejarori asavicajeitapaaje anta inquitequi. Otimi avatsa quipatsiquiniri, ontimaje coajica aisati savicajantsineri inquitequi.

⁴⁵ Ocanti Sanquenarensi: "Aneatsiri inaveitani yora jivataintsiri shirampari, yora Aran". Irinti yora impoitiriri, yora Quirishito, oaneantasanotatsiri ini, ainiro itasorenca irinti.

⁴⁶ Tempa ojvataque meeca oca avatsa asavicantacari aca quipatsiqui; coajica ontimaje avatsa iroaqueratajantsineri, savicajantsineri inquitequi, irointi.

⁴⁷ Iponeaca yora jivataintsiri Aran quipatsiqui, oshanincataro ivatsa quipatsi. Yora apitetapaintsiri iponeaca inquitequi.

⁴⁸ Isavicaveitani quipatsiqui Aran, aisati aquempejeitacari maaroni timajeitsiri aca quipatsiqui. Isaviqui inquitequi itsipa, aisati anquempejeiteari maaroni jatatsineri inquitequi.

⁴⁹ Aisati oquempetaca: ashiajeitaquero meeca ivatsa yora quipatsisati, coajica ashia-paajero ivatsa yora inquitesati.

⁵⁰ Irootaque, noyemisantaririnte, noncamantantempirori oca: tecatsi oncantea oca avatsaca ojate anta ipincatsaritinta Tasorensi, tempa ompatsaye. Tecatsi oncantea ojate anta te impatsaajeitenta savicajeitatsiri.

⁵¹ Pamene, noncamantempiro oca manavetachari: eiro acamajeititsi maaroni, iro cantaincha ampashinijeitanaje maaroni.

⁵² Ari intioyeete, ayojeitanteari omoncarataca. Intsipate ampashinijeitanaque, oquem-petaca amatsioqui aparo, ari omataca, matsio. Intioyeete, irosati irointinaantajeitajeari Tasorensi maaroni camajeivetainchari; eiro ipatsaajeitajitsi aisati. Aitaque, ampashini-jeitanaque maaroni.

⁵³ Ashi airo apatsaajeiti, iro cantaincha eiro apatsaajeitajitsi aisati. Ashi airo acamaajeiti, iro cantaincha eiro acamaajeitajitsi aisati.

⁵⁴ Ompatsaajeitanaque oca avatsaca maaroni, iro cantaincha ontimaje avatsa caari patsaanetajantsine. Ancamaajeitanaque maaroni, irompa coajica, eiro acamanejeitajitsi. Impoiji omoncarataquea oca isanquenayeetiri:

⁵⁵ “Ariove. Eiro apiitajatsi ancamaajeitaje aisati. Eiro aquenqueshiretajatsi ancame. Cameetsave. Meeca eiro atsaroacaajeitarotsi ancame”.

⁵⁶ Ariorica antayetero caari cameetsatatsi, ari antsaroacaaquearo ancame. Timatsi aisati isanquenare Moishishi, camantaqueeri: “Ainiro pantane”.

⁵⁷ Irio oavisacoajeitaqueeri Avincatsarite Jesoquirishito. Ariove. Cameetsa ini Tasorentsi. Eiro atsaroacaajeitarotsi ancame.

⁵⁸ Irootaque, noyemisantaririnte nonintasanotiri, noncamantantempirori oca: pinquearioventeneri Avincatsarite paitapeerica panteneriri, eiro piperashireatsi, pincantatiyempani pinquearioventero. Piojeitaque eiro patsipetashitarotsi pimpomerentsiventeari.

16

Yapatotiniri quemisantatsiri jerosaresati iirequite.

¹ Meeca nonquenuetsatocoteri quirequi pampatoteneri ayemisantaririnte ashinoncaajeitachari anta Jerosarequi. Oca nocamantimpiri, nocamantaqueri aisati quemisantatsiri anta Carashiaqui.

² Maaroni tomincoqui ocameetsati pampatotapiniteneri jerosaresati piirequite, pinquemopyeneri. Jaocarica incarate piirequite, pinquemopyearanteneri. Pintearo pampatotiteanari meeca, opomerentsitimotimpicari ariorica nareetapeempera.

³ Aisati nocoaque pincoyeitea aanajenerine. Ariorica nareetapeempera, nosanqueenateneri jerosaresati, iriotantavaqueariri. Irosati antiancanteari Jerosarequi.

⁴ Pincoajeiterica nojate narori, ari nontsipajeitanaqueari.

⁵ Coajica nojate noneajeitempi, iro cantaincha nocoaque nojatapainte Maseroniaqui.

⁶ Ariorica osamani nosaviquimojeitempi, ariorica nosarintsitacotaque. Impoiji pincavintsajeitavaquena, jaocarica nojateri aisati.

⁷ Ariorica noneapaajempi, te noninteji noshintsitanaque navisanaquempi. Nocoaque osamani nosaviquimotanaquempi, irishinetenarica Avincatsarite.

⁸ Nosavicanauquetsita aca Ejesoqui, irosati omoncaratanteari Pentecoshiteshi.

⁹ Icoacaajeitavaquena oshequi nonquenuetsatacaajeitanaqueri. Oshequi iquemisantejeiti. Itimi aisati oshequi quisajeitavenari.

Ivetsajeitacari iyemisantaririnte.

¹⁰ Irareetapeempirica Timoteo, pineshinoncaajeitavaqueri. Tempa iquempetavaquena narori, oshequi yantaveetiniri Avincatsarite.

¹¹ Eiro pitseencavaqueritsi. Ariorica omoncaratapaquea impiaje aca, aisati cameetsa pineshinoncatavajeri, cameetsa irareetitantajeari aca. Noyeaqueri, aisati itsipapee ayemisantaririnte.

¹² Aisati nocantavetacari ayemisantaririnte, Aporo. Nocantasanovetacari irijateme irineempime, intsipatearime itsipapee quemisantatsiri. Te incoyeji irijate meeca. Ariorica coajica irijatanaque.

¹³ Paamayeariyea, yamatavitimpicari. Pinquearioventajeitero pinquemisantasanojeite. Eiro pitsaroajeititsi. Pishintsiventeneri Tasorentsi maaroni.

¹⁴ Tsame anintajeiteri ashanincepee, paitapeerica anteneriri.

¹⁵ Piojeitiri, noyemisantaririnte, yora Eshitejana aisati ishaninca iriori. Ijivajeitiri Acayasati iquemisantejeiti. Iquearioventaquero icavintsajeitiri maaroni ayemisantaririnte yoameetsantiri Tasorentsi. Tecatsi canterine, iotashitaca icavintsavacaajeitaca.

¹⁶ Ipomerentsitaca yamitacotasanojeitimpi, paitapeerica yantayetimpiri. Nocoaque pinquemisantejeitavaqueri iriori, aisati pinquemisantejeitavaqueri maaroni quempejeitacariri.

¹⁷ Noveshireimentavacari yora areejeitachari: yora Eshitejana, Jorotonato, aisati Acaico. Ainirojeitatsi aca, oquempetimotaquena avirojeitakerica tsipajeitavenari aca.

¹⁸ Iquimoshiretacaquempi chapinqui, meeca iquimoshiretacaapaquena narori. Cameetsa pinecameetsajeitavaqueri iriori.

¹⁹ Yovetsatasanojeitaquempi maaroni apatotimentariri Tasorentsi aca Ashiaqui. Aisati yovetsajeitimpi Aquira aisati iroori Pirishira, aisati maaroni apatotinijeitachari anta ivancoqui. Tempa iriojeitaque quemisantejeitiriri Avincatsarite.

²⁰ Yovetsajeitaquempi maaroni ayemisanrarinte. Ariorica povetsatavacaaquea, cameetsa paacameetsatavacaajeitea.

²¹ Narotaque Pavoro vetsajeitimpiri. Narotaque sanquenajeitimpirori.

²² Irijateta Sharincaveniqi maaroni caari ninterine Avincatsarite. Pishintsite, Novincatsarite, pimpocaje.

²³ Cameetsa irineshinoncajeitempi Avincatsarite Jesoshi.

²⁴ Tempa aquemisantajeitiri Jesoquirishito, irootaque meeca nonintasanojeitantimpiri. Narotaque sanquenajeitimpirori oca: *Pavoro*

YORA PAVORO YAPIITAJINIRI AISATI ISANQUENATAJINIRI CORINTOSATI

Yovetsajeitacari.

¹ ¿Ainirompi corintosati? Narotaque aca Pavoro sanquenajeitimpirori. Peerani itiancaquena Jesoquirishito noquenquetsacotaqueri, irootaque inintacaquenari Tasorensi. Notsipatari aca ayemisantaririnte Timoteo nosanquenajeitimpi. Nosanquenajeitimpiri maaroni quemisantajeitatsiri ara corintoqui aisati Acayaqui.

² Nocoaque irineshinoncajeitempi Apa Tasorensi, aisati cameetsa irisavicacajeitempi. Nocoaque aisati inquemetaquempi iriori Avincatsarite Jesoquirishito.

Tsame aveshireimentajeiteari Tasorensi.

³ Tempa icameetsatasanotaque Tasorensi, yora iriri Avincatsarite Jesoquirishito. Irootaque neshinoncajeitaqueeri, veshireacajeitaqueeri.

⁴ Ariorica ashinoncaajeivetaca tempa yoveshireacajeitaquee. Pamene, intacaro yoveshireacajeitaquee arori, ayojeitancari aveshireacajeiteari yora itsipapee ayemisantaririnte, ariorica irashinoncayea iriori.

⁵ Ariorica oshequi anquematscitimenteari Quirishito, oshequi aisati iroveshireacajeitaquee.

⁶ Iro noquemaatscitantacarori nocoaque oshequi piveshireimentajeiteari Tasorensi, aisati poavisacojeitancari. Ariorica noveshireimenteari, nocoaque aisati piveshireimenteari avirori: piojeitaque ariorica pinquematscitatearo paitapeerica, iroveshireacajeitempi pamavetantearori.

⁷ Niotasanotaque ariorica pinquempjeitena pinquematscitatearo avirori paitapeerica, aisati pinquempjeitena piveshireimentajeiteari Tasorensi.

⁸ Nocoaque piojeite, noyemisantaririnte, oshequi catsini noquematscayetacaro anta Ashiaqui. Oshequi nashinoncaaca, te capichaji. Nojivetaca ari noncamaque.

⁹ Queario, niotaque tecatsi noncanea noavisacotajea narosati, irootaque naventantacariri Tasorensi. Apaniro irinti imataquero yoavisacotaquena: tempa aisati imatiro yoitinairi camaintsiri.

¹⁰ Ari yoavisacotaquena, caari nocamanta; aitaque iroavisacotajena aisati, niotaque incanteani iroavisacotapinitena.

¹¹ Pamitacojeitena, pincanteri Tasorensi iramitacotena. Impoiji, ariorica iriojeite itsipapee iquemisantaquempi Tasorensi, yoavisacotaquena, oshequi iriveshireimentajeiteari Tasorensi iriori.

Yora Pavoro icantiri corintosati: "Tsame aveshireimentavacajeitea".

¹² Ari yamitacotaquena Tasorensi, ineshinoncataquena, irootaque noquearioventantannariri nantaveetiniri. Te niotashiteaji paitarica nantiniriri, iro cantaincha yoametaquena iriori ocameetsatantari nomayetaqueneri. Niotaque pineacameetsataquero nantayetaqueri, aisati iquempetaca itsipapee atiri, irootaque noquimoshiretantacari.

¹³ Te ompomerentsiteaji pineanatero oca nosanquenatimpiri, aisati te ompomerentsiteaji piojeitavaquero. Nocoaque piotasanajeitavaquero.

¹⁴ Capichaji piquemavetacaro nocamantaquempiri peerani, aisati capichaji piquemisantavetaquena. Ariorica impiapaaje Avincatsarite Jesoshi, noveshireimentajeitempi, iro cantaincha nocoaque pinquemasanotero nocamantitaquempiri piveshireimentajeitancari meeca.

Irijateme Pavoro irineerime corintosati.

¹⁵⁻¹⁶ Ari niotaque piveshireimentavetaquena, pineacameetsavetaquena, irootaque noquenqueshireantavetacari noneajantempime. Nojivajeitempime noneajeitanajempime, impoiji novaanaqueame anta Maseroniaqui. Impoiji noneapaajempime aisati, impoijiquea novaanaqueame Joreaqui. Apite aveshireimentavacajeiteame.

¹⁷ ¿Ariompa nocoaque namatavitempi? ¿Noquempetacarimpa amatavitantatsiri cantashitachari: "Ari", aisati: "Eiro"? Te nonquempeteariji. Te noncoyeji nainti namatavitempi.

¹⁸ Tempa queariotaque icantiri Tasorensi, te iramatavitanteji. Aisati narori, te noncantapinitempiji: "Ari nomataquero", impoiji: "Eiro nomatirotsi".

¹⁹ Ari nocarataqueri Shirivano, jeri Timoteo nocamantajeitaquempi jaoca icantari Jesoquirishito, yora Itomi Tasorensi. Te incanteji iriori: "Ari nomataquero", impoiji: "Eiro nomatirotsi". Apatiro icantapiniti: "Ari nomatasanotero", impoiji imataquero.

²⁰ Queario imajeitaqueenero maaroni icantaqueeri Tasorentsi. Irootaque nocantajeitantariri maaroni atiri icameetsataque, impincatsajeitantariri iriori.

²¹ Aquemisantajeitaqueri Quirishito, irootaque itasoncaventantaqueeri Tasorentsi ashanincatavacaajeitancari. Aisati timatsi icoacaaajeitaqueeri antajeiteri, maaroni.

²² Itasoncaventajeitaquee maaroni, aisati itiancaqueero Ishire quiso oajeitantaqueeri. Meeca ayojeitaque eiro yojocajeiteetsi.

Icamantajiri paita caari ijatanta irineajeri.

²³ Iro caari nojatanta noneajempi peerani, te noncoyeji nonquenquejaimentempiro pantajeivetacari, te noncoyeji noashiretacaajeitempi. Ioti Tasorentsi te nontseeyaji.

²⁴ Te noncoyeji noncantapinijeitempi pinguemisantajeitena, tempa piquemisantasanojeitaqueri Tasorentsi. Irointi nocoaque noveshireacaajeitempi, maaroni.

2

¹ Noquenqueshiretaque: "Eiro meeca nojatitsi noneeri yora corintosati. Napiitacaajiricari noashiretacaajeeri, aisati noashiretacetaricari narori".

² Ariorica noashiretacayempi, tempa aisati narori noashiretacojeitempi. Impoiiji, ¿janica veshireacaajeitenaneri? Ariorica noneajeitajempi piveshireajeitanajea, ari noveshireanajea narori. Irompa eirorica piveshireajatsi, eiro noveshireajatsi narori.

³ Peerani nosanquenatantimpirori noshintsitsajeitaquempi pojocajeitantarori caari cameetsatsi pantajeitaqueri. Te noncoyeji noashiretacojeitempi, irointi ocameetsati noveshireacojeitempi. Niotaque ariorica pineajeitavaquena nonquimoshiretapaque, ari piveshireimentajeitavaquena avirori.

⁴ Peerani nosanquenajeitantaquempironiri, oshequi noashiretacojeitaquempi catsini, oshequi niracojeitaquempi. Iro cantaincha te noninteji noashiretacaajeitempi, irointi nocoaqueni piojeite oshequi nocavintsaaajeitaquempi catsini.

Icantiri Pavoro: "Pincavintsaajeri yora antaveitaroniri caari cameetsatsi".

⁵ Queario noashiretacetaricari yora aavetarori iashiane, iro cantaincha tempa avirojeitaque oashiretasnotainchari.

⁶ Ari poasanquetaajeitaqueri yora aavetarori iashiane, irootaque yojocantajarori yantaveitaniri, meeca moncarataca.

⁷ Meeca eiro piquisajiritsi aisati, irointi pincavintsaajeiteri. Piveshireacaajeiteari, te aninteji aiqero irijatatiye iroashiretasnotanaquea catsini.

⁸ Nocoaque meeca piotacayeri queario picavintsasanojeitaqueri.

⁹ Irootaque nosanquenatantimpirori peerani: nocoaqueni noneantajeitaquempi. Nocoaqueni niote queariorica piquemisantasanoaquena.

¹⁰ Janicarica picavintsaajeitiri, aisati narori noncavintsayeri. Ariorica irantimojeitaquee ashaninca caari cameetsatsi, icoaque Quirishito eiro aquishmentiritsi, aisati icoaque ancavintsaajeiteri. Irootaque nocavintsantacari. Aisati avirori, nocoaque paacameetsatavacaajeitea.

¹¹ Aisati te noncoyeji irantacaajeiteero Satanashi caari cameetsatsi. Niotaque oshequi icoaveta iramatavijeiteeme.

Icamantaquee Pavoro paita ipasonquitantariri Tasorentsi.

¹² Ari chapinqui nareetaca Toroashiqui, nocamantajeitaqueri savicayetatsiri jaoca icanta Quirishito yoavisacotanti. Oshequi yamitacotaquena Avincatsarite, oshequi ya-cameetsajeitaquena savicajeitatsiri, oshequi iquemisantajeiti.

¹³ Nocoavetapaacari Tito, iro cantaincha te noneeriji. Oshequi noquenqueshiretaqueri, irootaque novaantanajari Maseroniaqui.

¹⁴ Ari nocantani narori nopasonquitapinitiri Tasorentsi. Aquemisantaqueri Quirishito, irootaque itasoncaventajeitantaqueeri, imatacaajeitantaqueerori maaroni icoacaa-jeitaqueeri. Meeca iotacojeitaqueri maaroni savicajeitatsiri.

¹⁵ Ari aquemisantajeitaqueri Quirishito, aisati ashanincajeitacari, irootaque inecameetsajeitantajeeri Tasorentsi. Acarajeitaqueri savicatsineri inquitequi, aisati jatatsineri Sharincaveniqui.

¹⁶ Avamejeivetari aparopee, iro cantaincha itseencajeitaquee, irootaque irijatanteari iriori Sharincaveniqui. Yora itsipapee avamejeitaqueri, ari iquemisantajeitaquee irinti, irootaque irijajeitanteari inquitequi. Incantaitiyempani irisavicaajeite cameetsa. Oshequi noquenqueshiretasanoaquero: ashinetricari irijajeite Sharincaveniqui. Eirome yamitacotaname Tasorentsi, eiro nomatirome nonquemisantacaajeiteri itsipapee.

¹⁷ Ainiro oshequi oametantashijeivetarori irineane Tasorentsi iranteariri quirequi. Te nonquempeteariji nainti. Itiancaquena Tasorentsi noametantero irineane, iotaque nocoasanotaque noametantero. Aisati yamitacotaquena Quirishito.

3

Iquenquetsatacotiri iotacairiri atiri cameetsa yoametanti.

¹ Ari pineanatavaquero nojivataquempiri nosanquenataquempiri. ¿Pijitaquempa meeca oshequi noshemeti narori? ¿Picoaquempa intime pashini sanquenatacotenaneri camantempineri nocameetsatirica? Aisati narori, te noncoacayempiji pisanquenatacotena, pincamanteri pashini ashaninca nocameetsataque.

² ¿Paita noncoantearori? Iojeitaque atiri oshequi noquencheshirejeitaquempi, oshequi nocavintsajeitaquempi. Iojeitaque iriori te namatavijeitempi.

³ Te pisanquenatacotenaji paperiqui, iro cantaincha noquemisantacajeitaquempi, aisati oameetsataquempi Ishire Tasorensi, yora aneasanotatsiri. Meeca ioshirejeitaquena atiripee queario itiancaquena Quirishito, te namatavitanteji.

Yamitacotaqueri Tasorensi Pavoro imayetaquero icantaqueri.

⁴ Niotaque queario oca nocamantajeitaquempiri. Noquemisantacari Quirishito, irootaque yamitacotanari Tasorensi nomayetaquero nocantaquempiri.

⁵ Te nomatashiteeroji apaniro, irinti Tasorensi matacaquenarori.

⁶ Iriotaque iotacaanari jaoca icanta meeca yoavisacotanti. Peerani otimini isanquenare Moishishi camantajeiteeri paita icoacaqueeri. Iro cantaincha eirorica amoncarajeitirotsi, ajate Sharincaveniqui. Iro cantaincha iroaquera meeca itiancajeiteero Tasorensi Ishire, aajeitanajeeneri asavicantajeeri anta inquitequi.

⁷ Peerani intacaro Tasorensi, isanquenataquero mapi. Ineantacariri Moishishi, oshipaquireanaque ivoro, shipaquirerere; impoi yoirincapaaja. Ari ineantajeitavajariri ishaninca opeavetanaja ishiquirei, iro cantaincha te irimajeiteeroji iramenavorojeitajeri: irosati icanta yatsioquintaqueri. Ari maaroni caari moncaratiro ocantiri isanquenare ijajeitaque Sharincaveniqui.

⁸ Ari isanquenatantarori Tasorensi mapi, oshipaquireanaque ivoro Moishishini, yoanaque cavaco, aisati yoajeitanaque cavaco maaroni ishaninca. Meeca ainiro Ishire Tasorensi, quiso oajeitaquee, aisati coajica osavicacajeitajee anta inquitequi. Tempa aitaque avasanojeitapaaque cavaco, sorerere.

⁹ Yora caari moncaratiro ora sanquenarentsi yamaqueri Moishishi irirajeite irinti Sharincaveniqui, iro cantaincha ishiquireeacaquero Tasorensi ivoro Moishishi. Iro cantaincha ayojeitaque meeca yoameetsajeitaqueri Tasorensi maaroni quemisantajeitiriri, ayojeitaque corajica aneajeitajeri anta inquitequi irishiquireacotasanojeitajee.

¹⁰ Peerani aneacameetsajeivetaro isanquenare Moishishi, iro cantaincha meeca te aneacameetsasanojajeero. Timatsi meeca cameetsasanojatsinsi: yoameetsajeitaquee Tasorensi, asaviquimojeitapaajeri anta ocameetsaitetinta catsini.

¹¹ Ocameetsavetaca isanquenatiniri Moishishi, iro cantaincha eiro ocantaitatiani ontime. Irisavicacaasanojeitajee Tasorensi inquitequi, ancantaitatiyempani: tempa ocameetsasasanojate irointi, catsini.

Iotacajeitaquee Avincatsarite, te incoyeji intime amatavijeiteeneri.

¹² Ari ayojeitaque queario asaviquimojeiteri Tasorensi, irootaque caari apashiventanta aquenquetsatacaajeitaqueri atiri.

¹³ Te anquempajeiteeriji Moishishini, ipashicavorotaca irinti: te incoyeji irineajeiteri ishaninca ompeanajea ishiquireavorovetaca.

¹⁴ Iro cantaincha te inquencheshireajeiteaji joriopee. Icantani ineanatapinivetaro isanquenare Moishishi, iro cantaincha te iriotacoteeroji. Apatiro Quirishito matirori iriotacajeiteri.

¹⁵ Queario, irosati icantajeita meeca. Ariorica irineanatero isanquenare, te iriotacoteeroji: tecatsi incantea inquemero.

¹⁶ Iro cantaincha ariorica iraventeeri Avincatsarite, iriotacayeri eiro yamatavitantajatsi irisati; irointi iriotasanojate.

¹⁷ Ainiro Avincatsarite Ishire, oamejeitaquee eiro apomerentsiventiro isanquenare Moishishi.

¹⁸ Meeca tecatsi amatavijeiteeneri, irointi timatsi ayojeitiri. Ayojeitaque icameetsasasanojate Avincatsarite. Otasoncaventajeitaquee Ishire anquempajeiteeriji. Meeca aquempajeivetacari capichaji. Acantani apashinipinitanaque. Coajica anquempetasanojeitapaajeri, ancameetsasasanojeitapaaje.

4

Cameetsa iquenquetsatacotiro Pavoro irineane Tasorensi.

¹ Tempa icavintsaajeitaquee Tasorentsi, irootaque itiancantanari nonquenquetsatacay-eri atiripee. Meeca eiro nojocajirotsi.

² Te noninteji namataviteri ashaninceapee: te incameetsateji yora pashini amatavijeitiriri. Te nompashiniteroji irineane Tasorentsi, aisati te noncamantashiteariji atiri ocameetsayetaque icoayetiri iriori: namatavitericari. Irointi queario noamejeitaqueri atiri. Piojeitaque, aisati iotaque Tasorentsi queario oca nocaantaquempiri.

³ Intimerica caari iotatsi jaoca incanteari iravisacotantajeari, iriojeitaque jatatsineri anta Sharincaveniqui.

⁴ Yamatavitaqueri Satanashi caari imatantaro iriote. Tempa iriotaque ivincatsarite maaroni tseencantatsiri. Te incoacayeriji iriote jaoca incanteari iravisacotaje; te irinintacayeriji iriojeite oshequi ipincatsariti Quirishito, Tasorentsi ini.

⁵ Te naro quenquetsatacotachane, irinti Avincatsarite Jesoquirishito noquenquetsatacotiri. Noquemisantaqueri irinti, irootaque nocoantacari nintacojeitempi.

⁶ Peerani, yovetsicantarori Tasorentsi quipatsi, otsiteniveitani, iro cantaincha icanti: “Onquitaitetanaque”. Ari oquitaitetanaque, irootaque meeca amenajeitantari paitapeerica. Aisati meeca iotacaajeitaquee jaoca icantari Quirishito, ayotantacari oshequi ipincatsaritaque Tasorentsi.

Irio Tasorentsi matacaaqueeri aquenquetsati.

⁷ Te noshintsivatsateji narori, aisati nojoquiiapinitaca piojeitancari tecatsi catsini nomate apaniro, irinti Tasorentsi matacaaqueenarori noquenquetsatacotiri. Irootaque ocameetsatantari pimpincatsajeiteri, eiroquea pipincatsatashitanatsi narori.

⁸ Oshequi yoashinonqueetaquena, iro cantaincha te irojocacayeetenaroji noquenquetsati; oshequi noquenqueshiretaque, iro cantaincha te noashireteaji.

⁹ Oshequi iquisheetaquena, iro cantaincha te irojoquenaji Tasorentsi; ipasanatapiniyetaquena, iro cantaincha te iroyenaji.

¹⁰ Oquempetaca peerani itimi oshequi coapinivetainchari iroyerime Jesoshi, aisati itimi oshequi coapinivetachari iroyename narori. Apaniro Jesoshi yoavisacotapinitaquena, iojeitancari atiri aneanaji ini.

¹¹ Queario, ariorica anquemisanteri Jesoshi, aitaque incantajeiteari, incoajeite iroajeitee. Coajica, ari ancamajeitaque, iro cantaincha maaroni neajeitaqueeri meeca iojeiti aneasanotaji ini Jesoshi.

¹² Noquenquetsati, irootaque icoanteetacari iroyena; iro cantaincha piquemisanta-jeitaque, irootaque pintimajeitanteari anta inquitequi, pincantaitiyempani.

¹³ Tempa isanquetatini peerani yora ayemisantaririnteni: “Noquemisantaque, irootaque noquenquetsacantariri noshaninca irineane Tasorentsi”. Aisati noquempejeitacari narori: noquemisantaque, irootaque noquenquetsacantajeitaquempiri.

¹⁴ Ayojeitaque ainiro yora oitinaajiriri Avincatsarite Jesoshi. Coajica irointinaasano-jeitajee arori, antspajeiteari Jesoshi. Impoiji quiso avajeitanajeri iriori.

¹⁵ Oshequi noquematsicamentajeitaquempi, ineshinoncajeitantajimpiri Tasorentsi: aisati irineshinoncajeiteri itsipapee atiri. Impoiji pimpasonquijeiteri maaroni, pincantajeite: “Tempa icameetsati Tasorentsi”.

¹⁶ Meecari, meeca, oshequi amaojeitaque, coajica anteashipajeitanaque, ancama-jeitanaque; iro cantaincha eiro aquenqueshireajetirotsi. Tempa icantani Tasorentsi iveshireacaajeitaquee maaroni quitaiteriqui.

¹⁷ Meeca capichaji yoashinoncaajeitaquee tseencantatsiri, iro cantaincha te antsipetashiteaji ashinoncaaca. Capichaji aneaquero meeca, iro cantaincha ioti Tasorentsi, impoijiquea cameetsa irisavicacajeitajee anta inampiqui. Ancantaitiyempani asavique cameetsa, eiro oquempetajatsi aca.

¹⁸ Eiro aquenqueshiretasanojeitirotsi pomerentsiyetachari aisati timayetatsiri aca quipatsiqui. Coajica tempa ompeajeitanajea maaroni aneajeitaqueri aca. Irointi anquenqueshiretasanotero caari aneapiniti meeca: ora timajeitatsiri inquitequi. Eiro opeajatsi irointi.

5

Iquenquetsatacotiro aquimoshirejeitantajari.

¹ Ayojeitaque ariorica ancamajeite aca, antimajeite inquitequi. Ontime avatsa cameet-sari irovetsicajeeneri Tasorentsi, te irio atiri vetsicajeerone. Ancantaitiyempani asavique anta.

² Aca quipatsiqui oshequi meeca ashinoncaapinijeitaca aisati oshequi aquenqueshire-jeitaque; oshequi acoajeitaque onttime avatsa iroaquerari anta inquitequi.

³ Eiro apatiro onttime ashire, irointi onttime aisati avatsa.

⁴ Meeca oshequi aquenqueshirejitaque: te ancoajeiveteaji ajocajero oca avatsa, iro cantaincha acoasanotaque avatsa iroaqueratajantsineri. Acoaque ampashinitanaje ontimanteari avatsa caari tsoncanetajanchane.

⁵ Iriotaque Tasorentsi tasoncaventajeitajeeneri ontimanteari pashini avatsa iroaqueratajantsineri. Quiso oajeitaquee Ishire ayojeitantacari queario intasoncaventaquee,

⁶ irootaque aquimoshirejitantacari. Ayojeitaque atimajeiti aca quipatsiqui, tequeratsita antsipatasanoteari Avincatsarite.

⁷ Tequera aneajeitero inampi, iro cantaincha aquemisantaque, ayojeitantacari aneajero coajica.

⁸ Aveshireimentajeivetari Avincatsarite aca quipatsiqui, iro cantaincha acoasanoveta antsipatasanoteari anta jenoqui, anampitasantearo.

⁹ Ainirotatsiquera asaviqui aca, acoasanotaque iriveshireimentajeitee. Aisati, ajaterica anta ancoaque iriveshireimentajeitee.

¹⁰ Coajica incantacoventajeitee Quirishito. Ariorica meeca antayero cameetsatsiri, incavintaajeitee; ariorica antayero meeca caari cameetsatsi, iroasanquetaajeitee.

Iquenquetsatacotaja irisati Pavoro.

¹¹ Oshequi apincatsajeitaqueri Avincatsarite, irootaque aquemisantacaantajeitacariri atiri. Ioti Tasorentsi nopincatsatanotaqueri, nocoaque piojeitero aisati avirori.

¹² Te noncoyeji noneatsataja narosati, iro cantaincha te aisati noncoyeji pimpashiventacotena. Yora cantimataquenari, oshequi ishemetaque irinti, ishemetimentayetaquero yantayetiri, iro cantaincha te incameetsashireteji. Icantimataquena iriori, iro cantaincha nocoaque pimplateari.

¹³ Icanti: “Te iriotacoteaji Pavoro”, iro cantaincha apatiro nantiniri Tasorentsi icoacaquenari. Otimi notantari nintacotantaquempiri.

¹⁴⁻¹⁵ Oshequi inintaquena Quirishito, icavintaasaanotaquena. Niotaque icamimentajeitaquee maaroni: meeca oquempvetaca acamajeitaque maaroni, eiro amatapinitantajarotsi aisati caari cameetsatsi. Aisati icoacaquee eiro antanontajatsi arosati, irointi anteneri iriori icoacaqueeeri: tempa icamimentajeitaquee arori, itinaanaja aisati.

¹⁶ Peerani nojivetacari Quirishito atiri ini, te niövetarini Tasorentsi ini. Iro cantaincha meeca niotasanotaqueri, niotaque jaoca icanta. Aisati yora ayemisanrarinte, eiro ateenquiritsi: tempa inecameetsajeitaqueri Tasorentsi.

¹⁷ Ariorica iquemisantaqueri ashaninca Quirishito, ari inashitacaacari iriori; eiro yantapinitirotsi yantaveitaniri, irointi impashinitanaje.

¹⁸ Iriotaque intacarori Tasorentsi. Itiancaqueri Quirishito icamimentajeitaquee, yoameetsajeitaquee, yaacameetsatanotaqueri iriori. Meeca icoaque ancamanteri itsipapee atiri inquemisante, iraacameetsanteariri iriori.

¹⁹ Pineaquero, itiancaqueri Quirishito iroameetsajeitee arori, irineacameetsajeitantajeeri. Eiro iquenqueshiretajirotsi aisati caari cameetsatsi antajeivetaniri. Meeca itiancajeitaquee arori ancamantajeiteri itsipapee icoaque Tasorentsi iraacameetsajeiteri, maaroni.

²⁰ Queario, itiancaquena Quirishito: novaajimpiro irineane Tasorentsi. Aisati iriori Quirishito icoacaquempi pinquemisanteri iraacameetsatantempiri Tasorentsi.

²¹ Tecatsi irante Quirishito caari cameetsatsi, iro cantaincha itiancaqueri iriri icamimentajeitaquee. Oquempetimovetacari yantaquero iriori caari cameetsatsi. Irootaque meeca yoameetsatantajeiteeri Tasorentsi.

6

Jaoca icantapinita Pavoro.

¹ Meeca nantiniri Tasorentsi icoacaquenari, irootaque nocantantimpiri: icavintaasaanajeitaquempi. Eiro meeca pitseenquiritsi.

² Jero oca ocantiri irineane: “Picantaquena, aisati noquemisantaquempi; moncarataca pavisacotantajari, irootaque nintacotantaquempiri”. Meeca aisati narori noncaman-tempi: moncarataca meeca pinquemisante, pavisacotantajeeri.

³ Tecatsi nante, tecatsi pinquisantenari; cameetsa noamejeitaquempi piojeitantacari pavisajeitaje.

⁴ Nocantani nantaveetiniri Tasorentsi, noquearioventaquero, piojeitantacari queario nopincatsatanotaqueri. Nocantani nantaveetiniri, iro cantaincha oshequi noquematsicatimentacari, nashinoncaapinitaca, maaroni.

⁵ Ipanataquena soraro, yoiminqeapinitaquena. Iquisapinijeitaquena atiripee. Oshequi opomerentsitimotaquena noquenquetsatacaajetiri atiripee. Nosaaquitapiniti tsiteniriqui. Noquemapinitaquero notasheni.

⁶ Iro cantaincha cameetsa nosaviqúi, niotasantaquero irineane Tasorentsi, oshequi namavetaquero iquisaquena caari quemisantatsi, piojeitantacari queario nantaveitiniri Tasorentsi. Amitacotapinitaquena Ishire Tasorentsi, nocavintsantapiniti,

⁷ queario oni oca noametantapinitiri, te nontseeyaji. Itasoncacoventapinitaquena Tasorentsi, yojocoventaquena, aisati imatacaaquena noquemisantacaaqueri itsipapee atiri icameetsatantajari.

⁸ Ainiro pincatsataquenari aisati shirontimentaquenari. Ainiro neacameetsataquenari aisati cantimataquenari. Ainiro quemisantaquenari aisati tseencaqueenari.

⁹ Te iriojeitenaji atiripee, iro cantaincha iotaquena Tasorentsi. Isareajevetaquena atiri iroyename, iro cantaincha aneatsina noni. Oshequi noneacatsiyetacaro, iro cantaincha iquempoyeaquena Tasorentsi.

¹⁰ Noashiretacojeitacari ashanincapee, iro cantaincha noveshireimentacari Tasorentsi. Nashinoncaavetaca narori, iro cantaincha noamejeitaqueri ashanincapee cameetsa yoveshireimentantajariri Tasorentsi. Tecatsi nashitaarantea, iro cantaincha ipaquena Tasorentsi maaroni coiteimotaquenari.

Oshequi icavintsaajeitaqueri Pavoro yora corintosati.

¹¹ Noyemisantaririnte, nocamantasanojeitaquempi maaroni noquenqueshiretaqueri, tecatsi nomanapitsatempi. Oshequi nonintajeitaquempi.

¹² Te nompashiventeaji narori noquenquetsatacainpi, iro cantaincha naamaaca ainiro pipashiventajeita avinti.

¹³ Ari noquempetacaantajeitaquempi notomipee, nishintopee: oshequi nocavintsaajeitaquempi. Aisati nocoaque pincavintsaajeitena narori.

Icantiri Pavoro: “Te pinquempetasanoteariji tseencantatsiri”.

¹⁴ Eiro quiso poiritsi yora caari quemisantatsi. Pamene, ariorica acameetsataque, ¿aquempetacarimpa caari cameetsatsati? ¿Ashanincajeitacarimpa? Oquempetaca quitaiteiri aisati tsiteniri: te omoncaratavachoyeaji, onashita.

¹⁵ ¿Ishanincatacarimpa Quirishito yora Satanashi? Ariorica aquemisantaque, ¿aquempetacarimpa tseencantatsiri?

¹⁶ ¿Omoncaratavacaacampa ivanco Tasorentsi aisati ovanco isheroncayetiri atiri? Pamene, quiso yoajeitaquene Tasorentsi, yora aneasanotatsiri, tempa peerani isanquenayeetironi irineane iriori: “Quiso noajeitanaqueri maaroni quemisantanari, eiro nojocajeitiritsi. Nontasoncaventaiteiri, aisati impincatsajeitena.

¹⁷ Pinijantareajeri tseencantatsiri, eiro quiso poajeitiritsi, eiro pantayetirotsi caari cameetsatsati. Impoiji naacameetsatasanojeitempi maaroni,

¹⁸ nontomintajeitajempi, nishintojeitajempi, pincantajeitena: ‘Apa’. Irootaque icantaqueeriniri Avincatsarite, yora Tasorentsisanori”.

7

¹ Ari, nonintane, ayojeitaquero oca icantaqueeri Tasorentsi. Eiro meeca antayetirotsi caari cameetsatsati, aisati eiro aquenqueshiretirotsi. Tsame cameetsa ampincatsatasanojeiteiri Tasorentsi, anquearioventajeiteneri icoacayeeri.

Yora Pavoro iveshireimentajeitacari corintosati.

² Nocoaque paacameetsajeitena. Piojeitaque te noashinoncaajeitempiji, te nantacaajeitempiroji caari cameetsatsati, te namatavijeitempiji.

³ Te nontantempiji ainiro pantane, teve. Tempa nocamantaquempi oshequi nocavintsaajeitaquempi, oshequi nonintajeitaquempi. Nocantani noquenqueshirejeitaquempi aca quipatsiqui. Aisati ariorica noncamaque, noncanteani nonquenqueshirejeitapaa-jempi anta inquitequi.

⁴ Te nonquenqueshireacotempiji, niotaque piquemisantaquena, irootaque noveshireimentantaquempiri, noquimoshireventantaquempiri. Oshequi yoashinonqueetaquena, iro cantaincha noveshireimentasanojeitaquempi.

Ineacameetsajeitaqueri Pavoro corintosati.

⁵ Peerani, nareetantacari Maseroniaqui, te nomateroji nomaoreapee: yoashinoncaapiniyeetaquena. Aisati oshequi notsaroashiretanaque.

⁶ Iro cantaincha tempa iveshireacaapinijeitaquene Tasorentsi. Itiancaquenari yora Tito, irootaque noquimoshiretantacari.

⁷ Ari noveshireimentacari Tito iriori, itsipataquena. Aisati icamantapaquena paacameetsajeitavaqueri chapinqui, aisati iveshireimentaquempi. Icamantaquena picoiteajeitaquena, aisati piquenqueshiretanaca: eiro papiitajirotsi oca pantaveitaniri peerani.

Aisati icamantaquena pinintajeitaquena. Noquemantavacariri icantapaaquena, oshequi noquimoshiretanaque.

⁸⁻⁹ Nosanquenatantaquempirori peerani, noquenqueshiretacaajeitaquempi. Poashirejeivetanaca, iro cantaincha impoiji pojocaquero pantaveitaniri, paventajeitajari Tasorentsi. Te nantsipetearoji nosanquenajeitaquempi, te noashinoncaajeitempiji. Peerani aquenqueshirejeivetanaca, iro cantaincha meeca aquimoshirejeitaque.

¹⁰ Icoaque Tasorentsi avashiretanaquea ajocantearori caari cameetsatsati antajeitaqueri, ampashinitantajeiri. Impoiji ancanteri iroavisacojeitee. Ariorica amatero oca icoacaaqueeri, anquimoshirejeitanaque. Yoashirejeivetaca aisati iriori tseencantatsiri, iro cantaincha te iraventajeiteariji irinti Tasorentsi, irotaque ijatantacari Sharincaveniqui.

¹¹ Poashirejeivetacani, iro cantaincha meeca piquearioventaquero piquemisantajeitaque. Picoajeitaque cameetsa pisavicaajeitanaque. Oshequi piquenqueshirejeitaca, aisati pitsaroajeitaque, irotaque picoantacari namitacojeitempi. Piquemisantasanojeitaquena, aisati pojocacaquero yoranqui yantaniroveitaniri. Pitsoteaquero maaroni nocantajeitaquempiri, meeca cameetsa pisavicajeiti.

¹² Nosanquenatantaquempirori nocoacaaquempi pamitacoteri yoranqui antacotiriri iriri, aisati yora iriri, pamitacoteri. Iro cantaincha nocoacaasanoaquempi piojeitaque pinintasanojeitaquena. Tempa irotaque icoacaaquempiri aisati Tasorentsi.

¹³ Ari meeca noveshireimentajeitaquempi, aisati noveshireimentavajari Tito. Oshequi iquimoshiretapaquena, icamantapaaajana: "Cameetsa isavicacaajeitavaquena".

¹⁴ Chapinqui, tequeratsitani irijatashitempi, nocamantavaqueri: "Icameetsajeitaque corintosati, cameetsa iracameetsatavaquempi". Ari yareetantaquempiri iotaque queario nocantaqueriri, te nontseeyaji. Aisati oquempetaca, te namatavijeitempiji avirojei.

¹⁵ Oshequi inintajeitaquempi: iotaque piquemisantajeitavaqueri aisati pipincatsajeitavaqueri.

¹⁶ Aisati narori, noveshireimentajeitaquempi: niotaque pantapinitaquero icoacaaquempiri Tasorentsi.

8

Oshequi icavintsanti yora maseroniasati.

¹ Meeca, noyemisantaririnte, nocoaque noncamantempi oshequi ineshinoncajeitaqueri Tasorentsi maaroni yora ayemisantaririnte anta Maseroniaqui.

² Oshequi yoashinoncaajeivetacari ishanincapee, iro cantaincha oshequi iveshireimentajeitacari Tasorentsi. Aisati te irashitaarantasanoveteaji, iro cantaincha oshequi yapatojeitiniri quemisantatsiri quirequi, ipiriri. Iojeitaque yashinoncaajeitaca ayemisantaririnte anta Jerosarequi.

³ Te capichaji imperi, oshequi ipaqueri. Te iriojeiteji intsaneempari iirequite. Tecatsi canterine: "Pincavintsayeri piyemisantaririnte". Irisati iotashitacha icavintsairi.

⁴ Icantasanoaquena: "Nocoaque namitacojeiteri noyemisantaririnte".

⁵ Ari niövetaca imperi quirequi, iro cantaincha imapocaquena icantajeitaquena: "Nanteneri Tasorentsi paitarica icoacaanari, aisati nantempiro paitarica pincantaquenari. Pincamantena paitarica icoacaquenari Tasorentsi".

⁶ Ari chapinqui intanacaro Tito icantaquempi: "Pampatoteneri jerosaresati piirequite". Ari cameetsa papatojeitaqueneri. Meeca nontiancajempiri aisati incantajempi pampatotasanojeiteneri aisati piirequite, pincavintsaasanojeiteri piyemisantaririnte.

Icantiri Pavoro corintosati: "Pintacoteari ashinoncaincari anta Jerosarequi".

⁷ Oshequi panaacojeitaqueri pashinipee piyemisantaririnte: panaacotaqueri piquemisantasanojeiti, piquenquetsasanojeiti, piotasanojeiti, piquearioventasanotiniri Avincatsarite icoacaimpiri, aisati pinintasanojeitaquena. Meeca nocoaque panaacojeiteri pineshinoncatasanojeiteri ashinoncaincari.

⁸ Te noncoyeji nomperanatempi pimpajeiteri ashinoncaincari, iro cantaincha ariorica pimpasanoteri, piotacaajeiteri itsipapee queario pinintasanojeitaqueri piyemisantaririnte.

⁹ Tempa aisati oshequi ineshinoncajeitaquene Avincatsarite Jesoquirishito. Oshequi yashitaarantaca anta inquitequi, aisati oshequi catsini ipincatsaritini, iro cantaincha ipocantacari aca quipatsiqui, yojocanaquero maaroni cameetsayetatsiri. Yashinoncaave-tapaaca: tecatsi timimotajerine, itseencajeitaqueri ishaninca, maaroni. Yashinoncaimentaquee arori, oncanteata cameetsa irisavicacaajeitajee anta inquitequi.

¹⁰ Nocoaque pintacotasanojeitari yora ashinoncaajeitachari anta Jerosarequi: tempa avirojeitaque intasanojeitarori peerani.

¹¹ Picoajeitague pintacoteari: meeca, intimerica piirequite pintacotanteariri, jentsite, pampatoteri pimpacantanteariri.

¹² Ocameetsati picoaque pincavintsayeri. Ari itimirica piirequite, tempa ari pimataquero avinti pimperi. Iro cantaincha terica intimeji piirequite, eiro nocantashitimpitsi pimperi.

¹³ Te noninteji ompomerentsitimojeitempi, aisati eiro opomerentsitimojeitiritsi itsipapee.

¹⁴ Timatsi pashitaarantajeitaca, meeca pincavintsayeri yora ashinoncaincari. Coajica ariorica irashitaarantaquea iriori, aisati ariorica pashinoncaajeitaquea avirori, impoi-jiqnea impiatempit incavintsaajeitempi avirori.

¹⁵ Tempa ocantini Sanquenarentsi: “Yora piotasanovetacarori mana, te ontimimotajeriji aisati timaarantajantsine. Irintiquea yora aatsiri capichaji, te irashinoncayeaji irinti. Aitaque, imoncaratavacaajeitaca maaroni”.

Intianqueri Tito irineajeri aisati corintosati.

¹⁶ Ari iquempetaquea Tito, oshequi inintajeitaguempi, irootaque nopasonquitan-tacariri Tasorentsi.

¹⁷ Nocantaqueri: “Pijatashitajeri aisati corintosati, pineeri”. Iro cantaincha te apaniro narori noncoacayeri, irisati coashitacha irineajempi aisati.

¹⁸ Nontianquempiri itsipa ayemisantaririnte intsipatanaqueari. Oshequi iquenquetsa-tapinitiro irineane Tasorentsi, irootaque iojeitantacariri maaroni quemisantatsiri. Aisati avirori, piquemacojeitaqueri.

¹⁹ Aisati itiancajeitaqueri ayemisantaririnte intsipatanaquea narori anta Jerosare-qui, iramitacotena naanajeneri ashinoncaincari quirequi. Oshequi icavintsaajeitaqueri ayemisantaririnte, irootaque incantanteari jerosaresati: “Icameetsataque Tasorentsi”. Aisati iriojeitanaque oshequi acavintsaajeitaqueri.

²⁰ Ari icarataque oshequi quirequi pintianqueneriri, oshequi picavintsaajeitaqueri. Irootaque nocoantacari intime tsipatenaneri naanajeneri. Icanteeanacari: “Picoshita-queri”.

²¹ Te apaniro noncoaque irineacameetsatena Tasorentsi, aisati nocoaque irineacameet-sajeitena ashanincapee.

²² Aisati pineavajeri pashini ayemisantaririnte nontianqueri. Niotaqueri, iquearioven-taquea iquemisantaque. Nocamantaqueri oshequi piquemisantajeitaque aisati oshequi picavintsantajeitaque, irootaque icoasanotantacari irijate irineempi.

²³ Yora Tito, quiso yoapinitaquea, yamitacotapinitaquea nintacojeitaguempi. Aisati yora intsipajeiteari irineempi, iriojeitaque itiancanepee ayemisantaririnte aca. Cameetsa inajeiti, quemisantasannotiriri Quirishito.

²⁴ Ari oshequi nocantapinijeitaqueri quemisantatsiri aca: “Icameetsajeitaque corin-tosati”. Ariorica pineavaqueri yoca, paacameetsatasannotavaqueri iriojeitanteari queario oca nocantaqueriri.

9

Icamantaqueri paita icoacantariri irineshinoncajeiteri jerosaresati.

¹⁻² Jero oca nocantaquempiri: “Pintacoteari piyemisantaririnte”. Iro cantaincha tempa piotasanotaque picavintsaajeitaqueri. Niotaque te pintsaneempariji piirequite, irootaque nocamantantariri maseroniasati: “Ocarataque meeca aparoni osarinti icoantacari corin-tosati intianqueneri jerosaresati quirequi”. Iotacojeitaguempi, irootaque icoasanojeitan-tacari inquempejeitempi, irintacojeitantea iriori.

³⁻⁴ Ari nocantajeitaqueri: “Icoaque corintosati intianqueneri jerosaresati iirequite”. Meeca nontianqueri yoca irijivatanaquea, incantempi pimpiotasanotanteariri. Nimpoi-tanaje narori noneajeitempi, ariorica intsipatanaquea itsipapee maseroniasati. Ariorica irineapaaquempi pivioncaqueneri jerosaresati piirequite, iriojeitapaaque queario nocan-taqueriri, aisati eiro nopashiventatsi narori.

⁵ Ari nocantaqueri yoca ayemisantaririnte irijivatanaquea, pampatojeitanteariri piire-quite. Avirojei cantashitachari peerani: “Nintacoteari ashinoncaincari”, te naro cantasan-otempine.

⁶ Ariorica pampatoteri piirequite, piquempevetacari panquiveetatsiri: ariorica impan-quitero oshequi oitsoqui, irayero coajica oshequi, impiotero. Iro cantaincha impan-quiterorica capichaji, ari capichaji iraye.

⁷ Piojeitaque jaoca incarate quirequi picoaqueri pimperi. Aitaque incarataque pim-periri. Eiro pitsaneashiretaritsi, aisati eiro piperanataritsi itsipapee. Iro icoaqueri Tasorentsi ariorica pintacoteari, pinquimoshiretanaque.

⁸Tempa ioti Tasorentsi icavintsaasanoaquempi catsini, eiro ishinetajimpitsi pashinoncaajeitea. Intimacayempiro maaroni coiteimotaquempiri, impasanotempiro ontimanteari pintacotanteariri aisati itsipapee.

⁹Tempa aitaque ocantini Sanquenarentsi: “Te pantsipetashiteaji pintacojeitari ashinoncaincari, eiro catsini ipeacotarotsi Tasorentsi picavintsanti”.

¹⁰Yora Tasorentsi ipapinitiri panquiveetatsiri oitsoqui impanquitantearori, aisati ipapinijetaquee avajeitari. Tempa aisati irishequianaquempiro timimojeitempineri ontimanteari pincavintsaajeitantariri ashinoncaincari.

¹¹Aiquero irovanaaquempiro Tasorentsi, pintacotasanoanteariri itsipapee. Impoiji impasonquijeiteri iriori Tasorentsi, irineacameetsatasanojeiteri.

¹²Ariorica intacotanea arori, ampanoteri ashinoncaincari coiteimotacariri. Iro cantaincha aisati avamejeiteri impasonquijeiteri Tasorentsi.

¹³Ariorica pincavintsaajeiteri piyemisantaririnte, iriojeitanaque iriori queario aviojeitae quemisantanojeitiriri Quirishito. Aisati iriojeitanaque te pintsaneempariji piirequite, irointi oshequi pintacotantaca, impoiji irineacameetsajeiteri Tasorentsi.

¹⁴Oshequi iquenqueshirejetaquempi, aisati oshequi icantapinitiri Tasorentsi iramitacojeitempi. Iojeitae oshequi catsini ineshinoncajeitaequempi Tasorentsi.

¹⁵Tsame ampasonquijeiteri, tempa icavintsaasanojeitaeque catsini.

10

Icamantacoventaja irisati Pavoro.

¹Ari itimi quisagenari, cantajeitaequempiri: “Ariorica itsipajeitaequempi Pavoro, it-saroacaajeitaequempi. Ariorica itimi arejiqui ipacantaquempi sanquenarentsi, iquisatsataquempi”. Ari timatsi noninti noncamantempiri. Tempa ineshinoncajeitaeque Quirishito, te irishintsitsatejei: aisati noninti nonquempetempi narori.

²Timatsi yora cantimpiri: “Te iranteroji Pavoro icoacaavetariri Tasorentsi, irointi yantashitacaro icoayetiri iriori”. Terica irimajerete iriori, pamenavaquenayea eiro nontsaroacaapaaritsi, irointi nonquisatsatapaqueri. Iro cantaincha te noncoyeji nonquisatsajeitapeempi, irointi nocoaque aacameetsatavacaajeitea maaroni.

³Aca quipatsiqui timatsi camaari quisajeitaequeeri: tecatsi ancantea amanateri; te inquempejeiteariri atiripee amanajeitantariri.

⁴Te ontimeji amanatantariri, iro cantaincha timatsi irinti Tasorentsi tasoncacoventajeitaequeeri ampiajeitantariri camaari.

⁵Timatsi yora piatsatacariri Tasorentsi, aisati cantiriri ashaninca: “Eiro piquemisantiritsi Tasorentsi”. Iro cantaincha itasoncacoventajeitaeque Tasorentsi aimajerentajeitantariri maaroni piatsajeivetacariri, aisati anquemisantacantariri, irishiretasanotantariri Quirishito.

⁶Aisati anta pinampiqui, niotaque piquemisantajeitaequena, iro cantaincha naamaaca itimaarantaque aparopee piatsataquenari. Irintiquea yora piatsataquenari, noncanteri Tasorentsi iroasanquejeiteri.

Icantiri Pavoro: “Narotaque itiancane Quirishito”.

⁷Ainiro caveaquenari, aisati tseencaquenari. Ijivetaquena te naro itiancane Quirishito. Icantacotashitaca irisati: “Naro itiancane Quirishito”, iro cantaincha noncantempi nainti: narosanoaque nainti itiancane.

⁸Nocantapinitaequempi itiancaquena, iro cantaincha queariotaque oca nocantimpiri. Icoacaquena Avincatsarite nonquemisantacaasanojeitempi: te incoacayenaji nontseencacaejeitempi. Nantiniri icantaquenari, irootaque caari nopashiventanta.

⁹Eiro pijititsi notsaroacaajeitimpiri, irootaque noquisatsatantaquempiri nosanquenatitaquempiri peerani.

¹⁰Timatsi cantimpiri: “Isanquenatashita Pavoro, te irioteji. Iquisatsatashitaquempi. Ariorica impoque aca, pineavaqueri tecatsi pimpincatsatimenteriri. Te irioteji inquenquetsatacaasanojeitempi”.

¹¹Pincamanteri iriori: “Ariorica irareejeitempi Pavoro, incamantasanotapaajempiro oca isanquenajeitimpiri. Eiro ipashinitirotsi irineane”.

Te oncameetsateji ashemete, irointi aveshireimenteari Avincatsarite.

¹²Ari inecameetsajeitashitaja irisati yora tseencajeitanari. ¿Paita noncoanteari nonquempeteiteari iriori? Icantajeitaeque: “Nomoncaratavacaajeitaca nainti, nocameetsatasanojeitaeque”. Queario, imoncaratavacaajeitaca, iro cantaincha te iriojeiteji, te anerooji iojeitantari.

¹³ Te noninteji noneacameetsatashitea narosati: apatiro nocoaque nomataqueneri Tasorentsi maaroni icoacaquenari. Niotaque icoacaquena nonquemisantacaasanojeit-empi avirori.

¹⁴ Te nanteroji caari icoacaana, iro cantaincha tempa narotaque intasanotacarori noquenuetsatacaajeitaquemp peerani. Narotaque nainti camantajeitaquempiri ariorica pinquemisantajeiteri Quirishito, iroavisacojeitempi.

¹⁵ Te noninteji noncantashitea nomataquero nainti imataqueri iriori: tempa onashiyetaca. Nocoaque aiquero pijajeitaiye avirori pinquemisantasanojeitanaque. Impoiji novaanafea narori,

¹⁶ nonquenuetsatacaajeiteri itsipapee atiri aisati, yora caariquera iojeitatsi. Eiro nonpoitiritsi itsipapee quenuetsatacantatsiri, eiro nocantashitatsi naro quemisantacairiri yora iquemisantacairi iriori.

¹⁷ Te oncameetsateji ashemetimentero amataqueri arori, irointi ocameetsati aveshireimentearo imatacaajeitaqueleri Avincatsarite.

¹⁸ Te incameetsateji neacameetsatashitachari irisati, irintiquea cameetsatsiri yora ineacameetsatiri Avincatsarite.

11

Yora Pavoro iquenuetsatacotaja irisati, aisati iquenuetsatacotiri quisaqueriri.

¹ Nocoaque nonquenuetsatacotajea aisati. Terica aneroji notantari, iro cantaincha, eiro pishemanatsi.

² Pamene, tempa icoasanotapiniti shirampari irayero caari neiri shirampari. Ariorica oneaqueri pashini shirampari impiincaquero, irojocajero. Aisati noquempetaca narori, nocoaque nonquemisantacaasanotempi irineacameetsatasanotantempiri Tasorentsi, eiro yojocantimpitsi.

³ Peerani yora maranque yamatavitaquero Eva. Queariya, iquempetacantimpicari yoranqui: yamatavijeitimpicari. Piquemisantasanojeivetacari Avincatsarite, pipincatsatananojeivetacari. Yojocacaimpirocari amatavitantatsiri.

⁴ Te pinquenueshiretimateaji. Piquemisantashijeitavacari maaroni jatashijeitimpiri. Onashita oca iquenuetsatacotaqueri Jesoshi. Nocoacaquempi oamejeitempi Ishire Tasorentsi, icoacaquempi shirori iroamejeitempi camaari. Nocamantajeitaquempi pinquemisanteri Jesoshi pavisacojeitantajeari, onashita yoamejeitaquempiri iriori amatavijeitimpiri. ¿Paita piquemisantajeitantariri?

⁵ Itseencajeivetana iriori, iro cantaincha ¿paita noncoanteari nonpincatsateri iriori?
⁶ Yaamaavetaquena te nonquenuetsate cameetsa, iro cantaincha timatsi nioyetiri. Piojeitaquena, piojeiti timatsi nioyetiri.

⁷ Pamene, peerani iroaquera noquemisantacantaquempiri, tecatsi noncoacotimajeitempi, iro cantaincha naamaaca ocameetsaveta noncoacotempime.

⁸ Naaque iirequite ipaquenari itsipapee quemisantatsiri nomatantarori noamejeitaquempi.

⁹ Nosaviquimojeitantimpiri, nashinoncaavetaca, iro cantaincha te noncamantempiji. Impoiji iponeaca Maseroniaqui quemisantatsiri, ipapaaquenari aisati quirequi. Tecatsi catsini noncoacojeitempi avirori.

¹⁰ Niotaque irootaque icoacaquenari Quirishito. Meecca noncamantajeiteri maaroni acayasati tecatsi noncoacojeitempini peerani.

¹¹ ¿Paita noncamantanteariri? ¿Pijitimpa te nonintajeitempi? Ioti Tasorentsi queario nonintasanojeitaquempi.

¹² Iro cantaincha nocoaque niotacaasanojeitempi te nonquempetariji yora itsipapee oamejeivetimpiri, amatavijeitimpiri. Pipinatiri, irootaque yoamejeitantaquempiri iriori. Naroquea nainti, tecatsi noncoacotemp.

¹³ Te intianqueriji irinti Tasorentsi. Yamatavijeitaquempi. Ishiacantashitaca itiancane Quirishito.

¹⁴ Aitaque icanta, yamatavianti, iquempetacari Satanashi, yamatavianti iriori. Ishiacantashitacari iriori inampire Tasorentsi.

¹⁵ Aitaque icantari quemisantiriri camaari: ishiacantashitaca iquemisantiri Tasorentsi. Iro cantaincha coajica impiateari Tasorentsi, iroasanquetaajeiteri.

Yora Pavoro yanaacojeitiri quisaqueriri, iotasanoti.

¹⁶ Nampiitajempiro: eiro pijitashitanatsi te aneroji notantari. Pijitenarica caari iotatsi, pinquenueshiretero oca: capichaji nonquenuetsatacotajea narosati.

¹⁷ Te incamantenaji Avincatsarite nonquenuetsatacotea, te incoacaayenaji noshemetashitea.

¹⁸ Iro cantaincha ishemejeiti irinti yora quisajeitaquenari: meeca nonquempeveteari narori, noshemete.

¹⁹ Pijijeiveta piojeitaque avinti, pitseencaquena, iro cantaincha piquemisan-tashitaquena.

²⁰ Irintiquea yora amatavijeitimpiri, te pintseenqueriji irinti. Oshequi iperanajeitaquempi, yaapitsajeitaquempi piirequite, ishemetimojeitaquempi, aisati ipasavoroniro-jeitaquempi. ¿Paitaquea?

²¹ Queario, te nioteji nonquempeteari.

Ari ainiro oshequi ishementimentiri: meeca nonquempeteari, oshequi noshementimenta-
quero narori, onquempeteame te aneroji niotantari.

²² Ishementimentaquero ijoriotaque. Tempa narotaque narori jorio. Ishanincatacari Ishiraeri, yora icoyeane Tasorensi. Aisati noquempetacari narori. Icanti: “Noshanincatacari Avaramani”. Aisati narori, noshanincatacari.

²³ Icantashiveta: “Nantiniiri Quirishito icoacaquenari”. Oshequi nainti nanaacota-
queri. ¿Paitaquea noshementantacari? Oshequi noquearioventaquero nantiniiri Quirishito
icoacaquenari, irootaque yoiminqeanteetapinivetaquenari caravosoqui, ipasatantap-
iniyeetaquenari. Oshequi nocamapinivetaca.

²⁴ Yora nojorioririnte ipasatapinitaquena, tac, tac, tac, tac, ocarataque 39 ipasataquena. Pashini quitaiteri aisati 39 ipasanatajana, tac, tac, tac. Aisati iquempetajana pashini
quitaiteri, ocarataque quitaiteri apapacoroni.

²⁵ Pashini quitaiteri ipasanatapinitaquena, tac, tac, tac. Impoijini aisati ipasatajana,
tac, tac, tac. Iro aisati ipasatajana. Iro ipasatantanari inchaquipee. Pashini aisati
ipichanayetaquena mapi, pitsec, pitsec, pitsec. Aisati noquenavetanaja pitotsiqui an-
tearojaqui incajare. Jero otsitianaque, irovetaicha nompinqueme. Impoiji aisati
noquempetapinitaca, nompinqueme. Aparoni quitaiteri notsatajataca nianquijaqui,
noquitaitetacotaque.

²⁶ Oshequi noquenaquenayetanaque noquenquetsatantacari. Oshequi nompinqueme
eniqui. Oshequi icoshitapinitaquena coshitantatsiri, yoashinoncaapinitaquena. Iroye-
name noshaninca, aisati itsipapee atiri. Iroyename savicatsiri nampitsiqui. Notimp-
inacavetaca inchatoshiqui, nashinoncaavetaca anta. Irovetaicha nompinqueme an-
tearojaqui incajare. Yoashinoncaaquena shiavetachari iquemisanti.

²⁷ Oshequi opomerentsitimotaquena, oshequi nashinoncaapinitaca. Oshequi te no-
materoji nomaye tsiteniriqui. Noquemapinitaquero notashe aisati nomire. Oshequi
quitaiteri te ontimeji noyerei. Noquemaquero noatsincare, te ontimeji noicoro.

²⁸ Aisati nocantani noquenqueshiretapinitaqueri ayemisantaririnte, nocoacaasanota-
queri inquemisantasanojeite.

²⁹ Ariorica yoashiretaca ayemisantaririnte, noashiretaca narori. Itimirica oashinon-
cairiri, noquisacotacari narori.

³⁰ Ari noshemevetaca, iro cantaincha nocamantajeitaquempiro oca piojeitanteari te
naro matashitearone, irinti Tasorensi matacaanarori paitapeerica.

³¹ Iriotaque Iriri Avincatsarite Jesoquirishito, tsame ancantaitiyempani ampincat-
sajeiteri maaroni. Iotaque iriori te nontseeyaji.

³² Peerani ipincatsariventantini yora Aretashi. Itianquiri ivincatsaririnte ipincat-
sariventanti anta Tamashicoqui. Iriotaque aacantenanemeri. Icoacoajeivetaquena so-
raropee,

³³ Iro cantaincha yaanaquena ayemisantaririnte anta tantotsiqui shoncarori nampitsi.
Yataitacaanaquena irosati omoroquinta, impoini yoaniitacotajana quipatsiqui. Irootaque
nomatantarori noshiapitsatacari pincatsari aacantenanemeri.

12

¹ Pamene, te oncameetsaveteaji nonquenquetsatacotapinitea narosati, iro cantaincha
nocoaque noncamantempi noneaqueri narori. Aisati noncamantempi icamantaquenari
Avincatsarite.

²⁻³ Ocarataque meeca 14 osarinti yaanaquena Avincatsarite anta inquitequi jenoqui,
anta ocameetsaitetasanoti catsini. Ojataquerica novatsa, te nioteji: apanirorica ojataque
noshire. Ioti Tasorensi irinti.

⁴ Tecatsi noncantea noncamantempiro maaroni noquemaqueri anta. Arioricame no-
mavetaquearome, eiro icoacaanarotsi Tasorensi noncamantempiro.

⁵ Oshequi noveshireimentayetacaro noneayetaqueri, iro cantaincha tecatsi noncantea
noshementimentearo. Irointi noncamantempi te noncameetsateji narori. Tecatsi nomate
narori: iriotaque Tasorensi matacaanarori paitapeerica, irootaque noveshireimentan-
tacariri.

⁶ Noveshireimenta quearome nantaqueri narori, eirome otimime niotantari. Aisati nontseyame: pineaquoero, tecatsi nomate apaniro. Te noninteji noncamantempiro nomayetirica narori. Timatsi pineacotaquenari aisati piquemacotaquenari: moncarataca, eiro novaimpirotsi aisati.

⁷ Timatsi oshequi iotacaquenari Tasorentsi, iro cantaincha te incoacayenaji noshemetimentearo. Irotaque ishinentacariri Satanashi yoashinoncaaquena, noquematsicatan-tacarori nojoquiitaca.

⁸ Ocarataque mava nocantavetacari Avincatsarite: “Poavisacotajena”,

⁹ iro cantaincha icantaquena: “Noncavintsayempi, moncarataca. Eiro noavisacotimpitsi, iro cantaincha nontasoncacoventempi pamavetantearori”. Meeca noveshireimentacaro oca noquematsicatarari: niotaque meeca itasoncacoventaquena Quirishito.

¹⁰ Iriotaque noveshireimentasanotacari. Te noshintsiteji, ishirontimentajetaquena itsipapee, noquematsicayetacaro paitapeerica, iquisheetapinitaquena, nashinoncaapinitaca, iro cantaincha noveshireimentacari Quirishito. Iotaque te noshintsiteji, iro cantaincha ishintsitacaquena.

Cameetsa isavicaque Pavoro anta Corintoqui.

¹¹ Pineaquoero, oshequi noquenquetsacotaja narosati. Oncameetsateme pineacameetsatename, pinquenquetsacotename, iro cantaincha, te. Irotaque noquenquetsacotantajari narosati. Te noncameetsateji narori, tecatsi nomatanote. Iro cantaincha te iranaacojeitenaji yora oamejeivetimpiri pineacameetsajeivetari.

¹² Peerani, notsipatantaquempiri, jentsiquero noamejeitaquempi, niotacaasanojeitaquempi queario itiancasanotaquena Tasorentsi. Pineacojeitaquena imatacaquena notasoncantayetaque, nomayetaquoero caari pineapiniti.

¹³ Nintacojeitaquempi, maaroni. Noquempetacaantajetaquempi maaroni quemisan-tatsiri anta otsipapeequi nampitsi. Apatiro avinti, te noncantajeitempiji: “Pimpena coiteimotaquenari”. Ocameetsaveta noncantajeitempime piojeitanteameri. Eiro piquishimentanarotsi te noncamantempiji peerani.

¹⁴ Irotaintsi meeca nojate noneajantempi aisati. Eiro opomerentsitimojeitempitsi, tecatsi noncoacojeitempi. Apatiro nocoaque pinquemisantajeitena. Noquempetacaajeitaquempi notomipee. Atomipee te impapiniteeji coiteimoteeri, ainti apapinitiri coiteimotariri irinti.

¹⁵ Nocoaque nainti nonquearioventasanotempiro maaroni nantaqueri pinquemisan-tasanojeitanteari. Oshequi catsini nonintasanajeivetaquempi avinti, iro cantaincha avirori, te pimpiatenaji pincavintsayena.

¹⁶ Ari picantajeiti: “Queario, tecatsi incoacojeitee Pavoro, iro cantaincha timatsi ionirotantari iriori. Aamaaca yamatavijetaquee, yaantarori paitapeerica”.

¹⁷ ¿Timatsimpa yaitaquempiri yora notiancaquempiri?

¹⁸ Chapinqui notiancaquempiri Tito aisati notiancaqueri itsipa ayemisanraririnte. ¿Timatsimpa yaitaquempiri iriori? Tempa iquempetaquena narori: tecatsi incoacojeitempi.

Oshequi iquenqeshiretaque Pavoro.

¹⁹ Pijitashijeivetaca apatiro nocoaque pineacameetsajeitena. Noquemisantaqueri Quirishito, noshaninca, irotaque nocoantacari nonquemisantacaajeitempi. Iotaque Tasorentsi queario nocantaquempiri.

²⁰ Oshequi noquenqeshiretaca meeca. Naamaaca ariorica noneajeitapaaquempi eiro noneacameetsatasanojeitapaimpitsi. Aisati naamaaca eiro pineacameetsatavaquenatsi narori. Naamaaca noneapaaquempi piquisatsatavacaaca, piquisavacaaca, picanti-matavacaajeitaca, otimi oshequi cantaantsi, pishemejetaque, maaroni; te pisavicajeite cameetsa.

²¹ Naamaaca ariorica nareetajempi aisati noashiretacotapeempi. Iro noashiretacotan-tempiri, yoametaquena Tasorentsi te oncameetsateji pantajetaqueri. Nompashiventacayeari yora caari jocajiro caari cameetsatsati yantapiniyetaqueri: yora mayempiyetirori tsinane, aimentarori ijina, airori iyashiane, maaroni.

13

Icoaque Pavoro inquemisantacaasanojeiteri corintosati.

¹ Ari ocarataque apite noneantantimpiri peerani, meeca noneajantempi aisati. Ari ocantini Sanquenarentsi: “Intimerica apite, ariorica mava neacoterineri ashaninca iran-tero caari cameetsatsati, piotasanotaque queario yantasanotaquoero, oncameetsatanteari poasanquetaajeiteri”.

² Peerani apitetaque nocantajeivetacari yora antirori caari cameetsatatsi, aisati meeca nosanquenajeitaqueneri iroimpacantajejarori oca yantayetaqueri. Eirorica yoipacajirotsi eiro nocavintsaajiritsi aisati.

³ Impoiji piojeitanaque queario novaajeitimpuro irineane Quirishito. Te intsaroacaajeit-empiji iriori, irointi oshequi ipincatsariventajeitaquempi, itasorentsitasanotaque.

⁴ Ipajacotanteevetacariri peerani Jesoshi, te irishintsiveteaji, iro cantaincha itasoncavoentaqueri Tasorentsi, yaneantajari meeca. Te noshintsijeiteji narori, noquempevetacari Quirishito peerani. Iro cantaincha itasoncaventaquena, nomatantarori nopincatsariventajeitaquempi.

⁵ Piotacojeitea avisati, piojeite queariorica piquemisantasanojeitaque. Tempa pioti quiso yoajeitaquempi Quirishito, itasoncaventaajeitaquempi. Terica quiso iroyempi, te pinquemisantseji.

⁶ Nocoaque piojeitaque avirori noquemisantasanojaque nainti.

⁷ Nocantapinitiri Tasorentsi iramitacojeitempi eiro pantantarotsi caari cameetsatatsi. Te noncoaveteaji pineacameetsatashitena, irointi nocoasanotaque pincameetsatasanojeitanaque. Irompa nainti, eirorica pineacameetsatana.

⁸ Tecatsi noncantea nompashinitero irineane Tasorentsi: tempa oqueariotasanotaque; nocoaque pinquemisantasanojeitero, maaroni.

⁹ Iro nocoacaasanojeitaquempiri pinquemisantasanojeite. Ariorica pinquemisantasanojeite, moncarataca, eiro ocantimoneentanatsi pitseencanarica. Aitaque nocantiri Tasorentsi iramitacojeitempi pinquemisantasanojeitanteari.

¹⁰ Noshintsitsajeitaquempi meeca, oncanteata ariorica narejeitempi tecatsiquea noshintsitsatimentapeempiri aisati. Icoacaquena Tasorentsi nompincatsariventante, iro cantaincha te noncoyeji noasunquejeitempi, irointi namitacojeitempi pinquemisantasanojeitanteari.

Ivetsajeitari.

¹¹ Ari, noyemisantaririnte, piveshireimentajeiteari Quirishito. Pinquenqueshirejeitea, eiro papiitajirotsi aisati caari cameetsatatsi. Poveshireacaavacaajeitea, paacameetsatavacaajeitea, impoiji quiso iroajeitempi Tasorentsi. Tempa oshequi inintajeitaquee, cameetsa isavicacaajeitaquee.

¹² Piquemisantasanojeitirica, paacameetsatasanotavacaajeitea: eiro piquisavacaajeitajatsi aisati.

¹³ Ivetsajeitimpi maaroni ayemisantaririnte aca.

¹⁴ Nocoaque meeca irineshinoncajeitempi Avincatsarite Jesoquirishito, irinintajeitempi Tasorentsi, aisati quiso oajeitempi Ishire.

Ari ocarati nosanquenajeitimpiri: *Pavoro*

YORA PAVORO ISANQUENATINIRI CARASHIASATI

Ivetsatari Pavoro carashiasati.

¹⁻² ¿Savicajeitatsimpi, carashiasati? ¿Tecatsimpa oajeitempine? Narotaque aca Pavoro sanquenatimpirori oca. Te naro itiancane atiri, te incantenaji atiri: “Pinquenquetsate”. Irintiquea tiancana yora Jesoquirishito noquenquetsatacapinitiri atiri. Aisati iriri iriori itiancaquena: yora oitinaajiriri. Nocarajeitaqueri aca quemisantajeitatsiri, nosanquena-jeitaquempi noyemisantaririnte, maaroni.

³ Nocantapinitiri Apa Tasorensi: “Pineshinoncajeiteri carashiasati, cameetsa pisavica-caajeiteri”; aisati iriori nocantiri Avincatsarite Jesoquirishito.

⁴ Tempa irisati shinetaincha peerani ipajacotanteetarari, irootaque inintacaqueriri Apa Tasorensi. Te ancameetsajeiveiteani, irootaque ipajacotimentantaqueeri, aisati yoavisacojeitajeeri, maaroni. Te incoacayeriji tseencantatsiri irantacaajeitajeero caari cameetsatsi.

⁵ Tsame aneacameetsatasanojeiteri Tasorensi, ancantaitiyempani. Aitaque ancanta-jeiteari.

Itimi aparo oavisacotantatsiri: yora Jesoquirishito.

⁶ Noquenqueshireacotaquempi, jaoca picantajeitacari. Icoyeaquempi Tasorensi, irootaque ineshinoncatantaquempi Quirishito. ¿Picatimaitacampa pojocajerome piquemisantiri? ¿Pijitimpa eiro imatirotsi iroavisacotajempi? ¿Picoaquempa pashini oavisacotempineri?

⁷ Queario nocamantajeivetaquempi jaoca pincanteari pavisacotantajeeri. Eirorica piquemisantana, eiro pavisacotajitsi. Iro cantaincha timatsi pashini, comitacaajeitaquempi. Icoaque pashini irantacaajeitempine, icantavetimp: “Eiro imatirotsi Quirishito iroavisacotempi”.

⁸ Ariorica nompashiniterome oca nocamantitaquempi, oncameetsateme iroasanquetaqueenname Tasorensi, intianquename Sharincaveniqui. Aisati inquempetea iriori, ariorica impashiniterome inampire Tasorensi, oncameetsateme aisati iroasanquejeiterime Tasorensi.

⁹ Aitaque nocamantitaquempi, meeca nampiitajempro: intimerica pashiniteroneri nocamantitaquempi, aitaque iroasanquetaqueeri Tasorensi.

¹⁰ ¿Janicampa nocoaqueeri nonquimoshiretacayeri? ¿Iriompa atiripee? Teve, tempa irinti Tasorensi. ¿Iriompa atiri nocoaque noveshireacayeari? Noncoaqueme noveshireacayeari atiri, tecatsi noncanteame nantenerime Quirishito.

Jero oca icamantapinitiriri Pavoro.

¹¹ Meeca, noyemisantaririnte, piojeitaque nocamantajeitaquempi jaoca acantajeitajari avavisacojeitantajari. Te irio atiri ashitearone irineane.

¹² Caari ini atiri iotacaanarori oca, te irio oametenarone atiri. Irinti Jesoquirishito iotacaanarori maaroni.

¹³ Piojeitaque jaoca nocantaveitaniri peerani: naro jorio, nomoncaratasanoveitaroni maaroni yamejeitari noshanincaptee. Piojeitaque aisati noquisaveitarini maaroni quemisantajeitiriri Tasorensi. Nocantirive, nocoaveitani nojocacaajeiterime iquemisantajeiti.

¹⁴ Queario, nomoncaratasanovetacaró maaroni yamejeitacari noshaninca: nanaacojeitaqueri maaroni noshiramparirinte. Aitaque, nomatasanoveitaroni maaroni yamejeitaniri noshanincani peeraniniri.

¹⁵ Iro cantaincha peerani, tequeratsitani nontimeni, iotitanani Tasorensi. Ineshinoncatitanani, irootaque icyoeyantajanari yoavisacotajana.

¹⁶ Inijaaquenari itomi, noneasanotantajariri: nioti jaoca icantari. Caari pinajeiveta noshaninca, iro cantaincha icoacaquena nocamantajeitantajimpiri jaoca icantajeitaqueeri yoavisacojeitantaqueeri. Te nosampitashiteariji itsipapee atiri: “¿Paita nanteri?”

¹⁷ Tempa itiancaquena Tasorensi irinti noquenquetsati. Te nojateji Jerosarequi nosampiteri itsipa itiancane: yora ijvataqueri itiancaqueri, ainti nojataque Araviaqui. Impoiji nopianaja aisati Tamashicoqui.

¹⁸ Ari mava osarints nosavicanaque, impoiji nojatanaque Jerosarequi, irosati nonean-tapaacari Sejashi. Ocarataque quitaiteri 15 nosaviquimotaqueri.

¹⁹ Aisati noneaqueri Santiaco, yora irirenti Avincatsarite. Te noneeriji itsipapee iroamereni Jesoshi.

²⁰ Ineaquena Tasorensi, iotaque te nontseejaji. Queariotaque oca nosanquenataquem-piri.

²¹ Impoiji aisati noquenayetanaque anta Shiriaqui aisati Shirishiaqui.

²² Tequerani irojeitenani quemisantajeitiriri Quirishito anta Joreaqi,

²³ irointi iquemacotashitaquena noquemisantaji. Icantajeitaque: "Iquisajeiveiteeni maaroni, icoaveitani impoyereajeiteeme, iro cantaincha meeca icamantajeitaqueri atiri: 'Pinquemisantajeiteri Quirishito'".

²⁴ Iveshireimentaquena quemisantajeitatsiri anta, icantajeiti: "Tempa icameetsati Tasorensi, yoavisacotaqueri Pavoro".

2

Ipianaja aisati Pavoro Jerosarequi.

¹ Ari opeeraniitanaque, ocarataque 14 osarintsi, ari nopianaja Jerosarequi. Notsipatanacari Verenave aisati naanjiriri iriori Tito.

² Iotacaaquena Tasorensi ocameetsati nojataque. Apaniro nojatashijeivetacari yora jivatacaaajeitiriri ayemisantaririnte, te nojatashijeiveteariji maaroni quemisantajeitatsiri. Nocamantasanotaqueri oca nocamantapinjjeitimpiri. Nosampjeitiri: "¿Ocameetsatimpa oca nocamantajeitiriri yora itsipapee atiri? ¿Natsipetashitarompa?" Icantajeitana: "Je, cameetsa; te pantsipetashitearoji".

³ Pamene, notsipatacari iriori Tito. Caari ini jorio, iro cantaincha te incantajeiteriji: "Pintoyeantea".

⁴ Aisati itimi iriori cantavetachari: "Naro piyemisantaririnte", iro cantaincha caari ini. Te noncajemeriji: iqueashitapaaca anta noametavacajeitanta. Iro iqueantacari, icoaque iriote nomoncarajeitirorica isanquenare Moishishi, icoajeiveta intoyeantacaaajeiteeme. Te irioteji avisacojeitaja maaroni quemisantajeitaqueriri Jesoquirishito, te imperanajeiteeeji Quirishito amajeitero yajejeitacari joriopee.

⁵ Te nonquemisantimateriji yora amatavitenanemeri. Nocoasanotaque pitasanotero jaoca acantajeitajari avavisacotantajari.

⁶ Tecatsi pashini incantena yora jivatacaaajeitantsiri. Te incantenaji: "Impeajeitajea itsipapee atiri jorio iravisacotantajeari". Pamene, peerani iroamereni Jesoshi inaveitani, iro cantaincha te nompincatsatashiteariji. Tempa iquempjeitae arori: ioti icomijeita iriori. Aisati iriori Tasorensi, te impincatsateariji: iotiri icomijeita, tempa atiri ini.

⁷ Tecatsi imperanate, irointi icantaque: "Queario, itiancaqueri Tasorensi Pavoro iquenquetsatacairi itsipapee atiri, icamantajeitiri jaoca incanteari iravisacotantajeari. Iquempetaca itiancaqueri Petero icamantajeitiri ashanincasanori arori".

⁸ Queario, yora Tasorensi itiancaqueri Petero iquenquetsatacaajeitiri joriopee. Naroquea nainti, itiancaquena noquenquetsatacaajeitiri itsipapee atiri.

⁹ Pineaquero, ijivatacanti Santiago, Sejashi, aisati Joa. Ari iojetaque iriori itasoncacoventajana Tasorensi. Yaacameetsajeitavaquena, aisati yaacameetsajeitavaqueri Verenave; icantajeitaquena: "Queario, aquempetavacajeitaca. Oquempetaca noquenquetsatacaajeitiri narori ajorioririnte, pijajeite avinti pinquenquetsatacaajeiteri itsipapee atiri".

¹⁰ Apatiro aisati icantaque: "Pincavintsaaajeiteri ashinoncaincari". Tempa aitaque nametacaro nocavintsapinitiri.

Yantiri Sejashi anta Antioquiaqui.

¹¹ Iro cantaincha ijatantacari Sejashi Antioquiaqui, yantaquero caari cameetsatsi, irotaque nocantantacari. Meeca noncamantempiro jaoca ocantari.

¹² Yareetantapaacari yoacotapinivetacari caari joriotatsi. Ocameetsataque oca, iro cantaincha impoiji yarejeitapaaca itiancane Santiago. Yora Sejashi itsaroacaavacari yora cantatsiri ocameetsati amoncarajeitero isanquenareni Moishishi avavisacotantajeari, irotaque itentareantanacariri yora yoacojeivetacari. Irointiquea oca, te oncameetsateji.

¹³ Impoiji ineacojeitaequeri yora itsipapee jorio yantaqueri Sejashi, iquempjeitacari: itentareashitanajari iyemisantaririnte, ipashiventacaaajeitacari intsipajeitajeari. Iojeive-taca te oncameetsateji intentareeri, iro cantaincha aisati iquempjeitacari Verenave.

¹⁴ Ari impoiji nareetapaaja narori. Noneantapaacariri Sejashi te intsipajeiteariji itsipapee atiri, niotaque te irimoncarateroji oca queariotatsiri acamantajeitiriri atiri: "Yoavisacotashijeitee Jesoquirishito, te incantajeiteeji amoncaratero isanquenare Moishishi avavisacotanteari". Ari napatojeitaca maaroni quemisantajeitatsiri. Nocantaqueri Sejashi: "Tempa aviro jorio, iro cantaincha te pinquempetasantajeari ashanincasanori, irinti piquempetaca itsipapee ashaninca. Pamene, ¿paitasa picoacaantacari yora itsipapee atiri inquempjeitee arori?"

¹⁵ Arojeitaque jorio, ashi airo ajoriojeiti. Te anquempeteariji itsipapee atiri: te iriojeit-erini peerani irinti Tasorentsi.

¹⁶ Iro cantaincha piojeitaque ariorica amoncarajeitaquerome maaroni isanquenareni Moishishini, eirome inecameetsateeme Tasorentsi, ioti antajeitaquero caari cameetsatatsi. Ariorica ashireteari Jesoshi, anquemisanteririca, ari incavintsaanojeitaquee Tasorentsi, eiro iquenqueshiretajirotsi aisati caari cameetsatatsi antajeitaqueri. Ari ashirejeitacari Jesoshi, aquemisantaqueri, irootaque inecameetsajeitantajeeri Tasorentsi, iquempetacantaquee te antajeiteroji caari cameetsatatsi. Te inquenqueshireteroji amoncarataquerorica isanquenare Moishishi. Te irineacameetsatashiteariji yora moncarajeiteronemeri maaroni ocantiri isanquenare Moishishi". Irootaque nocantaqueriri Sejashi aisati maaroni nojorioririnte.

Eiro oavisacoteetsi isanquenare Moishishi.

¹⁷ Pamene, ¿paita aventantacariri Quirishito? Tempa acoaque iroameetsajeitajee. Tempa oamejeitaquee isanquenareni Moishishi ainiro antane, irootaque aventantacariri Quirishito. ¿Yantacaajeitaqueempa Quirishito caari cameetsatatsi? Teve, te irantacaajeiteeroji.

¹⁸ Ari notseencaquero isanquenare Moishishi, eiro oavisacojeiteetsi. Noncantempiricame meeca: "Tsame amoncaratero isanquenare Moishishi avavisacotantajeeri", tempa otmimeme nantane.

¹⁹ Pineaquero, te noncanteji narori: "Nomoncarayetaquero isanquenayetiniri Moishishi". Oquempetaca nocamaque, te nonquenqueshiretajoroji. Oametaquena eiro nomatirotsi maaroni ocantiri, aisati oametaquena noquemisantaqueri Tasorentsi. Iriotaque irinti oaneaquenari, naneantacari meeca; irootaque noquemisantantacariri narori. Ipajacotaca Quirishito coroshiqui, icamaque, torein. Oquempevetaca notsipatacari narori coroshiqui, nocamaque, torein,

²⁰ Irootaque caari noquemisantantari cantavetanari: "Pinquemisantero isanquenare Moishishi pavisacotantajeeri". Queario, aneatsiquera noni, iro cantaincha te naro aneashitachane apaniro, irinti quiso yoana Quirishito. Iriotaque itomi Tasorentsi noquemisantaqueri, matacaanarori maaroni cameetsatatsiri nantayetiri. Inintasanotaquena, ishinetacotaca yoyeetaqueri, icamimentaquena irootaque yoameetsatantaquena.

²¹ Te irantsipetashitearoji Tasorentsi ineshinoncajeitaquee. Iro cantaincha, pijitacari ariorica pimocarajeitaquero isanquenare Moishishi ari pavisacojeitaque. Paventaquearoricame isanquenare, tecatsi pincantea pinquemisanteri Quirishito. Eirorica piquemisantiritisi, tempa yatsipetashitaca icamimentaajeitaquempi.

3

Ariorica aquemisanti, quiso oajeitaquee Ishire Tasorentsi.

¹ Meeca, carashiasati, te aneeroji piotantari. ¿Janicampa amatavijeitimpiri? Peerani nocamantajeitaquempini ipajacotimentaajeitaquee Jesoquirishito yoavisacotantajeeri. Pitotasojeivetacaroni, meeca picomitanajaro.

² Aparo nosampijeitempi: ora Ishire Tasorentsi, ¿paita quiso oajeitantaquempiri? ¿Irompa pimocarajeitaquero isanquenare Moishishi quiso oajeitantaquempiri? Tempa iro quiso oantaquempiri pishiretacarero nocamantitaquempiri. Tempa pinquenqueshireempa.

³ Piquemisantantacari peerani, ¿paita oavisacojeitaquempiri? Tempa iro Ishire Tasorentsi. ¿Paitasa picoantacari meeca pimocarajeitero isanquenare Moishishi? ¿Arimpa omatacaajeitaquempi icoacaajeitaquempiri Tasorentsi?

⁴ Oshequi pineacatsitimentari Jesoquirishito. ¿Patsipetashitarompa? ¿Ariompa pintseencajari meeca?

⁵ Pamene: tempa itiancaquempiro Tasorentsi Ishire. Tempa itasoncacoventapinitaquempi. ¿Paita itasoncacoventantaquempiri? ¿Irompa pimocarapinitaquero isanquenare Moishishi? Teve. Tempa pishiretacari, irootaque itasoncacoventantaquempiri.

Ishiretacari Avarama Tasorentsi, irootaque inecameetsatantacariri.

⁶ Tempa aisati piquempetacari Avaramani. Ishiretacaroni peerani maaroni icantaqueriri Tasorentsi, irootaque inecameetsatantacariri, oquempevetaca te iranteroji caari cameetsatatsi.

⁷ ¿Janica meeca shanincatasanotajariri Avaramani? Tempa yora quempetasanotajariri: yora shiretasanotariri Tasorentsi, quemisantasanotiriri.

⁸ Ora irineane Tasorentsi oquenquetsatcotiri itsipasatipee atiri. Ocantitani coajica inquemisantajeitaje atiri iravisacotantajeeri. Yora Tasorentsi peerani icamantaquerini

Avaramani, icantiri: “Pishiretaquena, irootaque notasoncacoventantaquempiri. Aisati nonquempetaqueri yora itsipapee atiri: ariorica irishiretena, nontasoncacoventaqueri”.

⁹ Aitaque icanta, itasoncacoventajeitiri maaroni quemisantatsiri, iquempetacantajeitaqueriri Avarama.

¹⁰ Ainiro inaveta coatsiri irimoncarajeiterome maaroni isanquenareni Moishishi, iravisacotantajeameri. Te irimateroji, irootaque iroasanquetantajeitariri Tasorentsi, intiancajeiteri Sharincaveniqui. Pineaquero, ocanti Sanquenarentsi: “Iroasanquejeiteri Tasorentsi yora caari moncaratasanojeitiro maaroni isanquenatiniiri Moishishi”.

¹¹ Pineaquero, tecatsi ancantero amoncarajeitero ora sanquenarentsi. Eiro ajititsi amoncaratasanojeitero avavisacotantajeiri. Eiro inecameetsatashijeiteetsi Tasorentsi, irointi icantaquee: “Ariorica pishiretena, ari noneacameetsajeitaquempi, impoiji pincantaitatiyempani paneajeitanaje inquitequi”.

¹² Aisati isanquenareni Moishishi, te oamejeiteeji ashireteari Tasorentsi avavisacotantajeiri, irointi oamejeitaquee ancantatiyempani amoncaratasanotero ocantayeteeri, avavisacotantajeiri.

Yantaqueeneri Quirishito.

¹³ Te amoncaratapiniteroji isanquenareni Moishishi, irootaque incantanteemeri Tasorentsi: “Pijate Sharincaveniqui”. Te amoncarajeiteroji, iro cantaincha icamimentaquee Jesoquirishito, yoavisacojeitaquee. Tempa ocantitani Sanquenarentsi: “Yora pajacotachaneri inchatuqui incamimentero maaroni antirori caari cameetsatatsi”.

¹⁴ Ari icamimentajeitaqueri pashinisatipee atiri, yoavisacojeitantajariri maaroni quemisantajeitiriri. Aisati iquempjeitani iriori yora Avaramani, iquemisantini, irootaque yavisacotantajari. Aisati Ishire Tasorentsi, quiso oajeitaquee maaroni arori quemisantajeitiriri. Irootaque icashiacaitacariniiri Avaramani peerani.

Icashiacaaitacariniiri Tasorentsi Avaramani.

¹⁵ Pinquengueshiretero, noyemisanteririnte, oca amejeitacari. Ariorica acoaque ancashiacayeri ashaninca amperi paitapeerica, asanquenateneri acashiacaqueriri, iriotasanotantearori. Aisati asanquenatero avajiro. Impoiji tecatsi ancantea ampashinitapinitero, eiro amatirotsi amataviteri yora acashiacaqueri paitapeerica.

¹⁶ Aisati iriori Tasorentsi, icantiri Avarama: “Ariorica pinquemisantena, ari noavisacotajempi”. Aisati icantaqueri: “Nontianqueri pishaninca, coajicani, iroavisacojeitajeri maaroni quemisanterineri”. Pamene, te incanteriji: “Nontiancajeiteri oshequi oavisacojeitempine”. Teve. Irinti iquenquetsatacotaqueri aparoni ishaninca, oavisacotantatsineri: yora Quirishito.

¹⁷ Pineaquero, otimi icantaqueriniiri Tasorentsi Avaramani peerani. Icantantacariniiri, tequerani ontimeni isanquenareni Moishishi. Impoiji ocarataque osarintsi 430, ari isanquenatacaqueri Tasorentsi Moishishi. Te impashiniteroji oca icamantitacariniiri yora Avarama, te iramataviteriji.

¹⁸ Incoaqueme Tasorentsi amoncaraterome isanquenare Moishishi avavisacotanteameri, eiro aquempetarime Avarama. Te ontimeniji irimoncaratantearomeri. Te iranteroni iriori ocantiri isanquenare Moishishi, irointi iquemisantaqueri Tasorentsi, irootaque icantantacariri: “Noavisacotempi”.

¹⁹ Ari, ¿paita otimantacari isanquenare Moishishi? Iotacaajeitaquee ainiro antane, irootaque acoajeitantacari oavisacojeiteeneri. Ipocaque Quirishito, te meeca ancoajeroji isanquenare Moishishi. Tempa iriotaque Quirishito ishanincani Avarama: yora icamantitaniri peerani Tasorentsi: “Nontiaquempiri coajica oavisacotempineri”. Aisati noncamantempiro oca: yora Tasorentsi icantiri inampire: “Pincamantaiteri Moishishi noneane”. Impoiji iriori Moishishi yovaaqueneri atiripee irineane Tasorentsi.

²⁰ Irintiquea Avarama iriotasanotaque neanatanotaqueriri Tasorentsi, tecatsi ovayenerine irineane. Apaniro icamantaqueri, apaniro ini.

²¹ Peerani icantiri Tasorentsi Avarama: “Ariorica pinquemisantena, noavisacotempi”. Ari impoiji isanquenatacari Moishishi, otimantacari isanquenare. ¿Onashitampa oca icantaqueriri Moishishi? Teve. Meeca ayojeiti te oavisacojeiteeji isanquenare Moishishi, tecatsi oncante oameetsatasanojeitee.

²² Oamejeitaquee sanquenarentsi ainiro antaneppee maaroni. Te amajeiteroji icoacaqueri Tasorentsi. Iro cantaincha timatsi icantajeitaqueeri maaroni arori shirejeitariri: ariorica anquemisanteri Jesoquirishito, aitaque iroavisacojeitaquee.

²³ Peerani, oshequi operanajeitaquee isanquenare Moishishi, oquempetacari variria, ariorica iroiminqueaquee caravosoqui. Oquempetacantaquee oquempoyeajeitaquee irosati ipocantacari yora aquemisantajeitaqueri.

²⁴ Aisati isanquenare Moishishi oshiaqueri oametantatsiri: oamejeitaquee ainiro an-tane, acoantacari anquemisantajeiteri Quirishito, iroameetsajeitantajeeri, inquempetacantajee te anteroji caari cameetsatatsi.

²⁵ Meeca ayojeitaqueri Quirishito, aquemisantaqueri. Aitapaji. Te ancoajeji meeca oametajeeneri anquemisantereri: tempa moncarataca.

Arojei quemisantatsiri, aquempejeticari Avaramani.

²⁶ Aquemisantajeitaqueri Jesoquirishito, irootaque itomintangajeitaqueeri Tasorentsi.

²⁷ Pamene, aisati avatotsatimentari, iojeitantacari atiri aquemisantaqueri, aisati ashanincajeitacari.

²⁸ Meeca acarajeitaqueri jorio, caari joriotatsi, aisati acarajeitaqueri pimantaari, caari pimantacha, shirampari, tsinane, maaroni: amoncaratavacaajeitaca aquemisantajeitaque. Iro cantaincha jaocarica acantajeitari, eiro aquenqueshiretirotsi. Pineaquero, ariorica ashanincatacari Jesoquirishito, ashanincatavacaajeitaca.

²⁹ Aisati oquempetaca, ariorica aquemisantaqueri Quirishito, aquempejeticari Avaramani. Tempa icantirini peerani Tasorentsi: "Pinquemisantenarica, aitaque nontasoncavoentaquempi". Irootaque icantajeitaqueeri meeca arori, eiro yamataviteetsi, irootaque aquempejeticantajariri Avaramani arori.

4

Jaoca acantaveitaniri peerani, tequerani impoqueni Quirishito.

¹ Piotacotiri yameyetacari ashitaarantachari. Itimirica itomi, icoaque imperi maaroni yashiyetari. Aisati icantiri ishaninca: "Ariorica noncamaque, pinquempoyejeneriya notomijaniqui maaroni nashiyetari. Ariorica irantearitanaje, ari pimpajeri maaroni". Ari icoaque imperi maaroni; tempa iriotaque ashijeivetariri itomi maaroni, iro cantaincha ainiroquera ijananequiti, tequeratsita impincatsateaji. Oquempetaca te irishineteriji nampirentsipee impimantayetero iroaararo nampitariri, aisati tequera irishineteri itomi impimantayetero iroaararo.

² Itimi quempoyejiriri, aisati quempoyejiniriri yashiyetari. Ariorica omoncaratapeempa icantaqueriri iririni, aitaque irishineteri paitapeerica.

³ Aitaque aquempevetaniri peerani arori, tequerani impoqueni Quirishito. Oquempoyeaveiteeni isanquenare Moishishi, oamejeiveiteeni antapinijeitironi pomerentsiyetachari. Aquemisantashiyevetaroni icantayetiri atiri, iperanajeiteeni.

⁴ Impoiji omoncarataca acantaqueriri Tasorentsi. Itiancaqueri itomi, otimaqueri tsinane, jorio inavetapaaca, ipomerentsitimentaquero isanquenare Moishishi.

⁵ Ayojeitaque opomerentsitaca amajeitero ocantayetiri isanquenare Moishishi. Aquempevetarini pimantaari, iro cantaincha yoavisacojeitajee, irootaque itomintasanoejitantajeeri Tasorentsi.

⁶ Tempa meeca arojeitaque itomipee, irootaque itiancantajeitaqueerori Ishire Itomi, quiso oajeitaquee. Irootaque meeca acantajeitantajariri: "Apa Tasorentsi".

⁷ Te arojei meeca pimantaari, meeca arojeitaque itomipee Tasorentsi. Ineshinoncajeitaquee, timatsi icashiacaajeitaqueeri maaroni.

Ariorica apomerentsiventajaro isanquenatiniriri Moishishi joriopee, aquempetacari pimantaari.

⁸ Peerani, te piojeiveitarini Tasorentsi, pijitasorentsijeiveitarini irovetsicane Tasorentsi. Tecatsi incantajeitea intasorentsi.

⁹ Iro cantaincha meeca piojeitaqueri Tasorentsisanori, tempa aisati iriotaque iojeitaquempiri. ¿Paita picoajeitantacari pinquempetajee peerani? ¿Picoaquempa pinquempetajee aisati pimantaari? ¿Paita pinquemisantashitantariri caari tasorentsitatsi? Eiro imatirotsi iroavisacotempi.

¹⁰ Pinashitacaapiniyetaro quitaiteripee, cashiripee, osarintsipee, paitapeerica. Iro pinashitacaapiniyetantarori picoajeiveta irineacameetsatempime Tasorentsi.

¹¹ Oshequi nocantashireti meeca. ¿Natsipetashitampa nopomerentsiventimpi noamejeivetimpi?

Iquenqueshireyetiri Pavoro.

¹² Meeca, noyemisantaririnte, pinquempjeitena: eiro pipomerentsiventajarotsi isanquenare Moishishi. Tempa nojocajiro narori, meeca noquempjeitajimpi avirori, te pimpomerentsiventearoni peerani, te pioveitearoni. Nojatashitantimpiniri peerani, te pintseencajeitavaquenaji.

¹³ Aisati piojeitaque nocamantantapaaquempiniri jaoca pincanteari poavisacotea, nojoquiitapaaca narori.

¹⁴ Pipincayevetari mantsiyatetsiri, iro cantaincha te pimpincavaquenaji nainti, cameetsa poisavicavaquena. Impoquericame inampire Tasorentsi, pincavintsayerime; aisati impoquericame Jesoquirishito, pincavintsayerime iriori. Iro cantaincha narotaque nainti areetaquempiri. Oquempetaca pincavintsaavaquerime iriori, picavintsaasotavaquena narori.

¹⁵ Peerani piquimoshireimentavaquena, ¿paita caari piquimoshirejitanta meeca? Peerani picavintsaajeitaquena catsini. Arioricame noncantempime: “Pinquitsoreajenaro poqui, pimpenaro”, ari pimpaquenarome, arioricame pimataquerome. Niotaque oshequi pinintasanojeitaquena.

¹⁶ Ari queariosanotaque oca noamejeitaquempiniri, ¿mecampame piquishimentaquenaro?

¹⁷ Queariompia: icoaque irovshireacayempi yora amatavitimpiri, iro cantaincha eiroyamitacotasantimpitsi. Icoaque pintseencajeitena, pinquemisantanteariri irinti, piveshireimentanteariri irinti.

¹⁸ Pamene, ocameetsati ancoaque ancavintsaavacaajeitea, eiroyamatavitavacaajeitatsi. Ariorica nontsipatempi, ocameetsati ancavintsaavacaajeitea, aisati ariorica nonteentare-anajempi, ancavintsaavacayeani aisati.

¹⁹ Aisati, noshaninca, noquempetaca: oshequi noquenqueshireacotaquempi catsini, tequera pimocarateroji icoacaquempiri Quirishito, tequera pinquempeteari iriori. Nonquenqueshireacotempini, noncanteani, irosati pinquempetanteariri.

²⁰ Nocoasanovetaca nontimotanjempime, cameetsa nonquenquetsatacaanajempime. Te niotacotempiji paitarica noncantempiri ontimanteari piotanteari.

Ariorica aquemisantaque, avavisacojeitaca; eiroyamoncaratajirotsi isanquenare Moishishi avavisacotantajeari.

²¹ Ariorica pijivetaca pimocarataquero isanquenare Moishishi pavisacotantajeari, pincamantena: ¿piotasantirompa ocantiri isanquenare?

²² Ocantitimi itomi Avarama apite. Aparo ashi inampire yamanantiri. Iriyopashini ashi ijinasanori, te iramananteroji iroitini.

²³ Yora otomi inampire iquempetasanojeitacari itsipapee jananequipee. Iro cantaincha inashita irinti otomi ijina. Icantitacaroni Tasorentsi: “Intime pitomi”. Impoiji omoncarataca icantaquerori, itimaque.

²⁴⁻²⁵ Ainiro oshiacantaqueri oca tsinane apite. Opajita nampirentsi Acara. Oshiacantaqueri iroori pomerentsiventirori isanquenare Moishishi. Isanquenataquero iriori icantaqueriri Tasorentsi anta toncaariqui timatsiri anta Araviaqui, pajitachari Shinai. Otomi ora nampirentsi, iquempetajaro iriniro: nampirentsi ini iriori, ainiro perantatari. Aisati oshiacantaqueri nampirentsi joriopee timayetatsiri meeca Jerosarequi: yatsipetashitacaro ipomerentsiventajetacaro isanquenare Moishishi, maaroni.

²⁶ Iro cantaincha ainiro pashini tsinane: ijinasanori Avarama. Oshiacantaqueri iroori savicatsineri pashiniqui Jerosare, timatsiri anta jenoqui. Arojei savicatsineri anta, anampijeitearo iroitini. Te arojei nampirentsi, te ampomerentsiventearoji isanquenare Moishishi, eiroyapomerentsiventarotsi catsini.

²⁷ Irootaque isanquenatacotaqueniri Isayashini: “Pishiravarovetaca, iro cantaincha piveshireanaquea. Tequera pintimeri pitomi, iro cantaincha pinquimoshireitasanotanaque, irishequiasanotanaque pisaripee, eiroyishequititsi osaripee pinampire”.

²⁸ Meeca, noyemisantaririnte, aquempejeitacari ainti Isaca. Ainiro icashiacaqueriri Tasorentsi Isaca, aisati ainiro icashiacaajeitaqueeri arori.

²⁹ Peerani, yora Ishimairi, yora otomi nampirentsi, iquisapinitaqueri irirenti: yora Isaca. Aisati oquempetaca, yora coatsiri amoncarajeitero isanquenare Moishishi iquisapinijeitaquee arori: tempa arojeitaque quiso oajeitaquerori Ishire Tasorentsi.

³⁰ Jero oca ocantiri isanquenatiniri Moishishi: “Icantiri Tasorentsi Avarama: ‘Pintiancajero ora pinampire aisati otomi. Yora Ishimairi, eiroyiquempetasanotaritsi otomi pijinasanori. Yora Isaca irashitasanotajearo maaroni timimojeitimpiri’ ”.

³¹ Pineaquero, noyemisantaririnte, te ashanincajeitearoji ora nampirentsi, eiroyapomerentsiventarotsi isanquenare Moishishi. Irointiquea ashanincajeitacari itomisanori Avarama: yora Isaca. Aquemisantaque, irootaque itomintantaqueeri Tasorentsi.

5

Pincoyeanontea: terica pininte pimpeajea jorio, ari pinquemisanteri Quirishito.

¹ Tempa peerani yoavisacotajee Quirishito, irootaque meeca ocameetsatantari ajatasanojeiteri. Te incoyeji anquempetajeari pimantaari. Eiroyapicoitsi imperanayeetempi pimayetero paitapeerica pavisacotantajeari.

² Pinquemisantasanotena. Narotaque Pavoro camantimpirori oca. Ariorica pintoyeantea, pijiticari oavisacotempi; patsipetashitarocari paventavetacarini Quirishito, eiro imatirotsi iroavisacotempi.

³ Noncamantajempi aisati: ariorica pintoyeantea pavisacotantajeari, ocameetsati pimincarajeitero isanquenare Moishishi, pintsoteaqueru maaroni catsini. Eirorica pimincarajeitrotsi maaroni, eiro pavisacotajitsi.

⁴ Ariorica pininti pimincarajeitero sanquenarentsi irineacameetsatantempiri Tasorentsi, te pincoyeji irineshinoncatempi. Pitseenquiricari Quirishito.

⁵ Iro cantaincha ariorica ashinetero Ishire Tasorentsi oamejeitee anquemisante, ayojeitaque irimoncaratero Tasorentsi maaroni icantaqueeri. Aitaquequea ayojeitaque iroameetsatasanojeitee.

⁶ Ariorica aquemisantasanotaqueri Jesoquirishito, eiro isampiteetsi Tasorentsi: “¿Pitoyeantampa?” Teve. Te inquenqueshireteroji. Ariorica anquemisante, ari anintajeiteri itripapee atiri. Irootaque icoacaaqueeri Tasorentsi.

⁷ Peerani cameetsa piquemisantajeiveitani. Pishiretasanojeivetacaroni quearioyetatsiri. ¿Janicampa jocacaquempirori piquemisanti?

⁸ Te irijocacayempiro irinti Tasorentsi. Iriotaque coyeequempiri iroavisacotempi.

⁹ Otimirica tapiacaarori tanta capichaji, ari otapiacaacaro oshequi tanta, otsoteanaquero, maaroni. Aisati oquempetaca, aparoni amatavitantatsiri yamatavijeitiri oshequi atiri.

¹⁰ Noshiretacari Tasorentsi, niotaque inquenqueshiretacaajempi, pinquempejeitanta-jenari. Te nioteji janicarica ashereaquempiri, iro cantaincha coajica iroasanqueteri Tasorentsi.

¹¹ Timatsi cantanirotatsiri nocamantiri atiri irimoncaratero isanquenare Moishishi. Noncantempime: “Pintoyeantea pavisacojeitantajeari”, eiro nocamantimpime: “Icamentaquee Quirishito coroshiqui yoavisacojeitajee”. Impoiji eirome iquisaname joriopee.

¹² Timatsi yora cantanirovempiri pintoyeantea, oshequi yashereajeitaquempi. No-coaveta narori iraitsoquireempame iriori.

Ariorica pinintavacaajeitea, ari moncarataca.

¹³ Meeca, noyemisantaririnte, noncamantempi. Icoyeequempi Tasorentsi iroavisaco-jeitempi, te irinintacayempiji pimpomerentsiventearo isanquenareni Moishishi. Yoavisacojeitaquempi, iro cantaincha te irishinetempiji pantero paitapeerica picoiri. Icoaque pinintavacaajeitajea maaroni, aisati pincavintsavacaajeitajea.

¹⁴ Jero oca isanquenatiniri Moishishi: “Oquempetaca avisati cavintsaaiancha, aisati pinquempejeiteri itripapee, pincavintsasaanjeiteri, pinintasaanjeiteri”. Ariorica ama-jeitaquero oca, cameetsa. Moncarataca.

¹⁵ Iro cantaincha piquisavacaajeitaca, oshequi picatsimajeitaque: oquempetaca patsi-cavacaajeitaca, aisati oquempetaca pipatsareavacaajeitaca, patsare. Ariorica pincatsima-jeite, aitaque pimpoyereavacaajeitajea; eiro pimajeititrotsi pinquemisantajeite.

Acoajeivetari arori, aisati ocoacaajeitaqueeri Ishire Tasorentsi.

¹⁶ Noncamantasanotempi: pincertero Ishire Tasorentsi oamejeitempi paitapeerica panteri. Eiro pantitrotsi caari cameetsatsi picoajeivetari avirori pantajeitemeri.

¹⁷ Timatsi caari cameetsatsi acoajeivetari antajeiteri arori, aisati timatsi ocoacaave-taqueeri Ishire Tasorentsi antacayeemeri. Te omoncaratavacayeaji. Onashiyetaca, irootaque caari amajeitantarero cameetsayetatsiri antemeri.

¹⁸ Ariorica anquemisanteru Ishire Tasorentsi paitarica antacayeeri, eiro aquenqueshire-trotsi amoncaratero isanquenare Moishishi.

¹⁹ Ayojeitaquero caari cameetsatsi antapinjeitiri: ineavintsatiro shirampari caari yai, oneavintsatiri tsinane caari ai, antavintsatavacaajeita: acantirove, te ampashiventeaji.

²⁰ Aisati ashicantaqueri paitapeerica ajitasorentsitashiyetari, amatsitanti, aquisava-caajeita, aquisatsatavacaajeita, anevetaro paitapeerica yashiyetari ashanincapee, at-simaajencata, te ancavintsavacayeaji, te aacameetsatavacaajeiteaji, irointi aquisashi-reavacaajeita.

²¹ Aisati anintitaqueri aitayeri irovaararo ashaninca, avanti, ashinqujeita, maaroni. Peerani nocamantitimpini: “Queariompiya. Ariorica antapinitero maaroni ocapee, eiro amatitrotsi ajate anta ipincatsaritinta Tasorentsi”. Meeca nampiitajempiro: “Queariom-piya. Pantirocari caari cameetsatsi”.

²² Iro cantaincha Ishire Tasorentsi oamejeitaquee anintavacaajeitaca, aquimoshire-jeitaque, aveshireajeitaca, eiro aquisavacaatsi, acavintsavacaaca, acameetsataque, eiro amatavitantitsi,

²³ aneshinoncatavacaaca, eiro antayetirotsi caari cameetsatatsi acoavetari antemeri. Te ontsaneapitsateeroji isanquenare Moishishi maaroni oca.

²⁴ Yora pajacojeitachari coroshiqui icamajeitaque, torein: tecatsi irantaje aisati. Ariorica aquemisantaqueri Jesoquirishito, oquempetaca arosati pajacotajancha, oshiacantaca acamaque, tecatsi ancantea ancoajeitaje antajero caari cameetsatatsi.

²⁵ Iro cantaincha oshiacantaca oameajee aisati Ishire Tasorentsi, iotacaajeitajee aisati. Tsame ancantero oamejeitee paitapeerica antayeteri.

²⁶ Eiro ashemetitsi, aquisacaaricari itsipapee. Eiro anintashireitiritsi ioyetiri iriori.

6

Jero oca pashini yoameyetiriri Pavoro.

¹ Noyemisanrarinte, ariorica pineeri pishaninca yantiro caari cameetsatatsi, pincantero Ishire Tasorentsi oametempi pincavintsayeri. Queariya, piquishiricari, jentsiquero pineanateri. Queariompiya pantirocari avirori caari cameetsatatsi.

² Pincavintsaavacaajeitea. Ariorica pincavintsante, pimataquero yoamejeiteeri Quirishito.

³ Itimirica shemetatsiri, yamatavitaja irisati. Te incameetsateji iriori.

⁴ Pinquenqueshireempa: piote ocameetsatirica pantayetiri. Ariorica ocameetsati pantayetiri, pinquimoshiretanaque. Eiro pishemetitsi, eiro pitseenquiritsi itsipapee,

⁵ tempa ainiro antajeitiri maaroni.

⁶ Ocameetsati ampapiniteri oamejeiteerori irineane Tasorentsi maaroni coiteimojeitacariri. Te ancoyeji incoiteayetearo paitapeerica. Irinti quemisantajeitiriri pajeiterineri.

⁷ Queariompiya, eiro pamatavijeitajatsi avisati, te incoacayeeji Tasorentsi antseencajeiteri. Paitapeerica apanquiyetiri, aayetajero oitsoquipee oshanincasanori iroori.

⁸ Oshiaquero ariorica antapinitero caari cameetsatatsi acoajeivetari, ari ajate Sharincaveniqui. Ariorica antapinitero ocoacaqueeri Ishire Tasorentsi, ari ancantatiyempani asavique inquitequi.

⁹ Eiro aperatarotsi antapinitero cameetsatatsiri. Ariorica ancantatiyempani antapinitero, ari impinajeitaquee coajicani Tasorentsi.

¹⁰ Ari ocameetsati ancavintsaajeiteri itsipapee atiri, aiquero ajatatiye ancavintsaasanojeiteri ayemisanrarinte.

Ari yovecarataquerori isanquenare.

¹¹ Narotaque Pavoro sanquenatimpirori oca: pineaquero, antearo nosanquenataquero.

¹² Yora coanirovetachari pintoyeantea, icoaque yora ijorioririnte irineacameetsanirorojeiteri. Te irinintanirroteji inquisajeiteri. Incantempime: "Icamimentaquempi Quirishito coroshiqui yoavisacojeitajimpi", ari inquisajeiterime ishaninca.

¹³ Maaroni yora toyeantachari te irimoncarateroji isanquenare Moishishi, iro cantaincha icoanirovetaca pintoyeantea avirori irishemetanteari. Irishemetimentempime, incanterime ishaninca: "Pineaquero, notoyeantacaacari. Iquemisantajeitaquena".

¹⁴ Iro cantaincha te oncameetsateji noshemete nainti, irointi nocoaque noveshireimenteari yora Avincatsarite Jesoquirishito: yora pajacotimenteeri coroshiqui. Meeqa oquempetimotaquena nopajacotaca narori. Nocamaque, te meeca noncoayetajeroji caari cameetsatatsi icoayetiri atiri, te nonquenqueshiretajeiroji caari cameetsatatsi.

¹⁵ Eiro yavisacotashitatsi maaroni toyeantachari, aisati eiro yavisacotashitatsi caari toyeantacha. Iro cantaincha ariorica impashinitacaajee Tasorentsi, ari avavisacotajea.

¹⁶ Ariorica piquemisantaquero oca, ari ishanincataquempi Tasorentsi, aisati nocoaque cameetsa irisavicacayempi, aisati nocoaque incavintsayempi.

¹⁷ Meeqa eiro pashereanatsi, eiro pipiatsatanatsi. Narotaque antaveetiniriri Jesoshi, irotaque iqishimentantanarori tseencantatsiri, irotaque namashiyetantacariri novatsapeequi.

¹⁸ Meeqa, noyemisanrarinte, nocoaque irineshinoncajeitajempi aisati Avincatsarite Jesoquirishito. Tempa aitaque icantapinijeitimpiri.

Ari ocarati. Narotaque sanquenatirori oca: *Pavoro*

YORA PAVORO ISANQUENAJEITINIRI EJESOSATI

Ivetsajeitari Pavoro ejesosati.

¹ ¿Savicajeitatsimpi, ejesosati? ¿Tecatimpa oajeitempine? Narotaque Pavoro sanque-
najeitimpirori oca. Itiancaquena Jesoquirishito noquenuetsatocotiri, irootaque icoa-
caaquenari Tasorentsi. Meeca nosanquenajeitimpiro maaroni quemisantajeitatsiri, ma-
roni quearioventiniriri Jesoquirishito icoacaajeitaquempiri.

² Nocoaque irinешinoncajeitempi Apa Tasorentsi, cameetsa irisavicacaajeitempi. Aisati
iriori Avincatsarite Jesoquirishito: Irinешinoncajeitempi, aisati cameetsa irisavicacaajeit-
empi.

Icoacaaquee Tasorentsi ayojeiteri.

³ Tsame ancamentajeiteri atiri icameetsatasanoti catsini Tasorentsi: yora iriri Avincatsarite
Jesoquirishito. Aquemisantaqueri Quirishito, meeca icantajeitaquee Tasorentsi:
“Pisaviquimojeitena coajica anta inquitequi jenoqui”. Tempa aisati meeca oshequi icav-
intsaaajeitaquee, aveshireimentasanotacari catsini, oquempetaca asaviquimojeitaqueri
inquitequi.

⁴ Peerani, tequerani irovetsiqueroni quipatsi, icoyeajeititaqueeni, iotitacani iroavisaco-
jeitee Quirishito. Iquenqueshiretitacani: “Noameetsatasanoyeiteri maaroni quemisanta-
jeiterineri notomi”. Meeca inecameetsajeitaquee, iquempetacantajeitaquee te anteroji
caari cameetsatatsi.

⁵ Inintasanoyeitaquee catsini, irootaque itiancantacariri Jesoquirishito icamimenta-
jeitaquee. Aitaque icantitani peerani: “Nontomintajeiteari iriori quemisantatsineri”.
Irootaque icoacaajeitaqueeri maaroni.

⁶ Meeca ashanincajeitacari Itomi inintasanotiri, irootaque inешinoncajeitantaqueeri.
Icavintsaasanojeitaquee catsini. Tsame ancantaitiyempani ancamentajeiteri atiri:
“Icameetsatasanotaque Tasorentsi”.

⁷⁻⁸ Inешinoncatasanojeitaquee maaroni, inintasanoyeitaquee catsini. Itiancaqueri
Itomi icamimentajeitaquee, aparajatmentajeitaquee iriraja. Icavintsaasanojeitaquee,
meeca te inquenqueshiretajerorji aisati caari cameetsatatsi antajeitiri. Tempa aitaque
yoavisacojeitaquee. Iotacaajeitaquee, otimantacari ayojeitantajari.

⁹ Aisati iotacaajeitaquee paita itiancantacariri Quirishito: te ayojeiveitearoni peerani.
Aitaque, peerani icoitacani intianqueri iroavisacojeitajee.

¹⁰ Jero oca icoacaajeitaqueeri maaroni: coajica impincatsaritanotanaque catsini
Quirishito. Ariorica omoncarataquee, irampatojeitaquee maaroni catsini: inquiresati
aisati maaroni quipatsisati. Impoiji impincatsariventajeitaquee, maaroni.

¹¹ Ari aquemisantajeitaqueri Quirishito, meeca timatsi icoacaajeitaqueeri Tasorentsi.
Tempa icoyeajeitaquee peerani, catsini: tequerani irovetsiqueroni quipatsi. Timatsi aisati
icashiacaajeitaqueeri: irimajeitaqueero maaroni icantaqueeri.

¹² Narojeitaquee jorio jivajeitatsiri noquemisantajeitaqueri Quirishito, irootaque icoan-
tacari Tasorentsi nompincatsajeiteri, aisati noncantajeiteri atiri: “Icameetsasano-
taque Tasorentsi”.

¹³ Aisati avirojei: piquemacojeitaqueri Quirishito. Piquemaque ipocashijeitaquee
yoavisacojeitaquee. Queario oni, irosati piquemisantantacari. Peerani icantajeitaquee
Tasorentsi: “Ariorica pinguemisantaquena, quiso oajeitempi Noshire”. Meeca quiso
oajeitaquemp, ayojeitantacari pishanincatacari Quirishito.

¹⁴ Ariorica quiso oajeitaquee, ayojeitaquee queario, intsoteajeero Tasorentsi maaroni
icantitaqueeri. Eiro yamataviteetsi. Tempa queario iraajeitanajee inampiqui antsipajei-
tanteariri iriori. Tempa icameetsasananotaque. Tsame aisati ancamentajeiteri maaroni
atiri: “Icameetsataque Tasorentsi”.

Ipasonquitiri Pavoro Tasorentsi.

¹⁵ Noquemacojeitaquemp avirori, piquemisantasanojeitaqueri Avincatsarite Jesoshi,
aisati pinintasanoyeitaqueri piyemisanrarinte.

¹⁶ Irootaque nocantantariri Tasorentsi: “Ariove pimatacaqueri ejesosati”. Nocantani
nopasonquitacoventajeitimp, aisati nocantiri Tasorentsi iramitacojeitempi.

¹⁷ Noquenuetsatacaapinitiri yora iriri Avincatsarite Jesoquirishito: tempa icameetsa-
tasanotaque. Nocantiri: “Piotacaajeiteri ejesosati, piotacaajeiteri jaoca picanta avirori.

¹⁸ Piotacaasanojeiteri, iriojeitantearori jaoca noncantajeiteari, coajica: tempa ocameet-
sasanotaque catsini anta inquitequi”. Tempa yashijeitaquee, irootaque nocoantacari
piojeite ocameetsasanojeiti maaroni icashiacaajeitaqueeri.

¹⁹ Oshequi catsini itasorentsitanotaque, te ompeempaji itasorencia. Itasoncaventa-
jeitaqueri maaroni quemisantajeitiriri. Peerani iotacaajeitaquee itasorentsitanotaque,
²⁰ tempa yoitinaajiri Quirishito. Yaanaajiri anta inquitequi, aisati isavicacaajiri anta
iracosanoriqui icaratajiri ipincatsariventantajeiti.

²¹ Icantaqueiri: “Notiomi, nocoaque pimpincatsariventajeiteri maaroni pincatsarijeive-
tachari, savicacantajeivetachari, jivatacaantajeivetachari, maaroni. Pimpincatsariventa-
jeiteri maaroni timajeitatsiri meeca, aisati pimpincatsariventajeiteri maaroni timajeita-
jantsineri coajicani”. Ari yanaajeitiri maaroni, ipincatsaritanotaque catsini.

²² Aisati icantaqueri: “Avirotaque cantacanterone jaocarica oncantayeteari paitapeer-
ica, aisati pimpincatsariventajeiteri maaroni quemisantajeitimpiri.

²³ Impincatsajeitempi iriori. Tempa piquempetasanotaquena narori, pitasorentsitanota-
caque catsini, picantani pitasoncavoventajeitaqueri maaroni quemisantajeitimpiri”.

2

Itasoncaventaajeitiri Tasorentsi quemisantajeitiriri.

¹ Peerani, avirori, te piojeiveitearini Tasorentsi, pantapiniveitaroni caari cameetsa-
tatsi, irootaque pijajeitanteameri Sharincaveniqui: iro cantaincha yoavisacojeitaquempi
Tasorentsi, irootaque pijajeitanteajeri inquitequi, paneasanojeitapaaje anta.

² Piquempejeiveitarini yora itsipapee tseencantatsiri, piquemisantaveitarini Satanashi,
yora pincatsariventiriri lamaaririnte tasoncantavetachari. Iriotaque pincatsariventa-
jeitiriri maaroni piatsajeitariri Tasorentsi.

³ Tempa peerani aquempeveitarini yora tseencantatsiri, antapiniveitaroni caari
cameetsatatsi acoajeiveitaroni. Acantani, antapiniveitaroni paitapeerica acoaveitaniri,
paitapeerica aquenqeshireveitaniri. Irootaque iqishimentantavetaqueerori
Tasorentsi, iquempetacaantaquee itsipapee atiri.

⁴⁻⁵ Peerani, antapiniveitaroni caari cameetsatatsi, ashi aironi: te ayojeiveitearini
Tasorentsi, aisati ajajeiteme Sharincaveniqui. Iro cantaincha yashi yoiro icavintaasano-
jeitaquee, oshequi inintasanojeitaquee. Peerani yoaneajiri itomi, icantani meeca
yaneanaji. Meeca aisati yoavisacojeitaquee arori, ancantaitatiyempani asaviquimojeiteri
inquitequi. Tempa ineshinoncajeitaquee, irootaque yoavisacojeitantajeeri.

⁶ Icaamaque Quirishito, impojii yoitinaajiri Tasorentsi. Aisati arori aquempevetacari,
ipashinacaquee Tasorentsi arori, aveshireimentajeitacari meeca Quirishito; aisati ay-
ojeiti ancaraajeiteri coajica anta inquitequi.

⁷ Incantaitatiyempani iriotacaajeitajee, oshequi catsini ineshinoncatasanojeitaquee,
icavintaasanojeitaquee: yashi yoiro. Iro icavintaajeitantaqueeri ashanincatacari Jeso-
quirishito.

⁸ Piquemisantaqueri, irootaque yoavisacotantaquempi Tasorentsi: tempa oshequi
ineshinoncatasanojeitaquempi. Tecatsi pincantajeitea poavisacojeitajea avisati, irin-
tiquea yoavisacotashijeitaquempi.

⁹ Arosatime oavisacotajanchaneme, tempa ashemejeiteme.

¹⁰ Iro cantaincha itasoncaventaajeitaquee Tasorentsi ashanincajeitancariri
Jesoquirishito, icoaque antayetero cameetsayetatsiri. Peerani, tequerani antimeni,
otimini icoacaajeitaqueeri antayeteri. Icoaque ancantaitatiyempani antapinijeitero.

*Aririca aquemisantajeitaqueri Quirishito, ari aquempetavacaajeitaja maaroni: jorio
aisati pashinisatipee atiri.*

¹¹ Te avirojei jorio. Ipincajeitaquempi iriori, icanti: “Te iriojeiteriji pashinipee atiri
Tasorentsi, te intoyeantajji”. Ijjeiveta iotiri irinti Tasorentsi.

¹² Pinquenqeshirejeitero jaoca picantajeitani peerani: te pinquemisantajeiveitearini
Quirishito, te pishanincajeiteariji joriopee, te piojeiveitearoni icantayetiri Tasorentsi,
aisati te piojeiveitearoni icashiacaajeitaqueeri. Te pioveitearini Tasorentsi, aisati te
pioveiteani icoaqueni irineshinoncajeitempi.

¹³ Queario, peerani te piojeiveitearini Tasorentsi, oquempetaca pitimini arejiqui
catsini. Iro cantaincha icamentajeitaquempi Quirishito, aparajatimentajeitaquempi
iriraja. Meeca piquemisantajeitaqueri, pishanincajeitacari. Irootaque piojeitancariri
Tasorentsi, quiso poasanojeitancariri.

¹⁴ Peerani narori, aisati maaroni nojorioririnte, noquisajeveitimpini: narori aisati iriori
maaroni pishanincapeeni, aisati piquisajeveitanani avirori. Iro cantaincha yoavisaco-
jeitaquee Quirishito, ipeajiro aquisavacaajeveitani, cameetsa isavicacaajeitaquee. Meeca
aquempetavacaajeitaja maaroni.

¹⁵ Icamimentaquee, eiroquea apomerentsiventantarotsi isanquenareni Moishishi,
tecatsi oncantajeitee. Peerani onashitacaajeiveiteeni, te ashanincatavacaajeiveiteani. Iro

cantaincha meeca ashanincajeitacari Quirishito, aisati ashanincatavacaajeitaca maaroni, aquempetavacaajeitaja,

¹⁶ acatsimareavacaajeitaja maaroni. Iro acatsimareavacantajeitajari, ashanincajeitajari yora pajacotimentajeitaqueeri coroshiqui. Meeca eiro atsipetashitarotsi anquemisantero isanquenareni Moishishi avavisacotantajeari. Meeca aneacameetsajeitiri Tasorentsi maaroni: noshaninca aisati pishaninca.

¹⁷ Narojeitaque jorio: niojeivetaca jaoca icantari Tasorentsi, niojeivetaro irineane, iro cantaincha te nonquemisantajeiteriji. Avirojei, avinti, te piojeiveitearini catsini, oquempetaca pitimini avirori arejiqui. Iro cantaincha ipocaque Quirishito, icamantajeitaquee maaroni jaoca acantajari ashanincatavacantajeitajari, aquempetavacantajeitajari.

¹⁸ Oshequi imataqueeneri Quirishito, irootaque amajeitantarori aquenquetsatacaajeitiri Tasorentsi. Aisati Ishire Tasorentsi oamejeitaquee aquenquetsatacaajeitiri.

¹⁹ Peerani te pioveitearini Tasorentsi, te pishanincaveitearini. Iro cantaincha meeca, pinashijeitaca; piquempejeitacari itsipapee quemisantatsiri, piojeitacueri Tasorentsi, pishanincajeitacari.

²⁰⁻²² Meeca noshiacantempiro. Ariorica avetsiquero avanco, tempa ajivataque amenero cameetsari quipatsi, impoiji amenero otincamipee cameetsatsiri, quisotsatsiri. Impoiji atancotashitaquero maaroni inchaquipee, ashiticaquero oshipee, maaroni. Ariorica antsonquero pancotsi, asavicaque. Aisati aquempejeitacaro, ariorica aquemisantaque. Ijivataque yora itiancaneppee Tasorentsi aisati yora camantantatsiniri icamantajeitaquee jaoca icantari Jesoquirishito: icameetsataque, imataquero yoavisacojeitaquee. Tempa iriotaque meeca Avincatsarite. Impoiji ashequiajeitaque maaroni quemisantatsiri, aisati otasoncaventajeitaquee Ishire Tasorentsi aquempetavacaajeitantajari: tempa ashanincajeitacari Quirishito, maaroni. Meeca yashijeitaquee Tasorentsi, quiso yoajeitaquee.

3

Yantayetiri Pavoro.

¹ Te avirojei jorio, iro cantaincha nonintajeitakuempi. Nocavintsaajeitakuempi, nocamantakuempi: “Ariorica pinquemisantajeiteri Jesoquirishito, ari iroavisacojeitempi”, irootaque yoiminqeanteetaquenari caravosoqui.

² Tempa ineshinoncataquena Tasorentsi, irootaque nomatantarori noquenquetsatacaajeitempi.

³ Iotacaquena caari iojeitini itsipapee, tampatica yoametaquena. Aitaque nosanquenaajeitakuempiro, novaajimpiro icamantaquenari.

⁴ Ariorica pineanatero oca nosanquenataquempiri, piojeitavaquero oca niotacotaqueri Quirishito, caari ioyeetini peerani.

⁵ Te irioveitearoni yora peeraniniri, iro cantaincha Ishire Tasorentsi iotacaajeitaquena: narojeitaque itiancaneppee Quirishito aisati quenquetsatacoyetiriri.

⁶ Te avirojei jorio, iro cantaincha iotacaquena ariorica pinquemisantajeite, pavisacojeitanaque. Pimoncarajeitacari noshanincapee narori: ainiro cameetsayetatsiri icashia-caajeitaqueeri Tasorentsi. Aisati ashanincatavacaajeitaca: noshaninca aisati pishaninca avirori. Ariorica piquemisantaqueri Quirishito, irimoncarajeitakuempiro maaroni icantajeitakuenari narori.

⁷ Irootaque oca noquenquetsatacotapinitaqueri. Ineshinoncataquena Tasorentsi, aisati itasoncaventaquena, nomatantarori noquenquetsati.

⁸ Pamene, noquemisantaveta; iro cantaincha te nonquempeteariji itsipapee quemisantatsiri: tecatsi nomataque narori. Iro cantaincha ineshinoncatashitaquena Tasorentsi, itiancaquena nocamantajeitacueri itsipapee atiri jaoca icantari Quirishito icavintsaanojeitaquee catsini. Te ayotacotashiteariji, irointi oamejeitaquee Ishire.

⁹ Aisati itiancaquena nocamantajeitakuempi icoaque iroavisacojeitempi avirori, aisati maaroni itsipapee atiri. Aitaque peerani catsini icoaqueni iroavisacojeitempi, iro cantaincha te irioyeetini peerani iroavisacojeitempi, iroaquera iotacaajeitaquee. Iriotaque vetsicajeitiriri maaroni timajeitatsiri.

¹⁰ Meeca icoaque iriotacaajeiteri maaroni yora inquitequiniri: yora cantacaantayetatsiri aisati yora pincatsariyetatsiri. Iriojeitanaque inquitequiniri oshequi itasoncaventaqueri Tasorentsi quemisantajeitiriri, impoiji iriojeitanaque ainiro iotantari catsini Tasorentsi, yashi yoiro ioti catsini.

¹¹ Aitaque icoitacani peerani iriojeite maaroni inquitequiniri. Ainiro imayetaqueeneri Avincatsarite Jesoquirishito, iotantacari yora inquitequiniri oshequi ioti Tasorentsi catsini. Irootaque icoacaqueriri.

¹² Aquemisantaqueri Quirishito, irootaque ayotantacari ocameetsataque anquenquetsacayeri Tasorentsi, inquemisantavaquee. Eiro atsaroacaaritsi.

¹³ Piojeitaque noamejeitaquempi, irootaque oshequi yoashinoncanteetaquenari, iro cantaincha eiro poashiretacojeitanatsi, irointi pinquimoshirejeite.

Yora Pavoro icantiri Tasorentsi: "Pamitacojeiteri ejesosati".

¹⁴ Oshequi ioti Tasorentsi, oshequi imataqueeneri, irootaque nopincatsatantacariri, aisati noquenquetsatacapinitantacariri.

¹⁵ Iriotaque ashijeitaqueeri, maaroni quemisantajeitaqueriri. Asavicajeiti arori aca quipatsiquica, ainiro isaviqui pashini inquitequi, iro cantaincha ashanincajeitacari.

¹⁶ Icameetsatasanotaque catsini Apa, itasorentsitanotaque catsini, irootaque nocantantacariri incantero Ishire ontasoncaventempi, impoiji ontimasanotanaque piotanteari.

¹⁷ Nocantaqueri inquemisantacaasanojeitempi, pishiretapinitanteariri Quirishito. Aisati, nocoaque pishirejeitaquearo jaoca icanta Tasorentsi inintasanojeitaquempi, pinquemisantasanojtajariri.

¹⁸ Ariorica pishiretasanotaqueari, pinquempeteari itsipapee quemisantatsiri, piotasanajeite oshequi catsini inintasanojeitaquee Quirishito, te capichaji. Yashi yoiro inintasanojeitaquee, icantani.

¹⁹ Nocoaque piojeite inintasanojeitaquee, iro cantaincha te ayojeiteji paita inintantajeiteeri. Ariorica piojeitaque inintasanojeitaquee, nocoaque aisati pishiretasanajeiteeri Tasorentsi aisati nocoaque irimatacaasanojeitempiro catsini maaroni icoacaajeitaquem-piri.

Tsame ampincatsajeiteri Tasorentsi.

²⁰ Ari itasoncaventasanojeitaquee Tasorentsi, oshequi intacojeitaquee, yoanaaqueero maaroni acoacojeitaqueriri. Tecatsi ancantea antsoteajeitero anquenqueshirejeitero maaroni imajeitaqueeneri.

²¹ Tsame maaroni quemisantajeitiriri Jesoquirishito ampincatsajeiteri Tasorentsi; tsame ancamentapinijeiteri atiripee icameetsatasanoti, ancantaitatijempani. Aitaque ancantajeiteari.

4

Tsame anquempetavacaajeitea, maaroni.

¹ Noquemisantaqueri Avincatsarite, irootaque yoiminquanteetaquenari aca caravoso-quica. Meeca noncantajeitempi: cameetsa pisavicajeite; icoyeajeitaquempi Avincatsarite, meeca pimajeiteneri maaroni icoacaajeitaquempiri.

² Eiro pishemejeititsi, pincavintsantajeite, eiro pishemajeitaritsi pishaninca, irointi pinintajeiteri, eiro piquishiritsi.

³ Pincantajeitero Ishire Tasorentsi oamejeitempi pinquempetavacaajeitanteari, cameetsa paacameetsatavacaajeitanteari.

⁴ Maaroni quemisantatsiri ashanincatavacaajeitaca, aisati ainiro Ishire Tasorentsi apaniro, ora quiso oajeitaqueeri. Amoncaratavacaajeitaca: icoyeajeitaquee Tasorentsi, ayojeitaque irimajeitaqueenero maaroni icantajeitaqueeri, irootaque aveshireimentasanojtantariri.

⁵ Icarataque Avincatsarite apincatsajeitaqueri apaniro, amoncaratavacaajeitaca aque-misantajeitaqueri arori, aisati amoncaratavacaajeitaca avaotisitamentajeitacari.

⁶ Itimi aporo Tasorentsi: yora Apasanori arori. Ipincatsariventajeitaquee maaroni arori, itasoncaventajeitaquee, quiso yoajeitaquee maaroni.

Onashiyetaca imatacaajeitaqueeri Quirishito.

⁷ Ineshinoncaajeitaquee Quirishito, iro cantaincha onashiyetaca imatacaajeitaqueeri.

⁸ Ora irineane Tasorentsi oquenquetsatacotitarini, ocantitani: "Irovancanajearica Quirishito coajica inquitequi, iranaacojeiteri maaroni camaari quisajeivetacariri; irinti atiripee, irimatacaajeiteri paitapeerica".

⁹ ¿Paita ocantantari: "Irovancanajea"? Aitaque iponeanacari peerani inquitequi jenoqui, irosati isavicantapaacari aca quipatsiquica. Impoiji yovancanaja aisati.

¹⁰ Yora anireatsiri aca quipatsiquica yovancanaja aisati anta inquitequi jenoqui. Anta ipincatsariventajeitaquee aisati itasoncaventajeitaquee maaroni, catsini.

¹¹ Imatacaasanojeitaqueri quemisantajeitatsiri yantajeitaquero paitarica icoacaajeitaqueriri: itiancaneppee, camantantatsiri, quenquetsatacaantatsiri, jivatacaantatsiri, oametantatsiri, maaroni.

¹² Ari imatacaajeitaquee arori, aisati iriori maaroni quemisantajeitiriri, irootaque amajeitantarori antaveetiniri. Aisati imatacaajeitaquee aquemisantacaasanojeitaqueri maaroni quemisantajeivetariri Quirishito.

¹³ Ari incanteani irimatacaajeitee, irosati amoncaratavacanteari anquemisantasanojeite, aisati ayotasanojeitanteariri iriori. Icoaque ayotasanojeiteri anquempetasanojeitanteariri iriori.

¹⁴ Peerani aquempeveitarini jananequi, te amatasanojeiveitearoni antajeivetaniri. Aquemisantashijeivetacarini amatavijeitaqueerini, te ayoveiteani. Iro cantaincha te incoyeji Tasorentsi anquempetajeari jananequi, irointi icoaque anquempeteari antearipee, icoaque ontimasanote ayojeitanteari.

¹⁵ Icoasanoaque ancavintsaasanojeiteri itsipapee, cameetsa ancamantajeiteri irineane: tempa queariotasanotaque. Icoaque aiqero ajatatiye anquempetasanojeitanaqueari Quirishito: yora Avincatsarite.

¹⁶ Aquemisantajeitaqueri, irootaque ashanincatavacaajeitantacari; aisati yoamejeitaquee amitacotavacaajeitantacari, aisati yoamejeitaquee amajeitantacanariri maaroni icoacaajeitaqueeri. Aisati yoamejeitaquee anintavacaajeitantacari.

Icantiri: "Eiro piquempetajatsi peerani".

¹⁷ Meeca novaajempiro icantaqueri Avincatsarite, noncamantempiro icoacaquempiri. Te incoacayempiji pinquempetajeari caari quemisantansi: yatsipetashijeita iriori yaamaashiyetacaró paitapeerica, te inquengeshireempaji.

¹⁸ Te iriojeiteriji Tasorentsi, oquempetaca te ontimeji ishire. Te irinintajeiteji inquengeshireteri, te incoajeiteji irioteri, irootaque caari irimatantearo Tasorentsi iroaneasanojeiteri irisaviquimojeitanteariri anta inampiqui.

¹⁹ Yantapiniitashitacaro caari cameetsatsi, iro cantaincha te impashiventajeiteaji. Imayempitapinijeiti, itsinampavacaajeita, maaroni.

²⁰ Yora Quirishito, te iroamejeitempiji pinquempeteari yora tseencantatsiri.

²¹ Tempa piquemacotaqueri Jesoshi, queario noamejeitaquempi jaoca icantari.

²² Ari meeca eiro piquempetajatsi peerani. Pashi poironi te pincameetsateni. Pinintasanotironi pantayetironi caari cameetsatsi, irootaque pamatavitantajari avisati.

²³ Eiro piquenqueshiretajirotsi piquenqueshireveitaniri peerani, irointi pinquengeshiretajero cameetsatsiri.

²⁴ Pimpashinijeitanaque: eiro pantashitajarotsi caari cameetsatsi, irinti pinquempetajeari Tasorentsi, tempa icameetsatasanotaque.

Icamantajeitiri Pavoro irantayeteri.

²⁵ Meeca eiro pamatavitantajatsi aisati, irointi tampatica pineanateri pishaninca. Pamene: ariorica ashanincatacari Quirishito, ashanincatavacaajeitaca, maaroni.

²⁶ Ariorica pinquisashireaquea, eiro pantasanotirotsi caari cameetsatsi. Aisati, ariorica pinquisashiretaquea, pishintsite pincatsimareajea aisati,

²⁷ oncanteaquea eiro catsini imatimatantimpitsi camaari irantacayempiro caari cameetsatsi.

²⁸ Ariorica picoshiveitani, eiro papiitajirotsi pincoshitaje, irointi pintsameete. Pantaveetanontea avisati, aisati pincavintsayeri ashinoncaincari.

²⁹ Eiro pineanatanarotsi caari cameetsatsi, irointi pineanatanantearo cameetsayetatsiri. Cameetsa poametavacayea, piveshireacayeari pishaninca.

³⁰ Terica pisavique cameetsa, oashiretanaca Ishire Tasorentsi. Eiro poashiretacaarotsi: tempa irootaque quempoyeajeitaquempiri. Oncanteani onquempoyeajeitaquempi irosati pijatanteari inquitequi. Anta inquitequi pavisacotasanoapaaje catsini.

³¹ Meeca eiro piquisatsi, eiro pitsimaajencatatsi, eiro picatsimatantitsi, eiro piquisatsantitsi, eiro picantimatantitsi. Eiro catsini piquishiritsi itsipapee,

³² irointi pincavintsaajeiteri, pineshinoncajeiteri. Piquemisantaqueri Quirishito, meeca te inquishmentempiroji Tasorentsi pantayetaqueri, irointi icavintsaajeitaquempi: aisati pinquempeteiteri pishaninca iriori, eiro piquishmentiritsi yantayetaqueri, irointi pincavintsayeri.

5

¹ Tempa avirojeitaque itomipee Tasorentsi inintasanotiri: ari meeca pinquempeteiteri.

² Inintajeitaquempi Quirishito, irisati shinetaicha ipajacoyeetiri, icamimentajeitaquempi. Inecameetsatasanotaquero Tasorentsi oca imataqueri itomi. Oquempetaca inintajeitaquempi Quirishito, aisati pinquempeteri pishaninca, pinintasanoeiteri.

³ Eiro pantirotsi caari pai, eiro pitsinampantitsi catsini, eiro pinevetarotsi yashijeitari itsipapee: quemisantatsiri te irantapiniteroji oca.

⁴ Eiro picantatsatacotirotsi tsinane, eiro pincantatsatacotiritsi shirampari. Ocameetsati pimpashiventacayearo maaroni caari cameetsatsi. Te oncameetsateji pishineventearo, eiro pishirontimantarotsi. Irointi ocameetsataque ampasonquiteri Tasorentsi: tempa icavintsasaanojeitaquee.

⁵ Jero oca noncamantempiri, piotasanotavaquero: eiro ijatitsi inquitequi yora antapinitirori caari yai, aisati eiro ijatitsi tsinampaantatsiri, aisati nevetitayetariri iroaaroro itsipapee. Yora nintasanotirori irashitaarantea iquempetacantaquero iroorica Tasorentsi inintantarori. Pineaquero, eiro ijatitsi irinti anta ipincatsarijeitinta Quirishito aisati Tasorentsi.

⁶ Ainiro coavetachari iramatavitempi: oshequi irineanatashivetemp, vero, vero. Incamantashijeitempi ocameetsati pimajeitero oca caari cameetsatsi, iro cantaincha eiro piquemisantiritsi. Iroasaquejeitaquero Tasorentsi maaroni caari quemisantiri.

⁷ Eiro catsini piquempetaritsi.

Icantiri: "Pintimajeite quitaiteriqui".

⁸ Peerani oquempetani pitimini tsiteniriqui: pantapinitirori caari cameetsatsi. Iro cantaincha yoameetsataquempi Quirishito, oquempetaca itimacaajimpi quitaiteriqui. Meeca cameetsa pisavicaje, onquempetanteari pintime quitaiteriqui.

⁹ Ariorica antime quitaiteriqui, ancavintsante, antime cameetsa, tampatica aneanate.

¹⁰ Piojeitero icoacaaguempiri Avincatsarite, impoiji pimamatero.

¹¹ Eiro pantirotsi yantayetiri timajeitsiri tsiteniriqui, irointi piotacaajeiteri te oncameetsateji oca yantajeitaquero.

¹² Nopashiventacaacaro noquenquetsatacotiro yantajeitiri, ora imanavetacari.

¹³ Ariorica piotacayeri te oncameetsateji yantajeitiri, onconijataque maaroni yantajeitaquero. Impoiji iriotanaque te incameetsateji. Impoiji ariorica incoaque incameetsatanaque, onquempetajea irisavicaje iriori quitaiteriqui.

¹⁴ Tempa icanteeti: "Ariorica pimaaque, pintinaanaje. Ariorica picamaaque, pintinaanaje aisati. Iriotacaasanotemp Quirishito, irisavicacayempi quitaiteriqui".

¹⁵ Pinquenqueshiretasanotero paitapeerica pantayeteri: eiro piquempetaritsi caari iotatsi, irointiquea ocameetsati ontimasanote piotanteari.

¹⁶ Ariorica ompomerentsitimojeitempi, iro cantaincha pinquearioventero pantero cameetsayetatsiri.

¹⁷ Eiro pantashiyetarotsi paitapeerica, irointi pijivate pinquenqueshiretasanotea. Piojeitero paitapeerica icoacaaguempiri Avincatsarite: impoiji pimamajeitero irointi.

¹⁸ Eiro pishinquitatsi, te oncameetsateji catsini: irointi pinquemisantasanotero Ishire Tasorentsi oamejeitantempiri.

¹⁹ Oshequi pincantapiniteri pishaninca: "Tempa icameetsataque Avincatsarite", aisati pimpampoyeaventapinijeiteri Tasorentsi, piveshireimenteari.

²⁰ Pipincatsataquero Avincatsarite Jesoquirishito, irootaque itasoncacoventantaquempiri Apa Tasorentsi. Meeca pimpasonquitapiniteri.

²¹ Ariorica pipincatsatiri Quirishito, pimpincatsatavacaajeitea, paacameetsatavacaajeitea.

Ocameetsati incavintsasaanotero shirampari ijina, aisati ocameetsati ompincatsateri tsinane ojime.

²² Tsinane, ¿pipincatsatirimpa Avincatsarite? Ari, aisati pinquempeteri pijime, pimpincatsateri iriori.

²³ Iquempetaca Quirishito ipincatsariventajeitiri quemisantajeitiriri, aisati inquempetea shirampari, impincatsariventero ijina. Tempa oshequi icavintsaaajeitaquee Quirishito, irootaque yoavisacojeitantajeeri.

²⁴ Oquempetaca aquemisantajeitaquero Quirishito, ocameetsati tsinane onquemisantapiniteri ojime.

²⁵ Iquempetaca Quirishito inintasaanojeitaquee, irosati icamimentantaqueeri, avirojei shirampari, cameetsa pinintasanotero pijina.

²⁶ Pineaquero, inintajeitaquee Quirishito, icamimentajeitaquee, irootaque yoameetsatantajeiteeri. Ariorica anquemisantajeitero irineane Tasorentsi aisati avaotisaajeitea, iroameetsasaanojeitee Quirishito anquearioventajeiteneri maaroni icoacaajeitaqueeri.

²⁷ Icoaque irineacameetsajeitee arori, aisati iriori maaroni itsipapee quemisantatsiri; eiro otimimojeiteetsi caari cameetsatsi. Icoaque ancameetsasaanotanaque, eiro catsini otimi antane. Pineaquero, oshequi inintajeitaquee.

²⁸ Aisati, shirampari, pinintasaanojeitero pijina. Oquempetaca picavintsaaaja avisati, pincavintsayero pijina. Yora cavintsariori ijina, icavintsaaaja irisati.

²⁹ Te amatapiniteaji anquisajea arosati, irointi acavintsaaja arosati, aneshinoncataja arosati. Aisati, iquempetaquee Quirishito arori, ariorica aquemisantajeitiri,

³⁰ icavintsaajeitaquee; tempa ishanincajeitaquee, quiso yoajeitaquee.

³¹ Ocanti Sanquenarentsi: “Ariorica iraaque shirampari ijina, irojocanaqueri iriri, aisati iriniro, quiso iroanaquero ijina. Yora shirampari aisati ijina ishiaquero apaniro ivatsa iriori: quiso iroavacayea, te oncameetsateji irojocavacayea”.

³² Opomerentsivetaca anquemero oca, iro cantaincha oshiaqueri Quirishito aisati maaroni quemisantajeitiriri, apaniro anajeitaque: iotaca ashanincatavacaajeitaca, aquempeavacaajeitaca.

³³ Ari nampiitajempiro: iquempetaca icavintsaaja irisati shirampari, ocameetsati incavintsaasanotero ijina, incanteani. Aisati ocameetsati ompincatsateri tsinane ojime.

6

Jaoca ancantiriri atomipee aisati ashijeiteeri.

¹ Jananequi, ariorica piquemisantaqueri Avincatsarite, icoacaaquempi pinquemisanta-jeiteri aisati ashijeitimpiri.

²⁻³ Otimini peerani oshequi icantapinivetacariniri Tasorentsi peeraniniri, iro cantaincha te incantapiniteriji: “Ariorica pinquemisantena, ario peerani pintimeni quipatsiqui”. Impoijiquea icantirini: “Ariorica pimpincatsateri piri, aisati pimpincatsatero piniro, cameetsa nosavicacayempi; peerani pintimeni avinti quipatsiqui, eirotsita picamitatsi”.

⁴ Shirampari, eiro pishemaritsi pitomipee, iquisacari; irointi poamejeiteri icantayetiri Avincatsarite, aisati poamejeiteri impincatsateri.

Jaoca incantiriri ivatorote aisati iratirite.

⁵ Intimerica amanantimpiri, pinquemisanteri, pimpincatsateri. Oquempetaca pantiniri Quirishito maaroni icoacaaquempiri, panteneri amanantimpiri maaroni icoacaaquempiri iriori.

⁶ Eiro pamatavitiritsi. Eiorica yamenimpitsi, pincanteani pantaveeteneri: tempa aisati pantaveetiniri Quirishito. Pincoasanaotaque panteneri Tasorentsi maaroni icoacaaquempiri.

⁷ Te irio pantaveetasanotene atiri, irintiquea pantaveetini Avincatsarite.

⁸ Piojeite ariorica pantapinitero cameetsatatsiri, impinatempi. Impinateri pimantaari, caari pimantacha, maaroni.

⁹ Aisati amanantiriri atiri: pincavintsaajeiteri pamanantanepee, tempa nocantaqueri inquemisantempi. Eiro piquisapinitiritsi. Eiro pipeacojeitarotsi: avirojeitaque ipincatsariventajeitiri Quirishito, aisati ipincatsariventajeitiri pamanantane: pimoncaratavacaajeitaca.

Quemisantsiri ishiaqueri soraro.

¹⁰ Apanivaniji noncamantempi: pincanteri Avincatsarite impincatsariventajeitempi, aisati intasoncacoventajeitempi.

¹¹ Iquempetaca yaventapinitaro soraro ashirotsatsiri iitsaare eiro imatantaritsi oyerinimeri, paventajeiteari Tasorentsi eiro imatantimpitsi camaari, yora amatavijeitempineri.

¹² Te irio ampieata atiri aneayetiri, irinti apiataca caari conijayetatsi: yora pincatsariventiriri camaari, jivajeitiriri camaari, pincatsariventiriri maaroni tseencantatsiri, antirori caari cameetsatatsi, maaroni camaari catsini. Iquisajeitaquee iriori.

¹³ Oquempetaca yaventayetaro soraro ashiroyetatsiri, paventeari avirori Tasorentsi poimpianteariri camaari. Iroashinoncayempime, iro cantaincha eiro imatasanotimpitsi, panaacotajeri. Pintsoteyeteneri Tasorentsi maaroni icoacaajeitaquempiri; eiro pojoirotsi piquemisanti.

¹⁴ Pinquemisantanasanotanaque, pinquenqueshirejeitero queariotasantatsiri eiro yoashinoncantimpitsi camaari: oquempevetaca yaventaro soraro ishiticatsaqui eiro imatantari yora quisavetariri. Pincameetsatasanotanaque eiroquea imatantimpitsi camaari: pinquempetanteariri soraro, yaventaro ipashicanejitari.

¹⁵ Oquempetaca soraro isapatotanaca cameetsa iquenayetantari, ari pivetsicaquea pinquenayetanaque, pincamanteri atiri jaoca incanteari iravisacotantajeri.

¹⁶ Aisati ainiro soraro yojocaari, yojocantarori parashetatsiri chacopi caari iquentanteetari. Aisati avirori, pinquemisanteri Tasorentsi, eiroquea imatantimpitsi camaari irantacayempi caari cameetsatatsi.

¹⁷ Aisati, oquempetaca soraro ipashicainatacero ashiro yavisacotantari, paventeari avirori Tasorentsi pavisacotantajeri: impoiji eiro imatimpitsi camaari. Ainiro aisati

ivesamento soraro imatantariri iisane: oshiaquero irineane Tasorentsi oamejeitaquee Ishire amatanteariri camaari.

¹⁸ Pinquenquetsatacapiniteri Tasorentsi. Paitapeerica oncoacayempiri Ishire, pincanteri. Pincamanteri coiteimotaquempiri. Eiro piperaventarotsi pinquenquetsatacayeri: pincantapiniteri: “Pincavintsaajeiteri noyemisantaririnte”.

¹⁹ Aisati pincanteri iramitacotena narori, eiro nopashiventanta nonquenquetsatacaajeiteri atiri. Noncamantajeiteri caari iojeiveitani: iroavisacojeiteri Tasorentsi maaroni quemisantajeiterineri.

²⁰ Nocamantapinitaqueri atiri, irootaque yoiminqeanteetaquenari aca caravosoquica. Pincanteri iramitacotena cameetsa noncamantapiniteri atiri, eiro nomanirotsi. Tempa irootaque icoacaaquenari Tasorentsi.

²¹ Ariorica irareetea Tiquico, incamantapaaquempi jaocarica nocantacari, aisati incamantempi paitarica nantayetaqueri. Iriotaque ayemisantaririnte nonintasanotiri, iquear-ioventiniri Avincatsarite maaroni icoacaaqueriri.

²² Irootaque notiancantacariri, nocoaque piojeite jaocarica nocantacari. Aisati nocoaque iriveshireacaajeitempi.

²³ Meeca, noyemisantaririnte, nocoaque cameetsa irisavicacayempi Apa Tasorentsi, nocoaque iroamejeitempi pinquemisantasanojeite aisati pinintasanojeiteri pishaninca. Aisati nocoaque inquempetacayempi iriori Avincatsarite Jesoquirishito.

²⁴ Ariorica pincanteani pinintasanoteri Jesoquirishito, nocoaque irineshinoncajeitempi Tasorentsi, maaroni.

Narotaque sanquenajeitimpirori: *Pavoro*

YORA PAVORO ISANQUENATINIRI JIRIPOSHISATI

Yovetsajeitari Pavoro jiriposhisati.

¹ ¿Savicajeitatsimpi jiriposhisati? ¿Tecatimpa oajeitempine? Narotaque Pavoro sanque-najeitaquempirori, nocarataqueri aca iriori Timoteo. Narotaque antaveetiniriri Jeso-quirishito icoacaquenari. Nosanquenajeitimpino maaroni noyemisantaririnte: quen-quetsatacantajeitatsiri aisati amitacojeitiriri quemisantatsiri, maaroni.

² Nocoaque irineshinoncajeitempi Tasorensi, aisati cameetsa irisavicaaajeitempi. Aisati nocoaque inquempetacaajeitempi Avincatsarite Jesoquirishito.

Ipasonquitiri Pavoro Tasorensi.

³ Ariorica noquenqueshirejeitaquempi, nopasonquitapinitiri Tasorensi. Avirojeitaque nopasonquitimentiri.

⁴ Aitaque nocantani noquenquetsatacapinitiri Tasorensi, nocantapinitiri: “Pincav-
intsaaajeiteri jiriposhisati”, aisati noveshireimentajeitaquempi.

⁵ Picantani pamitacotapinijeitaquena avaraaquero irineane Tasorensi, acamantajeitiri atiri jaoca icantajari yavisacotantajari. Irootaque nopasonquitimentantimpiri.

⁶ Ocameetsataque oca pantapinijeitaqueri, tempa irio Tasorensi antacaquempirori. Niotaque incantatiyempani, irimatacapinitimpino, irosati impocantajeri Jesoquirishito. Ariorica impocapaaje iriori, ari moncaratapaaca maaroni pantajeitaqueri.

⁷ Tempa ocameetsataque noneacameetsajeitaquempi, aitaque oshequi nonintasano-
jeitaquempi. Ariorica nonapiniti caravosoqui, noquenquetsatacotiri Jesoquirishito, aisati
ariorica yoisoquijana, aisati noquenquetsatacotiri. Nocamantapinitiri yora pincatsaripee
paita noquenquetsatacotantariri Jesoquirishito; aisati nocamantiri oqueariotasanoaque
irineane Tasorensi. Iro cantaincha picantani avirori picavintsaaanojeitaquena, aisati
ineshinoncajeitaquee Tasorensi.

⁸ Iotaque iriori oshequi nocoiteajeitaquempi. Oshequi inintasanojeitaquee Jeso-
quirishito, aisati noquempetaca narori, oshequi nonintasanojeitaquempi.

⁹ Aisati nocantiri Tasorensi iramitacojeitempi, nocoaque aikuero pijatatiye pin-
tasanajeiteri itsipapee. Aisati nocantiri iroamejeitempi iriori piotasanojeitanteariri, aisati
ontimimojeitantempiri piotanteari: aikuero pijajeitatiye.

¹⁰ Nocoaque piojeite pantero cameetsatsiri, eiroquea pantirotsi caari cameetsatsi.
Nocoaque pincameetsatasanojeitanaque, eiro otimitsi pantane; pincantaitatiyempani,
irosati impocantajeri Jesoquirishito.

¹¹ Tempa yoameetsatasanojeitimpino, meeca nocoaque cameetsa pisavicaajeite, iramitaco-
jeitempi iriori. Impoiji maaroni atiri impincatsajeiteri Tasorensi, incantajeite: “Tempa
icameetsatasanoti Tasorensi”.

Itimi Pavoro caravosoqui, iro cantaincha ovaraana irineane Tasorensi.

¹²⁻¹³ Noncamantempino, noyemisantaririnte: yoiminqeetaquena, iro cantaincha te
nantsipetashitearoji nosaviqui aca caravosoqui. Nocantani nocamantajeitiri atiripee
jaoca incanteari iravisacojeitantajeri. Iquemajeitaquena maaroni soraropee: yora
shentajeitirori ivanco pincatsari. Aisati pashinipee atiri, iquemajeitaquena. Iojeiti
tecatsi nante, irointi yoiminqeashiyeeetaquena; apatiro noquenquetsatacotiri Quirishito.
Eirome notimime aca, eirome iojeitajime jaoca incanteari iravisacojeitantajeri.

¹⁴ Ineapaaquena ayemisantaririnte jaoca nocantari aca, irootaque iveshireimentajei-
tantacariri Avincatsarite. Meeca te intsaroajeiteji, irointi icoasanojeitanaque incamanta-
jeiteri maaroni atiri irineane Tasorensi.

¹⁵ Ainiro oshequi quenquetsatacotiriri Quirishito. Ineaquena aparopee oshequi no-
quemisantacaajeitiri atiripee, irootaque iquisaneentantaquenari, aisati ipiatsatantaque-
nari; icoaque iranaacojeitena impincatsarite. Iro cantaincha ainiro pashini cavintsaaano-
taquenari,

¹⁶ oshequi inintajeitaquena irinti. Iojeitaque iriori notimi aca caravosoqui noncamanta-
jeitanteariri pincatsaripee paita noquenquetsatacotantariri Jesoquirishito, noncamanteri
jaoca incanteari iravisacojeitantajeri.

¹⁷ Yora quisaquenari, te incoacayeriji atiri inquemisantajeitena, irintiquea coaintsi
iranaacotena inquemisantacaajeiteri atiripee. Te irantaveetasanoteneri Quirishito,
irointi icoaveta iroashinoncayename aca caravosoqui.

¹⁸ Ari, oncanteata inquisenata. Aparopee iquisaneentaquena, yora pashini
icavintsaaquena, iro cantaincha iquenquetsatacojeitaqueri Quirishito, irootaque
noquimoshiretantacariri narori. Noncanteani nonquimoshiretasanotanaque.

¹⁹ Niotaque ariorica inquenquetsate, ari cameetsa nontime narori. Tempa picantaqueroi Tasorentsi, irootaque yamitacotantaquenari, aisati amitacotaquena Ishire Jesoquirishito.

²⁰ Te noncoyeji nompashiventea, irointi nocoasanotaque narori cameetsa nonquemisantasanoteri Quirishito; nocoaque nonquempetajea peerani, te nontsaroyeji. Arioricampa iroyeetaquena meeca, irompa eirorica yoyeetanatsi, iro cantaincha paitapeerica nanteneriri, nocoasanotaque incantajeite atiri: "Tempa icameetsasatanoti Quirishito".

²¹ Eirotsitarica yoyeetanatsi meeca, irosati noncanteani nonquemisantasanoteri Quirishito. Ariorica noncamaque, ocameetsasatanotaque aisati: tempa noneasanoteri anta inquitequi; irootaque nocoasanotaqueroi.

²² Eirotsitarica nocami, ari noncanteani nomateneri Avincatsarite paitapeerica icoacaquenari. Tempa ocameetsataque. Aisati, ariorica noncamaque, ocameetsataque. Te nioteji paitarica nocoasanotaqueroi.

²³ Nocoasanovetacaro apite. Nocoaque noncame, nojashitarentari Quirishito, quiso noanteariri. Tempa ocameetsasatanotaque.

²⁴ Iro cantaincha aisati ocameetsasatanotaque noncanteani nanee, namitacojeitantempiri avirori.

²⁵ Naamaaca meeca eirotsita yoyeetanatsi, eirotsitarica nojatitsi inquitequi. Nosaviquimojeitempi namitacojeitempi pinquemisantasanojeite, aisati piveshireimentajeitari yora piquemisantaqueroi.

²⁶ Ariorica nojashijeitajempi aisati, piveshireimentavajena, aisati piojeitanaque icameetsasatanotaque Jesoquirishito.

Icantiri: "Cameetsa pisavicajeite".

²⁷ Jero oca pinquenqueshiretasanoteri: piquemisantaqueroi Quirishito pavisacotantajari, meeca icoaque cameetsa pisavicajeite, pantapinijeitero maaroni icoacaquempiri. Ariorica nojashijeitempi nocoaque noneajeitapeempi piquearioventajeitaquero piquemisantajeiti maaroni. Eiroricampa nojashijeitimpitsi, iro cantaincha nocoaque nonquemacojeitempi pincaratavacajaitea, pimpomerentsiventearo pincamantajeitari atiri: "Ariorica pinquemisanteri Quirishito, iroavisacotempi".

²⁸ Eiro pitsaroacaajeitaritsi yora quisajeitempine: impoiji inquenqueshirejitanaquea: "¿Paita caari itsarocantana?" Iriojeite iriori irijajeite Sharincaveniqui, iriojeite aisati yoavisacojeitaquempi Tasorentsi.

²⁹ Icavintsaajeitaquempi Tasorentsi, inintacaajeitaquempi pinquemisantajeitari Quirishito. Iro cantaincha aisati inintacaajeitaquempi pineacatsitimentajeitari.

³⁰ Aitaque amoncaratavacaajeitaca apomerentsiventajeitiniri. Peerani pineajeitaquena nopomerentsiventiniri. Meeca aisati piquemacojeitaquena, oshequi nopomerentsiventiniri.

2

Eiro picavintsaatsi avisati, irointi pincavintsaajeitari itsipapee.

¹ Tempa ocameetsati piveshireimentajeitari Quirishito. Inintajeitaquempi, irootaque ocameetsatantari piveshireimenteari. Tempa quiso oajeitaquempi Ishire Tasorentsi. Tempa piojeiti picavintsanoti. Tempa piojeiti pineshinoncatanti.

² Ari meeca nocoaque cameetsa pisavicajeite, paacameetsatavacaajeitea, pinintavacaajeitea. Cameetsa omoncaratavacaajeitea paitapeerica pincoajeitari aisati paitapeerica pinquenqueshirejeitari. Ariorica pantajeitero oca, ari nonquimoshiretanaque.

³ Paitapeerica pantajeitari, eiro piquisavacaajeitatsi, eiro pishemejeititsi. Eiro pijijeititsi picameetsasatanoti, eiro pijijeititsi panaacojeitaqueroi itsipapee, irointi pinquenqueshirejeite: "Icameetsasanojeiti itsipapee, yanaacojeitaquena icameetsati".

⁴ Ocameetsaveta pincavintsayea avisati, iro cantaincha ocameetsasatanoti aisati pincavintsaajeitari itsipapee.

⁵ Pinquempejeitari Jesoquirishito: te incavintsayeaji irisati, irointi icavintsaajeitaquero arori.

⁶ Iriovetaca Tasorentsisanori inaveta, iro cantaincha icantiri iriri: "Apa, nioti aquempetavacaajeitaca, Tasorentsi anajeiti,

⁷ iro cantaincha nocoaque nompeapeempa atiri, nantempiro maaroni picoacaquenari". Ari yojocanaquero ipincatsaritantaniri, itasorentsitantaniri. Ari itimantapaacari peerani quipatsiqui, yatiritasanotapaaque:

⁸ iquempejeitapaaque arori. Te impincatsarivetapeempaji, irointi ipincatsataqueroi iriri. Irisati coantsi ipajacoyeetaqueroi coroshiqui, icamimentajeitaquero arori. Irootaque inintacaqueriri iriri.

⁹ Iro cantaincha impoiji yaajiri jenoqui, cameetsa isavicacaajiri catsini. Ipeavajiri aisati pincatsarisanori, yanaacojeitapaqueri maaroni timajeitatsiri.

¹⁰ Icoaque Tasorentsi ampincatsajeiteri Jesoshi, catsini: yora jenoquiniri, arori quipatsiqiniri, yora ishaavijiniri, maaroni. Aiquero ajatatiye, ampincatsasanojeiteri catsini.

¹¹ Aisati ancantasanajeite: "Iriotaque Jesoquirishito Pincatsarisanori", impoiji aacameetsasanojeitanti catsini yora Apa Tasorentsi.

¹² Ari, noshaninca, picantani piquemisantapinijeitaquenani. Notsipatantimpiniri piquemisantajeitaquenani. Meeca te nontsipajeitempiji, iro cantaincha nocoaque pinquemisantasanojeitena aisati. Tempa yoavisacojeitaquempi Tasorentsi: meeca pimpincatsasanojeiteri, panteneri maaroni icoacaajeitaquempiri.

¹³ Tempa itasoncacoventapinitaquempi, picoajeitancari pimayetaquero cameetsayetatsiri. Tempa ocameetsataque maaroni icoacaajeitaquempiri, aitaque yamitacotapinijeitaquempi pimataquero.

¹⁴ Pimatasanajeitero maaroni icoacaquempiri: eiro pishemarotsi, eiro pipiatsataritsi iriori.

¹⁵ Ariorica panteneri Tasorentsi maaroni icoacaquempiri, eiro otimitsi pantane, irointi pincameetsashiretanaque. Tempa itomintajeitaquempi, ishintojeitaquempi. Yoameetsasanojeitaquempi. Ara pinampiqui picarajeitaqueri oshequi tseencantatsiri: te incameetsateji, te irioteriji Tasorentsi. Oquempetaca tsiomentotsi otsiotaca amenantari, ari cameetsa pisavicajeite piotacaajeitanti iriori yora tseencantatsiri.

¹⁶ Oquempetaca pitsiotacaro tsiomentotsi pamenantari tsiteniriqui, aisati poamejeiteri pishaninca irineane Tasorentsi irineantapaajearori iriori inquite, incantaitiyempani iraneapaaje anta. Ari pimamajeitero oca; impoiji, impocajerica Quirishito, nonquimoshireimantajeitaquempi. Niotanaque te nantsipetashiteeroji noamejeitaquempi.

¹⁷ Meeca piquemisantajeitaque. Tempa narotaque quemisantacaajeitaquempiri, irotaque icoanteetacari iroyeetena. Arioricampa iroyeetena meeca, iro cantaincha niotaque aiquero pijatatiye pimpincatsasanojanuqeri Tasorentsi. Irotaque noquimoshiretantacari, aisati nocoaque pinquimoshireventena avirori.

¹⁸ Queario, ocameetsati pinquimoshirejeitanaque, anquempetavacaajeitanti, anquimoshiretasanajeitanti, maaroni.

Itianquiri Pavoro Timoteo.

¹⁹ Ariorica incoacayena Avincatsarite Jesoshi, nocoaque intsipaite nontianquempiri Timoteo. Ariorica impiaje aisati aca, incamantapaajena jaoca picantajeitari, nonquimoshiretanteari.

²⁰ Te noncarateriji itsipa quempetearine iriori: oshequi icoaque incavintsaajeitempi cameetsa pisavicajeitanti.

²¹ Ainiro pashinipee: iquenqueshirejeitaquero paitapeerica icoayetiri iriori, te inquenqueshiretapiniteroji icoaqueri Jesoquirishito.

²² Iro cantaincha piojeitaque icameetsataque Timoteo, iquearioventiro yamitacotaquena noquenquetsatacaqueri atiri: nocamantajeitiri jaoca incanteari iravisacotanteari. Oshequi yamitacotaquena, iquempetacantaquena narorica iriori.

²³ Irotaque nocoantacari nontianquempiri. Ariorica niotasanotaque iroyeetena, irompa eirorica, ari intsipaite nontianqueri Timoteo incamantapeempi.

²⁴ Aisati naamaaca irishinetena Avincatsarite nojatashijeitempi. Eiro osamanititsi, ari nareetapaajempi.

Iquenquetsatacotiri Epajororito.

²⁵ Chapinqui pitiancaquenari ayemisantaririnte Epajororito, oshequi intacotaquena. Icarataquena, nantavejeitiniri Avincatsarite. Oquempetaca soraropee iquearioventiniri iyapitanote paitapeerica yantiniriri, nocarataqueri Epajororito noquearioventiniri Avincatsarite maaroni nantiniriri; te nomperaventearoji icoacaquenari.

²⁶ Oshequi icoteajeitaquempi. Piquemacojeivetacari yojoquitaca, oshequi poashiretacovetacari. Meeca iquenqueshiretaquempi, te incoyeji poashiretacoteari.

²⁷ Queario, yojoquititanovetaca, irovetaincha incameme, iro cantaincha ineshinoncatajiri Tasorentsi, yoavisacotajiri. Aisati narori, ineshinoncatajana, te incoacayenaji incamimotena. Ioti nashinoncaavetaca, te incoacayenaji noashiretacoteari.

²⁸ Meeca nocoasanotaque nontiancajempiri. Ariorica pineajeitavajeri, pinquimoshireventajeitavajeri, impoiji eiro noashiretacotimpitsi.

²⁹ Paacameetsatavajeri, pinquimoshireventavajeri; tempa irio quemisantiriri Avincatsarite. Pimpincatsatavaqueri, aisati pimpincatsajeiteri iriori maaroni quempejetacari.

³⁰ Tempa yantaveetiniri Quirishito, irootaque yojoquiantacari, irovetaíncha incameme. Oshequi intacotapínitaquena: iquempetaquempi pintacotapínijeitename, pín-timeme aca. Te Incavintsayeaji irisati, irootaque incamanteameri.

3

Paamayeariyea yora coatsiri impeacaajeitempi jorio.

¹ Aisati, noyemisaririnte, noncantajeitempi: pinquimoshireventajeiteari Avincatsarite. Te noshemearoji oca nosanquenatapínitimpíri, tempa ocameetsati pinquemapínitero.

² Paamayeariyea yora coatsiri impeacaajeitempi jorio: te incameetsateji. Paamayeariyea, yoashinoncaimpicari, icoaveta intotacayempime.

³ Atsipetashita atotiro ameshina, eiro ocameetsateetsi, eiro oavisacoteetsi. Iro cantaincha Ishire Tasorentsi oamejeitaquee apincatsasanojeitiri Tasorentsi, irootaque yoameetsajeitanteeri, yoavisacajeitanteeri. Aveshireimentajeitacari Jesoquirishito, ayojeitaquee tecatsi ancantajeitea avavisacotajea arosati.

⁴ Arioricame amaterome avavisacoteame arosati, tempa narosati oavisacotajanchaneme. Oshequi nomayevetaca, nanaacojeivetacari itsipapee.

⁵ Iroaquera notimapaqueni, 7 nomaacotapaquee, ari itoyeanteetaquena. Narotaque ishanincani Ishiraerini. Aisati noshanincatacari Vejamini. Narotaque joriosanori, nashi noiro. Nononcaratasanoataquero isanquenare Moishishi, tempa naro variseo.

⁶ Nocoasanojeitani catsini nonquemisanterime Tasorentsi, irootaque noquisajeitancaririri yora quemisantajeitiriri: nojijeiveitarini yamatavijeitiri atiri. Cameetsa nononcarataquero isanquenare Moishishi, tecatsi incanteenani: "Ainiro pantane".

⁷⁻⁸ Noveshireimentaveitaroni maaroni nantíniri, noshemeveitani, iro cantaincha meeca niotaque natsipetashitacaroni. Queario, natsipetashijeitacaroni maaroni. Meeca eiro noquenqueshiretajirotsi nantaveitaniri, irintiquea Jesoquirishito nonpincatsate. Niotaque ipincatsariventasanotaquena, noveshireimentasanotacari, icameetsasanoataque. Te nonquenqueshiretajeiroji maaroni nantaveitaniri peerani: te oncameetsateji, nojocanaquero nantaveitaniri, oquempetaca ajocapínitiro cajara. Te nonquenqueshiretajeiroji jaoca nocantaveitaniri, notseencaja narosati; meeca nopincatsataqueri Quirishito irinti, noquemisantaqueri. Nocoasanoataque nonpincatsatanaqueri, irootaque nojocajeitantarori maaroni nantaveitaniri.

⁹ Nocoaque noshanincatasanoataqueari. Te noncameetsatashiteaji narori: nononcarayevetaro isanquenare Moishishi, iro cantaincha te ocameetsantenaji. Irointiquea noquemisantaqueri Quirishito, irootaque yoameetsantaquenari irinti. Aitaque, yoameetsajeitiri Tasorentsi maaroni quemisantajeitiriri.

¹⁰ Nocoaque niotasanoteri Quirishito. Oquempetaca itasoncacoventajiri Tasorentsi yoitinaantajariri, nocoaque intasoncacoventapínitena narori. Aisati, oquempetaca oshequi icatsitimentajeitaquee, nocoaque noncatsitimenteri narori; oquempetaca icamimentajeitaquee, nocoaque nantaveiteneri narori irosati iroimentanteenarori.

¹¹ Impoiji ariorica intinaajeitanaje maaroni camaintsiri, nocoasanoataque nontinaanaje narori, nontsipanteariri Tasorentsi.

Icamantacotaja irisati Pavoro.

¹² Tequeratsita nomayetero oca noquenquetsatocataqueri, tequeratsita noncameetsatanote. Iro cantaincha nocoasanoataque nomamateneri catsini, tempa yoavisacotajana Jesoquirishito nomatanteearori.

¹³ Pineaquero, noyemisaririnte: te noncantempíji nomatasanojetaquero maaroni nocoaqueri nomateri. Te nonquenqueshiretajeiroji maaroni nantaveitani, irointiquea iotaca noquenqueshiretasanotiro maaroni nanteneriri Quirishito, aisati nocoasanoataque catsini quiso noanaqueri iriori.

¹⁴ Noquemisantaqueri, irootaque icoantacari Tasorentsi nojate inquitequi, nosaviquimotapaajeri iriori. Meeca noquearioventiro nantaveetasanotíniri impinatantenari coajica anta jenoqui.

¹⁵ Nocoaque pinquempejeitena, maaroni quemisantasanoatsiri. Terica pinquempejeitenaji, iriotacajeitempi Tasorentsi tequerata omoncarateaji pinquemisantasanojeite.

¹⁶ Iro cantaincha pinquearioventero pimatasanotero maaroni icoacaquempíri. Tempa aitaque iotacaquempíro maaroni.

Icoaque Pavoro anquempejeiteari iriori.

¹⁷ Noyemisaririnte, pinquempejeitena. Aisati piotacojeiteari itsipapee, iquempejeitarica. Impoiji pinquempejeitena maaroni: pinquemisantasanojeiteari Quirishito.

¹⁸⁻¹⁹ Peerani nocamantaquempi ainiro oshequi quishiriri Quirishito; yora pajacoti-menteeeri coroshiqui. Meeca napiitajimpuro: queario icarati oshequi quishiriri. Te impincatsajeiteriji Tasorentsi, irointi iveshireimentaro yoari: oquempetaca ipeajiro yoari itasorentsite. Oncameetsateme impashiventajeiteame, iro cantaincha ishemetashijeitaca. Iotaca iquengheshirejiteiro jaoca icantajeitari aca quipatsiqui. Coajica irijajeitanaque Sharincaveniqui. Niraacojeitaqueri narori.

²⁰ Iro cantaincha acoaque anampitasanotearo ainti inquitegui. Coajica imponeaquea inquitegui yora oavisacojeiteeri: yora Avincatsarite Jesoquirishito.

²¹ Yashi yoiro itasoncanti, imatantarori paitapeerica icoaqueri. Intasoncacoventapaajee arori, impashinitapaajeenero avatsa, anquempetanteariri iriori. Meeca ashi airo apatsaajeti, acamajeti; iro cantaincha coajica anquempejeiteari iriori, oncameetsataso- tanaque avatsa, catsini: eiro apatsaajeitajitsi, eiro acamajitsi.

4

¹ Ari, noyemisantaririnte, oshequi nonintajeitaquempi, oshequi nocoiteajeitaquempi, oshequi noquimoshireventaquempi, oshequi noveshireimentajeitaquempi. Quiso poajei- teri Avincatsarite, pojatasanojeiteri. Queario, oshequi nonintajeitaquempi.

² Meeca noncamantero Evoria aisati Shintique eiro oquisavacaatsi. Cameetsa oncanteri Avincatsarite iramitacotero aacameetsatavacayea.

³ Meeca noncamantempi, noshaninca, tempa atsipatavacaaca antaveetiniri Avincatsarite: nocoaque pamitacotero ora tsinane aacameetsatavacaajea aisati. Peerani opomerentsiventavetaroni ocamantajeivetari atiri jaoca incanteari iroavisacotantajeiri: ocara- jeivetaquenani, aisati iriori Queremente, aisati pashini amitacojeitanari. Osanquena- jeitaca ivajiropee yora amitacojeitanari anta jenoqui, isanquenatacotaca maaroni savi- catsineri inquitegui.

Pinquimoshireventeri Tasorentsi.

⁴ Pincantaitatitempani pinquimoshireventajeiteri Avincatsarite. Nampiitajempuro: pinquimoshireventasanojeiteri, maaroni.

⁵ Nocoaque iriojeite atiri picavintsantasanojeiti. Eiro pipeacotarotsi: irotaintsi impocaje Avincatsarite.

⁶ Meeca picantashirejitsi. Pincantaitatitempani pinquenquetsacayeri Tasorentsi, pincanteri paitarica picoiri. Paitapeerica pincoajeiteriri, ari pincamanteri. Aisati pimpa- sonquitapinijeiteri.

⁷ Impoiji inquimoshiretacaasanojeitempi Tasorentsi catsini. Yanaacotasanojeitaquee arori, te amateroji anquimoshiretacaasanojeiteri itsipapee, te ayateroji. Ariorica pinquemisanteri Jesoquirishito, incanteani Tasorentsi inquimoshiretacaajeitempi, iriveshireacaajeitempi.

⁸ Apanivaniji, noyemisantaririnte, noncamantempuro oca. Pincasanojeite eiro pa- matavitanti, irointi tampatica pineanaajeite, pincameetsate, pineshinocatante, pinta- cotantea, picavintsante, pinintavacaajeitea. Queario, pincanteani pinquenqueshire- tasanotero maaroni cameetsayetatsiri, irootaque pinquenqueshirejeiteri maaroni inea- cameetsajeitiri Tasorentsi.

⁹ Pantapinijeitero maaroni noamejeitaquempiri, maaroni nocamantajeitaquempiri, maaroni piquemajeitavaquenari. Paitapeerica pineaqueri nantaqueri narori, ari panta- jeitero avirori. Impoiji quiso iroajeitempi Tasorentsi: yora veshireacaajeitimpiri.

Yora jiriposhisati oshequi ineshinoncajeitaqueri Pavoro.

¹⁰ Peerani piquenqueshirejeivetaquena, impoiji pipeacovetajana; iro cantaincha meeca piquenqueshirejeitajana aisati, picavintsajeitaquena, irootaque noquimoshiretaso- tantacari. Tempa icameetsataque Avincatsarite. Te pimpeacotasantenaj, iro cantaincha te pimaveitearoni pincavintsajeitena.

¹¹ Te noncamantempiji ainiro coiteimotaquenari paitapeerica: teve. Te oshequiteji timimojeitanari, iro cantaincha niotaque meeca noquimoshiretashita.

¹² Nametacaro te nashitaaranteaji, aisati nametacaro ariorica nashiyetearo paitapeerica. Nioyetaquero maaroni: niotaque noquemacaro noanaro, aisati niotaquero no- tashaeaque. Niotaque nashitaarantaca, aisati niotaque nashinoncaaca.

¹³ Tempa quiso yoana Quirishito, imatacaaquena, irootaque nomatantarori paitapeerica icoacaquenari Tasorentsi.

¹⁴ Iro cantaincha pineshinoncajeitaquena. Piojeitaque nashinoncaavetaca, irootaque picavintsajeitantaquenari.

¹⁵ Aisati piojeiti jaoca ocantani peerani, iroaquerani noquenquetsacantaquempini ara pinampiqui, nintacojeitaquempi. Nojatantajari aisati, noponeanaja Maseroniaqui, nojayetaque pashinipeequi nampitsi. Avirojei pintacojeitavaquena, pipashijeitavaquenaro coiteimojeitaquenari. Te inquempejeitempiji yora quemisantajeitatsiri anta pashinipeequi nampitsi.

¹⁶ Aisati, nosavicanacari anta Tesaronicaqui, pitiancajeitaquenaro coiteimotaquenari. Impoiji pashini pipacantajana aisati.

¹⁷ Te noncoacaavetempiji pimpapinitena paitapeerica, irointi nocoasanotaque pimayetero cameetsatsiri, cameetsa impinatasanojeitantempiri Tasorentsi.

¹⁸ Ipapaaquenaro Epajororito maaroni pipacantaquenari. Ocameetsatasanoti oca pantaqueri, oquempetaca irio pipaqueri Tasorentsi maaroni. Ineacameetsataquero, iveshireimentaquempi. Meeca otimimotasanotaquena paitapeerica, tecatsi pashini coiteimotenane; moncarataca.

¹⁹ Piquemisantasanoquaeri Jesoquirishito, irootaque irintacojeitantempiri Tasorentsi, impajeitempi maaroni coiteimojeitaquempi. Ashitaarantincari ini iriori, te irimashitsateji. Tempa ipincatsaritananoti, icameetsatasanoti.

Ivecarataquero Pavoro isanquenare.

²⁰ Tsame ampincatsatananojeiteri Apa Tasorentsi, ancantaitatitempani. Aitaque ancantasananojeiteari.

²¹ Novetsajeitimpi, aisati novetsajeitari maaroni iriori quemisantiriri Jesoquirishito. Ivetsajeitaquempi aisati maaroni ayemisanteririnte aca.

²² Aisati ivetsajeitaquempi maaroni quemisantatsiri: yora iratiritipee Sesari, maaroni.

²³ Nocoaque irineshinoncatasananojeitempi Avincatsarite Jesoquirishito. Piveshireimentajeiteari, maaroni.

Narotaque sanquenataquempirori oca: *Pavoro*

YORA PAVORO ISANQUENATINIRI COROSASHISATI

Ivetsajeitari Pavoro corosashisati.

¹⁻² ¿Savicajeitatsimpi, corosashisati? ¿Tecatsimpa oyempine? Narotaque Pavoro sanquenatimpirori oca. Narotaque itiancane Quirishito, irootaque noquenquetsatantari: irootaque inintacaquenari Tasorentsi. Nocarataqueri aca ayemisantaririnte Timoteo. Nosanquenajeitimpiri maaroni quemisantasanoitiriri Tasorentsi ara pinampiqui: avirojeitaque noyemisantaririnte quemisantasanojeitiriri Quirishito. Nocoaque irineshinoncajeitampi Apa Tasorentsi, aisati nocoaque cameetsa irisavicacaajeitampi.

Ipasonquitacoventiri Pavoro corosashisati.

³ Nocantani nocantapinitiri Tasorentsi iramitacojeitampi, aisati nopasonquitapinitiri Tasorentsi: yora iriri Avincatsarite Jesoquirishito. Avirojeitaque nopasonquitacoventiri.

⁴ Oshequi noquemacotaquempi, piquemisantasanoitiriri Avincatsarite, aisati oshequi pinintanojeitiriri ayemisantaririnte.

⁵ Peerani piquemaqueroni ariorica pinquemisante, pavisacotaje. Queario oca piquemaqueri. Aisati piojeitavaqueroni cameetsa irisavicacayempi Tasorentsi anta inquitequi.

⁶ Oca piquemaqueri ojatacoyetanaque maaroni nampitsipeequi. Piquemantacarori avirori, piojeitavaquero queario ineshinoncajeitaquee Tasorentsi. Ari piquemisantaquero, irootaque pipashinitantajari. Aisati iquempejeitaquempi pashinipee atiri, ipashinijeitaji iriori.

⁷ Tempa irio Epajarashi quenquetsatacainpiniri peerani. Iquempetaquena, icantani yantaveetiniri Quirishito. Cameetsa yantaveetiniri, irootaque notiancantacariri peerani iquenquetsatacainpi.

⁸ Icamantaquena piquemisantaquero Ishire Tasorentsi, irootaque pinintanojeitancacariri itsipapee atiri,

⁹ irosati nocantantacariri Tasorentsi: “Pamitacojeiteri noyemisantaririnte anta Corosashiqui”.

Icantiri Pavoro Tasorentsi: “Pamitacojeiteri quemisantaajeitimpiri anta Corosashiqui”.

Ari nocantani nocantapinitiri Tasorentsi: “Piotacayeri corosashisati maaroni picoacaqueriri”. Aisati nocantiri: “Nocoaque pintianqueneri Pishire oametasanojeiteri, iotacaasanojeiteri”.

¹⁰ Aisati nocantiri iramitacotempi cameetsa pisavique, piveshireacaasanojeitancetariri, pimayetancetarori cameetsayetatsiri. Tempa irio Avincatsarite, irootaque ocameetsatanitari amajeiteneri oca. Aisati nocantiri iramitacotempi piotancetariri, aiquero pijatatiye.

¹¹ Pashini aisati nocantiri irimatacotempirori: tempa irio Tasorentsisanori, icameetsasanoiti. Irimatacayempiri pimatapinitancetarori cameetsayetatsiri: eiro pishemarotsi, irointi pinquimoshireventero.

¹² Aisati nocantiri Apa iramitacotempi pimpasonquitancetariri. Tempa yoameetsajeitaquee, ivetsicashireajeitaquee ajajeitantajeiri anta icashicaajeitaqueenta. Ancarajeitapaajeri maaroni ayemisantaririnte anta oquitaitetasanotinta catsini.

Iquenquetsatacotaqueri Jesoquirishito.

¹³ Peerani oquempevetaca atimaveitani anta otsitenitanotinta: apincatsaveitarini camaari. Iro cantaincha yoavisacojeitajee Tasorentsi, irootaque apincatsatantajariri Itomi: yora inintasanotiri.

¹⁴ Icamimentajeitaquee arori, avavisacojeitantajari. Icavintsaasanojeitaquee, meeca eiro iquenqueshireacotajeerotsi caari cameetsatatsi antajeitini.

¹⁵ Te inconijateji Tasorentsi, iro cantaincha iconijataque itomi, iquempetasanotacariri. Peerani, irio jivatatsiri itimi irinti, tequerata ontimayete oca aneayetaqueri.

¹⁶ Tempa iriotaque vetsicajeitiriri maaroni: inquitatsi, quipatsisati, conijayetatsiri, caari conijayetatsi, maaroni. Ari yovetsicajeitiriri caari conijayetatsi: yora pincatsarijeitatsiri, jivatacaajeitantatsiri, savicacaajeitantatsiri, maaroni. Iriotaque Quirishito vetsicajeitiriri maaroni. Te irovetsicashiteariri, irointi yovetsicantari impincatsajeiteri iriori.

¹⁷ Iriotaque Quirishito intasanotacarori itimi, catsini. Icantaqueeriri maaroni yovetsicane: “Aitaque pincantajeiteari”.

¹⁸ Iro aito iotacairori avatsa maaroni. Eirome otimime, eiro aneime. Aisati iquem-petaca Quirishito: ipincatsariventajeitaquee arori, aisati maaroni itsipapee quemisan-tiriri; eirome itimime, eiro ayojeitirime Tasorensi, eiro aquemisantajeitume, eiro avav-isacojeitajame. Irio jvatiriri maaroni tinaajeitajanchaneri, yanacojeitaqueri ipincatsar-itasanoti. Queario ipincatsaritananoti catsini,

¹⁹ itasorensitasanotaque catsini: irootaque icoacaaqueriri iriri.

²⁰ Peerani aquisajeiveitarini Tasorensi, iro cantaincha icamimentajeitaquee Quirishito coroshiqui, yaparajatimentaqueero iriraja. Yoameetsajeitaquee, meeca aneacameet-sajeitajiri Tasorensi, aisati inecameetsajeitaquee arori. Aisati inquiresati, inecameet-sajeitiri Tasorensi; aisati iriori, inecameetsatiri. Ari imataquero Quirishito, cameetsa asavicajeitantari maaroni.

Iquenquetsatacotiri corosashisati.

²¹ Ari, peerani te pinquencheshiretapiniterini Tasorensi, piquisajeiveitarini. Piquen-qeshireveitaroni caari cameetsatatsi, aisati pantapiniveitaroni, caari piquencheshire-tantari Tasorensi.

²² Iro cantaincha yatiritapaaque Jesoquirishito, impoiji icamimentaquempi, yoameet-sataquempi, irootaque pineacameetsatantariri Tasorensi, aisati inecameetsatantimpiri iriori. Ineaquempi picameetsasananotaque, iquempetacaantaquempi te aneajeroji meeca pantane. Meeca eiro icantajimpitsi: “Ainiro pantane”.

²³ Iro cantaincha icoaque ancantaitiyempani anquemisanteri. Aiquero ajatatiye, anquemisantasananotaque. Pamene, ovaraanaca irineane Tasorensi maaroni nampit-sipeequi. Ocamantajeitee jaoca ancanteari avaviasacotantajeari. Tempa naro ovaraaque-rori, nocarajeitaqueri itsipapee ovaraayetaquerori; aisati icamantaquempiro Epajarashi. Pishiretacaro, piotantacari pavisacotaji. Meeca eiro piperaventarotsi.

Yoametiri Pavoro caari iojeiveitani.

²⁴ Oshequi iquematsicataro Quirishito yoaviasacojeitantariri maaroni quemisanta-jeitiriri, meeca ishiacantaquee arori ivatsasanori iriori. Aisati narori, noquempetacari: ainiro noquematsicantantaquempiri, noquemisantacantaquempiri, irootaque no-quimoshiretantacari. Moncarataca meeca.

²⁵ Icantaquena Tasorensi: “Pamitacojeiteri maaroni piyemisantaririnte, aisati poametasanojeiteri noneane”.

²⁶ Ari meeca noamejeitempiro caari iojeiveitani inampirepee Tasorensi, aisati caari iojeiveitani atiripee. Meeca iotacajeiteero Tasorensi, aisati iriori maaroni itsipapee quemisantajeitiriri.

²⁷ Icoaque meeca piojeitero oca imajeitaquempiri: ocameetsasananoti catsini. Te avi-rojei jorio, iro cantaincha quiso yoasanojeitaquempi Quirishito, irootaque piojeitantariri cameetsa pisaviquimojeiteri Tasorensi, coajica.

²⁸ Iriotaque Quirishito noquenquetsatacotiri. Nocantajeitiri atiri: “Pantirocari caari cameetsatatsi”. Aisati noametasanojeitiri iriotasanotanteariri Quirishito, irishiretasanotanteariri. Impoiji iriotacojeiteri atiripee, icameetsasananoti.

²⁹ Irootaque nopomerentsitimentantaquempiri, caari noperaventantimpi. Irio Quirishito shintsitacaquenari, itasoncaventaquena nomatantarori.

2

¹ Nocoaque piojeite nocantani nopomerentsitacoventimpi noquenquetsatacairi Tasorensi: nocantapinitiri iramitacotempi, aisati noquempetacoventiri yora ayemisantaririnte anta Arariseaqui. Aisati iriori nopomerentsitacoventajitiri maaroni caari neana. Nocantapinitiri Tasorensi iramitacotempi

² piveshireajeitantajeari, pinintavacaajeitantajeari. Aisati nocoaque ontimimotasan-otempi piotanteari, nocoaque piotasanoteri yora imanaqueniri Tasorensi. Meeca iotacaa-jeitimpi: piojeitiri, iriotaque Quirishito.

³ Iotasanoti catsini, otimasananoti catsini iotantari. Te amateroji anquencheshiretero maaroni iotiri irinti.

Icantiri Pavoro: “Yamataviyeetimpicari”.

⁴ Queariompia, yamataviyeetimpicari: irootaque noamejeitantimpirori maaroni oca.

⁵ Queario, te nontspajeitempiji, iro cantaincha oshequi noquencheshiretaquempi. Noveshireimentaquempi: cameetsa pisavicajeiti, aisati piquemisantasanajeitaque.

⁶ Tempa peerani pishiretacari Avincatsarite Jesoquirishito, irootaque yoavisacotanta-quempiri. Irosati pincanteani: pishireteari maaroni quitaiteriqui, paitapeerica panteri.

⁷ Noshiacontempiro: ora panquirensi, irootaque ovaritsa shiocacairori, aisati irootaque shintsitacairori. Aisati pinquempeteari avirori, quiso poyeri

Quirishito iriotacantempiri, aisati irishintsitacantempiri. Pincantaitatitempani pinquemisantasanoteri, tempa irootaque yoameyeetimpiri. Aitaque pincantajeitari, pimpasonquijeiteri Quirishito, tempa icavintsaasanojeitaquee.

⁸Queariompia: eiro piquemisantiriti yora coavetachari iramatavijeitempi. Iroamejeitempime atiripee maaroni iquenqueshireyeteri, aisati maaroni ioyevetari: oca yoameyevetariri ishanincani iriori, intasonotacarori itimi, iro cantaincha te ontampicateji. Yamatavitimpicari. Te incoacayempiji iriori pinquemisantero yoametimpiri Quirishito.

⁹Peerani iquempetaquee Quirishito avatsa arori, iro cantaincha itasorensitasanotaque catsini, yashi yoiro.

¹⁰Ariorica quiso poyeri, intasoncaventapinijeitempi, incantaitatitempani, eiro pashinoncantajatsi catsini. Ipincatsaritanotaque catsini, yanaacotasanojeitiri maaroni itsipapee pincatsarivetachari.

¹¹Yora joriopee, itoyeantajeita: yojocaquero imeshina. Meeca oquempvetaca pitoyeantaca avirori, iro cantaincha yojocacaquempiro Quirishito caari cameetsatsi pantiniri. Meeca eiro acoirotsi antapinitero caari cameetsatsi: tempa ipashinitacaajeitaquee.

¹²Ariorica pivaotisajeitaca, oquempetaca pitsipatacari Jesoshi: picamajeitaque, aisati pitijajeitaca. Tecatsi pincantero pincoayero pantero caari cameetsatsi: tempa oquempetaca picamaque. Itinaanaja aisati Quirishito, meeca oquempetaca pitinaajeitanaja aisati: meeca pinashijeitaja. Iro pinashijeitantajari, pishiretacari yora Tasorensisanori: yora oitinaajiriri Quirishito.

¹³Peerani oquempetimojeitaquempi picamaque, te pinquenqueshireterini Tasorensi, irointi pantapiniveitaroni caari cameetsatsi. Te pioveitarini Tasorensi. Meecauea icavintsaajeitaquempi: te inquenqueshiretajeiroji aisati caari cameetsatsi pantajeiveitaniri. Meeca piquempetacari Quirishito: piojeitiri Tasorensi, aisati coajica pisaviquimojeiteri anta inquitequi.

¹⁴Pamene: peerani oshequi apomerentsiventavetaro isanquenareni Moishishi avav-
isacotantajeameri, iro cantaincha te amoncarajeiteroji. Ayojeitanaque otimini antane, irootaque ajatanteameri ishaaviji. Iro cantaincha icamimentajeitaquee Quirishito coroshiqui, yoavisacojeitaquee. Meeca eiro apomerentsiventirotsi sanguenarensi avav-
isacojeitantajeari.

¹⁵Peerani, icamantacari Quirishito coroshiqui, iotacaajeitaquee tecatsi incantajeitee camaari iroashinoncaajeitee. Itsaneacoventaquee, eiro ishinetiriti camaari irantanatee.

Eiro piquenqueshiretirotsi yoameyevetimpiri atiripee.

¹⁶Te oncameetsateji inquishmentempiro pishaninca poapinitari aisati piraapinitiri. Ainiro quitaiteripee inashitacaari joriopee, aisati imaoreajeitantari. Irosati yantironi: maaroni osarintsi, maaroni cashiri, aisati maaroni saavaro. Terica pimoncarateari avirori, eiro pishinetiriti inquishmentempiro.

¹⁷Peerani icantani yametapinijeitaro joriopee, iquenqueshireantariri Tasorensi, iro cantaincha meeca yareetaca Quirishito. Irosanori irinti, ampincatsajeiteri. Moncarataca, ari ocarati: eiro meeca apiitapinijirotsi yamejeitari joriopee.

¹⁸Queariompia, eiro pishinetiriti iramatavitempi. Icoacampicari pinquempeteari iri-
ori, icantimpicari: "Pimpincatsateri inampire Tasorensi pavisacotantajeari. Noneaquero caari ineapiniyeeti: ¿pineaquerompa avirori?" Ishemetive. Eiro piquenqueshiretirotsi incantavetempiri, itseeanyi.

¹⁹Te inquenqueshireteriji yora Jivajeitaqueeri, te irioteriji. Aroquea ainti, ariorica anquenqueshireteri Quirishito, iriotacaajeitee, iramitacojeitee quiso avavacaajeitea, am-
atasanotantearori icoacaqueeri Tasorensi.

²⁰Icamaque Quirishito, aisati oquempvetaca pitsipatacari picamaque avirori. Meeca eiro piquenqueshiretajiroti yoameyevetimpiri atiripee: eiro oavisacotimpitsi. ¿Paita patsipetashitantarori pantashiyevetacaro icantimpiri iriori?

²¹Icantanivetimp: "Ariorica picoaque poavisacotea, eiro pipamitiriti yora, eiro poaritsi yora, eiro pantiritsi".

²²Tempa icantashitacaro atiri oca, yoamemashitimpiro. Pamene, tempa ashii airo avapinijeitaro avari: ariorica ayearo, poyere; tecatsi oncantero ashire.

²³Ariorica antiteari, ajiticari ayoti, ajiticari aquemisantasanoti, ajiticari te ashemetee, ajiticari ashinoncaimentacari Tasorensi. Iro cantaincha atsipetashitacaro atita. Ariorica antitaquea, acantani acoaquero caari cameetsatsi, aisati ashemetaquee.

3

Icantiri Pavoro: "Cameetsa pisavicajeite".

¹ Peerani te piojeiveitearini Tasorentsi, pijajeiteme Sharincaveniqui; iro cantaincha icamimentajeitaquempi Quirishito, yoavisacojeitaquempi. Impoiji itinaanaja; irootaque meeca piojeitantariri Tasorentsi, eiro pijajeititsi Sharincaveniqui, ainti pijajeite inquitequi: anta isaviquinta Quirishito iracosanoriqui Tasorentsi, icaratiri ipincatsaritasanotaque. Meeca pincosanotanaque pisavicaajeite anta, pintsipajeitantariri.

² Piquenqueshirejeitea jaoca pincantajeiteari aca quipatsiquica.

³ Oquempetaca picamaque, eiro meeca piquenqueshireyetajirotsi timayetatsiri quipatsiquica, eiro piquempetajatsi peerani. Iro cantaincha yoaneajeitaquempi Tasorentsi, pintimajeitapaaje inquitequi. Iquempoyeaquempi, inquempetacantajempi Quirishito.

⁴ Coajica impiaje quipatsiquica Quirishito, yora oaneajeitaqueeri. Cameetsa impincatsaritapaaje, ancarajeitapaajeri ampincatsaritapaaje arori.

Icanti Pavoro: "Eiro papiitajirotsi caari cameetsatatsi pantaveitaniri peerani".

⁵ Eiro catsini papiitajirotsi caari cameetsatatsi pantaveitaniri peerani. Shirampari, eiro pantirotsi caari pai. Tsinane, eiro pantiritsi caari pai. Eiro pimayempitantapinititsi. Eiro pinevetarotsi tsinane. Eiro pinevetaritsi shirampari. Eiro pinevetasanotarotsi vaararonsi: piquempetacantarocari irio pitasorentsite pinintantarori.

⁶ Oshequi imayetiro atiripee, irootaque inquisanteariri coajica Tasorentsi.

⁷ Peerani pantapiniveitaroni, pashi poironi.

⁸ Pojocajeitajero meeca: eiro piquisavacaajeitajatsi, eiro pitsimajencatavacaajatsi, eiro picatsimatavacaajatsi, eiro picantimatavacaajeitajatsi, eiro pineaveetantajarotsi caari cameetsatatsi,

⁹ eiro pamatavitavacaajeitajatsi. Tempa pinashijeitaja meeca, eiro papiitajirotsi pantaveitaniri.

¹⁰ Meeca pimpashinitanotanaquea, pincameetsatasanojeitanaque, pinquempjeiteari yora Vetsicanaquempiri peerani.

¹¹ Te inquenqueshireteroji Tasorentsi jaocarica acantajeitari: ariorica ajorioti, terica; ariorica atoyeanta, terica. Te inquenqueshireteroji jaocarica aponeacari, paitapeerica ayoyetiri, ariorica pimantaari, terica impimanteetejei. Irointi iquenqueshiretacotee aquemisantiririca Quirishito.

Jaoca icantajeitari quemisantatsiri.

¹² Pamene, tempa icoyeajeitaquempi Tasorentsi. Icoaque pincameetsatasanotanaque, aisati inintajeitaquempi. Icoacajeitaquempi pashi poyero pincavintsante, pineshinocantane. Eiro pishemetitsi, eiro pishema, eiro piquisa.

¹³ Pintacotavacaayea: eiro pipiataritsi quisavetempineri, irointi pincavintsayeri. Tempa icavintsaimpi Avincatsarite, meeca pishiacoteri, pincavintsaajeiteri itsipapee.

¹⁴ Jero oca pimatasanoteri: aiquero pinintavacaasanojeitea catsini, maaroni. Pineaquero, ariorica anintavacaajeitea, ari ancameetsatasanojeitanaque maaroni.

¹⁵ Nocoaque piveshireimentajeiteari yora Quirishito. Irootaque icoyeajeitantaquempiri, icoaque piveshireajeitanajea, maaroni. Icoaque anquempetavacaajeitea, maaroni quemisantatsiri. Aisati icoaque ampasonquijeiteri Tasorentsi.

¹⁶ Piquenqueshiretasanotero irineane Quirishito. Pincanteri iriotacajeitempi cameetsa poametavacaajeitantajeari. Icavintsaajeitaquempi Tasorentsi, meeca pimpasonquijeiteri. Poametavacaajeitea pimpampoyeaeventajeiteri.

¹⁷ Te ancoajeiteji impashiventacaajeitee Avincatsarite Jesoshi, irootaque nocoacantaquempiri poameetsayetero maaroni pantayeteri. Ocameetsati anquenqueshiretapiniteri, ampasonquijeitantariri Tasorentsi.

Icantiri jaoca ancanteriri ashanincapee.

¹⁸ Tsinane, pimpincatsateri pijime, irootaque icoacaquempiri Avincatsarite.

¹⁹ Shirampari, pinintasanotero pijina, eiroquea piquishiroti.

²⁰ Jananequi, pinquemisantapiniteri ashijeitimpiri, paitapeerica incantempiri. Irootaque iveshireimentari Avincatsarite.

²¹ Itimirica pitomipee, eiro piquisatsatiritsi: pishemashireacaaricari.

²² Pimantaari, pinquemisantasanoteri yora amanantimpiri, paitapeerica incantempiri. Eiroquea pamatavitiritsi: eirorica yamenimpitsi, iro cantaincha eiro piperatarotsi pintsameeteneri. Ariorica pipincatsatiri Avincatsarite, ari pishintsiventeneri pivatorote.

²³ Paitapeerica panteneriri, pishintsiventeneri. Pinquempetacanteri pishintsiventiniri Avincatsarite, te irio atiri.

²⁴ Piotasanotaque pantapinitaqueneri Avincatsarite Quirishito, iriotaque pinatempineri coajica, iroaneasanotajempi anta inquitequi.

²⁵ Irintiquea yora antapinitirori caari cameetsatsi: iroashinoncayeri irinti. Paitapeerica antajeitaqueri, timatsi incanteeri arori, tecatsi ancantea amataviteri.

4

Icantiri Pavoro: "Pinquenquetsatacapiniteri Tasorentsi".

¹ Itimirica atiri pamanantiri, cameetsa pineshinoncateri, pincavintsayeri. Tempa pioti itimi anta inquitequi pivincatsarite avirori: iotaque maaroni pantajeitaqueri.

² Pincantaitatiyempani pinquenquetsatacapiniteri Tasorentsi, pimatasanotero catsini. Queario, ariorica pinquenquetsatacayeri, pimpasonquitapiniteri aisati.

³ Tempa nocamantapinitiri atiripee jaoca incanteeri iravisacotantajeeri, irootaque yoiminqueanteetaquenari meeca caravosoquica. Aisati pincanteri Tasorentsi iramitacotena noncamantajeiteri atiripee jaoca icantajeitaqueeri Quirishito yoavisacotantajeeri.

⁴ Nocoaque cameetsa nontsoteeneri, inquemasanotantearori.

⁵ Aisati avirori, ariorica pincarajeiteri caari quemisantayetatsi, cameetsa pisavique, aisati cameetsa poamejeiteri, eiro piperaventarotsi.

⁶ Ariorica pinquenquetsatacayeri, pincavintsayeri. Eiro pashereiritsi: vero, vero, vero. Ariorica irisampitempi paitarica, piote cameetsa panqueri incoanteeri iriori inquemisante.

Iquenquetsatacotiri Tiquico.

⁷⁻⁸ Meeca nontianquempiri Tiquico, ayemisantaririnte nonintasanotiri. Iquempejeitaquena, iquearioventiniri Avincatsarite paitapeerica yantiniriri. Incamantapaaquempi jaoca nocantacari nosavicaque. Irootaque nontiancanteariri, piotanteari jaoca nocantajeitari aca. Aisati nocoaque iriveshireacayempi.

⁹ Intsipatanaqueeri Tiquico pishaninca Oneshimo. Irisati iriori ayemisantaririnte, iquearioventiniri Avincatsarite paitapeerica yantiniriri. Nonintasanotiri. Ari incarate apite camantapeempineri maaroni nantajeitiri aca.

Ivetsajeitari corosashisati.

¹⁰ Ainiro aca yoiminqueetaqueri aisati yora Arishitaraco, ivetsajeitaquempi. Aisati ivetsajeitaquempi Maricoshi, yora iraniri Verenave. Tempa nocamantaquempi chapinqui: ariorica irareetempi Maricoshi, pineshinoncatavaqueri.

¹¹ Jeri aisati Jesoshi, yora pajitachari aisati Joshito, ivetsataquempi. Jorio inajeiti, iro cantaincha icarajeitaquena noquenquetsatacojeitiri Tasorentsi, jaoca icanta ipincatsariventaquae. Aisati oshequi iveshireacaaquena.

¹² Ainiro aisati pishaninca Epajarashi, ivetsajeitaquempi. Irisati iriori antaveetiniriri Jesoquirishito. Icantani icantapinitiri Tasorentsi iramitacotempi pincameetsatanteari, aisati pimatantearori maaroni icoacajeitaquempiri Tasorentsi.

¹³ Noncamantempi: queario, ipomerentsiventanasojeitaquempi. Aisati ipomerentsiventiri yora araoriseasati, jeri aisati iyeraporishisati.

¹⁴ Aisati ivetsajeitaquempi Irocashi: yora aavintantatsiri nonintasanotiri. Aisati ivetsajeitaquempi yora Temashi.

¹⁵ Novetsajeitari maaroni ayemisantaririnte anta Araoriseaqui, aisati novetsataro Ninaja, aisati novetsajeitari maaroni quemisantapinijeitatsiri anta ovancoqui.

¹⁶ Pineanajeiteneri nosanquenare maaroni quemisantatsiri aviroriqui. Impoiji pincanteri yora araoriseasati irineanateneri maaroni iyemisantaririnte iriori. Aisati pineanajeitero ora nosanquenajeitiniriri iriori.

¹⁷ Jero oca pincanteriri Ariquipo: "Pimamatero maaroni icoacajuempiri Avincatsarite".

¹⁸ Ainirona nosaviqui aca caravosoqui, eiro pipeacotanatsi. Nocoaque irineshinoncajeitempi Tasorentsi.

Ari ocarati. Narotaque sanquenajeitimpirori: *Pavoro*

IJIVATAQUE PAVORO ISANQUENAJEITINIRI YORA TESARONICASATI

Ivetsajeitari Pavoro tesaronicasati.

¹ ¿Savicajeitatsimpimpa ara, tesaronicasati? ¿Tecatsimpa oajeitempine? Narotaque aca Pavoro, nocarajeitiri Shirivano aisati Timoteo. Nosanquenajeitaquempiro maaroni noyemisantaririnte ara. Tempa avirojeitaque shanincajeitacariri Apa Atasorentsitate aisati Avincatsarite Jesoquirishito.

² Nocoaque Irineshinoncajeitempi aisati cameetsa irisavicacaajeitempi.

Oshequi iquemisanti tesaronicasati.

Nocantatiani nopasonquitiri Tasorentsi: nopasonquitimentajeitempi aisati nocantiri iramitacotempi.

³ Ariorica noquenquetsatacairi, noquenqueshiretapinitimpi, nocantapinitiri: “Pintasoncaventeri tesaronicasati”. Oshequi pishirejeitacari aisati pinintajeitaqueri, irootaque pantaveetantacanariri maaroni icoacaajeitaquempiri. Aisati noquenqueshiretaquempipi, piquearioventiro pishiretacari Avincatsarite Jesoquirishito, piojeitaque eiro yamatavitimpitsi.

⁴ Noyemisantaririnte, icantani inintaquempi Tasorentsi. Niojeitaque icoyeajeitaquempipi, irootaque itomintajeitantaquempiri.

⁵ Piojeitaque peerani nocamantajeitaquempi jaoca pincanteari pavisacojeitantajeari; te noncantashiteaji. Oamejeitaquempi Ishire Tasorentsi, otasoncacoventajeitaquempipi, piojeitantaroriri queariosanotaque nocantaquempiri. Aisati ocameetsajeitaque maaroni nantajeitaqueri, irootaque pioletantacari queariotasanotaque nocantaqueri.

⁶ Paitarica piqueacotaquena nantaqueri, ari piquempejeitaquena. Aisati pimataquero paitarica piquemacotaqueriri yantayetiri Avincatsarite Jesoshi. Piquemisantaquero maaroni nocamantaquempiri, irosati piquemaatsicamentantacaroriri, iro cantaincha piveshireimentacarori Ishire Tasorentsi.

⁷ Ari cameetsa pisavicajeitaque, irootaque icoantajeitacari inquempejeitempi maaroni ayemisantaririnte anta Maseroniaqui aisati Acayaqui.

⁸ Aitaque povaajeitanaquero Irineane Avincatsarite. Te apaniro inquemacotempi yora maseroniasati aisati acayasati, irointi iquemacojeitaquempipi maaroni itsipapee atiri piquemisantasantaquere. Te noncamantajeiteriji naroriri,

⁹ irointi iquenquetsatacotashijeitaquempipi maaroni. Iojeitaque peerani nojatashitanatquempipi, pojocajeitajiro maaroni povetsicashiyevetari pijitasorentsiivetari. Paventajeitacari Tasorentsiisanoriri, yora aneasanotatsiriri; meeca pantaveetaqueneriri icoacaajeitaquempipi iririri.

¹⁰ Icamaque peerani Jesoshi, yora Itomi Tasorentsi, impoiiji yoitinaajiri aisati. Coajica, inquisajeitaqueri maaroni caari cameetsatsi, iro cantaincha eiro atsaroacaajeitaritsi ainti: tempa yoavisacojeitaquere. Meeca paamaajeiteari Itomi: piojeitaque impocaje, imponeaquea inquitequi.

2

Yantayetiri Pavoro Tesaronicaqui.

¹⁻² Peerani, tequerani nojatani pinampiqui, oshequi noneacatsitacaroriri anta Jiriposhiqui, aisati ishironintimenteaquena. Aisati oshequi opomerentsitimotaquena ara pinampiqui, iro cantaincha te nontsaroapeeji. Aitaque, yamitacotaquena Tasorentsi, nomatantacaroriri nocamantajeitaquempiro Irineane. Te nantsipetashitearoriri noquivan-tajeitaquempipi. Tempa, noyemisantaririnte, piojeitaquero maaroni oca.

³ Noquemisantacantaquempiniriri, te noncoyeni namatavijeitempi. Tampatica noametaquempini: te nontseeayaji.

⁴ Iotitaca Tasorentsi cameetsa novaayempiro irineane, irootaque itiancantanariri nocamantimpiro. Te nonintasanoveteaji irineacameetsajeitena atiri, irointi nocoasanotaque irineacameetsatena Tasorentsi. Iriotaque iotasanotiroriri maaroni aquenqueshirejeitiri.

⁵ Te noninteji cameetsa noveshireacaashijeitempi, te noncantashijeitempiiji: “Picameetsatanajojeitaque”. Namatavitimpicari. Ioti Tasorentsi te irio nonintimentempipi piirequite.

⁶⁻⁷ Tempa narojeitaque itiancane Quirishito noquenquetsati, irootaque ocameetsatan-tavetari noncantempine: “Pimpincatsajeitena”. Iro cantaincha te noncoyeji pimpincatsajeitena, aisati te noncoyeji impincatsajeitena itsipapee atiri. Ariorica atsotairiri tsinane

otomipee, ari ocavintsairi. Aisati noquempetacantapaaquempini peerani: nocavintsaa-jeitapaaquempi, te noshintsitacaajeitapeempiji.

⁸ Oshequi noneacameetsajeitapaaquempi, oshequi nonintajeitapaaquempi, irootaque nocamantantapaaquempirori irineane Tasorensi. Meeca, paitapeerica nantayetaqueri, nocantatiani noquenqueshiretapinijeitauquempi.

⁹ Piojeiti, noyemisantaririnte, oshequi nopomerentsitacaro nantaveeti quitaiteriqui aisati tsiteniriqui. Te nonintajeiteji pimpomerentsiventenaro avirori pimpashiyetena paitapeerica. Nocamantajeitauquempiro Irineane Tasorensi.

¹⁰ Pineajeitauquena noquemisantasanotaque, cameetsa nosavicaajeitauque, te ontimeji nantane. Aisati inajeitauquena Tasorensi, cameetsa nosaviquimojeitauquempi, noyemisantaririnte.

¹¹ Jero oca noshiantempiri: tempa cameetsa yoametiri shirampari itomipee. Piojeitauque noquempetacantajeitauquempi notomipee, nocantajeitauquempi pinquemisante, noveshireacaajeitauquempi, aisati noamejeitauquempi

¹² cameetsa pisavicaajeite irivshirementantempiri Tasorensi. Tempa icoyeajeitauquempi pisavicaajeitantajeari anta ipincatsaritinta, anta ishiquaireacojeitirinta maaroni.

¹³ Peerani, noquenquetsacantapaaquempiniri, pishiretasanotavacaro Irineane Tasorensi. Te pijitavaqueroji iro nashi noneane, irointiquea piotaquero iroosanotaque irineane Tasorensi, tempa queario oni. Piquemisantaque, irootaque opashinitacantajimpiri, oameetsatantajimpiri. Irootaque nocantantacariri Tasorensi: "Ariove, iquemisantaquero tesaronicasati pineane". Aitaque nocantani nocantapinitiri.

¹⁴ Ari, noyemisantaririnte, piquempejeitacari yora quemisantajeitiriri Jesoquirishito anta Joreaqui. Iquisajeitauqueri jorio ayemisantaririnte anta, aisati iquempejeitauquempi pishaninca ara pinampiqui, iquisajeitauquempi iriori.

¹⁵ Yoacantajeitauqueri jorio Jesoquirishito, aisati peerani yoajeitauquerini camantantatsiniri. Aisati iquempejeitauquena narori: iquisajeitauquena, te incoacaajenaji noshanincatajeari. Te onimoteriji Tasorensi yantanirojeitauqueri: tempa iquisanirojeitauqueri maaroni itsipapee atiri.

¹⁶ Oshequi itsaneacotapinivetaquena nonquenquetsatacaajeitempi avirorije, maaroni caari joriotatsi. Te incoacaajeivetempiji pavisacojeitaje. Aiquero ijatatii yantaquero caari cameetsatatsi, iro cantaincha meeca iquisaqueri Tasorensi, queario iroasanquetaajeiteri.

Icoaque Pavoro irineajeri aisati tesaronicasati.

¹⁷ Noyemisantaririnte, te ancaratavacaajeivetempaji, meeca oshequi nocoiteajeitauquempi. Te anevacaajeitajeaji, iro cantaincha te nompeacotempiji. Oshequi nocoaque anevacaajeitajea aisati.

¹⁸ Nocoajeivetaca nonquivantajeitajempime. Aisati narori nocoapinivetaca nojatashitempime apaniro, iro cantaincha yoipiavajana Satanashi.

¹⁹ Coajica impocapaaje aisati Avincatsarite Jesoquirishito. Iotaque iriori avirojeitauque noquemisantacaajeitauqueri. Ariorica impocaje, nonquimoshiretimentajeitempi, noveshireimentajeitempi, oshequi nonquenquetsatacojeitempi.

²⁰ Queario, noveshireimentasanojeitauquempi meeca, noquimoshiretimentasanojeitauquempi.

3

¹ Oshequi noquenqueshirejeivetauquempi, iro cantaincha tecatsi noncantea nareetajempini narori. Naamaaca ocameetsati nosavique apaniro aca Atenashiqui,

² iro cantaincha nocoaque notianquempiri irinti Timoteo. Tempa iriotaque ayemisantaririnte, tempa iquempejeitauquee antajeitiniri Tasorensi, aquenquetsatacojeitiri Quirishito, acamantajeitiri atiri yoavisacotantaque. Ari yareetapaaquempi Timoteo, yamitacotapaaquempi piquemisantasanotaque, aisati iveshireacaajeitapaaquempi.

³ Pamene, timatsi quisajeitauquempiri, iro iquisantaquempiri piquemisantaqueri Jesoshi. Iro cantaincha eiro picantashiretanaquetsi, tempa piotitacani intime quishempineri.

⁴ Notsipatantaquempiniri, nocamantitaquempini: "Ariorica pinquemisante, inquisaquempi tseencantatsiri". Aitaque piojeitauque meeca moncaratata nocamantitaquempiniri,

⁵ irootaque oshequi noquenqueshireantaquempiri. Notiancaqueri Timoteo notanteari irosatirica piquemisantajeiti. Naamaavetaquempi yantacaquempiro camaari caari cameetsatatsi. Ariorica pinquemisanterime camaari, natsipetashitacarome noquemisantacaajeitauquempi peerani.

⁶ Ari meeca yareetapaaja aisati Timoteo. Ineaitimpi, meeca ocameetsati oca icamantapaajanari: “Irosati icanta tesaronicasati, iquemisantasanojeitaque, aisati inintasanojeitaqueri itsipapee. Ineacameetsajeitaquempi, icoiteajeitaquempi”. Aisati narori, oshequi nocoiteajeitaquempi avirori.

⁷ Oshequi nashinoncaaca narori aca, iguisheetaquena. Iro cantaincha niotaque picantatani piquemisantajeitaque, irootaque noveshireimentantajeitaquempi.

⁸ Meeca noquimoshirejeitanaque, niojeitaque piquearioventaquero piquemisantaqueri Avincatsarite.

⁹ Oshequi catsini noveshireimentaquempi, irootaque nopasonquitantacariri Apa Tasorensi aisati Avincatsarite Jesoshi, iquemisantasanojeitaque, aisati yamenacojeitaquee maaroni.

¹⁰ Noquenuetsatacaapinitiri Tasorensi: quitaiteeriqui aisati tsiteniriqui. Nocantiri: “Nocoaque pintianquena noneajeri aisati tesaronicasati”. Aisati nocoaque intianquena namitacojeitempi pinguemisantasanojeitanteari eiroquea pitseencashiretantajatsi.

¹¹ Nocoaque irareetacayena ara pinampiqui.

¹² Nocoaque iramitacotempi cameetsa pinintasanotavacaajeitea catsini, aisati pinintasanojeiteri catsini itsipapee. Nocoaque pimocarajeitena, nonintasanojeitaquempi avirori.

¹³ Nocoaque iroameetsashiretasanotempi catsini, pinguempetanteariri iriori. Coajica impocaje Avincatsarite Jesoshi, intsipajeitaqueari maaroni quemisantajeitiriniri, yora yoameetsajeitiniri. Ari, impocajeiterica, nocoaque irineacameetsajeitempi Tasorensi: tempa irio Apa arori.

4

Incantajeitiri: “Cameetsa pisavicajeite, pinintajeiteri itsipapee, panteneri Tasorensi icoacaaquempiri”.

¹ Meeca, noyemisaririnte, nocoaque pimajeitero oca noncantempiri: irootaque icoacampiri Avincatsarite Jesoshi. Noamejeitaquempiro jaoca pincantajeiteari piveshireacantajeariri Tasorensi. Ari pimatapinitaqueri peerani: aiqero pijatatiye meeca, pimatasanotero.

² Piojeitaquero icantaquempiri Avincatsarite Jesoshi, novaajimpiri narori.

³ Icoasotaque Tasorensi pincameetsatasanojeitanaque. Aisati te incoyeji pineavintsatero tsinane caari pai,

⁴ irointiquea icoaque quiso poasanotero pijinasanori. Cameetsa paasanotero, pincavintsayero.

⁵ Eiro piquempetaritsi caari quemisantiri Tasorensi: inevetashitacaro tsinane, iotashitaca icoashitaca irineavintsatero.

⁶ Aisati icoaque eiro pimatirotsi itsaneayetacari. Eiro pineavintsatitayetiritsi ijina pishaninca. Ariorica pantacoteri, iroasanquetasanotempi Avincatsarite. Tempa oca nocamantasanojeitaquempiro peerani.

⁷ Te incoacaajeiteji Tasorensi anquempeteari otsiti aneavintsayero tsinane, irointi icoacaajeitaquee ancameetsatanaque.

⁸ Yora caari mayeterone oca nocantaquempiri, te irio impiatsatea atiri, irinti ipiatsatata Tasorensi: yora tiancaquempirori Ishire.

⁹ Pinintavacaajeitaca: tempa iriotaque Tasorensi oamejeitaquempirori. Maname nosanquenatajempime aisati: “Pinintajeiteri piyemisaririnte”, tempa nantsipetarome. Tempa picantani pinintavacaajeitaca.

¹⁰ Queario, pinintajeitaqueri ayemisaririnte: maaroni yora maseroniasati. Meeca, noshaninca, noncantempi aisati, aiqero pijatatiye pinintasanojeiteri catsini.

¹¹ Pincoajeitanaque pisavicajeite cameetsa. Eiro pashereiritsi itsipapee. Eiro paamacotaritsi. Pantaveetapinitine, paanteari coiteimojeitimpiri. Tempa nocamantitaquempironi oca.

¹² Ariorica pimajeitero, ari irineacameetsajeitempi maaroni caari quemisantatsi, aisati eiro coiteimojeitimpitsi paitapeerica.

Intinaajeitanaje camajeitaintsiri, aisati impocaje Quirishito.

¹³ Meeca, noyemisaririnte, noninti noncamantempiro jaoca incantajeiteari yora ayemisaririnte, camajeitaintsiri. Nocoaque piotasanotero. Eiro piraacotasanojiritsi, eiro piquempetaritsi yora caari iotatsine antinaajeitaje.

¹⁴ Ayojeitaque icamaque Jesoshi, aisati itinaanaja. Aisati inquempejeitaqueari maaroni quemisantajeitaqueriri, camajeivetainchari: irointinaajeitajeri Tasorensi. Ariorica impocapaaje aisati Jesoshi, intsipajeitaqueari.

¹⁵⁻¹⁷ Jero oca noncamantempiri, irootaque irineane Avincatsarite. Coajica impocaje, aisati intianqueri Tasorentsi inampirepee, incanteri: “Meecaquea pijajeite pampatojeiteri maaroni quemisantajeitanari”. Irosati intiotantaquearo itiore, aisati incajemapaaque yora jivatacaajeitiriri. Irosati irisaviincantapaaqueari Avincatsarite, imponeaquea inquitequi jenoqui. Eirotsitarica acamaajeititsi arori, eirotsita ajivajeitiritsi camajeitaintsiri ajajeite jenoqui. Intinaajeitavajetsita quemisantajeitirini Quirishito. Impoijiquea ajajeite, antsipajeitanaqueari camajeivetainchari. Iraayeetanaquee anta mencoriqui, antonquiotavaqueari Avincatsarite anta inquitequi. Impoiji ancantaitatiyempani quiso avanaqueri.

¹⁸ Pincamantajeiteri maaroni ayemisantaririnte oca nocamantaquemperi, piveshireantajeiteari, maaroni.

5

¹ Te nonintacayempiroji nosanquenatempiro jaoca oncarate impocantajeiri Jesoshi.

² Yora coshitantatsiri: ariorica incoshite, irimananaquearo tsiteniri. Aisati iquempetacari Avincatsarite, imanaquero jaoca oncarate impoque: tempa piojeitaquero oca.

³ Ariorica incanteete: “Cameetsa meeca asavicaajeite, tecatsi antanateene”, ari omapocageri irashinoncaaquea. Inquempetearo tsinane tsomontetatsiri. Omapocaquero antisicaneentaquero, tecatsi oncantero ompeajeero.

⁴ Iro cantaincha, noyemisantaririnte, piojeitaque avinti: te onquempetimotoempiji pinte tsiteniriqui. Eiro imapoquimpitsi Avincatsarite, eiro iquempetacaantimpitsi yora coshitantatsiri, imapoquiri ishaninca icoshitiri.

⁵ Aitaque piojeitaque, oquempetimotoimpi pitimi quitaiteariqui. Te arojei caari iojeitatsi, te antimeji tsiteniriqui.

⁶ Te inquenqueshireteaji itsipapee, iro cantaincha eiro aquempejeitaritsi arori. Tsame anquenqueshirejeitea ainti, aamaajeitajeiri Avincatsarite. Eiro ashinquitatsi, irointi anquenqueshireempa.

⁷ Imaapiniyeeti tsiteniriqui, ishinquitapiniyeeta tsiteniriqui,

⁸ iro cantaincha aquenapinijeitaque ainti quitaiteariqui, eiro ashinquitatsi. Ariorica imanatapinita soraro, ipashicanejitacaro ashiro, aisati ipashicainatacaro. Yaventacaro, eiro aveantaritsi ivesamento oyerinemer. Tsame anquempejeiveteari iriori, iro cantaincha aventeari Tasorentsi, irinti: anquemisanteri, aninteri, ayotaque ari iroavisacojeitaquee, impoiji eiro imatanteetsi yora camaari.

⁹ Te incoyeji Tasorentsi inquisajeitee, irointi icoaque iroavisacojeitee, ariorica anquemisanteri Avincatsarite Jesoquirishito.

¹⁰ Icamimentajeitaquee maaroni, aneatsiri aisati camaintsiri, antsipajeitanteariri maaroni.

¹¹ Irootaque noncantantempiri: poametavacaajeitea maaroni piveshireajeitanteari, piotasanojeitanteari. Tempa aitaque pimajeitaquero meeca.

Jero oca icoacaqueriri Pavoro irantajeiteri.

¹² Noyemisantaririnte, pimpincatsajeiteri maaroni quemisantaajeitimpiri, tempa ipomerentsiventimpiro maaroni. Tempa irio Avincatsarite tiancaqueriri, irootaque ipincatsariventajeitantaquemperi aisati yoamejeitantaquemperi.

¹³ Cameetsa yantaveetapiniti, irootaque ocameetsantari pimpincatsatasanojeiteri, pinintasanajeiteri. Aisati nonintaque paacameetsatavacaajeitea maaroni.

¹⁴ Meeca nocoaque noncamantajeitempi, noyemisantaririnte, nocoaque pincantajeiteri yora peranti eiro iperatatsi. Yora tsaroashenti, piveshireacayeari. Pamitacojeiteri yora caariquera materone inquemisantasante. Jentsiquero poamejeiteri maaroni, eiro piquisatsajeitiritsi.

¹⁵ Ariorica iroashinoncayeetempi, eiro pipiataritsi, irointi pincavintaavacaapinijeitea. Aitaque pincanteari, pincavintaapinijeiteri maaroni atiri.

¹⁶ Piveshireimentapiniteari Tasorentsi,

¹⁷ pinquenquetsatacaapiniteri.

¹⁸ Jaocarica incanteetempi, pincanteri: “Irove, Apa, iroashinoncayeetenata; aviroquea avinti noveshireimentaquempi”, irootaque icoacaquemperi. Tempa avirojeitaque quemisantajeitiriri Jesoquirishito.

¹⁹ Pincantasanojeitero Ishire Tasorentsi oamejeitempi, eiro pipiatsajeitarotsi.

²⁰ Eiro pitseenquirotsi icamantimpiri itiancane Tasorentsi.

²¹ Piotasanotavaquero maaroni iroametempimeri itsipapee. Ariorica ocameetsasante, ari pishiretearo.

²² Paamaaventearo maaroni caari cameetsatsi.

Ivetsajeitari Pavoro.

²³ Yashi yoiro isavicacaajeitaquee Tasorentsi cameetsa. Nocoaque iroameetsashire-tasanojeitempi. Nocoaque iramitacotempi poameetsajeitero maaroni piquenqueshiretap-inijeitiri aisati maaroni pantapinijeitiri. Cameetsa inquempoyeajempi irosati impocantajeari Avincatsarite Jesoquirishito.

²⁴ Icoyeaquempi Tasorentsi, eiro meeca yamatavijeitimpitsi, aitaque irimataquero maaroni icantajeitaquempiri.

²⁵ Noyemisanraririnte, nocoaque pincantapinijeiteri Tasorentsi: "Pamitacoteri Pavoro".

²⁶ Pincanteri maaroni ayemisanraririnte ara novetsajeitari.

²⁷ Aisati nocoacaquempi pineanajeiteneri maaroni pishaninca oca nosanquena-jeitaquempiri.

²⁸ Nocoaque incantaitiyempani irineshinoncajeitempi Avincatsarite Jesoquirishito.

Narotaque sanquenajeitimpirori oca: *Pavoro*

YAPIITAJIRO PAVORO ISANQUENAJEITINIRI TESARONICASATI

Yovetsajeitajari aisati Pavoro tesaronicasati.

¹ ¿Savicajeitatsimpimpa, tesaronicasati? ¿Tecatimpa oajeitempine? Narojeitaque aca Pavoro, Shirivano, aisati Timoteo; nosanquenajeitajimpiro, aisati nosanquenajeitajiniri iriori maaroni noyemisantaririnte ara. Tempa avirojeitaque quemisantajeitaqueriri Apa Atasorensite aisati Avincatsarite Jesoquirishito.

² Nocoaque irinешinoncajeitempi aisati cameetsa irisavicacaajeitempi.

Iquemisantaque tesaronicasati, aisati ninintavacaajeitaca.

³ Cameetsati nopasonquitacoventapinitimpi, noyemisantaririnte. Aiquero pijatatii piquemisantasanojeitanaque aisati pinintavacaasanojeitanaca. Irio nopasonquitapinitiri Tasorensi.

⁴ Queario, nocamantajeitiri itsipapee quemisantiriri picantatiani piquemisantajeiti. Oshequi iquisheetaquempi, aisati oshequi yoashinoncaajeitaquempi, iro cantaincha te pojoqueroji piquemisanti.

⁵ Pineaquero, cameetsa ipincatsarivaquempi Tasorensi. Ishinetacoventajeitaquempi pineacatsijeitacaro maaroni oca, pincameetsashireantajeiri, pintsipajeitanteariri anta ipincatsaritinta.

⁶ Iro cantaincha icoaque Tasorensi impiateari yora oashinoncaajeitaquempiri, aintanaquempa irineashiihetemparota iriori.

⁷⁻⁸ Meeca yoashinonqueevetaquempi, iro cantaincha coajica cameetsa irisavicacayempi Tasorensi, pincarajeitena narori. Coajica irimapocapaaque Avincatsarite Jesoshi, imponeanaquea inquitequi, intsipatapaaqueari inampirepee shintsitanotsiri. Irishipaqueireapaque, inquempejeitapaaquearo paamari. Cameetsa irisavicacaajeitapaaque, iro cantaincha iroasanquejeitapaaqueari maaroni caari quenqueshireterine: maaroni yora caari quemisanterone icantayevetariri.

⁹ Incantaitiyempani irineacatsitacaaqueari anta Sharincaveniqui, eiro catsini ineiritsi iriori Avincatsarite. Eiro ineiritsi impincatsaritanote, eiro ineiritsi intasoncantasanoyete.

¹⁰ Ariorica impocaje Avincatsarite, impincatsajeitavaqueri maaroni atiri yoameetsajeitiri, aisati iramenasanojeitavaqueri catsini maaroni quemisantajeitiriri. Piquemisantajeitavaquero peerani maaroni nocamantajeitaquempiri, irootaque pincarajeitanteariri ariorica impocaje.

¹¹ Ari icoyeajeitaquempi Atasorensite, meeca nocantapinitiri iramitacojeitempi, nocoaque iriveshirementasanojeitempi. Aisati nocantapinitiri irimatacaajeitempiro maaroni cameetsatatsiri icoacaquempiri panteneriri. Ariorica pinquemisantasanojeiteri, pantajeiteneri icantaquempiri; aisati nocantapinitiri intasoncaventajeitempi pimatasantotantearori.

¹² Irineajeitempi atiri cameetsa pisavicajeitaque, irootaque impincatsajeitanteariri Avincatsarite Jesoshi. Tojeiti atiri aviro quemisantiriri Jesoshi, irootaque irineacameetsajeitantempiri. Tempa oshequi inешinoncajeitaquee Atasorensite, aisati Avincatsarite Jesoquirishito.

2

Iquenquetsatacotaqueri Jesoshi, impocantajeiri.

¹⁻² Meeca, noyemisantaririnte, piojeitaque impocaje Avincatsarite Jesoquirishito. Impocajerica, ari irampatojeitapaajee maaroni, ancarajeitanteariri iriori. Meeca noninti noncamantempi: eiro picantashirejeititsi, aisati eiro pitsaroajeititsi. Ariorica incanteetempi: “Areetapaaja Avincatsarite”, eiro pishiretarotsi incanteetempiri. Ariorica incanteetempi: “Oametaquena Ishire Tasorensi, ocanti pocaji”. Ariorica incanteetempi: “Noneaqueri narori”. Ariorica incanteetempi: “Ocanti isanquenare Pavoro areetaja”.

³ Yamataviyeetimpicari. Eiro pishiretimatarotsi incantempiri. Tequera omoncarateaji impocantajeiri Jesoshi. Irijivajeite oshequi atiri inquisajeiteri Tasorensi, impiajeiteari. Aisati intime yora janirotsatineri Sharincaveniqui, yora jivajeitiriri quisapinitiriri Tasorensi.

⁴ Inquisaniroteri Tasorensisanori, aisati inquisajeitero maaroni ijitasorensitashivetari atiri. Incantanirote: “Itimayeveta oshequi tasorensiyevetachari, iro cantaincha nanaa-cojeitaqueri nainti. Notasorensitasanotaque catsini”. Irisavicanirotaque anta ivancoqui

Tasorentsi, incantanirotaque: “Naro nainti Tasorentsisanori, pinquemisantajeitena”. Ari, impojiquea impocaje Quirishito, irinti.

⁵ Peerani notsipajeitantimpiniri, nocamantitaquempironi maaroni oca. Tempa ainiro piquenqueshiretaquero.

⁶⁻⁷ Impocanirotaqueame yora quisasanotaqueriri Tasorentsi, iro cantaincha timatsi tsaneacariri. Timatsi yantanirovetacari meeca, iro cantaincha imanaquero. Te oncameet-sateji oca yantanirotaqueri. Ainiroquera tsaneacariri, irootaque caari iconijatanta. Ar-iorica omoncaratapaquea impocantajeari, irijate yora shentiriri tsaneacariri, impojii impocanirotasanotapaque. Piojeitiri yora tsaneacariri: tempa irio Tasorentsi.

⁸⁻¹¹ Ari inconijatasanotapaque yora caari quemisanirotiro icantiri Tasorentsi. Iro impocanteari intianqueri yora Satanashi. Irimatacayeri paitapeerica, intasoncantayete: incoapaaque avajeitavaqueri cavaco. Aisati incoapaaque iramatavijeitapaqueri atiri, maaroni. Irantanirotapinitero caari cameetsatatsi, iramatavitasanotanteariri maaroni yora jatatsineri Sharincaveniqui: queario, te incoajeiteji iriojeitero tampaticatsiri oavisacojeiterinemeru. Ari irishineteri Tasorentsi iramatavijeiteri, inquemisantajeitero tseyantsi. Iro cantaincha impoitapaqueri Avincatsarite Jesoshi, intasoncapaaqueri, iroapaaqueri. Irishipaquireacotapaqueri, impoyereapajeru, poyere.

¹² Impojii iroasanquetaasanoteri Tasorentsi maaroni caari quemisanitiro queariotasanotatsiri: yora veshireimentarori caari cameetsatatsi.

¹³ Iro cantaincha nopasonquitapinitiri Tasorentsi. Avirojeitaque, noyemisanrarinte, nopasonquitacoventajeitiri. Inintajeititaquempini Avincatsarite. Peerani catsini icoyeajeititaquempini Tasorentsi iroavisacojeitempi. Ari oameetsatasanojeititaquempini Ishire, aisati pishirejeitacaro quearioyetsiri, irosati yoavisacojeitantimpiri.

¹⁴ Narotaque ovaajimpirori oca icamantaquempiri pavisacotantajari. Icoyeajeititaquempini pinquempeteari Avincatsarite Jesoquirishito, pincarajeiteri pimpincatsarijeite.

¹⁵ Pincantaitiyempani pinquemisantanojeite. Eiro pipeacojeitarotsi maaroni noametititaquempiri peerani notsipatantaquempiri. Aisati eiro pipeacojeitarotsi maaroni nosanquenajeititaquempiri.

¹⁶ Oshequi inintajeititaquee Avincatsarite Jesoquirishito, aisati Apa Atasorentsite. Icantaitatiani iveshireacaajeititaquee. Ineshinoncajeititaquee, irootaque ayojeitantacari irimajeiteero maaroni icantajeititaqueeri.

¹⁷ Nocoaque iriveshireacaajeitempi. Aisati, paitarica pantapiniteri, paitarica pincanteri, nocoaque iramitacotapinitempi.

3

Incantajeitiri Pavoro: “Jero oca pantajeiteri”.

¹ Meeca, noyemisanrarinte, noncamantempini. Noninti pincanteri Avincatsarite iramitacotena noshintsitacantearori novaajero irineane, aisati impincatsajeitanteariri maaroni quemajeitavaqueroneri, inquempejeitempi avirori.

² Timatsi caari cameetsajeitatsi coatsiri iroashinoncaayena. Pincanteri Tasorentsi iroavisacotena. Te meeca inquemisantajeiteji maaroni atiri.

³ Eiro yamatavitempitsi Avincatsarite, cameetsa pishireteari. Iramitacotempini piveshireimentasanotanteariri, aisati irojocaacoventempini: eiro ishinetiritsi camaari irantacayempiro paitapeerica.

⁴ Iriotaque Avincatsarite iotacaquenari pimatapinitaqueru maaroni nocantimpiri. Aitaque pincantaitiyempani pinquemisantena.

⁵ Avincatsarite Quirishito icantaitiani iquearioventiniri Tasorentsi maaroni. Nocoaque irimatacaajeitempiro pinquempeteari irirori. Aisati nocoaque irimatacaajeitempiro pinintasanajeiteri.

⁶ Meeca, noyemisanrarinte, noncamantempiro oca icoacaquempiri Avincatsarite Jesoquirishito. Ariorica iperatata piyemisanrarinte, eiro piquempejeitaritsi. Te nonquempeteariji narori; pineajeitiquena, te nomperateaji nainti.

⁷ Piojeititaque ocameetsatimojeitempi pinquempejeitena avirori. Peerani, notsipatantaquempiniri, te nomperateaji.

⁸ Ariorica pipayetaquenaro noari, nopinataquero. Aitaque nantaveetapinitaqueru quitaiteriqui aisati tsiteniriqui. Nopomerentsiventacaro maaroni coiteimojeititaquenari oncanteata tecatsi pimpomerentsiventeneri avirori.

⁹ Ocameetsavetaca noncoacotempime paitapeerica, iro cantaincha nonintaque nonijayempiro ocameetsati pantaveetapinite, eiro piperatatsi.

¹⁰ Notsipatantaquempiri nocamantajeititaquempiro oca: yora caari antaveetatsine, eiro yoatsi.

¹¹ Noquemacotaqueri picarajeitaqueri peranti. Te irantaveeteji, irointi iquenayeti yaamaacotashitari ishaninca, ineaveetashita, vero, vero. Te oncameetsateji.

¹² Tempa ineajeitaquee Avincatsarite Jesoquirishito, irootaque nocamantajeitantimpirori oca. Pincantasanojeiteri irimajerejeite, intsameejeite, impomerentsiventero coiteimojeitacariri.

¹³ Noyemisanraririnte, eiro piperatarotsi pintacotantajeitea.

¹⁴ Pioteri yora caari quemisantiro oca nosanquenatimpiri. Eiro piquempetacaasanotiritsi piyemisanraririnte, oncanteata iroashiretanteari.

¹⁵ Eiro piquishiritsi, irointi cameetsa poametasanoteri: tempa iriovetaca piyemisanraririnte.

¹⁶ Tempa cameetsa isaviqui Avincatsarite, meeca nocoaque cameetsa irisavicacaajeitempi maaroni quitaiteriqui, jaocarica pisavicajeiteri. Nocoaque quiso iroajeitempi.

¹⁷ Narotaque nainti Pavoro vetsajeitaquempiri. Pineaquero nosanquenare piotanteari narosanotaque pacantaquempirori. Aitaque nametacaro: ariorica nosanquenatapinitiniri ayemisanraririnte, nosanquenajeitiniri novajiro.

¹⁸ Nocoaque irineshinoncajeitempi Avincatsarite Jesoquirishito.

Ari ocarati: *Pavoro*

IJVATAQUE PAVORO ISANQUENATINIRI TIMOTEO

Ivetsatari Pavoro Timoteo.

¹ ¿Savicatsimpi, Timoteo? ¿Tecatsimpa oyempine? Narotaque Pavoro sanquenatimpirori oca; itiancaquena Avincatsarite Jesoquirishito noquenquetsati, aisati itiancaquena Tasorentsi. Iriotaque matirori yoavisacojeitee, ayotasanojeiti te intimeji pashini oavisacotantatsine.

² Noquemisantacaaquempi peerani, irootaque noshiantantimpiri notomisanori. Nocoaque irineshinoncatempi Apa Atasorentsite, incavintsayempi, cameetsa irisavica-cayempi. Aisati inquempetacayempi Jesoquirishito, yora Avincatsarite.

Isaviqui Timoteo Ejesoqui.

³ Nojatantacari Maseroniaqui, nocantasannotanaquempi: “Pisavicavaquetsita aca Ejesoqui”. Nocoacaquempi pincantimentero amatavitantatsiri; pincantajeiteri: “Eiro poametantirotsi tseyantsi”.

⁴ Pincantajeiteri ayemisanrarinte: “Eiro piquemisantashitarotsi iquenquetsatashiyetari”. Pincanteri aisati: “Eiro pishiretashitarotsi iquenquetsatocotashiyetari maaroni peeraniniri. Patsipetashitarocari paamaashiyetearo paitapeerica. Tecatsi oncantempi ocapee oamejeitempi. Ainiro icoacaaqueeri Tasorentsi: ariorica ashireteari irinti, ari iroamejeiteero”.

⁵ ¿Paita nocamantantimpirori oca? Irootaque nocamantantimpirori nocoaque pincameetsashiretanaje, nocoaque pintime cameetsa, eiroquea poashiretantatsi; nocoaque pinquemisantasannotanaque. Ariorica pimajeitaquero oca, aitaque pimataquero aisati pinintasanojeiteri itsipapee.

⁶ Ainiro comiyetacarori aparopee, iquenquetsatocotashiyetaro irinti caari ioyeti, yatsipetashitaca icantavacaimentaro.

⁷ Icoayeveta iroametanterome icantacantiniri Moishishini, iro cantaincha te iriotimateroji icantavetari. Te iriotimateroji paitarica icamantacotasanovetari, vero, vero: ishiaqueri eroti.

Iquenquetsatocotiro icantacantiniri Moishishini.

⁸ Ayojeiti ocameetsati icantacantiniri Moishishini, iro cantaincha acomitarocari.

⁹ Piotasanotavaquero oca noncamantempiri: arojeitaque yoameetsatane Tasorentsi, te aro irisanquenateene Moishishini. Irinti isanquenatini yora caari quemisantiro irineane Tasorentsi: yora piatsatariri, caari quemisantiri, yora caari cameetsatsi, antapinitirori caari cameetsatsi, caari quenqueshiretiri Tasorentsi, oiriniri iririni, oironiri irinironi, oantatsiri,

¹⁰ neavintsatirori caari yai, ora neavintsatiriri caari ai, yora tsinampairiri ishiramparirinte, noshicantatsiri, tseyari, maaroni. Aisati isanquenatini maaroni quisayetiriri yora oametantayetirori cameetsatsiri. Tempa irio Tasorentsi sanquenatacaqueriniri Moishishini.

¹¹ Cameetsa oni oca noametantiri. Itiancaquena Tasorentsi noncamantacoteri irinti, ioti nomataqueneri icantaqueneri. Cameetsa oca nocamantacotiriri: tempa icameetsatasanoti irinti.

Yantayetiri Pavoro.

¹² Icoyaequena Avincatsarite Jesoquirishito nanteneri paitapeerica icoacaquenari. Iotaque nomoncarateneri maaroni icoacaquenari: iotaque eiro namataviritisi. Aisati imatacaquenaro nantayetiniriri, irootaque nocantantariri: “Ariove, pimatacaquenaro”.

¹³ Peerani nocantimaveitarini, noshemetimoveitarini, aisati noquisajeiveitarini maaroni quemisantiriri. Iro cantaincha tequerani nioveitearini Quirishito, tequerani nonquemisantaveiteani. Te nioveiteani paitarica nantayetiniri, irootaque icavintsantaqueneri.

¹⁴ Ineshinoncatasannotaquina catsini Avincatsarite: yoametaquena noquemisantiri Jesoquirishito, aisati nonintasanotiri.

¹⁵ Queariotaque oca noncamantempiri, cameetsa pinquemisantavaquero. Ipcapaaque aca quipatsiquica Jesoquirishito yoavisacojeitaqueri caari cameetsajeitatsi. Nanaacojeitaquempi maaroni, te noncameetsaveiteani catsini.

¹⁶ Irootaque icavintsaantaquenari, ijivataquena narori ineshinoncataquena, te inquishenaji. Irootaque ayotantacari aisati inquempejeiteri iriori maaroni quemisanterineri coajica: irineshinoncajeiteri, incantaitatiyempani intimasanojeitantajeari anta inquitequi.

¹⁷ Incantaitatiyempani Atasorensite impincatsariventajetajee arori. Tecatsi incantea incame. Yashi yoiro imana. Apaniro itasorensiti. Tsame ancantaitatiyempani ampincatsatasanojeitanaqueri, ancamentapinijeitanaqueri atiri icameetsatasanoti. Aitaque ancanteari.

Jero oca icantayetiriri Pavoro Timoteo.

¹⁸ Piotaque, Timoteo, noshiacantaquempi notomi. Pinquemisantero oca noncantempiri. Tempa peerani Tasorensi, icantajeitaqueri ayemisanraririnte: “Oshequi irimatenaro Timoteo nocoacaqueriri”. Irosati yovaaajeitanaqueerori arori. Meeca pimamatero icamantacotaquempiri. Píoti yora soraropee ishintsiventiniri iyapitanote paitapeerica icantiriri. Meeca, pinquempeteari, pishintsiventeneri paitapeerica panteneri Avincatsarite,

¹⁹ pinquemisantasanotanaqueri. Ariorica pioti ocameetsati pantero paitapeerica, ari pimamatero. Ainiro yora iovetachari te oncameetsateji paitapeerica, iro cantaincha yantashitacaro, impoiji yojocajiro iquemisanti.

²⁰ Aitaque imataquero Imeneo aisati Arijantero: yojocajiro iquemisanti. Te oncameetsateji oca, irootaque nocantantacari iriori: “Iroashinoncayempita Satanashi”; oncanteaquea iriotanteari pashini ashaninca eiro icantimatantaritsi iriori Tasorensi.

2

Incantiri: “Pincanteri Tasorensi iramitacojeiteri maaroni atiri”.

¹ Ari nojivataque noncamantempiro oca: pinquenquetsatacayeri Tasorensi, pincanteri iramitacojeiteri maaroni atiri, pimpasonquitacoventeri.

² Aisati pincanteri iramitacojeiteri pincatsaripee aisati maaroni pashini ivincatsaririnte, impoiji cameetsa asavicaajeitanteari, eiro itimitsi ashereaajeiteeneri. Aisati cameetsa amatasanotero anquemisantajeiteri Tasorensi, ampincatsajeiteri.

³ Cameetsa ancamentapiniteri Tasorensi oca, irootaque icoiri; tempa iriotaque oavisacojeitaqueeri.

⁴ Icoasanotaque iriori avavisacojeitajea maaroni, aisati icoaque ayojeitero queariotatsiri, maaroni.

⁵ Maaroni asavicajeiti arori aca quipatsiquica. Ainiro Tasorensi apaniro, isaviqui irinti inquitequi. Te aneapiniriji, iro cantaincha ainiro aparoni shirampari vaapiniteerori irineane: yora Jesoquirishito. Aisati apaniro yovaaqueneri Tasorensi aneane arori, ashanincatantacari.

⁶ Yora Quirishito, irisati coashitacha, icanti: “Nocoaque noncamimentajeiteri maaroni atiri noavisacojeitanteariri”. Ari imataqueenero ayojeitantacari.

⁷ Ipeaque camantantatsiri, itiancaquena noamejeiteri maaroni atiri inquemisanta-jeitero oca queariotatsiri. Te nontseeyaji, queariotaque oca nocantimpiri.

Jaoca ancanteari anquenquetsatacayeri Tasorensi.

⁸ Ari nocoaque anquenquetsatacayeri Tasorensi, maaroni. Ariorica anquenquetsatacayeri, cameetsa asavicajeite: te oncameetsateji anquisheri itsipapee, te oncameetsateji antseenqueri Tasorensi.

⁹ Aisati nocoaque onquitsaatea tsinane cameetsa, eiro ocoitsi irineveyeetearo, aisati cameetsa onquenqueshiretea. Te oncameetsateji ontsiricoishitero oishi irineveyeetan-terori, aisati te oncameetsateji oaneencashitearo oro, aisati perata. Aisati te oncameet-ateji oshemetacayero oitsaare pinatanotachari: ineveyeetarocari.

¹⁰ Irointi ocameetsati oneshinoncatante: ari ocameetsavetari omajeiterome maaroni quemisantajeitiriri Tasorensi.

¹¹ Ocameetsati onquemisantasanoteri tsinane shirampari, aisati omajerete, iotantearori paitapeerica.

¹² Te noshineteroji tsinane oametante, aisati te oncameetsateji omperanateari shirampari, irointi ocameetsati omajerete.

¹³ Ijivataqueri Tasorensi peerani yovetsicaqueri Aran, impoiji iroori yovetsicaquero Eva.

¹⁴ Te iramataviteriji Satanashi Aran, irointi yamatavitaque tsinane, impoiji antaquero caari cameetsatatsi: te onquemisanteriji Tasorensi.

¹⁵ Iro cantaincha ariorica oncavintsayeri tsinane otomipee, oncantatitempani onquemisanteri Tasorentsi, onintajeiteri oshanincapee, cameetsa osavique, cameetsa onquencheshiretaquea, ari oavisacotaquea.

3

Jaoca incanteari yora jivatacaajeitiriri iyemisanraririnte.

¹ Queario oca icanteetiri: "Ariorica icoaque shirampari irijivatacaajeiteri iyemisanraririnte, tempa ocameetsati oca icoaqueri".

² Ariorica irijivatacaajeiteri iyemisanraririnte, te oncameetsateji ontime irantane. Cameetsa iraye ijina aparani, te oncameetsateji irishinquitea, cameetsa inquencheshiretanaquea, incameetsashirete, cameetsa irineshinoncatavaqueri quivanterineri, cameetsa iriotasanote iroametante.

³ Te oncameetsateji irirapinitero quepishijatasantatsiri, te oncameetsateji inquishea; irointi cameetsa incavinsante, cameetsa irisavique, te oncameetsateji irinintasanoteri quirequi.

⁴ Cameetsa iroametapinitero ijina, cameetsa iroametapinijeiteri itomipee, inquemisanraritajeitiriri iriori, eiroquea ipiatsajeitaritsi, cameetsa irisavicantajeitiriri.

⁵ Eirorica imatirotsi inquemisantacayeri itomipee, aisati ijina: ¿Jaoca incanteari irintacoteari maaroni yora quemisantajeitiriri Tasorentsi?

⁶ Te oncameetsateji irijivatacante iroaquera quemisantatsi: ishematicari. Iquempetari cari camaari, ishemetaque peerani, impoji yoasanquetaqueri Tasorentsi.

⁷ Cameetsa iriojeiteri yora caari quemisantajeitatsi, incantajeite: "Icameetsati yora jivatacaajeitiriri quemisantatsiri". Impoji eiro imatantaritsi incantimajeiteri, aisati eiro imatantaritsi camaari irantacayeri caari cameetsatsi.

Iquenquetsatacotiri amitacotapinitiriri iyemisanraririnte.

⁸ Yora amitacotapinitiriri iyemisanraririnte: cameetsa irishiyeri yora jivatacaajeitiriri, incameetsashiretanaque. Te oncameetsateji iramatavitante. Aisati te oncameetsateji irirero oshequi cachojari. Aisati te oncameetsateji inquencheshireteri quirequi iroshiquiyeri.

⁹ Cameetsa inquearioventero inquemisantasanotero maaroni yoameyetiriri Tasorentsi, aisati ocameetsati iriote te aneroji irantane.

¹⁰ Pijivate pamenasanoteri, piotasanoteri icameetsasatanotirica. Ariorica piojeitaque icameetsasananoti, ari pincanteri iramitacojeiteri quemisantajeitatsiri.

¹¹ Aisati onquempeteari ijina, oncameetsashiretanaque: te oncameetsateji oncantimatante, te oncameetsateji oshinquitea, te oncameetsateji amatavitante.

¹² Yora amitacotantatsiri, cameetsa iraye ijina aparani. Cameetsa iriote inquemisantacaajeiteri maaroni saviquimojeitiriri.

¹³ Ariorica cameetsa iramitacojeiteri iyemisanraririnte, ari impincatsayeeteri, aisati irimatatero inquemisantasanoteri Jesoquirishito, eiro itsaroacaaritsi.

Iquenquetsatacotiri quemisantajeitiriri Jesoshi.

¹⁴⁻¹⁵ Nocoavetaca intsipaite nareetitapeempime, iro cantaincha eirorica nomatirotsi. Irootaque nosanquentantimpirori oca: nocoaque piote jaoca acantajeitari. Icoyeajeitaquee Tasorentsi: tempa arojeitaque quemisantajeitiriri. Aneatsiri ini. Ayojeitiro oca queariotasanotatsiri: cameetsa anquearioventero avayetero.

¹⁶ Queario, te ayotashiteaji jaoca icantari Tasorentsi, iro cantaincha iotacaajeitaquee Quirishito. Tasorentsi ini, iro cantaincha yatiritapaaque. Ora Ishire, irootaque iotacaajeiteeri itasorentsitaque. Yora inampirepee Tasorentsi yamenacoventajeitaqueri Quirishito. Acamantacojeitaqueri arori maaroni nampitsipeequi, iquemisantajeitaqueri savicajeitatsiri. Yovancajiri iriri aisati inquitequi, cameetsa isavicapaaji catsini.

4

Quearioyea yoameyetimpircari tseeayantsi.

¹ Jero oca ocamantasanojeitee Ishire Tasorentsi. Coajica, irotimatantsi impocantajeiri Quirishito, intime jocajeiteroneri oca queariotatsiri aquemisantajeitiriri. Inquemisanteri amatavijeiterineri, ovaayetirori yoameyetiriri camaari iriori.

² Iramatavitante yora atiri, iro cantaincha irishiacanteame iquemisanti. Tecatsi incantea iriote te oncameetsateji oca icantayetiri.

³ Intsaneapiniteari shirampari iraye ijina, aisati intsaneaquearo tsinane aye ojime. Aisati intsaneapitsataqueeri avajeiteari avari yovetsicaqueeri Tasorentsi. Aquemisanta-jeitiri Tasorentsi, ayojeiti queariotaque yoamejeitaqueeri irinti. Aitaque icoaque ampasonquitacoteri ayeari, irosati avanteariri.

⁴ Ocameetsajeitaque maaroni yovetsicaqueeri Tasorentsi. Ariorica ampasonquiteri, cameetsa avajeiteari, eiro apinquiritsi.

⁵ Yoameetsantaqueeri Tasorentsi avajeitari. Ariorica ampasonquiteri, aisati anquen-qeshiretero irineane, ocameetsati avapinijeiteari maaroni.

Pinquearioventeneri Tasorentsi maaroni icantayetimpiri.

⁶ Ariorica povaajeiteneri ayemisantaririnte oca nocantimpiri, ocameetsati. Tempa pishiretapinitacaro, ometasanoaquempi. Ariorica poamejeiteri itsipapee nocamantimpiri, ari incantempi Jesoquirishito: "Cameetsa oca pantaquenari".

⁷ Eiro pishiretarotsi oca iquenquetsatashitari tseyari: te oncameetsateji pinquen-qeshiretapinitero. Irointiquea pinquearioventero pinquemisantsanoteri Tasorentsi, irinti.

⁸ Ocameetsaveta pinquenaveete aisati pintsameete, oshintsitanotantajeari pivatsa; iro cantaincha ocameetsasasanoti catsini pinquearioventeneri Tasorentsi paitapeerica panteneriri. Eiro patsipetarotsi irointi: cameetsa pisavique meeca, aisati cameetsa pisavique coajica anta inquitequi.

⁹ Queariotasanoaque oca nocamantaquempiri. Ocameetsataque irishirejeitearo maaroni atiri.

¹⁰ Apomerentsiventacari atiri, aquematsicatimentacari inquemisantajeitantajeari. Aneatsiri ini Tasorentsi, ayojeiti eiro yamataviteetsi: iriotaque oavisacojeitiriri maaroni atiri. Queario, yoavisacotasanojeitiri maaroni quemisantajeitiriri.

¹¹ Pincantajeiteri atiri irimamajeitero oca nocantimpiri, poametasanojeiteri.

¹² Evancariquerampi, iro cantaincha eiro pishineyetiritsi intseenqueetempi. Paitapeerica pantayetaqueneri Tasorentsi, cameetsa pimayetero, inquempetantempiri piyemisantaririnte: pineanate cameetsa, pisavique cameetsa, pinintajeiteri itsipapee, pinquemisanteri Tasorentsi, poameetsantero maaroni pinquenqeshireyeteri.

¹³ Coajica noneajantempi. Meeca pineanatapiniteneri ayemisantaririnte irineane Tasorentsi, piveshiraacaapiniteari, poametapiniteri. Pincantatiyempani, irosati naree-tantapaajeari.

¹⁴ Peerani icamantacotantaquempiri, aisati icantantariri jivatacaantatsiri Tasorentsi iramitacotempi, aisati yajiricainataquempi, irosati imatacaantaquempiri Tasorentsi. Meeca eiro piperaventarotsi oca imatacaaquempiri.

¹⁵ Pimatapinitero oca imatacaaquempiri, iriotasanojeitantajeari maaroni atiri pimatasanotaquero.

¹⁶ Pinquenqeshiretasanotero paitarica pantayeteri, aisati paitarica poameyeteriri: pinquearioventajeitero. Ariorica pimajeitero oca, ari poavisacotacantajeiteri maaroni quemajetempineri, aisati pavisacotaje avirori.

5

Jaoca pincanteriri itsipapee pishaninca.

¹ Eiro piquisatsatiritsi anteashipari; irointi cameetsa pineanateri, pinquempetacanteri irio piri avirori, cameetsa pincavintsayeri. Aisati evancaripee, pinquempetacanteri pirenti.

² Ora anteashiparo, pinquempetacantero piniro. Aisati evancaropee, pinquempetacantero pitsiro: eiro piquenqeshiretirotsi pantero.

³ Ariorica ontimashitajea camajimentaaro, terica intime neshinoncatajerone, pineshinoncateroyea avinti.

⁴ Iro cantaincha itimirica otomi, oshintoto, iriorica osari, cameetsa irineshinoncatero iriori. Irootaque icoiri Tasorentsi cameetsa ayojeite ancavintsayeri ashanincasanori arori. Cameetsa ampajeiteri ashijeiteeri coiteimojeitacariri. Tempa peerani ipajeitaquee maaroni coiteimojeitaqueeri arori.

⁵ Ariorica otimashitasanotaja camajimentaaro, apaniro oquenqeshiretasanotiri Tasorentsi irinti, te intimeji pashini neshinoncateroneri. Ocantani: tsiteniriqui, quitaiteeriqui, oquenquetsatacapinitiri Tasorentsi, ocantapinitiri paitarica ocoayetiri.

⁶ Iro cantaincha ainiro pashini, onashita irointi: ocoaque onquimoshiretashitea. Aneavetaca, iro cantaincha eiro oneiritsi Tasorentsi.

⁷ Pincamantajeiteri maaroni quemisantatsiri irimamajeitero oca nocantimpiri, oncanteata eiro otimitsi irantane.

⁸ Ocameetsati aneshinoncajeiteri itsipapee ashaninca, aisati ashanincasanori arori, aneshinoncatasanoteri. Eirorica aneshinoncatiritsi, eiro acantitsi: “Noquemisanti narori”. Teve. Te incameetsateji tseencantatsiri, iro cantaincha terica aneshinoncatari ashaninca arori, anaacojeitajiri ainti yora tseencavetachari, te ancameetsatasanoteji catsini.

⁹ Ariorica omoncarataquero camajimentaaro 60 osarintsite, ari pincerero intacojeiteari maaroni ayemisanrarinte. Ocameetsataque aisati aaveitaniri aparoni ojimeni, te oshequiyerini.

¹⁰ Ocameetsati pineacojeitaquero omayetaquero cameetsayetatsiri: intacojeitacari otomipee, oneshinoncajeitaquero itsipapee, amitacojeitaquero maaroni quemisanta-jeitiriri Tasorensi, oavintsaajeitaquero ashinoncaincari, oquearioventaquero omayetaquero cameetsayetatsiri. Ariorica pineacojeitaquero omayetaquero oca cameetsayetatsiri, ari ocameetsati pincerero intacojeiteari quemisantajeitatsiri ashinoncaajeitachari.

¹¹ Iro cantaincha eiro picantirotsi ora camajimentaaro caari anteashipatatsi. Ocoiricari shirampari antashiteari. Ocoicari aaje aisati, ojocajiricari Quirishito.

¹² Ojivavetaca ocantavetacari: “Nonquemisantasanotempi”, iro cantaincha impoiji atavavitaquero. Irootaque iroasanquetantearori.

¹³ Aisati operatacari, oquenaquenayeticari pancotsipeequi, oneaveetashitacari, vero, vero, oquempetaricari tsiroti. Aamaashitaricari oshaninca, oneanantantarocari caari cameetsatatsi.

¹⁴ Irootaque nocoantacari aaje aisati camajimentaaro, tequeratsitarica anteashiparote. Cameetsa intime otomipee. Cameetsa oncoteneri ojime iroyeari, aisati otomipee. Cameetsa ontijeneri iitsaare, onquiveneri iitsaarepee, maaroni. Ariorica cameetsa ontime, tecatsiquea incantea atiri incantimajeitee.

¹⁵ Jero imayetaquero Satanashi aparopee: yojocacaajiro oquemisantavetacari Quirishito.

¹⁶ Itimirica oshanincasanori camajimentaaro, cameetsa iriotashitea incavintsayero iriori. Te oncameetsateji incanteri quemisantajeitatsiri: “Pincavintsaajeiteroyea avinti”. Timatsi pashini camajimentaaro, savicatsiri apaniro: tecatsi oshanincasanori cavintsayeroneri. Irooquee irointi, cameetsa incavintsaajeitero yora quemisantajeitatsiri.

Jaoca ancantajeiteri yora jivatacaajeiteeri.

¹⁷ Cameetsarica ijivatacanti yora jivatacaajeitiriri quemisantatsiri, ocameetsati impinatanoteri. Cameetsa inquemisantasanoteri aisati. Ariorica ipomerentsiventaquero iquenquetsati aisati yoametanti, cameetsa impinatanoteri.

¹⁸ Aitaque ocanti Sanquenarentsi: “Eiro pipashicavantetiritsi yora vaca aaticaitirori tirico, pishineteri iroyea. Tempa yaaticaitimpro paantarori oitsoqui”. Aisati ocanti: “Ocameetsati impinayeeteri yora antaveetiniriri”.

¹⁹ Eiro piquemisantashitaritsi aparo cantacotashitearineri jivatacaajeitimpiri, piquemisantirocari tseyentari. Iro cantaincha incarataquerica neasanoterineri 2, ariorica 3, ari pishiretearo oca incamantempiri.

²⁰ Queariorica otimi yantasanotaquero, ari pincereri: “Eiro papiitajirotsi aisati oca pantaquero”. Cameetsa iriojeitero maaroni quemisantatsiri oca pincererini, inquenqueshirejeitanteari, iriojeitanteari eiro yantantarotsi iriori caari cameetsatatsi.

²¹ Ayojeitaque icarajeitaquero Atasorensite, aisati Jesoquirishito. Aisati icarajeitaquero inampirepee iriori. Irootaque nocantantimpiri pimamajeitero pincereri antirori caari cameetsatatsi. Eiro pipincatsatashitaritsi jivatacaavetimpiri avirori. Ocameetsati pimocaratavacajeitea avirori.

²² Eiro pipeashitaritsi shirampari jivatacaajeiterineri quemisantatsiri, eiro pipaminatashitaritsi. Pijivate piotasanoteri. Eiro pishinetiritsi itsipa irantero caari cameetsatatsi: ariorica pishineteri, ontime pantane avirori. Pantirocariya avirori caari cameetsatatsi.

²³ Eiro apatiro piriro nija, irointi pirero aisati ovaja capichaji. Oameetsatajempiro pamporetza picatsiti. Apinitaquempi pimaore, iro cantaincha oshintsitacayempi ovaja. Ariorica pirapinitero capichaji, ari oavisacotajempi, aisati oshintsitacaajempi.

²⁴ Oconijataque caari cameetsatatsi yantaniroyetiri aparopee atiri; iojeitaque incantacoteri Tasorensi: “Ainiro yantane”. Ainiro pashini manavetacarori yantayetiri, iro cantaincha coajica onconijate aisati maaroni yantayetiri iriori.

²⁵ Aisati, ariorica antayetaquero cameetsayetatsiri, oconijataque aparopee, ineacojeitaquero atiri. Iro cantaincha tequera onconijateji maaroni cameetsatatsiri antajeitaquero: coajica onconijatasanotaque maaroni. Aitaque oncanteari.

6

Jero oca icantajeitiriri pimantaari.

¹ Yora amanantiriri iveranaro, iperanatasanotacari. Iro cantaincha ariorica iquemisan-
taque yora pimantaari, ocameatsati impincatsateri yora amanantiriri. Impoiji tecatsi
incanteete incantimateri Tasorentsi, aisati tecatsi incanteete: “Te oncameetsateji oca
yoametiriri quemisantatsiri”.

² Ariorica iquemisanataque yora amanantajiriri, te oncameetsateji incante yora pi-
mantaari: “Iriotaque meeca noyemisanantaririnte, nomoncaratavacaaca. Eiro meeca
nopincatsatiritsi”. Irointi cameetsa irantaveetasanoteneri: tempa irio iyemisaririnte
yantaveetiniri, irootaque inintantariri. Irootaque, Timoteo, poamejeiteriri maaroni,
pincantajeiteri maaroni irimajeitero.

Iquenquetsatacotiri oametantirori tseyantsi.

³ Ainiro quenacaashitacarori oca noametiriri. Te irishiretearopi ora queariotatsiri
yoametiriri Avincatsarite Jesoquirishito. Aisati te irishiretearopi oca oamejeitaqueeri
anquemisanteri Tasorentsi.

⁴ Oshequi ishemeti, iro cantaincha te aneroji iotantari. Te irioteji. Isampitacotashitac-
aro paitapeerica. Ineanatashiniroveetaca, vero, vero. Impoiji iquisashireaqueri itsipapee,
iquisatsataqueri, icantimataqueri, yaamaacotacari yantiro caari cameetsatsi.

⁵ Iquisavacaajeitaca yora quenqueshiretirori caari cameetsatsi, te inquen-
queshireteropi queariotatsiri. Iquemisananiromempeaca, ijitashivetaca ari irayeme
paitapeerica.

⁶ Iro cantaincha ariorica anquemisantasanoiteri Tasorentsi, aisati aveshireimenteari, ari
asavicasanojeitanaque cameetsa.

⁷ Atimantapaacari peerani, tecatsi amapaaque. Aisati onquempetea, ariorica anca-
maque, tecatsi aanajeri aisati.

⁸ Iro cantaincha timatsirica avajeitari aisati aquitsaajeitari, aitapaaji, eiro aiqero
acoanaitii aisati.

⁹ Irintiquea yora coatsiri irashitaarantea yantanirotashiyetacaro paitapeerica irishe-
quiantearopi irovaararo. Omapocashitapaacari yantaquero paitapeerica. Te inquen-
queshireteaji, icoashitacaro caari cameetsayetatsi, impoiji incamaquerica, irijate Sharin-
caveniqui.

¹⁰ Ariorica ancoasanotaque ashiyetearo paitapeerica, aitaque antaquero caari cameet-
satsi. Oshequi quemisantavetachari yojocajiro iquemisanti. ¿Paita yojocantaropi?
Tempa icoaque irashiyetearo paitapeerica, iro cantaincha impoiji oshequi inquen-
queshiretanaquea, iroashiretasanotanaquea catsini.

Icantiri: “Pinquearioventeneri Tasorentsi pantaveeteneri”.

¹¹ Iro cantaincha avinti, piquearioventiniri Tasorentsi paitarica icantimpiri. Pineve-
tarocari avirori paitapeerica. Pincoasanote pincameetsatasananotaque avinti. Pimpin-
catsateri Tasorentsi, pinquemisantasanoiteri, pinquearioventeneri maaroni icoacaaque-
mpiri, pantaveeteneri; pinintasanajeiteri itsipapee, pineshinoncajeiteri.

¹² Ariorica opomerentsivetaca piquemisantasanoitiri Tasorentsi meeca, iro cantaincha
ocameetsatasanoiteri pimataquero. Pinquearioventeneri icoacaajeitimpiri. Eiro pipeaco-
tarotsi: pincantaitiyempani panee inquitequi. Icoyaequempi Tasorentsi iroaneanta-
jempiri anta inquitequi. Tempa irootaque picantaqueri avirori, icarajeitaque oshequi
quemajeitavaquempi. Queariotaque picantaqueriri.

¹³ Tempa irio Tasorentsi oneajeiteeneri inquitequi, maaroni. Aisati peerani Jeso-
quirishito, te intsarocayeariji Pontsio Pirato, yora oacantaqueriri. Icantiri: “Queario,
narotaque pincatsari”. Meeca icarajeitaquee Tasorentsi aisati Jesoquirishito, yamena-
coventajeitaquee.

¹⁴ Irootaque nontanantempirori oca: pintsoteaquero maaroni nocantimpiri, eiro pi-
comitarotsi. Pincantatiyempani, pimatasanotero irosati impocantajeeri Avincatsarite
Jesoquirishito.

¹⁵ Ioti Tasorentsi jaoca oncarate impocantajeeri, iriotaque cantatsineri. Iquimoshire-
taque iriori. Apaniro ini, itasorentsitanaotaque catsini, ipincatsariventajeitiri maaroni
pincatsariventatariri atiri, ijivatacaajeitiri maaroni jivatacaajeivetariri atripee.

¹⁶ Apaniro irinti eiro itsoncatsi, eiro icamitsi catsini. Anta itiminta otimi quitaiteri
catsini, tecatsi ancantea ajatashitero. Te intimeji neerineri Tasorentsi. Tecatsi ancantea
aneajeiteri. Ocameetsati ampincatsatasanojeitanaqueri maaroni. Icantatiani ipincat-
sariventanti irinti, yashi yoiro. Aitaque icanta.

Jero oca icantiriri ashitaarantincari.

¹⁷ Pincanteri ashitaarantincari eiro ishemetitsi. Aisati pincanteri eiro iveshireimenta-rotsi yashiyevetari, tempa ari ompeajea, coajica. Irintiquea Tasorentsi iriveshireimentea. Ipapinijeitaquee maaroni coiteimojeitaqueeri aquimoshirejeitantari.

¹⁸ Oshequi iroaararo iriori ashitaarantincari. Pincamanteri meeca irineshinoncajeiteri ishanincapee, oshequi irineshinoncateri. Te oncameetsateji irimashitsate. Cameetsa incavintsante, irointi.

¹⁹ Ariorica irimayetaquero oca, cameetsa. Impinateri Tasorentsi coajica anta inquitequi, anta incantaitatitempani iraneapaaje cameetsa.

Ivecarataquero isanquenare.

²⁰ Meeca, Timoteo, otimi icantaquempiri Tasorentsi pantaqueneri. Ari pimamatener-iqueti, eiro pamatavitiritsi. Eiro pishiretashitarotsi cantaantsi. Ainiro oametantayeve-tarori paitapeerica, ijiveta ioti, iro cantaincha te omoncaratavacayaeji icantiri. Eiro pishiretashitarotsi yoametashiyetimpiri.

²¹ Ijitashivetaca yora ioti, iro cantaincha, te irioteji. Irootaque caari iquemisantanta. Ari, nocoaque irineshinoncatempi Tasorentsi.

Narotaque sanquenatimpirori oca: *Pavoro*

YAPIITAJINIRI PAVORO ISANQUENATAJINIRI AISATI TIMOTEO

Ivetsatajari aisati Pavoro Timoteo.

¹⁻² ¿Ainirompi, Timoteo? ¿Tecatsimpa oyempine? Narotaque Pavoro sanquenatajimpirori oca. Itiancaquena Jesoquirishito noncamantajeiteri maaroni atiri ariorica inquemisan-tajeiteri Jesoquirishito, ari iroaneajeitajeri anta inquitequi. Irootaque icoacaquenari Tasorentsi. Notiomí, nonintasanotimpi. Nocoaque irineshinoncatempi Tasorentsi, aisati Avincatsarite Jesoquirishito. Aisati nocoaque incavintsaasanotempi, cameetsa irisavica-cayempi.

Ipasonquitacoventiri Pavoro Timoteo.

³⁻⁵ Noquenquetsatacapinitiri Tasorentsi maaroni quitaiteriqui, aisati tsiteniriqui. Paitaricapee nanteneriri, nocoasanotaque noveshireacayeari. Tempa peerani yantavee-tinirini iriori yora noshanincani. Peerani, nojocantanaquempiriranqui, poashiretanaca, piraaca. Oshequi meeca nocoiteaquempi. Nocoaveta noneajempime aisati, noveshirei-mentasanotajempime. Noquenqueshiretajimpi, oshequi piquemisantsanotaque, pican-tani. Piquempetacaro pisaro Iroira, aisati piniro Eonise: oquemisantsanojeiti iroori. Nioti ainírotatsi piquemisanti, irootaque nopasonquitacoventantimpiri.

Eiro pipashiventacaarotsi pinquemisantacayeri atiri.

⁶ Piquemisantaqueri Tasorentsi, irootaque noncantantempiri: peerani, nopamiinatana-taquempiri, aisati nocantantacariri Tasorentsi iramitacotempi, timatsi imatacaaquem-piri. Meeca pimatasanotero maaroni imatacaaquempiri.

⁷ Te incoyeji antsaroacayeari atiri, irointi icoasanotaque anquearioventeneri maaroni. Icoaque anintajeiteri atiri; aisati icoaque ontimimojeitee ayojeitanteari, cameetsa asavi-cajeitantajeari.

⁸ Eiro pipashiventacaarotsi pinquenquetsatacoteri Avincatsarite. Aisati, eiro pipashiv-entacaanatsi; noquemisantaqueri Avincatsarite, irootaque yoimínqueanteetaquenari meeca caravosoquica. Oshequi noneacatsitimentacari Quirishito, cameetsa pinquempe-tena avirori. Aitaque irimatacayempiro Tasorentsi maaroni icoacaaquempiri.

⁹ Peerani, tequerani irovetsiqueroni oca quipatsica, iotitaqueeni anquemisanteri Jeso-quirishito. Icoyajeititaqueeni cameetsa asavicajeitanteari. Te ancameetsaveiteani, iro cantaincha timatsi icoacaaqueeri. Ineshinoncatashijeitaquee, yoavisacojeitaquee.

¹⁰ Ipcapaaque quipatsiquica Jesoquirishito, yora oavisacojeitaqueeri. Meeca ay-otasanojeitaqueero maaroni imataqueeneri Tasorentsi. Eiro meeca atsaroitsi ancame. Ayojeiti ariorica ancamaanaque, eiro ajatitsi ainti Sharincaveniqui. Cameetsa oni oca ica-mantajeiteeri: yoaneasanojeitaquee, ancantaitiyempani asaviquimojeiteri inampiqui.

¹¹ Itiancaquena Tasorentsi noncamantajeiteri atiri oca cameetsatatsiri, aisati noamejei-teri.

¹² Irootaque noneacatsitantacarori maaroni aca caravosoquica. Iro cantaincha te nompashiventeaji. Niotasanotiri yora noquemisantiri: niotaque eiro yamatavitanatsi, irootaque nocantantacariri: “Pinquempeyaejena”. Niotasanoti inquempeyaejena irosati impocantajeari.

¹³ Queariotasanoaque maaroni noametaquempiri, te namatavitempiji. Pimoncaratero maaroni nocantaquempiri. Pinquemisanteri Jesoquirishito, pinintasanoteri.

¹⁴ Quiso oajeitaquee Ishire Tasorentsi. Timatsi omatacaaquempiri, ari pimamayetero cameetsa.

Jaoca icantajeitiriri Pavoro.

¹⁵ Pioti yojocajeitacuena ashiasati: Jijero, Eromojeneshi, maaroni.

¹⁶ Nocoaque incavintsayeri Avincatsarite Oneshijoro, aisati ishaninca iriori. Intacotap-initacuena Oneshijoro, te impashiventeaji iquivantana aca caravosoquica.

¹⁷ Itimantacari aca Oromaqui, icoacoayetaquena, irosati ineantapaaquenari aca.

¹⁸ Piotasanoti aisati oshequi yamitacotaquena anta Ejesoqui. Coajica, impocajerica Avincatsarite, aitaque incavintsaapaajeri.

2

Icantiri: “Pincantaitiyempani pantaveeteneri Tasorentsi”.

¹ Meeca, notiomí, tempa ineshinoncataquempi Jesoquirishito, irootaque nocantantim-piri pishintsiventeneri maaroni pantayeteneriri.

² Timatsi piquemitaquenari, tempa picarajeitaqueri oshequi pashini quemajeitaquenari. Ari poameyeteri pashini ashaninca, inquearioventeneri Tasorentsi iroametante iriori. Irovaajeneri aisati itsipapee oca noametaquempiri.

³ Yora soraropee cameetsari ineacatsimentapinitari ivincatsarite. Pinquempeteari avirori, eiro pitsaroiits pineacatsimenteari Avincatsarite Jesoquirishito.

⁴ Aisati te iriompapitapiniteaji soraro, te impanquiveeteji, irointi apatiro iquearioventiniri iyapitanote inintacairiri.

⁵ Ocameetsati yora aatiquirori perota inquemisanteri yora jivatacairiri. Eirorica iquemisantasantotiri, eiro ipashiyetaritsi oca ipapinitiriri anaacotantatsiri.

⁶ Yora panquiveetatsiri, ariorica intsameetacotasanotero ivanquire, ari irayero oshequi oitsoqui, coajica. Te irantsipetearoji itsameetacotiro.

⁷ Pinquenqeshiretasanotero oca noshiacantimpiri, ari iriotacaasanotempiro Avincatsarite.

Pinquenqeshireteri Jesoquirishito.

⁸ Pinquenqeshireteri aisati Jesoquirishito, yora ishanincani Iravirini; yoyeevetacari, iro cantaincha itinaanaja aisati. Irootaque oca nocamantapinijeitiriri atiri, iravisacojeitajantajeari.

⁹ Nocantani noquenuetsatacaajeitiri atiripee, irootaque noneacatsitantacarori meeca. Yoisoeyetaquena, iquempetacanteetaquena oayeri. Iro cantaincha tecatsi incanteetero iroisotero irineane Tasorentsi: tempa ovaaranaca irointi.

¹⁰ ¿Paita noneacatsitantacarori maaroni oca? Irio noneacatsimentiri maaroni atiri icoyeaqueri Tasorentsi, incantaitiyempani irisavicanteari cameetsa anta inquitequi. Iriotaque Jesoquirishito oavisacoterineri.

¹¹ Queariotaque oca icanteetiri: “Ariorica ancamimentero Quirishito, ari antsipatapaa-jeari anta inquitequi, asaviquimotapaaajeri.

¹² Ariorica ampomerentsiventeneri antayeteneri paitapeerica meeca, iro cantaincha coajica ancaraajeteri ampincatsarijeite. Ariorica ancanteri atiri: ‘Te nioteriji Jesoquirishito’, aisati incantacotee iriori: ‘Apa, te nioteriji yoca’.

¹³ Ariorica amataviteri, iro cantaincha eiro yamataviteetsi irinti. Irimoncarataquero maaroni icantaqueeri”.

¹⁴ Tempa icarajeitaquee Avincatsarite. Pincantapiniteri atiri eiro icantavacaimentarotsi paitapeerica yoameyeteri. Yatsipetashitacaro icantavacaimentaro oca, icomitacaaricari yora quemajeiterineri.

¹⁵ Pantasanoyeteneri Tasorentsi, incantantempiri: “Cameetsa maaroni pantaquenari”, impojji eiro otimitsi pimpashiventanteari. Piotasanotiro irineane Tasorentsi, meeca poametantero cameetsa; tempa tampatica oametanti irointi.

¹⁶ Eiro pishiretarotsi cantaantsi, eiro picantavacaatsi: pojocacaasanotiricari atiri inquemisanterime Tasorentsi.

¹⁷ Oshiaquero patsaarontsijenca, ariorica aaquee, ontsoncanaquee maaroni atsempequiqui, ampatsayetanaque. Yatsipetacaro icantavacaanirotaca yora Imeneo aisati Jireto.

¹⁸ Icomijeitacaro quearioyetsiri. Icantaniroto: “Aitanaji. Itinaajeivetaja itsipapee, iro cantaincha eiro atinaajeitajatsi ainti”. Iquenqeshiretacaajeitaqueri maaroni quemajeitaqueriri.

¹⁹ Piotero ocaocantiri irineane Tasorentsi: “Iotasantotiri Tasorentsi maaroni quemisanta-jeitiriri”. Aisati ocanti: “Intimerica cantatsine: ‘Noquemisantiri Avincatsarite’, ocameetsati irojoquero caari cameetsatsi yantayetiri”. Aitaque ocantaqueri. Irineane Tasorentsi oshiaquero antearo mapi: te ompashinitapiniteaji.

²⁰ Anta ivancoqui ashitaarantincari timatsi oshequi iveratote. Ainiro pinatasantachari, yovetsiqueetiro oro aisati perata. Ainiro caari pinatacha, yovetsiqueetiro inchato aisati quipatsi. Ora pinatachari, iveshireimentacaro: icoaque irameniteri maaroni ishaninca. Ora caari pinatacha onantari cajara.

²¹ Ariorica poameetsataquea avisati, pojocaquerorica caari cameetsatsi pantapini-jeitiri, ari pinquempetearo perato pinatasantachari; iriveshireimentempi Avincatsarite, incoaque irineajeitajempi maaroni. Impojji pimataqueneri paitarica incoacaquempiri.

²² Eiro catsini piquenqeshiretirotsi caari cameetsayetatsi yantayetiri evancaripee. Irointiquea pincoasanotanaque pincameetsatanaje, pinquemisantasantotanaaje, pininteri itsipapee, pincarajeiteri itsipapee cameetsayetatsiri: maaroni yora aventasanotariri Avincatsarite.

²³ Eiro picantavacaimentashitarotsi caari ayotasanojeiti: piquisavacaacari.

²⁴ Ariorica antaveeteneri Avincatsarite paitapeerica, te oncameetsateji anquaisajeiteri ayemisanraririnte; irointi cameetsa ancavintsayeri itsipapee, cameetsa avameteri, eiro ashemaritsi,

²⁵ cameetsa avameteri yora quisajeitaqueeri. Cameetsarica avameteri, impoji ariorica inquenqueshiretanaquea, irojocajero caari cameetsayetatsi inquemisantantearori quear-iotatsiri. Iramitacoteri Tasorentsi.

²⁶ Yamatavivetacari camaari: Otimaveta icoacaavetacariri, irootaque yantantavetacaraniri iriori; iro cantaincha iroavisacoteri Tasorentsi, ariorica inquemisanteri.

3

Jaoca incanteari amatavitantatsineri, coajicani.

¹ Piotero oca: coajica, ariorica omoncarataquea impocantajeari Jesoshi, oshequi om-pomerentsitimoteari quemisantatsiri.

² Irisati nintajanchane atiri, incoasanoteri quirequi, irishemete, irishirontimenteari itsipapee, incantimateri Tasorentsi, impiatsateari ashitariri, eiro ipasonquitiritsi neshi-noncaterineri, eiro iquenqueshiretiritsi Tasorentsi.

³ Eiro iotirotsi incavintsayeri itsipapee, eiro iotitsi incatsimareajea, incantimatante, eiro ipashiventacaarotsi irantayero tsinanepée, inquisanaquea, inquisayeri cameet-sayetatsiri,

⁴ iramataviyeteri ishanincasanoripee, irantashiyeteoro paitapeerica, eiro iquenqueshiretatsi, irishemetasanote, incoanaque inquimoshiretashitea, eiro icoitsi irioteri Tasorentsi.

⁵ Inquemisantamempeashiteari Tasorentsi, iro cantaincha eiro ipincatsatiritsi. Eiro piquempetaritsi avirori.

⁶ Inqueavancoteri itsipapee atiri, iramatavitapeero tsinanepée. Te onquenqueshire-tasanoteaji, irootaque iramatantearori iramatavitapeero. Oshequi antaqueroro caari cameetsatatsi, ocoasanotaque antayero.

⁷ Oshequi oquemisantashiyetacari pashini oamenirotirori, iro cantaincha te iotasano-teroji queariotatsiri.

⁸ Peerani yora Janeshi aisati Jampireshi ipiatsatacarini Moishishini, te incoacayeriji joriopee inquemisantajeiteri. Aisati iquempetacari meeca yora amatavitantatsiri: te incoacayeriji atiri inquemisantero queariotasanoatsiri. Te oncameetsateji oca iquen-queshireyetaqueri, iquemisantamempeashitaca.

⁹ Eiro icantatiani irimatero oca. Tempa peerani iotacojeitiri yora piatsatacariniri Moishishini. Aisati coajica iriojeitanaque atiri queario yamatavitantaque yora amatavi-tantatsiri.

Pinquemisantasanotero queariotasanoatsiri.

¹⁰ Piotaquetasanotaquea. Piotaquero noameyetimpiri. Piotaquero nantayeteri. Pio-taquero nocoaqueri nomayeri narori nantayeteri. Piotaque aisati noquemisantaqueri Tasorentsi, noquearioventiniri maaroni, nonintaqueri, te noshemearoji nocatsitimenta-queri.

¹¹ Aisati pioti iquishmentapiniyeetaquenaro noquemisanti. Piotaque aisati no-quematsicatapinitacaro anta Antioquiaqui, Iconioqui, aisati Irishitaraqui. Oshequi iquisajeitaquea savicajeitatsiri anta. Iro cantaincha yoavisacotapinitaquea Avincatsarite.

¹² Queario, iquisheetiri maaroni quemisantiriri Jesoquirishito, ariorica icoasanotaque inquemisantasanoteri.

¹³ Aiquero irijatatiye iramatavitasanotante yora caari cameetsatatsi, aisati oametantirori tseyantsi. Aisati yora camaari iramataviteri iriori.

¹⁴ Airoquea avinti, pincantaitatiyempani pishiretanaquearo maaroni noamejeitaque-mpiri. Tempa piotaque eiro namatavimpitsi.

¹⁵ Peerani, pijananequiveitani, yoameyeetaquempiro irineane Tasorentsi. Irootaque oametaquempirori piquemisantaqueri Jesoquirishito, pavisacotantajari.

¹⁶ Iriotaque Tasorentsi sanquenatacantaquerori irineane, maaroni. Oamejeitaque-ro queariotasanoatsiri, terica oncameetsateji antaqueri, ocamantaquee. Oame-jeitaquee jaoca ancanteari avameetsantajeari arosati, aisati oamejeitaquee ancameet-sajeitanaque.

¹⁷ Irootaque otimantacari irineane Tasorentsi, ancameetsasanoantajeari. Impoji tecatsi ancantea ancomitea, irointi antasanojeitero maaroni icoacaqueeri Tasorentsi.

4

Iveshireacaacari Pavoro Timoteo.

¹ Coajica impocaje Jesoquirishito impincatsaritapaaque. Ariorica impocaje, ari irini-jaajeitapaaqueero yantayetiri maaroni aneajeitatsiri aisati maaroni camajeitaintsiri. Incamantajeitee jaoca incantajeiteeri. Ayojeiti icarajeitaaquee meeca, aisati icarajeitaaquee Tasorentsi, irootaque meeca nocamantantimpirori oca.

² Pinquenquetsatapinitero irineane Tasorentsi maaroni quitaiteriqui. Jaocarica incarateri catsirincaiteri, jaocarica pisaviqueri, eiro catsini pimajeretitsi, irointi pinquenquetsatacayeri maaroni atiri. Terica oncameetsateji oca yantaqueri, ari pincanteri, aisati pintsaroteri. Pincantajeiteri cameetsa irisavicajeite. Jentsiquero poametasanojeiteri itsipapee, eiroquea piquisatsatiritsi.

³ Coajica, ariorica cameetsa avamejeiveteari atiri irineane Tasorentsi, iro cantaincha eiorica iquemisantajeitrotsi. Eiro icoirotsi, irointiquea incoasanojeite oamejeiterineri tseeeyantsi. Irooquee icoasanoaqueri inquemero, irointi.

⁴ Eiro iquemisantitrotsi irineane Tasorentsi, irointi inquemisantashitearo iquenquetsatashiyetari atiri.

⁵ Aviroquea, avinti, paamaventea: piquempetaricari. Ariorica pincatsitimentero Avincatsarite, eiro poashiretatsi. Pinquemisantacayeri itsipapee. Pimatasanoaqueri Tasorentsi maaroni icoacaquaempiri.

Iquenqueshiretiri Pavoro.

⁶ Iro nocamantantimpirori oca, irotaintsi iroyeetena, irotaintsi nojate narori inquitequi.

⁷ Nopomerentsiventasanotiniri Avincatsarite, nomataqueri maaroni icoacaquenari, te namataviteriji.

⁸ Coajica, impocajerica Avincatsarite, impashiyetenaro cameetsayetsatsiri. Eiro ipanarotsi apaniro narori, irointi impajeiteri maaroni atiri, yora yoameetsantaqueri: arojeitaaque maaroni aamaajeitacariri. Tempa cameetsa icantacoventajeitaaque maaroni.

Pashini icamantajiriri aisati.

⁹ Pishintsite pimpoque pineena.

¹⁰ Yora Temashi, icoaque iriveshireimentearo timayetatsiri quipatsiqui. Yojocanaquena, ijatanaque Tesaronicaqui. Yora Queresente, ijatanaque Carashiaqui, yora Tito ijatanaque Taramashiaqui.

¹¹ Apanivaniji Irocashi, itsipataquena. Ariorica pimpoque, pamaquenari Maricoshi, oshequi nocoaque iramitacotena.

¹² Aisati ijatanaque yora Tiquico. Notianquiri iriori Ejesoqui.

¹³ Aisati pamaquenaro noicoro noanajiri Toroarequi, otimi anta ivancoqui Caripio. Aisati pamaquenaro maaroni sanquenarentsipee, aisati novaperitepee.

¹⁴ Yoashinoncaasanotaquena Arijantero, yora vetsicapinitirori ashiro. Coajica iroasanqueteri Avincatsarite.

¹⁵ Paamayeariyea avirori, yoashinoncaimpicari. Oshequi iquishimentaquenaro nocantajeitaaqueriri.

¹⁶ Ijivatantacari pincatsari isampitacoventana, te intimeji cantacoventaneneri, ishiapitsajeitanaquena. Te noncoyeji iroasanqueteri Avincatsarite.

¹⁷ Irintiquea irinti, quiso yoana. Itasoncaventaquena, nomatantarori noquenquetsatacajeitiri itsipasati atiri, maaroni. Iroashinonqueetenname, iro cantaincha yoavisacotaquena Avincatsarite.

¹⁸ Ariorica iroashinonqueetaquename aisati, niotaque ari iroavisacotajena aisati; irisavicaayena inquitequi, anta ipincatsaritinta iriori. Tsame ampincatsatasanojeiteri, aitaque ancantaitiyempani.

¹⁹ Novetsataro Pirishira, aisati iriori Aquira. Aisati novetsatari maaroni ishaninca Oneshijoro.

²⁰ Ainiroquera Erashito, isaviqui anta Corintoqui. Navisantacarori Miretoqui, noneanajiri Torojimo: ijoquiitaca.

²¹ Pishintsite pimpoque, tequeratsita onquimojate. Ivetsajeitimpi Eovoro, Pororente, Irino, Iraoria, jeri maaroni ayemisanraririnte.

²² Nocoaque incavintsayempi Avincatsarite, irineshinoncatasanotempi.

Narotaque sanquenatimpirori oca: *Pavoro*

YORA PAVORO ISANQUENATINIRI TITO

Ivetsatari Pavoro Tito.

¹ ¿Ainirompi Tito? ¿Tecatsimpa oyempine? Narotaque Pavoro sanquenatimpirori oca. Nocoasanotaque nanteneri Tasorentsi paitapeerica incoacayenari. Itiancaquena Jesoquirishito nonquemisantacaasanojeiteri maaroni atiri, yora icoyeaqueri Tasorentsi. Aisati niotacaasanoteri queariotasanotatsiri inquearioventantearori inquemisante.

² Peerani, tequerani irovetsiqueroni quipatsi, icantitacani Tasorentsi: “Noaneasanojeiteri maaroni nocoyeaajeitaqueri, nosavicacaajeiteri aca inquitequi”. Te iriotimateroji Tasorentsi iramatavitante. Ayojeitaque ancantaitiyempani aneajeitanaje anta inquitequi.

³ Meeca omoncarataca iriojeitantearori maaroni atiri irineane Tasorentsi, yora oavisacojeitaqueeri. Irootaque itiancantaquenari noncamantajeiteri atiripee.

⁴ Peerani noquemisantacaquempi, irootaque meeca noquempetacantaquempi notomisanori. Nocoaque irineshinoncatempi Tasorentsi, cameetsa irisavicacayempi, aisati inquempetacayempi Jesoquirishito, yora oavisacojeitaqueeri.

Jaoca incantajeiteari yora jivatacaajeitiriri quemisantatsiri.

⁵ Peerani nojocanaquempi anta Queretaqui, pamitacotantariri ayemisanrarinte iquemisantasantacari. Aisati nocantaquempi: “Ariorica pinquenayetanaque anta maaroni nampitsipeequi, pincoyeaajeiteri jivatacaajeiterineri ayemisanrarinte, yora quemisantacayerineri”.

⁶ Meeca noncamantempi. Te oncameetsateji irijivatacantashitea; irointi ariorica cameetsa isaviqui, aisati otimirica ijina aparani, aisati oncameetsatirica iquemisanta-jeitaque maaroni itomipee, aisati icantacoyeetiririca itomipee: “Cameetsa iriori, te impiat-satanteaji”, ari iriotaque jivatacaajeiterineri ayemisanrarinte.

⁷ Pineaquero, ariorica incoaque irantaveeteneri Tasorentsi, acoajeitaque arori incameetsatanote. Te oncameetsateji impiatsatantea, inquishempa, irishinquentempa, irantanayeteri itsipapee, iramataviteri itsipapee iraitanteariri iirequite aisati iroaararo. Te oncameetsateji maaroni oca.

⁸ Irointiquea ocameetsati irintacoteari itsipapee, irinintero maaroni cameetsayetatsiri, inquenqeshiretanaquea, inquemisantasananotaque, incameetsatanotaque, iriote iraamaaventea irisati eiro yantantarotsi caari cameetsatsi.

⁹ Cameetsa inquearioventero inquemisantasanotero irineane Tasorentsi, ora avamejeitaqueriri, irimatantearori iroametantasanotero iriori queariotatsiri. Aisati iriotasanote iroameteri yora tseencantatsiri.

¹⁰ Ainiro oshequi caari quemisanti jivatacaajeivetariri, neaveetashitachari, amativitantsiri, maaroni. Aitaque icantajeita yora cantaniriojeitashitariri quemisantatsiri: “Pimpeajeitajea jorio, maaroni”.

¹¹ Nocoaque poimajerentaniriojeiteri. Yojocacaanirioyetaqueri oshequi quemisantatsiri iquemisanti. Te oncameetsateji oca yoametantaniriotiri. Apatiroti icoaque iraitashiteari quemisantatsiri iirequite.

¹² Ainiro aparo, yora quenquetsataciriri ishaninca, icanti iriori: “Yashi yoiro queresatati yamatavitanti, icatsimatanti. Oashenti ini”.

¹³ Queariotaque oca icantaqueri. Ari pintsarotasanojeiteri yoranqui, inquemisantasanojeitantearori queariotatsiri.

¹⁴ Te oncameetsateji ashiretashitearo iyenquetsare jorio, aisati icantashiyetari yora tseenquirori queariotasanotatsiri.

¹⁵ Ariorica acameetsati arori, anecameetsajeiteri maaroni ashanincapee, eiro aamaajeitaritsi. Iro cantaincha irinti, te incameetsateji, aisati itseencanti, irootaque caari inecameetsatantari ishanincapee; irointi yaamaashjeitari. Queario, eiro imatirotsi inquenqeshireyetero cameetsayetatsiri.

¹⁶ Icantaniriojeveta yoranqui: “Niotiri Tasorentsi”, iro cantaincha te irisavique cameetsa, irootaque ayotantacari itseeyani, te irioteriji. Te incameetsateji catsini yoranqui, ipiatsatanta, te irioteji irantero cameetsatsiri.

2

Yoameyetiri paitapeerica.

¹ Aviroquea, avinti, cameetsa pinquenquetsatero queariotasanotatsiri.

² Poameteri yora antearipee eiro ishinquitatsi, cameetsa irisavique, cameetsa inquenchishiretanaquea, inquemisanotananaque, irinintasanotananaqueri itsipapee, inquear-ioventeneri Tasorentsi maaroni.

³ Aisati pinquempetero antearopee, poametero cameetsa osavique, onquemisantsanote. Te oncameetsateji oncantimatante, aisati te oncameetsateji irapinitero quepishijari. Cameetsa osavique iriojeitanteari itsipapee quemisantsiri jaoca incantajeiteari.

⁴ Aisati cameetsa oametero evancaropee onintasanoteri ojime aisati otomipee.

⁵ Oametero aisati onquencheshirempa, oncameetsate; cameetsa oncoteneri oshaninca, antsiteneri, onquiveneri iitsaare, maaroni oncavintsante, onquemisantsanoteri ojime. Impoiji tecatsiquea incanteetero intseenqueetero irineane Tasorentsi.

⁶ Aisati poameteri evancaripee inquencheshiretasanajeitanaquea iriori, cameetsa irisavicajeite.

⁷ Aisati avirori, cameetsa pisavicanaque, iriojeitanteari atiri jaoca incantajeiteari incavintsante iriori. Cameetsa poameteante, tempa piotasanoti yamenacotimpi Tasorentsi.

⁸ Cameetsa pinquenquetsatayeri atiri, oncanteata eiro otimitsi inquishimentempiri. Impoiji impashiventea coavetachari impiatsatempime, eiro otimitsi incantimatantempiri.

⁹ Pincamanteri pimantaari inquemisantsanoteri amanantiriri, irimatasanoteneri maaroni icantaqueriri. Te oncameetsateji impiatsateari,

¹⁰ te oncameetsateji incoshiteri. Irointi ocameetsati iriotasanote yora amanantiriri eiro yamataviritirsi catsini. Impoiji incoasanojeite atiri inquemisanteri yora oavisacojeitaqueri, incantajeite: "Ocameetsati oca iquenquetsataceyeteriri Tasorentsi".

Paita ayojeitancari ineshinoncajeitaquee Tasorentsi.

¹¹ Meeca ayojeitaque ineshinoncajeitaquee Tasorentsi, icoaque iroavisacojeiteri maaroni atiri.

¹² Ari ineshinoncajeitaquee, yoametaquee ajocajero atseencanti, aisati ajocajero icoajeitiri tseencantatsiri. Ayojeiti ocameetsati maaroni quitaiteari anquencheshiretanaquea, ancameetsatanaque, anquemisantsanotananaqueri Tasorentsi.

¹³ Meeca ayojeitaque aamaajeitajeari Tasorentsi: yora Avincatsarite Jesoquirishito. Tempa irio oavisacojeitaqueeri. Ayojeitaque impocaje, eiro yamataviteetsi, irootaque aquimoshirejeitantajari. Aneajeitavajeri, impincatsaritapaaque.

¹⁴ Antapinijeitaquero caari cameetsatsi, iro cantaincha icamimentajeitaquee yoavisacotantajeitaqueeri, yoameetsatantajeitaqueeri, ashanincatasanojeitantajariri iriori, acoasanojeitancari antapinitero cameetsayetatsiri irointi.

¹⁵ Pincamantasanajeiteri maaroni atiri oca nocamantaqueempiri. Tempa itiancaqueempi Tasorentsi, ari pincamantasanajeiteri atiri inquemisantsanojeitanaque. Terica oncameetsateji yantayetiri, cameetsa pincamantasanoteri. Eiro pishinetirtsiti intseencajeitempi.

3

Pashini icantayetiriri.

¹ Pincamantajeiteri ashaninca impincatsajeiteri maaroni jivatacaajeitiriri aisati pincatsariventajeitiriri, inquemisantajeiteri. Pincanteri ocameetsati incoajeitanaque irantajeitero cameetsayetatsiri.

² Pincantajeiteri eiro icantimatirtsiti itsipapee, eiro iquisatsatavacaajeitatsi, eiro iquisatsi, irointi cameetsa incavintsaajeiteri maaroni atiri.

³ Peerani te anquencheshireveiteani arori, te anquemisantaveiteani, amatavintaveitani, antapinitashiveitaroni maaroni acoanirodashijeitaniri, aisati antashiveitaroni maaroni anintashijeivetaniri. Acantani antapiniveitaroni caari cameetsatsi, aquisatsicaveitarini itsipapee, aquisaveitani, aquisavacaajeitani.

⁴ Iro cantaincha iotacaajeitaquee Tasorentsi, yora oavisacojeitaqueeri. Iotacaajeitaquee icavintsaajeitaquee, inintasanajeitaquee.

⁵ Yoavisacojeitaquee. Te antajeivetearoji cameetsatsisiri iroavisacojeitanteeri, iro cantaincha icavintsaashijeitaquee. Avaotisajeitaca, yoaneasanojeitaquee, opashinishirejeitaquee Ishire.

⁶ Aquemisantajeitaqueri Jesoquirishito, yora oavisacojeitaqueeri, irootaque itiancasanojeitanaqueeri Tasorentsi Ishire, te intsaneemparoji.

⁷ Ineshinoncajeitaquee, irootaque yoameetsatantaqueeri, aisati icanti ancantaitiyempani antimajeite inquitequi. Ayojeitaque eiro yamataviteetsi.

⁸ Queariotaque oca icamantaqueeri. Nocoaque pincantajeiteri quemisantajeitiriri Atasorentsite irimajeitero maaroni oca, pincamantasanoteri. Ocameetsajeitaque maaroni oca: eiro yatsipetashijeitarotsi.

Jero oca pashini icantiriri Pavoro Tito.

⁹ Eiro pisampitacoventirotsi caari iotasanoeyeeti, aisati eiro pishiretashitarotsi iquenquetsatacotashitaniri yora intacaroniri. Eiro piquishimentarotsi isanquenareni Moishishi, eiro piquisatsatimentarotsi. Patsipetashitarocari, eiro oametimpitsi.

¹⁰ Intimerica amataviyeterineri quemisantatsiri inquisavacaajeitanteari, pincamanteri eiro yamatavitanti. Terica inquemisantempi, aparo pampiitsanoteri. Iro cantaincha terica inquemisantempi, eiro picantajiritsi: "Noyemisantaririnte".

¹¹ Iquemisantiro tseeyantsi iriori. Te oncameetsateji yantayetiri, ainiro yantane.

¹² Nontianquempiri Aretemashi; tericampa, irioricampa Tiquico. Ariorica pineavaqueri, pishintsite pijate Nicoporishiqui: aitaque pineavaquenari anta. Nocoaque nonquimojantsitacotanaque anta.

¹³ Pintacoteari yora Senashi, aisati Aporo. Yora Senashi ioyetiro icantayetiri pincatsaripee. Pimpavaqueri maaroni coiteimotariri ariorica irovaanajea. Te oncameetsateji oncoiteimoteari paitapeerica.

¹⁴ Ocameetsati iriojeitanaque ashanincapee arori incavintsaantajeite. Ocameetsati iramitacoteri yora ashinoncaincari. Ocameetsati irimayetero maaroni cameetsayetatsiri.

¹⁵ Ivetsajeitaquempi maaroni nocarajeitaqueri aca. Novetsajeitari maaroni quemisantatsiri ara, nintajeitanari. Nocoaque irineshinoncajeitempi Tasorentsi.

Narotaque sanquenatimpirori oca: *Pavoro*

YORA PAVORO ISANQUENATINIRI IRIORI JIREMONA

Ivetsatari Pavoro Jiremona.

¹ ¿Savicsatsimpi, Jiremona? ¿Tecatsimpa oyempine? Narotaque Pavoro sanquenatimpirori oca. Nosaviqui meeca aca caravosoquica. Noquenquetsatacotaqueri Jesoquirishito, irootaque yoiminqeanteetaquenari. Nocaratiri ayemisantaririnte Timoteo nosanquenatimpiro oca. Nonintasanotaquempi. Piquempejeitaquena, antaveejitini Tasorentsi paitapeerica.

² Meeca novetsatara Apia, ayemisantaroronte. Aisati novetsatari Ariquipo, yora noshiacantaqueri nosoraroririnte. Yora soraropee iquearioventiniri iyapitanote maaroni icoacairiri. Aisati iriori Ariquipo, imoncarataquena, noquearioventajeitiniri Tasorentsi maaroni icoacaajeitaquenari. Aisati novetsajeitari maaroni ayemisantaririnte apatotapinitachari pivancoqui.

³ Nocoaque irinshinoncajeitempi Apa Atasorentsite, cameetsa irisavicacaajeitempi. Aisati inquempetacaajeitempi Avincatsarite Jesoquirishito.

Iveshireimentari Pavoro Jiremona.

⁴⁻⁵ Icamantapiniyeetaquena picantani piquemisantiri Avincatsarite Jesoshi, aisati pinintajeitiri maaroni quemisantatsiri yoameetsantiri Tasorentsi. Irootaque nocantapinitantari Atasorentsite: "Ariove pimatacaqueri Jiremona pamitacotasoteri catsini".

⁶ Nocantiri iriotacaasanojeiteri maaroni ashaninca piquemisantacaajeitiri. Cameetsa iriotacaasanojeiteri intacotasanojeitee Quirishito.

⁷ Meeca niotaque, nonintane, pinintajeitiri itsipapee quemisantatsiri yoameetsantiri Tasorentsi, aisati piveshireacaajeitari, irootaque noquimoshireimentantaquemperi, aisati noveshireimentantaquemperi.

Icantacoventiri Oneshimo.

⁸ Nioti naro itiancane Quirishito: ishinetaquena noncamantempiro paitarica panteri,

⁹ iro cantaincha anintavacaaca, irootaque caari nocoanta noncantempi: "Jero oca pantayeteri". Ari nanteashipataque meeca. Noquenquetsatacotiri Jesoquirishito, irootaque yoiminqeanteetaquenari caravosoquica.

¹⁰ Timatsi noquemisantacaqueri aca, noshiacantaqueri meeca notomi. Ipajita Oneshimo: iriotaque noncantacoventeri.

¹¹ Te iramitacoveitempiniji, iro cantaincha meeca oshequi iramitacotempi avirori, aisati iramitacotena narori.

¹² Nontiancajeri meeca impiashitanajempi aisati. Nonintasanotaqueri catsini.

¹³ Nocoasanovetaca quiso iroyename aca, iramitacotasannotename aca caravosoquica: onquempeteame arime pintimeme aca, pamitacotename avirori. Noquenquetsatiro irineane Tasorentsi, irootaque notimantacari meeca aca.

¹⁴ Iro cantaincha te nioteji paitarica picoiri avirori. Te noninteji noncantasanotempi pintacotena: aviro avinti cantatsine.

¹⁵ Peerani ishiapitsavetaquempi, meecaquea incantaitiyempani quiso iroajempi.

¹⁶ Peerani pamanantane inaveitani. Iro cantaincha meeca iriotaque iyemisantaririnte pinintasanotajeri. Oshequi nonintaqueri narori, meeca pinintasanotavajeri avirori. Ocameetsati pininteri pamanantane, iro cantaincha ocameetsasanoti pinintasanoteri catsini piyemisantaririnte.

¹⁷ Pamene, tempa aquempeavacaaca arori. Ari meeca noninti pineshinoncatavaqueri, pinguempetacantename pineshinoncatavaquename naroricame areetapainchaneme.

¹⁸ Ariorica icoshitaquempi, aisati ariorica irevitaquempi, ari pincoacotenaro narori maaroni.

¹⁹ Narotaque nainti Pavoro sanquenatimpirori oca. Nompinaventajeri paitapeerica irevitaquempi. Pinquenqeshiretero oshequi nocavintsaaquempi: pioti eirome notimime, eirome pavisacotajime.

²⁰ Tempa, nonintane, piquemisantiri Avincatsarite, meeca nocoaque pincavintsayena narori. Tempa piquemisantiri Quirishito, meeca nocoaque piveshireacaajena.

²¹ Niotaque ari pinquemisantana, irootaque nosanquenatantimpirori oca. Aitaque niotaque ari pimateno maaroni nocantaquempi, aitaque povanaashitavaqueanari maaroni nocantaquempi.

²² Aisati nocoaque pivetsiquenaro nosavicantapeempari. Niotaque ariorica pincanteri Tasorentsi, irishinetena noneajempi aisati.

²³ Ainiro nocarataqueri Epajarashi aca caravosoquica. Iquempetaquena iquenquetsat-acotiri Jesoquirishito, irootaque yoiminqeanteetacariri iriori. Ivetsatimpi.

²⁴ Aisati ivetsajeitaquempi Maricoshi, Arishitaraco, Temashi, Irocashi, maaroni. Icarajeitaquena nantajeitiniri Atasorensite paitapeerica.

²⁵ Nocoaque irineshinoncatempi Avincatsarite Jesoquirishito.
Narotaque sanquenatimpirori oca: *Pavoro*

ISANQUENAYEETINIRI IJORIORIRINTE

Yanaacotaqueri Quirishito itsipapee itiancaneppe Tasorentsi, ipincatsaritasanoti.

¹ Peerani yora Tasorentsi yoamejeitaqueri yora quenquetsatacantayetsiniri. Aparopee ineesanotiri Tasorentsi, irio itsipa iquemashitacari ineanatiri, irio itsipa ineiri inampire, irio itsipa aisati imishitacaacari, maaroni. Aiquero yovainiri, aiqero yovainiri, yoamejeitaqueri. Impoiji iriori yovaaajeitaqueneri yora ashanincapeeni.

² Meecaquea yoametasanojeitaquee itomisanori iriori Tasorentsi. Tempa iriotaque irinti anaacojeitiriri atiri ipincatsariti. Icantiri peerani: “Notiomi, aviro vetsiqueroneri quipatsi, inquite, maaroni; pincantacantayetero maaroni”. Ari imoncarataqueneri icantaqueriri.

³ Ishiasanotaqueri iriri, ishiquaireasanotaque, ipincatsaritasanotaque. Tempa yanaacojeitiri atiri ipincatsariti. Ariorica irinintanaque irimayetaquero paitapeerica, intasoncaque. Ari imajeitaquero maaroni icantajeitiri catsini: apatiro ineanataque, mataca. Peerani ainironi antayetironi caari cameetsatatsi, irootaque caari acameetsatantaveitani. Iro cantaincha ipocaque irinti icamimentajeitaquee yoameetsajeitantajeeri. Iplanaja aisati anta inquitequi, isavicapaaji iracosanoriqui Tasorentsi, icaratiri ipincatsarijeiti.

Yanaacotaqueri Quirishito inampirepee Tasorentsi, ipincatsaritasanoti.

⁴ Irisati aisati anaacojeitiriri inampirepee Tasorentsi, ipincatsaritasanoti, tempa icantiri Tasorentsi: “Notomi”. Ishanincatasanoacari.

⁵ ¿Icantirimpa Tasorentsi inampire: “Aviro notomi, meeca notomintaquempi”? Te intominteariji inampirepee, irintiquea irinti Quirishito. ¿Icantirimpa inampirepee: “Narotaque pirintajeitari, notomintajeitaquempi”? Te incanteriji.

⁶ Aisati peerani, ipocantacari itomi quipatsiquica, icanti: “Nocoacaajeitaqueri maaroni nonampirepee impincatsajeiteri notomi”.

⁷ Icantiri Tasorentsi: “Notiancapinitiri nonampirepee yovaaajiniri ashaninca noneane, ishintsitananojeiti. Ainiro shiaarantaquerori paamari”.

⁸ Iro cantaincha icantiri Itomi irinti: “Oshequi pipincatsariti, oshequi pitasorentsi: pincantaitiyempani. Ocameetsatanotaque pineane, oqueariotasanotaque.

⁹ Oshequi pinintacaajeitaqueri atiri intime cameetsa; te pinintacaajeiteriji catsini irantero caari cameetsatatsi. Novshireacaasanotaquempi, panaacojeitaqueri itsipapee piveshiresanotanaca avinti”.

¹⁰ Aisati icantiri: “Pincatsari”; tempa icantiri: “Oshequi pipincatsariti avirori. Peerani povetsicaquero quipatsi, inquite, aisati maaroni timantajeitarori.

¹¹⁻¹² Coajica ompeajeitanajea, irompa avinti pincantaitiyempani pintime. Oquempeta maatsaraantsi yojoqueetiro irantajeeri iroaquerari, aisati pinquempetacantajeero iroori quipatsi: pojocajero povetsicantajeeri pashini. Irompa avinti, eiro pipashinitatsi, eiro pipeatsi catsini”.

¹³ ¿Icantirimpa Tasorentsi inampire: “Pisavique nacosanoriqui irosati impincatsarijeitan-tempiri quisajeivetimpiri”? Te incanteriji, irinti icanti itomi irinti.

¹⁴ Tempa irio inampirepee antayetiniriri icoacaajeitaqueriri: yamenacoventajeitaqueri maaroni yora oavisacotajanchaneri.

2

Ocameetsati anquemisantasanojeiteri Itomi Tasorentsi.

¹ Icoacaasananojeitaquee Tasorentsi anquenshiresanotero maaroni icantajeitaqueri Itomi: tempa oqueariotasanotaque, te oncameetsateji ampeacotearo icantaqueeri.

² Tempa oqueariotasanotaque maaroni icantajeitiriri inampirepee, aisati yoasanquetajeitaqueri Tasorentsi maaroni caari quemisantajeitavaqueri: ineararove.

³ Meeca oshequi ipomerentsiventajeitaquee Itomi yoavisacojeitantajeeri. Ariorica antseencajeiteri, ¿pigitimpa eiro yoasanquetajeiteetsi iriri? Ijivataque Avincatsarite iriori yoamejeitaqueri iroamerepee jaoca ancantajeiteeri avavisacotantajeitajeeri; impoijiquea yovaaajeitaquero arori yora quemajeitaqueriri.

⁴ Janicarica icoacaapiniyetiri Tasorentsi itasoncantayeti, imatacaaqueri; aisati omatacaajeitiri Ishire paitapeerica, caari amati arori. Ari aneajeitaqueri, ayojeitantacari queariotaque icantiri Tasorentsi.

Coajica impincatsajeiteri maaroni atiri Jesoshi.

⁵ Ari meeca nonquensatocotero pashini quipatsi onta inquitequiniri: ora asavicajeitantapaajeri coajica. Eiro anta ipincatsariventajeitajeetsi inampirepee Tasorentsi,

⁶ eiro catsini. Tempa peerani icantirini Iravirini Tasorentsi: “Te nonquempetempji avinti, te nontasorentsiteji narori. ¿Paita piquenqueshiretantanari? Tecatsi pinquenqueshireimentenari. Aisati, ¿janicampa yora poneachaneri inquitequi, yora atritapaatsineri? ¿Paita pineacameetsatantariri iriori?”

⁷ Ariorica impocapaaque quipatsiqui, eiro imoncaratapaajaritsi pinampire ipincatsariti. Iro cantaincha eiro osamanitasantitsi iranaacotajeri aisati, impincatsaritasanotaje. Pisavicacaajeri cameetsa, pimpeajeri pincatsarisanori.

⁸ Pincanteri: ‘Pincantacantajeitero maaroni. Ari impincatsajeitempi maaroni timajeitajantsineri’”. Irootaque isanquenatiniri Iravirini. Pineaquero, icantiri: “Pincantacantajeitajero maaroni, impincatsajeitempi maaroni timajeitajantsineri”. Tequera omoncarateaji maaroni, iro cantaincha

⁹ ayojeitaque peerani iponeanaca Jesoshi inquitequi, ipocaque quipatsiqui. Te impincatsaritasanotapeeji, te irimoncaratapaajeariji inampire Tasorentsi ipincatsariti. Oshequi yoashinonqueevetacari, icamimentajeitaque, irootaque caari ajajeitantea Sharincaveniqui. Irio tiancaqueriri Tasorentsi ayojeitancacari oshequi ineshinoncajeitaque. Meeca cameetsa isavicapaaji inquitequi, ipincatsaritasanotapaaji aisati.

Icamantaquee paita icamantacari Jesoshi.

¹⁰ Ari yovetsicajeitaquee maaroni, irootaque meeca ampincatsajeitanteariri maaroni; tempa itasonaquee atimajeitancacari meeca. Oshequi iquematsicamentajeitaquee, irootaque ocameetsatantari ampincatsajeiteri, avavisacojeitantajeari; tempa aitaque icoaque intomintajeitajee Tasorentsi maaroni, icoaque iraaajeitajee inquitequi.

¹¹ Ari yoameetsajeitaquee Jesoshi, meeca acantajeitiri Iriri iriori: “Apa”. Irootaque caari ipashiventacantee Jesoshi icantajeitee: “Iye”, aisati: “Tsio”.

¹² Tempa ocanti Sanquenarentsi: “Icantiri Quirishito Iriri: ‘Noncamantajeiteri iyepee aisati tsiopee jaoca picanta; noncarajeiteri nompampoyaventajeitempi’”.

¹³ Ocanti pashini Sanquenarentsi: “Noncarajeiteri iyepee aisati tsiopee nonquemisantajeiteri Tasorentsi”. Iro pashini ocanti: “Apa, pineaquena aca, nocarajeitiri aisati pitomipee, aisati pishintopee. Irootaque pitimacantacari noshanincajeitajeari”.

¹⁴ Arojeitaque atiri itomipee Tasorentsi, irishintopee; caamaneri anajeitaque. Ari iquempejitapaaquee Jesoshi, icamimentajeitapaaquee. Intsoncajeiteri camaari, coavetachari iroajeiteeme aisati iraaajeitanaqueeme Sharincaveniqui.

¹⁵ Peerani atsaroacaajeiveitaroni ancamajeiteme, acantatiani; meeca te antsaroajeitanajeji, irointi aveshireajeitanaja.

¹⁶ Te irio irintacotapeempa Jesoshi inampirepee Tasorentsi, aintiquea intacojeitapaaca aroripee: maaroni joriopee.

¹⁷ Ari yatiritapaaque, irirentjeitapaaquee; iquempejitapaaquee arori, irootaque iotantacari ineshinoncajeitaquee aisati icantaqueri Tasorentsi irineshinoncajeitee iriori. Aisati imajeitajuero maaroni icoacaajeitajeriri Tasorentsi, icamaque yoameetsajeitancacari maaroni antirori caari cameetsatsi, meeca yaacameetsajeitaquee Tasorentsi.

¹⁸ Oshequi iquematsicacaro iriori; aisati ineantavetacari camaari, irantacayerime caari cameetsatsi. Meeca aroripee, ariorica anquematsicayetearo paitapeerica, aisati ariorica irineantavetaquee camaari, ioti irinti Jesoshi aitaque ocantari. Irootaque iotantacarori intacojeitaquee.

3

Yora Quirishito, yanaacotaqueri Moishishini ipincatsariti.

¹ Meeca, noyemisantaririnte, noncamantempi te pinquempejiteariji yora caari quemisantatsi: icoyeajeitajuempi avinti Tasorentsi pintsipajeitanteariri anta inquitequi. Pinquenqueshirejeitanaqueri Jesoshi, jaoca icanta: iquempejitacari maaroni itiancaneppee Tasorentsi, icamantajeiteero maaroni icoacaqueeri Tasorentsi. Aisati iquempetacari yora ivincatsarite saserote: yovaajiniri Tasorentsi acoacotiriri arori.

² Peerani yora Tasorentsi icantaqueri Moishishi: “Cameetsa poamejeiteri pishanincapee, plotacaajeiteri maaroni nocoacaajeitajeriri”. Ari iquearioventaqueneri Moishishi maaroni icantaqueriri Tasorentsi. Yora Jesoshi yanaacotasantaqueri Moishishi, iquearioventasantaqueneri Tasorentsi maaroni icantaqueriri, catsini.

³ Tempa aneacameetsasanotiri yora vetsiquirori ivanco: te aneacameetsasanoteroji ivanco irointi. Tempa irio iotatsiri irinti yovetsiqui: te ioteji pancotsi ovetsicajea irosati. Aisati ocameetsati aneacameetsasanoteri Jesoshi, oshequi ipincatsariti; eiro aneacameetsasanotiritsi Moishishi irinti, te impincatsaritasanoteji.

⁴ Timatsi vetsiquirori maaroni pancotsipee, iro cantaincha yovetsicajeitajuero Tasorentsi maaroni timajeitatsiri, catsini.

⁵ Ari cameetsa iquearioventiniri Moishishi Tasorentsi maaroni icoacaayetaqueriri, iro cantaincha iquempetacari inampire. Intavetacaro yoamejeitaquee capichaji yantayetiri Tasorentsi.

Iquisaqueri Tasorentsi tseenquiriri aisati piatsatariri.

⁶ Iro cantaincha, Quirishito irinti, iquearioventasanotiniri Tasorentsi maaroni icoacaqueriri. Caari ini inampire, irinti itomisanori. Ariorica ancanteani ashirejeiteari, ayojeitaque iraajeitanaquee anta inquitequi, irootaque ocameetsatantari anquimoshirejeite, impoiiji ayojeitaque ashanincajeitacari Tasorentsi.

⁷ Jero oca osanquenatacaqueriniri Ishire Tasorentsi yora Iravirini: “Meeca pinquema-jeitavaquero icantiri Tasorentsi.

⁸ Eiro piquishiritsi, eiro pitseenquiritsi: eiro piquempetaritsi yora piatariniri peerani. Ipiavetacari peerani Tasorentsi anta caaraiteriqui, ijjivetani eiro yoasanquetairitsi.

⁹ Icantiniri iriori: ‘Queario ipiajeivetaquena narori pishanincani peerani. Ocarataque 40 osarintsi natsipetashita notasoncacoventiri.

¹⁰ Iro cantaincha ipiajeitaquena, irootaque noquisajeitancariri narori, nocantaquerini: Oshequi pitseencaquena, te pinquenqueshiretenaji. Te pincoajeiteji piojeite paitarica nocoacaajeitaquempiri.

¹¹ Noquisaqueri, irootaque nocantasanotancariri: Eiro pareejeitatsi anta Canaqui, aisati eiro pareejeitatsi aca ocameetsaitetica’ ”. Irootaque isanquenatiniri peerani Iravirini.

¹² Quearioimpia, noyemisantaririnte, pitseenquiricari Tasorentsi: te oncameetsateji. Yanei irinti, icantani. Iro cantaincha ariorica pintseenqueri, pimpeacoteari: eiro piquenqueshiretajiritsi aisati.

¹³ Irointi ocameetsati meeca pinquemisantacaapiniteri pishaninca maaroni quitaiteri: coajica eiorica pimatirotsi. Eiorica iquemisantajeiti meeca, incanteani irampiitapinitero caari cameetsatsi, irametearo: impoiiji oshequi iramatavitaquea, eiro icoitsi catsini inquemisante.

¹⁴ Ariorica ancantaitatiyempani ashireteari Quirishito, ayojeitanaque ancarajeiteri aja-jeitanaque inquitequi: eiro yamataviteetsi.

¹⁵ Iro cantaincha pinquenqueshiretajero isanquenatiniri Iravirini: “Meeca pinquema-jeitavaquero icantiri Tasorentsi. Eiro piquishiritsi, eiro pitseenquiritsi: eiro piquempetaritsi yora piataricari peerani”.

¹⁶ Peerani yora ejipitosati oshequi yoashinoncaajeitaqueri maaroni intacantajeitaqueeri. Ari icantajeitiri Moishishi: “Tsame, naajeitanajempi pashiniqui quipatsi, cameetsaquea asavicajeitantajeari”. Icantajeiti: “Cameetsa, tsame ajajeite maaroni”. Iro cantaincha tempa iriojeitaque piajeitacari Moishishi aisati Tasorentsi.

¹⁷ Irootaque ishemantacari Tasorentsi. Ocarataque 40 osarintsi ishemacari. Oshequi yantajeitaquero iriori caari cameetsatsi, irootaque ishinentancariri icamajeitaque anta caaraiteriqui.

¹⁸ Te inquemisantajeiteriji, irootaque icantasanotantariri: “Eiro pareejeitatsi anta ocameetsaiteti”.

¹⁹ Pineaquero, itseencaajeitaqueri Tasorentsi, irootaque caari yareejeitanta iriori anta ocameetsaitetinta.

4

Icoaque Tasorentsi areejeitea anta ocameetsaitetinta.

¹ Pamene, icantajeitaquee Tasorentsi: “Ariorica pinquemisantajeitena pisaviquimojeitena aca nonampiqui, aca ocameetsaitetica”. Iro cantaincha quearioimpia, piquempetaricari yora peeraniniri caari areetachani.

² Ocameetsatasanotini ora icashiacaavetacariniri Tasorentsi, aisati ocameetsati oca icashiacaajeitaqueeri arori. Iro cantaincha te inquemisantajeiteni iriori, irootaque yat-sipetashitancarori icamantiri.

³ Ariorica aquemisantasanotaqueri Tasorentsi, ari areetasanotaquea anta ocameetsaitetinta, iro cantaincha eiro yareetatsi yora caari quemisantiri. Tempa icantaquerini Tasorentsi: “Noquisaqueri, irootaque nocantasanotantariri: ‘Te pinquemisantenaji, irootaque eiro pareetantatsi anta ocameetsaitetinta’ ”. Peerani, tequerani irovetsiqueroni quipatsi, yovetsiquitavetanari irisavicanteameri, iro cantaincha te irareejeiteaji.

⁴ Ayojeitaque yovetsicajeivetacaro maaroni, moncarataca. Tempa ocanti Sanquenar-entsi: “Ocarataque 6 quitaiteri yovetsicajeitancarori Tasorentsi maaroni; moncarataca. Impoiiji, quitaiteri 7 yoipacaquero yovetsicantaque, ari ocarati”.

⁵ Ari yovetsicavetanari, iro cantaincha te inquemisantajeiteriji irioripee, irootaque icantantari aisati Tasorentsi: “Eiro catsini yareejitatsi aca ocameetsaitetasanotica”.

⁶ Ari ocameetsataque ora icantaqueriniri Tasorentsi, iro cantaincha eiro yareejitatsi iri-ori yora icantaqueniri: pineaquero, te inquemisantajeiteji. Iro cantaincha intimaarantaje areetajanhaneri.

⁷ Ari Tasorentsi: “Meecaquea nocoacaajeitaqueri atiri inquemisantajeitena irareejitantajeari jenoqui”. Irootaque isanquenatacaqueriniri Iravirini: “Meeca, ariorica pinquemavaqueri Tasorentsi inquenquetsatacayempi, eiro piquishiritsi, eiro pitseenquiritsi”.

⁸ Arime irareetacaahearime Josoe ishanincapee anta ocameetsaitetinta, zarimpa impoiji irisanquenatacaquerime Tasorentsi Iraviri: “Coajica irareejeitea quemisantajeitanari anta ocameetsaitetinta”?

⁹ Irootaque ayojeitancari coajica ajajeitaje maaroni quemisantatsiri anta ocameetsaiteti, eiro anta apomerentsitapaajatsi antsameejeitaje.

¹⁰ Peerani itsoncantacarori Tasorentsi yovetsicayetaque, yoipacaquero, tecatsi irantaje aisati. Aisati arorijeji, ariorica ajajeite irioriquinta, anquempejeitapaajeari, amaoreajeitapaaje, tecatsi antajeitapaaje.

¹¹ Tsame ancoasanojeitajero areejeitaje anta: eiro apiatsataritsi, eiro atseenquiritsi. Eirorica aquemisantasanotiri, eiro areetajaritsi.

¹² Aneatsiri ini Tasorentsi, oshequi itasorentsiti; imatasanotaquero maaroni icantajeitiri. Tecatsi ompomerentsitimoteari, ioti jaoca ocantari aquenqueshireantari aisati ashire; ioti catsini jaoca acantari; iotiro maaroni aquenqueshirejeitiri aisati maaroni acoajeitiri.

¹³ Tecatsi materone irimanapitsateari: ineasanojeitaquee maaroni; jaocarica asavica-jeitiri, ineajeitaquee. Itsoteayetiro quipatsi, maaroni; iquenqueshirejeitaquee maaroni.

Yora Jesoquirishito iquempevetacari ivincatsarite saserote.

¹⁴ Ari ijataji Jesoshi anta inquitequi, itsipatapajari iriri, yora Tasorentsi. Ainiro meeca icantiri Iriri: “Pincavintsajeiteri quemisantajeitanari”, iquempevetacari yora ivincatsarite saserotepee, irootaque ocameetsatantari ancantaitiyempani anquemisantajeit-eri.

¹⁵ Yatiritapaqueni peerani, iquematsicayetacaro paitapeerica, aisati yora caamari iriori irantacayerime caari cameetsatatsi, iro cantaincha tecatsi irante. Iotitantaqueerori irinti maaroni aquematsicayetari aisati jaoca icantaqueeri camaari. Ioti opomerentsiti-mojeitaquee, iro cantaincha icavintsaasanojeitaquee.

¹⁶ Eiro meeca atsaroacaajeitajaritsi anquenquetsatacayeri Tasorentsi: ayojeitaquee iri-neshinoncajeitaquee, incavintsaasanojeitaquee. Eiro ishineteetsi ashinoncaajeitea.

5

Icoacaaqueriri Tasorentsi yora ivincatsarite saserote.

¹ Ari ipeaqueri Tasorentsi atiri ivincatsarite saserote, icoacaapinitiri irimanacoventajeitee arori. Irio vaaqueneriri Tasorentsi paitarica apajeitiriri. Antajeitiro caari cameetsatatsi, irootaque maaroni osarints yoantanariri saserote Tasorentsi aparoni virantsi cameetsari, itaaqueneri. Impoiji yaacameetsajeitaquee maaroni quemisantatsiri, iquem-petacantajeitaquee te antajeiteroji caari cameetsatatsi.

² Ari iquempejeitaquee arori, atiri ini; te irimateroji intime cameetsa catsini, irointi timatsi yantiri iriori caari cameetsatatsi. Irootaque iotantacari icavintsaajeitaquee ariorica antero arori caari cameetsatatsi.

³ Aisati ariorica yoiniri Tasorentsi ovisha, iquenqueshiretiro antaneppee arori, aisati irantane iriori.

⁴ Te irisati peashitachane ivincatsarite saserote, irinti peaqueri Tasorentsi; oquem-petaca peerani ipeaqueri Aaro isaserotantacari.

⁵ Aisati iquempetaca Quirishito: te irisati peashitachane quempetearine saserote, irinti peaqueri Apa Tasorentsi. Tempa icantiri peerani: “Aviro notomi, meeca quitaiteri notomintaqueempi”.

⁶ Pashini aisati icantiri: “Pincantaitiyempani pisaserotetanaque, pinquempeteari iriori Merequiserequi”.

⁷ Peerani, yatiritantapaintaniri Quirishito, oshequi iquenquetsatacapinitiri Iriri, irasaanotacani, aisati ijaquitacani; icantiri: “Apa, ariorica noncame niotaque pimatajena pointinaajena”. Ari oshequi ipincatsataqueri Tasorentsi, irootaque imatantacarori iriori icocairiri.

⁸ Queario, itomi Tasorentsi ini, iro cantaincha iquemisantiri Iriri, irootaque iquematsicatantacarori paitapeerica. Meeca ariorica anquemisante arori, aisati anquematsicatearo paitapeerica, iotiro irinti jaoca ocantari.

⁹ Ari imatasanotaquero maaroni icoacairiri iriri, iquemisantasanotaqueri: irootaque imatantarori aisati yoavisacojeitiri maaroni quemisantasanajeitiriri iriori. Meeca eiro ajajeitisi Sharincaveniqui, ainti ajajeite inquitequi, ancantaitiyempani asavicajeitapaaje.

¹⁰ Iriotaque ishiacantaqueri Tasorentsi ivincatsarite saserote, icanti: “Irio iquempetaca notomi Merequiserequi iriori”.

Tequera inquemisantasanote yora isanquenatiniri.

¹¹ Nocoavetaca nontsoteajeitempirome maaroni oca, noametasanojeitempirome. Oti-maveta plotantavetari, iro cantaincha te pinquemisantavaquenaji, irootaque caari pique-mantavacaro.

¹² Oncameetsateme poamejeiterime meeca itsipapee, iro cantaincha ainirotatsi picoajeiti oamejeitempineri. Picoajeiti nampiitajempiro caari pomerentsitsati. Piquempetarari jananequi: coatsimpi pantsomite, te paveeroji pantsiquero poyeari.

¹³ Queario, piquempejeitacari jananequi, coatsimpi pantsote: tequera piotasanajeitero Irineane Tasorentsi oamejeiteeri jaoca ancanteari ancameetsajeitantajeeri.

¹⁴ Piotasanojerime Tasorentsi, pincoajeiteme poyeari pantsicasanojerime. Piotaqueme paita cameatsatsiri antajeitaqueri, aisati piotaquerome caari cameatsatsi eiro pan-tirome.

6

Icamantiri sanquenatirori paita isanquenatantantariri.

¹ Eiro napiitapinitajimpirotsi oca noametacotapinitiriri Quirishito: te ompomerentsiteaji. Eiro meeca picantajanatsi: “Pampiitapinitajenaro”. Ocameetsati aikuero pijatatiye piotasanoanaquero maaroni icoacaajeitaquempiri Tasorentsi. Nocantimpini peerani: “Eiro pantashiyetarotsi paitapeerica, eiro oavisacotimpitsi: tecatsi pincantea poavisacotajea avisati. Ocameetsati pinquemisanteri Quirishito pavisacotantajeeri.

² Pivaotisatimentajeiteeri iriojeitanteeri atiri piquemisantiri. Ariorica pincanteri Tasorentsi iramitacoteri piyemisanteririnte, pipamijeitaqueri. Ariorica ancamaajeite anti-naajeitanaje aisati, impolji incantaventajeitee Tasorentsi”. Ari eiro napiitajimpirotsi oca piotitaniri,

³ irointi ariorica irinintacayena Tasorentsi, noametempiro iroaquerari, caari piquemap-initi.

⁴⁻⁶ Pamene. Ainiro ashaninca quemavetaroniri irineane Tasorentsi, iveshireimentavetacari Tasorentsi, amitacovetacari Ishire iroori. Iovetaca ocameetsati irineane Tasorentsi; iovetaca coajica impincatsariventajeitee Quirishito. Iro cantaincha yojocajiro iquemisan-taveitani. Ariorica yojocajiro iquemisantiri Itomi Tasorentsi, oquempetaca icoaque irampiitajerime aisati impajacotantajeeri. Itseencaqueri, icoaque intseencaajeitiri it-sipapee atiri, irishirontimentajeitanteeriri Quirishito. Ari tecatsi incantajea inquemisan-tasanotaje yora quemisantaveitachaniri. Queariyea, piquempetaricariyea avirori.

⁷ Ariorica cameetsa oparii incani quipatsiqui aisati onintiro panquirentsi, otimaque yoajeitari yora panquitirori. Tempa iriotaque Tasorentsi oameetsantirori quipatsi onin-tantarori panquirentsi.

⁸ Iro cantaincha ariorica pineaquero oantsiqui saveshiniro aisati otsipapee totsequi-shi, tempa picanti: “Te oncameetsateji, tsame anquicoajeitero, antaajeitero maaroni”. Queariyea, piquempetarocari avirori, irointi pinquempeteoro cameetsari quipatsi.

Iveshireacaacari yora isanquenatiniri.

⁹ Ari nocantavetaquempi: “Pitseenquicari”, aisati nocantimpi: “Piquempetarocari quipatsi oshiocantari saveshiniro”. Iro cantaincha, noshaninca, nonintajeitaquempi. Naamaaca cameetsa pisavicajeitaque, aisati iroavisacojeitempi Tasorentsi.

¹⁰ Tempa icameetsataque, eiro ipeacotarotsi maaroni pantiniriri: ioti piquearioventa-quo icoacaimpiri, ioti picavintsaajeitiri piyemisanteririnte, picantani.

¹¹ Nocoacaasanojeitaquempi pinquearioventajeitero pinintajeiteeri itsipapee, pin-can-teni, irosati omoncaranteari impinatantempiri Tasorentsi.

¹² Eiro piperaventarotsi icoacaimpiri Tasorentsi, irointi pinquempejeiteeri yora itsi-papee quemisantasanotiriri, quearioventiniriri maaroni icoacaajeitiriri iriori. Queario irineajeitero maaroni icashicaajeitaqueriri.

¹³ Pamene, ariorica ancoaque ayotacaasanoteri itsipapee ashaninca queario oni acan-taqueriri, acantiri: “Ioti Tasorentsi queario oni oca nocantimpiri. Yanaacojeitaqueree irinti,

ipincatsaritanoti. Ariorica namatavitempi, yoasanquetanacari". Timatsi meeca icantaqueeri Tasorentsi, iro cantaincha tecatsi anacoterine irinti, tecatsi oasanquetayerine irinti. Apatiro icantiri Avarama: "Queario oca noncamantempiri nainti, tempa naro Tasorentsi: eiro nopashiniyetirotsi noneane".

¹⁴ Impoiji icantiri: "Queario, nontasoncacoventempi, oshequi nintacotempi; aisati noshequiaqueri pishaninca".

¹⁵ Ari yoyeasantaqueri Avarama, impoiji ineesanotaquero maaroni icashiacaairi.

¹⁶ Tempa ariorica ancoaque ayotacaasanoteri itsipapee ashaninca queario oni acantaqueriri, acantiri: "Ioti Tasorentsi queario oni oca nocantimpiri. Yanaacojeitaquee irinti ipincatsaritanoti. Irimatacayena nontsoteaquempiro maaroni nocantimpiri. Ariorica namatavitempi, iroasanquetaquena iriori". Ariorica ayotaque ipincatsaritanotaqueeri.

¹⁷ Ari otimini icashiacaajeititariniri Tasorentsi yora peeraniniri. Icoaqueni iriojeite eiro yamatavijeitiritsi, irootaque icantasantanariri: "Queario oca noncamantempiri nainti, tempa naro Tasorentsi: eiro nopashiniyetirotsi noneane".

¹⁸ Ari oqueariotasanotaque irineane Tasorentsi: te irioteji intseeya. Iro cantaincha aisati icantini: "Queario oca noncamantempiri", ayotasanajeitancari eiro catsini yamatavitanitsi. Meeca, ariorica aventeari iroavisacojeitajee, ayotasanotaque irimataqueero oca icantaqueeri: iroavisacotasanojeitee.

¹⁹ Ariorica ayojeitaque avavisacotaca, tempa aveshireasanotaca, eiro aquenqueshiretajatsi aisati. Ayojeitaque ocameetsataque anquenquetsatacaajeiteri meeca Tasorentsi, aisati coajica arejeiteari: tecatsi ticavaqueene.

²⁰ Ijivajeitanaquee Quirishito, icamantacotaquee: iquempetacari yora Merequiserequi, ivincatsariteni saserote peerani.

7

Yora Merequiserequi yanaacojeitaqueri isaserotetasanotaque maaroni ishanincani Irevi.

¹ Ari meeca nonquenquetsatacoteri yora Merequiserequi: peerani ipincatsariventajeitaqueri yora saremisati. Aisati Tasorentsi iriori, yora savicatsiri inquitequi, ipeaqueri saserote, icanti: "Irio saserotetatsine yoca". Ari itimi pashiniqui nampitsi Avarama. Yajeitanaqueri iratiritepee, ijajeitanaquee imanajeitiri yora iisaneentane, yora noshiquiriri itomitsori: oshequi inajeiveta, iro cantaincha ipoyereajeitaqueri maaroni, ivincatsaritepee, maaroni. Ari ipianaja Avarama, yoipiajiri itomitsori, aisati yamayetajiro ivararoni yora yovaitiri. Ipiantajari, itonquiotavacari Merequiserequi, icantiri Tasorentsi: "Pintasoncacoventeri Avaramaca cameetsa irisavicanteari".

² Impoiji yaarrantaji Avarama vaararontsi, ipaarantaqueri, icantiri: "Jeroca irashi Tasorentsi". Otimirica 10, ari ipaqueri aparoni. Ari ipajita iriori Merequiserequi. Acantiri aneanequi: "Cameetsatsiriri". Ipincatsariventajeitiri saremisati. Ocantiri Saremi aneanequi: "Cameetsa asavicajeiti".

³ Ora sanquenarentsi tecatsi onquenquetsatacoteri iriri Merequiserequi. Tecatsi onquenquetsatacotero iriniro, icharine, tecatsi. Tecatsi onquenquetsatacotero itimantacari aisati icamantacari. Oquempvetaca icantani itimini, irootaque ishiantacariri itomi Tasorentsi; icantani iriori isaserotetanaque, icantapinitiri Tasorentsi: "Pintasoncacoventeri maaroni quemisantariri".

⁴ Pineaquero, oshequi ipincatsaritini Merequiserequi. Intacantajeitaqueeniri peerani Avaramani, iro cantaincha ipincatsariri, aisati ipaarantaqueri ivararoni imanatiniri.

⁵ Pamene, impoiji catsini itimi ishanincani Avaramani: yora Irevi. Isanquenatacaqueri Tasorentsi Moishishi, isanquenatantarori: "Icoaque Tasorentsi impeaquea ishanincani Irevi saserotetatsineri. Nocoaque maaroni ijorioririnte impeeranteri iriori ivararo, ivira, maaroni: intimerica 10, ari imperi aparoni". Pineaquero, ishanincani Avaramani inajeitini: ishanincani Irevi aisati maaroni ijorioririnte. Ishanincatavacaajeitaca.

⁶ Iro cantaincha peerani yora Merequiserequi te irishanincatsirini Avaramani, inashita iriori; iro cantaincha yaavaquero maaroni ipaarantaqueriri iriori, aisati icantacotaqueri yora intacantajeitaqueeri: yora icashiacaqueri Tasorentsi.

⁷ Pineaquero, yora Merequiserequi anaacotantatsiri ipincatsariri, irootaque icantantariri Tasorentsi: "Apa, pintasoncacoventeri Avaramaca cameetsa irisavicanteari".

⁸ Aca ashaninca inajeiti yora ishanincani Irevi, imoncarajeitaquee arorijeji, acamajeiti, iro cantaincha yaapinitaqueri maaroni apajeitaqueriri. Iro cantaincha peerani yora Merequiserequi, inashita: oquempvetaca te incameji irinti, te oncanteji sanquenarentsi: "Icamaque".

⁹⁻¹⁰ Peerani, ipaarantantacariri Avarama vaaranonshi, tequerani intimeni Irevi: itimi iriori impojji. Iro cantaincha arime intimiteame, impaaranterime aisati iriori: tempa inquempetarime yora jivatatsiri itimi. Aisati inquempetejeterime maaroni ishanincapeeni Irevi: maaroni saserotetsiri. Aitaqueme impincatsajeiterime Merequiserequi maaroni. Pineaquero, ajorioririnte ipincatsajeitaqueri saserotepee, irootaque ipaarantajeitantacariri paitapeerica, iro cantaincha yora saserotepee ipincatsasanojeitaqueri Merequiserequi: tempa yanaacotantaque iriori isaserotetasanotaque, ipincatsaritanotaque.

Yora ishanincani Irevi, tecatsi incantee iroavisacojeitee.

¹¹ Ari itimajeveta yora ishanincani Irevi: yora Aaro aisati maaroni ishanincani iriori, isaseroteitaque; aisati otimaveta isanquenajectiniri Moishishi, oamejeitiri paitapeerica antajeitiri. Iro cantaincha tecatsi incantee iriorije iroameetsajeitee, iroavisacojeitee; irootaque itiancantacariri Tasorensi pashini saserotetajantsiri, quempetajariri yora Merequiserequi.

¹² Ari inashita yora saserotetsiri, aisati meeca onashita icoacaajeitajeeri Tasorensi.

¹³⁻¹⁴ Itimaveta saserotepee shanincajeitacariri Irevi, aisati isanquenajectaqueneri Moishishi, yoamejeitiri paitarica yantajeitaqueri. Iro cantaincha yora iroaqueratajantsiri saserotetajantsiri te irishanincateariji Irevi, irinti ishanincatacari Jora. Te irisaseroteteji itsipapee ishanincani Jora: te irisanquenajectenerini Moishishi, te incanteriji irinti impeaquea saserote.

¹⁵ Meeca itimi yora quempetariri Merequiserequi, inashita iriori, ayotantacari onashita icoacairiri Tasorensi.

¹⁶ Te irishanincateariji Aaro ipeantacari saserote; irointi itasorensitaque aisati icantaitatiani yanei, irootaque ipeantacari saserote.

¹⁷ Tempa icantirini Tasorensi peerani: “Pincantaitiyempani pisaserotetanaque, pinquempeteari iriori Merequiserequi”.

¹⁸ Otimavetani oca isanquenajectiniri ishanincani Aaro, iro cantaincha te incoyeji Tasorensi ampomerentsiventearo meeca. Antsipetearome, tecatsi oncantajeitee oavisacojeitee.

¹⁹ Amoncarajeiterome maaroni, eiro oameetsajeitee. Iro cantaincha irinti Quirishito aitaque irimatajeje irraajeitanajeje anta Tasorensiqui. Te antsipetashiteaji aquemisanta-jeitaqueri irinti.

Incanti Tasorensi: “Queario, incantaitiyempani Quirishito irisaserotetanaque”.

²⁰ Te incantashiteaji Tasorensi, icantasanoti: “Queario oca noncamantempiri, tempa naro Tasorensi. Incantaitiyempani Quirishito irisaserotetanaque”.

²¹ Te inquempeteariji irinti ishanincajeini Aaro. Iro cantaincha icantiri Quirishito irinti: “Queario oca noncamantempiri, tempa naro Tasorensi. Te noncantashiteaji, eiro namatavitimpsi. Avirotaque saserote, pincantaitiyempani”.

²² Irootaque ayojeitantacari yanaacotantaque Jesoshi isaserotetasanotaque, imajeitaquee yoavisacojeitaquee.

²³ Ari icarajeiveitani oshequi saserotevetachaniri, iro cantaincha icamapinijeitaque, yojocapinijeitaquero isaserotetantaniri.

²⁴ Irinti Quirishito, icantani itimi: irootaque imatantarori isaseroteti, icantani.

²⁵ Imajeitaqueri quemisantajeitiriri: yoavisacotasanojeitaqueri maaroni coasanotatsiri iraanajeri Tasorensiqui. Icantani yanei, irootaque imatantarori icamantacoventajeitaquee.

²⁶ Queario, ocameetsasananoti isaseroteventajeitaquee; tempa Tasorensi ini, te aneroji irantane, te iranteroji caari cameetsatatsi; te inquempetejeteriji yora caari cameetsajetatsi isaviquimojeivetapaintaniri. Meeca isaviqui cameetsa anta inquitequi jenoqui.

²⁷ Yora itsipapee saserotetsiri, maaroni quitaiteri yoapinitiniri Tasorensi ivirapee, itaapinitiniri. Iro yoapinitantanariri, oshequi iquenqueshiretaquero caari cameetsatatsi yantajeitiri aisati yantajeitiri iriori iJORIORIRINTE. Tecatsi iroapinite irinti Quirishito, irointi apatiro icamimentajeitaquee: moncarataca, eiro yapiitajirotsi aisati.

²⁸ Ari peerani isanquenajectiniri Moishishi, icanti: “Impeajeitanaquea ishanincani Aaro saserote”. Atiri inajeti iriori, yantajeitiro caari cameetsatatsi. Iro cantaincha impojji icanti Tasorensi: “Queario oca noncamantempiri, tempa naro Tasorensi: incantaitiyempani Quirishito irisaserotetanaque”. Iriotaque Quirishito Itomi, te iranteroji caari cameetsatatsi irinti, icantatiani icameetsasananotaque.

8

Isaserotetanaque Quirishito anta inquitequi.

¹ Piotavaquero oca noncamantempiri: iriotaque Quirishito saserotementajetaqueeri. Isaviquimotiri Tasorensi anta inquitequi jenoqui, anta iracosanoriqui; icaratiri ipincatsarijeiti.

² Yora ishanincani Aaro iquenquetsatacapinitiri Tasorensi anta pancotsiqui yovetsiquiri atiri, icantashitacararo: "Ivanco Tasorensi". Irinti Quirishito isavicasanoti anta Tasorensiqui: te irio vetsiquerone atiri, irinti Avincatsarite vetsiquirori inampi iriori.

³ Yora ivincatsarite saserote ipapinitiri Tasorensi paitapeerica; yoaqueneri virantsi, shemi; itaaqueneri. Irinti Quirishito, te iroyeneriji virantsi; irisati coaintsi yoyeetantacariri. Impoiiji ijatashitaqueri Tasorensi, icantapaaqueri: "Narotaque nainti camimentajetaqueriri ashaninca, oavisacojeitaqueriri".

⁴ Intimeme meeca aca quipatsiquica, eirome isaserotetime; pineaquero, te irishanincateariri Aaro: iriojeitaque ishanincani Aaro tsoteaquerori isanquenatiniri Moishishi.

⁵ Yantaveetapinitiri anta icanteetirinta: "Ivanco Tasorensi", iro cantaincha te anta irisavicasanote Tasorensi. Apatiro oshiacaventiro inampisanori anta inquitequi. Peerani, yovetsicantarori Moishishi, icantiri Tasorensi: "Anta toncaariqui pajitachari Shinai noametasanotaquempiro jaoca pincanterori pancotsi: pimincaratasanotero nocantaquempiri".

⁶ Ocameetsavetaca ora isanquenatiniri peerani Moishishi, isaserotejeitancari Aaro aisati ishanincani, aisati yamitacojeivetacari ajorioririnte. Iro cantaincha oca icantiri meeca Tasorensi ocameetsasanoaque, oshequi anaacotaquero isanquenatiniri Moishishi. Aisati iquempetaca, oshequi imatasanotaqueenero Quirishito, oshequi yanaacotaqueri Aaro.

⁷ Oncameetsasanoaqueme isanquenatiniri peerani Moishishi, eirome icantirime pashini Tasorensi.

⁸ Tempa icantini Tasorensi peerani: "Tequera omoncarateaji, te oncameetsasanooteji oca isanquenatiniriri Moishishi Aaro". Irootaque isanquenatacantacariri itsipapee quemisantatsiniri peerani: "Icanti Avincatsarite: 'Coajica ontime pashini noncamantajeiteriri maaroni joriopee, onashitanaquea.

⁹ Euro oquempetajarotsi ora nocantaqueriri yora intacantacaroniri. Peerani isavicaveitani maaroni joriopee Ejipitoqui, iro cantaincha naajeitanaqueri pashiniqui quipatsi. Isanquenavetacaro Moishishi nocoacaajeivetacariri, iro cantaincha te inquemisantajeitenaji. Irootaque caari namitacojeitantari.

¹⁰ Meeca timatsi noncamantajeiteriri maaroni joriopee. Coajica niotacaasanojeitaqueri maaroni noncantajeiteriri, inquenqueshiretasanojeitero, eiro ipeacojeitarotsi. Impincatsasanojeitaquena, aisati nontasanoventajeiteriri narori.

¹¹ Euro yatsipetashijeitatsi iroametaavaajeitea, eiro icantavaaajeitatsi: "Noshaninca, pioteri Novincatsarite". Aitaque iriotashijeitena maaroni: pincatsaritatsiri, caari pincatsaritatsi, maaroni catsini, iriojeitena.

¹² Noncavintsaasanojeiteriri maaroni antirori caari cameetsatsi, eiro noquenqueshireacotajiritsi aisati yantayetiri". Irootaque icantitacari peerani Tasorensi.

¹³ Pineaquero, icantini: "Ontime pashini noncamantajeiteriri atiri, eiro oquempetajarotsi nocantiniri peerani". Ari oca icantiri meeca, irootaque poyeetajarori icantiniri peerani.

9

Iquenquetsatacotiro pancotsi yantaveetantari saserotepee.

¹ Peerani icantajeitiri Tasorensi intacantaqueeniri jaoca incantajeiteari inquemisantajeite, aisati icantiri jaoca oncanteari pancotsi irantaveetanteari saserotepee.

² Ari yovetsicajeitaqueroni pancotsi, imoncarataqueroni icantiniriri Tasorensi. Anta yantaveetapinitinta saserotepee icanteetiro irashi Tasorensi. Otimi anta yoantarori vera itsiotari, aisati otimi mesa. Anta mesaqui yoapinitiro tanta, ocarataque 12, aquenqueshirejeitantarori ipapinijeitaquere Tasorensi avajeitari.

³ Otimaque oticaashiro, ainiro araquerora tecatsi jatapinitatsine, icanteetiro inantasanotari Tasorensi iriori.

⁴ Otimi ara itaapinitantarori casancapsari, iro yovetsicantarori oro. Otimi aisati cajo, ipashicantarori oro. Ara tsoompoina, otimi coviti yovetsicantarori oro, tsoompoina irointi iteyetiro mana. Aisati otimi cajoqui iotiquiro Aaro, ora shiocashitachaniriri peerani oshi. Aisati otimi ora mapi isanquenatacainiriri Tasorensi Moishishi.

⁵ Anta otataroqui cajo ishiacantaqueri apite inampirepee Tasorensi ipajiyetiri querovine. Ishiacantaca ainiro isavicaque Tasorensi. Yamenajeitaquero otataro cajo anta yoapinitiro maaroni osarintsiqui ivincatsarite saserote iriraja virantsi. Oquempetaca

iquenqueshirejeitiri camimentajeiteeri, cavintsaaajeiteeri. Eiro meeca notsoteasanotirotsi noncamantempero jaoca ocantayetari.

⁶ Ari yovetsicajeitaquero peerani, imoncarataquero icantiriri Tasorentsi Moishishi. Impoiji iqueapinijeiti saserotepee, yantaveetapinijeiti.

⁷ Iro cantaincha te irijatapinijeitei oticaashiroqui araquerora. Aparoni ijati maaroni osarintsiqui irinti ivincatsarite. Ijivataque yoiniri Tasorentsi virantsi, impoijiquea iqueanaque apaniro, yaanajiro iriraja, itecaquero anta otataroqui cajo; icantiri Tasorentsi: “Apa, pincavintsaaajeitena, eiro piquishimentajeitanarotsi nantajeitaqueri aisati yantajeitaqueri noshanincapee; eiro piquenqueshireacojeitajanarotsi aisati”.

⁸ Pineaquero, otimi oticaashiro, ticaajeitaqueriri itsipapee saserote aisati maaroni joriopee. Tecatsi incantajeitea irirajeite anta isavicantasanariguvi Tasorentsi. Irootaque oshiacantajeitaqueeri Ishire Tasorentsi, ayojeitantacari yora ishanincani Irevi tecatsi incantajeitee irareetacaajeitee anta Tasorentsiquinta.

⁹ Ocameetsati anquenqueshirejeitero meeca ayojeitanteari: maaroni ipapinijeitaqueri Tasorentsi, aisati maaroni yoapinitiniri aisati itaapinitiniri, te oameetsajeiteriji yora papinivetariri aisati taapinivetanariri.

¹⁰ Peerani yoametashijeitari paitarica yantashijeitari; paitarica yoajeitari, aisati paitarica irajeitiri; yoametashijeitari jaoca incanteari inquivapinitea, paitapeerica. Irootaque icoacaajeivetacariri Tasorentsi atiri peerani. Iro cantaincha ari ocaratinsi, moncarat-aca. Ipocapaaque meeca Quirishito aamaajeitari. Meeca onashitaja icoacaajeitajeeri Tasorentsi arori, iroaqueratajantsiri, ocameetsatasanotaque.

Yora Quirishito yoameetsajeitiri maaroni antajeitirori caari cameetsajeitatsi.

¹¹ Ipocapaaque Quirishito iquempevetapaajari ivincatsarite saserote, iro cantaincha ocameetsatasanotaque oca yantapaaqueri irinti. Yantaveetini itsipapee saserote anta pancotsiqui yovetsiquiri atiri; iro cantaincha irinti, ijatasanotaque anta ivancosanoriqui Tasorentsi: ocameetsatasanotaque irointi anta inquitequi.

¹² Aca quipatsiqui yora ivincatsarite saserote ijatapiniri maaroni osarintsi, yaapinitiro iriraja chivo aisati vacajaniqui anta pancotsiqui tsompoina, ora icanteevetari inantasanotari Tasorentsi. Iro cantaincha Quirishito irinti, icamimentajeitaquee, impoiji ijataji anta inquitequi isavicasanotinta Tasorentsi. Ishiacantaca yaanajiro iriraja: caari oni iriraja virantsi, irointi irirajanoriri. Icantiri Tasorentsi: “Pineaquero, nocamimentajeitaqueri maaroni atiri noavisacotantajariri, incantaitiyempani irisavicantajeeri aca anampiquica”. Te irantsipeteaji irinti impiapinite, aparo imataquero, ari ocaratini.

¹³ Ari peerani ariorica yantironi ashaninca caari cameetsatatsi, yoaqueri saserote vaca, iriorica chivo, iriorica vacajaniqui. Impoiji yaaquero iriraja, ipantaqueri yora antirori caari cameetsatatsi. Aisati itaaqueri ivatsa, impoiji ipantaqueri shirampari itsimencuero virantsi. Impoiji icantajeitiri ishaninca: “Icameetsataji aisati yoca. Ocameetsati incarajeitajeri aisati quemisantatsiri”.

¹⁴ Irintiquea Quirishito, icameetsatasanotaque irinti, ocantani otimi ishire. Icantiri Tasorentsi: “Apa, nocoasanotaque noncamimentajeiteri atiripee, noavisacojeitanteeriri”. Ari aparajamentajeitaquee irirajasanori irinti, te iro iriraja virantsi: icamimentajeitaquee, meeca eiro atsipetajarotsi anquenqueshiretero caari cameetsatatsi, ora jatacaajeiteenemeri Sharincaveniqui, irointi anteneri Tasorentsi maaroni icoacaajeitaqueeri. Impoiji ancantaitiyempani asaviquimojeiteri anta inquitequi.

¹⁵ Ari peerani apatiro ayojeitaquero isanquenare Moishishi, aisati antapinijeitaquero caari cameetsatatsi, ajajeitanteameri Sharincaveniqui; iro cantaincha icamimentajeitaquee Quirishito, yoavisacojeitantejeeri. Meeca onashita icantajeitaqueeri Tasorentsi: “Ocameetsaiteti maaroni nocashiacaajeitaqueriri quemisantajeitanari nocoyeajeitaqueri. Incantaitiyempani iroveshireimentajeitearo”.

Yoamejeitaquee paita icamimentajeitantejeeri Quirishito.

¹⁶⁻¹⁷ Ari pinquenqueshiretero yamejeitacari ashanincapee. Otimirica ivaararopee, isanquenati paperiqui: “Ariorica noncame nocoaque irashiyetajeero noshanincapeeni”. Ari isanquenataquero ivajiropee ashiyetajeerone ivaararopee. Impoiji, ariorica incamaque, iriojeitanaque irio ashiyetajeerone. Eirotsitarica icami yora sanquenatirori, eirotsita yaajeitirotsi vaararontsi. Iro cantaincha incamaquerica, moncaratataca: impoijiquea irajeiteero.

¹⁸ Aisati oquempetacani peerani: otimi icantiriniri Tasorentsi ashanincani peerani. Tecatsi incantea Tasorentsi incame, iro cantaincha icamapinijeitaque poshiniri omoncaratantacari icantiriniri.

¹⁹Peerani icamantiri Moishishi maaroni icoacaajetitiri ajorioririnteni, irosati isanquenatantarori. Impoiji icamantajeitiri ishaninca icantiriri Tasorentsi; impoiji aisati yoajeitaquero vacajaniqui aisati chivo, yaajatavaquero iriraja, iconoajataquero nija. Impoiji yaaquero iviti ovisha quitioncapitiri aisati casancashiri, yovıncaquero ojaqui, isaitantariri ishanincapee. Aisati isaitaquero iroori oca isanquenatacaqueriri Tasorentsi.

²⁰Ariorica isajjeitaqueri, icantajeitiri ishaninca: “Ari nocamantajeitaquempi maaroni iroaquerari icamantaquenari Tasorentsi. Icanti: ‘Ariorica pinquemisantajeitena, nontasoncoventajeitempi’. Aisati avirori picantajeiti: ‘Cameetsa’. Irootaque nosaitantaquempirori meeca iriraja”.

²¹Impoiji isaitaquero aisati pancotsi iquemisantajeitantari, aisati isajjeitaquero maaroni timayetatsiri tsoompoina.

²²Ari isanquenatini Moishishi: “Irootaque iriraja poshiniri oameetsajeitirori paitapeerica; aisati eirorica itimi camimenterineri atiri, amparajatimenterineri iriraja, eiro yavascotajitsi”.

Iquenquetsatacotiro paita icamimentantaqueeri Quirishito.

²³Ari otimi oshiacantiri oca pancotsi aisati maaroni timajeitatsiri tsoompoina. Ocameetsati isajjeitaquero yoameetsatantarori. Iro cantaincha otimi inquitequi oca ishiancantajeitaqueri, itimi aisati anaacotirori iriraja virantsi, oameetsasananotirori maaroni timajeitatsiri inquitequi:

²⁴iriotaque Quirishito. Yora saserotepee ijatapiniti anta pancotsiqui yovetsicajeitiri atiri, ishiancanteitiro: “Inantari Tasorentsi”. Irinti Quirishito ijatasantotaji itimasantotinta Tasorentsi, icantacoventajeitaquere.

²⁵Yora ivincatsarite saserote ijatapiniti anta inantariqui Tasorentsi, yaapinitiro maaroni osarintsiqui iriraja poshiniri: te irayeroji iriraja irashi iriori. Te irijatapiniteji irinti Quirishito irapinitantearori iriraja.

²⁶Arioricame irapiniterome iriraja Tasorentsi, oncameetsateme incamapiniteme, peerani catsini: yovetsicantarori quipatsi, irintearome incamapiniteme, irosati meecame. Iro cantaincha moncarataca peerani icamantacari: aparoni icamaque, yoavisacojeitaquere.

²⁷Ayojeitaque aparo acamajeitaque, toren, ari acarati; te ampiitapiniteroji ancame. Ariorica ancamaque, impoiji icantacoventajeitaquere Tasorentsi.

²⁸Ari oshequi anajeiveta, iro cantaincha aparo icamimentajeitaquere Quirishito; imoncarataquero, eiro icamajitsi aisati. Impocaje aisati coajica ancarajeitasanotajeri, ancarajeiteri aisati maaroni itsipapee aamaajeitariri meeca.

10

Tecatsi oncantajeitee isanquenare Moishishi oameetsajeitee.

¹Pamene, maaroni isanquenatacaquerini peerani Moishishi oshiacantaqueri yora pocapaintatsiniri, cameetsasananotatsiri. Yareetapainta, oshequi itasoncoventajeitaquere. Icantiri Moishishi Aaro: “Poapiniteneri Tasorentsi virantsi maaroni osarintsiqui”. Ari icantani ishanincani yoapinijeivetari, iro cantaincha tecatsi oncanteri oavisacojeiteri yora quemisantirori isanquenatiniri Moishishini.

²Arime oavisacojeiterime yoca yoapinitiri, tempa iroimpacayerome yoapinitiniri. Aisatime iroavisacotajeame yora, eiro iquenqueshirejaitajirome aisati yantayetiri.

³Iro cantaincha yoapinijeivetari ivira maaroni osarintsiqui, irosati icanta oquenqueshiretacaapinitiri yantayetiri.

⁴Tecatsi oncanteri iriraja vaca aisati chivo oameetsajeiteri antirori caari cameetsatsi.

⁵Ipcantacari quipatsiqui peerani Quirishito, tempa icantiri Tasorentsi: “Apa, te pineacameetsasananoteroji iriraja virantsi, te oameetsajeiteri icantajeitirori caari cameetsatsi. Irootaque pivetsicantanarori novatsa noncamimentajeitanteariri maaroni atiri, noameetsajeitanteariri.

⁶Te pineacameetsateriji maaroni itaapinijeivetimpiri atiri, aisati maaroni yoapinijeivetimpiri poameetsajeitantearimeri.

⁷Irootaque nocantantimpiri: ‘Pamene, Apa, nopocaque aca nantantempirori maaroni picoacaquenari. Noncaratero maaroni isanquenatacotiteetaquenani peerani’.

⁸Pinquenqueshiretasanotero oca icantiniri Jesoshi: “Te pincoyeji, Apa, iroajeitimpiri atiri virantsi, intaapinijeitempiri. Te pineacameetsatimenteariji yora pavetimpiri maaroni isanquenatacotiniri Moishishi”.

⁹Impoiji icantiri: “Pamene, Apa, pocaquena nantantempirori maaroni picoacaquenari”. Icantantarori oca, icanti: “Ontimaite maaroni yantayevetaniri ishanincani Irevi. Ontime iroaqueratajatsineri”.

¹⁰ Aparo icamimentajeitaquee Jesoquirishito, eiro yapiitajatsi incamaje aisati, imoncarataquero. Yoameetsatasanojeitaquee, aisati maaroni iriori quemisantajeitiriri, iquem-petacantajeitaquee te anteroji caari cameetsatatsi.

Te iroavisacotanteji virantsi yora yoyeetiri, irinti Quirishito oavisacotantatsiri.

¹¹ Ari yantaveetapinitaque maaroni saserotepee, yoapinitiniri Tasorentsi virantsi, itaapinitiniri, iro cantaincha te oameetsajeiteriji maaroni antirori caari cameetsatatsi.

¹² Iro cantaincha aparoni icamimentajeitaquee Quirishito, yoameetsajeitantajeeri, moncarataca. Impoiji isavicapaaji anta iracosanoriqui Iriri,

¹³ yoyeaqueri irimatantearori icantaqueriniri: “Coajica nontsoncajeiteri maaroni quisajeitaquempiri”.

¹⁴ Aparo icamimentajeitaquee maaroni: tempa icoyeajeitaquee Tasorentsi, yoameetsatasanojeitaquee.

¹⁵ Aisati oametasanojeitaquee Ishire Tasorentsi queario nosanquenataquempiri; tempa osanquenatacainiri peeraniniri: “Icanti Tasorentsi:

¹⁶ “Tempa narotaque Ivincatsarite jorio, irootaque noncantajeitanteariri: Te pimajeit-eroji nocantaqueriri Moishishi, iro cantaincha coajica nonquenqueshiretacaajeitempiro maaroni nocoacaajeitaquempiri, pintoteajeitajero, piotasanoeitajero, maaroni’ ”.

¹⁷ Impoiji aisati osanquenatacaqueri: “Icanti Tasorentsi: ‘Eiro noquenqueshiretacoti-tajiritsi aisati caari cameetsayetatsi yantajeitaqueri’ ”.

¹⁸ Pamene, ariorica incavintsaajeitiri Tasorentsi antirori caari cameetsatatsi, aisati terica inquenqueshiretacotajeri aisati yantaqueri, eiro icoajitsi aisati camimenteriniri iroameetsatanteariri. Pineaquero, inecameetsajeitaquee meeca.

Icamantajeitaquee paita icoacaajeitaqueeri arori.

¹⁹ Noyemisarinarinte, icamimentajeitaquee Quirishito, yaparajatimentajeitaqueero iriraja yoavisacotantaqueeri. Meeca ayojeitaquee inecameetsajeitaquee Tasorentsi, ocameetsatantari anquenquetsatacapinijeiteri.

²⁰ Peerani otimini pancotsiqui oticaashiro, ora caari ijatapinijeitantani atiri onta inantarinta Tasorentsi: tempa oticaajeitaqueri. Iro cantaincha icamimentajeitaquee Quirishito, caari otimantaja meeca ticaajeeneri. Yaneanaji aisati, irootaque ocameetsatantari meeca anquenquetsatacapiniteri Tasorentsi.

²¹ Isaserotetasanotaque, ipincatsariventasanojeitaquee arori, aisati maaroni itsipapee quemisantajeitiriri Tasorentsi.

²² Yaparajatimentajeitaqueero iriraja, aisati avautisatimentajeitacari. Irootaque meeca eiro atsaroacantaritsi Tasorentsi, ayojeitaquee eiro yoipiajeiteetsi, irointi iraacameetsatasanojeitee.

²³ Ayojeitaquee irimataqueenero maaroni icantajeitaqueeri, eiro yamatavijeiteetsi: irootaque ocameetsatantari ancamentajeiteri itsipapee atiri oca aquemisantajuqueri.

²⁴ Tsame meeca anquenqueshirejeiteri itsipapee: anintajeiteri aisati ancavintsaajeiteri.

²⁵ Timatsi ayemisarinarinte caari pocapinitatsi inquemisante: eiro piquempejeitaritsi avirori, irointi pampatotapinijeitea poimoshirencavacaajeitanteari maaroni. Tempa ayojeiti eiro osamanititsi impocantajeiri Quirishito, irootaque ocameetsatantari aveshirei-mentajeiteari aisati aveshireacaajeiteari itsipapee.

²⁶ Pamene, ariorica ayojeitaquee icamimentajeitaquee Quirishito, irootaque yoavisacotantaqueeri, ocameetsataque ashiretaro, anquemisantanojeiteri: tempa irootaque icantiriri Tasorentsi, oqueariotasanotaque. Te oncameetsateji catsini antseenqueri, te aneriji pashini oavisacoteeneri.

²⁷ Aitaque coajica inquisajeitanaqueri Tasorentsi maaroni tseenquiriri, iroasanquetasanojeiteri. Impoyereajeitajeri maaroni iisane, poyere.

²⁸ Yora ajorioririnteni yoapinijeitajuquerini caari pincatsatiro isanquenare Moishishi. Itimirica apite cantatsiri, ariorica icarati mava cantatsiri: “Ainiro yantane, noneajeitaju-queri”, ari yoajeitajuqueri ishaninca. Te incavintsaajeitimeteriji.

²⁹ Ariorica intseenqueri atiri Itomi Tasorentsi, aisati incantherica: “Yatsipetashita ica-maque Quirishito, yatsipetashita yaparajataquero iriraja, eiro yoavisacoteetsi”; aisati incantimaterorica Ishire Tasorentsi, ora cavintsaajeiteeri: ¿pigitimpa eiro yoasanquetiritsi Tasorentsi? Aitaque iroasanquetasanojaqueri, catsini: irineashiteteartave, ironea caari iquemisantantari.

³⁰ Tempa ayojeitiri, ayojeiti icanti: “Aitaque nompiajeiteari, noasanquetaajeiteri nainti”. Aisati icanti: “Queario noncantacoventajeiteri maaroni atiri, tempa naro pincatsariventa-cojeitiriri”.

³¹ Ariorica intscancante atiripee, inquisajuqueri Tasorentsi, yora aneasanotatsiri: ocameet-sati intsaroacaasanoeiteari catsini, yoashinoncairicari.

Icantiri: "Pinquearioventero pinquemisante, eiro pitsaroitsi pashinoncaimenteari Quirishito".

³² Pinquenqueshirejeitajea jaoca ocantari peerani, iroaquerani piquemacotaquerini Quirishito. Iquishmentajetaquempiro pishaninca piquemisanti,

³³ ishirontimentajetaquempi, yoashinoncaajeitaquempi. Aisati pineajeitaqueri yoashinoncaajeitaqueri itsipapee piyemisantarinte.

³⁴ Picavintsaaapinitaqueri yora yominguearanteetaqueri. Ariorica icoshitaquempini pivaararo, piquimoshirejeitaqueni, picantini: "Irayerota. Coajica ontimasanoyetaje cameetsayetsiri anta inquitequi, eiro itimajitsi coshitajeeneri anta. Ancantaitiyempani asavicajeite anta ocameetsaitetinta catsini".

³⁵ Eiro pipeacotarotsi piquimoshireimentiri, aiqero pijatatiye pinquimoshirejeitanaque. Queario, impinatempi Tasorentsi.

³⁶ Ocameetsati pincanteani pinquearioventero maaroni icoacaimpiri Tasorentsi, impoiji irimatempiro icantaquempiri.

³⁷ Tempa ocantini sanquenarentsi: "Irotajantsi ipocaje Avincatsarite, eiro osamanititsi, tempa icanti: 'Nompocaje.

³⁸ Ocameetsati inquemisantanasojeitena yora noameetsantiri. Iro cantaincha irojocajerorica iquemisanti, eiro noveshireimentajaritsi".

³⁹ Te ancarajecteriji arori yora jocajeitirori iquemisanti: irijajeite iriori Sharincaveniqui. Aquemisantajeiti ainti, ajajeite ainti inquitequi.

11

Yantajeitiniri quemisantanasotatsiniri peerani.

¹ Piquemisantiri Tasorentsi piotasanotantacari irimatasanotempiro maaroni icantaquempiri. Ainirotatsi oshequi caariquera aneajeiti, iro cantaincha aquemisantajeiti, irootaque ayojeitantacari aneajeitajero coajicani maaroni icashiacaajeitaqueeri.

² Iquemisantini yora peeraniniri, irootaque inecameesatantariri Tasorentsi.

³ Aquemisantajiri arori, irootaque ayojeitantacari ineanataque Tasorentsi otimantacari quipatsi, inquite, aisati maaroni timantarori. Ineanataque otimantanacari: tecatsi irovet-sicantearori.

⁴ Iquemisantini Averini, irootaque inecameesatitantacariri Tasorentsi ipaqueriri; irintiquea Caini, te inquemisanteji, irootaque caari inecameesatantaro ipavetacariri iriori. Inecameesataqueri Tasorentsi Averini, irootaque inecameesatitantacariri ipaqueriri. Icaмаqueni iriori peerani, iro cantaincha ocameetsati anquempjeiteari: anquemisantajeite irineacameesajeitanteeri Tasorentsi.

⁵ Iquemisantini Enoco, caari icamanta. Aneatsi ini, yaanajiri Tasorentsi inquitequi. Tecatsi neajerine aisati: queario, yaasanotanjiri inquitequi. Tequerani irayerini, icantini: "Queario, noneacameesatasaotaqueri Enoco".

⁶ Eirorica aquemisantiri, eiro inecameesajeiteetsi. Intimerica coatsiri irareeteari Tasorentsi, ocameetsati inquemisantanasoteri, aisati iriotsanotanaque impinateri coasanotatsiri irioteri.

⁷ Aisati iquemisantini Noeni. Icantirini Tasorentsi: "Coajica ompoque antearo incani catsini, incajaretanaque maaroni. Pivetsiquero antearo pitotsi pavisacotantajeari". Ari iquemisantacari. Osarintsitasanovetani, iro cantaincha yantaque pitotsi, yavisacotantajari, aisati yavisacojeitantajari maaroni saviquimojeitiriri. Te inquemisantajeiteji itsipapee ishaninca, irootaque yoasanquejeitantariri Tasorentsi. Irintiquea Noeni yoameetsantiri: tempa iquemisantiri irinti.

⁸ Aisati iriorini Avaramani, iquemisantirini Tasorentsi. Icantirini iriori: "Nocoaque pijate pashiniqui quipatsi, anta arejiqui: aitaque pisavicapeeri. Nompempiro pashitasanoteari avirori; aisati nomperi pitomi, picharine, maaroni. Tsame pijate, noco nonijayempiro". Ari ijatanaque, iro cantaincha te irioteji jaocaria irijateri.

⁹ Yareetantacari, inepaaqueri pashini atiri savicajeitatsiri. Oquempvetaca caari iipatsite, te irisavicasanoteji, irointi iquenayetaque; iro cantaincha icantani iquemisantiri Tasorentsi. Aisati iquempjeitaca Isaca aisati Jacovo: te irisavicasanoteji, te irivetsicajeiteji cameetsari ivanco,

¹⁰ irointi iquenqueshirejeitiro pashini inampi, caari yovetsiqui atiri. Iojeitaque coajica irajeitanajeri Tasorentsi anta inampiqui iriori, yovetsicaqueri iriori.

¹¹ Oquemisantini Sarani: shiravaro oni, te intimeni otomi. Impoiji anteashipatanaque. Icantaquero Tasorentsi: "Coajica intime pitomi", irosati oquemisantantariri. Ocanti: "Eiro yamatavitanatsi Tasorentsi". Impoiji itimaque.

¹² Aisati yanteashipatasanotaqueni Avaramani, oshequitasanotaque irosarintsite. Te intimaveteaji catsini itomi, iro cantaincha impoji itimacaquero ijina otomi. Meeca icarajeiti ishanincani oshequi catsini, tecatsi ancantari ayojeiteri jaocarica icarajeitiri: iquempejeitacari impoquiropee, tecatsi ancantari ayojeiteri jaocarica icarajeitiri. Aisati iquempejeitacaro ovane impanequi anta otsapijaqui incajare, oshequi catsini.

¹³ Ari icamajeitacaro irioriji quemisantsiniri: isavicajeitvani Canaqui, iro cantaincha te irineasanojeiteroiji maaroni icantaqueriniri Tasorentsi. Iro cantaincha iojeitacae irineajero coajica. Icantajeitini: “Te nonampitasanotearoji quipatsica, te nosavicasanoteji aca”.

¹⁴ Irootaque ayojeitancari icoajeitacueni irareejeitea pashiniqui nampitsi irinampitasantantapaajejarori.

¹⁵ Incoajeitajeme impiajeitanajeme anta Ejipitoqui iponeantacari, ari irijajeiteme.

¹⁶ Iro cantaincha icoajeitacae irijajeite cameetsaiteeriqui nampitsi: ora timatsiri inquitequi. Irootaque yoveshirementantacariri Tasorentsi iriori: te impashiventacaimateariji, itomintasanojeitacari. Aisati yovetsicajeitini isavicajeitantari.

¹⁷ (-)

¹⁸ Peerani icantirini Tasorentsi Avaramani: “Meeca itimi pitomi papanirorite, pipajitiri Isaca. Iriotaque ashijeitarineri pincharinentayetajeari, maaroni. Tecatsi itsipa ashitearine”. (v 17) Ari yevancaritapaini Isaca, irosati ineantantari Tasorentsi Avarama, iriotanteari queariorica iquemisantsanotiri. Icantiri: “Poyenari pitomi papanirorite, pintayenari”. Ari iquemisantirini, icantiri: “Ari, nojate noyeri”.

¹⁹ Iquenqueshiretaca: “Icantana Tasorentsi: ‘Iriotaque ashijeitearine pincharinentayetajeari, maaroni’. Tequera intime itomi iriori, iro cantaincha icantaquena: ‘Poyeri’. Naamaaca ariorica noyeri, irointinaajeri”. Ijatanaque, irotaintsi iroyerime, iro cantaincha icantiri Tasorentsi: “Eiro poiritsi, irointi noneantimpi. Meeca niotaque pipincatsatasantaquena”. Ari oquempetimovetacari Avarama yoitinaajiniri itomi, yaneanaji aisati.

²⁰ Aisati iquemisantini Isacani, irootaque icantacoventantariri Jacovo aisati Esao. Icantiriri Tasorentsi: “Pintasoncacoventeri notomi apite”. Irootaque itasoncacoventantanariri oshequi.

²¹ Aisati iquempetani Jacovoni, iquemisantini. Irotaintsi incame, iro cantaincha ititacaro iotiquiro; yoivotashitacari Tasorentsi, icantiri: “Pintasoncacoventajeiteri itomipee Jose”.

²² Aisati iriorini Jose, iquemisantini. Peerani itimini Ejipitoqui, aisati maaroni ishaninca, iro cantaincha iotaque iraajeitanajeri joriopee anta ipatsitequi iriori. Irootaque icantantari ishaninca: “Irotaintsi noncama. Coajica, ariorica pijajeitanaje apatsitequi arori, paajeitanajeroyea notonquini, pintijapaajero”.

²³ Peerani icantajeivetarini yora ivincatsarite ejipitosati: “Noshaninca, pineaqueri yoshequajeitanaque joriopee: te oncameetsateji. Pijajeite piviincajeiteri maaroni itomipee, iroaquera timayetatsiri”. Ari yora iriri Moishishi iquemisantini, aisati iriniro: ipincatsajetirini Tasorentsi, irootaque icantantari: “Eiro apincatsatiritsi irinti ivincatsarite ejipitosati. Icameetsataque atomi, eiro ashinetiritsi iroviinquiteeri”. Ari imanapitsataqueri, caari yoantari.

²⁴ Ari impoji oneaqueri Moishishi irishinto pincatsari. Oquenqueshireti: “Eiro noiritsi, irointi nonquempetacantajeri notomi, intime novancoqui”. Impoji yantearitanaque. Iquemisantaqueri Tasorentsi, irootaque icantantari: “Te noncoyeji noshanincateari ejipitosati, naro jorio”.

²⁵ Iotaque iquemisantaajeiti joriopee, irootaque yoashinoncaajeitancari ejipitosati. Iquimoshirejeivetaca ejipitosati, iro cantaincha te oncameetsateji itimajeiti, irootaque caari icoanta Moishishi irishanincajeiteari.

²⁶ Te incoyeriji iirequite ejipitosati isaviquimovetacari, irinti icoasantaque iquemisantiri Quirishito, iquematsicatimentacari iriori. Iotaqueni coajica impinateri Tasorentsi.

²⁷ Iquemisantini, iotaque te inconijateji Tasorentsi, iro cantaincha iotaque quiso yoiri; irootaque caari itsaroacantari pincatsari, aisati ishiapitsajeitancari ejipitosati, yaajeitanaqueri maaroni ijiorioririnte.

²⁸ Aisati iquemisantiri Tasorentsi, yora cantiriri: “Meeca tsiteniri nontianqueri nonampire iroyeri itomipee tseencajeitanari, yora jivatatsiri itimi. Iro cantaincha ariorica poyeri ovisha, paisaiteero pivanco iriraja, iravisanteari yora oantatsiri, tecatsiquea incanteri pitomipee”. Ari iquemisantaqueri Moishishi, aisati iquemisantaajeitacari ijiorioririnte, caari icamajeitanta itomipee. Iro apajitantarori quitaiteeri: “Yavisantaniri”.

²⁹ Aisati iquemisantaajeitini maaroni joriopee. Ishiapitsajeitacari yora isorarotepee ejipitosati. Yoijajeivetancari, iravaajerime. Jero oticajeitacari joriopee antearoaji

incajare, tecatsi inquenajeitanaje. Iotaque Tasorentsi iquemisantajeitiri, irootaque iteen-careajatantarori incajare, oquipatsitanaque nianqui. Jentsipaite yavisajeitanaque intatiquero maaroni joriopee. Yoijajeivetapaacari ejipitosati, iro cantaincha yoipiajatajiro Tasorentsi incajare, aajeitaqueri soraropee.

³⁰ Aisati iquemisantajeitini joriopee anta Jericoqui. Itantacotasanojeitaca savicajeit-siri, iticajeitavaqueri joriopee. Iro cantaincha icantiri Tasorentsi: "Pishoncajeitanaquearo nampitsi, paniijeitanaque. Aparo quitaiteiri, aparo pishoncajearo; otsipa aisati, otsipa aisati, irosati 7 quitaiteiri". Ari omoncaratapaaca quitaiteiri 7, irosati otireantanaca tantotsi. Icamajeitanaque tseencantatsiri, savicajeitatsiri.

³¹ Otimi anta aparoni tsinane, pajitachaniri Arava. Peerani oshequi antayetirini shi-ramparipee caari ai. Oquemisantaji iroori, amitacotantariri itiancaneppee Josoe iramenero nampitsi. Te oncameji irointi anta Jericoqui, te onquempeteariji itsipapee tseencajeitan-tatsiri.

³² ¿Paita pashini nonquenquetsatacoteri? Oshequitanaque meeca nosanquenare, iro cantaincha itimi oshequi catsini itsipapee quemisantajeitiriri Tasorentsi: Quereo, Varaca, Santso, Jete, Iraviri, Samoiri, aisati itsipapee quenquetsatacantatsiniri. Eiro meeca notsoteirotsi yantayetiri maaroni.

³³ Iquemisantajeitirini Tasorentsi, itsoncajeitantavacariri oajeiterinemer. Iquemisanti itsipapee imatantarori cameetsa ipincatsariventajeitiri ishaninca, aisati imatantacanariri Tasorentsi icantaqueriri. Yojoquevetari manitimashiqui, iro cantaincha iquemisantini, irootaque caari yoantarini.

³⁴ Pashini yojoquevetari paamariqui, iro cantaincha te intayeaji. Impesheeterime itsipapee, iro cantaincha yoavisacotaarantaqueri Tasorentsi. Imantsiataarantaque, iro cantaincha yoavisacotaarantaqueri, ishintsitacaarantaqueri. Imatacaarantaqueri manat-achari. Yoimishiaarantaqueri manaterinemer quemisantatsiri.

³⁵ Oquemisanti tsinanepee, irootaque itinaantajari ojimeni, aisati otomipee. Yoashinoncaaranteetaqueri itsipapee quemisantatsiri, yoatsinaaranteetaqueri; icanti-ri: "Ariorica pojocajero piquemisanti, ari cameetsa noimpacajempi". Iro cantaincha icantiri: "Eiro nojoquirotsi noquemisanti. Coajica cameetsa irisavicacayena Tasorentsi".

³⁶ Ari ishiritomentaarantacari, ipasanataarantaqueri, tac, tac, tac; yoisotaarantaqueri carenatsaqui, yoiminquiaarantaqueri,

³⁷ ipichaarantaqueri mapi, pitse, pitse, pitse. Itotaqueri ichaquireaqueri, chaquire. Ipesaarantaqueri, peti. Itsipapee te inquitsaateaji cameetsa, irointi iquitsaataashitacari imeshina ovisha aisati imeshina chivo; ocoiteimotacari paitapeerica, iquisheetaqueri, yoashinonqueetaqueri.

³⁸ Iquenayetanaque caaraiteriqui aisati toncaariqui. Imanapitsayetacari quisaqueriri anta omoropeequi toncaari. Icameetsatasanojeitaqueni, iro cantaincha te iraacameet-saniroteariji yora tseencantatsiri.

³⁹ Ari iquemisantajeitaqueni, irootaque ineacameetsatantacariri Tasorentsi, irinti; iro cantaincha te irineasanojeiteroji maaroni icantajeivetacariri.

⁴⁰ Ocameetsatasanoataque icoacaajeitaqueeri Tasorentsi: te incoacaajeiteriji yora peeraniniri irijivajeitee irineajeitero, irointi icoaque amoncaratavacaajeitea aneajeitero maaroni.

12

Icantiri: "Pinquearioventeneri Tasorentsi icoacaimpiri, eiro pishemashireatsi".

¹ Ari oshequi iquemisantajeitaqueni maaroni yocapee noquenquetsatacojeitaqueri. Meeca oquempetaca yapatotashijeitaquee, yamenacojeitaquee iriojeitanteari paitarica antajeiteri arori. Noshiacantempiro: tempa yamejeita evancaripee ishiajeita iriotanteari janicarica anaacotantatsineri. Ariorica irishianaque, tecatsi inquijanaque, irointi yojo-canaquero iitsaare irishiasanotanteari. Aisati ocameetsati ajocajero caari cameetsatsi antajeivetari amatantearori maaroni icoacaajeiteeri Tasorentsi, anquearioventero.

² Ancanteani anquenqueshirejeiteri Jesoshi, yora oavisacojeitaqueeri peerani, aisati iriotaque aajeitanajeeneri coajica inquitequi. Oshequi iquematsicatimentajeitaquee coroshiqui peerani, oshequi yoashiventaajeitaqueri iriori. Iro cantaincha iotaque irisav-icacaajeitajeje cameetsa anta inquitequi, irootaque iquematsicatimentantaqueeri. Meeca isaviqui iriori anta iracosanoriqui Tasorentsi, icarajeitaqueri ipincatsariventajeitaquee.

³ Oshequi peerani iquisajeitaqueri tseencantatsiri, oshequi yoashinoncaajeitaqueri. Meeca ocameetsati pinquenqueshiretasanojeiteri, impoiji eiro poashiretatsi, eiro pishe-mashireatsi.

Yoasanquetaaqueri Tasorentsi quemisantatsiri antirori caari cameetsatsi.

⁴ Ari picantayevetari antirori caari cameetsajeitatsi: “Pojocajero pantayetiri”, iro cantaincha tequera inquishmentajeitempio. Tequera iroimentempio, tequera iroashinoncaimentempio.

⁵ ¿Pipeacotarompa itomintaquempi Tasorentsi? Pinquenqueshiretajero aisati oca isanquenatacaqueriri peeraniniri: “Notiomi, ariorica noasanquetayempi, eiro piquisanatsi, tempa narotaque pivincatsarite. Aisati ariorica noasanquetayempi, eiro pishemashireanatsi.

⁶ Ariorica irantero nonintane caari cameetsatatsi, noasanquetaapiniteri. Nocoaque nio-tacanteariri te oncameetsateji irampiitapinitero. Ariorica noasanquetayempi piotanteari notomintasanotaquempi”.

⁷ Ariorica iroasanquetaajeitempio Tasorentsi, eiro pishemashireatsi. Inintajetaquempi, itomintajetaquempi, irootaque yoasanquetantaquempiri. Tempa amejeitaro arori avasanquetaapinijeitiri atomipee.

⁸ Maarori shirampari yoasanquetaajetaqueri itomipee. Eirorica yoasanquetaimpitsi Tasorentsi, te aviro itomi, irishinto: te pishanincateariji.

⁹ Yoasanquetaajetaquee ashijeiteeri, iro cantaincha tempa apincatsajetaqueri. Tempa aisati ocameetsati ampincatsajeiteri Tasorentsi ashijeiteeri, ancantaitiyempani asavicanteari anta inquitequi.

¹⁰ Yora ashijeiteeri yoasanquetaajetaquee aisati yoamejeitaquee ayojeitantacari asavicajeiti cameetsa aca quipatsiqui: eiro osamanititsi, ari ancamaque. Aisati yora ashijeiteeri te iriojeiteji maaroni, irointi yaamaashiyeta iriori; ainiro iquisashitee. Irin-tiquea Tasorentsi, te iramaashiyeteaji irinti, cameetsa yoasanquetaajetaquee, cameetsa yoametasanojeitaquee. Impoiji ancaraajeiteri iriori ancantaitiyempani ancameetsa-tasanojeitapaaje.

¹¹ Ariorica yoasanquetayee, tempa avashirevetanaca, te anquimoshirevetanajeaji. Iro cantaincha impoiji aquenqueshiretanaja, ayotaque yoamejeitaquee anquimoshirejitanaque aisati ancameetsatanaque.

ICantiri: “Piveshireimentajeitari Tasorentsi”.

¹² Piquempejeivetaca pimaotsajetaque. Pintinaanaje, pishintsitanaje: queario iquishmentajetaquempiro piquemisantajeiti, iro cantaincha piveshireajetaanaquea.

¹³ Pinquearioventero icoacaimpiri Tasorentsi. Piveshireacaajeiteari piyemisantaririnte oashirejeivetachari inquemisantasanojeitanteari iriori.

¹⁴ Pincoasanojeite paacameetsajeiteri maaroni itsipapee atiri, eiro piquishirtsiti. Aisati pincoasanotaque pintime cameetsa: eirorica pitimi cameetsa, eiro pimatirotsi pinquemisantacaajeiteri itsipapee, eiro iojeitirtsiti Avincatsarite.

¹⁵ Pamitacotavacaajeitea, poametaavacaajeitea, iriojeitanteari maaroni ashanincapee ineshinoncajeitaqueri Tasorentsi. Piquisashireajeitiricari pishaninca, te oncameetsateji. Ariorica pinquisavacaajeitea, eiro pitimajeititsi cameetsa, aisati pojocajeitirocari piquemisanti.

¹⁶⁻¹⁷ Piojeitaque paita yantaquerini Esao. Iriotaque itomi Isaca; Esao iriotaque jivatatsiri itimi; irinti Jacovo, impoitatsiri. Ari yamejeitaca ashijeiteeri icantacoventasanotiri jivatatsiri itimi itomi, intasoncacoventanteariri Tasorentsi. Aisati icantiri: “Aviro poyeetajenaneri, ashiyetajearone timimoyetanari”. Aisati inquemperime iriori Isaca, incavintaasaanoterime Esao. Iro cantaincha pashini quitaiteri oshequi iquemaquero iriori itashe, impoiji ineaqueri irirenti otimi oshequi yoari. Icantiri: “Iye, pimpena noyeyari: aasanotaquena notashe”. Icantiri: “Ariorica icantacoventaquena nainti apa, aisati incantena nompoyeetajeyari, ari nompaquempiro poyeyari”. Icantiri: “Ari, aviroyempa. ¿Paita noncoanteari nainti incantacoventena coajica? Irotaintsi noncame meeca”. Ari ipaqueri yoari. Impoiniji iquenqueshireavetanaja Esao, oshequi irasaanovetanaca, icantavetari iriri: “Apa, nocoasanotaque pincanteri Tasorentsi nompoyetantajempiri”. Icantiri: “Eiro. Nocantacoventaqueri meeca pirenti. Impoiji meeca picantaquena”. Te incoyeyi Esao intasoncacoventerime Tasorentsi, irointi itseencaqueri. Eiro piquempejeitaritsi meeca avirori.

Cameetsa icavintaajeitaquee Tasorentsi meeca: eiro aquempetaritsi peeraniniri, yora tsaroacajeitacariniri.

¹⁸ Te pineajeiteroji ineajeitaqueri peeraniniri anta toncaariqui shinaiquiniri, itsaroejeitantacari. Icamantantacariniri Tasorentsi Moishishi maaroni icoacajeitaqueriri, ineaquero omapocanaca otaashitaca paamari, aisati otsitenitanaque quitaiteriqui, ineaquero antearo tampea.

¹⁹ Iquemajeitaquero ishaninca aisati antearojenca itioti aisati iquemajeitantacariri Tasorensi, itsarocaaajeitacari catsini, icantajeiti: “Eiro pineanajeitanatsi aisati, oshequi notsarocaaajeitaquempi. Nocamicari”.

²⁰ Icanti Tasorensi: “Te noncoyeji impoque aca toncaariqui atiri aisati ivira. Impoquera aca ivira, pimpichaaajeiteri, poyeri”. Ari itsarocaaajeitanaque maaroni atiri, catsini.

²¹ Aisati iriori Moishishi, itsarocaaajeitacaro maaroni ineajeitaqueri; icanti: “Oshequi notsarocaaajeitanaque, irootaque nopioncantanacari”.

²² Avintipee, te pijajeiteji Shinaiqui, irootaque caari pitsarocaaajeitanta. Irointi oquempetaca pijajeitaque anta pashiniqui toncaari, pajitachari Sio, ora timatsiri anta Jerosarequi: shiaquerori inampi Tasorensi. Pineaquero, oquempetaca pijatasanaotaque pashiniqui Jerosare, ora inquitequiniri: pareejeitacari Tasorensi, icavintsaasanojeitaquempi, irootaque caari pitsarocaaajeitanta. Ainiro anta oshequi catsini inampire, yapatotimentajeitacari, ipampoyeaventajeitaqueri, maaroni.

²³ Anta intime maaroni quemisantatsiri itomintajeitacari Tasorensi, maaroni savicasanotatsineri anta: ainiro osanquenataca meeca ivajiro, maaroni. Ainiro Tasorensi, yora cantacooventajeitaqueeri, maaroni. Ainiro aisati maaroni yora quemisantajeitatsiniri peerani; yoameetsajeitaqueri Tasorensi, cameetsa isavicajeiti meeca inquitequi.

²⁴ Aisati oquempetaca pareetaca Jesoshiqui, yora oamejeiteeri maaroni icantajeitaqueri Tasorensi. Peerani yoaqeri Caini irirenti Averi, irootaque yoasanquetaantacariri Tasorensi Caini. Yoyeetaqueri aisati Jesoshi, iro cantaincha icamimentajeitaquee irinti, icavintsaajeitantaqueeri Tasorensi.

²⁵ Pinquemisantajeiteriyea yora quenquetsatacaajeitimpiri, pipiatsataricari. Peerani ipiatsajeitacari ashanincani Moishishi. Ishaninca inaveta, iro cantaincha te inquemisanteriji, irootaque yoasanquetimentajeitantariri Tasorensi. Caari ini atiri coatsine inquequetatsacayempi meeca, irinti Tasorensi. Oshequi yanaacotantaque ipincatsariti. Eirorica piquemisantiritsi irinti, tempa iroasanquetasanojeitempi catsini.

²⁶ Peerani anta Shinaiqui iquenquetsatacantacariri Tasorensi Moishishi, inicaquero quipatsi. Iro cantaincha icantirini iriori: “Coajica apanivani nonicajero aisati quipatsi, iro cantaincha aisati nonicacoteri inquitesati maaroni”.

²⁷ Ari icantini: “Apanivani nonicajero aisati”. Aitaque intsonquero maaroni nica-jeitachaneri, maaroni caari quisotasanotatsi. Ontimaarantanaque irointi caari nicachane.

²⁸ Ari coajica asavicajeitantaajeiro anta pashiniqui quipatsi, ora caari tsoncanetachane: anta impincatsariventasanojeitee. Irootaque ocameetsatantari ampasonquitasanojeiteri, anquearioventeneri maaroni icoacaaqueeri; tsame ampincatsatasanojeiteri maaroni. Ocameetsati intsarocaaajeiteari maaroni caari pincatsatiri,

²⁹ tempa intsoncasanojeitaqueri maaroni tseecajeitiriri, impoyereajeitajeri, maaroni: poyere.

13

Icantiri: “Pintimajeite cameetsa”.

¹ Ari, pinintavacaasanojeitea: pinquempetacanteri itsipapee irio pirenti pinintasanotiri.

² Ariorica irareetempi caari pineapiniti, paacameetsatavaqueri. Ainiro aacameetsatavaqueriri caari ineapiniti, ijivetari ishaninca ini yora yaacameetsatiri: jaa, irinti inampirepee Tasorensi inajeiti.

³ Pincavintsaajeiteri maaroni ayemisanteririnte, yora yoiminqueeyetiri: pintimeme anta caravosoqui, tempa pincoaqueme cavintsaajempinemer avirori. Pincavintsaajeiteri maaroni yoashinonqueeyetiri: tempa pishanincajeitacari.

⁴ Ocameetsati aye ajina; ocameetsati iroori tsinane aye ojime. Ocameetsati irineero shirampari ijina; ocameetsati oneeri tsinane ojime. Iro cantaincha iroasanquetaajeiteri Tasorensi maaroni aimentarori ijina aisati maaroni aimentariri ojime. Aitaque iroasanquetaajeiteri maaroni antirori caari yai.

⁵ Eiro picoitsi poshequiyeri piirequte, irointi piveshireimentearo timimojeitimpiri. Tempa icanti Tasorensi: “Eiro noshinetimpitsi pashinoncayea, quiso noajeitempi”.

⁶ Irootaque ocameetsatantari ancantapinjete: “Niotaque intacotapiniquena Avincatsarite, eiro noquenqueshireatsi. Tecatsi incantena atiri iroashinoncayena”.

⁷ Pinquenqueshiretasanoteri jaoca icantari yora quemisantacaaajeitimpiri: yora oamejeitimpirori irineane Tasorensi. Pinquenqueshiretasanoteri maaroni imajeitaqueri, impoji pinquempejeiteari iriori, pinquemisantasanojeite.

⁸ Te impashinipinitijeji Jesoquirishito, irosati icanta: peerani, meeca, irosati coajica.

⁹Eiro piquemisantirotsi yoametantashiyetari atiripee. Tempa ocameetsati anquemisantero yoamejeiteeri Tasorentsi, yora neshinoncajeiteeri. Ainiro cantimentajeiteerori paitarica avajeiteameri, iro cantaincha yatsipetashitacaró: te oameetsajeiteriji iriroripee, aisati eiro oameetsajeiteesi arori.

¹⁰Ari icamimentajeitaquee Quirishito, avavisacojeitantajari; irintiquea yora cantiriri saserotepee: “Poyenari novira navisacotantajeari”, yatsipetashijeitacaró, eiro yavisacotajitsi.

¹¹Ari yora ivincatsaritepee saserote yoapinitiri virantsi aisati yaajatapinitiro iriraja anta ivancoqui Tasorentsi. Icantiri Tasorentsi: “Ainiro irantane noshaninca, irootaque noantiriri virantsi piotanteari icoaque pincavintsayeri. Jero oca iriraja”. Impoiji yaajetanaquero ivatsani virantsi anta arejiqui, itaaqueri.

¹²Aisati iquempetacantaqueri Jesoshi, yaajeitanaqueri arejiqui yoantacariri: te ari iroyeri nampitsiqui. Iro cantaincha icamaque yoameetsajeitantaqueeri.

¹³Ariorica irishirontimentee tseencantatsiri, ariorica iroashinoncaajeitee, iro cantaincha ocameetsati ancanteani anquemisanteri Jesoshi. Tempa ishirontimentajeitacarí irirori, yoashinoncaajeitaqueri.

¹⁴Caari oni anampisanori oca quipatsi, irointiquea acoajeitaque anampitasanotearo anta inquitequi.

¹⁵Ariorica aquemisantaqueri Jesoquirishito, ocameetsati ancamentapinijeiteri itsipapee: “Oshequi icameetsataque Tasorentsi, oshequi nopincatsatiri”.

¹⁶Pincanteani pantayetero cameetsayetatsiri aisati pincavintsaaajeiteri itsipapee: irootaque icoacaajeitaquempiri Tasorentsi.

¹⁷Pinquemisantajeiteri yora quenquetsatacaajeitimpirori irineane Tasorentsi, pimpincatsajeiteri. Ocameetsati iroamejeitempi irirori cameetsa, pincameetsashirejeitantajeari. Coajica irisampitavaqueri Tasorentsi: “¿Paita poametaqueriri yora piquemisantacaajeitaqueri? ¿Cameetsampa iquemisantaquempi?” Ari incamanteri. Tempa cameetsa iranqueri: “Je, cameetsa iquemisantajeitaquena”. Iro cantaincha eirorica piquemisantiri, incanteri: “Teve inquemisantenaji”, impoiji iroasanquetempi Tasorentsi.

¹⁸Te nioteji ainirorica nantane, naamaaca te aneroji; iro cantaincha nocoaque pincanteri Tasorentsi oncanteata eiro otimantatsi catsini.

¹⁹Aisati pincanteri oncanteataquea nareetitantajempiri aisati, aneavacantajeari.

²⁰Aisati noncateri iramitacojeitempi avirori. Niotaque inquemisantena Tasorentsi, tempa itasoncacoventajeitaquee: icoaque irisavicacaajeitee cameetsa. Peerani aisati yoitinaanjiri Avincatsarite Jesoquirishito: yora cantacoventajeitaqueeri, amenacoventajeitaqueeri. Yamenacoventajeitaquee, iquempetacari ashitariri irovishate, yamenajeitiri. Icamimentajeitaquee ayojeitancari queario icantaqueeri Tasorentsi: “Noavisacojeitempi, nosavicacayempi aca nonampiquica, pincantaitiyempani”.

²¹Nocantaqueri: “Poameetsatasanojeiteri noshaninca, pimatacayeri cameetsayetatsiri irantajeitantempirori maaroni picoacaajeitaqueriri: tempa iquemisantajeitaqueri Jesoquirishito”. Aisati nocantajeitimpi avirorije: “Pimpincatsatasanojeiteri Quirishito, pincantaitiyempani. Aitaque ancantajeiteari”.

Ivecarataquero isanquenare.

²²Noshaninca, te oshequiteji oca nosanquenajeitimpiri: pinquenqueshiretasanojeitero.

²³Piojeitaque yoiminqueetaqueri Timoteo caravosoqui, iro cantaincha isotoanaji meeca. Ariorica jentsipaite irareetea aca, nontsipatanajeari ara pinampiqui, noneajeitapaajempi.

²⁴Novetsajeitacarí maaroni quenquetsatacantatsiri aisati maaroni ayemisantaririnte. Ivetsajeitaquempi maaroni itariasati.

²⁵Nocoaque incavintsaaajeitempi Tasorentsi, maaroni. Aitaque incanteari. Ari ocarati.

ISANQUENATIRI SANTIACO

Yovetsajeitari Santiaco ijorioririnte.

¹ ¿Savicajeitatsimpi, nojorioririnte, maaroni? ¿TecatSIMPA oyempine? Meeca nosanque-najeitaquempiro, maaroni jayetanaintsiri pashinipeequi nampitsi. Narotaque Santiaco sanquenajeitaquempirori oca, narotaque antaveetiniriri Tasorentsi aisati Avincatsarite Jesoquirishito. Novetsajeitaquempi, maaroni.

Icantiri: “Ariorica ompomerentsitimojeitempi paitapeerica, iro cantaincha pinquemisantanojeite”.

² Meeca, noyemisanraririnte, noncamantempi: ariorica ompomerentsitimojeitempi paitapeerica, ocameetsati pinquimoshiretasanajeitanaque catsini.

³ Piotasanojeitero oca: ariorica ompomerentsitimotempi, paventeari Tasorentsi, ari iramitacotaquempi pinquemisantanojeitantajeari, pincanteani.

⁴ Cameetsa pincantaitiyempani pinquemisantanojeite, impoiji pincameetsashirejeitanaque, pivetsicashireasanojeitanaquea: pimajeitantearori maaroni icoacaajeitaquem-piri Tasorentsi.

⁵ Terica piotero icoacaimpiri Tasorentsi, pincanteri: “Piotacayena paitarica pincoacayenari”, ari irimataquero iriotacaasanotempi, eiro ishemimpitsi.

⁶ Iro cantaincha, ariorica pincanteri, cameetsa pinqueshiretasanotea: “Niotaque iquemaquena Tasorentsi, irimataquenaro oca nocoacotiriri”. Eiro pitseencajiritsi. Ainiro itsipapee quenquetsatacaavetariri Tasorentsi, iro cantaincha itseencanti. Timatsi icoacovetariri, iro cantaincha yaamaaca eiro iquemiritsi. Iquenqueshirevetaca: “Meeca iquemaquena Tasorentsi”, iro cantaincha impoiji iquenqueshiretaca: “Te inquemnaji Tasorentsi”. Ari iquempetacarora otavoncara anta incajarequi. Otatsincajataquero tampea, ojocajataquero, opiapinitantari.

⁷ Quearioya, piquempetaricari yora tseencantatsiri. Eiro pijititsi irayero iriori paitapeerica incoacovetariri Avincatsarite.

⁸ Yora tseencapinitatsiri, iperaventajeitacarora maaroni yantayevetari.

⁹ Ainiro oshequi ayemisanraririnte caari ashitaarantacha, iro cantaincha ocameetsati inquimoshiretasanotanaque: tempa inecameetsataqueri Tasorentsi iriori.

¹⁰⁻¹¹ Aisati ocameetsati yora ashitaarantachari iriveshirementajeitari Avincatsarite; eiroquea iveshirementarotsi yashiyetari, tempa eiro osamanititsi incamanteari, irijocayetanauero maaroni timimovetariri. Ocameetsati iriote iquempetacarora oteaqui tojari: oshintsiti ocampiniti. Ocameetsaitetamanaque, iro cantaincha impoiji ijenoquitapaaque catsirincaiteri, icatsirincatasanotapaaque. Oshimpeshitanaque tojari; oshimpetanaque oteaqui, aisati ojireanaque. Pineaquero, eiro osamanititsi incamanteari yora ashitaarantachari, irijocajeitanaquero maaroni timimovetariri.

¹² Ariorica pincoajeiveteari pantero caari cameetsatsi, iro cantaincha eiorica pantiro, pinquimoshiretasanotanaque, aisati impinatasanotempi Tasorentsi: irisavicacaasanotempi anta inampiqui iriori, pincantaitiyempani panee anta. Aitaque icantitarini: “Nosavicacaajeitari anta inquitequi maaroni nintasanajeitanari”.

¹³ Ariorica pinqueshiretate pantero caari cameetsatsi, eiro picantashitatsi: “Icoacaaquenaro Tasorentsi”. Pamene, te incoyeji Tasorentsi irantero irinti caari cameetsatsi, aisati te incoacayeriji itsipapee irantero.

¹⁴ Ariorica anqueshireterora antero caari cameetsatsi, impoiji ancoanaque antero.

¹⁵ Impoiji, ariorica ancoaque antero, antasanotaquero; ontimanteari antseenque, aisati ajatanteari Sharincaveniqui.

¹⁶ Eiro picomitarotsi, noyemisanraririnte nonintasanotiri.

¹⁷ Iriotaque Tasorentsi cavintsaajeiteeri, pasanojeiteeri maaroni cameetsasasanotatsiri. Iriotaque vetsiquiriri catsirincaiteri, cashiri, impoiqueropee, maaroni timayetatsiri. Te impashinitapiniteji Tasorentsi, irosati icantani icavintsaasanojeitaquee.

¹⁸ Icoaque Tasorentsi ashanincajeiteeri, irootaque itomintantaqueeri. Itimacaaqueero irineane, oametasanojeitaquee queariotasanoatsiri. Aquemisantauero, irootaque itomintantaqueeri. Ijivajeitaquee arori, iro cantaincha impoiji intomintajeiteeri oshequi itsipapee atiri aisati.

Jero oca icoacairiri Tasorentsi quemisantatsiri.

¹⁹ Piojeitavaquero oca, noyemisanraririnte nonintasanotiri: ocameetsati ajivate anquero icantaqueeri itsipa, eiro ashintsititsi aneanateri, eiro ashintsititsi anquishea.

²⁰ Ariorica anquishea, tecatsi ancantea anteneri Tasorentsi cameetsatsiri.

²¹ Irootaque nocantantimpiri: te pincameetsashirejeiteji. Te oncameetsateji catsini pantayetaqueri: pojocasanojeitajero maaroni oca. Pishiretearo cameetsa irineane Tasorentsi, oca piquemaqueri. Ariorica pinquemisantasanotero, ari oavisacotaquempi.

²² Pimatasanotero ocamantimpiri irineane: eiroquea piquemashitarotsi, oncanteataquea eiro pamatavintajatsi avisati. Te oncameetsateji pinquemashitearo, irointi pinquemisantasanotero.

²³ Yora quemashitarori, yora caari antasanotiro ocantaqueri, te iriotasanteji jaoca icanta: yatsipetacaro iguemavetaro, te inquenqueshiretajeiroji aisati. Ishiaqueri amenaavorovetachari amenaarontsiqui:

²⁴ yamenavoroveta ivoroqui, impoiiji ijatanaji, te inquenqueshiretajeaji aisati jaocarica ocantacari ivoro.

²⁵ Iro cantaincha yoavisacojeitaquee ainti, irootaque ocameetsatantari ancantaitatdiyempani anquenqueshiretapinitero irineane Tasorentsi itimacaaqueeneri: tempa ocameetsatanoti. Eiro aquemashitarotsi, irointiquea amayetero ocantayetiri, anquimoshirejeitantajeiri.

²⁶ Ariorica ajitashitaquea queario aquemisanti, iro cantaincha ariorica aquisatsatapiniriti itsipapee, amatavitaja arosati: tequera anquemisantasanoteji, irointi atsipetashitaca aquemisantamempeaca. Pineaquero, icoaque Apa Tasorentsi ayojeite eiro ashintsitsatiritsi ashanincapee.

²⁷ Icanti ariorica anquemisantasanotanaque, ancavintsayeri yora ashinoncaincari: yora jananequi camatsiri iriri, iriniro. Aisati ancavintsayero camajimentaaro, eiro antayetirotsi yantayetiri tseencantatsiri. Irootaque icoacaasanojeiteeri Tasorentsi.

2

Cameetsa anintavacaajeitea.

¹ Tempa, noyemisantaririnte, piquemisantajeitiri Avincatsarite Jesoquirishito. Icameetsatanoti irinti. Te incoacayempiji pincavintsaapinitashiteari apaniro yora ashitaaran-tachari, irinti caari ashitaaran-tacha pipincashireaqueri.

²⁻³ Anta papatotapinijeitanta: ariorica iqueapaaque quitsaatachari cameetsari iitsaare, yaniyotaro pinatasanotachari oro. Irio pineacameetsatavaqueri irinti, picantavaqueri: "Jero ca savicamentotsi cameetsari, pisavicapee". Ariorica iqueapaaque caari ashitaaran-tacha, quitsaatachari maatsaraantsi, pipincashireavaqueri, picantavaqueri irinti: "Ari ara pincatiapee. Tecatsi pisavicanteari".

⁴ Aparopee pineacameetsajeitiri, itsipapee pipincajeitaqueri. Te paacameetsatavacaajeitea: tempa pijiveta pinashijeita, irootaque pipincavacaantacari. Te oncameetsateji oca piquenqueshirejeitiri.

⁵ Pinquemisanta, noyemisantaririnte nonintasanotiri. Tempa icoyeaqueri Tasorentsi yora caari ashitaaran-tacha inquemisantasanotanteari iriori, irisavicanteari anta ipincatsaritinta. Icanti: "Nosavicacaajeiteeri aca nonampiqui maaroni nintajeitanari".

⁶ Irompa avinti, pipincashireaqueri yora caari ashitaaran-tacha. Tempa irio ashitaaran-tincari quisajeitaquempiri. Tempa irio oashinoncaapinijeitimpiri, coatsiri iroiminqueacantapinijeitempi caravosoqui.

⁷ Tempa iriojeitaque cantimatiriri Jesoshi. Ja, irinti, icameetsatanoti, iriotaque cavintsaajeitaquempiri.

⁸ Timatsi icantitacani Avincatsarite: "Oquempetaca avisati cavintsaajancha, aisati pinquempjeiteeri itsipapee, pincavintsaajeiteeri iriori, paacameetsajeiteeri". Ariorica pimataquero oca, ocameetsatanoti.

⁹ Iro cantaincha ariorica pipincashireaqueri ashinoncaincari, te paacameetsatavacaajeiteaji: te oncameetsateji oca. Tempa ocanti Sanquenarentsi: "Terica paacameetsatavacaajeitea, ainiro pantane".

¹⁰ Pimoncarataqueroricame maaroni ocantiri isanquenatiniri Moishishini, iro cantaincha otimirica aparo caari pimoncarati, ainiro pantane: oquempetaca tecatsi meeca pimoncaratea.

¹¹ Icanti: "Eiro paimentrotsi pijina. Eiro paimentaritsi pijime". Irisati cantatsiri: "Eiro poanti". Terica paimentearo pijina, terica paimenteari pijime, iro cantaincha ariorica poanti, ainiro pantane: te pimpincatsateroji icantayetiniri peerani Moishishini.

¹² Coajica, ariorica incantacoventempi Quirishito, tempa incavintsaasanotempi. Aisati pinquempjeiteeri maaroni pishaninca: pincavintsaasanojeiteeri itsipapee, cameetsa pineshinoncatsateri.

¹³ Eirorica pineshinoncatiritsi itsipapee, eiro ineshinoncatimpitsi avirori Quirishito. Ayojeiti ineshinoncatapinitaquee, irootaque eiro atsaroajeitantsi ariorica incantacoventajeitaquee.

Ariorica aquemisantasantaqueri Tasorentsi, anteneri icoacaaqueeri.

¹⁴ Pamene, noyemisantaririnte: icantashitarica ashaninca: “Noquemisanti”, iro cantaincha terica incavintsayeri itsipapee, ¿ocameetsatimpa? Te, te oncameetsateji. Tempa iquemisantashiveeta: ¿jaoca incanteari iravisacotantajeiri?

¹⁵ Ariorica piotaque ocoiteimotacari piyemisantaririnte iitsaare aisati iroyeari, pincavintsayeri.

¹⁶ Eiro picantashitaritsi: “Cameetsayea pijate. Cameetsa pinquitsaatea. Cameetsa pinquemaquea”. Eirorica pipavaqueritsi oca coiteimotacariri, ¿picavintsasaanotirimpita? Te.

¹⁷ Pineaquero, ariorica aquemisantashita, terica aneshinoncateri itsipapee, te oncameetsateji: atsipetashitacaro aquemisantamempeaca.

¹⁸ Intimerica cantempineri: “Piquemisantashiveeta avinti; irompa nainti, nantaveetiniri Tasorentsi icoacaquenari”. Queario irinti icantaqueri. Eirorica pantaveetiniri Tasorentsi, ¿jaoca oncanteari piotacantenari piquemisantasantotiri? Cameetsa nantaveetiniri nainti, piotanteari noquemisantasantotiri.

¹⁹ Pishirevetaro apaniro ini Tasorentsi, ari cameetsa. Aisati ishirenrojeivetaro iriori camaaripee, irootaque itsaroanriotantacari, ipioncanriotantacari; iro cantaincha eiro yavisacotajitsi.

²⁰ Tempa, noshaninca, ontime piotantari. Tempa pincoyeji piote. Eirorica antaveetiniri Tasorentsi icoacaaqueeri, atsipetashitacaro aquemisantamempeaca.

²¹ Pinquenqueshireteri yora ashanincani intacaroniri: yora Avaramani. Iroaquenerime Tasorentsi Isaca anta yoapinitinirinta virantsipee. Tempa irootaque icantantari Tasorentsi: “Noneacameetsataqueri Avarama”.

²² Pineaquero, te inquemisantashiveetaji, irointi yantaveetiniri Tasorentsi aisati paitapeerica icoacaqueriri. Yantaveetiniri, irootaque omoncaratantacari iquemisantasantaquee.

²³ Omoncarataca sanquenarentsi, cantatsiri: “Iquemisantiri Avarama Tasorentsi, irootaque icantantacari Tasorentsi: ‘Noneacameetsataqueri Avarama’”. Aisati icanteeti: “Irio Avarama inintane Tasorentsi”.

²⁴ Pineaquero. Ariorica apatiro onavetea inquemisantamempeempa atiri, tecatsi incantea Tasorentsi irineacameetsateri. Irompa ariorica inquemisantasantotiri aisati irantaveeteneri icoacairiri, ari irineacameetsataqueri.

²⁵ Aisati oquempetaca Arava: ora neavintsatapinivetariri pashinipee shirampari anta Jericoqui. Ocavintsajaiteitavaveri maaroni yora itiancanepee Josoe. Onijavaqueri pashini avotsi inquentanaqueari irishiapitsatantanaqueariri yora quisaqueriri. Oca antaqueeneri Tasorentsi, irootaque inecameetsatantacarori.

²⁶ Eirorica aneencajitsi, tempa camasantaquee anaque; aisati oquempetaca, eirorica antiniritsi Tasorentsi icoacaaveteeri, te anquemisantasantoteji.

3

Ariorica aneaveetashitea, antirocari caari cameetsatatsi.

¹ Pamene, noyemisantaririnte, noametanti narori. Coajica, ariorica incantacoventajeitee Tasorentsi, incantana: “Pamene, oshequi poamejeivetacari itsipapee: ¿paita caari pimatantaro avirori picantavetacariri iriori? Oncameetsateme pimatasantotrome avinti”. Tempa piotiro. Irootaque nocamantantimpirori oca: eiro picoashitatsi poametante. Icoasantaque Tasorentsi pimajeitero maaroni picantaqueri.

² Tempa aneanatantajeitaro caari cameetsatatsi. Intimericame caari neanantantaro caari cameetsatatsi, iriotaque cameetsasasantotatsiri catsini; iotaque yantapinitaquero cameetsatatsiri, paitapeerica yantayetiri.

³ Atimpatacotapinitiri cavayo ivantequi iquemisantanteeri. Orijaniqui onaveta atimpatacotantariri, iro cantaincha amatantacari aquenacairi anteari cavayo.

⁴ Pinquenqueshiretero aisati antearo pitotsi. Antearo onaveta, aaveaquero antearo tampea anaquero. Iro cantaincha oquenacanaquero oomarojaniqui, jaocarica inintiri yora comatirori.

⁵ Aisati oquempetaca anene: orijaniqui onaveta, iro cantaincha oshequi omayeti: irootaque avametantariri atiri, aisati aquisatsacantariri. Oquempetacaro amorecaque paamari, capichaji onavetaca, iro cantaincha omataquero otaaquero antearo ovaantsi.

⁶ Aisati aquempetacaro, ariorica capichaji ancante, iro cantaincha aquisacaajeitacari oshequi atiri, antacaajeitacari caari cameetsatatsi. Tempa iriotaque sharincavenisati

oamejeitaqueerori aneanatantaro caari cameetsatsi, irootaque oshequi aquisavacaajeitancacari.

⁷ Ari ayojeitaque avamejeitaqueri poshineripee, tsimeripee, maranque, shimapee, maaroni. Avamejeitaqueri, avirajeitari.

⁸ Iro cantaincha te intimeji oametachane irisati irimajerete eiro ineanatantaro caari cameetsatsi. Ashi airo aneanatantaro caari cameetsatsi. Oashinoncaajeitaquee piantatsiri, ari oamaaquee irerorica, iro cantaincha aisati oashinoncaajeitaquee caari cameetsatsi aneanatashiyetari, irootaque ijajeitancacari oshequi atiri Sharincaveniqui.

⁹ Acantapinitaque: "Icameetsasasanti yora Apa Avincatsarite". Iro cantaincha aisati acantimanirotiri atiri: tempa ishiavetari iriori Tasorentsi.

¹⁰ Otimi avante aparoni, iro cantaincha irootaque aneshinoncantantari ashaninca, aisati aquisatsantantari. Te oncameetsateji, noyemisantaririnte, anconoayetero aneshinoncatsateri aisati anquisatsateri.

¹¹ Noshiacantempiro: anta osoquijatiro omoronaja nija, ariorica opochajati, ariorica ocachojati. ¿Arimpa omataquero pochajari aisati cachojari, apite?

¹² ¿Arimpa omataquero naranca ontimantearo manco oitsoqui? ¿Arimpa omataquero ova ontimantearo oitsoqui iyera? Aisati eiro omatirotsi cachojari ompeajea pochajari. Aisati aquempejeitacaro: terica ancameetsashirete, eiro amatirotsi aneanatapinitero cameetsayetsisiri.

Iquenquetsacotiro iotantari.

¹³ ¿Piotimpa piquenqueshireta? ¿Timatsimpa piotantari? Ari cameetsa pintime: eiro pishemetitsi, irointi cameetsa pineshinoncatante, cameetsa aisati pinquenqueshiretaquea.

¹⁴ Ariorica pinquisashiretasanotaqueri itsipapee, aisati ariorica pincatsimashireaqueri, eiro pishemetitsi. Eiro pamatavitantsi: eiro pijitashitatsi picameetsati, eiro pijititsi pioti.

¹⁵ Ariorica pantanirroyetaquero oca caari cameetsayetsati, te irio oametempirone Tasorentsi, irinti atiri oametimpirori, aisati camaari. Te iro oametempirone Ishire Tasorentsi.

¹⁶ Pineaquero, ariorica pinquisashireavacaquea, ariorica pincatsimashireavacaquea, eiro pimatirotsi pisavicaajeite cameetsa, irointi pantapinjeteero caari cameetsatsi, maaroni.

¹⁷ Iro cantaincha ariorica irinintacaaquempiro Tasorentsi ontime piotanteari, pincameetsashiretanaque, eiro piquisatsi, pincavintsante, eiro pipiatsataritsi itsipapee, pashi poyero pineshinoncatante, poameetsasasanotero maaroni pantayeteri, eiro pitseen-cashireitsi itsipa, eiro pamatavitantsi.

¹⁸ Paitarica apanquitiri, ayero oitsoqui. Aisati oquempetaca, ariorica cameetsa incavintsanaqueri itsipapee, ari irineacameetsataquee Tasorentsi.

4

Iquenquetsacotiri caari coatsine incavintsante.

¹ ¿Paíta piquisavacantajeitacari? Tempa pineveyetaro vaaronitsi, irootaque piquisavacaajeitancacari.

² Picoajeivetacaro paitapeerica, iro cantaincha te payeroji. Poantaque. Pineveyetaro yashiyetari itsipapee, iro cantaincha te payeroji, irootaque piquisavacaajeitancacari. Iro caari paantaro picoayevetari, te pincantasanoteriji cameetsa Tasorentsi.

³ Picantavetari, iro cantaincha caari paasanotanta, te oncameetsateji ora picoasanovertacari: picoaveta pincavintsayeá avisati.

⁴ Pishiaquero aimentariri ojime: ocaqueri pashini shirampari, oquisakeri ojime. Ariorica pinintayetiro maaroni timayetsisiri quipatsiqui, piquisakeri Tasorentsi. Maaroni nintatsiri irishanincateari tseencantatsiri iquishiri Tasorentsi.

⁵ Jero oca ocantiri sanquenarentsi: "Itiancajeiteero Tasorentsi Ishire iriori, iro cantaincha meeca icavintsasanovertacaro: te incoyeji antseenquero". Te oncantashiteaji sanquenarentsi, te antsipetashiteaji osanquenataca.

⁶ Oshequi ineshinoncatasanojeitaquee Tasorentsi, irootaque ocantantacari sanquenarentsi oca: "Iroashinoncayeri Tasorentsi yora shemetatsiri, iro cantaincha ineshinoncajeitaqueri yora caari shemetatsine".

⁷ Irootaque nocantantimpiri: pishinetacotea, paitarica irinintacaaquempiri Tasorentsi. Irintiquea camaari, pimplateari, impoji ari irojanajempi.

⁸ Pinquenqueshireteri Tasorentsi, quiso iroantempiri irinti. Pantapiniveitaroni caari cameetsatsi: meeca pojocajero maaroni oca pintimantajeari cameetsa. Oshequi pitseenquirini Tasorentsi; pincanteri meeca: “Poameetsashiretajena, pinquenqueshiretacyenaro cameetsatsiri”.

⁹ Pinquenqueshiretajea, poashiretea; te oncameetsateji maaroni pantapinitiri. Pishirontimentavetacaro caari cameetsatsi: oncameetsateme poashiretanaqueame; piquimoshireventavetacaro: oncameetsateme poashiretasanotanaqueame, irointi.

¹⁰ Pincanteri Avincatsarite: “Te noncameetsateji, te nomatimateroji cameetsayetatsiri. Nocoaque pincavintsayena”. Ari incavintsaquempi, iroameetsatajempi, iramitacotempi.

¹¹ Eiro, noyemisantaririnte, picantimatavacaajatsi. Ariorica pincantimateri pishaninca, aisati ariorica pincante ainiro irantane, pitseencaquero isanquenareni Moishishi. Tempa ocanti: “Pintavacaajeitea”. Iro cantaincha picanti avinti: “Te oncameetsateji ocantiri isanquenareni Moishishi. Te noncoyeji nonintavacaajeitea”. Ariorica pincante: “Te oncameetsateji isanquenareni”, te pinquemisanteroji, irointi pitseencaquero.

¹² Pamene, apaniro icantacantanti irinti Tasorentsi, aisati apaniro icantacoventajeitaquee maaroni. Oshequi ipincatsariti. Irio matirori yoavisacojeitiri quemisantariri aisati intianqueri tseenquiriri Sharincaveniqui. Aviroquea, avinti, *zjanicampa cantanerotimpiri*: “Pincantimateri pishaninca”?

Isanquenatacotiri yora iomparitachari aisati ashitaarantincari.

¹³ Pamene, picantayeveta: “Meeca nojate nampitsiquinta: terica meeca, ari osaitequera nojatanote. Anta noavisaita aparoni osarintsi: niomparitea, oshequi naye paitapeerica”.

¹⁴ Iro cantaincha te piotacoteaji osaitequera, paitarica oyempineri. Aneavetsimpi meeca, iro cantaincha piquempetacaro mencorijenca. Te osamaniteji omencorietete, impoiji jentsipaita opeanaja. Aisati avirori, eiro osamanititsi irosati pincamanteari.

¹⁵ Irointiquea pincante: “Ariorica irinintacaaquena Avincatsarite, eirositarica nocamitsi, ari nomataquero coajica paitapeerica”.

¹⁶ Pamene meeca, oshequi pishemeti, pineacameetsatashitaja avisati: te oncameetsateji.

¹⁷ Ariorica pivotetaro cameetsatsiri, iro cantaincha te pimateroji, ainiro pantane.

5

Jero oca icamantiriri yora ashitaarantincari.

¹ Meeca, ashitaarantincari, noncamantempi: piraajeitea coajica, pincavintsaajeitea, irotaintsi oshequi pinquematsicajeitearo.

² Ompatsaayetanaque maaroni pashijeivetari. Intsonquitajetempiro sancori piit-saarepee.

³ Oyechariyetanaque maaroni ashroyetatsiri pashiyevetari: oro, perata, maaroni. Ariorica oyechariyetanaque, irioyeetempi pipiotashitacaro, iro cantaincha te pimpinateriji yora patiritepee. Ontsoncaquea ashroyetatsiri, aisati avirori, pijate Sharincaveniqui, eiro pineajirotsi aisati pashijeiveitaniri.

⁴ Pamene, pamatavijeitaqueri maaroni patirite, te pimpinatanoteriji, irootaque pipi-otantarori pivaararo oshequi. Iquisatsajeitaquempi patiritepee. Iotaquero Avincatsarite: tempa ipincatsariventajetiri maaroni timajeitatsiri. Ioti te pincavintsanteji, irootaque iroasanquetantempiri.

⁵ Avisati quenqueshirecotajanacha, te pinquenqueshireteriji itsipapee iriori, piveshirementaro pashiyetari. Noshiacantempiro: ariorica inquejitaque pivira, ari pincantajeitiri pishaninca: “Tsame ayeri novira; quejitaque, moncarataca avanteariri”. Aisati iquem-petaca Tasorentsi, icanti: “Oshequi timimojeitiriri, moncarataca noasanquetanteariri”.

⁶ Poashinoncaasantaqueri cameetsayetatsiri: te pimpashitimateariji coiteimojeitacariri, irootaque icamantacari, torein; iro cantaincha te inquisavetempiji. Irintiquea meeca quishempineri Tasorentsi.

Paamayempari Avincatsarite.

⁷ Noyemisantaririnte, paamayempari Avincatsarite, irosati impocantajeari. Pinquenqueshireteri yora panquiveetatsiri, yoyeaquero ivanquire oitsoquitantajeari. Oparii incani, yoyeaquero. Osamani aisati, ari opariaji aisati. Coajica, ariorica ontimanaje oitsoqui, oshequi ontimanaque ovinaro, impoiji iroveshirementearo panquitirori.

⁸ Aisati avirori, pincanteani paamaajeari Avincatsarite, eiro osamanititsi impocantajeari: piveshirementeari.

⁹ Eiro, noyemisantaririnte, picantimatavacaajeitatsi. Ariorica pincatimatavacayea, icantimpicari: “Ainiro pantane”. Quempejitapaaque meeca yora Cantacoventajeitaquee-eri, irotajantsi impocaje.

¹⁰ Pinquenqueshireteri yora camantantatsiniri peerani. Itiancaqueri Avincatsarite, irootaque iquenquetsacotantariniri. Peerani ipomerentsiventinirini, peerani yaamacarini iriori Avincatsarite impocanteari. Meeca, aisati pishiajeiteri avirori.

¹¹ Pamene, ariorica pinquearioventeneri Avincatsarite paitapeerica, pinquimoshiretanaque. Ontimerica pinquematsacotamenteariri, iro cantaincha pinquimoshireventeri. Piquemacojeitaqueri Joponi, iquearioventiniri Avincatsarite maaroni yantayetiniri. Impoiiji icavintsaqueri, aisati ineshinoncataqueri. Piojeiti yashi yoiro icavintsanti, ineshinoncatanti.

Eiro picantashitatsi.

¹² Pamene, noyemisantaririnte. Paitapeerica pinquenquetsacoteri, ariorica pintseeeya, eiro catsini picantashitatsi: “Toti Tasorentsi otampaticati nocantiri, terica ontampaticateji oca nocantiri, nocoaque iroasanquetayenata”. Pincantera: “Ario, nantempero”, ario pimamatero. Pincantera “Eiro nantirotsi”, eiro pantirotsi. Eiro catsini pamatavitanti: ariorica pamatavitante, iroasanquetaaquempi Tasorentsi.

Pinquenquetsacacayeri Tasorentsi.

¹³ ¿Picarajeitirimpa ashinoncaincari? Cameetsa pincantera Tasorentsi incavintsayeri, iroavisacoteri. ¿Picarajeitirimpa quimoshiretatsiri? Pincantera impampayeaventeri Tasorentsi.

¹⁴ ¿Picarajeitirimpa mantiari? Pincantera incajemerita yora jivatacaajeitiriri quemisantatsiri. Cameetsa incantera Avincatsarite iroavisacoteri, aisati intiritapeeri quejiitsi.

¹⁵ Ariorica inquemisantasanote, ari iravisacotaje yora mantiari. Irio Avincatsarite oavisacotajerine. Otimirica caari cameetsatsi yantayetiri, aisati incavintsayeri, eiro iquenqueshiretajirotsi aisati.

¹⁶ Irootaque noncantantempiri: ariorica pantero caari cameetsatsi, pincamantava-caajea aisati pincantajeiteri Tasorentsi: “Pincavintsaajeitena, navisacojeitantajeari”. Yora shirampari yoameetsantiri Tasorentsi, ariorica icantiri, oshequi imatasanotaqueneri.

¹⁷ Atiri inaveitani peerani Iriashini, iquempetaquee arori. Icantasanotiri Tasorentsi: “Eiro poariajirotsi meeca incani. Pinquenqueshiretacayeri noshaninca”. Ari avisanaque mava osarintsi, te ompariajeji incani quipatsiqui.

¹⁸ Icantajiri aisati: “Meeca nocoaque poariajero aisati incani”, impoiiji opariaji, aisati oshiocanaji ivanquirepee joriopee.

¹⁹ Pamene, noyemisantaririnte: ariorica pincarajeiteri jocavetajearoneri oca queario-tasanotatsiri iquemisantavetari, pinquenqueshiretaajeri, pinquemisantacaasanotajeri.

²⁰ Piojeitero oca: yantavetacaro caari cameetsatsi, iquenashiveetaca, irijateme Shar-incaveniqui, iro cantaincha poavisacotajeri eiro ijatantatsi. Otimimotasanovetajeri yantayetiri oshequi, iro cantaincha inquemisantajerica aisati, incavintsayeri Tasorentsi, eiro iquenqueshiretajirotsi aisati yantavetacari.

Narotaque sanquenatimpirori: *Santiago*

IJIVATAQUE PETERO ISANQUENATINIRI IYEMISANTARIRINTE

Ivetsajeitari.

¹ ¿Ainirompi noyemisantaririnte? ¿Tecatsimpa oyempine? Narotaque Petero sanquena-jeitimpirori oca. Narotaque itiancane Jesoquirishito noquenquetsati. Nosanquena-jeitimpirori maaroni nojorioririnte, quemisantajeitiriri Quirishito, jaocapeerica pisavica-jeitiriri anta Pontoqui, Carashiaqui, Caparoshiaqui, Ashiaqui, Vitiniaqui, maaroni.

² Peerani icoyeajeitaquempi Apa Tasorentsi, icoaque intomintajeitajempi. Aisati oameetsashirejeitaquempi Ishire piquemisantantacariri Jesoquirishito: icamimenta-jeitaquempi, aparajatimentajeitaquempi iriraja yoavisacotantaquempiri. Nocoaque iri-neshinoncatasanojeitempi, aisati cameetsa irisavicacaasanojeitempi.

Tsame ampansquijeiteri Tasorentsi, tempa icavintsasanojeitaquee.

³ Tsame ancamentajeiteri ashanincapee: “Icameetsasananotaque Tasorentsi: yora Iriri Avincatsarite Jesoquirishito”. Icavintsasanojeitaquee, yashijeitaquee: oquempevetaca iroaquera atimaji aisati, irootaque ashanincatantacariri. Yoitinaajiri itomi, irootaque ay-ojeitantacariri antinaajeitanaje arori, ancantaitiyempani aneajeitapaaje anta inquitequi.

⁴ Ainiro yovetsicajeitaquempiri pisavicajeitantapaajeari anta inquitequi. Oncantaitiyempani ontime, ocameetsasananotaque, eiro otsoncatsi, ainiro iquempoyeaquempiro.

⁵ Piquemisantajeitaqueri Tasorentsi, irootaque itasoncacoventantaquempiri; iquempoyeajeitaquempi irosati impocantajeari. Impoijini pineajeitero maaroni yovetsicajeitaquempiri.

⁶ Queario, ariorica ompomerentsitimojeitempi paitapeerica, iro cantaincha eiro osamanititsi irosati pineanteorori pinampi anta inquitequi. Ariorica pinquenqueshiretero oca, tempa ocameetsati pinquimoshireimentearo.

⁷ Ari yora vetsiquirori oro icotaquero, ojananaca, impoiji yojocajiro ovitsijare quipatsi. Impoiji ineantacarori paamariqui, iriotanteorori iotasannotacarica oro. Aisati iriori Tasorentsi ineantapinijeitaquempi iriotanteori piquemisantasanaquerica. Ora oro, oshequi opinavetaca, iro cantaincha ompeaquea; irompa ainti aquemisantaque, eiro apeatsi. Irootaque ineacameetsasananotaqueeri, ariorica aquemisantasanaotaque. Impoiji, ariorica impoque, incantajeitapaaque: “Noneacameetsajeitaquempi: pincarajeitena anta inquitequi, pintsipajeitena ampincatsarijeite”.

⁸ Tequera pineajeiteri, iro cantaincha pinintajeitaqueri, piquemisantajeitaqueri, piveshireimentasannotacariri catsini.

⁹ Piquemisantajeitaqueri, irootaque yoavisacotantaquempiri, pishanincajeitantacariri.

¹⁰ Peerani yora camantacoveitariniriri Tasorentsi icoajeiveitani irioteme jaoca ancanteori avavisacojeitantajeari. Isanquenatacovetacariri Tasorentsi, iojeivetani icavintsanti, iro cantaincha te iriotasanteji.

¹¹ Timatsi oamejeitaqueriri Ishire Quirishito, iro cantaincha te inquemasantajeitavaque-rojiri. Oametaquerini, ocanti: “Oshequi iroashinoncayea, incamaque; impoijini impincatsaritanaje”. Iquenqueshirejeitacani: “¿Janicampa oquenquetsatacotiri? ¿Jaoca oncarate impincatsaritantajeari?”

¹² Iro cantaincha icamantaquerini Tasorentsi: “Eiro pineiritsi avirori, irintiquea neajerine impoitanaajantsineri intimaje coajicani”. Tempa arojeitaque meeca iquenquetsatacotiniriri. Meeca otiancaquena Ishire Tasorentsi noquenquetsatacaajeitaquempi, nocamantajeitaquempi yoavisacotanti Quirishito. Aitaque icoasanojeiveta inampirepee Tasorentsi iriotasanotero jaoca acantajari avavisacotantajari.

Oshequi icavintsaajeitaquee Tasorentsi, tsame aveshireimenteari.

¹³ Meeca pinquenqueshirejeitanaquea, cameetsa pisavicajeite. Piojeite ariorica impocaje Jesoquirishito aneajeitavaqueri, aisati oshequi incavintsaajeitapaaque; ari piveshireimentajeiteri.

¹⁴ Tempa irio Tasorentsi ashijeitimpiri. Ari pinquemisantajeiteri. Peerani te piojeiveitearini, irootaque pantashitantaveitaroniriri caari cameetsatsi. Meecaquea piojeitiri: eiro piquempetajatsi aisati.

¹⁵ Icameetsasananotaque yora coyeajeitaquempiri yoavisacotajimpi: meeca pinquempejiteari iriori, poameetsasantasanojetero maaroni pantayeteri.

¹⁶ Tempa peerani isanquenayeetironi oca icantitacaniri Tasorensi: “Nocameetsasatanogue narori, irootaque nocoantacari pincameetsasatanotana je avirori”.

¹⁷ Ari meeca pirintajetacari: ocameetsati piojeite iojeitaquempi maaroni, itsoteajeitaquempi. Ari incantacoventempi, inquenqueshirejeitero jaoca ocantari maaroni pantajetiri. Ocameetsatirica, ari iraacameetsatempi. Terica oncameetsateji pantayetiri, iroasanquetayempi. Pimpincatsajeiteri meeca, cameetsa pisavicajeite irosati parejeitan-teari inquitequi.

¹⁸ Peerani patsipetashiveitaroni pantashiveitaroni yamejeitaniri ajorioririnteni, iro cantaincha yoavisacojeitaquempi Tasorensi. Te impinaventempiroji perata aisati oro yoavisacotantimpiri. Te oncanteji, coajica ari ontsoncajea iroori.

¹⁹ Irintiquea itiancaqueri itomi, yora inintasanotiri catsini. Icamimentaquempi irinti, aparajatimentaquempi iriraja pavisacojeitantajari. Ariorica yantiro ajorioririnte caari cameetsatatsi, yamejeitari yoiniri Tasorensi ovisha, itaaqueneri. Apatiro yoiniri cameetsasananotatsiri ovisha. Aisati iquempetaca iriori Quirishito, icameetsasananotaque: tecatsi irantane.

²⁰ Peerani, tequerani ontimeni quipatsi, icantini Tasorensi: “Coajica nontianqueri notomi quipatsiqui iroavisacojeiteri atiripee”.

²¹ Ari ipocaque, icamimentajeitaquempi, impoji yoitinaajiri Tasorensi, yaanajiri aisati anta ocameetsaitetinta. Meeca piojeitaque queario icavintsaasanojeitaquempi, ari cameetsa pinguemisantajeiteri, piojeite iriotaque savicacaajeitempineri anta inquitequi.

²² Ari piquemisantaquero maaroni yoamejeitaquempiri Tasorensi, tempa otampaticatasanotaque maaroni icantaqueri. Meeca yoameetsashirejeitaquempi, aisati icoacajeitaquempi pinintasanajeiteri maaroni piyemisantaririnte. Pinguentarioventero, pinintavacaasanojeitea catsini.

²³ Peerani otimimpi piniro, meeca piquempejeitacari ashijeitimpiri, pincamajeite avirori. Iro cantaincha meeca piquemisantaquero irineane Tasorensi, ocantani otimi. Aisati yashijeitajimpi, piquempejeitajari iriori: pincantaitatiyempani pintime inquitequi.

²⁴ Tempa ocanti Sanquenarentsi: “Ashiaquero tojari: oshintsiti ocami, oshintsiti opatsai. Timatsi amajeivetacari, iro cantaincha oquempetaca oteapee tojari: ompeajea, ontsoncajea.

²⁵ Iro cantaincha oncanteani ontime irineane Avincatsarite: eiro opeatsi irointi”. Irootaque irineane noamejeitaquempiri: icavintsaajeitaquene Tasorensi, yoavisacojeitaquene. Tempa ocameetsataque.

2

¹ Meeca eiro piquisatsi, eiro pamatavitanti, eiro pishemeti, eiro paamaari pishaninca, eiro picantimatiritsi.

² Yora iroaquera timatsi yatsotapinitiro otsomi iriniro, irootaque iqueveantacari. Aisati meeca avirori, pincoasanotero irineane Avincatsarite: pineanatapinitero, pinquenqueshiretapinitero, piotasanotanteariri iriori.

³ Tempa piojeitaque icavintsaasanojeitaquempi, ineshinoncajeitaquempi.

⁴ Ariorica avetsiquero mapipanco, ajivatero avatiyero quisotacayerone mapi avanquetantearori oshanincapee. Eirorica otimi, eiro oquisotitsi pancotsi. Iriotaque Quirishito shiaquerori mapi, iro cantaincha yaneasanoti irinti, aisati yoaneajeitaquene arori. Itseencajeivetacari ashanincapee, iro cantaincha inecameetsasananotaqueri Tasorensi irinti. Eirome itimime, eiro avavisacotajame.

⁵ Avirojei, piquempejeitacaro mapipee yoanqueyeetaqueri jenioquiji. Yoaneajeitaquempi avirori, pincantaitatiyempani anta inquitequi. Piquempejeivetacaro pancotsi, isavcantari Tasorensi; pantajeiteneri maaroni icoacajeitaquempiri. Piquemisantajeitaqueri Jesoquirishito, irootaque inecameetsasantarori maaroni pantajeitiniriri.

⁶ Irootaque ocantiniri Sanquenarentsi: “Icanti Tasorensi: ‘Nontianqueneri joriopee Quirishito, oshequi noneacameetsataqueri. Nocoyeaqueri iroavisacojeiteri maaroni quemisantajeiterineri, eiro yashinoncaajatsi iriori’ ”.

⁷ Avirojeitaque quemisantajeitiriri, tempa pineacameetsajeitaqueri. Irintiquea maaroni tseencajeitiriri, te irineacameetsateri. Oquenquetsatocotaquerini Sanquenarentsi, ocanti: “Yora vetsiqueronemeri pancotsi itseencaquero mapi, icanti: ‘Te oncameetsateji’. Iro cantaincha inecameetsasananotaquero Tasorensi.” Pineaquero, itseencajeitaqueri jorio Quirishito, iro cantaincha inecameetsasananotaqueri Tasorensi.

⁸ Aisati ocanti Sanquenarentsi: “Yora Quirishito ishiaquero mapi itsitincacari atiri ipariantacari. Queario, te iriojeitavaqueri, icomijeitavacari”. Pineaquero, jero oca ishiantaqueri: iro caari iojeitanti, te inquemisanteroji icantavetacariri Tasorensi, irootaque iroasanquetajaaitanteariri.

⁹ Iro cantaincha icoyeasanojeitaquempi yoavisacojeitantaquempiri. Pantaveejetitniri yora Pincatsarisanori. Yoameetsajeitaquempi, pishanincatasanojeitacari Tasorentsi. Te piojeiveiteani, oquempetaca pitimini meeca tsiteniriqui; iro cantaincha icoyeajeitaquempi, iotacaasanojeitaquempi, oquempetaca pitimi meeca quitaiteriqui. Meeca icoacaquempi pincamantajeiteri atiri: “Ocameetsatasanotaque yantajeitaqueeneri Tasorentsi”.

¹⁰ Peerani te pincameetsaveiteani, iro cantaincha meeca pishanincajeitacari Tasorentsi. Peerani te piojeiveiteani icavintsaavetaquempi, meeca piojeiti, piveshirementajeitacari.

Cameetsa pisaviquimojeiteri itsipapee atiri.

¹¹ Noshaninca, piojeitaque nonintajeitaquempi. Te pishanincatasanojeiteariji yora pisaviquimojeitiri, tempa pinampitanotareo inquite. Eiro pantashiyetarotsi caari cameetsayetatsi yantayetiri itsipapee atiri iriori. Ariorica pantashiyetearo, eiro picameetsashiretitsi.

¹² Icantashijeiveta itsipapee atiri: “Te incameetsajeiteji joriopee”, iro cantaincha cameetsa pisavicaajeite, iriojeitanteari queario piquemisantajeitaqueri Tasorentsi. Impoiji inquemisante iriori, aisati ariorica impocapaaje Quirishito, incantajeite: “Tempa icameetsaque Tasorentsi”.

Pinquemisantajeiteri pincatsariventajeitiriri pishaninca.

¹³ Ariorica piquemisantaqueri Avincatsarite, ocameetsati pinquemisantajeiteri aisati iriori pincatsariventajeitimpiri aca quipatsiqui. Pinquemisantajeiteri yora pincatsariventajeitiriri maaroni savicajeitatsiri,

¹⁴ aisati pinquemisantajeiteri maaroni itiancaneppee. Itianquiri iroasanquejeiteri caari cameetsatsi irisavicaajeite. Irintiquea cameetsatsiri isaviqui irineacameetsateri.

¹⁵ Ainiro caari iotiri Tasorentsi, icantimatiri quemisantatsiri. Irootaque icoantacari Tasorentsi pisavicaajeite cameetsa inquenqueshirejiteanteari, irimajerejiteanteari.

¹⁶ Ari piquemisantajeitaqueri Tasorentsi, meeca te incoyeji imperanajeitempi iriori pinquemisantajeiteri pincatsariventajeitimpiri aca quipatsiqui, tempa ocameetsati piotashitea pimpincatsajeiteri. Te oncameetsateji pantajeitero caari cameetsatsi.

¹⁷ Paacameetsajeiteri itsipapee atiri, pinintajeiteri ayemisantaririnte, pimpincatsajeiteri Tasorentsi, aisati pimpincatsajeiteri yora pincatsariventajeitiriri pishaninca.

Yoamejeitiri nampirentsipee.

¹⁸ Nampirentsi, pinquemisantajeiteri yora nampitimpiri, pimpincatsajeiteri. Eiro apaniro pipincatsatiri cavintsaquempiri, neshinoncatimpiri; irinti pimpincatsateri aisati peranatimpiri, quishimpiri.

¹⁹ Pamene, ariorica iquisashitaquempi nampitimpiri, tempa iotaquero Tasorentsi; aisati ariorica yoashinoncashitaquempi, iotaquero aisati. Eiro pipiatsataritsi nampitimpiri. Ariorica piquemisantiri Tasorentsi, tempa ari incavintsaasanojeitempi coajica.

²⁰ Pamene, ariorica pamataviteri nampitimpiri, ariorica impasatimtempiro. Eirorica pipiatsavetari, iro cantaincha ¿ocameetsatimpa pamatavitaqueri? Eiro ineacameetsatimpitsi Tasorentsi. Iro cantaincha ariorica impasatashitempi yora nampitimpiri aisati te pimpiatsateari, ari irineacameetsatempiri Tasorentsi.

²¹ Irootaque icoacaquempiri: eiro pipiatsataritsi yora quisashitimpiri. Pinquenqueshireteri iriori Quirishito: oshequi ineacatsitimentaquempi, icoaque pinquempeteari.

²² Tecatsi irante irinti caari cameetsatsi, aisati te iramatavitanteji.

²³ Te impiatsateariji yora quisatsajeitaqueriri, aisati te inquisatsateriji yora oashinoncaajeitiriri. Irointiquea iquenqueshiretaqueri iriri, yaventacari, iotaque ari irintacoteari iriori.

²⁴ Icamimentajeitaquee anta coroshiqui, eiroquea iquenqueshiretantajarotsi aisati Tasorentsi caari cameetsatsi antajeitiri. Meecaquee meeca, eiro antapinitajirotsi aisati caari cameetsatsi, irointi antapinite cameetsatsiri. Oshequi ineacatsitimenta-jeitaquee, eiro ashinoncantatsi arori.

²⁵ Piojeitaque yora ovisha te aneroji jotantari: oshequi iquenashiyeta. Eirorica itimitsi shenterine impearrantaquea. Aitaque piquempjeiveitarini ovisha, te piojeiveiteani. Iro cantaincha timatsi meeca Shentajeitimpiri, iquempoyeasanojeitaquempi.

3

Yora shirampari aisati ijina, ocameetsati iracameetsatavacayea.

¹⁻² Tsinane, pimpincatsateri pijime. Terica inquemisante meeca, iro cantaincha ocameetsati irineaquempi piquemisantasantaque aisati cameetsa pisaviqui. Impoijiquea irineacameetsatempiri, aisati arioricampa pimateri pinquemisantacayeri.

³ Eiro apatiro pincoashitea poameetsantero piishi, poaneenquea, pinquitsaatea, paitapeerica.

⁴ Irointiquea pincoasanote pincameetsashiretanaque, pineshinoncatsateri pijime. Irootaque icoacaasanotaquempiri Tasorentsi.

⁵ Aitaque oquempjeitaniri peeraniniri quemisantiriri Tasorentsi: cameetsa osaviquini, opincatsatirini ojime.

⁶ Ora Sarani oquemisantirini Avaramani, oshequi opincatsatarini. Ariorica pintime cameetsa, pinquempetearo, impoiji eiro pitsaroacaaritsi pijime: eiro otimitsi inquisishmentempiri.

⁷ Aisati shirampari: te omoncaratempiji pijina, te oshintsitanoteji, irootaque nocantantimpiri pincavintsayero, pineacameetsatero. Tempa pimoncaratavacaaca, icavintsaajeitaquempiri Tasorentsi pisavicaajeitanteari coajica anta inquitequi. Eiorica picavintsaairo pijina, eiro iquemisantimpitsi Tasorentsi ariorica pinquenquetsatacaaveteari.

Corajica iroashinoncayeeteri antirori cameetsatsiri.

⁸ Aisati noncantajeitempi maaroni: pinquempetavacaajeitea, pineshinoncatavacaajeitea, pinintajeiteri piyemisanrarinte, pincavintsaavacaajeitea, eiro pishemejeititsi.

⁹ Terica oncameetsateji yantimotaquempiri pishaninca, eiro pishemaritsi; ariorica inquisatsatempiri, eiro pipiataritsi. Pincanteri Tasorentsi incavintsayeri. Irootaque icoyeajeitantaquempiri Tasorentsi: icoaque incavintsaajeitempi.

¹⁰ Tempa irootaque ocantiniri Sanquenarentsi: “Pincoaqueric pinquimoshiretanaque aisati pisavique cameetsa, eiro piquisatsatiritsi pishaninca, aisati eiro pitseeiyatsi.

¹¹ Eiro pantayetirotsi caari cameetsayetatsi, irointi pantayete cameetsayetatsiri. Pincoasanotaque pintime cameetsa.

¹² Yamenapinijeitiri Avincatsarite maaroni quemisantajeitiriri, ishentajeitiri. Iquemapinitiri ariorica iquenquetsatacaari. Iro cantaincha te incavintsayeriji antapinitirori caari cameetsatsi”.

¹³ Pincoasanoterica pantapinitero cameetsatsiri, ¿ariompa intime coatsiri iroashinoncayempi?

¹⁴ Ariorica intime aparo quisashitempineri, iro cantaincha intasoncacoventempiri Tasorentsi. Eiro pitsaroacaaritsi yora quisashitimpiri, eiro picantashiretitsi,

¹⁵ irinti pimpincatsatanoteri Quirishito. Ariorica irisampiyeetempiri: “¿Paita piquemisantantacariri Jesoquirishito?” Ari cameetsa pancanaqueri, eiro piquisatsatanaqueritsi. Pincamanteri paita piotantacari iraanajempi inquitequi.

¹⁶ Eiro catsini pantirotsi caari cameetsatsi. Impoiji iriotanaque yora quisaquempiri irio Quirishito oameetsantimpiri. Impoiji aisati impashiventanaquea, iriotanaque te oncameetsateji incantimatempiri.

¹⁷ Ariorica incoacayempi Tasorentsi iroashinoncayeetempiri, iro cantaincha oncameetsate pashinoncaimentearo cameetsayetatsiri pantayeteri. Te oncameetsateji pashinoncaimentearo caari cameetsayetatsi pantayeteri.

Yantayetaqueri Quirishito.

¹⁸ Ari te ancameetsajeiteji arori, oshequi antayetaquero caari cameetsatsi, iro cantaincha icameetsatasanotaque irinti Quirishito. Icamimentajeitaquee irinti, yoavisacojeitaquee; icoaque aneajeitantaजारiri Tasorentsi. Icamasanovetaca; iro cantaincha ishire, te oncameji.

¹⁹ Icamantacari, ijashiretapainti anta Sharincaveniqui, anta yoaquerinta Tasorentsi camaaripee aisati ishireni tseencantatsiniri. Ari iquenquetsatacaapaqueri.

²⁰ Peerani, te inquemisantajeiteni iriori ishaninca Noeni. Yovetsicantavetacaroniri ivito, icantapinijeivetacari ishaninca peerani: “Pinquemisantajeiteri Tasorentsi”, iro cantaincha te inquemisantajeiteriji. Ari peerani yamavenavetacari Tasorentsi, iro cantaincha impoiji ishemanacari, itiancaquero antearo incani, incajaretanaque, maaroni. Anaqueri maaroni, itsitajeitanaque, pomiririri. Ari icarati avisacotajantsiri pitotsiqui ocho.

²¹ Ari ishiaeivetacarini iriori vaotisajeitachari meeca. Ariorica avatotsataquea, te iro ancaate, irointi ashiacantiro icamimentajeitaquee Jesoquirishito, aisati itinaanaja, yoavisacojeitaquee. Aisati ashiacantiro aventari Tasorentsi yoameetsashirejeitantaqueeri.

²² Ari meeca ijataji Jesoquirishito anta inquitequi, isaviquimotapaajiri Tasorentsi iracosanoriqui: icaratiri ipincatsariventajeitee. Aisati oshequi ipincatsajeitiri inampirepee, itsipapee pincatsarivetachari, maaroni.

4

¹ Ari piojeitaque otimi oshequi iqumatsicatarari Quirishito, te incoyeji eiro iqumatsicataro. Aisati avirojei, eiro picoajeititsi eiro piquematsicatarotsi paitapeerica. Pamene, ariorica pinquematsicatearo paitapeerica, eiro picoajitsi pantapinitero caari cameetsatsi

² aisati icoayetiri atiripee. Irointiquea pincoasanotanaque panteneri Tasorentsi paitapeerica incoacayempiri, irosati pincamanteari.

³ Peerani pantaveitaroni yantapiniyetiri yora tseencantatsiri: moncarataca, eiro papi-itajirotsi aisati. Jero itsinampanti iriori, yantayetiro caari yai, ishinquitapinita, imayempitavacaapinijeita, iquisavacaajeitaca, ipincatsatashitacararo ijitasorentsitashitari.

⁴ Te iriojeiteji iriori, icanti: “¿Paita caari iqumepetataro quemisantatsiri?” Yoajeitanaquempircavaco, irosati icantimajeitanaquempiri.

⁵ Iro cantaincha coajica impoque Quirishito incantacoventajeiteri maaroni atiri: aneajeitatsiri aisati camajeitatsiri. Irisampijeiteri tseencantatsiri: “¿Paita piquisantaricari quemisantari?” Te oncameetsateji”. Eiro yaquiritsi, oshequi impashiventanaquea.

⁶ Peerani yora Jesoshi iquenquetsatacaajeitaqueri savicaveitachaniri, icamantajeitaqueri: “Ariorica pinquemisante, pincantaitatiyempani pintime anta inquitequi”. Ari icamajeitaque: tempa yantajeitaquero caari cameetsatsi, irootaque icamajeitantacari, iqumpejeitacari maaroni atiri. Iro cantaincha yoitinaajiri Tasorentsi maaroni quemisanta-jeitiriri, isavicacaajeitaqueri anta inampiqui. Meeca iqumpejeitacari Tasorentsi: eiro icamajeitajitsi aisati.

Tsame ancavintsayeri ayemisanraririnte.

⁷ Pamene, irotaintsi omoncarataquea incantacoventantajeiteeri Tasorentsi. Cameetsa pisavicajeite catsini, pinquearioventero pinquenquetsatacapinijeiteri.

⁸ Pincoasanojeite catsini pinintavacaajeitea. Ariorica pinintavacaajeitea, eiro piquen-queshiretirotsi caari cameetsatsi yantayetiri itsipapee, irointi pincavintsavacaajeitea.

⁹ Pincanteani pineshinoncajeitavaqueri maaroni quivantempineri.

¹⁰ Tempa otimi imatacaaquempiri Tasorentsi, ari pimamatero pintacotanteariri pishaninca. Piotacaajeiteri iriori icavintsavaajeitaqueri Tasorentsi.

¹¹ Ariorica pinquenquetsatacayeri pishaninca, pinquearioventero povaaajeneri irineane Tasorentsi. Ariorica pintacoteari pishaninca, pincanteri Tasorentsi iramitacotempi, aitaque irimatacaaquempiro. Ariorica anquemisantasanoteri Jesoquirishito, incantajeite itsipapee atiri: “Tempa icameetsasasanoti Tasorentsi”. Tsame aneacameetsajeiteri maaroni, ampincatsajeiteri: ancantaitatiyempani. Aitaque ancantajeiteari.

Icantiri: “Ariorica pinquematsicamenteari Quirishito, pinquimoshiretanaque”.

¹² Noshaninca, oshequi nonintajeitaquempiri. Niotaque oshequi yoashinonqueetaquempiri. Eiro poanaquetsi cavaco, aitaque yoashinonqueetiri aisati itsipapee quemisanta-jeitatsiri.

¹³ Tempa aisati yoashinonqueetaqueri iriori Quirishito, meeca piquempejeitacari: ari pinquimoshirejitananaque. Aisati, coajica impincatsaritapaaque irinti, irosati pinquimoshireventasanoanteariri.

¹⁴ Ariorica inquishimenteeyetempiro piquemisantiri Quirishito, pinquimoshiretanaque: tempa aitaque itasoncacoventaquempiri Tasorentsi. Quiso oajeitaquempiri Ishire, aisati coajica cameetsa pisaviquimoteri anta inquitequi.

¹⁵ Iro cantaincha eiro poantitsi, eiro picoshititsi, eiro pantayetirotsi caari cameetsayetatsi, eiro pashereiriti pishaninca, maaroni. Ariorica inquishimenteeyetempiro ocapee, pineashiitetarove.

¹⁶ Iro cantaincha ariorica pinquemisantasanoteri Quirishito, irootaque inquishimentanteetempirori, eiro otimitsi pimpashiventimenteri. Irointi pincante: “Tempa icameetsataque Tasorentsi, ishinetana noquematsicamentacari Quirishito”.

¹⁷ Pamene, irotaintsi incantacoventajeitee Tasorentsi: irijivajeitee maaroni arori itomintajeitari, impoiiquea iriori tseencajeitiriri. Ariorica irintacojeitee arori, tempa iroashinoncaasanojeiteri yora caari quemisanta-jeitiri.

¹⁸ Tempa ocantini Sanquenarentsi: “Ari yoavisacojeitaqueri Tasorentsi yora quemisanta-jeitiriri yoameetsajeitaqueri, iro cantaincha irovetaincha irijajeiteme Sharincaveniqui. Irintiquea yora tseenguiniriri Tasorentsi, yantapinitiro caari cameetsatsi: tempa ari irashinoncaasanoataquea irinti”.

¹⁹ Ariorica pantiniri Tasorentsi icoacaquempiri, irootaque picatsitimentantacari, ocameetsataque. Pinquearioventero pantayetero cameetsayetatsiri. Pincanteri Tasorentsi: “Pinquempoyeajena”. Tempa iriotaque vetsicaquempiri, inquempoyeasano-tempi, eiro yamatavitimpitsi.

5

Yora Petero yoametaqueri jivatacaajeitiriri iyemisanraririnte.

¹ Jero oca nosanquenateneriri quenquetsatacaantatsiri. Tempa narotaque narori quenquetsatacaantatsiri. Peerani noneasanotaqueri Quirishito inecatsitacaro oshequi. Aisati coajica, ariorica impoque Avincatsarite impincatsariventantapaaje, nontsipateari nonpincatsariventante narori. Ari meeca timatsi noninti noncamantajeitempiri:

² yora ashitariri irovishate intacojeitacari irovishate. Aisati avirori, pintacotapinijeiteari ashanincapee piquemisantacaajeitaqueri. Avisati coashitachane, eiro itimitsi per-anatempineri. Te iro pinquenquetsatacaapinijeitantariri paitanteariri iirequite, irointi pincoasanotaque pintacojeiteari.

³ Eiro pishintsitsajeitiritsi, irointi cameetsa pintime, inquempejeitantempiri iriori.

⁴ Coajica impoque yora pincatsariventajeitajeeri, irajeitanaje, irisavicacaaajeitapaajee anta inquitegui. Ancantaitiyempani asavicajeite anta ocameetsaiteti catsini.

⁵ Aisati evancaripee, noncamantempi: pimpincatsajeiteri maaroni timacaaajeitimpiri. Eiro pishemejeitiitsi, irointi cameetsa pincavintsaavacaaajeitea. Yora Tasorentsi iquisaqueri yora shemetatsiri, iro cantaincha inecameetsajeitaqueri caari shemejeitatsi.

⁶ Pimpincatsajeiteri iriori: tempa itasorentsitasanotaque, ipincatsaritasanotaque; impoiiji irisavicacaaajeitempi cameetsa catsini.

⁷ Eiro piquenqueshireatsi, eiro poashiretatsi. Otimirica piquenqueshireyeteri, pincanteri Tasorentsi: “Oshequi noquenqueshireaca. Pamitacotena eiro noquenqueshireantajatsi aisati”. Ariorica pincanteri, ari piveshireimenteari iriori.

⁸ Queariompia: paamayeari camaari. Oshequi catsini iquenaquenayetaque, icoaveta irojocaaajeiteerome aquemisantajeiti maaroni: eiro catsini aquemisantantajatsi. Iquempetacari anteari maniti, ariorica itasheasanotaque: yoari iovintsane, itsoncasanotaqueri, te intimeji timaarrantajantsine.

⁹ Pinquemisantasanoteri Avincatsarite pimpiatanteariri camaari. Queario ontimayete pinquematsicayeteri, iro cantaincha tempa aisati iquempejeitaquempi iriori ayemisantaririnte anta otsipapeequi quipatsi.

¹⁰ Eiro osamanitanotitsi pinquematsicatearo: ioti Tasorentsi pipincatsataqueri Quirishito, ari impoiiji irajeitanaquempi anta inquitegui. Pincantaitiyempani pisavica-paaje anta ocameetsaitetasanotinta catsini. Yashi yoiro icavintsanti: iroameetsantasanojeitempi, iriveshireacaaajeitempi, impeavajempi pincatsari avirori, eiro picantashiretajitsi aisati.

¹¹ Tsame maaroni ampincatsatasanojeiteri, ancantaitiyempani. Iroove, icameetsatasanotaque catsini.

¹² Jeri yoca Shirivano, iriotaque aanajempirone oca nosanquenare. Oshequi noneacameetsatiri: iriotaque ayemisantaririnte, iquearioventiro iquemisanti. Ari nocamantaquempi oshequi icavintsaasanojeitaquempi Tasorentsi, queario nocantaquempiri. Meeca pinquemisantasanoteri, piveshireimenteari iriori.

¹³ Ivetsajeitaquempi maaroni ayemisantaririnte aca Vavironiaqui, tempa irisati icoyeane Avincatsarite iquemisantajeitiri. Aisati ivetsajeitimpi noamere Maricoshi.

¹⁴ Paacameetsatavacaaajeitea maaroni, pincavintsaavacaaajeitea. Nocantiri Tasorentsi: “Pincavintsaajeiteri maaroni quemisantiriri pitomi, cameetsa pisavicacaaajeiteri”.

Narotaque sanquenajeitimpirori: *Petero*

YAPIITAJINIRI PETERO ISANQUENATINIRI IYEMISANTARIRINTE

Ivetsajeitari.

¹ ¿Ainirompi noyemisantaririnte? ¿Tecatsimpa oyempine? Narotaque Shimo Petero sanquenajeitimpirori. Narotaque itiancane Jesoquirishito, nantiniri iriori paitarica icoacaaquenari. Tempa amoncaratavacaajeitaca aquemisantajeitaqueri Tasorensi aisati Jesoquirishito, yora oavisacojeitaqueeri. Irootaque yoameetsajeitantaqueeri.

² Ari piojeitaqueri, irootaque oshequi incavintsajeitantempiri aisati cameetsa irisavicacaajeitantempiri.

Ocameetsati anquearioventeneri Tasorensi maaroni antajeiteneri.

³ Ari icoyeajeitaquee Tasorensi ancameetsajeitanteari aisati cameetsa asaviquimojeitanteariri anta ocameetsaitetinta. Ariorica ayojeiteri, intasoncacoventajeitaquee cameetsa asavicajeitanteari aisati cameetsa anquemisantanteariri.

⁴ Oshequi intasoncacoventajeitaquee anquimoshireimentantajeitariri catsini, irimataqueenero maaroni icantaqueeri. Iramitacojeitee eiro acoantaro antero caari cameetsatsati. Aisati iramitacojeitee anquempjeitanteariri iriori.

⁵ Ariorica acoajeitaque intasoncacoventajeitee, ocameetsati ajivataque anquemisanterri. Ariorica anquemisanterri, impoiji ocameetsati ancameetsatanaque. Ariorica ancameetsatanaque ocameetsati aisati ayotasanotanaque paitarica icoacaaqueeri.

⁶ Ariorica ayotaque paitarica icoacaaqueeri, ocameetsati aisati aamaventanaquea arosati amatantearori. Ariorica aamaventanaquea arosati, ocameetsati anquearioventero icoacaaqueeri. Ariorica anquearioventero icoacaaqueeri, ocameetsati aisati ampincatsatanotanaqueri.

⁷ Ariorica ampincatsatanotanaqueri, ocameetsati aisati anintajeitanaqueri maaroni ayemisantaririnte, ancavintsajeitanaqueri maaroni ashanincajei.

⁸ Ariorica pimatasanojeitanaquero maaroni ocapee, ari oshequi pimataqueneri Avincatsarite Jesoquirishito, aisati piotasanotanaqueri.

⁹ Yora caari majeitiro ocapee te iriotasanoteriji Avincatsarite, te inquenqeshireteroji icavintsairi. Oshequi yantajeitironi caari cameetsatsati, iro cantaincha icavintsasaanotaqueri, yoameetsataqueri, te inquenqeshireajeroji aisati.

¹⁰ Meece, noyemisantaririnte, pinquearioventasanotero panteneri Tasorensi maaroni icoacaajeitaquempiri, te oncameetsateji irantsipetashitearo icoyeaquempi pijatanteari anta inquitequi. Aisati eiro pojoquirotsi piquemisantiri,

¹¹ oncanteataquea irantantajempiri anta inquitequi, anta icantani ipincatsariventanti Avincatsarite Jesoquirishito: yora oavisacojeiteeri.

ICantiri: "Eiro pipeacotarotsi oca nocantaquempiri".

¹² Te iroaquera pinquemajeitero oca nocantaquempiri: piojeitironi, aisati pimayetaquero cameetsa. Iro cantaincha nampiitajempiro aisati nonquenqeshiretacaajempiro.

¹³⁻¹⁴ Iotacaaguena Avincatsarite Jesoquirishito eiro osamanititsi noncamanteari. Iro cantaincha nonquenqeshiretacaajejempiro irosati noncamanteari.

¹⁵ Impoiji, ariorica noncame, eiro pipeacotantarotsi, irosati pinquenqeshiretantapintearori.

Tampatica oamejeitaquee irineane Tasorensi.

¹⁶ Tempa nocamantajeitaquempi coajica impocaje aisati Avincatsarite Jesoquirishito, oshequi impincatsaritapaaque. Queario oca nocantaquempiri, te noncamantajeitempiro naamaashijeitacari. Tempa narojeitaque neasanojeitaqueriri Jesoshi peerani ishapaquireaque aisati itasoncantayetaque.

¹⁷⁻¹⁸ Peerani ijatantacari Jesoshi toncaariqui, noijatanaqueri narori, aisati itsipapee iroamere; noneasanojeitaqueri ishapaquireanaque, aisati noquemajeitavaqueri Apa Tasorensi, yora cameetsatanotatsiri. Icanti: "Iriotaque yoca notomi nonintasanotiri, oshequi noneacameetsatanotaqueri". Irosati nopincatsatanajeitantanacariri Jesoshi.

¹⁹ Timatsi aisati isanquenajeitirini yora camantantatsiniri peerani: iotacaasanojeitaquee queario impocasanotaje Quirishito, impincatsariventajeitaje. Ocameetsati pinquenqeshiretasanojeitero ocantiri Sanquenarentsi piotanteariri jaoca icanta. Oquempetacarero atsiota tsiteniriqui: eirorica atsiota, eiro aneitsi. Ari ocameetsati pincanteani pinquenqeshirejeitero, irosati impocantajeeri; impoiji iriotacaasanojeitempi, onquempetimojeitempi oquitaitetasanoti.

²⁰⁻²¹ Nocoaque piotasanojeitero oca: ora isanquenare yora camantantatsiniri otampaticatasanoaque. Te irioteniji intacarori, yora camantantatsiniri, caari oni irineane iriori; irointi oamejeitaqueri Ishire Tasorentsi, isanquenatantacarori irineane.

2

Iquenquetsatacotiri amatavitantatsiri.

¹ Ari peerani itimini quenquetsatacaajeitiriniri joriopee, iro cantaincha yamatavijeitirini, aisati intime meeca amatavijeitempineri avirori. Iroamejeitempiro tseyantsi, intseeyacoteari Tasorentsi. Tempa ayojeitaque icamimentajeitaquee Jesoshi ajajeitanteari inquitequi, iro cantaincha incantanirote yora amatavitantatsineri: “Eiro apincatsatiritsi Jesoshi”. Irootaque iroasanquetasanoanteaririri Tasorentsi.

² Intime oshequi oijajeiterineri: inquempejeiteari, irantayetero caari cameetsatatsi; irootaque intseenqueetanteaririri Quirishito.

³ Oshequi iramatavijeitempi, iroametashiyetempiro paitapeerica iraitantempiriri piirequite. Peerani icanti Tasorentsi: “Aitaque noasanquetasanojeiteri yora amatavijeiterineri quemisantatsineri”. Queario, eiro osamanititsi irijajeite Sharincaveniqui.

⁴ Peerani yora inampirepeeni, iplatsajeitacarini Tasorentsi, yantayetaquero caari cameetsatatsi. Ari yoasanquetajeitaqueri, yojocajeitaqueri anta Sharincaveniqui, anta otsiteniitasanotinta. Aitaque itimaqueri iriori anta, irosati incantacoventanteaririri Quirishito.

⁵ Pamene, peerani yoamaajeitaquerini Tasorentsi yora ishanincapeeni Noe. Te impincatsajeiteriji Tasorentsi, irootaque itiancantacananariri incani aajeitaqueri. Tecatsi pashini iroavisacote, irinti Noe aisati ishanincasanori iriori, caratatsiri 7. Tempa irootaque quenquetsatacaajeivetacarini ishanincapee, camantajeivetacarini jaoca incanteameri iravisacojeitantaajeameri.

⁶ Peerani itaajeitaqueri Tasorentsi maaroni soromasatini, aisati maaroni comorasatini; itaajeitaquero ivancorpee, irovararo, maaroni. Otaaca maaroni, poyere. Ocameetsati meeca anquenqueshirejeitero yantaqueri Tasorentsi ayojeitanteari iroasanquejeiteri maaroni caari pincatsatiri.

⁷⁻⁸ Ari icameetsataqueni Orotini; isavicaveitani anta, iro cantaincha te irineacameetsateroji oca yantajeitaqueri yora isaviquimojeitiri. Oshequi iquenqueshiretanaca maaroni quitaiteari: “¿Paita caari iquemisantajeitanti Tasorentsi?” Ari inecameetsataqueri Tasorentsi iriori, irootaque caari itaantari.

⁹ Ari iotasanoaque Tasorentsi yoavisacojeitaqueri pincatsajeitiriri, eiro iquempentantariisi tseencantatsiri. Irinti yora caari cameetsajeitatsi, iroashinoncaajeitajeri, irosati impocanteari incantacoventantajeitairiri.

¹⁰ Aitaque iroasanquejeiteri maaroni coatsiri irantayetero caari cameetsayetatsi, antashiyetarori paitarica icoayetiri, jeri aisati yora tseenguiriri Avincatsarite. Tecatsi impincatsajeite, oshequi ishemejeiti, te intsaroyeji icantimajeitiri inampirepee Tasorentsi.

¹¹ Ari isavicajeiti iriori anta Avincatsaritequi, aisati oshequi ishintsiti, oshequi ipincatsariti, iro cantaincha te impiateariji yora cantimajeitiriri.

¹² Iquempejeitacari iriori poshiniripee, tecatsi iriote. Iquenashiyeta, impoiiji imanatiri atiri, yoaqueri, shemi. Yora tseencantatsiri icantimatashiyetaro caari ioti, irootaque irijajeitanteari Sharincaveniqui, intsipajeiteari camaari.

¹³ Yoashinoncaajeitei meeca: coajica irashinoncaajeitaquea iriori. Iveshireimentashiyetaro timayetatsiri meeca: te inquenqueshireteroji jaoca incanteari coajica. Te oncameetsateji yantajetiriri iriori, iro cantaincha yantacaajeitaquempiro caari cameetsatatsi pinquempejeitanteaririri avirori.

¹⁴ Inevejeitaro tsinaneepe, icantani yantapinitiro caari cameetsatatsi: tecatsi incantero irijocajero, yashi yoiro. Yantacaajeitaqueri caari quenqueshirevetaro caari cameetsayetatsi. Yashi yoiro inevetararo vararonsi. Queario irijajeite iriori Sharincaveniqui.

¹⁵ Te incoajeiteji intime cameetsa, irointi yantashiyetaro paitapeerica. Iquempejeitacari Varamani, itomini Veoro. Iquenquetsavetaroni peerani irineane Tasorentsi, iro cantaincha inevetasanotaro vararonsi, te irantasanoteneriji Tasorentsi icoacaavetariri.

¹⁶ Te inquemisanteriji, irointi yojjataqueri coatsiri imperi vaararonsi. Ari imapocakeri irashinote ineanataqueri. Te irioteji irio neanatacairiri Tasorentsi. Ari iquenquejaqueri, iplatsatacari, impoiiji oshequi yoanaqueri cavaco iriori, aisati oshequi iquenqueshireanaca: te inquenqueshiretateroji aisati vaararonsi.

¹⁷ Ariorica pinqueacotero nija oncontejatanteari, tempa pincoasanoaque ontime nija. Iro cantaincha ariorica ompirijatanaje, te oncameetsateji, tecatsi payero nija. Ari yora amatavitantatsiri ishiaquero pirijatsitiri nija: te incameetsateji. Oshequi ineevete,

vero, vero, iro cantaincha tecatsi iramitacotempi. Aisati iquempevetacaro mencori, ariorica pineaquero amaquero tampea: pijiti ompariye incani, iro cantaincha ariorica amatavitempi, te ompariye. Timatsi intimasanotanteari iriori, yovetsicaqueneri Tasorentsi anta otsiteniitananoti catsini.

¹⁸ Oshequi ishemejeiti, aisati icantapiniti: “Pineaquero, nantashiyetacaro paitapeerica nocoayetiri”. Ari yamataviyetiri oshequi iroaquera quemisantavetachari: iroaquera yojocavetacaro caari cameetsatatsi yantayetiri, iro cantaincha yantacaanivotajiri aisati.

¹⁹ Icantayetiri: “Tempa irio Tasorentsi oavisacotimpiri, te pimateroji poavisacotajea avisati. ¿Paita caari pantantaro paitarica picoayetiri? Tempa icavintsaaquempi, eiro iquishimentimpirotsi. Tsame pinquempetena narori”. Irootaque icantayevetari, iro cantaincha yamatavitanivoti. Jero yantapinitiniri camaari icoacairiri iriori: iriotaque ivincatsarite. Iriome Tasorentsi ivincatsarite irantenerime icoacairiri iriori, cameetsa irisaviqueme.

²⁰ Pamene, peerani yashinoncaajivetaca: yantapinijeivetaroni caari cameetsatatsi yantajeitiri tseencantatsiri. Impoiji iotajiri Avincatsarite Jesoquirishito, yoavisacotajiri. Iro cantaincha yapiitajiro ora yantapinijeiveitaniri. Meeca tecatsi incantacoventajea iroimpacajero aisati yantayetiri, irootaque irashinoncantasanoetari catsini.

²¹ Pineaquero, ocameetsaveta eiro iovetarime Tasorentsi. Yoameetsavetajari, aisati yoamevetajari, iro cantaincha ipiatsanivotacari yora cavintsavetajari.

²² Icanteetini: “Yora otsiti yoipiajaro iamarancane, yoajaro. Atsipetashitacari aquiviri shintori, tempa implanaje aisati intivironcajearo sampoatsa”. Queario icanteetiri. Aitaque iquempejeitari iriori yora quemisantavetachari, yapiitajiro caari cameetsatatsi.

3

Iquenquetsatacotiri Jesoshi, impocantajeiri.

¹⁻² Ari, noyemisantaririnte, piojeiti nonintajeitaquempi. Chapinqui nintantaquempirori nosanquenataquempiro, noquencheshiretacaquempiro isanquenatiniri yora quenquetsatacotiriniri Tasorentsi peerani. Aisati noquencheshiretacaquempiro maaroni yoamejeitaquenari Avincatsarite, yora oavisacojeiteeri. Impoiji itiancajeitaquena noquemisantacaajeitaquempi. Meeca napiitajimpiro nosanquenatajimpiro pinquencheshiretasano-tantearori.

³ Piojeitaque eirotsitarica ipoquitatsi Avincatsarite, intime oshequi tseencantatsineri, irantashiyetearo paitapeerica incoaniryeteri iriori. Irishirontimentajeiteari Avincatsarite,

⁴ Incantajeite: “¿Icantimpa Quirishito impocaje? Iji, iji, iji. ¿Jaocari meeca? Tempa camaque peerani. Eiro ipocajitsi. Peerani yaamaavetacarini yora intacaroniri iquemisanti, iro cantaincha te irineeriji, irosati meeca. Peeraniiteni. ¿Pijitimpa pineajeri avinti? Iji, iji. Irosati ocantani quipatsi, te ompashiniteaji”. Irootaque incantajeiteeri tseencantatsineri.

⁵ Te incoyeeji inuquencheshiretero yantayetaqueri Tasorentsi. Peerani icantaque iriori: “Ontimeta quipatsi, aisati ontimeta inquite”, irosati otimantacari. Ari yovetsicaquero quipatsi, ocontetapaaque incajarequi, meeca aisati oshoncacaro incajare.

⁶ Aitaque ocontacari peerani, iro cantaincha impoiji yoasanquetaajeitaqueri yora ishanincani Noe. Iro yoasanquetantacariri, te oncameetsateji intimeni. Ari opariaqueni antearo incani, oncanaca maaroni quipatsi, aisati ipoyereajeitanaca tseencantatsiri.

⁷ Aisati icanti Tasorentsi: “Coajica nontayero inquite aisati quipatsi, aisati nontaacojeiteeri maaroni timantarori”. Tempa peerani icantini “Novetsiquero quipatsi”, irosati otimantacari. Meeca icanti: “Coajica nontaajero quipatsi”, tempa aisati irimatajero. Aisati tequerata omoncateaji intaantajeirori, iro cantaincha coajica intayero, pomein, aisati intaacojeiteeri maaroni tseencantatsiri, iroasanquetaajeiteeri.

⁸ Meeca pinquencheshirejeiteero oca, noshaninca: ajijeivetaro 1000 osarintsi peerani catsini. Iro cantaincha te irijiteroji irinti. Ineaquero te osamaniteji, oquempetimovetacari aparoni quitaiteeri. Ajijeitiro te osamaniteji aparoni quitaiteeri, irioquea iriori ineaquero osamani, oquempetimovetacari iro 1000 osarintsi.

⁹ Pineaquero, ajijeivetaro opeeranitaque, tequera irimoncarateroji icantaqueeri: tequera impoque Avincatsarite. Iro cantaincha te irijiteroji irinti opeeranitaque. Eiro yamataviteetsi, iro cantaincha osamani onaveta yoyeacovetacari tseencantatsiri, icoaque inuquencheshiretajea eiro ijatanta Sharincaveniqui.

¹⁰ Iro cantaincha coajica irimapocasanotapaaque Avincatsarite, impocaje. Antearo on-toncanaque inquite, ton; onsoncasanotanaquea, poyere. Intaasanotanaquea impoquero, catsirincaiteeri, cashiri, maaroni: pomein, insoncasanotanaquea iriori, poyere. Aisati

quipatsi, ontayea; aisati ontaacotasanojeitanaquea maaroni timajeitatsiri quipatsiqui, pomein, poyere.

Icamentiri jaoca oncanteari coajica.

¹¹ Ari meeca ayojeitanaque onsoncajeitajea maaroni aneajeitiri, irootaque ocameetsatantari anquenqueshiretanaquea, anquemisantasanoteri Tasorentsi, cameetsa antime catsini.

¹² Cameetsa aamaajeitari Tasorentsi impocaje, cameetsa aisati antajeiteneri maaroni icoacaaqueeri irishintsitantajeeri impocaje. Ariorica omoncarataquea, ontayea inquite aisati inquitesati onsoncajeitanaquea, maaroni, poyere.

¹³ Iro cantaincha timatsi pashini icantaqueeri, ayotanaque eiro yamataviteetsi. Icanti: "Pashini novetsicaje aisati inquite iroaquerari, aisati quipatsi iroaquerari. Oncameetsa-tasanotaje irointi, eiro itimajitsi antayetajeroneri caari cameetsatsi".

¹⁴ Meeca, noyemisantaririnte, paamaajeitacaro icantaqueeri. Pincoasanaque pintime cameetsa, aisati paacameetsatavacaajeitea; impoiji ariorica impocaje, irineacameetsa-tasanotapaquempi.

¹⁵⁻¹⁶ Queario, tequera impocaje, iro cantaincha yoyeajeitaqueri itsipapee atiri inquemisantajeite iriori iravisacojeitantajeeri. Irootaque isanquenajeitaquempi Pavoro iriori, yora anintasanoeitiri. Oshequi iotacairi Tasorentsi. Timatsi pomereentsitaaran-tainchari isanquenayetiri. Meeca yora caari iotatsi, yora caari quemisantasanotatsi, iquenacaashitacaro irineane Pavoro, te ontampaticateji incamantacotero. Aisati iquenacaashiyetacaro pashini irineane Tasorentsi, irootaque iroasanquejeitanteariri.

Ivecarataquero isanquenare.

¹⁷ Ari, noshaninca, nocamantaquempi jaoca oncanteari coajica. Nocamantajeitaquempi intime yora caari cameetsayetatsine, piatsajeitearineri Tasorentsi, iroametantero tseeoyantsi. Queariyea, piquemisantiricari, icomitacaimpicari.

¹⁸ Pinquemisantasanoteri Avincatsarite Jesoquirishito, yora oavisacojeiteeri, piotasanotanaqueri. Tsame meeca aisati ampincatsatasanojeiteri, ancantaitatiyempani. Aitaque ancantajeitari, maaroni.

Narotaque sanquenajeitimpirori: *Petero*

IJIVATAQUE JOA ISANQUENATINIRI IROAMERE

Yora Ashitarori Irineane yoamejitaquee jaoca ancanteari antimanteari inquitequi.

¹ ¿Ainirompi, noamere? ¿TecatSIMpa oyempine? Narotaque aca Joa sanguenajeitimpirori oca. Meeca nosanquenatacotaqueri intasanotarori itimi. Tequerani ontimeni quipatsi, itimitani irinti. Iriotaque Ashitarori irineane, oamejitaqueeri jaoca ancantajeari antimajitantajeari anta inquitequi, ancantaitatIyempani.

² Itsipatarini Apa Tasorensi, impoiji ipocaque aca quipatsiqui. Noneapinijeitaqueri, namenapinijeitaqueri, noquemapinijeitaqueri, nopamitapinijeitaqueri: meeca nocamantajeitaquempi jaoca icantari, aisati nocamantajeitaquempi jaoca incantajeitajeeeri aneasanojeitantajeari anta inquitequi.

³ Ari yora noneasanotaqueri, noquemasanotaqueri, iriotaque noquenquetsatacotaqueri. Meeca noncamantasanotempi, pinquempetantenari narori. Aquempejeitacari Apa, aisati aquempejeitacari itomi: yora Jesoquirishito.

⁴ Meeca nosanquenajeitempiro oca pinquimoshiretasanajeitanteari.

Ishiasanotaquero Tasorensi quitaiteri.

⁵ Meeca noncamantempiro icamantaquenari iriori. Ishiasanotaquero Tasorensi quitaiteri, te intsitenitimateji: te iranteroji irinti caari cameetsatatsi.

⁶ Ancanterica: “Noquempetacari”, iro cantaincha ariorica antapinitero caari cameetsatatsi, aquempetacaró aquenanaque tsiteniriqui: antseeYashitaca, amatavitantaque.

⁷ Iro cantaincha icameetsatanotaque Tasorensi, iquempetacaró iquenanaque irinti quitaiteriqui. Ariorica cameetsa asavique, oquempetaca aniitanaque quitaiteriqui, ashiaqueri iriori: aquempetavacaajeitaca. Icamimentaquee Jesoshi, yora Itomi Tasorensi: aparajatimentaquee iriraja yoavisacojeitantaqueeri, yoameetsajeitantaqueeri.

⁸ Ancanteririca: “Te nanteroji caari cameetsatatsi”, arosati amatavitajancha, tequera ayotimateroji queariotasanotatsiri.

⁹ Te iramataviteeji Tasorensi, icameetsataque. Ariorica ancamanteri: “Ainiro nantane”, incavintsajeitee, iroameetsajeitee, maaroni.

¹⁰ Ancanteriricame Tasorensi: “Te nanteroji caari cameetsatatsi”, ancanterrime aisati: “Te pioteji, pitseeYani”. Ancanteriricame: “Te aneroji nantane”, te ashiretearó irineane.

2

¹ Meeca, noamere, nosanquenajeitempiro eiro pantantarótsi caari cameetsatatsi. Timatsi Apaquí Cantacoventajeitaqueeri: yora Jesoquirishito, icameetsatanotaque. Ariorica antero caari cameetsatatsi, incantacoventee. Incanteri iriri: “Pincavintsayeri yora quemisantanari”.

² Ainiro antajeitiri maaroni, iro cantaincha icamimentajeitaquee coroshiqui. Te apaniro incamimentajeiteri ashanincapee arori, irointi icamimentajeitaqueri maaroni atiri. Yoameetsajeitaquee Tasorensi, aisati iriori maaroni quemisantajeitiriri, eiro iqushimenterótsi caari cameetsatatsi antajeitaqueri, eiro yoasanquetaajeiteetsi.

Quemisantiriri Tasorensi, iriotaque iojeitiriri.

³ Ariorica antapinijeitaquero icantaqueeri Tasorensi, ayotavacaajeitaca ashanincat-acari.

⁴ Ainiro cantashitachari: “Noshanincatacari Tasorensi”, iro cantaincha te iranteneriji icantavetariri. Iriotaque tseeYari, irisati amatavitajancha.

⁵ Ariorica antasanotiro icantaqueeri Tasorensi, arojeitaque nintasanojeitiriri. Irootaque ayotavacaantacari aquempetasanojeitacari.

⁶ Ancanterica: “Quiso noanaqueri Tasorensi”, cameetsa ancantaitatIyempani ashiasanoteri, asavique cameetsa.

⁷ Nonintane, te naro intearone oca nocamantimpiri. Peerani intajeitaqueeroni Tasorensi icamantajeitaqueeroni. Peerani piquemaquero.

⁸ Te ayoveiteani, oquempetimojeiveiteeni atimini tsiteniriqui, iro cantaincha ipocapaaque iotacaajeitaqueeri, oquempetaca iquitaitetacojeitaquee. Irootaque meeca napi-itantümpirori. Iquearioventiro Quirishito inintajeitaquee. Aisati avirori, pinquearioventero, pinintajeiteri itsipapee.

⁹ Ancantashitearica: “Noqueni quitaiteriqui, niotiri Tasorensi”, iro cantaincha anquisheririca ashaninca, ainiroquera aqueni tsiteniriqui.

¹⁰ Ariorica aninteri ashaninca, anquenasanotanaque quitaiteriqui, eiro aisati antapini-tirotsi caari cameetsatatsi.

¹¹ Ariorica anquisheri ashaninca, oquempetaca aquenashitanaca tsiteniriqui, ainiro antapinitiro caari cameetsatatsi. Te ayoteji jaocarica aquenaqueri, oquempetaca otsiten-itimotaquee, te aneroji amenanteari.

Eiro pinintasanotirotsi yantapiniyetiri tseencantatsiri.

¹² Noamere, otimi pantajeitini, iro cantaincha yoavisacojeitaquempi Jesoshi. Irootaque meeca nosanquenatantimpirori oca.

¹³ Avirojei shirampari: piojeitaqueri yora intasanotarori itimi, irootaque nosanquenatantimpirori oca. Avirojei, evancari: te panteneri camaari icoacaavetaquempiri, irootaque nosanquenatantimpirori oca.

¹⁴ Avirojei jananequi: piojeitiri Apa, irootaque nosanquenatantimpirori oca. Avirojei shirampari: piojeitaqueri yora intasanotarori itimi, irootaque nosanquenatantimpirori oca. Avirojei evancari: pishintsijeitanaque, piquearioventaquero piquemisantaquero irineane Tasorentsi, aisati te pinquemisantimateriji camaari, irootaque nosanquenatantimpirori oca.

¹⁵ Eiro picoasanotirotsi pantero yantapinijeitiri tseencantatsiri. Eiro picoasanotirotsi timayetatsiri quipatsiqui. Ariorica pinintasanojeitero, eiro pimatirotsi pinintasanojeitero Tasorentsi.

¹⁶ Aitaque acantajeitari: aquenqueshirejeitaquero paitarica acoasanoaqueri anteri. Acoasanoaquero paitarica aneayetaqueri, ashemetimentaquero ashiyetari. Te irio oameeteerone Apa, irinti atiri oamejeiteerori.

¹⁷ Ompeanajea timayetatsiri quipatsiqui, aisati ompeajeitanajea maaroni acoajeivetari. Iro cantaincha ariorica anteneri Tasorentsi icoacaqueleri, ancantaitatitempani antimeni anta inampiqui.

Iquenquetsatacotiri tseeyacojeitacariri Quirishito.

¹⁸ Noshaninca, irotaintsi impocaje Quirishito, eiro osamanititsi. Piquemacotaqueri yora pashini pocatsineri, yora amatavitantatsineri, cantatsineri: “Te iratiritapeeji Jesoshi, te imponepaji inquitequi. Caari ini Quirishito”. Ipajiyetiri yora cantatsiri: “Antiquirishito”. Noncamentempi, yareejitaca. Timatsi meeca oshequi amatavitantatsiri, irootaque ayojeitancari eiro osamanititsi impiasnotaje Quirishito.

¹⁹ Peerani icarajeiveiteeni yora amatavitantatsiri, iquemisantaveitani, iro cantaincha meeca yojocajeitaquee. Te inquempetasanojeiteeji. Inquempeaqueeme, quiso iroajeitaqueeme, iro cantaincha yojocajeitaquee. Meeca ayotasanojeitaqueri te inquempejeiteeji, te inquemisantajeiteji.

²⁰ Avintiquea itiancajeitaquempiro Tasorentsi Ishire, quiso oajeitantimpiri. Piotasanojeitaquero. Te pishiyeriji yora caari ioterone queariotatsiri: te irioteji irinti.

²¹ Piojeitaquero queariotatsiri, irootaque nosanquenatantimpirori oca. Piotaque te intseeyaji caari tseeyacha.

²² Tseeyari ini yora cantashitachari: “Yora Jesoshi, caari ini Quirishito”. Itseenquiri Apa. Itseenquiri Itomi, icantashita: “Caari ini Quirishito”.

²³ Yora tseenquiriri Itomi, te irioteriji Apa. Yora cantasanojatsiri: “Quirishito ini Itomi Tasorentsi”, iriotaque iotasanojiriri Apa.

²⁴ Pincantaitatitempani pinquenqueshiretero oca piquemaqueri peerani. Ariorica pinquenqueshiretanoteri, quiso poyeri Itomi, aisati Apa.

²⁵ Jero oca icashiacaqueleri: “Pincantaitatitempani pisavique nonampiqui”.

²⁶ Ari nosanquenatacotaqueri yora amatavitempinemeri,

²⁷ iro cantaincha itiancajeitaquempiro Tasorentsi Ishire, quiso oanaquempi. Te pincoyeji pashini oametempaneri. Quiso oanaquempi, ari meeca otsoteaquempiro maaroni, oametasanoaquempi. Tampatica oametaquempi, te ontseeyaji. Tempa oamejeitaquee quiso ayeri Quirishito: ari quiso poyeri.

Yashjeitacariri Tasorentsi.

²⁸ Meeca, noamere, quiso poyeri Quirishito. Coajica impocaje. Ariorica pincanteani quiso poyeri, ari piveshireimentavaqueari, eiro pipashiventacaavacari.

²⁹ Ari ayojeitaque icameetsataque Tasorentsi. Incameetsataquerica iriori atiri, ari ayojeitanaqueri itomintajeitacariri Tasorentsi.

3

¹ Icantajeitaquee Tasorentsi: “Avirojeitaque notomipee, nishintopee”. Queario icantaque. Pineaquero, oshequi inintasanojeitaquee Tasorentsi. Te irioteriji tseencantatsiri jaoca icantari, irootaque caari iotantee arojei itomi.

² Meeca, nonintane, avirojei itomipee Tasorentsi, irishintopee. Tequera ayojeiteji jaocarica ancanteari, coajicani. Ariorica impiaje aca quipatsiqui, amenajeitavaqueri jaocarica icantari. Impojiquea ashiasanojeiteri iriori.

³ Aamaajeitajari impocaje, irootaque acoajeitancacari meeca ancameetsajeitanaque: anquempajeitajari iriori, icameetsataque.

⁴ Ariorica antaqueri caari cameetsatsi, te anquemisanteroji icantavetaqueeri Tasorentsi. Te oncameetsateji ampiatsatearo icantaqueeri.

⁵ Tempa piojeitaque ipocaque peerani aca quipatsiqui yoavisacojeitajee. Piojeitaque aisati te iranteroji irinti caari cameetsatsi.

⁶ Ariorica quiso avanaqueri, eiro antirotsi arori caari cameetsatsi. Yora antapinitirori caari cameetsatsi te irineeriji Jesoshi, te irioteriji jaocarica icantari, aisati te irishanincateariji.

⁷ Noamere, yamataviyeetimpicari. Ariorica antapinijeitiro cameetsatsiri, aitaque acameetsajeitanaque: amoncarajeitacari Tasorentsi, icameetsataque.

⁸ Yora antirori caari cameetsatsi, ishanincatacari camaari: tempa iriotaque intasanotacarori caari cameetsatsi. Ari ipocapaaque Itomi Tasorentsi. Iro ipocashitanotiri irojocacajeri maaroni yantanerotiri camaari.

⁹ Ariorica itomintajeitaquee Tasorentsi, eiro antapinijeitirotsi caari cameetsatsi. Itomintaquee, irootaque quiso oantaqueeri Ishire, aquempajeitacari. Irootaque caari antapinijeitantajaro caari cameetsatsi.

¹⁰ Irootaque ayotantacari ashanincajeitacari Tasorentsi. Yora caari materone cameetsatsiri, te irishanincateariji Tasorentsi. Aisati iquempeta yora caari ninterine ishaninca, te irishanincateariji, irootaque ayotantariri ishanincatacari camaari.

¹¹ Jero oca intaquempiri Tasorentsi icamantaquempiro peerani: “Cameetsa pinintavacaajeitea”.

¹² Eiro pishiiritsi Caini: ishanincatacari camaari. Yoaqueri irirenti. ¿Paita yoantacariri? Yashi yoiro te incameetsateji, iro cantaincha ineaqueri irirenti cameetsa oni oca yantayetaqueri, irootaque yoantacariri.

Pinintajeiteri piyemisanraririnte.

¹³ Noyemisanraririnte, inquishempirica tseencantatsiri, eiro poanaquetsi cavaco.

¹⁴ Anintajeitaqueri ayemisanraririnte, irootaque ayojeitancacari ancantaitatijempani asavique inquitequi. Peerani te ayoveitearini Tasorentsi, iro cantaincha meeca ayojeitajiri. Yora caari ninterine ishaninca, incantaitatijempani intime irinti Sharincaveniqui.

¹⁵ Yora quishiriri ishaninca, iriotaque oayeri. Piojeitaque eiro itimitsi oayeri inquitequi.

¹⁶ Yora Quirishito irisati coaintsi icamimentajeitaquee, irootaque ayojeitancacari inintajeitaquee. Aisati arori, te oncameetsateji antsaroacayearo ancamimentero ayemisanraririnte.

¹⁷ Jeri ashitarantachari: ineaветaririca yashinoncaaca iyemisanraririnte, terica icoye incavintsayeri, ¿inintirimpa Tasorentsi?

¹⁸ Noamere, te oncameetsateji ancantashijeitea: “Nonintiri noshaninca”. Iro cantaincha cameetsa aneshinoncajeiteri, anintasanajeiteri,

¹⁹ irootaque ayojeitancacari aijatasantiriri Tasorentsi, te aneroji antane.

²⁰ Ayotirica otimi antane, ¿paita inquenqueshireteri Tasorentsi? Tempa itsoteiro maaroni, iojeitaque maaroni antajeitiri.

²¹ Aisati, nonintane, ariorica ayojeite te aneroji antane, ayojeite aisati ocameetsati anquenquetsatacapinijeiteri Tasorentsi.

²² Ariorica anquemisantero icantaqueeri, aisati amateneri icoacaqueeri, ayojeitaque ariorica anquenquetsatacayeri, aitaque inquemaquee.

²³ Jero oca icantaqueeri: “Pinquemisanteri notomi Jesoquirishito. Pimoncarateneri icantaquempiri iriori: ‘Pinintavacaajeitea’”.

²⁴ Ariorica anquemisanterojero icantaqueeri, quiso avanaqueri. Aisati iriori, quiso iroajeitaquee. Itiancajeitaquee Ishire, irootaque ayojeitancacari quiso yoajeitaquee.

4

Piojeiteri maaroni oamejeitempineri.

¹ Nonintane, eiro piquemisanrashijeitaritsi maaroni oamejeitempinemeri: yamatavitimpicari. Ariorica incantempi: “Itiancaquena Tasorentsi”, iro cantaincha pijivateri pisampiteri paitarica iroamejeitempiri, piotanteariri queariorica itianquiri Tasorentsi. Aca quipatsiqui timatsi oshequi coavetachari iramatavijeiteeme.

² Jero oca piotanteariri otiancaneppee Ishire Tasorentsi: incantajeitee irinti: “Yatirita-paaque Jesoshi, iponeaca inquitequi. Iriotaque Quirishito”. Iriojaetaque shanincatacariri Tasorentsi.

³ Iro cantaincha te itianqueriji Tasorentsi yora caari cantatsi: “Quirishito ini Jesoshi”. Iriotaque antiquirishito. Piquemacojeitaqueri icanteeti: “Impoque tseyacotearineri Quirishito”. Ainiro meeca tseyacojeitariri.

⁴ Noamere, yashijeitaquempi Tasorentsi, quiso yoajeitaquempi. Tempa ipincat-saritanotaque irinti, yanacojeitaqueri maaroni coavetachari iramatavijeitempime. Irootaque caari piquemisantantari yora tseyachari.

⁵ Tempa ishanincajeitacari iriori tseencantatsiri, irootaque iquenqueshirejeitantarori icoayetiri atiri. Iquemisantajeitavaqueri ishaninca iriori.

⁶ Aroquea ainti, ashanincajeitacari Tasorentsi, iquemisantajeitaquee maaroni iotiriri, irootaque ayotantariri quiso oajeitaqueri Ishire Tasorentsi: ora oamejeitiriri queario-tasanotatsiri. Yora caari ioterine Tasorentsi, te inquemisantajeiteeji, irootaque ayotan-tacariri yamatavijeitaca irinti.

Tsame anintavacaajeitea.

⁷ Nonintane, tsame anintavacaajeitea. Iriotaque Tasorentsi intasanotacarori yoame-jeitaquee anintavacaajeitanteari. Ariorica anintajeitiri itsipapee, arojeitaque itomimpee Tasorentsi, ayojeitiri.

⁸ Yora caari nintiri ishaninca, te irishanincateariri Tasorentsi: irishanincataquearime, inquempetaquearime, tempa yashi yoiro inintajeitaquee.

⁹ Irootaque ayotantacari inintajeitaquee, itiancaqueri Itomi irapintite quipatsiquica yoavisacojeitajee, ancantaitiyempani asaviquimotantajariri anta inquitequi.

¹⁰ ¿Janica nintasanotantatsiri? Te anintasanoteriji Tasorentsi, irinti inintasanajeitaquee. Itiancaqueeri Itomi, icamimentajeitaquee, yoavisacojeitantajeeri. Meeca te inquen-queshiretajeeroji Tasorentsi antajeivetari, eiro yoasanquejeiteetsi.

¹¹ Pineaquero nonintane, inintasanajeitaquee Tasorentsi catsini. Irootaque ocameetsa-tantari anintavacaajeitea arori.

¹² Tecatsi neerine Tasorentsi, iro cantaincha ariorica anintavacaajeitea, quiso iroajei-tanaquee Tasorentsi, aiquero ajatatiye anintasanajeitanaqueri.

¹³ Itiancajeitaqueero Ishire, quiso oajeitaquee. Irootaque ayojeitancari quiso avajeita-queri arori, aisati quiso yoajeitaquee iriori.

¹⁴ Itiancaqueri Apa Itomi aca quipatsiquica yoavisacojeitajee, maaroni. Noneajeita-queri, meeca nocomantacojeitaqueri.

¹⁵ Ancanterica: “Iriotaque Jesoshi Itomi Tasorentsi”, quiso iroajeitanaquee Tasorentsi. Aisati anquempejeitea arori, quiso avanaqueri: anquempetavacaajeitea maaroni.

¹⁶ Ari ayojeitaque inintaquee, ashirejeitacaro. Yashi yoiro inintajeitaquee. Ariorica ash-i ayero anintavacayea arori, quiso avanaqueri Tasorentsi, aisati quiso iroanaquee iriori.

¹⁷ Coajicani ancamajeitaque, iro cantaincha eiro atsaroacaaritsi Tasorentsi. Ariorica aveshirementeari, ayotanaque anintasanajeitaqueri arori, aitaque amoncaratacariri iriori Jesoquirishito.

¹⁸ Ariorica ayojeitaque inintajeitaquee, eiro atsaroacaaritsi. Ariorica inintasano-jeitaquee catsini, ¿jaoca ancanteari antsaroacanteariri? Ayojeitericame iroasanque-jeitaquee, aitaque antsaroacayearime. Yora tsaroacaariri Tasorentsi, tequeratsita iriote irinintasanoteri.

¹⁹ Ijivataquee Tasorentsi inintajeitaquee, tsame meeca anintajeiteri arori.

²⁰ Incanteeterica: “Nonintiri Tasorentsi”, iro cantaincha inquisherica ishaninca, tsee-yari ini. Terica irinintajeiteriji ishaninca iriori, tecatsi incantari irininteri Tasorentsi. Pineaquero, terica irimatero irininteri ishaninca ineapinitiri, ¿jaoca incanteari irinintan-teariri Tasorentsi? Te irineeriji irinti.

²¹ Jero oca icantajeitaqueeri Quirishito: “Ariorica anintiri Tasorentsi, aisati anquem-peteri ashanincapee, anintajeiteri”.

5

Ocarataque mava iotacaajeitaqueeri Quirishito ini Jesoshi.

¹ Ariorica ayojeitaqueri Jesoshi iriotaque Quirishito, aitaque yashijeitaquee Tasorentsi. Ariorica anintiri Apa, anintiri aisati Itomi.

² Ariorica anintiri Tasorentsi, anquemisantero icantaqueeri, ayotanteari anintajeitiri maaroni yashijeitacari.

³ Ariorica anintasanoteri Tasorentsi, anquemisantasanoteri icantaqueeri. Te ompomer-entsitasanoteaji anteneri icantaqueeri.

⁴ Ariorica yashijeitaquee Tasorentsi, eiro aijatiritsi tseencantatsiri. Iro caari aijatantari, aquemisantaqueri Tasorentsi.

⁵ ¿Janica caari oijatiri tseencantatsiri? Tempa yora iotiriri Jesoshi, cantatsiri: “Iriotaque Jesoshi Itomi Tasorentsi”.

⁶ Peerani, ipocantacari Jesoquirishito quipatsiquica, ivaotisatataca aisati icamimenta-jeitaquee, ayojeitantacari Quirishito ini. Te apatiro ivaotisatataca, aisati icamimenta-jeitaquee. Aisati oamejeitaquee Ishire Tasorentsi jaoca icantari. Tampatica oamejeitaquee.

⁷ Ocarati mava iotacaaqueeri Quirishito ini:

⁸ Ishire Tasorentsi, ivaotisatataca Jesoshi, aisati icamimenta-jeitaquee. Omoncaratavacaaca, iotacaa-jeitaquee jaoca icantari Jesoshi.

⁹ Tempa ashirejeitacaro icamantaqueeri atiri, iro cantaincha yanacojeitaqueri Tasorentsi, queario yoametantaque irinti. Icamantacotasano-jeitaqueri itomi.

¹⁰ Ariorica aquemisantaqueri Itomi, aquenqueshiretasanotaqueri. Yora caari quemisantari Tasorentsi, te irishiretareoji icamantacotiriri Itomi: itseencaqueri Tasorentsi, ijitiri irio tseeyachari.

¹¹ Aquemisantaqueri ainti Itomi, irootaque irisavicacanta-jeitajeeri Tasorentsi anta in-ampiqui, ancantaitiyempani.

¹² Aitaque incantaitiyempani iraneaje inquitequi maaroni iotiriri Itomi. Yorari caari iotiri, tecatsi incantea irisavique anta inquitequi.

Incantiri: “Pinquenquetsatatacapiniteri Tasorentsi”.

¹³ Piquemisantaqueri Itomi Tasorentsi, meeca nosanquenajeitimpio piotanteari pincantaitiyempani pane anta inquitequi.

¹⁴ Eiro apashiventatsi anquenquetsatacayeri: timatsi icoacaaqueeri ancantapiniteri. Ariorica amoncaratatuero ayojeitaque ari inquemisantaquee.

¹⁵ Ayojeitaque paitarica ancantari, inquemisantaquee. Aitaque irimataqueenero oca ancantari.

¹⁶ Ariorica pineeri piyemisantaririnte yantaquero caari cameetsatatsi, iro cantaincha terica intseenqueriji Tasorentsi, pincantacoventeri iroavisacotanteari. Timatsi yantaqueri pashini tseencantasanotatsiri: ariorica pineacotaqueri, piotanaque irijate irinti Sharincaveniqui. Te noncantempiji pincantacoventeri irinti.

¹⁷ Te oncameetsateji catsini antayetero caari cameetsatatsi, iro cantaincha eiro ajitashitatsi irijate Sharincaveniqui maaroni antayetirori.

¹⁸ Ayojeiti ariorica yashijeitaquee Tasorentsi, te antapinintajeroji caari cameetsatatsi. Yojocacovantaquee Itomi, tecatsi incantee camaari.

¹⁹ Ayojeitaque ashanincajeitacari Tasorentsi. Irintiquea maaroni tseencantatsiri, ipincatsariventajeitaqueri camaari.

²⁰ Ayojeitaque ipocaque peerani Itomi Tasorentsi, iriotaque iotacaa-jeitaqueeri, ayojeitantariri yora Tasorentsisanori. Ashanincajeitacari iriori, aisati ashanincajeitacari Itomi, yora Jesoquirishito. Aisati iquempetacari iriri, Tasorentsisanori ini iriori. Yoanea-jeitaquee, ancantaitiyempani aneajeitanaje anta inquitequi.

²¹ Noamere, piquemisantirocari ijitasorentsitashiyeetari.

Ari ocarati. Narotaque sanquenajeitimpiori: *Joa*

YAPIITAJIRO JOA ISANQUENATINIRI IROAMERE

Ivetsajeitari.

¹⁻² ¿Ainirompi tsio? ¿Ainirompi, nioti? ¿Tecatsimpa oajeitempine? Narotaque jivatacaajeitaqueriri ayemisantaririnte aca. Niotaque, tsio, aviro icoyeaque Tasorentsi piotantacariri, aisati icoyeaajeitaqueri pitomipee. Queario, nonintasanoajeitaquempi. Te apaniro noninta-jeitaquempi narori, aisati iquempejeitaca maaroni ayemisantaririnte: inintajeitaquempi. Oshequi ashirejeitacaro irineane Tasorentsi, aitaque ancantaitiyempani, tempa queari-otasanotaque ocamantajeitaqueeri.

³ Oshequi inintajeitaquee Apa Tasorentsi, aisati itomi, yora Avincatsarite Jesoquirishito, queario oni oca yoamejeitaqueeri. Aisati incantaitiyempani incavintsaajeitee, irineshi-noncajeitee, irisavicacaajeitee cameetsa.

Intime coajica oshequi tseyacotearine Quirishito.

⁴ Ari noneayetaqueri aparopee pitomipee, oshequi noveshireimentajeitacari. Cameetsa isavicajeiti, iquemisantajeitaquero queariotatsiri yoamejeitaqueeri Apa Tasorentsi, aisati yantiniri maaroni icoacaajeitaqueeri.

⁵ Meecca, noshaninca, nocoaque nonquenqueshiretacaajempiro intajeitaqueero Tasorentsi yoamejeitaqueeri peerani: ocameetsataque anintavacaajeitea, maaroni. Te naro intearone noamejeitempiro oca.

⁶ Ariorica aninteri Tasorentsi, amajeiteneri maaroni icoacaajeitaqueeri. Ari icoaca-jeitaquee ashi ayero anintavacaajeitea, maaroni, anquearioventero. Tempa irootaque icantajeitaqueeri peerani.

⁷ Itimi meecca oshequi amatavitantatsiri, yoametantiro tseyantsi, icantajeiti te imponeempaji Jesoshi inquitequi, te iratiritapeeji. Aisati icanti te inquempejeiteeji arori, caari ini Quirishito. Yora tseyacotariri Quirishito iquishiri iriori, te incoyeji anquemisan-teri.

⁸ Paamayeariyea: yamatavitimpicari. Oshequi piquearioventaquero pantapinitiniri Tasorentsi icoacaquempiri; ariorica pincanteani, eiro patsipetashitarotsi, impinatempi iriori. Iro cantaincha paamayeari yora coatsiri iramatavijeitempi: ariorica pojataqueri, pantsipetearo maaroni pantayevetanariri Tasorentsi, tecatsi impinatempi.

⁹ Pojoquiricari Quirishito: eirorica pishiretarotsi yoamejeitaqueeri iriori, te pioteriji Tasorentsi. Iro cantaincha ariorica pincanteani pishiretearo yoamejeitaqueeri, pioteri aisati Iriri: quiso iroajeitanaquempi Apa aisati Itomi.

¹⁰ Irijatashitempirica atiri iroamejeitempi, piotavaqueri paitarica yoametacotapinitiriri Quirishito. Terica ontampaticate oca icoavetari iroametempiri, eiro paacameetsatavaque-ritsi: eiro pisavicacairitsi pivancoqui, eiro piquemisantiritsi catsini.

¹¹ Ariorica paacameetsatavaqueri, pishanincajeitacari: aitaque pincaajeitaqueri poametantero tseyantsi. Te oncameetsateji catsini.

Ivecarataquero isanquenare.

¹² Timatsiquera oshequi pashini nocoaque noncamantajeitempiri, iro cantaincha te noninteji nosanquenatempiro. Nocoaque nojate noneempi. Ariorica anevacaajeitea, noncamantasantempiro maaroni. Aisati anquimoshirejeitanaque maaroni.

¹³ Ainiro aca otomipee pireento. Tempa iriojeitaque icoyeaqueri Tasorentsi. Ivet-sajeitaquempi. Ari ocarati.

Narotaque sanquenatimpirori: *Joa*

MAVATAPAAQUE ISANQUENATINIRI JOA IROAMERE

Ivetsatari Joa Cayo.

¹ ¿Ainirrompi Cayo? ¿Tecatsimpa oyempine? Narotaque Joa, jivatacaajeitiriri ayemisan-
taririnte aca. Queario, oshequi nonintaquempi.

*Cameetsa pintacotapiniteari ayemisan-
taririnte.*

² Noncamantempi, nonintane, nocantacoventapinitaquempi: nocantiri Tasorensi in-
tasoncacoventempi cameetsa pisavicanteari. Niotaque piquemisantasanotaque, aisati
nocantacoventimpi pishintsivatsasanotanteari.

³ Ainiro areejeitachari ayemisan-
taririnte, icamantapaaquena piquearioventiro pisav-
iqui cameetsa, aisati piquemisantasanotaqueri Tasorensi, irootaque noquimoshireimen-
tantaquempi.

⁴ Ariorica noquemacotaqueri noshaninca iquemisantasanotaque, aitaque
noquimoshiretasanotaque.

⁵ Nonintane, piquearioventaquero picavintsaajeitaqueri ayemisan-
taririnte, pitsotea-
queri: yora poneayetachari pashinipeequi nampitsi, maaroni. Cameetsataque.

⁶ Icamantajeitaquena maaroni ayemisan-
taririnte aca, oshequi pinintajeitavaqueri. Ar-
iorica irareetajempi aisati pinampiqui, ocameetsataque pintacoteari; ariorica irijatanaje,
pimpajeitavajeri coiteimojeitariri: irootaque icoacaquempiri Tasorensi.

⁷ Iquenaquenayetanaque iquenquetsatacotapinitiri Jesoquirishito, tecatsi incoacojeit-
eri yora caari quemisantatsi,

⁸ irootaque ocameetsatantari intacojeiteari arori, amitacojeiteri inquenquetsatero
irineane Tasorensi: tempa queariotasanotaque ocamantayetaqueeri.

⁹ Timatsi nosanquenavetanariri ayemisan-
taririnte anta, iro cantaincha te impincatsate-
naji yora Iriotereshi. Icoaveta irijivatacanteme iriori.

¹⁰ Ariorica nareejeitempi nonquenqueshiretacaajeitapaaquempi jaoca icantari: itsee-
acotaquena, icantimataquena. Aisati, ariorica yareevetari ayemisan-
taririnte anta, te
irineshinoncatavaqueriji. Aisati iquisaqueri yora neshinoncatavaqueriri areejeitachari,
aisati te irinintacaajeiteriji incarajeiteri inquemisantajeite.

¹¹ Nonintane, te oncameetsateji catsini oca yantayetaqueri yoranqui: eiro piquem-
petaritsi. Irinti pinquempetea antirori cameetsatasanoyetatsiri. Yora antapiniyetirori
cameetsatsiri, iotiri Tasorensi; yora antapiniyetirori caari cameetsatsi, te irioteriji.

¹² Queario, icameetsatasano-
taque Irimitirio. Tempa inecameetsajeitaqueri quemisan-
tajeitatsiri aca, aisati noneacameetsataqueri, aisati avirori pineacameetsataqueri.

¹³ Timatsiquera oshequi nocoaque noncamantempiri, iro cantaincha te noncoyeji
nosanquenatempiro.

¹⁴ Naamaaca irotaintsi noneempi: ariorica aneavacayea nontsoteaquempiro, nonca-
mantempiro maaroni.

¹⁵ Cameetsayea pisavique. Ivetsajeitaquempi ashanincapee aca. Aisati ashanincapee
ara, novetsajeitari, maaroni.

Narotaque sanquenatimpirori oca: *Joa*

YORA JORASHI ISANQUENATINIRI IYEMISANTARIRINTE

Ivetsajeitari Jorashi iyemisantaririnte.

¹ ¿Ainirompi, noyemisantaririnte? ¿Tecatsimpa oajeitempine? Narotaque Jorashi sanquenajeitimpirori oca, narotaque antaveetiniriri Jesoquirishito; narotaque irirenti Santiaco. Ari niotaque icoyeajeitaquempi Apa Tasorentsi, irootaque piquemisantajeitantariri, aisati oshequi inintajeitaquempi. Iquempeyeaventajeitaquempi, pineanteariri coajica Jesoquirishito.

² Nocoaque incavintsaajeitempi, cameetsa irisavicacaajeitempi. Aisati nocoaque paacameetsatavacaajeitea maaroni, pinintavacaajeitea.

ICantiri: "Paamayeariyea coatsiri iramatavitempi".

³ Piojeitaque oshequi nonintajeitaquempi. Tempa yoavisacojeitaquede Tasorentsi. Meeca noquenqueshirevetaca noncamantempime jaoca icantajeitaqueeri: itasoncaven-tajeitaquede, icavintsaajeitaquede, maaroni; iro cantaincha meeca eiro nocamantimpirotsi oca. Timatsi meeca pashini noninti noncamantempiri, irointi. Nocoacaaquempi pinquearioventero pinquemisantero yoamejeitaquempiri Tasorentsi, te ompashinitap-initeaji. Eiro piquemisantiritsi yora itsipapee coajeivetachari iramatavijeitempime.

⁴ Ainiro yora cantatsiri: "Noquemisanti", iro cantaincha yamatavitanti. Ioti icav-intsaajeitaquede Tasorentsi, yoavisacojeitaquede. Meeca icantashijeitaquempi yoranqui: "Cameetsa antajeitaquero paitarica acoajeitiri, eiro iquisheetsi Tasorentsi", iro cantain-cha irointi yamatavitanti. Te impincatsajeiteriji Avincatsarite Jesoquirishito, irootaque irijatanteari Sharincaveniqui. Tempa irootaque ocantiri Sanquenarentsi.

⁵ Timatsi piotasanojeitaqueri, iro cantaincha noninti nonquenqueshiretacaajempiro aisati. Peerani oshequi yashinoncaajeitaca maaroni joriopee anta Ejjipitoqui, iro cantain-cha yoavisacojeitaqueri Tasorentsi, yajeitanacueri pashiniqui quipatsi. Iro cantaincha iconoajeitacari joriopee tseenquiriri Tasorentsi, irootaque yoantacariri iriori.

⁶ Aisati itimaveitani inquitequi inampireni Tasorentsi, icameetsaveitani catsini, iro cantaincha ipiatsatacari Tasorentsi. Meeca te irisavicajeji anta ocameetsaitetinta, ainti yojocacueri Tasorentsi oshaaviji, anta otsitenitasanotinta. Aitaque isavicaqueri irosati incantacoventanteariri, iroasanquetasanotanteariri.

⁷ Aisati iquempejeitaca yora soromasatini aisati comorasatini, aisati maaroni ishan-incapeeni iriori: oshequi yantajeitaquero caari cameetsatatsi. Yantajeitaquero iashiane-pee, itsinampaavacaajeitaca, maaroni. Ari yoasanquetaajeitaqueri Tasorentsi, maaroni; irootaque ayojeitancari otimi Sharincaveni, iroasanquetaajeitanteariri maaroni antapinitirori caari cameetsatatsi: incantaitiyempani inquematsicataro paamari.

⁸ Iro cantaincha te inquenqueshireteaji yora amatavitantatsiri. Icantani yantayeta-quero iashiane, itsinampavacaaca; itseencaqueri ivincatsarite, ishirontimentajeitacari; icantimajeitaqueri yora inampirepee cameetsari Tasorentsi.

⁹ Peerani icanteetini: icamantacaniri Moishishi, icoaveta Satanashi iraanacuqueme anta Sharincaveniqui. Aisati iqumpetaca Miyeri, yora ivincatsarite inampirepee Tasorentsi: icoaveta iraanacuqueme iriori inquitequi. Ari icantavacaaca apite. Ari yora Miyeri oshequi itsaroacaari Satanashi, oshequi ipincatsataqueri, irootaque caari ipiatsatantari. Apatiro icantiri: "Irinti Tasorentsi piatempineri". Irootaque icantaqueriri.

¹⁰ Noshaninca, yora amatavijeitimpiri te iriojeiteji irisavique cameetsa, iro cantaincha icantimajeitaquede arori ariorica atimi cameetsa. Te aneroji iotantari, iquempejeitacari avira: yantashijeitaro paitarica icoiri. Irootaque iroasanquejeitanteariri Tasorentsi,

¹¹ irashinoncaajeitaquede. Iquempejeitacari yora Caini, yora oiriri irirentini. Iquempe-jeitacari yora Varama: ipinayeetiri qirequi, irootaque yantantarori caari cameetsatatsi. Iquempejeitacari aisati yora Core: ipiatsatacari peerani Moishishini. Tempa iroasanque-jeiteri Tasorentsi, maaroni.

¹² Pamene, ariorica papatotapinita poajeita, picoajeiveta pinintavacaajeiteame, pincav-intsaavacaajeiteame. Iro cantaincha icarajeitaquempi yoranqui, caari pimatasanotantaro cameetsa. Te irioteji iriori impashiventea, oshequi yoajeitaca, te inquenqueshireteriji itsipajeitari. Oshequi ineaveetashita, vero, vero, iro cantaincha te iramitacojeitempiji. Iquempetacaro mencori amatavijeitimpiri: amavetaro antearo tampea, pijitashijeiveta ompariye incani, iro cantaincha, te. Iquempetacaro inchato caari timatsi oitsoqui, te oncanteji, ocameetsati anchaquitero, amponquitireajero, antaajero.

¹³ Tempa pineapinijeitiro otsapijaqui opitsishimoretaque, te pineacameetsateroji: ari iquempejeitari iriori, te oncameetsateji yantayetiri, oncameetsateme impashiventeame. Pishiaccantavetacari impoquiro iotacalmpiri jaoca pinqueneri, iro cantaincha yamatavi-jeitaquempi. Irijatanaque iriori anta otsitenitanotaque, incantaitiyempani irisavique.

¹⁴ Peerani catsini iquenquetsatacotaquerini Enoco, yora ishanincani Aran, icantini: “Pamene, coajica impoque Avincatsarite, incarajeiteri oshequi catsini inampirepee.

¹⁵ Iroasanquetaajeitapaqueri maaroni caari cameetsajeitsine. Iriojeiteri maaroni tseencajeitiriri: ipiatsajeivetacari, icantimajeivetacari, irootaque iroasanquetaajeitan-teariri”.

¹⁶ Ari iquisashirejeitanaca, icantimajeitaqueri ishaninca, icoasanaque irantapinitero caari cameetsatatsi, oshequi ishemejeitaque. Ipincatsatamempeashitacari ishaninca iramatavitanteariri.

¹⁷ Ari, noshaninca, oshequi nonintajeitaquempi, irootaque nocoacantimpirori pinquen-queshiretasanotero icantayetimpiri itiancanepee Avincatsarite Jesoquirishito.

¹⁸ Tempa icamantajeitaquempini: “Coajica pineasanojeitavaqueri tseencantasanotatsi, irantashijeitearo paitapeerica icoaqueri iriori”.

¹⁹ Iriojeitaque amatavijeitiriri itsipapee, irootaque iquisavacaajeitancari; oshequi itseencantajeiti, te quiso oyeri Ishire Tasorentsi.

Icamantiri Jorashi icoacaqueriri.

²⁰ Ari, nonintane, pinquemisantasanojeiteri avinti Tasorentsi, impoiji pimasanojeit-ero pintime cameetsa. Pincoasanotero Ishire oametasanojeitempi pinquenquetsatacay-eri.

²¹ Pincoasanojeite irinintajeitempi Tasorentsi. Piojeitaque incavintsaajeitempi Avin-catsarite Jesoquirishito, irajeitanaquempi anta inquitequi, pincantaitiyempani pisav-iquimojeiteri.

²² Pincavintsaasanojeiteri yora caari iojeitiri Tasorentsi, poametasanojeiteri.

²³ Poavisacojeiteri pishaninca, itaacari anta Sharincaveniqui. Queariompia, piquem-petaricari yora piquemisantacaajeitaqueri. Eiro pantimatirotsi catsini caari cameetsatatsi yantajeitiri iriori.

²⁴⁻²⁵ Tempa timatsi Tasorentsi apaniro, aisati iriori Avincatsarite Jesoquirishito: yora oavisacojeitaqueeri. Ainiro itasorenca irinti, iquempeyeasanojeitaquempi eiro panti-matantarotsi caari cameetsatatsi. Iraajeitanaquempi inquitequi: anta ocameetsaitetasan-otaque catsini. Aitaque anta anquimoshireventajeitapaajeri, maaroni. Tsame meeca an-camantajeiteri atiri: “Icameetsatasanoti Novincatsarite, ipincatsaritanoti, itasorentsi-tasanoti”. Aitaque ancantaitiyempani ancamantapinijeiteri itsipapee, eiro ajocajirotsi. Aitaque ancantaitiyempani.

Narotaque sanquenajeitimpirori: *Jorashi*

ICAMANTIRI TASORENTSI JOA PAITARICA IRANTAYETERI JESOQUIRISHITO.

Intanacaro Joa isanquenare.

¹ Intasanotacaro Tasorentsi, icamantaqueri Jesoquirishito, impoji yovaajiniri iriori inampire, impoji iriori yovaajanaro narori, meeca novaajeitempiro avirori. Nopincatsa-
taqueri Tasorentsi, aisati piquempejeitaca, pipincatsajeitaqueri avirori; meeca icamanta-
jeitaquee paitarica iranteri Jesoshi: eiro osamanititsi irimatantearori.

² Ari oshequi iotacaaquena Tasorentsi aisati Jesoquirishito: aiuro icamantaquenari
aisati inijaquenari. Meeca noncamantajeitempiro jaoca ocantari.

³ Iroimoshirencajeiteri Tasorentsi maaroni neanateroneri oca nosanquenajeitaque-
mpiri aisati maaroni quemajeitavaqueroneri. Iro cantaincha eiro iguemashitarotsi,
irointi irimatasanotero ocantaqueeriri inquimoshiretanteari. Pamene, eiro osamanititsi
irimatantearori Jesoshi maaroni oca noquenquetsatacotiriri.

⁴ Narotaque Joa sanquenatirori oca. Nosanquenajeitaqueeneri savicajeitatsiri anta
Ashiaqui, aisati iriori yora quemisantajeitatsiri anta 7 nampitsipeequi. ¿Ainirojeimpi,
maaroni? Aiuro Tasorentsi iriori, irosati icanta: itimini peerani, irosati meeca; irosati
incanteani, coajica. Nocamantaqueri: “Pincavintsaajeiteri noyemisanteririnte anta
Ashiaqui, cameetsa pisavicacajeiferi”. Irosati nocantaquerori Ishire, ora quiso oiriri
ipincatsariventanti.

⁵ Irosati nocamantaqueriri Jesoquirishito: tempa cameetsa yovaajeitaqueero arori
icantaqueriri Tasorentsi. Iriotaque nijantajirori itinaanaja, aisati ipincatsariventajeitiri
pincatsarivetachari aca quipatsiquica. Oshequi antajeivetacaro caari cameetsatsi aja-
jeitanteameri Sharincaveniqui, iro cantaincha oshequi ineshinoncajeitaquee, yaparajati-
mentaquerero iriraja, yoavisacojeitaqueeri.

⁶ Icantajeitaquee: “Pincarajeitena ampincatsarijeitaje, aisati pinquenquetsatacaapini-
teri Apa: pincanteri iramitacojeiteri piyemisanteririnte”. Tsame ampincatsatasanojeiteri
maaroni, ancantaitatijempani. Aitaque ancantajeiteari.

⁷ Pamene, inquenapaaje mencoriqui, aitaque aneajeitavajeri maaroni. Aisati irinea-
jeitavajeri pajacojeivetacariri peerani. Ari intsaroacajeitavaqueari maaroni tseenca-
jeitiriri, iriraajeitanaquena, jii, jii. Queario, aitaque oncanteari.

⁸ Te impashinitapiniteji Avincatsarite, itasorentsitaque, irosati icantani: peerani, aisati
meeca, aisati coajicani. Icantani: “Narotaque intacarori maaroni, aisati narotaque ve-
carayeroneri maaroni”.

Jjivataqueri ineaqueri Joa.

⁹ Ari, noyemisanteririnte, aquempetavacajeitaca: aquemisantaajeitaqueri Jesoshi,
irootaque yoashinoncaapinijeitantaqueeri tseencantatsiri. Ipincatsariventajeitaquee Je-
soshi, irootaque amavejeitantarori. Noquenquetsatiro irineane Tasorentsi aisati no-
quenquetsatacotaqueri Jesoshi, irootaque yojocanteetaquenari aca ovoyejaqui ipajiyee-
tiri Patimoshi.

¹⁰ Ari tomincoqui noquenqueshiretasanotaqueri Tasorentsi, irosati noquemantacariri
iquenquetsatacaquena. Antearojenca ineanataquena, iquempetacari tiorentsi; jajen-
caitaque irineane,

¹¹ icantaquena:

–Pisanquenatero maaroni nonijaayetempiri, impoji pimpacanteri quemisantajeit-
siri anta Ejesoqui, Eshimirinaqui, Perecoaqui, Tiataraiqui, Sarireshiqui, Jirarerejaqui,
jero Araoriseaqui. Ocarataque inampipee 7.

¹² Nopitsocashitanacari yora quenquetsatacaquenari; ari noneaquero onantari veera,
ocarataque 7, yovetsiqueetiro oro.

¹³ Nianqui noneaqueri isateca quempetariri Jesoshi, yora poneainchari inquitequi
peerani, iquempetapaaca yatirintapaacanari. Iquitsaataro tsantsashitsari iitsaare, on-
aque inejiqui quempevetarori ishiticatsaqui, yovetsiqueetiro oro.

¹⁴ Oquitamaroishitasanotaque iishi, oquempetacaro ampeji aisati sharaca: quitamaro
catsini. Oquempetacaro iroqui paamari amorequi.

¹⁵ Oshipaquireaque iiti, oquempetacaro ashirotsatsiri saancanatatsiri. Antearojenca
ineanati, iquempetacaro oshequi ovarijare antearo, sooo.

¹⁶ Yajiricaqueri iracosanoriqui 7 impoquiro; ocontetapaaque ivantequi ivesamento, ot-
saampiti apite omititsaqui; oshipaquireasanotaque ivoro, oquempetacari catsirincaiteri,
ishipaquireasanotaque, shipaquirerere.

¹⁷ Noneantacariri, notaanaque iitiqui, toren. Oquempevetaca nocamaque. Ipamitaquena iracosanoriqui, icantaquena:

–Eiro pitsarocaaanatsi, narotaque intasanotacarori maaroni, aisati narotaque vecarayerone maaroni.

¹⁸ Naro aneasanotatsiri. Nocamasanovetaca, iro cantaincha naneanaji aisati; meeca noncantaitiyempani nanee. Eiro nocamajitsi aisati. Narotaque cantajeiterine ariorica incame atiri, eirorica icamitsi; narotaque cantajeiterine janicarica jatatsineri inquitequi aisati janicarica jatatsineri Sharincaveniqui.

¹⁹ Meeca pisanquenatero oca pineaqueri, aisati pisanquenatacoteri nantayeri coajica.

²⁰ Meeca noncamantempiro caari pioti incaranqui. Pineaqueri impoquiro najiricaqueri: ishiaqueri yora jivatacaajeitiriri quemisantajeitatsiri anta 7 nampitsipeequi. Meeca piotaque nopincatsariventajeitiri. Aisati ora onantari veera: oshiaqueri maaroni quemisantajeitatsiri anta nampitsiquinta. Meeca piotaque quiso noajeitanaqueri.

2

Isanquenajeitiniri quemisantajeitatsiri anta Ejesoqui.

¹ Jero aisati icantaquenari Jesoshi:

–Jero oca pisanquenateneriri yora jivatacaajeitiriri quemisantajeitatsiri anta Ejesoqui: “Meeca noncamantempiro icamantaquenari yora ajiriquiriri impoquiro iracosanoriqui: yora aniitatsiri anta onantariqui veera, caratatsiri 7.

² Icantimpi: ‘Niotaquero pantayetaqueri, niotaquero pipomerentsiventaquenaro nocoacampiri, te pishemearoji. Niotaquempi te pishinetimateriji piyemisanrarinte irantapinitero caari cameatsatsi. Ainiro jatashivetimpiri cantashitachari: “Narotaque itiancane Quirishito”, iro cantaincha piotaqueri iramataviterime quemisantatsiri: niotaque te pishineteriji inquenquetsatacayempi.

³ Niotaque oshequi pineacatsitimentaquena, iro cantaincha te pishemearoji, te pojocajeroji pantayetaquenari.

⁴ Iro cantaincha ainiro pojocaqueeri aparo: peerani pinintasanovetaquena; meecari, meeca te pinintasanotenaji.

⁵ Pinquenqueshirejeitea jaoca picantaniri peerani; te pinquempejeiteaji meeca. Pinquenqueshirejeitea pinquempejeitanteari peerani, iroaquerani piquemisantajeitajena. Pinquenqueshireempa, pinintasanojeitajena aisati. Eirorica pinintajanatsi, nojatashitimpicari, notsoncajeitimpicari.

⁶ Iro cantaincha timatsi noneacameetsatantimpiri: te pineacameetsateroji yantayetaqueri oijajeitiriri Nicorashi, yantashiyetaro caari yai. Aisati narori, te noneacameetsateroji yantajeitiri.

⁷ Otimirica piquemantari, pinquemavaquero oca nocamantaquemperi. Peerani otimiri Erequi inchato oaneantatsiri: arioricame iroyearome peeraniniri, incantaitiyempanime iraneeme. Meeca ainiro quempevetarori anta ocameetsaitetinta, anta Tasorentsiqui. Ariorica cameetsa pisavicajeite aisati pimatapinitaquenaro nocoacampiri, onquempetaquea poaquearo inquitequi oaneasanojeitempineri: queario pincantaitiyempani pisavicajeite anta inquitequi’.

Irotaque isanquenatacaquenari Jesoshi.

Isanquenajeitiniri quemisantajeitatsiri anta Eshimirinaqui.

⁸ Aisati icantaquena Jesoshi:

–Jero oca pisanquenajeiteneriri yora jivatacaajeitiriri quemisantajeitatsiri anta Eshimirinaqui: “Meeca noncamantempiro icamantaquenari yora intasanotacarori maaroni, vecarayeroneri maaroni. Icaamaque peerani, impoiji itinaanaja.

⁹ Icantimpi: ‘Niotaquero pantayetaqueri, niotaquero oshequi picatsitimentaquena, niotaquero pashinoncaimentaquena: iro cantaincha eiro pipeacotarotsi nompinatasanotempi anta inquitequi. Niotaque oshequi icantimajeitatempi yora shiavetariri quemisantatsiri. Icantanirojeiveta: “Noquemisanti”. Jaaquea narori, te inquemisantajeitenaji, irinti iquemisaniroti Satanashi.

¹⁰ Queario, oshequi pinquematsicatearo, iro cantaincha eiro pitsaroashiretitsi. Yora camaari iroiminqueaarantacantempi caravosoqui, icoaque iriotantempiri queariorica piquemisantasantaquena. Oncarate 10 quitaiteri oshequi pineacatsiyetearo paitapeerica. Pinquearioventenaro maaroni nocamantaquemperi, irosati pincamanteari; impoiji nompinatasanotempi, aisati pincantaitiyempani panee anta nonampiqui.

¹¹ Otimirica piquemantari, pinquemavaquero oca nocamantaquemperi. Ariorica cameetsa pisavique aisati pimatapinitenaro nocoacampiri, eiro pijatitsi avirori Sharincaveniqui’.

Irootaque isanquenatacaquenari Jesoshi.

Isanquenajeitiniri quemisantajeitatsiri anta Perecamoqui.

¹² Aisati icantaquena Jesoshi:

—Jero oca pisanquenateneriri yora jivatacaajeitiriri quemisantajeitatsiri anta Perecamoqui: “Meeca noncamantempero icamantaquenari yora ashitarori ivesamento, tsampitatsiri apite omittisaqui.

¹³ Icantimpi: ‘Niotaquero maaroni pantayetaqueri, niotaque ara pisaviquira itimi aisati oshequi pincatsatiriri Satanashi: queario isaviquimojeitimpi iriori. Niotaque piquemisantasanotaquena, te pojoquenaji. Peerani itimini pinampiqui Antipashi: yora quenquetsatacotanari, antanarori maaroni nocoacairiri. Pineacojeitaqueri yoyeetaqueri, iro cantaincha te pojocajeiteroji piquemisantaquena.

¹⁴ Iro cantaincha ainiro pantayetiri caari noninti. Noshiacantempero: ainiro yoametaqueriniri Varama peerani Varaca; impoiji iriori yantacaajeitaqueri pijorioririnteni caari cameetsatatsi: ipincatsatashijeitaro yovetsicayetiri atiri aisati yantapiniyetiro caari yai. Ainiro meeca picarajeitiri shiaqueriniri yora Varama: yantacaarantaquempi pipincatsatashiyetaro yovetsicane atiri aisati pantashiyetaro caari pal.

¹⁵ Queario iriojeitaque oijajeitiriri Nicorashi. Te oncameetsateji yantajeitaqueri: yantacaajeitimpicari yantayetiri iriori.

¹⁶ Pinquenqueshirejeitanaquea, eiro piquempetajatsi chapinqui. Eirorica pojocajeitrotsi pantayetiri, nojatashjeitimpicari nompoyereajeitapeempli. Ainiro novesamento novantequi nompesajeitantaquempi, peti, peti, peti.

¹⁷ Otimirica piquemantari, pinquemavaquero oca nocamantaquempi. Ariorica cameetsa pisavique aisati pimatapinitaquenaro nocoacaimpiri, nompaquempi poyeari caari conijatatsi, oquempetaca nopashijeitacari peeraniniri mana. Aisati nomperi quitamarori mapi, nosanquenatero mapiqui ivajiro iroaquerari: iriotero iriori ivajiro, iro cantaincha eiro iotrotsi itsipapee”.

Irootaque isanquenatacaquenari.

Isanquenajeitiniri quemisantajeitatsiri anta Tiatiraqui.

¹⁸ Aisati icantaquena Jesoshi:

—Jero oca pisanquenateneriri jivatacaajeitiriri quemisantajeitatsiri anta Tiatiraqui: “Meeca noncamantempero icamantaquenari Itomi Tasorentsi: oquempetacaro iroqui paamari amorequi, aisati oshipaquirea que iiti, oquempetacaro ashirotsatsiri saancanatsatsiri.

¹⁹ Icantimpi: ‘Niotaquero pantayetaqueri. Niotaque pinintavacaajeitaca, piquemisantaquena, pintacojeitacari pishaninca, piquearioventaquenaro maaroni nocoacajeitaquempi. Aiquero pijatatiye pimatasanajeitanaquero.

²⁰ Iro cantaincha ainiro pantiro caari noninti: pishinetaquero ora Jesavere oamejeitaqueri quemisantinari yantayetantacarori caari yai aisati iquemisantantacarori yovetsicayetiri atiri. Ocantaveta: “Noquenquetsatacotapinitiri Tasorentsi”, iro cantaincha amatavitapinijeitaqueri quemisantajeitanari.

²¹ Noyeavetacaro onquenqueshireanajeame; iro cantaincha te oncoyeji onquenqueshiretea, te oncoyeji ojocayetajero antayetiri caari ai.

²² Meeca noncamantemperi: nojoquiitacayearo, aisati eirorica iquenqueshireajeitatsi yora quemisantajeitirori, noashinoncaasanojeiteri iriori catsini.

²³ Queario noajeiteri maaroni oijajeitirori Jesavere, nontsoncajeiteri, maaroni. Impoiji iriojeitanaque maaroni quemisantajeitatsiri niotaquero maaroni iquenqueshirejeitiri atiri aisati niotaquero maaroni icoajeitaqueri. Ocameetsatirica pantajeitaqueri, aitaque noncavintsaasanojeitempi; iro cantaincha terica oncameetsateji, aitaque noashinoncaajeitempi.

²⁴ Yorari pitsipapee, caari quemisantiro Jesavere, aisati caari antasanotiniri icantavetariri Satanashi, tecatsi noncantajeiteri;

²⁵ irointi incanteani inquemisantena irosati naretantapaaajari.

²⁶ Ariorica pimatapinitaquenaro maaroni nocoacajeitimpiri irosati naretantajeeri, ari nompeajempi pincatsariventajeiterineri oshequi atiri.

²⁷ Oquempetaca narori, icantaquena Apa nopincatsaritantacari, aisati noncantemperi avirori pimpincatsaritanotananaqueari. Ariorica ompariaque coviti, omporocapaaque maaroni, poyere; aisati pinquempetea avirori: pimpyereajeitajeri maaroni caari quemisantajeitana, poyere.

²⁸ Pimpincatsaritanotananaque, oshequi noaneenquempi, pinquempeteari impoiquero anteariteaquiri.

²⁹ Otimirica piquemantari, pinquemavaquero oca nocamantaquempi”.

Irootaque isanquenatacaquenari Jesoshi.

3

Isanquenajeitiniri quemisantajeitsiri anta Sarireshiqui.

¹ Impoiji aisati icantaquena Jesoshi:

—Jero oca pisanquenateneriri jivatacaajeitiriri quemisantajeitsiri anta Sarireshiqui: “Meeca noncamantempero icamantaquenari yora quiso oirori Ishire Tasorensi: yora ajiriquiriri 7 impoquiro. Icantimpi: ‘Niotaquero maaroni pantayetaqueri; ijitashiyevetimpi avirojeitaque quemisantincari, iro cantaincha niojeitimpi nainti oshequi pitseenqui.

² Queariompia, pitseencasanotajicari, pijaticari Sharincaveniqui. Te onimoteariji Tasorensi pantayetaqueri. Piquemisantaveta: pinquencheshirejeitea meeca pinquemisantasantoteari.

³ Pinquencheshiretanotanajero noneane piquemaqueri peerani: pishiretanotanajero, pinquencheshiretanajea. Eirorica piquemisantasantotajana, nojatashitempi, noсанquetayempi. Te piojeiteji jaoca oncarate nojatashitantempiri: noquempetacari coshinti, te pioteji jaocarica oncarate irijatashitantempiri incoshitantempiri.

⁴ Oshequi pitseencantajeiti, iro cantaincha ainiro timaarantaintsiri quemisantaquenari: cameetsa isavicajeiti irinti. Pantajeitaquero caari cameetsatatsi noshiacantaquempiro piquipatsitiro piitsaare; irintiquea quemisantanari, te inquipatsiteroji iitsaare; noneaquero oquitetaque, oquitamarotasanotaque. Queario icameetsataque noneacameetsantacari.

⁵ Maaroni antajeitaquerori nocoacaajeitaqueriri inquitsaataquearo ora quitamarotasantotsiri catsini. Ainiro osanquenataca ivajiropee maaroni savicatsineri inquitequi. Nompeajero ivajiropee tseencajeitanari, iro cantaincha eiro nopeajirotsi ivajiropee antiriri maaroni nocoacairiri. Aisati noncamanteri Apa: “Iriotaque yoca quemisantaquenari”. Irosati noncamantajeiteriri maaroni inampirepee.

⁶ Otimirica piquemantari, pinquemavaquero oca nocamantajeitaquempiri’ ”.

Irootaque icantajeitaqueriri Jesoshi sarireshisati.

Isanquenajeitiniri quemisantajeitsiri anta Jirarerejaqui.

⁷ Aisati icantaquena Jesoshi:

—Jero oca pisanquenateneriri jivatacaajeitiriri quemisantajeitsiri anta Jirarerejaqui: “Meeca noncamantempero icamantaquenari yora cameetsasasantotsiri, yora Quirishitosanori. Iriotaque ishanincani Iravirini, impincatsariventasanotee. Incanterica: ‘Intsipatena yoca’, eiro itimitsi tsaneemparine. Incanterica: ‘Eiro itsipatanatsi yora’, tecatsi areetacayearine.

⁸ Icantimpi: ‘Niotaquero pantayetaqueri. Peerani nocoacaitaquempi: “Pinquenet-satero noneane, namitacotempi”. Ari pimatitaquenaro, irosati meeca pimataquenaro: tecatsi incanteetempi iroimajerenteetempi. Te pishequijeiteji, aisati te pimpincatsarijeiteji, iro cantaincha piquearioventajeitaquenaro nocantajeitaquempiri. Picantajeitaqueri atiri: “Noquemisantaqueri Jesoquirishito”, te pimpashiventacayenaji.

⁹ Ainiro ashaninca quemisantiriri Satanashi, irootaque iquisantaquempiri, iro cantaincha icantashita: “Noquemisantiri Tasorensi”. Te inquemisanteriji, itseevani. Coajica nareetacaajeitajeari aviroriqui intiyeroashitantapeempiri, impincatsatashitantapeempiri: iriojeitanaque oshequi nonintajeitaquempi.

¹⁰ Yoashinoncaajeivetaquempi, iro cantaincha piquearioventaquero nocantaquempiri, te pishemearoji, irootaque nojocaacoventantaquempiri. Coajica noneantajeiteari maaroni savicajeitatsiri quipatsiqui niotanteari jaoca icantajeita. Ompomereentsitimojeitaqueari maaroni atiri; iro cantaincha, queario nojocaacoventajeitempi.

¹¹ Pamene, eiro osamanititsi nareetantajempiri. Pincanteani pinquemisantaajeite, impoiji tecatsi tsaneavaquempine pijatanaque inquitequi; pisavicapaae anta, pincantaitiyempani.

¹² Ariorica pimataquenaro maaroni nocoacaajeitaquempiri, ari nosavicacaasanotempi anta itiminta Tasorensi: eiro pipiajatsi aisati. Nosatoncaatempi pivancainaquei ivajiro Tasorensi iriotanteeteari pishanincatacari. Aisati nosatoncaatempi ovajiro inampi Tasorensi: ora Jerosare iroaquerari poneachaneri inquitequi. Impoiji iriotanteeteari pinampitaro avirori. Aisati nosatoncaatempi novajiro narori, iroaqueratajantsiri, iriotanteeteari ashanincatavacaajeitaca.

¹³ Otimirica piquemantari, pinquemavaquero oca nocamantaquempiri’ ”.

Irootaque isanquenatacaquenari Jesoshi.

Isanquenajeitiniri quemisantajeitsiri anta Araoriseaqui.

¹⁴ Aisati icantaquena Jesoshi:

–Jero oca pisanquenajeiteneriri jivatacaajeitiriri quemisantajeitatsiri anta Araoriseaqui: “Meeca noncamantempiro icamantaquenari yora Queariotasanotatsiri, ovaajeerori ora icantaqueeri Tasorentsi: iriotaque Quirishitosanori. Iriotaque intarori yovetsicantaque: imataquero maaroni icantaqueriri Tasorentsi.

¹⁵ Icantimpi: ‘Niotaquero maaroni pantayetaqueri. Pinquearioventenarome nocoacaimpiri, noshicantempime catsirincajari; pintseencasanotename, noshicantempime catsincajari. Niotaque te pinquearioventenaroji nocoacaimpiri, iro caintaincha te pintseencasanotenaji; irootaque noshicantantaquempirori saavajari. Eirorica picoi pincatsirincajate, ari pincatsincajate; aisati oquempetaca, eirorica picoi pinquemisan-tasanote, ari pintseencasanoteta: eiro piconoirotsi.

¹⁶ Te noncoyeji nirero saavajatatsiri: noquishocajataquero, ontimaite. Aisati avirori, te noneacameetsatempiji.

¹⁷ Picantajeiveta: “Naro ashitaarantajeitachari, oshequi nomayetaque, tecatsi coiteimotajenane”. Picomitaca: te pioteji pashinoncaaca; pashinoncaasanotaca, tecatsi tim-imotempine, piquempetaca picaaratsempequitaque. Te piotasanoteriji Tasorentsi: oquempevetaca te pameneji.

¹⁸ Meeca noncantempi: pamanenaro oro cameetsasasanotatsiri, ontimimotantempiri pashitaarantajeeri. Aisati pamanenaro quitaarentsi quitamarori pinquitsaatantajeeri eiro ineanteetajimpitsi, eiro pipashiventantajatsi. Pamanenaro aisati aavintarontsi pincajoquitajeeri, pamenantajeeri. Pineaquero, ariorica pincantena, ari nonquemisanta-caasanotempi, noameetsajeitempi eiro pipashiventantatsi, niotaacaanojeitantajempiriri Tasorentsi.

¹⁹ Ariorica nonintasanotiri ashaninca, noametiri, aisati noasanquetairi, iriotanteari eiro yantantajarotsi caari cameetsatatsi. Meeca eiro pitseencantitsi, irointi pinquen-queshirempa: pincoasanotaje pioteri Tasorentsi.

²⁰ Pamene, oquempetaca nocatiapaaca saiteriqui, nocoaque noneempi. Ariorica pineavaquena aisati povetsatavaquena, nonqueapaaque, nosaviquimotapeempi aisati noimotapeempi. Nocoasanotaque ashanincatavacaajeitaquea.

²¹ Tempa nomataqueneri Apa maaroni icoacaquenari, impoiji nosaviquimotaqueri, notsipatajari nopincatsariventanti. Meeca pinquempetajena: ariorica pimataquenaro maaroni nocoacaajeitaquempiri, ari pisaviquimotena pintsipatena ampincatsariventantajeite.

²² Otimirica piquemantari, pinquemavaquero oca nocamantajeitaquempiri’.

Irootaque isanquenatacaquenari Jesoshi.

4

Iquenquetsatacotiri Tasorentsi aisati saviquimojeitiriri.

¹ Impoiji namenajaji aisati, noneasanotaquero inquite, tsompoina; oquempetaca ashitareaca ashitacorontsi. Impoiji noquemajiri aisati yora noquemaqueri incaranqui, ariorica ineanati ishiavetacari tiorentsi. Icantaquena:

–Caatanaque aca jenoquica. Noncamantempiro nantayeteri coajica.

² Irosati otentashiretantanaquena Ishire Tasorentsi, irosati inquitequi. Jeri noneapaa-queri Tasorentsi, isaviqui isavicamentoqui ipincatsaritantari.

³ Oshequi imarereataque, iquempetacaro mapi marereatatsiri: quitioncanirotatsiri, quenashinirotatsiri, maaroni. Aisati ainiro anta savirentsi, ishoncacaro isavicantari.

⁴ Aisati oshoncacaro isavicantari oshequi pashini savicamentotsi, ocarataque 24. Anta isavicaajeitaque 24 savicacantantatsiri, pincatsarijeitatsiri. Iquitsaajeitaro iitsaare quitamaromaori, yamatseejeitaca. Iro yovetsiqueetiri iramatseere oro.

⁵ Oponeaca ivincatsarimentoqui Tasorentsi quempetarori iporequi aisati itirei. Aisati inejitacaro tsiorontsi, ocarataque 7: oshiacantaca Ishire Tasorentsi.

⁶ Aisati inejitacaro incajare, oshiaquero amenaarontsi.

Aisati anta inejitacari aparoni ivira, jeri itapiiqui itsipa, jeri iracosanoriqui aisati irampatequi itimi itsipapee ivira. Icarajeitaque 4. Otimi iroqui iriori ivoroqui aisati otimi iroqui itapiiqui.

⁷ Ishiaqueri aparoni maniti; irio itsipa ishiaqueri vaca; irio itsipa ishiaqueri shirampari; irio itsipa ishiaqueri paquitsa, itimpavanquitanaca.

⁸ Ari otimi ishivanquimpee virantsi 6; oshequi iroquimpee, jaocarica onayetaqueri. Icantani ipampoyeaventajeitiri Tasorentsi: quitaiteriqui, tsiteniriqui; te iroimpacayero. Jero oca ipampoyeapinitiri:

Iceameetsataque, icameetsataque, icameetsataque yora Avincatsarite Tasorentsi: oshequi itasorentsitaque, tecatsi ompomerentsitimoteari.

Icantani itimi: peerani, irosati meeca, aisati coajicani.

⁹ Ari yapiitapinitiro:

Icameetsatasanoti Tasorensi, oshequi nopincatsatiri.

Oshequi nopasonquitiri yora pincatsariventaquenari.

Icantani yanei, eiro icamitsi catsini.

¹⁰ Ariorica iquemapiniijeitavaqueri yora 24 savicacantatsiri, itiyeroashitapiniijeitacari Tasorensi, ipincatsajeitaveri. Yaajeitaveri iramatseerepee yoanijeitaveri iitiqui, ipampoyeaventajeitiri:

¹¹ Picameetsasanaotaque, Novincatsarite, oshequi pitasorensitaque.

Ocameetsati noneacameetsajeitimpi, nopincatsajeitimpi.

Niotaque tecatsi pomerentsitimotempine: tempa pivetsicaquero maaroni timajeitatsiri.

Picoaqueni peerani ontime paitapeerica, irootaque otimantacari meeca.

5

Iquenquetsatacotiri Jesoshi, ishiacantiri ovisha.

¹ Ari noneaquero aisati iracosanoriqui Tasorensi yampinaicaquero sanquenarentsi, osanquenataca tsompoinaqui aisati acaquero. Ari ampinaicaca aisati otsinetaca: ocarataque 7 otsinetaca.

² Jeri noneaqueri inampire Tasorensi, shintsitanotatsiri, icantaveta:

—¿Janica cameetsasananotatsiri irimatantearori irampinaicareajero oca sanquenarentsica, intsinecareajero?

³ Ari namenajeivetanaca, tecatsi anquerine. Tecatsi materone irampinaicareajero: inquitetsati, quipatsisati, sharincavenisati, tecatsi catsini.

⁴ Te intimeji catsini cameetsasananotatsine, matasanoteroneri irampinaicareajero, irootaque niraantanacari: noashiretanaca te intimeji camantenane ocantayetiri sanquenarentsi.

⁵ Impoiji icantaquena aparoni savicacaantatsiri:

—Eiro piraatsi. Timatsi ampinaicareajeroneri: yora ishanincani Jorani; iquempevetari maniti, oshequi ishintsiti. Aisati ishanincatarini Iravirini, aisati oshequi ipincatsariti. Imataqueneri Tasorensi maaroni icoacaajeitaveri, irootaque irimatantajearori irampinaicareajero sanquenarentsi, aisati intsinecareajero.

⁶ Ari ainiro anta Tasorensi, jeri ivira, aisati yora savicacantajeitatsiri. Jeri noneaqueri isatecaca nianqui Ovisha, yamashitaca ora isatayeetaqueri peerani yoanteetacariri. Otimi itseequi 7, aisati iroqui 7: oshiacantaquero Ishire Tasorensi, itiancaquero otsoteaquero quipatsi.

⁷ Ari isavicaque Tasorensi ivincatsarimentoqui, yajiriquiro iracosanoriqui sanquenarentsi, ampinaicapatitachari. Ari ijataque Ovisha iriori, yaapaaquero.

⁸ Impoiji yora virantsi aisati yora savicacantayetatsiri itiyeroashijeitacari Ovisha. Yajiricajeitiro shiavetarori ijavimento; yajiricajeitiro aisati shiavetarori tsota, yovetsiqueetiro oro: otimi tsompoina casanapatsari. Oshiaquero iroori casanapatsari iquenquetsatacapinijeitiri quemisantatsiri Tasorensi.

⁹ Impoiji ipampoyeaventajeitiri Ovisha pampoyeantsi iroaquerari:

Ocameetsati pajiriquero avinti sanquenarentsi, aisati ocameetsati pintsinecareajero ora otsineyetacara.

Tempa peerani yoyeetaquempi, aparajatimentajeitacari piraja maaroni atiripee,

poavisacojeitantariri irisaviquimojeitanteariri Tasorensi, maaroni.

Poavisacojeitaveri timayetatsiri maaroni atiripee, nashiyetarori maaroni irineanepee.

Queario, poavisacojeitaveri poneayetachari maaroni nampitsipeequi, jaocarica isavica-
jeitiri.

¹⁰ Pipeajeitaveri pincatsarijeitatsiri aisati quenquetsatacapinijeitiriri Tasorensi: impincatsariventajeiteri maaroni savicajeitatsiri quipatsiqui, aisati incanteri Iriri irimatacojeiteri.

¹¹ Impoiji namenajaji aisati, noneajeitaveri; aisati iriori oshequi catsini inampirepee Tasorensi: te aparopee irine, oshequisano catsini.

¹² Antearojenca ipampoyeaventajeitiri:

Icameetsasanaotaque Ovisha yoyeetaqueri, iojeitaque maaroni timajeitatsiri

oshequi itasorensitaque, oshequi timimojeitiriri,

oshequi ioti catsini, maaroni imayetaquero catsini.

Tsame maaroni ampincatsajeiteri, aneacameetsajeiteri, aveshirementajeiteari.

¹³ Aisati noquemajeitaqueri maaroni savicajeitatsiri inquitequi, quipatsiqui, aisati maaroni camajeivetainchari: yora itijeevetacari quipatsiqui, aisati yovinquееvetari; ipampoyeajeitaque maaroni catsini:

Tsame aveshirementajeiteari Ovisha maaroni, ampincatsajeiteri, aneacameetsajeiteri, ancantaitiyempani.

Tempa itasorentsitasanotaque, icantani, peerani.

¹⁴ Irosati icantantacari yora 4 virantsi:

–Aitaque ancantajeiteari, ampincatsatasanojeiteri.

Aisati itiyeroashijeitacari savicacantajeitatsiri, ipincatsajeitaqueri maaroni.

6

Itsinecareajiro sanquenarentsi.

¹ Ari ocarataque 7 otsinetaca sanquenarentsi. Noneacotaqueri Ovisha itsinecareajiro aparoni, irosati noquemantacari virantsi, antearojenca ineanati, iquempetacaro itirei, antearojenca. Icantiri quijacotariri cavayo:

–Caate, pimpoque aca.

² Irosati noneantavacariri jivatapaintsiri: jeri iquijacotapaacari cavayo quitamarori, yajiricaquero iveane. Yamatseeyeetaqueri; coajica irijatanaque inquisajeiteri quishiriri, incoaque iranaacojeiteri irimanateri, impoyereajeiteri.

³ Impoiji itsinecareajiro otsipa, irosati icantantari itsipa virantsi:

–Caate, pimpoque aca.

⁴ Jeri iquenapaaque itsipa cavayo, quitioncatasanotsiri. Icantetiri:

–Meeca poamejeiteri atiri irimanatavacaajeitea, iroavacaajeitea.

Ari ipeetavaqueri antearo ivesamento.

⁵ Impoiji yora Ovisha itsinecareajiro otsipa, irosati noquemantacari itsipa virantsi, icantiri:

–Caate, pimpoque aca.

Irosati noneantavacariri iquenapaaque potsitari cavayo, yajiricapaaquero quijacotariri imoncaratantayeriri tenayetatsiri, paitapeerica.

⁶ Irosati noquemantacari satecainchari virantsi nianqui, icanti:

–Te aneasanoteroji tirico aisati oquempetaca shingui, irootaque opinatasanotantacari. Irointi oreji orivo aisati ovaja, irootaque timasanotaintsiri.

⁷ Impoiji itsinecareajiro otsipa, ocaratapaaque meecca 4, irosati noquemantacari itsipa virantsi, icantiri:

–Caatanaque, pimpoque aca.

⁸ Jeri noneavaqueri pashini cavayo, quiterivitiri; ipajita yora quijacotapaariri: Caamantsi. Yoijatapairi pajitachari Sharincaveni. Icantavaqueri:

–Aviro cantacoventajeiterineri oshequi atiri anta quipatsiqui, nocoaque pimpesaarantajeiteri, peti, peti; paacantajeiteri itashe; pojoquuitacaaranteari; pintianqueneri maniti irantsicaaranteri, irovamaaranteri.

⁹ Impoiji itsinecareaquero otsipa, ocarataque meecca apapacoroni; irosati noneantarori itaapinitantarori casancapatsari. Itimi anta oshequi quemisantajeitatsiri, camajeivetainchari. Peerani iquenquetsajeitaquero irineane Tasorentsi, icamantapinitiri atiri jaoca icantari Tasorentsi, irootaque yoanteetacari.

¹⁰ Antearojenca icantajeiti camajeivetainchari:

–Novincatsarite, aviro pincatsariventajeitiriri maaroni savicajeitatsiri. Oshequi picameetsatasanotaque, pitasorentsitasanotaque. Niotaque otampaticatasanoti pineane, te pamatavitantimateji. ¿Jaoca oncarate pinquisacoventajeitajena? ¿Jaoca oncarate poasanquetaajeitanteariri iriori savicajeitatsiri quipatsiquinta, oajeitajueneri?

¹¹ Ari ipajeitaqueri quitsaarentsi quitamarotasanotatsiri. Icantiri:

–Pimaoreavaquetsita. Tequera omoncarateaji noasanquetaasanojeitanteariri oajeitaquempiri. Timatsiquera itsipapee piyemisantaririnte iroyeeteri. Piquemisantaajeitaquena, irootaque yoanteetaquempiri; inquemisantajeitaquena itsipapee, irootaque iroanteeteariri iriori. Ariorica omoncarataquea, ari noasanquetaajeiteri maaroni oantatsiri.

¹² Impoiji itsinecareajiro otsipa, ocarataque meecca 6. Namenanaque, jero onicasanotanaca quipatsi, antearo onicanaca: nica, nica, nica. Itsitenitanotanotaque catsirincaiteri, iquempetanacaro tsimenquito; irinti cashiri, iquitioncatasanotanotaque, iquempetanacaro irajantsi, quitionca catsini.

¹³ Aisati ipariajeitanaque maaroni impoquiroppee: iquempetacaro oitsoqui iyera ora iraacatsiri, ariorica otimi antearo tampea, ari ojireayetanaque.

¹⁴ Opeanaca inquite, oquempetaca yampinaiqueetaquero sanquenarentsi. Opeaca maaroni quipatsi: toncaaripee, ovoyeja, maaroni; poyere.

¹⁵ Aisati noneaqueri ivincatsaritepee atiri, jeri ivincatsaritepee soraro, ashitaarantincari, shintsiyetatsiri, ivatorote, iratiritepee, maaroni atiri: ishijaiteanaca omoroqui imperita. Aisati ishijaiteanaca mapipeequi anta toncaariqui.

¹⁶ Icantajeivetacaro toncaari aisati mapi:

—Pimpariye, pintijajeitena, pimanena. Yaanacari Tasorentsi, aisati yaanacari yora Ovisha. Oshequi iquisaquena.

¹⁷ Meeca iquisajeitaquena maaroni; meeca impoyereajeitena, poyere.

7

Isatoncaajeitiri ishanincapeeni Ishirairi.

¹ Impoiji noneaqueri inampirepee Tasorentsi, caratatsiri itsipasati, icatijaiteaca anta otsapitapaa quipatsi; ipeavaquero tampea, maaroni. Ipeasanotavaquero maaroni, caari otimanta tampea quipatsiqui, incajarequi, inchatoqui, jaocarica.

² Impoiji aisati noneaqueri itsipa inampire Tasorentsi, iponeaca anta iquenapainta catsirincaiteri, yamaquero irisatoncaatanteariri atiripee. Icajemacojeitapaquero itsipapee, yora tsoncajeiteroneri coajica quipatsi aisati incajare.

³ Icantiri:

—Eirotsita pitsonquitarotsi quipatsi, incajare, inchato, maaroni. Ajivatavaquerita asatoncaajeiteri ivancainaquu maaroni quemisantajeitirisi Tasorentsi.

⁴ Ari noquemaqueri icantaque jaoca icarajeitaqueri satoncaajeitainchari: icarajeiti 144,000 quemisantatsiri. Icarajeitaqueri ishanincani maaroni itomipee Ishirairi.

⁵ Ari isatoncaajeitaqueri ivancainapeequi: icarajeitaque ishanincani Jora 12,000, icarajeitaque ishanincani Oroveni 12,000, icarajeitaque ishanincani Cara 12,000,

⁶ icarajeitaque ishanincani Asere 12,000, icarajeitaque ishanincani Nejatari 12,000, icarajeitaque ishanincani Manaseshi 12,000,

⁷ icarajeitaque ishanincani Shimeo 12,000, icarajeitaque ishanincani Irevi 12,000, icarajeitaque ishanincani Isacara 12,000,

⁸ icarajeitaque ishanincani Savoroni 12,000, icarajeitaque ishanincani Jose 12,000, icarajeitaque ishanincani Vejami 12,000. Ari isatoncaajeitiri ivancainaquu, maaroni.

⁹ Impoiji namenanaaji aisati, jeri noneajeitaqueri oshequi catsini atiri aisati, yapatojeitaca: tecatsi ancantea amoncarajeiteri jaocarica icarajeitiri. Inashijeitaca atiripee, onashijeitaca irineanepee, maaroni. Icatishijeitapaacari Tasorentsi, aisati anta itiminta Ovisha. Iquitsaajeitacaro quitamarori iitsaare, yajiricajeitaquero compiroshi.

¹⁰ Antearojenca icantajeitaque:

—Iriotaque oavisacojeitaqueeri yora Tasorentsi savicatsiri ivincatsarimentoqui, aisati yora Ovisha.

¹¹ Ari itimi quempeji Tasorentsi yora savicacaajeitantatsiri aisati yora virantsi. Ishoncajeitacari oshequi catsini inampirepee Tasorentsi, ipincatsajeitaqueri,

¹² icantajeiti:

Ariove, tempa oshequi ioti Atasorentsite, oshequi itasorentsi.

Tsame maaroni aveshireimentapinijeitari, aneacameetsatapinijeiteri, ampasonquitapinijeiteri, ampincatsatapinijeiteri;

aitaque ancantaitiyempani.

¹³ Impoiji isampitaquena aparoni savicacaantatsiri:

—¿Piotimpa janica yora quitsaajeitachari quitamarori? ¿Piotimpa jaoca iponeajeitari?

¹⁴ Nocantaqueri:

—Teve nioteji. Pincamantena: tempa pioti avinti.

Icantaquena:

—Iriojaiteque neajeitaqueriri yashinoncaajeitaca oshequi atiri; oshequi ineacatsitacaro iriori. Iquivantajeitaro iitsaare iriraja Ovisha, irootaque oquitamarotasanotantacari.

¹⁵ Irootaque yapatotimentantacariri Tasorentsi, intacojeitantacariri anta ivancoqui. Icantani intacojeitacari: quitaiteeriqui aisati tsiteniriqui. Ari quiso iroajeiteri Tasorentsi iriori, irojocaventajeiteri, maaroni.

¹⁶ Eiro iquemajeitajirotsi aisati itashe, aisati eiro iquemajeitajirotsi imire. Eiro itaajeitajiritsi aisati catsirincaiteri, eiro iquemaaitsicatarotsi aisati paamari.

¹⁷ Ari yora Ovisha itsipatarisi Tasorentsi: iriotaque Ovisha shentajeiterineri maaroni quitsaajeitachari quitamarori, papinijeiterineri maaroni coiteimojeitacari. Iroimoshirencajeitaqueri, eiro ishineturitsi iriraaajeitajea aisati.

8

¹ Impoiji itsinecareajiro aisati, caratatsiri 7. Ari imajerejeitanaque maaroni savicajeitatsiri anta inquitequi. Osamanitapainti omajeretasanotanaque catsini.

Itiojeiti intayetacarori inampirepee Tasorentsi, caratatsiri itsipasati.

² Impoiji aisati noneaqueri 7 inampirepee Tasorentsi, icatiajeitaca Tasorentsiqui. Ipeetaqueri 7 tiorentsi.

³ Jeri aisati itsipa nampirentsi, icatiaca anta itaapinitantaroriquinta casancapatsari, yovetsiqueetiro oro. Yajiricaquero onantajaniquitari yovetsiqueetiro aisati oro. Ari itaqueri Tasorentsi casancapatsari, oshiaquero oca iquenquetsatacapinijeitiri quemisantiriri Tasorentsi.

⁴ Ari areetacari oyachaare Tasorentsiqui, ocasancajencatapaaque, oshequi inecameetsataquero. Aisati oquempetaca, oshequi inecameetsataquero iquenquetsatacapinijeitiri quemisantajeitiri.

⁵ Impoiji yora nampirentsi yaaquero paamari, yoaquero onantajaniquitari, ipishoncaquero quipatsiqua. Impoiji antearojenca itireanaque, tiriririri; iporecanaque, porec, porec; aisati antearo onicaca quipatsi, nica, nica, nica.

⁶ Irosati yovetsicantajeitanaca nampirentsi intiotanteari.

⁷ Itiotaque jivataintsiri, tii, tii, tii; irosati opariantanaca quipatsiqui iriniqui, jero aisati paamari, oconocaro aisati irajantsi. Otaarantaca timayetatsiri quipatsiqui, otaarantaca inchatoshi; otaasanotaca iroori saveshi, tojari, maaroni, poyere.

⁸ Impoiji itiotaque apitetapaintsiri nampirentsi, tii, tii, tii; irosati noneantacarori quempetarori antearo toncaari, tainchari: ipishonqueetaquero incajarequi, pocn.

⁹ Opeaarantaca incajare irajantsi, icamaarantaque timatsiri incajarequi, aisati otsoncaarantaca pitotsipee.

¹⁰ Impoiji itioti mavatapaintsiri, tii, tii, tii; irosati noneantacarori shiaqueriri impoiquiro iparianaque, itaapaaca, pomein. Iparianaque nijatenipeequi aisati anta ocontejayetapaaque nija.

¹¹ Opeaarantaca quepishijari, irootaque icantanteetariri shiavetariri impoiquiro: Quepishiri. Icamajeitanaque oshequi irajeivetarori nija.

¹² Impoiji itioti aisati itsipasatitapaintsiri, tii, tii, tii; irosati itsitenitantavetanaca catsirincateri aisati cashiri. Aisati itsivacaarantayetanaque iriori impoiquiropee, irosati otsitenitantavetanaca quitaiteriqui. Aisati ipeaarantayetanaca quitaporoquitatsiri tsiteniriqui.

¹³ Ari namenajaji aisati, noneantacariri anteari paquitsa yaranaque anta inquitequi. Aisati noquemaqueri, antearojenca ineanati, icanti:

—Jo, oshequi irashinoncaasanojeitanaquea catsini savicajeitatsiri quipatsiqui. Irotaintsi intiojeite yora itsipapee nampirentsi, caratatsiri mava, impoiji irashinoncaasanojeitea maaroni atiripee.

9

Itioti impoitapaintsiri mava.

¹ Ari itioti itsipa inampire Tasorentsi, yora apapacorotapaintsiri, tii, tii, tii. Irosati noneantacariri impoiquiro, iponeaca inquitequi, ipariaque quipatsiqui. Ipeetaqueri iyavitarorori omoro jatatsiri tsoompoina catsini, te aneroji oncaratapee,

² irosati antoo. Ari iyavireapaaquero, itatareapaaquero, jero ocontejencatapaaque oshequi oyachaare. Ojataque jenoqui irosati otsitenitantanaca jenoqui, aisati iriori catsirincateri itsitenitanaque.

³ Impoiji noneaqueri tsinari, iquenantapaacaro cachaa, itsoteapaaquero quipatsi, imatacaqueri Tasorentsi yoantaque, iquempetacari quitoniro.

⁴ Icantiri:

—Poajeitearo ivanquirepee maaroni caari quemisantajeitana, yora caari satoncaajeitacha ivancainaquí. Eiro catsini poarotsi otsipayetari saveshi, tojari, inchatoshi, eiro catsini.

⁵ Nocoaque pinquematsicacayeari maaroni caari quemisantajeitana, incarataque 5 cashiri, iro cantaincha eiro poamaajeitiritsi.

Ari yoajeitaqueri, oshequi icatsitaque, iquempetacari quitoniro.

⁶ Ariorica omoncarataquea maaroni oca noneaqueri, ari incoajeivetanaquea atiripee incamajeite; iro cantaincha eiro imatirotsi incame. Incoajeivetanaquea iroajeame irisati, iro cantaincha eiro imatirotsi.

⁷ Ari namenasanotaqueri tsinari: iquempetacari cavayo, ipashicayetaca ashiro eiro aveantaritsi sataamentotsi aisati chacopi. Yamatseetacaro shiirori oro. Orari ivoropee oshiaquero avoropee arori.

⁸ Iviti oquempetacaro oishi tsinane, oquishipeti. Iraji oquempetacaro iraji maniti, antearoquiji.

⁹ Inejitonqui oshiaquero ashiro, ariorica yaranaque, antearojenca yaranaque, ishiaquero itirei, tiriririri.

¹⁰ Irishi oshiaquero irishi quitoniro, ainiro itseequi. Ariorica yoaquero atiri, icatsitasanotaquero, ocarataque apacoroni cashiri icatsitaque.

¹¹ Ainiro ivincatsarite tsinaripee: iriotaque ivincatsarite maaroni camaari. Ipajita irineanequi jorio Avaroni; iro irineanequi quireshiasati ipajita Aporioni. Iro acantiri aneanequi arori: Poyereantatsiri.

¹² Aitaque icantari yora intacarori oashinoncaajeitiriri quipatsisati. Timatsiquera apite aisati.

¹³ Impoiji itioti itsipa inampire Tasorentsi, yora seishitapaintsiri, tii, tii, tii; irosati noquemantacariri itsipa neanatsiri. Ari oponeacari irineane ora itaapinitantaroriqui casancapatsari, vetsichari oro. Otimi anta Tasorentsi, otiminta otseequi itsipasati.

¹⁴ Icantiri tiotaintsiri:

—Pijate poimisoquijajeri yora 4 camaari yoisotiri Tasorentsi anta antearojaqui eni: ora pajitachari Eojarateshi.

¹⁵ Ari ijataque, yoimisoquijajeri camaaripee. Ari icantini Tasorentsi peerani: “Niotaquero jaoca oncarate impoyereaaranteariri atiripee. Niotaquero jaoca oncarate omoncaratanteari osarinti, cashiri, quitaiteri, aisati jaoca incarate catsirincaiteri”. Meeca omoncarataca, irootaque yoimisoquijantajariri.

¹⁶ Yora camaari ijivajeitaquero oshequi catsini soraropee, icarajeiti 200,000,000. Niotaquero, icantaquenari.

¹⁷ Aisati noneajeitaquero iyavayote. Ipashicanejitaro quijacotariri quiraatatsiri, oshiaquero paamari, ora morecasanotatsiri. Ito cavayopee oshiaquero iitopee maniti. Oponeaca ivantequi oshequi paamari, jero cachaajenca oshequi, jero morecasanotatsiri.

¹⁸ Iroojeitaque poyereaaranteariri atiripee: ora paamari, cachaajenca, jero morecasanotatsiri poneachari ivantequi cavayo.

¹⁹ Irootaque yoantariri cavayo atiri: ivante aisati irishi. Iro irishi oshiaquero maranque, ainiro oitotaca, yatsicantacariri atiri.

²⁰ Ari itimaarantaque aparopee atiri, iro cantaincha te inquenqueshirejeitempaji: te incoyeji catsini inquemisanteri Tasorentsi. Icantani yantapinitiro caari cameetsatsi, ipincatsatapinijeitiri camaari, aisati ipincatsatashijeitaro yovetsicayetiri: oroyetatsiri, peratayetatsiri, otsipa ashiroyetatsiri, mapitatsiri, inchatoyetatsiri, maaroni. Ijitasorentsi-tashiyetaro, iro cantaincha tecsati oncantea amene, onqueme, aisati aniite.

²¹ Icantani yoayeriti, imatsitanti, yantiro caari yai, icoshiti. Te inquenqueshiretimateaji catsini.

10

Ora sanquenarentsi quenquetsatacotirori timayetatsineri, coajica.

¹ Impoiji noneaquero itsipa inampire Tasorentsi, shintsitasanotatsiri. Iponeaca inquitequi, oshoncacari mencori, itimaque savirentsi iitoqui jenioquiji. Ivoro oshiaquero catsirincaiteri, ivori oshiaquero paamari.

² Yajiriquiro sanquenarentsi, pinaicareachari. Itisanori aaticajatapairori incajare, irointi irampate aaticapairori quipatsi.

³ Antearojenca icajemapaque, iquempetacari maniti icajemi, jan, jan. Impoiji itireanque, icarataque 7, tiiriririri.

⁴ Noquemantacariri itireanque, irotaintsi nosanquenateme, iro cantaincha noquemaquero icantaquena inquitesati:

—Eiro pisanquenatirotsi icantiri tireatsiri, pimanero.

⁵ Ari noneajiri aisati inampire Tasorentsi, yora aatiquirori incajare aisati quipatsi: yovanquiro iracosanori inquitequi,

⁶ icanti:

—Timatsi Tasorentsi aneasanotatsiri, icantani yanei, eiro icamitsi catsini. Yovetsicaquero inquite aisati maaroni timantajeitarori; yovetsicaquero quipatsi aisati maaroni timantajeitarori; yovetsicaquero incajare aisati maaroni timantajeitarori. Ioti iriori te nontseejayi, irotaintsi meece omoncarate.

⁷ Impoiji intiote yora inampire Tasorentsi, yora sietetapaintsiri. Ari onconijatapaaque manavetachari peerani: oca yoametiriri Tasorentsi quemisantajeitiriri peerani, yora quenquetsatacojeitiririri.

⁸ Impoiji noquemajiri aisati jenoquisati quenquetsatacaquenari incaranqui. Icantana:

–Pijate, paavaquero sanquenarentsi yajiriquiri nampirentsi aatiquirori incajare aisati quipatsi.

⁹ Irosati nojatashitantacariri, nocantapairi:

–Pimpenaro sanquenarentsi.

Incantavaquena:

–Jero, payero, poyearo; ariorica poaquearo, pineaquero opochati, oquempetaca ija pitsi. Iro cantaincha impoji ompianeentaquempi.

¹⁰ Ari naavaquero, noacaro. Opochetaca, iro cantaincha impoji opianeentaquena.

¹¹ Impoji icantavaquena:

–Meeca pinquenquetsatocoteri aisati jaoca incantajeiteari coajica pashinipee atiri: nashiyetarori irineanepee, pincatsaripee, maaroni.

11

Iquenquetsatocotiri apite quenquetsatacantatsiri.

¹ Impoji ipaquenaro Tasorentsi inchaqui, shiirori cotiquiirontsi, impoji icantavaquena:

–Jero oca pimoncaramentoca. Pijate meeca novancoqui, pimoncarataitero; aisati pimoncaratero itaantarori casancapatsari, aisati pimoncarajeiteri maaroni quemisanta-jeitatsiri anta, jaocarica icarajeitiri.

² Eiroyea pimoncaratirotsi anta saiteriqui: irointiquea pimoncarate onta iquenantari caari quemisantajeitatsi. Incarataque 42 cashiri inquenayetanaque itsipapee atiri anta nonampiqui: ora Jerosare. Oshequi iroashinoncaajeiteri savicajeitatsiri.

³ Nontianqueri apite quenquetsatocotenaneri, oncarate 1,260 quitaiteri inquenquetsatapinite. Incantapinijeiteri atiri: “Pinquencheshirejeitanaquea. Eiro papiitapinirotsi caari cameetsatsi, irointi pinquemisantaajeite, pintimajeite cameetsa”.

⁴ Iquenquetsatocotitarini peerani Sacariashini yora apitetatsineri, ishiacantaqueri orivo. Aisati ishiacantaqueru onantari veera timatsiri anta Avincatsaritequi. Tempa iriotaque pincatsariventajetiriri maaroni atiri.

⁵ Intimerica coavetachaneri iroashinoncayerime yora apitetatsineri, omponeaquea ivantequi iriori paamari, ontsoncasanojeiteri, ontaajeiteri, pomein.

⁶ Oshequi irimatacaajeiteri Tasorentsi. Peerani inquenquetsatapinite, iro cantaincha incoaquerica eiro opari incani, eiro opariitsi, irosati irivecarantearori inquenquetsate. Aisati, incoaquerica, impeajero nija irajantsi. Aisati incoaquerica, iroashinoncaapinijeit-eri maaroni savicajeitatsineri.

⁷ Ariorica irimoncarataquero inquenquetsate, jeri aisati imponeaquea omoroqui tsonpoina covencatsiri iriori. Inquisapeeri quenquetsatsineri, iranaacotapeeri, iroapeeri, shemi.

⁸ Imponaajeitaquea camajeitatsineri anta Jerosarequi, nianqui. Ishiacantaquero Tasorentsi Jerosare Soroma aisati Ejipito; iro ishiacantantarori, oshequi yantapinijeitiro jerosaresati caari cameetsatsi. Tempa aitaque ipajacyeetaqueriri Jesoshi Jerosarequi.

⁹ Oncarate mava quitaiteri imponaajeite nampitsiqui nianqui, irosati intampati-catantajeeri catsirincaiteri aisati. Impocajeite maaroni atiripee iramenajeiteri ca-maintsineri, irinashijeitanaquea amenajeiterineri: imponeaquea otsipapeequi nampitsi, onashiyetaquea irineanepee. Eiro ishinetiritsi intijeeteri.

¹⁰ Inquimoshirejitanaque maaroni savicajeitatsineri, iro inquimoshiretanteari inca-maque yora apite quenquetsatacaajeivetearineri: impashitavacaajeitea paitapeerica. Incantajeite:

–Tsame anquimoshirejeite. Camanirotaque yora quenquetsatocotiriniri Tasorentsi: eiro imatajirotsi iroashinoncaajeitajee aisati.

¹¹ Iro cantaincha tampatica catsirincaiteri intasoncajeri Tasorentsi, intinaajeitajeri apite, incatijaaitanaje. Ari intsaroacaajeitanaqueari maaroni neajeitajerineri.

¹² Impoji inquemaqueri Tasorentsi, antearojenca incanteri:

–Caatanaje aca jenoqui.

Ari irijajeitanaque inquitequi, inquenantanajeero mencori; irineajeitavajeri maaroni quisajeivetariniri.

¹³ Irosati onicantanaquea quipatsica, ontireaarantanaque pancotsipee. Incarajeite camajeitaintsineri 7,000. Oshequi intsaroajeitanaque itsipapee, impojiquea impincat-sajeitakeri, icantajeite:

–Tempa oshequi ipincatsariti Tasorentsi, itasorentsitanoti.

¹⁴ Irootaque omoncaratanteari apitetapaintsiri iroashinoncaajeiteri Tasorentsi atiripee. Apanivaniji ora mavatapaintsineri.

Moncarataca ipincatsariventanti Tasorentsi.

¹⁵ Impoiji itiotaque yora itsipa inampire Tasorensi, yora sietetapaintsiri: tii, tii, tii. Noquemajeitaqueri savicajeitatsiri inquitequi, antearojenca icantajeiti: Meecaquea impincatsariventajeiteri Avincatsarite maaroni quipatsisati, incarateri Quirishito impincatsariventantajeite, incantaitiyempani.

¹⁶ Impoiji yora 24 savicacaajeitantatsiri iponeaca ivincatsarimentoqui, irosati itiyeroashijeitantacariri Tasorensi: oshequi ipincatsajeitaqueri.

¹⁷ Ipampoyeaventajeitiri:

Avirotaque, Novincatsarite, Tasorensisanori:

oshequi pishintsitaque, oshequi pipincatsaritaque.

Te pimpashinitapiniteaji, picantani pitasorensitaque.

Aisati pipincatsaritasanotaque, meeca pimpincatsariventajeiteri maaroni atiri;

eiro pojocajirotsi, irosati pincanteani.

Irootaque nopasonquijeitantimpiri.

¹⁸ Iquisajeivetimpi atiripee, iro cantaincha meeca pipiajeitacari.

Poitinaajeitajiri camajeivetainchari, maaroni:

pipinajeitaqueri maaroni antaveetimpirori picaoacaajeitaqueriri, maaroni quenquetsatacojeitimpiri, quemisantajeitimpiri, maaroni.

Pincatsajeitimpiri, pincatsariveitachaniri quipatsiqui, caari pincatsariveitachani, maaroni.

Cameetsa pisavicacaajeitaqueri pinampiqui.

Irintiquea yora quisajeitimpiniri, caari cameetsajeitatsini, poasanquetaajeitaqueri, pitiancaajeitaqueri Sharincaveniqui.

¹⁹ Impoiji ashitareanaca ivanco Tasorensi anta inquitequi, noneaquoero tsonpoina cajo, ora onantari isanquenare Tasorensi peerani. Aisati noneaquoero yamatsequi, matsec, matsec; aisati antearojenca itirei, tiiriririri; aisati onicanaca quipatsi, shique, shique, shique; jero aisati opariitasanotaque iriniqui, sacorororo.

12

Iquenquetsatacotaqueri Quirishito aisati yora maranquetatsiri.

¹ Impoiji otimi aisati noneaqueri anta inquitequi, ishiacantaqueeneri aisati Tasorensi, ayotanteari irantayeteri coajicani. Noneaquoero tsinane, oquempetaca oquitsaatacari catsirincaiteri, aaticaqueeri cashiri, amatseetacari 12 impoquiro.

² Otsomontetaque, irotaintsi intime, atsicaneentaquoero, ocavintsaanaca, ocajemanaque:

—Ayavee, ayavee.

³ Imapoquaquoero, ipocapaaque anteari maranque, catsini; quitioncaitaque ini. Ocarataque iito 7, aisati itseequi 10. Yamatseeyetaca iitopeequi.

⁴ Irishi inoshicaarantapaaqueri oshequi impoquiro catsini, sorororo; impoiji ipishoncajeitaqueri quipatsiqui. Icatipaaaca anta otiminta tsinane, yoyeaquoero ontimeri otomi, iroantavaqueariri.

⁵ Ari otimiri otomi, yora pincatsariventasanojeiterineri maaroni atiri; tecatsi piatearineri coajicani. Imapoquiri Tasorensi, yaapitsatanaqueri jananequi, yaanajiri inquitequi, isavicacaapaaqueri ivincatsarimentoqui.

⁶ Oshianaca tsinane anta caaraiteriqui, anta yovetsicaqueneronta Tasorensi. Ishentaquoero anta cameetsa, ocarataque 1,260 quitaiteri.

Imanatavacajeitaca anta inquitequi.

⁷ Jero aisati imanatavacajeitaca anta inquitequi. Yora Miyeri, icarajeitaqueri itsipapee inampire Tasorensi, iquisajeitavaqueri yora maranque aisati inampirepee iriori; imanatavacajeitaca.

⁸ Irio anaacotantatsiri inampirepee Tasorensi, yojocajeitaqueri maranque aisati icarajeitiri, tecatsi incantea iriori impiajeitanaje inquitequi.

⁹ Ari yojocasanojeitaqueri quipatsiqui, aisati maaroni inampirepee. Iriotaque yora maranquetatsiri peerani: ivincatsarite camaari, aisati ipajiyetiri Satanashi. Peerani oshequi yamatavijeivetacarini atiripee, iro cantaincha eiro imatajirotsi aisati.

¹⁰ Impoiji aisati noquemaqueri inquiresati, antearojenca icanti:

—Meeca yovavisacotasanojeitaquee Tasorensi, itasoncacoventajeitaquee, ipincatsariventajeitaquee; aisati iriori Quirishito ipincatsariventajeitaquee. Cameetsataque. Icantani peerani icantacojeitaquee Satanashi, aisati maaroni ayemisantaririnte, icoapinivetaca iroasanquejeiteeme Tasorensi: icantani, quitaiteriqui, tsiteniriqui. Meecaquea eiro imatajirotsi Satanashi aisati.

¹¹ Icamimentajetaquee Ovisha, aparajamentajetaquee iriraja, irootaque caari imatantajaro Satanashi iroasanquetacantajee. Aisati aquemisantasanojeitaqueri Tasorentsi, antajetaqueneri maaroni icoacaajeitaqueeri, irootaque caari yoasanquetantajeitee. Ainiro acarajeitaqueri camimentiriri Quirishito, te incoyeni inquempoyeempa irisati.

¹² Meeca aquimoshirejetaque, acarajeitaqueri maaroni savicajeitatsiri aca inquitequi; ancanteani anquimoshiretasanojeitanaque. Iro cantaincha irashinoncaasanojeitanaquea maaroni quipatsisati. Oshequi iquisa Satanashi, ioti eiro osamanititsi irisavique quipatsiqui, oshequi iroashinoncaajeiteri savicajeitatsiri.

Yora maranque iquisaquero tsinane.

¹³ Ari ipariapaaque maranque quipatsiqui, oshequi iquisapaaquero tsinane tomintariri otomi.

¹⁴ Itasonquiro Tasorentsi otimantacari oshivanqui apite, oquempetacaro ishivanqui anteari paquitsa. Impoiji arapitsatanaqueri maranque, ojataque anta ocaaraitepai. Anta intacoyeetacaro icarataque 42 cashiri.

¹⁵ Impoiji yora maranque yaparajataquero oshequi nija catsini, oponeanaca ivantequi, chararara; icoaveta irooncajerome quipatsi, icoaveta areteapeemparome tsinane, ompincanaqueme.

¹⁶ Iro cantaincha ocaavintsaquero quipatsi tsinane, otencareanaque, oquiajatanaque maaroni nija quipatsiqui.

¹⁷⁻¹⁸ Aiquero ijatatii iquisaquero tsinane. Te irimateroji iroori, irootaque ijatashitantariri itsipapee otomipee: maaroni yora antiniriri Tasorentsi icantaqueriri, aisati maaroni quemisantasanoitiriri Jesoshi; icoaveta intsoncajeiterime iriori.

13

Ari iquenquetsatacotaqueri covencatatsiri.

¹ Impoiji nocatiaca impanequiqui, anta otsapijaqui antearoja incajare. Jeri noneavaqueri incajarequi icontetapaaque covencatatsiri, otimi itseequi 10, jero iito 7. Otimi itseequiqui amatseerentsi; aisati isatoncaatata iitopeequi: ocantimatiri sanquenarentsi Tasorentsi.

² Ari ishiapaaqueri maniti. Iiti oshiaquero iiti meeni; irointi ivante oshiaquero ivante maniti. Icantavaqueri maranque:

—Meeca nocoaque nomatacayempi, pinquempetantenari: oshequi pimayetaque, oshequi pimpincatsaritanaque, oshequi pincantacantayete.

³ Amashitasanotaca catsini iito aparoni, naamaaca irovetainchaa oamayerime amashitaqueriri. Yoajeitanaqueri cavaco maaroni atiri, icantajeiti:

—¿Paitaquea caari icamanta? Pamenerote iito, joo, ¿paitaquea oaqueriri?

⁴ Aisati ipincatsajeitaqueri maranque, icantajeiti:

—Pineaqueri, oshequi imatacaqueri covencatatsiri.

Aisati ipincatsajeitaqueri covencatatsiri, icantajeiti:

—Pineaqueri, oshequi ishintsica, tecatsi materine impietari.

⁵ Impoiji yora maranque icantiri covencatatsiri:

—Meeca pinquisanaqueri Tasorentsi, incarate 42 cashiri pimpincatsaritasanotanaque.

Ari oshequi ishemetsataque, oshequi icantimataqueri Tasorentsi.

⁶ Ari icantimataqueri iriori, icantimataquero inampi, aisati icantimajetaqueri savicajeitatsiri anta.

⁷ Aisati icantaqueri maranque:

—Pinquisajeiteri maaroni quemisantajeitiriri Tasorentsi, poashinoncaajeiteri. Aisati pimpincatsariventajeiteri savicajeitatsiri quipatsipeequi, pashiniyetirori irineanepee.

⁸ Aitaque impincatsajeiteri maaroni atripee. Apatiroquea irinti quemisantatsiri, eiro ipincatsatiritsi. Aitaque, tequerani irovetsiqueroni quipatsi, iotitacarini Tasorentsi maaroni quemisantajeiterineri. Aitaque isanquenataqueroni ivajiropee, ipajititayetacarini yora Ovisha camimentajeiterineri.

⁹ Otimirica piquemantari, pinquenqueshiretero oca nosanquenataquempiri.

¹⁰ Icanti Tasorentsi: “Noiminqeajeiteri coajica maaroni oiminqeajeivetaquempineri. Nompesajeiteri maaroni pesajeivetempineri”. Meeca icoacaajeitaquee Tasorentsi ancantaitiyempani anquemisantajeiteri, anquearioventero.

Iquenquetsatacotaqueri itsipa covencatatsiri.

¹¹ Impoiji noneaqueri itsipa covencatatsiri, iponeaca irinti quipatsiqui tsoimpoina. Iquempevetacari ovisha, otimi itseequi apite; icovencati ineanati.

¹² Oshequi ipincatsaritaque, iquempetacari itsipa covencatatsiri, yora amashitachari iitoqui. Aisati icantajeitiri maaroni savicajeitatsiri:

—Pimpincatsajeiteriyea yora amashitachari iitoqui.

Ari ipincatsajeitavaqueri.

¹³ Oshequi itasoncantayetaque yora apitetapaintsiri. Imayetaquero caari ineapinijeiti ashanincapee. Ineajeitaqueri atiri yoariaquero paamari: oponeaca inquitequi, irosati quipatsiqui.

¹⁴ Oshequi imayetaque, irootaque yamatavijeitantacariri oshequi atiri, ijitasorentsi-jeivetacari. Ariorica itsipatacari yora jivatiriri, oshequi imayetaque. Aisati icantajeita-queri atiri:

—Jentsite, pishiacantajeiteri yoca jivataquenari, yoca ipeshevetacari. Pineaqueri, te incameji.

¹⁵ Ari iquemisantajeitaqueri, yovetsicajeitaque ishiacantaro. Impoiji itasoncaquero, aneantacari, aisati oneantantacari. Impoiji icantajeitaqueri atiri:

—Pimpincatsajeitero oca avetsicajeitaqueri: irootaque atasorentsite.

Ari ipincatsajeivetacaro. Irintiquea maaroni caari pincatsatiro, yoacantajeitaqueri.

¹⁶ Aisati isatoncaatacantaqueri atiripee, maaroni. Isatoncaajeitaca iracosanoriqui, ari-origa ivancainaqu, maaroni: pincatsarijeitatsiri, caari pincatsarijeitatsine, ashitaaranta-jeitachari, caari ashitaarantajeitachane; yora yamananteetiri aisati yora caari yamananteeti: isatoncaajeitaca maaroni.

¹⁷ Iro isatoncaajeitaqueriri ivajiro covencatatsiri, yorari itsipapee isatoncaajeitaqueri inomerote. Icantajeitiri:

—Eirorica isatoncaajeita atiripee, eiro noshinetirtsiri iramanantayete aisati impiman-tayete.

¹⁸ Ocameetsati meeca ontime piotanteari, pinquenqueshiretero inomerote covencatatsiri. Irootaque inomerote atiri, ocarataque 666: irootaque piotanteariri.

14

Iquenquetsatacotaqueri Ovisha aisati yora pampoyeaventajeitiriri.

¹ Impoiji namenajaji aisati, jeri noneaqueri yora Ovishatatsiri, icatiaca toncaariqui pajitachari Sio: otimi Sio Jerosarequi. Icarajeitaqueri maaroni quemisantajeitatsiri, satoncaajeitachari ivancainaqu ivajiro Ovisha aisati iriri. Icarajeitaque 144,000.

² Impoiji noquemajeitiri aisati inquiresati, antearojenca irineane; iquempetacaro antearoja ovarijare, aisati antearo itirei. Iriojeitaque javioquijeitirori shiirori ijavioqui.

³ Itimajeiti anta Tasorentsi, anta itiminta savicacantayetsiri aisati yora itsipasati virantsi. Ari ipampoyeajeitiro pampoyeantsi iroaquerari; ocameetsajencaque, iro cantaincha tecatsi materone iriotero: apaniro irinti 144,000 atiri oavisacojeitainchari.

⁴ Te irantajeitajeroji caari cameetsatsi iriori, icameetsajeitaque: aisati icantani yoija-jeitaqueri ovisha, jaocarica ijayetaqueri. Iriojeitaque quemisantajeitiriri Tasorentsi aisati Ovisha.

⁵ Te intseeajeiteaji, aisati icameetsajeitaque, te irantajeitajeroji caari cameetsatsi.

Irotaintsi iroasanquejeiteri Tasorentsi caari quemisantiri.

⁶ Impoiji noneaqueri itsipa inampire Tasorentsi, yarayetanaque inquitequi nianqui. Iquenquetsatacotaqueri maaroni savicajeitatsiri quipatsiqui, jaocarica otimayetiri inampipee, aisati jaocarica ocantayetari irineaneppe. Icamantajeitaqueri jaoca incanteari iroavisacojeitantajeri. Irootaque icantapinijeitiriri Tasorentsi maaroni atiri peerani, te impashiniteroji.

⁷ Antearojenca icanti:

—Pimpincatsajeiteri Tasorentsi, pincantajeiteri pishaninca: “Icameetsataque Tasorentsi”. Pamene, moncarataca meeca iroasanquejeiteri maaroni caari quemisantajeitiri. Pimpincatsatasanojeiteri: tempa iriotaque vetsiquirori inquite aisati quipatsi, incajarepee aisati nijatanipee, maaroni.

⁸ Yoijatanaqueri itsipa nampirentsi, icanti iriori:

—Peerani yora savicaveitachaniri Vavironiaqui yantacaapinijeitaquerini itsipapee atiri caari cameetsatsi, iro cantaincha meeca ipoyereajeitaqueri Tasorentsi vavironiasati. Eiro imatacaajeitajirtsisi aisati paitapeerica.

⁹ Impoiji yoijatajiri itsipa nampirentsi aisati: yora mavatapaintsiri. Antearojenca icantapaaque iriori:

—Queariompia, pipincatsatiricari yora covencatatsiri, aisati ora ishiacantaro. Aisati pishinetaricari irisatoncaatempipi vancainaqu, ariorica pacoqui.

¹⁰ Ariorica pimpincatsateri covencatatsiri aisati pishinetearirica irisatoncaatempi, ari inquisaquempi Tasorentsi; inquisasanotempi, eiro icavintsaimatimpitsi. Pinguematsicatasanaotaquearo paamari, irineajeitempi maaroni inampire Tasorentsi aisati yora Ovisha.

¹¹ Pincantaitiyempani pinguematsicatearo paamari; eiro otsivacanetitsi, oncantaqueani: quitaiteriqui, tsiteniriqui, peerani catsini. Aitaque inquematsicajeitearo maaroni pincatsatiriri covencatatsiri aisati ishiacantaro, aisati maaroni satoncaajeitarori ivajiro.

¹² Pamene, ariorica pantapinitiro maaroni icoacaimpiri Tasorentsi, aisati ariorica piquemisantasanaotaqueri Jesoquirishito, eiro pishemarotsi; ariorica pinguematsicaitementearo, iro cantaincha eiro patsipetashitarotsi.

¹³ Impoiji noquemaquero aisati Ishire Tasorentsi anta inquitequi, ocantaquena: –Jero oca pisanquenateri: “Inquimoshiretacayeari Tasorentsi maaroni camajeitatsiri, iquemisantirininirica Ivyncatsarite. Queario, inquimoshiretacaasanoteari Tasorentsi, tempa iotiara maaroni yantajeitaqueniri quipatsiqui; irisavicacajeitaqueri cameetsa, irimaoreacaasanojeitajeri”.

¹⁴ Impoiniji namenajaji aisati, jero noneaquero mencori, oquitamarotasanotaque. Aisati noneaqueri shiaqueriri Atiritapaintsiri, isavicaque mencoriqui. Yamatseetacaro iramatseere, vetsicachari oro. Aisati yajiricaquero shiavetarori saviri, otsampitasanotaque.

¹⁵ Impoiniji noneaqueri itsipa nampirentsi, iponeaca ivancoqui Tasorentsi. Antearojenca icajemacotaqueri yora savicatsiri mencoriqui:

–Moncarataca meeca pimpesacotero panquirentsi, sampataque meeca maaroni quipatsiquiniri. Pijate meeca pimpesacotero.

¹⁶ Ari ipesacojeitaquero savicatsiri mencoriqui, peti, peti; yaajeitaquero maaroni panquirentsi quipatsiquiniri.

¹⁷ Impoiji iponeaca ivancoqui Tasorentsi anta jenoqui itsipa nampirentsi. Aisati yamaque iriori shiavetarori saviri.

¹⁸ Jeri ipocaque pashini aisati, iponeaca anta itaapinitironta casancapatsari. Iriotaque taarantirori paitapeerica. Antearojenca icajemacotaqueri ishaninca ajiriquirori isavirite: –Iracaque ovapee: pimpesajeitero maaroni timajeitatsiri quipatsiqui, paayetajero maaroni, pampatotero.

¹⁹ Irosati ipesantarori maaroni ovapee anta quipatsiqui, yaayetajero, yoajiro anta intsinacaitantarori Tasorentsi: ishiacantaquero inquisasanojeiteri coajicani Tasorentsi maaroni tseencajeitiriri.

²⁰ Ari oniri itsinacaitantarori anta oantsiqui, te ari one nampitsiqui. Ari oponeanaca itsinacaitantaroriqui oshequi catsini irajantsi, ooncanaca quipatsiqui; oquimojatanaque, areetacaro ivantequi cavayo. Otsoteanaquero irajantsi 320 quirometero: ojatanaque antoo.

15

Yaajeitaquero inampire Tasorentsi pajoqui oashinoncaajeiterineri atiri.

¹ Impoiji noneaquero anta inquitequi itsipapee, ishiacantiro aisati timayetatsineri coajica. Oshequi noquencheshiretaquero, oshequi noanaquero cavaco. Noneaqueri 7 inampire Tasorentsi, oashinoncaajeiterineri atiri. Irioeitaque vecarayeroneri maaroni oashinoncayerineri atiri; omoncaratapaaquea inquisanaquea Tasorentsi.

² Noneaquero aisati incajare, oshiaquero amenarontsi, oconoaro paamari. Noneajeitaqueri anta otsapijaqui icatiajeitaca caari pincatsajeitiri yora covencatatsiri, jero aisati ishiacantaro; iriojeitaque maaroni caari satoncaatacha ivajiro aisati inomerote. Ari yajiricajeitaquero shiavetarori ijavioqui Tasorentsi.

³ Ipampoyeajeitaquero ivampoyeane Moishishi, yora antaveetinirineri Tasorentsi. Aisati ipampoyeajeitaquero ivampoyeane yora Ovisha. Jero oca ipampoyeajeitaqueri: Novincatsarite, tempa aviro Tasorentsi, oshequi pimayetaque. Oshequi pitasoncantayetaque, noanaquero cavaco pantayetaqueri. Ocameetsayetaque pantayetaqueri, te pamatavitanteji.

Queario, pipincatsariventajeitaqueri savicajeitatsiri maaroni nampitsipeequi, picantani. ⁴Tempa, Novincatsarite, ocameetsati nompincatsajeitempi, aisati iriori maaroni savicajeitatsiri.

Ocameetsati noncamantajeiteri atiri: “Icameetsati Tasorentsi”; tempa queario, picameetsataque.

Imponeajeitanaquea maaroni nampitsipeequi impincatsajeitantempiri.

Tempa iriojeitanaque ocameetsataque pantajeitaqueri.

⁵ Impoiji namenanaaji aisati, noneaquero ashireanaca ivanco Tasorentsi, onta inquite-quiniri. Noneasanoaqueo anta ininta Tasorentsi.

⁶ Itimi pancotsiqui yora 7 inampire, yora oashinoncaajeiterineri atiri. Noneaqueri isoquijanaque. Iquitsaajeitaro quitsaarentsi tsivitamaori, oquitamaromaotasanoaque. Ainiro inejiqui shiirori ishiticatsaqui, yovetsiqueetiro oro.

⁷ Aisati ainiro iriori aparoni virantsi, ipacojeitavaqueri nampirentsi aparopee pajo. Ojaaca pajoqui oja, oashinoncaajeiterineri atiri. Oshiaquantaqueri inquisheri Tasorentsi coajicani tseencajeitiriri. Icantatiani yanei Tasorentsi, eiro icamitsi irinti catsini.

⁸ Oshequi ishiquairei, oshequi itasorencia; ainiro oyachaare, ojaacaro pancotsi. Tecatsi incanteetero inqueajeitero pancotsi, irosati irimatantearori nampirentsi icantaqueriri Tasorentsi.

16

Jaoca ocantari timatsiri pajoqui.

¹ Impoiji noquemaqueri ineanataque anta ivancoqui Tasorentsi. Antearojenca icantiri yora 7 inampirepee:

—Meecaquee pijajeite pisacotero quipatsiqui oja pajoquiniri, irootaque shiaquerori iquisaca Tasorentsi.

² Irosati ijatantaca yora jivatatsiri. Isacotaquero quipatsiqui oja, irosati isompojeitananaca maaroni satoncaajeitarori ivajiro covencatatsiri, aisati maaroni pincatsatirori ishiantaro. Jo, oshequi isompojetanaque; opatsayetanaqueri, ishityetanaque.

³ Impoiji ijataque apitetaintsiri, isacotiro oja anta antearojaqui incajare. Opeanaca, oquempetacaro irirajani camaintsiniri. Icamajeitaque timajeivetachari: shimapee, omapipee, maaroni.

⁴ Impoiji ijataque mavatapaintsiri nampirentsi, isacotiro pajoquiniri anta enipeequi aisati nijatenipeequi. Opeajeitanaca irajantsi.

⁵ Impoiji icantiri:

—Tasorentsi, oshequi picameetsataque; picantani pitimi: peerani, irosati meeca. Ocameetsataque poasanquetaajeiteri maaroni yontapee, irineashiietearota;

⁶ tempa iriojeitaque oajeitiriri quemisantajeitimpiri aisati quenquetsatacojeitimpiri. Meeca pipiatacoventajari, poajeitaqueri. Ineacarove iriori, tempa iriojeitaque oayeri.

⁷ Aisati itimi itsipa anta itaapinitironta casancapatsari. Icantani iriori:

—Queario, Novincasarite, aviro Tasorentsi mayetirori maaroni. Ocameetsataque poasanquetaajeiteri, irineashiietearotave: piotaquero poasanquetaimentiriri.

⁸ Impoiji ijataque itsipa nampirentsi aisati, yora itsipasatitapaintsiri. Isacotiro pajoquiniri anta catsirincaiteriqui, imatantacariri itaajeitaqueri atiripee.

⁹ Ari itaajeitaqueri, irosati iquitsaajeitantariri Tasorentsi: yora tianquiriri oashinoncaajeitiriri. Te inquenqueshirejeiteaji. Te incoajeiteji irojocajero caari cameetsatsi yantayetiri, aisati te incoajeiteji impincatsajeiteri Tasorentsi.

¹⁰ Impoiji yora apapacorotapaintsiri, isacotiro pajoquiniri anta ivincatsarimentoqui covencatatsiri. Irosati otsenitantanaca anta ipincatsaritinta. Oshequi icavintsaajeitanaca, irosati yatsicanenetantanaca.

¹¹ Oshequi iquitsaajeitaqueri Tasorentsi, iquishimentaro isompoppee aisati maaroni iquemaatsicayetacari. Iro cantaincha te inquenqueshiretempaji, te incoajeiteji irojocajero caari cameetsatsi yantajeitaqueri.

¹² Impoiji yora itsipa nampirentsi isacotiro ivajonequiniri anta antearojaqui eni pajitachari Ejarateshi, irosati opirijatasanotantanaca, pirijaiteni. Meeca tecatsi ticajeitavaquerine yora pincatsaripee jivajeiterineri maaroni isoraroteppee. Imponeajeitanaque anta iquenapainta catsirincaiteri.

¹³ Impoiji noneaqueri aisati yora maranque, yora covencatatsiri, aisati yora amatavitantatsiri; iponeajeitaca ivantepeequi mava camaari, ishiapaqueri mashero.

¹⁴ Queario, icamaaritanotaque; itasoncantanirovetaca, imayetaquero caari anepini-jeiti. Ijatashijeitiri maaroni pincatsaripee, icantajeitiri:

—Tsame ancarajeitavacayea, amitacotavacaajeitea amanajeiteri maaroni oijajeitiriri Tasorentsi, antsoncajeiteri, maaroni.

Ja, ariorica impocapaaje Tasorentsi, yora matirori maaroni, irimanatavacaajeitea irioripee. Inquemacojeitero maaroni atiripee irantayetapaqueri Tasorentsi.

¹⁵ Incantapaaque:

—Pamene, oquempetaca coshitantatsiri imapoquiri yora icoshitiri, aisati narori, nomapocajeitapaaquempi. Te piojeiteji jaocarica oncarate nompocantajeiri. Nonquimoshiretacaajeitajeri maaroni aamaajeitanari, quempetarori isaaquiti. Nocoaque

incameetsajaitanaque, eiro yantapinitirotsi caari cameetsatatsi. Inquempetacantea iquitsaata cameetsa, tecatsi neatsempequiterine eiro ipashiventantaja.

¹⁶ Iro cantaincha yora camaaripee yapatojeitaqueri maaroni soraropee anta nampitsiqui ipajitiri jorio Aramaqueroni.

¹⁷ Impoiji yora nampirentsi sietetapaintsiri: yora caratapaintsiri. Isacotiro ivajonequiniri anta tampeaqui, irosati noquemantacari timatsiri anta ivancoqui Tasorentsi, savicatsiri ivincatsarimentoqui. Antearojenca icantaque:

–Moncaratapaaca, aitapaji.

¹⁸ Impoiji oshequi iporequi, porec, porec; aisati antearojenca itirei, tiiririri. Aisati antearo catsini onicaca quipatsi. Te aneapiniteroji quempetearoneri oca. Antearo onicaca catsini: nica, nica, nica, nica.

¹⁹ Irosati oporocajeitanaaca maaroni pancotsipee anta Vavironiaqui, aisati maaroni otsipapeequi nampitsi, otsoncajeitaca maaroni, poyere. Iquenqueshiretaquero Tasorentsi maaroni yantajeitaqueniri vavironiasati, irootaque iquisasanojeitancariri, yoashinoncaasanojeitaqueri.

²⁰ Opeajeitanaca maaroni ovoyejapee; aisati otishipee, opeajeitanaca, maani.

²¹ Jero aisati opariaque iriniqui, iro cantaincha antearo onasanotaque catsini. Otenataque apaitsoquironi 40 quiro. Oponeaca inquitequi, opariaque atiriqui, oshequi otsoncajeitaqueri. Oshequi itsaroacaajeitacaro iriori, irosati iquisatsajaitancariri Tasorentsi.

17

Iquenquetsatacotiri vavironiasati, irashinoncaajeitanaquea, coajica.

¹ Impoiji ipocashitaquena aparoni nampirentsi, sacotirori pajoqui. Icantaquena:

–Caatanaque aca: nonijayempiro jaoca incanterori Tasorentsi ora antajeitiriri shirampari, savicatsiri enipeequi, jero nijateenipeequi. Iroasanquetayero.

² Yantajeitaquero ivincatsaritepee itsipapee atiri. Oamejeitaqueri maaroni atiri yantapinitiro caari yai.

³ Impoiji yaanaquena anta caaraiteriqui, otimi anta onijaquenari Ishire Tasorentsi. Noneaquero tsinane, oquijacotacari covencatatsiri, quitioncatatsiri: otimi 7 iito, jero itseequi 10. Isatoncaayetaca ivatsapeequi: ocantimatiri Tasorentsi isatoncaaro.

⁴ Oquitsaatacero tsinane quiraanirori aisati quitioncari. Oaneencayetacaro oro, jero mapi shipaquireatsiri aisati quitamaroquiri. Ajiriquiro otsotane, yovetsiqueetiri oro; ojaacaro caari cameetsayetatsi, oshiacaventiro antacajeitiri atiri iquemisantashitaro yovetsicane atiri aisati oamejeitiri imayempitanti.

⁵ Osatoncaataca ovancainaqui: ainiro oshiacantayetaqueeri, iro cantaincha tequera onconijatasanote. Ocanti: “Antearo oni Vavironia, irootaque oamejeitirori tsinane antayetiri caari ai. Irootaque oamejeitiriri oshequi atiri iquemisantashitaro yovetsicashiyetari”.

⁶ Impoiji niotaquero oshinquitaca tsinane. Iro oshinquitacari irirajani quemisantaveitariniri Jesoshi oajeitaqueri. Oshequi noanaquero cavaco, namenasanotaquero, sorererere.

⁷ Iro cantaincha isampitana inampire Tasorentsi:

–¿Paitaquea poantarori cavaco? Noncamantempiro caari piotitiro, aisati noncamantempi caari piotitiri yora covencatatsiri oquijacotacari.

⁸ Itimaveitani yoranqui, te aneeriji meeca, itimi meeca omoroqui tsompoina, jatatsiri antoo. Coajica irajeri aisati Tasorentsi, intiancanteariri Sharincaveniqui: anta incantaitiyempani irashinoncayea. Itimaveitani, ipeaca, intimaje aisati; ariorica irineajeitavaqueri tseencajeitatsineri, iroajeitavaqueri cavaco. Peerani, iroaquerani yovetsiquiro Tasorentsi quipatsi, isanquenatiro ivajiropee maaroni jatatsineri inquitequi, iro cantaincha te irisanquenateroji ivajiropee yora tseencantatsiri.

⁹ Pinquenqueshiretasanotero oca noshiacantempiri piotantearori: ora iitopee caratatsiri 7 oshiacaventiro 7 toncaaripee osaviquinta tsinane.

¹⁰ Aisati oshiacaventiri 7 pincatsaripee. Icamaanaque apapacoroni, itimi meeca aparo, coajica intime yora caratapaintsineri. Eiro osamanititsi impincatsariventante yora caratapaintsineri.

¹¹ Yora covencatatsiri, iriotaque aparoni pincatsariveitachaniri nocantaquempiri: “Icamaque”. Iro cantaincha intinaanaje aisati, impincatsariventantaje aisati, impoiji irijate Sharincaveniqui.

¹² Aisati ora 10 itseequi pineajeitaqueri: oshiacantiri itsipapee pincatsarijeitatsine coajica. Incarajeiteri covencatatsiri, impincatsarijeivetanaquea, eiro osamanititsi impincatsariventante.

¹³ Inquempetavacaajeitea pincatsaripee, incantajeiteri covencatatsiri: “Nompincatsajeitempi avirori, nantajeitempi paitarica pincoacaajeitenari”.

¹⁴ Impoiiji inquisajeiteri Ovishatatsiri, aisati oijajeitiriri: irimanajeiveiteari, incoajeiveitea intsoncajeiterime. Iro cantaincha impiajeiteari Ovishatatsiri, intsoncajeiteri irinti. Tempa iriotaque anaacojeitiriri pincatsajeitatsiri, ipincatsaritanoti; iriotaque anaacojeitiriri maaroni savicacantantatsiri, maaroni. Icoyeajeitaqueri maaroni quemisanta-jeitiriri, ipashinitacaajeitajiri, ari quiso yoajeitanajiri iriori, maaroni.

¹⁵ Aisati icantaquena nampirentsi:

—Aisati pineaqueri enipee aisati nijatenipee osavicantari tsinane. Oshiacantaqueri iriori maaroni atiripee savicajeitatsiri jaocaricapee, jaocarica ocantayetari irineaneppee, maaroni.

¹⁶ Aisati itseequipee oshiacantaqueri atiripee quisajeitaquerori tsinane: ora antapinitiriri caari ai. Aisati inquempejeiteri yora covencatatsiri, inquisaqueri iriori. Iroashinoncaero, irisapoquero, iroyeoro ovatsa, intayero.

¹⁷ Irio Tasorentsi quenqueshiretacayerineri inquisajeitero, irimatantearori icoiri iriori. Incantajeite: “Tsame ampincatsajeiteri yora covencatatsiri quitioncatatsiri, anteneri paitapeerica incoacaajeiteeri”. Aitaque incantajeiterori oca omoncaratanteari icantiri Tasorentsi iriori.

¹⁸ Oca tsinane pineaqueri oshiacantaajeitaqueri maaroni savicajeitatsiri nampitsiquinta: yora anaacojeitiriri itsipapee atiri ipincatsariti.

18

Intime oshequi iracojeiterine vavironiasati.

¹ Impoiiji noneavaqueri ipocapaaque itsipa inampire Tasorentsi, iponeanaca inquitequi. Oshequi ipincatsaritapaaque, ishiquaireapaaque, iquitaitetasanotapaaquero quipatsi, yatsioquintapaaquena.

² Antearojenca icajemapaaque:

—Tsoncajeitaca ini maaroni savicajeiveitachaniri Vavironiaqui; oshequi inajeiveitani, oshequi ipincatsariveitani, meeca ipoyereaajeitaca. Irio timapaajantsiri camaaripee inampiniqui, mamaroni, tsivaniniro, maaroni. Iquempjeitacaro tsinane, antapinitirini caari ai.

³ Te oncameetsaveiteani osavique, aisati oamejeitaqueri maaroni itsipapee atiri iquempejeitantarori iriori. Yantajeitaqueroni pincatsaripee; oshequi yaarantaque yora pimantirori ovetsicane, caari cameetsayetatsi.

⁴ Impoiiji noquemaqueri Tasorentsi anta jenoqui, icanti:

—Pisoquijajeitanaje, quemisantaajeitanari: piquempetarocari, pantirocari avirori caari cameetsayetatsi antiri iroori. Picarajeitirocari, noasanquetajeiticari.

⁵ Oshequi catsini antapinitiro caari cameetsatatsi. Eiro nopeacotarotsi antayetaqueri.

⁶ Peerani oshequi oashinoncaajeitaqueri itsipapee, meeca pimpiajeitearo, aiqero pijatiye poashinoncaasanojeitero. Te oncameetsateji antajeitaqueri.

⁷ Peerani oshequi oshemetaqueni aisati oshequi antashiyetacari shiramparipee; meeca aisati onquempetea, oshequi pineacatsitacayero aisati oshequi poashiretacayero. Oquenqueshirevetaca: “Narotaque pincatsaro, te naro camajimentaaro, eiro noashiretatsi”.

⁸ Nomapocaquero noashinoncaasantaquero; oneaqueri oshaninca incamajeite, iracojeiteari, onquemero otashe; onsonquero paamari. Tempa narotaque pivincatsarite, tempa naro Tasorentsi. Ainiro noshintsinca noasanquetantearori.

⁹ Yora pincatsaripee antayetirori aisati antavintsayetirori irineajeitero ontayea, irineero oyachaare; impoiiji iriraacojeitero, iroashiretacotearo.

¹⁰ Areji incatijajeitanaque; intsaroajeitanaque, iramaaquea iroashinoncaajeiteri Tasorentsi iriori. Incantajeite:

—Oo, vavironiasati, pashinoncaajeitacave. Antearo onaveitani pinampi, oshequi picarajeiveitani savicajeiveitachaniri. Imapocaquempi Tasorentsi, itsoncajeitaquempi, maaroni.

¹¹ Ari iriraacojeitaquempi pimantajeitatsiri, iroashiretacojeitaquempi. Peerani oshequi pamanantajeiveitaroni paitapeerica ipayeveitimpiniri, iro cantaincha eiro meeca pamanantajitsi aisati.

¹² Tecatsi incantea impimantempi oro, perata, shipaquireatsiri mapi, quitamaroquiri mapi, tsivitamaori, quifioncaniromaori, quiripemaori, quiraamaori, inchato casancacotari, itseequi quitamarotseequiri isheronqueetiri, pinatachari inchato yovetsiqueetiri, ashroyetatsiri, pinatachari mapi,

¹³ pochapaneri, conoavanetachari yoari, casancapatsari, casancajayetatsiri, ovaja, quejitsi, trico, ovane tirico, vaca, ovisha, cavayo, shiacomentotsi, atiri; queario, ipimantaniroyetiri atiri.

¹⁴ Incante:

—Eiro poajarotsi aisati chochoqui pinintaveitaniri; eiro otimimotajimpitsi aisati pivaararopee aisati poanencayetajeari: ontoncaquea coajicani, poyere.

¹⁵ Yora pimantapiniveitaroniri maaroni oca vaararontsi yaantapiniveitariniri oshequi quireequi; iro cantaincha meeca incatijaiteanaque arejiqui, intsaroajeitanaque, iramaaya aisati iroashinoncaajeiteri Tasorentsi iriori. Iriraanaquea aisati irishencatanaquea, jii, jii, jii. Incante:

¹⁶ —Oo, vavironiasati, pashinoncaacave. Antearo onaveitani pinampi, oshequi picaraveitani savicajeiveitachaniri. Piquitsaajeiveitaroni tsivitamaori, quitioncaniromaori, aisati quiraamaori, poanencajeiveitaroni oro, mapi shipaquearetsiri, jero aisati quitamaroquiri mapi.

¹⁷ Meeca imapocaquempi Tasorentsi, itsonquitaquempiro maaroni, poyere.

Aisati maaroni marinero aisati ashiyetarori pitotsi aapinitirori vaararontsi icatiacojeitaca ivitoqui, arejiqui.

¹⁸ Paricoti yamenacojeitaquero oyachaare, povaa, irosati iraajeitantanaca. Icantajecti:

—Oo, ocameetsaveitani nampitsinta, te ontimeniji quempetearoneri.

¹⁹ Oshequi yoashirejeitanaca, irosati itijainatantaca quipatsi iitoqui. Oshequi iracojeitacaro aisati yoashiretacotacaro, icajemajeitanaque:

—Oo, pashinoncaajeitacave vavironiasati, antearo onaveitani pinampini, oshequi picarajeiveitani. Oshequi ojatapinitini antearo pitotsi anta, ipimantiro ashitarori oshequi ovaararontsi, yaantariri oshequi quireequi. Iro cantaincha omapocanaca otsoncanaca pinampi, maaroni.

Inquimoshirejeitanaque quemisantajeitatsiri.

²⁰ Impoiji noquemaque icanteeti:

—Pinquimoshirejeitanaque, maaroni inquiresati: quemisantajeitatsiri, itiancanenipee Quirishito, camantantaveitachaniri, maaroni. Peerani oshequi oashinoncaajeitaquempi, irootaque ipiatacoventantaquempiri Tasorentsi.

²¹ Impoiji noneaqueri inampire Tasorentsi, shintsitanotatsiri. Yaaquero antearo mapi, ipishoncaquero antearojaqui incajare, pocn. Incanti:

—Noviincaquero mapi, opeasanotaca; tecatsi neajeroneri aisati. Aisati inquempyeetajero Vavironia, intsonqueetajero iroori, poyere; tecatsi neajeroneri aisati.

²² Ainiro aquemapinivetari meeca javioquivetachari, pampoyeajeivetachari, shiovivetachari, voorerovetachari; iro cantaincha coajica tecatsi quemajerine. Ainiro inaveta meeca vetsicayevetarori paitapeerica, iro cantaincha coajica eiro itimajitsi. Ainiro aquemaqueri meeca tononquirori yoyeetari, tonon, tonon, tonon; iro cantaincha coajica tecatsi quemajerine.

²³ Eiro otsiotajatsi aisati itsiomento; eiro itimajitsi aisati aajantsine ijina. Peerani iotacojeitaqueri yora pimantayetatsiri anta Vavironiaqui, oshequi ivioncaqueri iirequite. Yora savicajeitatsiri yamatavijeitaqueri itsipapee atiri,

²⁴ aisati yoacantaajeitaqueri maaroni quenquetsatacotiriniri Tasorentsi, aisati maaroni quemisantatsiniri; irootaque impoyereantajeitariri Tasorentsi maaroni vavironiasati.

19

¹ Impoiji noquemajeitaqueri oshequi catsini inquiresati, antearojenca ipampoyeajeiti: Irove, icameetsasanaotaque Tasorentsi: iriotaque oavisacojeiteeri.

Tsame ampincatsasanojeiteri, tempa itasorentsitanotaque.

² Ocameetsataque yoasanquetaquero antapinitiriri caari ai, iotaquero yantayetiri, tecatsi incomitea.

Oshequi oamejeitaqueri itsipapee atiri yantiro caari yai, irootaque yoasanquetantarori; tempa oneashiitetarove.

Aisati oshequi oashinoncaajeitaqueri quemisantajeitiriri, irootaque ipiatacoventantariri.

³ Impoiji yapijeitajiro:

—Icameetsataque Tasorentsi. Otaasanotaca, oncantaitiyempani oncatiajencatanaque cachaa, eiro opeatsi.

⁴ Ari isavicaque Tasorentsi anta ivincatsarimentoqui. Itiyeroashijeitacari yora 24 savicacaantatsiri aisati yora apitesati virantsi, oshequi ipincatsajeitaqueri. Icantajecti:

—Aitaque ancantajeiteari ampincatsajeiteri Tasorentsi, tempa icameetsataque.

⁵ Impoiiji itimi pashini inquiresati, itimi quempeji Tasorentsi, icanti iriori: Pineacameetsajeiteri Atasorentsite, maaroni antavejeitiriri, aisati maaroni pincatsajeitiriri.

Pincatsaripee, pineacameetsajeiteri; caari pincatsarivetacha, pineacameetsajeiteri avirori.

⁶ Impoiiji noquemajeitaqueri oshequi catsini jenoquisati, antearojenca ineanajeiti, iqumpejeitacaro oshequi ovarijare antearojatatsiri aisati iqumpejeitacaro antearo itirei. Icantajeiti:

Icameetsataque Tasorentsi: ipincatsariventajeitaquee Avincatsarite, oshequi ishintsinca. ⁷ Tsame aveshireimentajeiteari, anquimoshireimentajeiteari maaroni.

Tsame ampincatsajeiteri maaroni.

Meeca omoncarataca irayero Ovisha ijina; vetsicaca ijinatsori.

⁸ Ishinetaquero oquitsaatara quiripemaori, cameetsatasanotatsiri, quitamarotasanotatsiri; te ompitsitimateji.

Ora quiripemaori oshiacantaquero cameetsayetatsiri yantajeitaqueri quemisantajeitatsiri.

⁹ Impoiiji icantaquena nampirentsi:

—Jero oca pisanquenateri: “Irotaintsi iraye Ovisha ijina, aisati inquimoshireventearo, aisati icajemajeitiri oshequi atiri iroimojeiteari. Inquimoshiretasanojeitaque maaroni icajemajeitiri”.

Impoiiji icantaquena:

—Oca nocamantaquempiri, irootaque icantasanotaquenari Tasorentsi.

¹⁰ Ari notiyeroashivetacari nampirentsi, nompincatsaterime, iro cantaincha icantaquena:

—Eiro pipincatsatanatsi. Tempa aquempetavacaajeitaca: narori, aisati avirori, jeri maaroni piyemisantaririnte quenquetsatacotapinitiriri Jesoshi. Aitaque aquempetavacaajeitaca antajeitiriri icoacaajeitaqueeri. Eiro pipincatsatanatsi, irintiquea Tasorentsi pimpincatsate.

Yora quenquetsatacotiriri Tasorentsi, iriojeitaque quenquetsatacotiriri aisati Jesoshi.

Imanatavacajeitaca anta Aramaqueroqui.

¹¹ Impoiiji noneaquero inquite tsoinpoina, jeri noneaqueri cavayo quitamarotasanotatsiri. Ainiro quijacotariri, ipajiyeetiri: Caari Amatavitantatsi; aisati ipajiyeetiri: Tampaticatatsiri. Icameetsataque: te iroasanquetashiteariji atiri, te iroashiteariji. Ioti paitarica yantiri, te inquisashiteariji.

¹² Iroqui oquempetacaro paamari amorequi, yamatseetacaro oshequi amatseerenti. Isatoncaataca ivancainaquu ivajiro, iro cantaincha tecatsi ioterone; apaniro iotiro irinti.

¹³ Iquitsaatacaro ajacachari irajantsi; aisati ipajiyeetiri: Ashitarori Irineane Tasorentsi.

¹⁴ Impoiijeitapaaqueri oshequi soraro jenoquiniri, iquijacojeitacari cavayo; iquitsaajeitaro quiripemaori, oquitamarotasanotaque, te ompitsiteji.

¹⁵ Otimi ivantequi jivajeitiriri ivesamento, tsaampitasanotatsiri impesajeitantariri caari pincatsajeitiri. Impincatsariventasanojeiteri, eiro catsini icavintsaimatiritsi. Yora vetsiquirori ovaja yaaticasanotaquero ova yaajatantacarori oja. Aitaque inquempetaqeriri iriori, iraiticasanojeitaqueri atiri, iriojeitanteari iriori iquisasanojeitaqueri Tasorentsi, yora Shintsitasanotatsiri.

¹⁶ Osanquenataca iitsaarequi jivajeitiriri, aisati ivoriqui, ocanti: “Irio pincatsariventajeitiriri maaroni pincatsaripee, anaacojeitiriri maaroni savicacantajeitatsiri”.

¹⁷ Impoiiji noneaqueri aparoni inampire Tasorentsi catiainchari catsirincateriqui. Antearojenca icajemajeitaqueri maaroni tisonipee:

—Caate, poajeitea. Poajeiteari ivatsa impajeitempiri Tasorentsi; timatsi oshequi poajeiteari.

¹⁸ Poyeari ivatsa pincatsari, ivatsa capitanotatsiri, ivatsa savicacaantatsiri, ivatsa cavayo aisati yora quijacovetariri. Poyeari ivatsa maaroni atiri: pimantaari aisati amanantavetajariri, pincatsaritatsiri aisati caari pincatsaritatsi.

¹⁹⁻²⁰ Aisati noneajeitaqueri yora covencatatsiri aisati maaroni yora pincatsaripee, yatojeitaqueri isorarotepee, maaroni. Aisati yoijataqueri covencatatsiri yora atiri, cantavetachari: “Noncamantempi jaoca icantari Tasorentsi”. Oshequi itasoncantayevetaca, yamatavijeitantariri caari quemisantajeitiri Tasorentsi. Isatoncaajeitaca ivancainaquu yora caari quemisantatsi. Ari ijatashijevetacari irimanajeiterime yora quijacotariri iyavayote aisati soraropee iriori. Iro cantaincha yaavaqueri apite: yora covencatatsiri aisati yora amatavitantatsiri, tapi. Aneatsiquera, yojocaqueri anta antearoqui paamari.

²¹ Irinti itsipapee, ipesajeitaqueri yora quijacotachari, ipesajeitaqueri maaroni, peti, peti, peti. Iro ipesantacariri ivesamento ivantequiniri. Ari yoajeitacaro tisoni ivatsani, iqumasanotacaro.

20

Iquenquetsatacotiro 1,000 osarintsi.

¹ Impoiji noneavaqueri yaniireapaaque itsipa inampire Tasorentsi, iponeanaca inquitequi. Yajiriquireo iyavireantarori omoro quipatsi, jatatsiri antoo. Aisati yamapaaquero antearo carenatsa.

² Yaapaaqueri yora maranque, timitachari peerani. Icanteetiri camaari aisati icanteetiri Satanashi. Ari yoisotasannotapaaqueri, oiso, oiso; oncarataque 1,000 osarintsi iroisoreacotantajareri aisati, coajicani.

³ Impoiji yojocaqueri omoroqui, yashitacotaqueri, iyavitaotaqueri. Tecatsi incantajea aisati iramatavijeitajeri atiripee, oncarataque 1,000 osarintsi. Iro cantaincha impoiji irisouqijanaje, eiro osamanititsi iramatavitantaje aisati.

⁴ Impoiji noneajeitaqueri oshequi savicajeitatsiri ivincatsarimentopeequi: iriojeitaque icantiri Tasorentsi: “Pincantacoventajeiteri maaroni atiri”. Peerani te impincatsajeiteriji iriori yora covencatatsiri aisati ishiacantaro. Aisati te irisatoncaateaji ivancainaju aisati iracoqui ivajiro covencatatsiri. Iquenquetsatacojeitaqueri Jososhi aisati yoametantajeitiro irineane Tasorentsi, irootaque ipesanteetacariri itsanoqui. Meeca itinaajeitanaja, incarajeiteri Quirishito, oncarataque 1,000 osarintsi impincatsariventantajeite.

⁵ Iro cantaincha tequera intinaajeitanaje itsipapee. Ariorica avisanaque 1,000 osarintsi, ari intinaajeitanaje maaroni.

⁶ Oshequi inquimoshirejeitanaque yora jivatasanojeitatsineri intinaajeitanaje: iroameetsatanoteri Tasorentsi. Iriotanaque eiro ijatitsi Sharincaveniqui, irointi impincatsajeiteri Tasorentsi aisati Quirishito, aisati oncarataque 1,000 osarintsi incarajeiteri impincatsarijeitanaque.

Trivecaratantarori irimanatavacayea.

⁷ Ariorica omoncaratapaaquea 1,000 osarintsi, ari iroisoreajeri Satanashi, iroimisoquijajeri aisati.

⁸ Impoiji irijatanaque iriori maaroni nampitsipeequi, intsoteanaquero quipatsi, irampatojeitantarori savicajeitatsiri irimanajeitantarori quemisantajeitatsiri. Icanteetiri yora oijajeitiriri Satanashi: Co, aisati Maco. Incarajeitanaque oshequi catsini. Oquempetaca te amateroji amoncarajeitero ovane impanequi, aisati eiro amatirotsi amoncarajeiteri irioripee, jaocarica incarajeiteri.

⁹ Inquenejeitanaque anta opampaitetinta, irishoncajeitanaqueari maaroni quemisantajeitatsiri, aitaque irishoncajeitaquero Jerosare: ora nampitsi anintajeitaqueri. Irimanajeitapaquerime quemisantajeitatsiri, iro cantaincha omapocanaquea omponeanaquea inquitequi antearo paamari, ontsoncajeitapeeri; ontajeitapeeri, pomein.

¹⁰ Impoiji irayeereri camaari, yora amatavijeitiriri atiri, irosati irojocanteetariri anta antearoqui paamari. Anta incarajeiteri yora covencatatsiri aisati yora amatavitantatsiri, cantavetachari: “Noquenquetsatacotiri Tasorentsi”. Ari oshequi inquemaatsicajeitearo: quitaieriqui, aisati tsiteniriqui; incantaitiyempani.

¹¹ Impoiji noneaquero antearo ivincatsarimento, oquitamarotaque; aisati noneaqueri yora savicantarori. Opeasanotanaca quipatsi aisati inquite, maani.

¹²⁻¹⁵ Aisati noneaqueri maaroni piincajeivetachari incajarequi. Itinaajeitanaja tija-jeivetachari aisati maaroni jajeitatsiri Sharincaveniqui. Queario, noneajeitaqueri: pincatsariveitachaniri aisati caari pincatsaveitachani, icatiimojeitacaro ivincatsarimento Tasorentsi. Impoiji ipenareetaquero oshequi sanquenarentsi. Osanquenajeitaca sanquenarentsipeequi maaroni yantajeitiniri atiripee. Ariorica ocameetsati yantajeitiniri, icanti Tasorentsi: “Nompinateri, cameetsa nosavicacayeri”. Terica oncameetsateji yantajeitiniri, icanti: “Noasanquetayeri yora”. Otimi otsipa sanquenarentsi aisati, ipenareetaquero. Osanquenataca irointi ivajiropee maaroni savicatsineri inquitequi. Yora caari sanquenatacotacha yojoqueetaqueri anta antearoqui paamari: anta yojoqueetiri maaroni tseencantatsiri aisati maaroni camaari. Ipajiyeetiro paamari Inampi Ashinoncaasantachari: yora caari neajeitajerine Tasorentsi.

21

Iquenquetsatacotaquero Jerosare iroaquerari.

¹ Impoiji noneaquero pashini inquite aisati pashini quipatsi, iroaqueratajantsiri. Aitaque opeasanotanaca ora intacaroniri, aisati opeaca incajareni.

² Aisati noneaquero ora Jerosare iroaqueratajantsiri, ora cameetsatasanotsiri, inampi Tasorensi; oponeanaca inquitequi, aniireapaque quipatsiqui. Oshequi oaneencayetaca, oquempetacaro tsinane, irotaintsirica aye ojime, oaneencaca.

³ Noquemaqueri jenoquisati, timatsiri quempeji ivincatsarimentoqui Tasorensi. Antearojenca icanti:

—Pamenajeite: ijataque Tasorensi irisaviquimojeiteri atiri. Quiso iroajeiteri, irishanincajeitanteariri. Eiro yojocajeitajiritsi.

⁴ Iriveshireacaajeiteari, eiro ishinetiritsi atiri irirajeitajea aisati; eiro icamajeitajitsi. Eiro iraacotajaritsi aisati camajantsineri, eiro ishencatajatsi, eiro iquematsicatajarotsi paitapeerica. Aitaque onsonqueari maaroni ocapee.

⁵ Impoiji icanti Tasorensi:

—Pamene, noaqueratacaajeitero maaroni.

Aisati icantaquena:

—Pisanquenatero oca: queario nocantaquempiri, te namatavitempiji.

⁶ Aisati icantaquena:

—Moncarataca, nomataquero. Narotaque intacantarori maaroni, aisati narotaque vecarayeroneri maaroni. Intimerica miretatsineri, nompashiteari irireri; eiro nocoacotiritsi: aitaque nompajeiteri maaroni coiteimojeitacariri.

⁷ Ariorica irantajeitenaro maaroni nocoacaajeitiriri, nompasanojeiteri maaroni coiteimojeitacariri. Nontasonacoventapinijeiteri, aisati nontomintasanojeiteari.

⁸ Irintiquea yora tsaroshenti, tseencantatsiri, antayetirori caari cameetsayetatsi, oantatsiri, antirori caari yai, matsitantatsiri, pincatsatashiyetarori yovetsicayetiri atiri, aisati maaroni amatavitantatsiri, nojocajeiteri antearoqui paamari. Irootaque noshiacontacari irampiitajea incamajeitajea.

⁹ Impoiji ipocashitaquena aparoni inampire, yora icarajeitiri incaranqui 7 ajiriquireori itsotane jaavetchari oja oashinoncaajeitiriri atiri. Icantaquena:

—Caate, nonijayempiro iroaquera aatsiri ojime: irootaque ijina Ovisha.

¹⁰ Itentashiretanaguena anta antearoqui otishi catsini, inijaapaquenaro Jerosare: ora cameetsatasanotsiri nampitsi. Oponeanaca Tasorensiqui anta inquitequi, aniireapaque.

¹¹ Ishipaqueireacaquero Tasorensi, oquempetaca shipaqueireasanotsiri mapi caari aneapiniti, osaancanatanotaque catsini.

¹² Otimi nampitsiqui tantorensi shoncarori, jatatsiri jenoqui. Otimi otantorequi 12 omoropee, yareetapinitantarori nampitsi; itimi anta 12 inampire Tasorensi shentajeitirori. Osanquenataca omoropeequi ivajiropee yora 12 itomini Ishirairini.

¹³ Otimi mava omoropee anta iquenapai catsincaiteri, otimi aisati mava omoropee anta iqueanajinta, aisati otimi omoropee omerequipeequi aisati: jero mava acaqueroca, jero mava antaqueronta.

¹⁴ Otimi ishaaviji antearo mapi caratsiri 12, yoanquetantarori oshanincepee mapi. Osanquenataca antearoqui mapi ivajiropee yora 12 itiancaneepe Ovisha.

¹⁵ Ari yajiricaquero nampirensi imoncaratantarori nampitsi, yovetsiqueetiro oro. Ari imoncarataquero nampitsi aisati tantorensi, aisati omoro iroori, iqueapinijeitantari.

¹⁶ Ainiro omerequi tantorensi ocarati otsipasati, omoncaratavacaaca maaroni. Imoncarataquero, ocarataque omerequi 2,200 quirometero. Aisati oquempetaca ojenoquiteque tantorensi.

¹⁷ Imoncarataquero otontapatsati, ocarataque 64 metro. Ari nosanquenataquempiro icantaquenari yora nampirensi.

¹⁸ Iro yovetsicantarori tantorensi mapi marereayetatsiri, camaranirori. Irointi nampitsi, iro yovetsiqueeyetiri oro, iro cantaincha osaancanataque, maaroni.

¹⁹ Ara tantorensiqui ainiro antearo mapi ishaavijiniri nocamantacotaqueri incaranqui. Oaneencayetacaro marereayetatsiri mapi, pinatananoyetachari: otimi camaranirori, quisaari, quitamaronirori, quenashiri,

²⁰ potsonanirori, quitioncanirori, camarari, cavoreanirori, quiterinirori, quenashinirori, potsonanirori, jero quiraanirori. Ocarataque onashiyeta mapipee 12.

²¹ Ora ashitacoronsi anta iqueapinitantaroriquinta tantorensi yovetsiqueeyetiro mapi quitamaronirori. Iro yovetsiqueetiri ashitacoronsi aparo mapi. Aisati maaroni avotsi anta nampitsiqui yovetsiqueetiro oro, iotaca oro, tecatsi onconoyeari; aisati osaancanatanatanotaque.

²² Te noneeroji nampitsiqui ivanco Tasorensi inquemisantajeitanteari savicajeitatsiri. Aitaque itsoteaquero Tasorensi aisati Ovisha nampitsi, iquemisantajeitacuqueri savicajeitatsiri jaocapeerica. Tempa iriotaque Avincatsarite mayetirori maaroni.

²³ Te intimeji catsirincaiteri irooreantearori nampitsi, aisati te intemeji cashiri quitas-anteterone: tecatsi incoajeitantariri. Tempa itimi Tasorentsi, oshequi ishiquairei oquitaitetantari nampitsi. Aisati iquempeta Ovisha, itsioyetaquero.

²⁴ Itsiojeitiri maaroni atiripee; aisati ivincatsaritepee, ipocajeitapaaque, ipincatsajeitapaquero, icantajeiti: “Tempa icameetsatasanotaque Tasorentsi”.

²⁵ Ametapinijeitaca ashitapinitiro anampi tsiteniriqui, iro cantaincha anta te irashitap- initeroji: tempa ocantani oquitaiteti, te ontsitenitimateji.

²⁶ Queario, ipocajeitaque maaroni atiripee ipincatsajeitakeri Tasorentsi, icantajeiti: “Tempa icameetsataque Tasorentsi”.

²⁷ Iro cantaincha eiro otimitsi anta caari cameetsayetatsi, paitapeerica. Aisati eiro yareetatsi antayetirori caari cameetsayetatsi, jaocarica ocantayetari; aisati eiro yareetatsi amatavitantatsiri. Irintiquea areejeitachane sanquenatacojeitachari anta isanquenar- entsitequi Ovisha. Iriojeitaque savicatsineri Tasorentsi, incantaitatitempani.

22

¹ Impoiji inijaquenaro nampirentsi antearoja eni, saancajatatsiri, icanteetiro: nija oaneantatsiri. Oponeaca ivincatsarimentoqui Tasorentsi aisati Ovisha, ocontejapaaque, chararara.

² Oquenajatanaque nampitsiqui nianqui. Otimi otsapijapeequi inchato, oaneantatsiri. Onashiyetaca oitsoqui, ocarajeitaque 12. Maaroni cashiri onashiyetaca oitsoqui timayetatsiri. Irointi oshi oshiaquero aavintarontsi oavisacojeitiriri maaroni atiri.

³ Eiro otimitsi nampitsiqui caari cameetsayetatsi; tempa anta isaviqui Tasorentsi aisati Ovisha. Impincatsajeiteri maaroni quemisantajeitiriri.

⁴ Irineavorojeiteri maaroni, aisati irisatoncaajeitaquearo ivancainaqu i vajiro, maaroni.

⁵ Eiro otsitenitajitsi aisati, eiro icoajeitajitsi intsiojeitanteari aisati catsirincaiteri. Aitaque intsiotacojeiteri iriori Avincatsarite Tasorentsi. Incarajeiteri iriori maaroni, impincatsarijeitanaque.

Ivecarataquero Joa isanquenare.

⁶⁻⁷ Impoiji icantaquena inampire Tasorentsi:

–Queariotaque oca icantaqueroi Jesoshi, eiro yamatavitimpitsi; icanti: “Eiro osamanititsi nompocantajeiri”. Peerani Avincatsarite Tasorentsi yoamejeitakerini yora camantantatsiniri iquenquetsatantacari. Meeca itiancaquena narori, irootaque noamejeitantaque- mpiri jaoca oncanteari coajica: eiro osamanitanotitsi omoncaratantajeiri.

Iroimoshirencajeiteri Tasorentsi quemisantajeiteroneri maaroni ocantiri oca san- quenarentsica.

⁸ Nopajita narori Joa. Narotaque quemaquerori aisati neaquerori maaroni oca nosan- quenatacotaquerica. Irio onijaquenarori inampire Tasorentsi. Inijantaquenarori, oshe- qui nopincatsataquero, notiyeroashivetacari,

⁹ iro cantaincha icantaquena:

–Eiro pipincatsatanatsi, aquempetavacaajeitaca: tempa arojeitaque antaveejeitiriri Tasorentsi. Narori, avirori, aisati piyemisanrarinteni, yora quenquetsatacantantatsiniri, jeri aisati maaroni quemisantajeitirori oca pisanquenatiri: aquempetavacaajeitaca. Eiro catsini pipincatsatanatsi narori, irintiquea Tasorentsi pimpincatsatea.

¹⁰ Impoiji aisati icantaquena:

–Eiro pimanirotsi oca pisanquenataquero, irotaintsi omoncarataquea.

¹¹ Eirotsitarica omoncaratatsi nocantaquempirica, incanteani irampiitapinitero caari cameetsatatsi yantajeitiri, aiqero irijatatiye. Aisati inquempeteari yora cameetsatatsiri: aiqero irovaajerori yantayetiri iriori. Yora quemisantanotatsiri incantaitatitempani irimatanoteneri Tasorentsi maaroni icoacairiri.

¹² Icanti Jesoshi:

–Eiro osamanitanotitsi irosati nompocantajeiri. Ariorica nareejeitapaaquempi, nompinajeitapeeri maaroni antajeitaqueanarori nocoacairiri.

¹³ Narotaque intacantarori maaroni, aisati narotaque vecarayerone maaroni. Noji- vatanotaque notimini, eiro nocamitsi, irosati noncanteani nontime.

¹⁴ Noimoshirencajeiteri maaroni quivajeitirori iitsaare, impoiji noshineteri iroajeitearo oitsoqui inchato oaneantatsiri, aisati noshinejeiteri irisavicajeite nonampiqui: inquea- jeitapeero omoro iqueapinijeitantari.

¹⁵ Anta saiteriqui itimi teencantatsiri, matsitantatsiri, antayetirori caari cameet- sayetatsi, oantatsiri, pincatsatirori yovetsicashiyetari atiri, coatsiri iramatavitea irisati, amatavijeitiriri itsipapee, maaroni. Eiro yareejeitarotsi irinti nonampiqui.

¹⁶ Narotaque Jesoshi. Notiancaquempiri nonampire, icamantaquempiro noneane po-
vaajeitanteanariri quemisantajeitanari. Narotaque vetsiquiriri Iravirini, aisati narotaque
ishanincani. Noshiacantaqueri impoquiro yora arimampoquitatsiri oquitaitetamani.

¹⁷ Ishire Tasorentsi aisati ijinatsori Ovisha, ocantajeitiri:

—Caate, Novincatsarite.

Tsame maaroni quemajeitirori, pinquempejeitearo, pincantajeite:

—Caate, Novincatsarite.

Aisati avirori, jaocarica pisavicajeitiri: ariorica piquemaquero pitashe, paventeari.
Janicarica coaintsine irire, paventajeiteari: impaquempi nija oaneantatsiri, tecatsi incoa-
cojeitempi.

¹⁸ Jeroca noncamantajeiteriri maaroni neanateroneri oca sanquenarentsica. Moncar-
ataca, ari ocarati. Tecatsiya pisanquenataje aisati. Ariorica povaajero, iroasanquetasan-
otempi Tasorentsi: iroashinoncaasanotempi onquempetea yoashinoncaasanojeitaqueri
maaroni oquenquetsatacotaqueri oca.

¹⁹ Aisati oquempetaca, pipeajirocari sanquenarentsica. Ariorica pimpeajero paitapeer-
ica, eiro ishinetimpirotsi Tasorentsi oitsoqui inchato oaneantatsiri; aisati eiro pineirotsi
inampi Tasorentsi, oca oquenquetsatacotirica.

²⁰ Yora oametaquenarori oca icanti:

—Queario, eiro osamanititsi nompiantajeari.

Aitaque incanteari. Caate Novincatsarite Jesoshi.

²¹ Nocoaque irineshinoncatasanojeitempi Avincatsarite Jesoshi. Aitaque incantap-
initeani.

Narotaque sanquenatirori: *Joa*